


Esuquidistu Chuiquin
Tantiamete



New Testament in Matsés (PE:mcf:Matsés)

Esuquidistu Chuiquin Tantiamente **New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

446da786-5bd1-5ffa-85e2-9eff4052cf8b

Contents

| | |
|--|-----|
| Mateyon Dada uaid | 1 |
| Madcosën Dada uaid | 103 |
| Ducasën Dada uaid | 163 |
| Uanën Dada uaid | 261 |
| Esus Chuibenequidon Naid | 336 |
| Doma yacnocquidon Iste | 426 |
| Codinto yacnocquidon Iste 1 | 474 |
| Codinto yacnocquidon Iste 2 | 515 |
| Cadasia yacnocquidon Iste | 539 |
| Epeso yacnocquidon Iste | 556 |
| Pidipos yacnocquidon Iste | 571 |
| Codosas yacnocquidon Iste | 581 |
| Tesadonica yacnocquidon Iste 1 | 591 |
| Tesadonica yacnocquidon Iste 2 | 600 |
| Timoteyon Iste 1 | 605 |
| Timoteyon Iste 2 | 618 |
| Titon Iste | 627 |
| Pidemonën Iste | 633 |
| Ebedeyon Isadaidbon Iste | 636 |
| Santiacon Dada uaid | 666 |
| Petedon Dada uaid 1 | 677 |
| Petedon Dada uaid 2 | 691 |
| Uanën Dada uaidëmpi 1 | 698 |
| Uanën Dada uaidëmpi 2 | 709 |
| Uanën Dada uaidëmpi 3 | 711 |
| Udasën Dada uaid | 713 |
| Esusën Uan Ismiaid | 717 |

MATEYON DADA UAID

Esuquidistun tsusedpabotedi chiaid
(Duc 3.23-38)

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic. ³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmëdpampic. Padesën mado Eston cuëmëdpampic. Estonën madobic Adan cuëmëdquid. ⁴ Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. ⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. ⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. ⁸ Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. ⁹ Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. ¹⁰ Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. ¹¹ Osiasën madobic Econias cuëmëdquid. Aid Econias caid aton matsesadobëdtabi yuanuen Babidonia yacnoquidon aton nidaidën buampampic.

¹² Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmëdpampic. ¹³ Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. ¹⁴ Asodën madobic Sadoc cuëmëdquid. Sadoquën madobic Aquin cuëmëdquid.

Aquinën madobic Ediud cuëmëdquid. ¹⁵ Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. ¹⁶ Acobon madobic Ose cuëmëdpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquio nec. Isadaidbon cainaidquio nec.

¹⁷ Aidedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Econias aton matsesbëdta buanaid ënquin chiombi. Adoshombic Econias ënquin chuiboed chuioaquin padpiden bedanquin aton matses 14tedbidi chuiquin Esusquiobi ënquin chiombi.

Esuquidistu tishaid

(Duc 2.1-7)

¹⁸ Nëbi aid tishaidquio chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash. ¹⁹ Usundoacsho isun abi inuequidën Osen dada utsin chudaïd danec: —“Nëbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bëdambo icquid icquin naden chiambo icpac caondash. —Bedabi bacuë usundoaque. Cuidquimbien ictiad —quequin aton matses chienquio yequi: —Bedenquio icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidën mayan bëdan Ose ushquin ismepac caondash. —Dabid yampidën tsyuecquid icsho mibi chuinu, Ose. Tantia. Chudenquio icquin Nuquin Papan Mayanën Madia bacuë usundomiyaye. Dacuëdenda. Dacuëdenquio icquin Madia min shubuno buanta. ²¹ Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquio iquendac,” quequin Esus cuënta —quequin mayan bëdan Ose ushquin ismepac caondash.

²² Aden mayan bëdan Esus tishte chiacpadomboen Nuquin Papan ambi chiaïd naden dada uamepampic.

²³ “Dadan inacmaidëmbi bacuë usundoshon dada bacuë tishendac.

Aidi Imanued cuënendac.

‘Nuquin Papapadquidquibidi matsesbëd tabadnuec choash nec,’ quequin Imanued cuënendac,”

quequin Esus tishte Nuquin Papan dada uamepampic.

²⁴ Aden mayan bëdan chiac isucunshumbien aidën chiacpadomboen Osen aton shubuno Madia buampac caondash.

25 Buanshun Osen chudenquo icnubi dada bacuë tishpac caondash. Tishacsho Esus cuëmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daëdpactsëcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin ² anocquido chuituidpac caondash. —Min matses isadaidbo chuiquid dapa ictequidquo nëbi tishtsaidëmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bëdamboshë ictequid nec,” quiash aid isnuec chopobi —quetuidpac caondash.

³ Adsho tantiash dacuëdcuededpac caondash abitedimbo. —Padtec. ¿Midapadquid bacuë nependabac? —quecuededpac caondash Edodes isadaidbo ancaquid ambi ancaidobëdi.

⁴ Adshumbien Edodesën abi yacno tsusiobo cho-chomepac caondash. —¿Mitsicquid caique? Tantianu —qeshun abi yacno Moisesën dada uampid chuibanquido abi chuiquid dapabobëdta cho-chomepac caondash. Cho-chomeshumbic: —¿Mitsishunquo Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien: ⁵ —Ai, tantiëmbi. “Nidaid Udeya caid yacno tabadquin shubu daëdpactsëcquid Beden caid yacnoshon aid bacuë tishendac,” quiampicpadëmbi tantiëmbi. Nuquin Papan ambi chiaid nuquin tsusedpa dada uamepampic naden. ⁶ Shubu daëdpactsëcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec.

‘Chuiquid dapa nibëdnuc icsambo iguendac,’ quedenedi mibi yacnoshon chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmendac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoquien Edodesën ambi ancaido isadaidbo ismenquo icquin matses utsibo uispa isquido chomeshun chuimepac caondash. —¿Nëbida tishaid tantiamete uispa isquin tauao? ¿Nëid inchëshën ushëmbida isbeno? ¿Ëndenda isbenonda? En chui. Tantianu —cac chuisho ⁸ tantiashun: —Beden yacno istan. Ano nidshun mimbi chiacpadquid bacuë istan. Aid

bacuë istanec cuenquin ëbi chuibenta. Ëmbitsen istanu. “Nuquin Papan chomiaid chuiquid dapa ictequid bédambo iquec,” quequin ëmbitsen istanu –capac caondash Edodesën muaquimbi. –Cuesunenu –quequimbi adopac caondash.

⁹ Adoquien ushë choacmiuësh bed-bedquesho ambi isbëquin tsibambëboedi uispa tsibanec Beden yacno nidpac caondash. Adec nidnubien uispa shubu ismec nidtuidpac caondash: –Bacuë ictsaïd shubu nëid iquec –quec. ¹⁰ Adsho isashien cuishonquepac caondash uispa isquido. ¹¹ Adash shubun puduedshun isquien aton tita Madiabëd bacuë ictsec. Aid isashic: –Matses chuiquid dapa ictequid nec. Matses bédambo icmetequid nec –quequin aton matsesën nacpadomboen ismequin danëshën sebudpac caondash. Adshumbic ambi bëboed aton na bédambo icquid chicshun menepac caondash nëidtedi. Nèidic shocosh piu. Nèidic bédambo nuadnuc tauitequid. Nèidic bédambo noadec danoshquete. Aidedi menepac caondash. Adoash ushtopac caondash. ¹² Adec ushtoacsho Nuquin Papan ushquin ismepac caondash. –Isadaïdbo ancaquid Edodes chuibidanenda –quequin ushquin ismiac isucunanec abi choboedën nidenquio yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bédan Ose ushquin ismepac caondash. –Isucunanec cuenta. Bacuëmpi aton titabëdta buanec nidaïd utsi Equipito caïd yacno cuenta. Ëmbi chiabi choenda. Anobi tabadta. Edodesën: “Bacuëmpibo cuesun siatanta,” cac chochoeque. Cuenta –quequin Ose ushquin ismepac caondash mayan bédan.

¹⁴ Aden ushquin ismiac isucuntantsequi inchëshëmbi puduanec aton bacuë anibëdta buanec nidaïd utsi Equipito caïd yacno Ose nidpac caondash. ¹⁵ Equipito yacno nidash ambobi tabadpac caondash. Isadaïdbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaïd chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindami,’ quiosh Nuquin Papa,” quequin Nuquin Papan chiaïd dada uapampic.

Bacuëbo dadpen cuesun siatanaïd

¹⁶ Adnubien isadaïdbo ancaquid Edodes: –Uispa isquidon cacuidposhi –quiash comapenec nëishun aton yuabo sondado chuipac caondash. –Uispa isquidon chuibocpadtsëcquid comapenec onquecuenabi ictscquidotedi

dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan –cac cuesun siatampac caondash. ¹⁷ Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

¹⁸ “Abi yacnuësh aton bacuëbo nibëdansho isash isadaidbon chidobo sedenquecuededendac.

Unësaid tantiec baded ënëdenquio yec sedenquebudnendac,” quequin chiampicpadomboen aton bacuëbo nibëdamepac caondash.

¹⁹ Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash. ²⁰ –“Bacuëbo cuesun siatan,” quiondaid unësaccoshe. Min chido min bacuëbëdta buanec min nidaid Isadaid caidën nidoata –caquien ²¹ isucunanec aidën chuibocno buanuec nidpac caondash.

²² Aton nidaidën nidshun aton matsesën chiaid tantiapac caondash. –¿Ada tantio? Udeya yacnocquido ancadened unësaidën mado Adquedayo caid ancanquidquiobidien nechitec –quesho tantiashien dacuëdtampac caondash Ose. Adshobien Nuquin Papan Ose ushquin ismeoapac caondash. –Cuesunenushë. Min nidaid Udeya caidën nidenda –quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash. ²³ Uquëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

3

Uan acten mentoanquidën chuibeniaid
(*Mad 1.1-8; Duc 3.1-9, 15-17; Uan 1.19-28*)

¹ Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash. ² Adquid icquin Esus chote chuibampac caondash naden. –Mibi icsaid ënash bëdamboec tabadta. Nuquin Icbombo choeque –quequin chuipac caondash. ³ Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac mat-ses chosho chuibenendac.

‘Chuiquid dapa choeque. Podqued andëdbanshunta,
quiachimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”
quequin Isayasën Uanën chuite chuipampic.

⁴ Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsipantebic nidaidën capuquid yua bitsi nacnenaïd tsiupondash. Aton pete bacumbëd shioshbimboecquid icpondash. ⁵ Aidën Nuquin Papan chiaïd chuibenesho tantianuec nëïdtedi matses cho-chopac caondash. Nëïdic shubu dadpen icquid Edu-saden caïd yacnocquido. Nëïdic nidaid Udeya caïd yacnocquido. Nëïdic acte Odan caïd cuëman tabadquido. Aidtedi cho-chopac caondash. ⁶ Cho-choshon Uanën chuïsho tantiash: — Nuquin Papan chiaïd niac-niaquec icsapobi. Icsaboedi aid tantiec bëdamboec tabadtiadquïo iquebi —quesho: —“Nëïd Nuquin Papa tantianu,” quequid nec —quequin acte Odan caïdën mentopac caondash Uanën.

⁷ Adnubien padiseyobobëd saduseyobo Uan isec cho-chopac caondash. Padiseyobo isadaïdbo tsusedpabon chiaïd namequido nec. Saduseyobobic: —Matses unësaid uincuenenquïo iquendac —quequido nec. Aïdo cho-chosho isun Uanën: —Nisibimboecquido mibi nec. Adquidën icsa uachimboen matses icsa uaquido mibi nec. Bëdambo icquid damianquiec mibi iquec. “Nuquin Papan mibi cuidnushe. Tantiatan,” quequin ¿tsuntsin chiac cho?
⁸ Mentomete bunec Nuquin Papan chiaïd niac-niacboedi ënash bëdamboec tabadta. ⁹ “Ëbipadquid Abadauanën tsyuecquidouditsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquïdien Nuquin Papan bëdamboen isec. Mimbi bëdamboen tantiatiapimbo icsho isun nëïd cuënotebi matses uashun Nuquin Papan Abadauampadquid abi tantiaquïdombo icmetsiash icnushe. Nuquin Papambo tantiata. ¹⁰ “Icsambo icquid nec,” quesshun ambi nitsinaïd cuëte bacuësa dëdshun nëdëncacimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chiec.

¹¹ Adshumbic padpiden chuïquin Esusën nate chuipac caondash. —Nuquin Papa tantianuequid acten mentobanquin chuïbanquid nebi. Padnuen con tsyuecquid choshon aidëntsen chuïbanendac. Èbi bëdiactsëc tantiaquid ictsëcnuc aidquien comapenen tantiaquidquïo yec bëdamboshë iquendac. “Aïdquïo bëdamboshë icquid icnuc ¿atotsieshun icsaquidquïobi: ‘Aïd choec,’ quequin

chuiquidquo Nuquin Papan ëbi icmeposh?" quec tsadebi. Ëmbi chuiboed choshon: "Ëbi tantiaquid nec," queshun aton Mayan menequin bédamboec tabadte mibi tantiamendac. Abi tantiesaboen cuidendac. ¹² Piacbo choeshashun putu bushcaquin secacimboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

Uanën Esus mentoaid

(*Mad 1.9-11; Duc 3.21-22; Uan 1.32-34*)

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: — Ëbitsen mento —quetuidpac caondash. ¹⁴ Adshobien Uanën: —Padenquio iquembi. Nuquin Papan chomiaid icquin mimibi ëbi naquien bédambo ictsiash. ¿Atotsieshun ëbi aden chie? Padi —queshobien: ¹⁵ —En na. Bédambo iquec. Ëbi mentoquin mimbi Nuquin Papan chiacpadomboen natsiaque. Ëbi acten mento —quesho tantiashun Esus acten mentopac caondash Uanën.

¹⁶ Adoac Esus pudundonobien canchedac bimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec. ¹⁷ Adnubien abucüëshquio Nuquin Papa onquiampac caondash. —Nëid ëmbi tantiaidquo con Mado nec. Ëmbi chiacpadomboen nasho isash bédambo iquebi —quepac caondash Esus caic.

4

Satanasën Esus icsamenuequin tanuidaïd

(*Mad 1.12-13; Duc 4.1-13*)

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënquid Satanäsën Esus icsamenuequin ma tanu —quequin ambo nidmepac caondash.

² Adoquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcnuc 40tedec ushquin penquio yec comapenec bumpac caondash. ³ Bunec tsadshobien Satanäsën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: "Pete icta," cata —caquien ⁴ Esus: —Padi. Nuquin Papan chiaïd dada uapampid nad iquec. "¿Peteuidi tantiecta matses bédamboec tabadpec? Nuquin Papan chiacpadomboenuidi naiquien matses bédamboec tabadtsiash," quequin dada uapampid iquec —quepac caondash Esus.

⁵ Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashu-
naid macano Satanasën Esus manidtomepac caondash abuc-
quio. ⁶ Adotanquimbien padpiden chuiuoquin: —¿Nuquin
Papa caidën Madombobida mibi neque? Aidën Mado yec
nëuëshquio pudunta. Nuquin Papan mibi paëdmenquio ictsi-
ashe. Nadentsen Nuquin Papan chiaid dada uapampic.

“ ‘Uidën uata,’ quequin ambi abi yacnoshon uaido mayan
bëdabo Nuquin Papan chiac mibi uidën uaindac
paëdenquio icnuc.

‘Cuënoten tadquëdnushe,’ queshun adoendac,”

quequin Nuquin Papan chiaid dada uapampique. Pudunta
—caquien ⁷ Esus: —Padi. Nuquin Papan chiaid dada ua-
pampid nad iquéc. “ ‘¿Icsamboen tantiaquin ëmbembi nashod-
abi Nuquin Papan cuidpatsiashe? Tanu,’ quenda,” quequin
dada uapampique. Padi —quepac caondash Esus.

⁸ Adoaquien Satanasën padpiden buanquin macuësh dapa
abucquiocquid manidtomeshun nidaid abichobi Esus is-
mepac caondash. Chuiquid dapabotedi ismequinc aidobëd
icquido ismequinc aidon dayun uaidtedi ismequinc capac
caondash. ⁹ Adoshombic: —Nëidtedi mibi menetsiambique.
Ëbi con icbo cata. Ëbi aden chuiquin ismënuen danëshën
şebudta. Adsho isun ëmbi ismiactedi mibi menembi. Aidën
icbo mibi icmembi —caquien ¹⁰ Esusën: —Padi. Baded
cuenta. Nuquin Papan chiaidquio chuiquin naden dada
uapampique. “Nuquin Papa abentsëcquiobi mimbi tanti-
aiduidtsëqui min Icbombo neque. Aidën namiaidquio icta,”
quequin dada uapampique. Cuenta —capac caondash Es-
usën. ¹¹ Adoaquien Satanas cuempac caondash. Cuenubien
Nuquin Papan abi yacnoshon uaido mayan bëdabo choshon
abëdi tabadquin Esus bëdambo icmepac caondash.

Cadidia yacnoshon Esusën chuibeniaid

(Mad 1.14-15; Duc 4.14-15)

¹² Adashic aton nidaid Cadidia caidën Esus nidpac
caondash. —Mibi acten mentonaid Uan bedshun quënën
nauedac caosh —quesho tantiash nidpac caondash.

¹³ Nidashic shubu dadpen icquid Nasaded caid yacno
tabadash nidec chian dapa cuëman shubu dadpen icquid
Capednaun caid yacno nidash anotsen tabadoapac caondash.
Aid nidaid Netadi capampic. Aid anoentsëqui icquid
nidaid utsi con tsusedpabon Sabudon capampic. ¹⁴ Esus
ambo tabadte chuiquin Nuquin Papan con tsusedpa Isayas
cuëmëdquid dada uamiampicpadec ambo tabadpac caondash
Esus. Naden dada uapampic.

15 “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

16 Aidtedishun Nuquin Papan chomiaid tantiendac.

Pabiate cuënëdabimboec icsamboec tabadquin Nuquin Papa tantienquo icboedombi tantiabenendac.

Nuquin Papa tantiamenuen chuibansho tantiashun matsesën paposhquiacbimboen Nuquin Papa tantiabenendac.

Abi tantienquo icsho Nuquin Papan cuidtsenaidombi Nuquin Papa tantiabenendac ushash isucunacbimboen,”

quequin Isayas Esus choash tabadte dada uamepampic Nuquin Papan.

17 Ashunquiobi Nuquin Papan chiaid chuiquin tauamboen Esusën matses abitedimbo chuibenepac caondash. — Icsaid ënash Nuquin Papa tantiec ambi chiacpadec bëdamboec tabadta. Nëbi Nuquin Papan abëd tabadtequido icmequin matses bëdamboen tabadmendac —quepac caondash Esus ambibi naid chiequi.

Nuëcquid bedquido Esusën: Cho, caid

(Mad 1.16-20; Duc 5.1-11)

18 Aden chuibenec chian dapa Cadidia caid cuëman nidquin isquien dadan aton utsibëdtambi nëshaid dapambo acte nënepac. Aid Simombidi Petedo capec. Aton utsi Andedes nec. Aid daëdshun nuëcquid bedquidombo icquin aton nëshaid acte nënesho istuidpac caondash Esusën. ¹⁹ Adshumbien Esusën: —Nuquibi icnu. Cho. Nuëcquid bedquid icboedi nëbi ëbi chuibanquid mibi icmenu ²⁰ —caquien aton nëshaid nianec nidquimbi Esus tsibanampac caondash.

²¹ Udictsëc nidquin isquien dada daëd cano antabëdpec. Acobo aton utsi Uambëd icpac caondash. Aton papa Sebedeyo caidbëdi cano antabëdquin nuëcquid bednun aton nëshaid dapa nacenmpac caondash. Adsho istuidshun Esusën: —Nuquibi icnu. Cho —caquien ²² aton papabëdta cano nianec Esusbëd icnuec nidpac caondash.

Matses dadpen Esusën chuibeniaid

(Duc 6.17-19)

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec

puuedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bēdamboen iste matses chuibeniac caondash. Adshumbic daicsaidotedi bēdamebampac caondash. ²⁴ Adosho istanquin: —Bēdamequidquo nec —quequin isboedon Esusën naid chuibenepac caondash. Ēnapen nidec nidaid utsi Sidia caidën nidshun chuibeniac caondash. Aden chiac daicsaidotedi bē-bēpac caondash. Dada paëmboshë icquido yec podobitsi icsa dapuedaido yec unēsanequido yec dada shëquëquenquo icquido yec quenuc bē-bēacsho aidtedi bēdamepac caondash Esusën. ²⁵ Aden: —Bēdamiosh —quequin chiac isec cho-choash dadpenquo tsucus-tsucustsēcquo yec tsidadash niqianquin Esus tsibanampac caondash. Nēidtedshun tsibananac caondash. Nēidic nidaid Cadidia caidën tabadquidon. Nēidic shubu dadpen icquid Decapodis caid yacno tabadquidon. Nēidic shubu dadpen icquid Edusaden caid yacnocquidon. Nēidic nidaid Udeya caidën tabadquidon. Nēidic acte Odan caid uquë cuëma utsiuc tabadquidon. Aidtedshun Esus tsibanampac caondash.

5

Nadquido bēdambo iquendac, quequin Esusën chiaid (Duc 6.20-23)

¹ Matses dadpenshun tsibananac macuësh dapa cuëte nibēdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abēd icquido Esusën dayunquo tabadpondash. ² Adshobien Nuquin Papan matses bēdamboen isquin bēdambo icmete Esusën matses abitedi chuibampondash.

³ —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbemi bēdamboec tabadtiapimbo iquebi. Bēdapenquo iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

⁴ “Matses abitedi icsamboec tabadnuc ëbitsen icsamboec tabadquid nebi,” quec shubiquimbi abi tantiasho Nuquin Papan bēdamboen isquin bēdambo icmendac.

⁵ Aton nauidi tantienquo icquin Nuquin Papa tantiaquin utsibotsen tantiaquid Nuquin Papan bēdambo icmendac. Yuecshun ambi nidaid chuca uaidën tabadmendac.

⁶ Pete bunacimboec ambi chiacpadec bēdamboec tabadte bunquid Nuquin Papan bēdamboen tabadmendac.

⁷ Abi chieshënquidi chieshënenquo icquin bēdamboen isquid Nuquin Papan bēdamboen isendac.

⁸ Ambi chiacpadomboenuidi nate bunquid Nuquin Papan bēdambo icmequin abibi bēismendac.

⁹ Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi adembidi con champi caindac.

¹⁰ Nuquin Papa tantiec bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac. ¹¹ “Esus tantiaquid nec,” queshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso adembidi mibi bēdambo icmendac. Adembidi mibi muauasho Nuquin Papan mibi bēdambo icmendac. ¹² Aden utsibon: “Esus tantiaquid nec,” queshun chieshēnaqui cuishonqueta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Adembidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishonqueta — quequin chuipondash Esusēn.

*Abi tantiaquido bēdamboec tabadte chiaid
(Mad 9.50; Duc 14.34-35)*

¹³ Abi macuēsh dapa poctse tsadquin Esusēn chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yac bimboec icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdambo iquec. Sa batambo icboedi batapenquio yec icsasho ¿mitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adembidi matses bēdamboec tabadenquio yec icsambo icsho Nuquin Papan chian anēdēnquiacno nēsecatequid nendac — quepondash Esus.

¹⁴ Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ¿Nuntanshunda ēapadic? Padenquio. Umanucshumbien ma tantianueshun ēaquid. Adembidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo. ¹⁵ ¿Utsibo chuinuecta abentsēqui uano icpadic? Padenquio. “Ma nēidēn tantianu,” quec aīdbēdi bēdamboec tabadquin chuibanquid. ¹⁶ Adembidi ēbi tantiesabobēd tabadquin: “Ma Nuquin Papa tantianu,” quequin ēnenquio icquin Nuquin Papan chiacpadomboen nata. “Nuquin Papa

bëdambo iquec,' ma utsibotsen quenu," queshun adota — quequin Esusën chuipondash.

Nuquin Papan Moises chuimiaid chiaid

¹⁷ Nadentsen Esusën chuipondash. —Ëmbi chuibansho tantiashun: "Nuquin Papan chiaidquio chienquio iquec," quequin tantienda. "Nuquin Papan Moises dada uamiampidbëdta con tsusedpabo utsibo dada uamiampid chienquio icquin utsi uapec," mimbi ëbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebique. ¹⁸ Abimbo chuinu. Tantia. Abubëdta nidaid nibëdamiabi icnuc Nuquin Papan chiaid bënudtiapimbo iquendac. Ambi chiactedimbo naquin Nuquin Papan nainendac.

¹⁹ Padnubic Nuquin Papan: "Nadomboen nata," quequin chiaid abentsëqui niacquin aid chiaidbidi adomboembidi niacmequid Nuquin Papan: "Bëdambo icquid nec," catiapimbo iquec. Utsibic Nuquin Papan chiacpadec tabadec: "Nuquitsen bëdamboec tabadnuna," quequid abi yacno nidacsho Nuquin Papan: "Bëdamboshë icquid nec," caindac. ²⁰ Moisesën dada uampid chuibanquido padiseyobobëd Nuquin Papa yacno puduedtequidoen mimbi dampec. Aido bëdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bëdamboec tabadquidien puduedtsiash —quequin chuipondash Esusën.

Chieshëmënquido nëish bëdante chiaid

(Duc 12.57-59)

²¹ Adshumbic Esusën padpiden chuiopondash. — Nuquin Papan chiaid chuiquin isadaidbo tsusedpabon: "Cuesunenda. Cuesunianquid Nuquin Papan chiacpadomboen matses cuidte chuiquidën cuesunemequin cuidquid," quequin chuipampid mimbi tantiec. ²² "Nadquidotsen cuidtequido nec," quequin chuinu. Tantia. Aton matses nëishënash aton nëish bëdanenquio icsho Nuquin Papan cuidtequido nendac. Utsibic chieshëmë nec icsamboec cuëmënquido isadaidbo tsusiobon cuidacsho isun: "Bëdamboen naic," catsiambi. Nëidic aton matses chieshënquin shëpiaquid Nuquin Papan icsano nësecaquin cuidtequido nendac. ²³ "Chieshëmënquid Nuquin Papan cuidtequid nendac," quequin ëmbi chuisho tantiashun bëdamboen nata. Nuquin Papa tabadte shubu uashunaidën puduedash: "Ambi chiacpadomboen musuc menenu," mibi quepec. Aden musuc menenumbi mimbi naid tantiata. "¿Ada ëbi

chieshënquid icpec? ¿Ëmbi chieshëmeboedta icpec?” quequin tantiata. ²⁴ Adshun: “Ai, ëmbi chieshëmeboed iquec,” queshun Nuquin Papa tantiaquin mimbi bëboed meniabi mibëd chieshënamboed yacno nidash aibdëd bëdamboec onqueta. Adec bëdamboec onquiash padpidec choashun Nuquin Papa tantiaquin meneta. Adec mibëd chieshënamboedbëdi bëdamboec onqueta.

²⁵ Mibëd chieshënamboed utsimbic: “Nëid cuidmenuen cuidte chuiquid yacno buanchitembimbi iquec,” queshun: “Baded nid,” cac podquedën nidec aibdëd bëdamboec onquenidta: “Ma nëish bëdanu,” quiash. “Matses cuidte chuiquidën cuidchitoshe,” quiash badedquio mibëd chieshënamboedbëd bëdamboec isnanta. Abi yacno buanacsho cuidte chuiquidën: “Icsambo iqueque. Quënën nauedta. Ëmbi chiacted piucquid ëmbi bedabi icnuc ma tsadpanu,” mibi catsiash. Quënën nauedshun ²⁶ ambi chiacted piucquid nibëdnuc mibi cuemenquio ictsiash. Mibëd chieshënamboedbëdi bëdamboec onqueta. “Nuquin Papan adembidi cuidnushe,” quiash adta –quequin Esusën chuipondash.

Icsaquin chudaid chiaid

²⁷ Adshumbic naden Esusën chuipondash. –Chiaid utsitsen mimbi tantiec. “Min chidopenquio chudenda. Min bënëpenquio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic. ²⁸ Aden chiaid niacniaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquio tantiequi matses icsapec. ²⁹ Ëshën isec mibi min chidopenquio bunec icsaic. Ëshë chicshuniac bimboec icsainquio yec ënëdash mibi bëdambo ictsiac. Icsaid ënenquio icquid Nuquin Papan chian anëdënquiacno nësecaquin cuidendac. ³⁰ Min chidopenquio chudte bunquin mëismec mibi icsaic. Mëteshuniac bedtiapimbo yac bimboen mibi icsaid ënta. Ënenquio icquid Nuquin Papan cuidendac –quequin Esusën chuipondash.

Aton chidobëd cuëshëdte chiaid

(Mat 19.3-9; Mad 10.11-12; Duc 16.18)

³¹ Nadentsen Esusën chuipondash. –Nuquin Papan Moises chuimiaid utsitsen mimbi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. ³² Utsitsen chuinu. Aton chidon bënëpenquio chudmesho istuidshun

Moisesën chiacpadomboen nac bēdambo ictsiash. Aton chido dada utsi chudmesa icshobi dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidtsen icsatsiash — quepondash Esus.

Abimbo chiacbimboen chienda, quequin Esusën chiaid

³³ Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “Nuquin Papa utsi uatiapimbo yacbimboen abimbo caimbi,’ quequin chiaid niactemaid nec. Niacsho Nuquin Papan cuidendac,” quequin Moisesën chuipampic. ³⁴⁻³⁶ Aidën chiacpadec muainquo ictiadquidi mimbi abimbo chiacbimboen utsi uain icsamboen chiec. “Abi cuēmēdquid cuēnec muasho ēbi cuidtsiash. Nuquin Papa cuēmēdquid cuēnenquo yec muasho Nuquin Papan ēbi cuidenquo ictsiash,” qeshun mimbi utsi chiec. “Abu utsi uatiapimbo yacbimboen ēmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacbimboen ēmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacbimboen chienda. “Nuquin Papa cuēmēdquid cuēnenquo iccombi,” mibi quenubi abu abi tabadaid icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bēdamboen namendac yuecshun. ¿Min mapin icboda mibi nedi? Padenquo. ¿Mimbida min mapi masedcamedi? Padenquo. Aton Icbombien Nuquin Papan naique. Abimbo chiacbimboen icsamboen chienda. ³⁷ Adec muainquo icquin abimbo chuita. “Ai, adembi naimbi,” quequin mimbi chiacpadomboen nata muainquo icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidën Satanasën tantiamiacpadec mibi muapeque. Adenda —quepondash Esus.

Chieshēnec cuidnanenda, quiaid

(Duc 6.29-30)

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshēnquin ēshē ansiac adecbidi cuidnanec ēshē ansenanquid. Chieshēnquin sēcsiac adecbidi cuidnanec sēcsenanquid,” quequin chiaid icnuc ³⁹ utsitsen chuinu. Tantia. Mibi cuesquid cuidenda. Chieshēnaqui cuidnanenquo icquin adembi bēdamboen ista. ⁴⁰ Min matses: “Ēbi cuidquin mimbi ēbi meniambo iqueque. Min dashcute beccho,” qesho

mimbi menenquio icsho isun: “Cuidte chuiquid yacno buanshun dashcute dachicmechitomane,” quesho aid dashcute meneshumbic min dashcute utsitsen chicshun meneta. Adec bēdamboec tabadta. ⁴¹ Utsibic: “Nēbi nidtuidquin con na buanec nid,” quequin ancabudac nēbi nidtuidenquio icquin udimbo buanshunta. ⁴² Aton na nibēdquid: “Mitsana beccho,” quesho meneta. Utsibic: “Mitsana buanshun bēuaindami,” quesho: “Padi,” cainda. Meneta. Aden bēdamboen nata — quepondash Esus.

Chieshēnquidobi bēdamboen iste chiaid
(Duc 6.27-28, 32-36)

⁴³ Adshumbic abi macuēsh dapa poctse tsadquin bēdamboec tabadte Esusēn chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tanti-aquidombo tantiakin mibi chieshēnquido chieshēnta,” quequin chuipampic. ⁴⁴ Utsi mibi chuinu. Tantia. Mibi chieshēnquidobi bēdamboen isquin tantiata. Chieshēnaqui: “Ēbi chieshēnquid bēdamboen ista, Papa,” quequin Nuquin Papa chianeta. ⁴⁵ Aden chianec Nuquin Papabimboec mibi ictsiac. Mibi utsibo bēdamboen nashunquid ictsiac. ¿Bēdambo icquido yacnoidida Nuquin Papan ushē chēncamepadic? Padenquio. Icsaido yacnotsen ushē chēncamec. ¿Bēdambo icquido yacnoidida ue chomepadic? Padenquio. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec. ⁴⁶ ¿Mibēd tantiananquido min shubun icquidoudi mimbi bēdamboen nashunsho isunda Nuquin Papan mibi: “Bēdambo iquec,” capec? Padenquio. Mimbi icsambo iquec caidontsen ambi tantiaino nashuntsiashe. Aidombien piucquid bedshumēnquido icquimbi aton shubun icquidoudi nashuntsiashe. Aden nainda. Utsibotsen bēdamboen nashunta. ⁴⁷ ¿Min shubun icquidobēduidida mibi onquec tabadpe? Nuquin Papa tantiesaboen adpec. Utsibotsen bēdamboen ista. ⁴⁸ Nuquin Papabimboec icta. Bēdambo icquid icta. Bēdambo icquidobēdta icsambo icquidobi Nuquin Papan bēdamboen tantiacpadomboen utsibotsen bēdamboen tantiata — quepondash Esus.

6

Utsibo bēdamboen nashunte chiaid

¹ Adshumbic abi macuēsh dapa poctse tsadquin Esusēn chuipondash. —Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bēdamboen istiapimbo

iqueque. “Utsibo nashunu,” quequin utsibo ismenquio icquin nata. ² “Aton na nibèdquido menenu,” qeshun utsibo ismequin menenda. Ismenquio icquin meniac bédambo ictsiash. “Nuquin Papa tantiaquid nebi,” quec muaquidèn nacpaden nainda. Nuquin Papa tantiaquid damenuembien muaquidèn matses dadpen yacnoshonuidi menedenepec. Adosho isun aton matsesènuidi bédamboen isnubi Nuquin Papan bédamboen istiapimbo iquec. ³ Aton na nibèdquido menequin utsibo ismenda. Meneshun: “Menebanombi,” quequin utsibo chienda. ⁴ Adsho isun mimbi utsibo ismenquio icquin naid tantiaquid icquin Nuquin Papan bédamboen isquin abèdi mibi tabadmendac –quequin Esusèn chuipondash.

*Nuquin Papa chianete Esusèn chiaid
(Duc 11.2-4)*

⁵ Adshumbic Nuquin Papa chianetetsen Esusèn chuipondash naden. –Bédambo icquid damianquidèn nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidtoshon comapenec onquequin Nuquin Papa chianepec. Adash umanuc puduenshun matses dadpen ismenuenuidi padpiden adembidi chianec. Adquid aton matsesèn: “Bédambo iquec,” canubi Nuquin Papan padenquio iquec. Bédamboen istiapimbo iquendac. ⁶ Mibi adenda. Utsibo ismenuenuidi nainquio icquin matsesèn isacmaidquio Nuquin Papambo tantiaquidquin chianeta. Aden chianequid mibi icsho Nuquin Papan mimbi utsibo ismenquio icquin naidtedi tantiaquid icquin mibi bédamboen isquin abèdi tabadmendac.

⁷ Nuquin Papa chuiquin bédamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquio chuibudac nuqui tantiaboedèn nuqui nashuntsiash. Padenquio icac nuqui nashunenquio ictsiash,” qeshun Nuquin Papa tantiesabon yuen chuibudacimboen nainda. ⁸ Adoenquio icquin Nuquin Papa chianeta. Mimbi chiabi: “Adopashuni. Aid nibèdnuc unèsebi. Utsi icnuc bédambo ictsiabi,” quequin mimbi otacquo tanti-aid Nuquin Papan tantieque. ⁹ Naden Nuquin Papa chuita. “Bédamboshè icquid icsho matses abitedishunquio mibi tantiapashun, Papa.

¹⁰ Matses abitedishunquio mibi con Icbo capashun. Mibi yacnoshon mimbi uaido mayan bédabon mimbi chiacpadomboenuidi naic.

Adomboembidi mimbi chiacpadomboen matses abitedishunquio napashun.

11 Bumianenda, Papa. Badiadquidën badiadquidënquien con pete icmeta.

12 Utsibon chieshënaqui ëbi cuidnanenquio icsho isun ëbi ic-sashobi cuidenquio icquin ëbi bëdamboen ista, Papa.

13 Mimbi chiaid ëbi niacmenda, Papa.

‘Icsamenushe,’ qeshun Satanas ëbi yuamenda, Papa.

Abitedishun Icbombo yec abitedimbo namequidquio mibi nec, Papa.

Ëmbi mibi chuisho tantiata, Papa.

Ënenquio icquin abitedishunquio: ‘Bëdambo iquec,’ mibi capashun. Padi,”

quequin Nuquin Papa chianeta —quequin Esusën chuipondash.

14 Adashic nadpondash: —Utsibo bëdamboen ista. Cuidnanec chieshënanenda. Cuidnanec chieshënanenquio icsho isun Nuquin Papan mibi cuidenquio icquin bëdamboen istiash. 15 Cuidnanec chieshënanasho isun Nuquin Papan mibi bëdamboen istiapimbo ictsiash —uequin Esusën chuipondash.

Buna mëmunte chiaid

16 Adshumbic utsibo ismenquio icte utsi Esusën naden chuipondash. —Tantia. Nuquin Papauidi tantianuequin buna mëmunquid chuinu. Muaquidën nachimboen ismenda. Muaquido: “Buna mëmunquid nec,” aton matses camenuc abibi maniumëdash nënquidbitsëcquiec mamënenquio iquec. Adec buna mëmunquid tanec muaic. Adsho isun matsesën bëdambo icquid danubi Nuquin Papan: “Icsambo icquid nec,” qeshun bëdamboen istiapimbo iquec. 17 “Nuquin Papauidi tantiaquin nëidtedec ushquin buna mëmunu,” qeshun Nuquin Papambo tantiaquin nata. “Utsibon tantianushe,” qeshun bëdamboen min manëdaid shueshcata. Adash bëdamboec mamënta. Aden utsibo ismenuenuidi nainda. 18 Aden bëdamboen manëdaid shueshcaid isun: “Buna mëmunec nec,” cainquio ictsiash utsibon mibi chuiquin. Nuquin Papambien: “Ëbiuidtsëqui tantianuen naic,” quequin tantiatsiash. Adshun mimbi utsibo ismenquio icquin naidtedi tantiaquid icquin abëdi mibi tabadmendac —quequin chuipondash Esusën.

Nuquin Papa yacno tabadte bunta, quiaid

(Duc 12.34)

19 Adshumbic padpiden Esusën chuipondash. —Ëmbi chui-boedquio tantiashun mimbi dayun uatequiduidi tantienda. Dayun uatequid nadquio iquec. Chodquetequid yec shocosh chiuidtequid yec matsesën ampeshuntequid yec quec ic-sabudtequid nec. Adquiduidi tantienda. 20 Icsabudesambo tantiata. Nuquin Papambo tantiec aïdbëd tabadte bunquin

ambi chiacpadomboen nata. Chodquetiapimbo icquid yec shēnibudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquio tantiata. ²¹ Mibi bunaidquio ēnenquio icquin tantiec mibi tabadtsiac. Nuquin Papabēd tabadte bunquin aid tantiata —quepondash Esus.

Pabiate shēcuē cuembo icquid chiaid
(Duc 11.34-36)

²² Adshumbic abi macuēsh dapa poctse tsadquin utsitsen Esusēn chuipondash. —Pabiate shēcuē cuembo icquin Nuquin Papa tantiaquiec mitsanauidi tantienquio yec mibi bēdamboec tabadtsiac. ²³ Pabiate cuēnēdacimboec yec Nuquin Papa tantienquio yec mitsanauidi tantiec ¿bēdamboecta tabadtsia? Padenquio. Adec mibi icsamboec tabadtsiaque. Adenda —quequin chuipondash Esusēn.

Bedteuidi tantienda, quiaid
(Duc 16.13)

²⁴ Adshumbic naden Esusēn chuipondash. —Mitsanauidi tantiec mibi icsamboec tabadtsiac. ¿“Naic cho,” quequin daēdshun chiacata aid daēdi mimbi nashumpatsia? Padenquio mimbi ictsia. Abentsēc nashunquin utsin chiaid mimbi natiapimbo ictsia. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidsēqui tantiata —quequin Esusēn chuipondash.

Nuquin Papan abi tantiaquido dayun uaid
(Duc 12.22-31)

²⁵ Adshumbic Esusēn padpiden chuipondash. —Ēmbi aden chuisho tantiash dacuēdenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuēdenda. Nuquin Papan nac unēsabi mibi tabadeque. Aidēmbien petebēdta dasiuidte icmeque. “Con na nibēdtsiash,” quiash dacuēdec tabadenda. ²⁶ ¿Uicchunēnda ambibi cuēte ēshē siac bacuēacsho chepadic? Padenquio. Adecbidi ambi pete dayun uatequid shubumpi nibēdec. Adquid icsho Nuquin Papan aton pete bedmec. Uicchun abipadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuēdenda. ²⁷ ¿“Unēstiapimbo iquebi. Dacuēdebi,” quequidta unēsenquio icpadic? Adequi dacuēdquid unēstiashe. Unēsteuidi dacuēdēnenda.

²⁸ “¿Atotsibi dasiuidpeba?” ¿quecta mibi dacuēdec tabadpe? Tantia. Chuinu. “Cuēte bacuēec bēdamboshē isadtsec,” quepec nuquin matses. ¿Aton sedquidi shoyontsēcshun abi dasiuidte

daëdcash dasiuidtsashta bédamboshë isadpadic? Padenquoio. Nuquin Papan uacpadquiobi iquec. ²⁹ ¿Cuëte bacuëec bédamboshë isadquidbimboecta nuquin tsusedpa chuiquid dapa Sadomon cuëmëdquidën dashcute icpampic? Padenquoio. Adpenquien icpampic. ³⁰ Cuëte bacuëec bédamboshë isadboed abadiadtsëcshumbi isac ënden chodquiac. Aid badedquoio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmenquioda icpadic? Padenquoio. Mibi dasiuidte icmeque. Dacuëdenda. Mitsana nibëdquoio icte dacuëdënquimbi mimbi Nuquin Papa bëdiactsëc tantiatseque. ³¹ Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëdenda. ³² Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiaquido yec dacuëdec tabadenda. ³³ Adenquoio yec: “Con Icbo mibi nec, Papa,” quequin ambi tantiacpadec bédamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiashe. ³⁴ Èbi adsho tantiash badiad utsi caic: “Aid badiadën ¿atotsimbi nape?” quec dacuëdenda. Aid badiadën Nuquin Papan ambi tantiacpadomboen mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquoio yec —quequin chuipondash Esusën.

7

Utsibo icsaid chienda, quiaid (Duc 6.37-38, 41-42)

¹ Naden Esusën Nuquin Papan chiacpadec tabadte chuipondash. —Mibi icsaid ucuambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. ² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. ³⁻⁴ ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiashe utsi chuiquin? Padenquoio. ⁵ Abi bëtsiadaid abia bëbedadashien: “Mibitsen bëbednu,” quetsiashe. Adembidi mimbia mibi icsaid ënshun: “Icsaid ënash bédamboequien tabadtiad,” quequin utsibo bédamboen chuita. Bédambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda. ⁶ Mimbi bédamboen chiaqui tantienquoio icsho chuidonenda. Nuquin Papan chiaid chuibudaqui tantiatipimbo icquin niac-niacsho isun adenuidi chuidonenda. Opa icsan abi pemequid piacbimboen mibi chieshëntsiashe. Chanchon icbon dashcute

nebudshun bëchish uaquin tin-tincacimboen Nuquin Papan chiaid niac-niactsiashe. Adquid chuidonenda –quepondash Esus.

Ënenquo icquin Nuquin Papa chianete chiaid
(Duc 11.9-13)

7-8 Nadembidi Esusën chuipondash. –Nuquin Papa ënenquo icquin chuidoneta. Bacuëbon: “En na,” cadoniacimboen chuidoniac Nuquin Papan mibi tantiatsiashe. Adembidi: “Ëbi bëdamboen name, Papa,” mimbi cacpadomboen bëdamboen mibi nametsiashe. Adembidi: “Ëbi nashunquin ëbi bëdambo icmeta, Papa,” quequin chuidoniac Nuquin Papan mibi bëdambo icmendac.

⁹ ¿Icsambo icquidta Nuquin Papa icpadic? Padenquo. Bëdambo icquidquo nec. Bacuëmpi: “Bundobique. Penu. Beccho, papa,” ¿queshoda amën cudasënquin cuënotebi menepadic? Padenquo. ¹⁰ ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic? Padenquo. ¹¹ Matses yec icsaquido icquimbi min bacuëbo abimbo mimbi menenubien Nuquin Papan ambi uaido matses: “Ëbi nashunta, Papa,” qesho tantiashun bëdamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bëdamboen isquin bëdamboen nashunta. Utsibo caic: “Aidon nashumpashuni,” quequin mimbi otacquo tantiacpadomboembidi utsibotsen nashunta. Aden Nuquin Papan chiaid Moisesbëdtan nuquin tsusedpabo utsibon dada uaquin chiampicpadomboen mimbi natsiaque. Aden utsibo nashunta –quequin chuipondash Esusën.

Daëdpactsëcshun Esus tantiabente chiaid
(Duc 13.24)

¹³⁻¹⁴ Adshumbic Esusën naden chuipondash. –Nuquin Papabëd tabadnuec aid tantiec bëdamboec tabadta. Shëcuë aniambo icquidën matses abentse-abentsec puduedacimboec abentse-abentsec Nuquin Papa yacno puduednuec aid tantiec bëdamboec tabadec. Padnuen antied dapan abi maisi nidacimboec matses dadpenquo abi tantiesabo yec Nuquin Papan icsaido nësecacno nidendac –quepondash Esus.

Icsambo icquid nec, quequin tantiate chiaid
(Duc 6.43-44)

¹⁵ Abi macuësh dapa poctse tsadquin naden Esusën chuipondash. –Utsibo: “Nuquin Papan chiaidquo chuiquid nebi,” quec bëdambo icquid damianquid iquendac. Adquid choshon Nuquin Papan chiaid niac-niacmequin

icsamendac. Bëdi dapa nëish yua pete bunquiabimboec mibi icsamete bunquieque. Adquidën chuisho tantienda.¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquio chienquio icsho tantiashun: “Utsi uain chiec,” mimbi catsiac. Chetequid isun cuëte dada matsesën tantiec. Aden tantiec nisanquidën bacuë bësho isash: “Dadainën bacuë nec,” quesa matses nec. Adecbidi echo bacuë bësho isash: “Bata nec,” quesa matses neoaic.¹⁷ Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic.¹⁸ ¿Cuëte bëdan bacuë chetemaidta nepec? Padenquio. ¿Cuëte icsan bacuë chetequidta icpec? Padenquio.¹⁹⁻²⁰ Chetemaidbimboec muaquid bëdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquio chienquio icsho: “Muaquid nec,” quequimbidi mimbi tantiatsiaque. Adquidën chuisho tantienda. Cuëte bacuëesa dëdshun nëdëncacimboen: “Nuquin Papan chiaid chiemi,” quec muaquid Nuquin Papan icsaido cuidacno nësecaindac — quepondash Esus.

*Nuquin Papa yacno puduednu, queuidte chiaid
(Duc 13.25-27)*

²¹ Utsitsen Esusën chuipondash. —Ëbi caic: “Con Icho mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiash? Padenquio. Nuquin Papan chiacpadomboen naquidquien abi yacno puduedtsiash.²² Nuquin Papa yacno ëmbi yuedte ushën matses dadpenshun ëbi chuiuidendac. “Con Icho mibi nec. Mibi caic: ‘Aidën namiaidquio nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,”²³ quesho ëbimbo tantiec Nuquin Papan chiacpadec bëdamboec tabadabi icsho: “Ëmbi tantiacmaidquio mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquio yec bëdamboec tabadta — quepondash Esus.

*Shubu uaquidbimboecquid chiaid
(Duc 6.47-49)*

²⁴ Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bëdamboen natsiaque. Shubu uaquin bëdamboen tantiaquidbimboec mibi ictsiaque. Tantia. Chuinu. Bëdamboen tantiaquidën mananënquio shubu uaquin buintad

nitsinquit. ²⁵ Aden shubu uan ue dapa conquequidbëdi chonoc shubu chimeshadenquo icquid. Shubu nuntan anchiuidenquo icquid. ²⁶ Aden ëmbi chiacpadomboen naquid icnubi utsibo ëbi tantiesa iquendac. Aido shubu uaquin tantienquo icquidbimboec iquec. Tantienquo icquidën nadoquid. Acte cuidi cuëmanquiobi shubu uaquin badedi unëstsëcquidquo cueste nitsinquit. ²⁷ Adquid nitsinaid ue dapabëd conquequid choquin shubu chimeshquid. Adecbidi acte cubudtoquidën shubu nuntan mauanquid. Aden tantesa uatsëcquidbimboec ëbi tantiesa iquec. Adquid Nuquin Papan cuidtequido neque. Ëbi tantiata —quequin chuipondash Esusën.

(*Mad 1.22*)

²⁸⁻²⁹ Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesën chiampid bëdiactsëc tantiatsëcquin chuitsëccosh. Padnuen Esusënquo comapenen tantiaquin chuiposh —quecuededpondash matses dadpenquo.

8

Esusën daicsaid bëdamiaid
(*Mad 1.40-45; Duc 5.12-16*)

¹ Ambobi macuësh poctse tsadquin ënquin chuitanequien Esus macuësh budpondash. Adec budanec nidsho isumbien matses dadpenhun tsibanampondash.

² Adnubien dada ushumbo yec daicsaidquo choshon Esus ismenuen danëshën seabudpondash. —Ëbi bëdamete bunquin mimbi ëbi bëdametsiaque. Ëbi bëdame, Icbo —caquien Esus: ³ —Ai, mibi bëdamete bunebi. Mibi bëdanendac —quequin mishtemaidquiobi mishnubi badedquo bëdampondash daicsaid nibëdquiec. ⁴ Adsho Esusën: —Utsibo chienquo yec nëish yua abided unës uaquido ismenuec nidta. Mibi isash: “Bëdamiaid nec,” quequin ma aidon tantianu. Moisesën chuipampicpadomboen nanuen: “Nuquin Papan bëdamioshi,” quequin Nuquin Papa menetequid buanquin ismec nidta —quequin Esusën chuipondash. Adtanec shubu dadpen icquid Capednaun caid yacno chopondash Esus.

Sondado chuiquid dapan yua Esusën bëdamiaid
(*Duc 7.1-10*)

⁵ Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. ⁶ —Tantia. Chuinu, Icbo. Con shubun icquid con yua shëquëquenquo iccosh. Natiambo yec unëstiadtsëcquo iccoshe. Bëdameta ⁷ —quesho tantiashun: —Ai, bëdamec nidnu. Nid —caquien: ⁸ —Padi. Mibi

bëdamboshë icquidquio nec. Èbibi icsactsëcquid icquin mibi con shubun puduedmetiapimbo iquebique. Nëshunquiobi bëdameta. Nidenquio icquin nëshunquiobi mimbi: “Bëdanta,” cac con yua bëdantsiashe. Mimbi tantiacpadomboen namequidquio mibi nec. ⁹ Èbibic chuiquid dapan namiac sondado utsibo namequid nebi. Èmbi: “Nid,” cac badedi nidec. Èmbi: “Baded cho,” cac badedquio choec. Con yuan èmbi: “Nata,” cac èmbi chiacpadomboen naic. Mibi adquidquiobidi neque. Con yua bëdameta —quepondash sondado chuiquid dapa.

¹⁰ Adsho tantiashun Esusën abi tsibambëquido chuipondash. —Bëdamboen nëidën chuipec. “Comapenen tantiaquin chuiquinuidi con yua bëdametsiash,” quequin èbi bëdamboen tantiaquid nec. Isadaidbo adquid nibëdec. Isadaidbon èbi bëdiactsëc tantiabededtsec. ¹¹ Tantia. Chuinu. Matses utsi icquimbi sondado chuiquid dapan èbi bëdamboen tantiec. Adec nidaid utsi-utsiec yacnocquido isadaidpembo èbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac. ¹² Padnuen Nuquin Papan con matses caido isadaidbo dadpenquio Nuquin Papa yacno puduedenquio iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tènquebudquiendac —quequin abi tsibambëquido isadaidbo chuipondash Esusën. ¹³ Adshumbic sondado chuiquid dapa chuiquin: —Nidec nid. Mimbi tantiacpadec min yua bëdaneque —cac nidshun isquien bëdanac Esusën chuibocpadequi.

Petedon nachi Esusën bëdamiaid
(Mad 1.29-31; Duc 4.38-39)

¹⁴ Adash yuec-yuecpectsëc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. ¹⁵ Uesho istuidshun mëdinquin Esusën bëdamepondash. Aden bëdamiac Esus pemepondash.

Esusën matses dadpen bëdamiaid
(Mad 1.32-34; Duc 4.40-41)

¹⁶ Petedon nachi bëdamiaid inchëshbudtsëqui Esus ismenuequin matses daicsaido dadpen bë-bëpondash. Bë-bëshobien podobitsi icsa dapuedaido comapenec cuëdquin cuemeshumbic daicsaidotsen Esusën bëdamebampondash. ¹⁷ “Nuqui icsaid ucquin nuqui daicsaidobi bëdamiac,” quequin ëndenquio Nuquin Papan Esusën nate Isayas dada uamepampicpadomboen nanuen adopondash Esusën.

Abëd icte bunquido Esusën chiaid
(Duc 9.57-62)

¹⁸ Adashic abi isnuec matses dadpenquoio datsidadsho isash abéd icquido chiec: —Chian potec nidnu. Nid —quianec chian yacno nidec puduampondash Esus. ¹⁹ Puduanec nidaneshobien Moisesën dada uampid chuibanquidën Esus chinuntuidpondash. —Con Icbo mibi caindambi. Mibéd nidendabi —caquien: ²⁰ —¿Ëbédta nide? Tantia. Mibi chuinu. Bédi chëshè shècuën ushquid. Uicchun shubu uash abuc ushquid. Padnueni con shubu nibèdnuc Nuquin Papan mat-sesmiaid yec quenenenquoio yec capucuenendac. ¿Ada mibi adpatsia? —capondash Esusën Moisesën chiampid chuibanquid chuiquin.

²¹ Adnubien abéd capucueboed utsin: —Chiata, Icbo. Con pa unèsoshe. Chococatambono —caquien: ²² —Padi. Cho. Ma unèsaidën tantienquoio yacbimboen èbi tantienquoio icquidon ma papa chococanu. Èbédta bédamboen naic cho —capondash Esusën amè unèsaid chuiquin. Adobidanec nidanepondash chian yacno.

*Natiambo cunquenuc acte tèccuasquiaid Esusën ènèdmiaid
(Mad 4.35-41; Duc 8.22-25)*

²³ Chian budash Esus chedo cano antabèdtopondash. Adashic potenuc puduampondash. ²⁴ Aden potenubi nënantanquoio icnuc cunquetuidpondash. Adnubien acte comapenec tèccuasquiampondash. Adec acte tèccuasquenuc cano acte ancushad-ancushadquiec yampondash cano mentoadtiadtsècquoio yec. Adsho isun abéd icquidon: —Dacuèdampambo iquec —quetanquin isquien Esus ushpec.

²⁵ Adshobien tinquin: —Nuqui mentoadequè. Isucun, Icbo. Baded èbi nashun —caquien: ²⁶ —¿Atotsi quiash dacuède? Èbi bèdiactsec tantiatsec dacuèdquidquoio mibi neque. Istac —quetanec nidtoshon actebèdtabi cunquequid chuipondash. —Padi. Ènèdta —caquien natiambo cunqueboedi badedquoio ènèdpondash cano mentoadtsenquionobi. Actetsen tèccuasquenquoio yampondash. ²⁷ Adsho isashien: —¿Mitsipadquidënquoio actebèdta cunquequid ènèdmepashba? —quecuededpondash Esusbéd icquido.

*Dada daèd dapuduedaido podobitsi icsabo Esusën cuemiaid
(Mad 5.1-20; Duc 8.26-39)*

²⁸ Aden chian potia sh pudundonobien Cadada yacnoquid podobitsi icsa dadpen dapuduedaido dada daèd choshon Esus chuituidpondash. Aid daèd unèsaido chococaid shècuèmbi tabadpondash. Matses cuesunete bunquieci dacuèdampambo icsho isash aid yacno matses nidenquoio icpondash. ²⁹ Aidon podobitsi icsabon oncamiapadomboen comapenec cuèdquin

Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? —capondash dada daëdshun abi oncamequidën chiaid chuiquin.

³⁰ Uano chancho dadpenshun natiacquin udquin pebededpondash. ³¹ Adnubien podobitsi icsabon aid dada daëd oncameoac: —Ëbitedi cuemiac chancho icbo-icboec dapuduedtsiabi —quecuededpondash podobitsi icsabo. ³² Adsho tantiashun Esusën: —Ai, mimbi tantiacpadec nid —cac nidash chancho icbo-icboec dapuduednubi chancho abitedi macuësh budec acte nësebudec mentoadbudnepondash nibëdquiec yec. Adec podobitsi icsabo dapuduenanec nidnubi dada daëd bëdambo yampondash.

³³ Adsho istanequien chancho pemequido aton matses chiec niquianec shubu dadpen yacno nidanepondash. Chancho mentoadbudneboedbëdta podobitsi icsabo dapuduemboed uesquin chuituidpac caondash. —Nuqui dacuëdëmboedobi bëdambo yanosh —quequin ³⁴ chuituidaquien anocquido abitedi Esus isec cho-chopondash. Adec cho-choshombien: —Dacuëdampambo mibi iqueque. Ëbi yacno choenda. Nidec nid —cabededpondash. Adoac Esus nidpondash.

9

Shëquëquenquo icquid Esusën bëdamiaid (*Mad 2.1-12; Duc 5.17-26*)

¹ —Nid —cac nidanec chian budash cano antabëdtoshon chian potiash abi iccondacnobidi Esus choapondash.

² Adnubien utsibon dada shëquëquenquo icquid Esus ismenuen aton uetechobi bëpondash. Bësho isumbien Esusën: —Ëbi caic: “Aidën bëdametsiash,” queshun bëac —quequin daicsaid chuipondash naden. —Dacuëdenda, madosio. Ambi chiaid niac-niaquec icsaboedi cuidmenquo icquin Nuquin Papa mibi bëdamboen ismembique —capondash Esusën.

³ Adsho tantiash aid datsidadash tabadquido Moisesën dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

⁴ Uanuësh adsho ambembi tantiashumbien Esusën aido chuipondash. —¿Atotsi quequin mimbi ëbi chieshëmpe?

⁵ Ambi namiaid icquin ëmbi: “Nuquin Papa cuidmenquo icquin mibi bëdamboen ismembique” cac Nuquin Papan nëid cuidenquo iquendac. Adembidi ambi namiaid icquin ëmbi: “Caputa,” cac nëid capuendac. ⁶ Istac. Mibi ismembique.

“ ‘Nuquin Papan chomiaid nec. Icsaidobi Nuquin Papa bēdamboen ismequid nec,’ mabi canu,” queshun naimbique. Istac –quetanquin dada shēquēquenquo icquid chuiquin: – Caputa –capondash Esusēn. ⁷ Adoac bēdanash aton shubuno nidpondash. ⁸ Adsho isashien: –Adquidshenda nepec. Nuquin Papan namiaid icquimbien adochitec. Abi namequid Nuquin Papa bēdambo iquec –quecuededpondash isquido.

Ēbēd iquec cho, quequin Esusēn Mateyo chiaid
(*Mad 2.13-17; Duc 5.27-32*)

⁹ Adnubini con matses aton piucquid bedshunuec podqued cuēman tsadquid shubumpin tsadpondac. Con matses yuaquid ancaquid dapan: –Min matsesēn na ěmbi chiacledi piucquid bedshun ěbi meneta –cac niondabi. Ambo tsadshobini Esusēn istuidpondash. Istuidshumbini Esusēn: –Nuquibi icnu. Cho –capondash. Adoac badedi tsibananec ¹⁰ nidequi con shubun Esusbēd puduedpondabi.

Adec puduedsho isashien matses dadpen pudued-puduedpondash. Esusbēd pec tabadnuec ěbēdtan piucquid bedshunquidobēdi con matsesēn: “Icsaido nec,” caidombo pudued-puduedpondash. ¹¹ Adsho isumbien Esus chieshēnquido Padiseyobo caidon Esusbēd icquido chuituidpondash. –¿Atotsi quiash mibi chuiquid Esus caid icsaquidobēdi pec tabadpec? Icsambo iquec –capondash Esus chieshēnquidon.

¹² Adsho tantiash Esus nadpondash. –¿Bēdambo icquidta dauēchoquidēn dauē menepadic? Padenquo. Ma daicsaidi dauēchoquidēn menepaid yoc. Adembidi icsaidobi abi icsaid ucquin bēdambo icmenuec nebi. ¹³ Nuquin Papan naden dada uamiampid pausudshun bēdamboen naic nid. “Ěmbi chiacpadomboen abentse-abentsen mimbi naic. Adoquimbi ěmbi chiaid utsi niaquec mimbi icsaido caido mimbi bēdamboen istiapimbo iquec. Adsho isun: ‘Mibi bēdambo iquec,’ catiapimbo iquebi” quequin Nuquin Papan dada uamiampid pausudta. Ēbibi matses bēdamboen ismequid nebi. Muaquido: “Bēdambo icquid nebi,” qesho bēdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquo yec ěnēdta,” canuec nebi –quepondash Esus abi chieshēnquido chiec.

Esusēn buna mēmunquido chiaid
(*Mad 2.18-22; Duc 5.33-39*)

¹⁴ Adnubien Uan acten mentoanquidbēd icquidon choshon Esus chuituidpondash. –Nuquin tsusedpabon nacpadomboen Nuquin Papauidi tantianuen buna mēmunquidquido nebi. Padiseyobo adembidi naquidquido nec. ¿Atotsieshun mibēd

icquidon aden nainquio icpec? ¿Natiapimboda iquec? —caquien ¹⁵ Esus nadpondash. —¿Icbon: “Pec cho,” cacta aid tantiec sedenquecuededquin buna mēmumpadic? Padenquio. Adquidbēdtan pec cuishonquec tabadquid. Icho nibēdanan sedenquecuededquin buna mēmunquid. Ēbi nibēdanan ēbēd icquidon ēbiuidi tantianuen buna mēmunendac —quepondash Esus.

¹⁶ Adshumbic Esusēn naden chuipondash. —Dashcute chuca cuēshun dashcute shēni nedesquiaidbēdta tuscaisa. Aden tuscashun panac shēni badedquio nedesquequid. ¹⁷ —¿“Machi sandono,” queshun tsitsan shēnimbida sandopadic? Padenquio. “Machi sebudnushe,” queshun tsitsan shēnin sandoenquio icquid. Tsitsan chuca daēdcashumbien machi sandoquid —quepondash Esus. —Adembidi tsusedpabon: “Naden nata,” quequin chiaid chienquio icquin ambi bēdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbēd icquido chiec.

Champi uincuemiaidbēdta chido bēdamiaid
(*Mad 5.21-43; Duc 8.40-56*)

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unēstiadtsēcquio iccoshe. Mishec cho. Mimbi mishac bēdantsiashe —capondash. —Mibi con Icho canu —quequin danēshēn sebudquin ismepondash. ¹⁹ Adoaquien Esus aibdēdi nidpondash.

²⁰⁻²¹ Nidnubien chido intac budted-budtedec seta 12tedi matamec bēdanenquio yec nacchoadbudquidēn Esusēn cachoctsēqui choquin: —Bēdamianquidēn dashcute mishec bēdampatsiash icmanendac —queshun ismenquio icquin dashcute cuēmano mishtsac caondash. ²² Adoaquien bidiadquin isun Esusēn chuipondash. —Dacuēdenda. Mibi: “Aidēn nac bēdantsiabi,” quiacpader mibi bēdanendac —Esus quenubi bēdampondash.

²³ Aid bēdamebidanec nidequi chuibante shubun tabadsho isquidēn shubun puduedshun isquien matses dadpen tabadec. Champi unēsacsho isash sedenquecuededec tabadec. Nēidic matses unēsan con matsesēn nacpadomboen shoncate shoncaquido. Nēidic comapenec sedenquecuededquido dadpen. Aidtedi icpondash. ²⁴ Adshobien Esusēn abitedi chuiquin: —Baded umanuc niecun. Champi unēsabi iqueque —capondash. Adoac: —“Champi unēsabi iquec,” quepequien iquec —queshun Esus mamēnshumbededpondash. ²⁵ Niecunan Esusēn champi uiacno quēnēn puduedtanquin mēdinac

champi uincuenash bēdambo yec capupondash. ²⁶ Adsho isun champi unēsaid uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

Bēshuaid daēd Esusēn bēdamiaid
(Duc 18.35-43)

²⁷ Auēshquio puduanec nidshobien bēshuaid daēdshun chinunshun comapenec cuēdquin Esus chuituidpondash. —Dabidēn tsyuecquid Nuquin Papan chomiaid icquin bēdamboen isquin ēbi bēdame —quebud-quebudpondash.

²⁸ Shubu utsin puduedash abēdi tabadshobien Esusēn: —“Ēbi bēdametsiash,” ¿caindabi ique? —caquien: —Ai, adebi —quepondash.

²⁹ Adshobien aid daēdi bēmishquin: —Mimbi tantiacpadece bēdanta —cac ³⁰ bēdampondash. Adsho isun Esusēn: —“Bēdamioshi,” quequin utsibo chienda —capondash.

³¹ Adoboqui anocquidotedi chuiben-chuibempac caondash.

Esusēn onquesa bēdamiaid

³² Bēshuaid bēdamiaid puduenuvien podobitsi icsa dapuduedaid onquesa dada Esus ismenuen bēpondash.

³³ Bēacsho isun Esusēn podobitsi icsa dapuduemiace bēdanash onquiampondash. Aden bēdamesho isash: —Nuquin nidaid Isadaid caidēnshun adoen ictenec —quecuededpondash isquido.

³⁴ Adnubien Esus chieshēnquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

Esusēn matses tantiaquiaid

³⁵ Aden onquesa bēdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnomboen chuibanquimbi matses bēdamebampondash.

³⁶ Abi tantienquio icquido dadpen chochoso isash unēsquo icnuc shubiantiadquio icpondash Esus. —Abi isquid nibēdnuc bacuēbo icsamboec tabadacimboec icsambo iquec. Nuquin Papa bēdamboen ismete chiabi yac tantienquio yec natia chieshēmēnec bēdamboec tabadtiapimbo iquec —quiash shubiantiadquio icpondash Esus.

³⁷ Adshumbic abēd icquido chuipondash. —Pete dadpen nitsinaid caniacsho bedtanenquio icnuc sinash chodquebudnequid. Adecbidi Nuquin Papan chiaid chuibanquid

nibëdnuc matses icsamboec tabadec. Aden chuibanquid nuquipadquid daëdpactsëcquio iqueque. ³⁸ Nuquin Papa chianeta. “Matses dadpenshunquio mimbi bëdamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusën abëd icquido chuiquin.

10

Esusbëd icquido 12tedi chiaid

(Mad 3.13-19; Duc 6.12-16)

¹ Adshumbic Esusën abëd icquido 12tedi chuipondash. — Ëmbi naid chuibeneta. Ëmbi namiaid icquin ëmbi nabocpadomboen podobitsi icsa matses dapuedaid mimbi cuemendac. Adembidi daicsaido abitedi mimbi bëdamendac — quequin chuipondashi nëidtedi. ² Nëidic Petedo caidbidi Simon cuëmëdquid. Nëidic abëdta tishaid Andedes cuëmëdquid. Nëidic Sebedeyon mado abi daëdi. Abentsëc Acobo icnuc utsi Uan icpondash. ³ Nëidic Uedipe. Nëidic Badtodome cuëmëdquid. Nëidic Tomas. Nëidic ëbibi Mateyo con matses piucquid bedshundenedi. Nëidic Acobo cuëmëdquid utsi Adpeon mado. Nëidic Debeyo caidbidi Tadeyo cuëmëdquid. ⁴ Nëidic Simon cuëmëdquid utsi con matses yuaquido cuemete bunquid. Nëidic Iscadiote caidbidi Udas cuëmëdquid abi chieshënquido Esus bedmequid. Aidtedi abëd icquido icsho chuipondashi.

Abëd icquido: Chuibeneta, caid

(Mad 6.7-13; Duc 9.1-6)

⁵ Adshumbic: —Ëmbi chiacpadomboen chuibenenuec nidshun isadaidpembo chienda. Aido yacno nidenda. Nidaid cuëshë Samadia caid yacnocquidon shubu datambidanta. ⁶ Nuquin matses isadaidbouidi chuibeneta. Bënudshun podqued tantienquio yacimboen nuquin matsesën Nuquin Papambo tantienquio iqueque. ⁷ “Mibi icsaid ënash bëdamboec tabadta. Nëbi abëd tabadtequido icmequin Nuquin Papan matses bëdamboen tabadmendac,” quequin chuibeneta. ⁸ Adembidi daicsaido bëdamequinc unësaido uincuemequinc dada ushumbo yec daicsaido bëdamequinc podobitsi icsa dapuedaido cuemeshunquinc cabeneta. Adoshon: “Piucquid beccho,” cainda. Ëmbi nabocpadomboembidi mibi namembique. “Piucquid beccho,” quequin nainquio iccombique. Adembidi nashumbanta. ⁹ Aden chuibenec nidquin min piucquid buanenda. ¹⁰ Adembidi pete sandoaid buanenda. Dashcute utsibëdta tapucudte utsi sandoshon buanenda. Mibi tidinquete cuate abentsëqui buanta. Adec mëdadauidquio chosho isun mimbi bëdamiaidon: “Mibi bëdambo

iquec. Ēbi yacno ushec cho,” mibi cac bēdambo ictsiash. Adembidi: “Mitsana nibēdsho isun mibi menenu,” mibi cac bēdambo ictsiash.

¹¹ Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidēn shubun ushta. Auēshquio nidabi yec aidēn shubunuidi ushta. ¹² Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista. ¹³ Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēnsho Nuquin Papan aido bēdamboen istiapimbo iquec. ¹⁴ Shubu dadpen icquid utsi yacno mibi nidacsho anocquidon cuemiad naden ismeta. Auēshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. ¹⁵ Mimbi adosho isun matses cuidte ushēmbi Nuquin Papan aido comapenen cuidendac. Ēndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi Comoda capampic. Aid daēd yacnocquido bēdiactsēc cuidshun mimbi chiaid tantienquo icquido comapenen cuidendac —quepondash Esus abēd icquido chiec.

Esus tantiaquido chieshēnte chiaid

¹⁶ Adashic padpiden chuioaic: —Ēmbi naid chuibenequido icsho utsin-utsinquien mibi chieshēnendac. Bēdi nēish yua acte bunac bimboec chieshēmēnquido mibi cuate bunendac. Aidobēd chieshēnanenda. “¿Mitsipadomboen chiac Nuquin Papan chiaid tantiabempatsiash?” qeshun bēdamboen tantiaquin bēdamboen chuita. ¹⁷ Mibi chieshēnquin cuesunetiadquo iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquo mibi cueshcaten cueshcaindac. ¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ēbi chuiquidon chuiquid dapabēdta isadaidpembo ēmbi naid chuibanu,” ēbi quenuc mibi aden buanendac. ¹⁹ Adoac dacuēdenda. “Chuiquid dapa yacnoshon ¿atotsimbi chuipatsiaba? ¿Adambi bēdamboen chuipatsiaba?” quec dacuēdenda. Chuiquid dapa mimbi bēisnubi Nuquin Papan ambi tantiacpadomboen mibi oncamendac. ²⁰ Aden aton Mayanēn ambi tantiacpadomboen mibi oncamendac —quepondash Esus.

²¹ Adashic padpidec onquec: —Ëbi chieshënquidon ëbi tantiaquidotsen comapenen chieshënendac. “Esus tantiaquid nec,” queshun aton buchimbi aton utsi cuesunemendac. Amëmbi ambi tishmiaid cuesunemendac. Aton bacuëbombi chieshtoshon anibëdta amë cuesunemendac. ²² “Esus tantiaquid nec,” queshun matses dadpeshun aden chieshënaqui chieshtoenuio icquin ëbi tantiasho Nuquin Papan abi yacno mibi puduedmendac. ²³ Shubu dadpen yacno nidacsho chieshënac shubu dadpen icquid utsi yacno cuenta. Anoshontsen ëmbi naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nëid nidaid Isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

²⁴ Mibi tantiamequid nebi. Ëmbi tantiamiaido icsho ëbi icbocpadomboembidi mibi chieshënendac. Abi chuiquid dapa chieshënacpadembidi ambi namiaidotsen chieshënquid. Ibo chieshënquimbi yuabotsen chieshënquid. ²⁵ Adembidi ëmbi chiacpadomboen natiadquio icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icbo Betsibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshënendac —quequin chuipondash Esusën abëd icquido chuiquin.

Dacuëdenquio icquin chui, quequin chiaid
(Duc 12.2-7)

²⁶ Adshumbic padpiden chuiquin: —Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac. ²⁷ Nëbi ëmbi mibitedictsëqui chuiboed dacuëdenquio icquin utsibo chuibeneta. ²⁸ Chuibenesho min dadauidsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan min tantiate abi icsho cuidnuequin chian anëdënquequid nësecanquid tantiaata. Adquid Nuquin Papa icsho dacuëdënta.

²⁹ Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquio icti? Padenquio. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantiec. ³⁰ Adembidi min manëdaid Nuquin Papan tambanaidquio nec. Aden min manëdaid abentsëc paëdsho aidën tantiec. ³¹ Aden min manëdaid tambanquid icquin padichucu bëdiactsëc tantiatsëcquin mibien comapenen

tantieque. Mibi chieshënquido dacuëdënenda —quequin chuipondashi Esusën.

Esus con Icho nec, quequido chiaid
(Duc 12.8-9)

³² Adshumbic padpiden chuiquin: —Utsibo chuiquin: “Con Icho Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. ³³ Padnuen utsibo chieshec: “Con icho Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” guesho: “Padi. Ëbi tantiaquidpenquo neque. Puduedmenda,” quequin Nuquin Papa chiendambi —quequin Esusën chuipondashi.

Esus tantiaquidobëdi cuëshëdte chiaid
(Duc 12.51-53; 14.26-27)

³⁴ Adshumbic padpiden chuiquin: —Ëmbi chuiboed tantiashun: “Nuquin Papa yacnuësh choquid icquin abitedimbo bëdamboen tabadmetsiash,” ¿caquindabi ique? Padenquo ictsiambi. Ëbi tantiaquidobëd ëbi tantiesabo cuëshëdenquo icte danenda. Ëbi tantiaquidobëdi ëbi tantiesabo cuëshëdendac. ³⁵ Amëbëd aton mado cuëshëdendac. Adecbidi anibëd aton champi cuëshëdendac. Adecbidi aton chayabëd aton babanën cuëshëdendac. ³⁶ Aden aton shubun icquidombi ëbi tantiaquid chieshënendac.

³⁷ Padnubic aton matsesuidi tantiaquidën ëbi bëdiactsëc tantiatsëctsiash. Aton tita tantiaquinc aton papa tantiaquinc cain aidën chiacpadomboenuidtsëqui naquidën ëbi bëdiactsëc tantiatsëcquin ëmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuidtsëqui bunquin ëbi bëdiactsëc tantiatsëcquin ëmbi chiacpadomboen natiapimbo ictsiash. Adquido bëdamboen istiapimbo iquebi. Ëbi tantiesabo nec. ³⁸ Utsibon chieshënac ëbi tantiatsëcboedi badedi chieshtoshon ëmbi chiacpadomboen natiapimbo yantsiash. Adquidotsen ëbi tantiaquidpenquo iquendac. ³⁹ Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquin ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquo ictsiash —quequin Esusën chuipondashi.

Nuquin Papan bëdambo icmete chiaid
(Mad 9.41)

⁴⁰ Adshumbic Esusën ëbi chedo padpiden chuipondash. —Mibi chieshënquido icnubi mibi bédamboen isquid iquen-dac. Ëmbi naid mimbi chuisho tantiash: “Ai, abimbo caic,” queshun ëbi tantiabenquin ëbi chomequidtsen tantiabenendac. ⁴¹ “Naden naindami,” quequin ambi chiaid chuibenequid Nuquin Papan bédamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bédamboen chuisho tantianu,” quequid icsho Nuquin Papan bédamboen isendac. Adembidi abi tantiec ambi chiacpadec bédamboec tabadquid Nuquin Papan bédamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” queshun bédamboen isquidotsen Nuquin Papan bédamboen isendac. ⁴² Adembidi ëbi tantiaquid yec acte bundoacsho acte menequid Nuquin Papan cuidnanquin bédambo icmendac. Adembidi utsibon Esus tantiaquido bédamboen nashunsho Nuquin Papan bédambo icmendac —quequin Esusën chuipondashi. Adshun: —Chuibenetan —cac nidshumbimbi chuibenepondac.

11

Uan acten mentoanquidën chuimiaid (Duc 7.18-23)

¹ Esusën: —Chuibenetan —cac abéd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniac caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ictanec Esusbéd icoaic cho-chopondac.

² Adnubien Uanën Esus acten mentondaidëmbi quënën nauedaid icquin Esusën naid tantiapac caondash. Adshumbic abéd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambéd icquidon Esus chuituidpondash. ³ —Uanën: “Chuitan,” cac chobi. ¿Ëmbi cainaid Nuquin Papan chomiaidquioda mibi nepe? Mibi adquidpenquo icnuc ¿ada utsi chopatsish? —caquien ⁴ Esusën: —Ëmbi nadatiambo icquin nabamboedbëdta ëmbi chuiboed Uan chiec nid. ⁵ “Bëshuacboedën isbenosh. Canite icsaidi capucuenosh. Daushumbo icquid nami mishadenquo icquid bédanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquo icquido Nuquin Papan bédamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquo nec,” quequin ëbi tantiendac. ⁶ Adshumbic

nadentsen chuita. “Muambo nec, ëbi cainquio icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bëdambo icmendac,’ quiosh,” quequin chiec nid –cac nidanepondash Uambëd icquido.

Uan acten mentoanquid chiaid
(Duc 7.24-35)

⁷ Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuc nidonda? ¿Cunquequidën ishacunaid isnuecta nidtionda? Padenquio. ⁸ ¿Dashcute bëdaidquio dasiuidaid isnuecta nidtionda? Padenquio. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec. ⁹ Ad icnuc ¿atotsi quenuc nidonda? “Naden naindambi,” quequin Nuquin Papan chiaid chuibenequid chuisho tantianuec ma mibi nidondac. Adec Nuquin Papan oncamiaidquio Uan nec. ¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic.

¹¹ “Nuquin Papan chomiaidquio choec,” quequin chuiquid Uanpadquid utsi nibëdec. Adquid yequi:

“Abi choec,” quequin ambi chuiboedën ëmbi nabansho isabi yequi bëdapabi Uan ictsec. Padnuen ëmbi Nuquin

Papan chiacpadomboen nabansho isash ëbi tantiaquido bëdamboshë iquendac. ¹² Uanën chuisho Nuquin Papa

tantiabenacpadomboen ëmbitsen Nuquin Papan bëdamboen iste chuisho tantiashun adembidì abi icsaid ënshun icsaboedon dadpenshun Nuquin Papa tantiendac.

¹³ Nëbi Uanën: “Nuquin Papan abi yacnoshon bëdambo icquid chomendac,” quequin chuipondash. ¿Ambiada

adopondash? Padenquio. Èndenquimboshë tauamboen nuquin tsusedpa Moisesën chuibempampic. Adshumbic

utsintsen. Adshumbic utsintsen. Aden Nuquin Papan ambi bëdambo icquid chomete chuiquin dada uamianepampic.

¹⁴ Adembidì Uan chote chuiquin dada uamepampic. “Nuquin Papan ambi tantiacpadomboen oncamiaidquio Edias cuëmëdquid choendac,” quequin Ediasbimboecquid Uan

chote chuipampic. Bëdamboen tantiaquin: “Nuquin tsusedpa Ediasbimboecquid Uan nec,” mimbi catsiac. ¹⁵ Bëdamboen

tantiaquidën adembidì tantiatsiash –quepondash Esus abi datsidadquido chiec.

16 Aden chuisho tantiash chieshtoshobien Esusën chuipondash naden. —Nuquin Papan chiaid tantienquo icquido yec nēmbo icquido ¿midapadquidoen nec? Bacuēbo nēishnanacbietsēcquieci mibi iquec. Bacuēbo: “Ēmbi chiacpadomboen nanuna,” queuidash ambi chiacpadomboen aton utsibon nainquo icsho isash nēishash chushcananquid. 17 “Cuēdēnuna,’ queuidbosh ēbi cuēdēnubi ma mibi cuēdēnquo icboc. ‘Sedenquenuna,’ queuidbosh ēbi sedenquenubi ma mibi sedenquenquo icboc,” quetsash bacuēbo nēishnanacbietsēcquieci ma mibi iqueyoc. Adec nēishēmēnquido yec icsambo ma mibi iqueyoc. 18 Uan pete utsi-utsien pesa iccosh. Adecbidi acte paēmbo icquid aquesambo niosh. Adquid icsho isash nēishash: “Ēmbi nacpadomboen naisa nec. Podobitsi icsa dapuduedashien nechitec,” mibi quepondac. 19 Ēbien nuquin matsesēn piaczimboen pequid nec. Adembidi actequid acquid nebi. Adsho isash nēishun ēbitsen icsamboen chuishunquin: “Peteuidi tantiaquin nua pequid nec. Tantiadenuen acte paēmbo icquid acquid nec. Adecbidi nuquin matses piucquid bedshunquidobēd onquec icsambo icquid caidobēd onquec quequid ma aidobēdi icsambo icquid nepayoc,” mimbi ēbi capec. Padnuen bēdamboen tantiaquidēn Nuquin Papan chiacpadomboen nasho isun Uambēdta ēbi: “Bēdambo iquec,” caindac —quepondash Esus abi chieshēnquido chieci.

*Shubu dadpen icquidēn tabadquido cuidte chiaid
(Duc 10.13-15)*

20 Adshumbic Esusën padpiden chuipondash. —Nēbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bēdamboec tabadtiadquido iquebi,” queti-adquidi chieshec adenquo iquec —qeshun Ēsusën naden chushcapondash. 21 —Shubu dadpen icquid Codasin caid yacnocquidobēdi shubu dadpen icquid utsi Betsaida caid yacnocquido Nuquin Papan cuidtequido nec. Ēmbi aido ismebocpadomboen ismiac isadaidpembo cuidadenquo ictsempampic. Aden ismiaqui: “Ai, icsapobi,” quiash shubibudequi icsainquo yec ēnēdtsempampic. Shubu dadpen icquid Tido caid yacnocquidobēdi shubu dadpen icquid utsi Sidon caid yacnocquido adtsempampic. 22 Nuquin Papan matses abitedi cuidte ushēn: “Nadatiambo icquin nabanquin ismiacmaido nec,” qeshun Tido caid yacnocquido Sidon caid yacnocquidobēdta bēdiactsēc cuidendac. Adoshombic: “Comapenen tantiaquin ismiaqui tantienquo icquido nec,” qeshun Codasin caid yacnocquidobēdta Betsaida caid yacnocquido comapenec sidquenec cuidendac.

23 Adembidi nēmbō icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshēnquido cuidacno nidmetequido ma mibi nepayoc. Ēdenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamēpampic. Ēmbi mibi ismebocpadomboen ismiac aidon abi icsaid ěntsempampic. Abi icsaid ěnsho Nuquin Papan cuidenquo ictsempampic. Cuidenquo yac nēbi aton mases abi ictsiash. 24 Nuquin Papan mases abitedi cuidte ushēn: “Comapenen tantiaquin ismiacmaido nec,” queshun Sodoma caid yacnocquido bēdiactsēc cuidendac. Nuquin Papan chomiaid icquin ěmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusēn chushcapondash.

Esusēn dayacquiobimboecnuc icmete chiaid
(Duc 10.21-22)

25 Adshumbic Esusēn Nuquin Papa chuipondash. —Mibi bēdamboshē iquec, Papa. Mibi yacnocquidotedishun Icbombo yec nidaidēn tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ěbi tantiabī iquec. Mimbi tantiamiac nēidon ěbi tantiec. Aden mimbi bēdamboen naic. 26 Mimbi tantiacpadomboen mimbi bēdamboen naic. Mibi bēdamboshē iquec, Papa —quequin Esusēn Nuquin Papa chuipondash.

27 Adshumbic abi datsidadquido chuipondash. —Nuquin Papan ambi tantiaidtedi ěbi chuimec. Ēmbi naboedbēdta ěmbi nate abitedi con Pan ambentsēqui tantiec utsibon tantienquo icnuc. Adembidi Nuquin Papan natebēdta ambi naboed abitedi ěmbentsēqui tantiēmbi. Aden Nuquin Papa tantiaquin: “Nēidtedi mases bēdamboen tantiamēmbi,” queshun: “Nuquin Papa nadquo iquec,” quequin tantiamēmbi. 28 Ēbi tantiaata. Dayacquo yacimbōecnuc mibi bēdambo icmembique. “¿Mitsipadequibi Nuquin Papa yacno puduedpe?” quec ¿uimambo yacimbōeacta mibi icpe? Adquidēn ěbi tantiaasho Nuquin Papa yacno puduedtequid mibi icmembique. Ēbi tantiaata. 29 Con Icho ěbi cata. Con yuambo icquin ěmbi chiapadomboen nasho mibi bēdamboen isquin dayacquo yacimbōecnuc mibi bēdambo icmembique. Ancanesambo yec bēdambo icquidini neque. Con Icho ěbi cata. Adsho mibi bēdambo icmembique. 30 Mibi ancainquo icquin dayacquo yacimbōecnuc bēdamboen mibi tabadmembique. Con Icho ěbi cata —quequin chuipondash Esusēn.

12

Esusbëd icquidon petsëcsho istuidshun chushcaid
(*Mad 2.23-28; Duc 6.1-5*)

¹ Adshumbic chonoadtemaid ushën Esusbëd capu-
cuenequin tied matanquin bundotsëcshun tiedën caniquid
ëshchicshun petempi petsëccondambi. ² Pesho istuidshumbini
con tsusedpabon chiampid namequido padiseyobon: —
Is. Mibëd icquido chonoadtemaid ushëmbi chonoadeque
—capondash Esus chuiquin.

³ Adoquien Esus: —Ma icsapenguio icpayoc. ¿Nuquin
tsusedpa Dabidën bundoshon ambi petemaidquio pepampid
chuiquin dada uapampid isamboda ictio? ⁴ Aidën Nuquin
Papa tabadte shubu uashunaid abi puduedtemaidën pudued-
shun ambi petemaid pan sanaid istuidpampic. Aid panëmpi
nëish yua abided unës uaquidon petequid nepampic. Aid
panëmpi bedshun abëd icquidobëdtan Dabidën pepampic.
Aden nuqui bëdambo icquid caidën ambi natemaidi na-
pampic. ⁵ Adembidi chonoadtemaid ushën natemaid chiaid
niacquimbi nëish yua abided unës uaquidon aid ushëmbi
Nuquin Papa tabadte shubu uashunaidën puduedshun nac-
nendenepec. Nuquin Papan chiacpadomboen naiqui ic-
sainquio icpec. ⁶ Nuquin Papa tabadte shubu uashunaid
tantiaquin adopec. Aid shubu bëdapabi icnuc bëdamboshë
icquid nebi. ⁷ Nuquin Papan naden chiaid mimbi bëdamboen
tantienquio iquec.

“Ëmbi chiacpadomboen abentse-abentsen mimbi naic.

Adoquimbi ëmbi chiaid utsi niaquec mimbi icsaido caido
mimbi bëdamboen istiapimbo iquec.

Adsho isun: ‘Mibi bëdambo iquec,’ catiapimbo iquebi.”

quequin Nuquin Papan chiaid bëdamboen tantiashun ëbëd
icquidon bëdamboen nasho mimbi chushcainquio ictsenoc.

⁸ Tantia. Nuquin Papan chomiaid icquin chonoadtemaid
ushë ëmbibi chiampid icnuc ëmbi tantiacpadomboen aid
ushëmbi ëbi tantiaquido namembique —quepondash Esus
ëmbi petsëcsho istuidquido chiec.

Mëicsatsaid bëdamiaid
(*Mad 3.1-6; Duc 6.6-11*)

⁹ Adanec nidec Nuquin Papan chiaid chuibante shubun
puduedshun ¹⁰ isaquien mëicsatsaid icpondash. Adnubien
padiseyobon: —Chonoadtemaid ushëmbi bëdamequid Nuquin
Papan chiaid niacquidien nechitec. Nuquin Papan chi-
aid Esus niacmenuna. Aden niacmeshun: “Icsambo mibi
iquec,” canuna —queshun Esus chuituidpondash. —¿Nadquid
chonoadtemaid ushëmbi matses bëdamequinda Nuquin Papan
chiaid niacpec? —caquien ¹¹ Esusën: —¿Ada min nëish yua

obeca caid icpec? Adquid chonoadtemaid ushën shëcuë uquëduc ampaëdacsho istuidshun çchiquenquioda mimbi icpat-sia? Ai, mimbi chictsiac. Chonoadtemaid ushëmbi mimbi chonoadquin chicpatsiac. ¹² Aden min obeca bëdiactsëc tantiec mibi bëdapabi icnuc matses tantiaquioquin nashunquid bëdamboshë ictsiash. Nadquid chonoadtemaid ushëmbi matses aden bëdamboen nashunquidën Nuquin Papan chiaid niaquenquio ictsiash –quequin Esusën abi icsamenu caquido chuipondash.

¹³ Adotanquimbien Esusën mëicsatsaid chuiquin: –Mëcueta –cac mëcuc bëdampondash aton mëdante abiuc daëdi bëdambo yec. ¹⁴ Adsho isashien abi chieshënquido padiseyobo nëishquiopac caondash. Adec nëishanec nidash aton matses utsibobëd: –Cuesunequimbien Esus ictiad –quecuededpac caondash.

Esusën nate ëndenquimboshë chiampid

¹⁵ Adnubien Esus: –Ëbi cuesunetiadquio iquec –quianec auëshquiobi puduanec nidpondash. Nidsho isumbien matses dadpeshun tsibanampondash. Adshumbic aidon bëaid daicsaidotedi bëdamebampondash. ¹⁶ Adshumbic ambi bëdamiaido chuiquin: –“Bëdamioshi,” quenda –quequin chuipondash Esusën: –Ëbi abi chuiquid dapa icmenushe –quiash adpondash Esus. ¹⁷ Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

¹⁸ “Ëmbi chomiaid ëmbi chiacpadomboen naquidquio nec. Aid tantiaquiec bëdambo iquebi.

Con Mayan bëdambo icquid abëdi tabadmemb.

Adoac ëmbi bëdamboen iste isadaidbobëdta matses utsibo abitedi bëdamboen chiendac.

¹⁹ Chushcanante bunenquio yec ancanenquio iquendac.

Chuiquid dapa ictiapimbo iquendac.

²⁰ Icsambo icquido yec shubiquido yec natiaic tabadquido yec daicsaido yec quequidon abi bëdiactsëc tantiabentsëcsho bëdamboen isquin bëdamboen tantiamendac.

Nuquin Papan chiacpadec cuidte ushë choabi icnuc adoendac.

²¹ ‘Nuquin Papan tantiacpadomboen matses bëdamboen namendac,’ queshun nidaid utsi-utsiec yacnocquidon matses dadpeshun aidi tantiendac,”

quequin Esusën bëdamboen nate chuipampic Isayasën.

Podobitsi icsan namiaidi Esus nec, quiaid

(Mad 3.20-30; Duc 11.14-23; 12.10)

²² Adnubien Esus ismenuen daicsaid bëpondash. Dapuduedshun podobitsi icsan bëshu uain eme uaidi onquesa

nepondash. Isenquio yec onquenquio icshobien Esusën bédamepondash. Adoac isbenequi onquiampondash. ²³ Adsho isashien Esus datsidadquido: —Is. Comapenen tantiaquin nabanquidquio nëid neque. ¿Nuquin tsusedpa Dabidën tsyuecquidta nepec? Adquid yec nuqui cainaidquio Nuquin Papan chomiaidien nechitec —quecuededpondash.

²⁴ Adsho tantiaash Esus chieshënquido padiseyobo: —¿Aidta nedic? Ma aidpenquio neyoc. Betsibu caidën podobitsi icsan icbon namiaid icquimbien Esusën podobitsi icsa cuemehitec —quequin otacquio tantiapanëdash.

²⁵ Adshobien Esusën aidon otacquio tantiaid ambembi tantiaashun naden chuipondash. —¿Adquidënda aton yuabi cuemepatsiash? Padenquio. Chuiquid dapan aton yuabo nëishtanquin chushcac cuësh-cuëshëdec aton yuabo uesadec nietsiash. Aido nibëdnuc chuiquid dapa ictiapimbo ictsiash. Adechidi shubu dadpen icquidën tabadquido chushcananash cuësh-cuëshëdec niquian shubu dadpen icboedi daëdpactsëc yanec. ²⁶ “Betsibu caidbidi Satanas caidëmbi namiaquien podobitsi icsa cuemehitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquio ictsiash. Satanasën cuemiac aibdëdi aton yuabo cuësh-cuëshëdtsiash. Adnuc Satanas aton icbopenquio yantsiash. ²⁷ Mibëd icquidon podobitsi icsa dapuduedaid cuemiac caosh. ¿Cuemesho isun mimbi ëbi chiacpadomboen: “Betsibu caidën namiaquien nachitec,” cainda ictio? Ma mimbi padenquio icpaboc. Mimbi adoac: “Mimbi icsamboen chiec,” quetsenosh podobitsi icsa dapuduedaid cuemequido mibëd icquido. ²⁸ Nuquin Papan Mayanën namiaquimbi podobitsi icsa cuemioc. Èmbi adosho isash: “Nëbi matsesbëd icquin Nuquin Papan namiaidën naosh,” quetiadquidi mibi nec —quepondash Esus.

²⁹ Adashic abi onquec: —Tantia. Mibi chuinu. Ampenuesho icbon istuidac ampequidën icbo uidën uabi ampeshunti-apimbo iquec. Icbo uidënquio icquid bucun cataneshun ampeshunquid. Adechidi Satanas bëdiactsëc tantiaquid icnuc ëbien comapenen tantiaquidquio nec. Uidën uacimboen nadatiambo icquin nabanquin aton yua cuemepombi. ³⁰ Èbi con icbo cainquio icquido Satanasën yuabo nec. Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

³¹ Adshumbic nadentsen chuipondash. —Nuquin Papan chiaid niac-niacboedëmbi ënacsho Nuquin Papan bédamboen isec. Nuquin Papan icsamboen chuishunquidëmbi abi icsaid

ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquo icsho Nuquin Papan bëdamboen istiapimbo iquec. ³² Èbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquo icquin icsamboen tantiasho adembidi ënenquo icquin bëdamboen istiapimbo iquendac —quequin abi chieshënquido Esusën chuipondash.

Bëdambo icquid nec, quequin tantiate chiaid

(Mat 7.15-20; Duc 6.43-45)

³³ Adshumbic naden bëdamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi matses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash. ³⁴ Ma mibi adquidpenquo neyoc. Nisibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc. ³⁵ Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuipoc. ³⁶ Ambi cuidte ushën Nuquin Papan: “¿Ada bëdamboen tantiaquin chuidenio?” quequin matses abitedi chuimendac. ³⁷ Adoac abimbo chiec: “Ai, bëdamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ënëdta —quequin Esusën abi chieshënquido chuipondash.

Padiseyobon: Èbi isme, quequin Esus chiaid

(Mad 8.12; Duc 11.29-32)

³⁸ Aden chuisho tantiashumbien abi chieshënquido utsibon Esus chuituidpondash. —“Nuquin Papan chomiaini nec,” quequin ëbi ismequin nadatiambo icquin nabanta. Isnu —quepondash padiseyobo Moisesën dada uapampid chuibanquidobëdi.

³⁹ Adoquien Esus: —Padi. Nuquin Papan chiaid niacniaquec mibi icsamboshë iquec. Èbi tantiate bunenquo icquimbi mimbi: “Èbi isme,” ëbi capec. Adsho nëbi mibi ismenquo iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi. ⁴⁰ Chishcambiequid dapan chebudac aidën pucun uec daëdec ushacsho ucbudac Onas padpidec

nidpampic. Adecbidi unēsacsho chococac Onas yampicpadec daēdec ushash uincuenendabi. Aden ismendambi. ⁴¹ Ēbi tantienquo yec mibi icsambo iquec. Padnuen Nuquin Papan chiaid Onasēn chuibanac shubu dadpenquo icquid Ninibe caid yacnocquido badedi icsainquo yec ēnēdpampic. Nuquin Papan chiaid chuibanquid Onas bēdambo icpampic. Ēbien bēdamboshē icquidquo nec. Adquid icquin nadatiambo icquin dadpen ismiaqui mimbi ēbi tantienquo iquec. Aden ēbi tantienquo icquido icsho Nuquin Papan matses abitedi cuidte ushēn Ninibe caid yacnocquidon: “Icsambo iquec,” mibi caindac. ⁴² Adquid cuidte ushēmbi matses utsi Sud yacnocquido ancaquidēn nuquin tsusedpa Sadomonēn chuisho tantiec chopampidēntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuēmēdquid dadpen tantiaquid nec,” quequin chuituidac Sadomonēn chuisho tantianuec nidshun aid chidon tantiatuidpampic. Adash: “Nuquin Papan tantiamiaidēnquo Sadomonēn bēdamboen chuipec,” quepampic. Ēmbien abitedi tantiaquid icquin nadatiambo icquin ismeuidpoc. Adoqui mimbi tantienquo icpec –quepondash Esus abi chieshēnquido chiec.

Abi nianaid podobitsi icsa dapuedoaid
(Duc 11.24-26)

⁴³ Adshumbic naden Esusēn chuipondash. –Icsaquido mibi nec. Podobitsi icsa dapuedoaidbimboecquid mibi nec. Tanta. Mibi chuinu. Abi dapuedoaid matses nianashi podobitsi icsa abi dapuedtequid nibēdacno yuec capucuen-capucuenec. Adtanequi: “Ēbi icbocnobidi dapuedoaic nidebi,” quianec choec. ⁴⁴ Chonobi ambi niamboed matses: “Ēbi dapuedoaid podobitsi icsa nibēdnuc bēdambo iquebi. Adquid chomeoatiapimbo iquebi. Ēmbimbo naic bēdamboec tabadquidquo nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuedtequidquo nēid nec,” quianec ⁴⁵ abipadquid utsi bedec nidoaic. Nidshumbic 7tedi icsamboshē icquido istuidshun bēash aidobēdi dapuedec. Adnuc podobitsi icsa abentsēc dapuedoaid yec ēnden icsambo icboedi aido dadpen dapuedoaid yec buēdanquiec aid matses icsamboshē yanec. Adquo mibi iquec. “Bēdambo iquebi,” queboedi nēbi mibi icsamboshē yanec –quequin Esusēn chuipondash.

Anibēdi Esusēn utsibo choaid
(Mad 3.31-35; Duc 8.19-21)

⁴⁶ Adanec shubun puduedshun Esusēn abēd puduedquido dadpen chuinubi aton utsibo aton titabēdi Esus isnuec chopac

caondash. Umanuc tabadnubi ⁴⁷ utsin puduedshun Esus chuituidpondash. —Mibi isec tita min utsibobëdi choac-cosh. Umanuc tabadec —caquien badedi nidenquoio yec ⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin ⁴⁹ abëd icquido mëdquin ismepondash. —Nëid ëbëd icquido con utsibo caimbi. ⁵⁰ Nuquin Papan chiapadomboen naquidquoio icsho con matses caimbi. Con utsi caquinc con chibi caquinc con ta caquinc caimbi —quepondash Esus.

13

Piacbo ëshë siaid chiaid
(*Mad 4.1-9; Duc 8.4-8*)

¹ Adtanec nidec chian budash cuëmano tabadtuidpondash.

² Tabadtuidsho isash matses dadpenquoio cho-choash tsucustsucusëcquoio yec Esus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³ Adshumbic abi tantiate chiuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquoio. ⁴ “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uic-chunën chequid. ⁵ Ëshë utsibic nidaid tsasimbo yacno siac badedi dëyucuidash ⁶ aton tapun nidaidën puduedenquoio icnuc ushë chënquequidën badedi unësquid. ⁷ Ëshë utsibic nisanquid diadacno siaid dëyucash canidouidtsëcsho nisanquidën dayunac unësquid. ⁸ Padnuen ëshë utsi-utsiec nidaid bëdanquoio siac dëyucash caniash dadpenquoio ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

⁹ Adashic: —¿Min pabiate shëcuë nibëdquiecta iquec? Ëmbi chuiboed bëdamboec pausudta —quepondash Esus.

Ompoacbimboen chiec nebi, quiaid
(*Mad 4.10-12; Duc 8.9-10*)

¹⁰ Adsho tantiaishun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien ¹¹ Esus nadpondash. —Utsibo tantiamenquoio icquin Nuquin Papabëd tabadte chuiquin nëbi mibiuidtsëqui tantiamembi. ¹² Nuquin Papa tantiatiadquoio icquidën ëbi tantiaisho bëdamboen tantiamendambi. Nuquin Papa tantiauidtsëcquidën ëbi tantienquoio icsho ëmbi ompoacbimboen chiac tantienquoio ictsiash. ¹³ Ompoacbimboen aido dadpen chuibanembi. Ëmbi naid isun ëbi tantienquoio iquec. Ëmbi chuisho pamumëdacbimboen tantienquoio iquec. Adsho aidon tantiatiapimbo icnuc chiembi. ¹⁴ Nëidon tantienquoio icte

chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquo iquendac.

Ismiac isquioboshombi: ‘Ai, aidi nec,’ cainquo iquendac.

¹⁵ Ai, ěmbi chiaid tantiatiapimbo iquec.

Ushacbimboen tantienquo yec pamumědacbimboec chieshěměnquidombo iquec.

Ĕbi tantiate bunenquo iquec.

Ĕmbi chiaid tantiaquidombien paposhquiacbimboen bědamboen tantiabentsiash.

Pausunacbimboen tantiashun ěmbi chiacpadomboen natiadquo yansho aton chiesh bědametsiambi. Aton chiesh bědamete bunenquo iquec,”

quequin Nuquin Papan dada uamepampic –quepondash Ĕsus aběd icquido chiec. ¹⁶ Adashic aidobidi chiec: –Isayasěn chiacpadomboen utsibon ěbi tantienquo icnubi mimbien ěbi tantiec. Ĕbi isec mibi tabadec. Ĕmbi chuibansho tantiash: “Ai, abimbo caic,” quec mibi bědambo iquec. ¹⁷ Ĕbi chote chuipampidobědtan bědamboec tabadquido dadpen-shun mimbi ěbi isacpadomboen ěbi iste bunequi ěbi isambobi uněspampic. Mimbi ěmbi chuisho tantiacpadomboen tantiatiadquo yequi tantiambobi uněspampic –quepondash Ĕsus.

Piacbo siaid sebaděnquo chiaid

(Mad 4.13-20; Duc 8.11-15)

¹⁸ Adashic abi onquec: –Tantia. Ĕmbi piacbo ěshě siaid quequin chuiboed sebaděnquo mibi chuinu. ¹⁹ Nuquin Papaběd tabadte chiaid piacbo ěshě siaidbimboecquid nec. Nuquin Papan chiaid chiaqui tantiadenquo icsho Satanasěn nac badedi běshumpec. Uicchuněn piacbo ěshě paědaid badedi chiacbimboen adopec. ²⁰ Utsibic Nuquin Papan chiaid chiaqui bědiactsěc tantiauidtsash: “Bědambo iquec,” quec cuishon-queuidtsec. ²¹ Adsho: “Nuquin Papan chiaid tantiaquid nec,” queshun utsibon chieshěnac badedi chieshtoshon tantienquo yanendac. Piacbo ěshě tapunuidtsash uněsacbimboen adoendac. ²² Utsibic Nuquin Papan chiaid tantiatsashi ambi dacuědquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon dayunac uněsacbimboen adoendac. ²³ Padnuen utsibon tantiate nidaid bědan siaidbimboecquid nec. Nuquin Papan chiaid chuisho tantiaquioshon ambi tantiaid běnuainquo icquin tantiabudec bědamboec tabadec. Adshun aiděn chiac utsi dadpenquioshě ěbi tantiaquid yanendac. Utsin chiac dadpen adecbidi ěbi tantiaquid yanendac. Utsin chiac daědpectsěc adquidbidi yanendac –quequin abi tantiate chuipondash Ĕsusěn.

Ĕshē icsambo icquid seuanaid chiaid

²⁴ Adshumbic Esusēn naden chuipondash. —Tantia. Nuquin Papan namiaid tantiamenuen utsi chiacbimboen chuinu. Tiedēn caniquid pete adosbiecquid icbon siac caondash. ²⁵ Adanec nidambic inchēshēmbi choshon chieshēmēnquidēn Ĕshē icsambo icquidtsen daēd uain seuanac caondash. ²⁶ Adoac adosbiecquid canidotsēcnubi abēdi tancandaēdpamboec icsambo icquid canidotsac caondash. ²⁷ Adsho istanquin yuabon aton icbo chuituidpac caondash. “¿Pete Ĕshēda sio?” cac: “Ai,” qesho tantiash: “Icsambo icquidbēd tancandaēdec canidopacbo. ¿Mitsipaden sio?” quequin yuabon icbo chuipac caondash. ²⁸ Adoquien: “Chieshēmēnquidēmbien seuanchitash,” cac: “¿Chicshunetanquindambi icpe?” yua qesho: ²⁹ “Padi. Petebēdi chiquidtsiash. ³⁰ Aidbēdi ma canipanuna. Ĕshēacsho tacuesquimbi teshun sianun nanuna. Adoshombic icsambo icquid tsindobanshun nēdēncanun nanuna. Icsambo icquid nēdēncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusēn chuipondash.

Esus tantiaquido dadpen yante chiaid
(*Mad 4.30-32; Duc 13.18-19*)

³¹ Adshumbic abi tantiaquido dadpen yante tantiamenuen Esusēn naden chuipondash. —Cuēte bacuē Ĕshēmpi ³² pistsēcquidi nuamboshē caniec. Aid cuēte cuidin uicchun dadpen tabadtonec. Adecbidi ēbi tantiaquid abentsēcshun bēdamboec tabadquin ismiac ēbi tantiaquid dadpenquo yanendac —quepondash Esus.

Abi bēdamboen tantiate Esusēn chiaid
(*Mad 4.33-34; Duc 13.20-21*)

³³ Adshumbic Esusēn abi bēdamboen tantiate chuipondash. —¿Mitsipad nami uaid icpec? Aniactšēc nami uashun utsibēdta daēd uain cabiunac abichobi batambo yanec. Adembidi ēbi bēdiactšēc tantiatsēcboedi Ĕmbi chiaid tantiash ēbi bēdamboen tantiaquid yanendac ³⁴ —quequin Esusēn chuipondash. Sebadēnquo chienquo icquin ompoacbimboenuidi Esusēn chuipondash. ³⁵ Aden Esusēn chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadēnquo chienquo icquin ompoacbimboenuidi chuibanendambi.

Ĕndenquimboshē matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”
quequin nuquin tsusedpan Esusën chuite dada uapampic.

Ëshë icsambo icquid seuanaid sebadënquio chiaid

³⁶ Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmëncquidën ëshë icsambo icquid siaid nec,” quequin mimbi chuiboed en sebadënquio chui, Icho. Tantuanu. ¿Atotsi chuitiadquio icquin aden chio? ³⁷ —caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin Papan chiaidquio tantiamequin matses bëdambo icmequid nebi. ³⁸ Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshëncquid Satanasën yuaido icsambo icquid siaidbimboecquid nec. ³⁹ Padnuc ëshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquio iquec. Adsho badedi cuidenquio icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuc ambi chiapadën Nuquin Papan abi yacnoshon uaido mayan bëdabon ëmbi chiapadomboen naindac. ⁴⁰ Icsambo icquid tsindoshon nëdëncacimboen Nuquin Papan cuidte ushëmbi icsambo icquido cuidendac. ⁴¹ Ëmbimboen mayan bëdabo namendac. “Icsamianquidobëdta icsaidotedi bedshun chian anëdënquiacno nëseca,” quequin ëmbi chiac ⁴² bedshun chian anëdënquiacno nësecaindac. Adoac natiaic mëyadbudec sidquequiendac. ⁴³ Padnuc ëbi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiapadomboen nata —quepondash Esus.

Nuquin Papabëd tabadte bunquiota, quiaid

⁴⁴ Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icho aid piucquid meneshun: “Nëbi con tied nec,” queshun piucquid ompoampid bedpac caondash. Adomboen matsesën Nuquin Papabëd tabadte bunquin aton nauidi nainquio icquin Nuquin Papan chiapadomboenuidi nac bëdambo ictsiash.

⁴⁵ Tantia. Casëdu bëdaidquio bunaidtsen mibi chuinu. Dadan casëdu bëdaidquio bunquin bednuc nibëbenepac

caondash. ⁴⁶ Adshun bēdaidquio istuidash: “Nadquid utsi nibēdec,” quiash comapenec bunquiac caondash. Adshun aton na abitedimbo menequin piucquid bedshun casēdu icbo menequin aid casēdu bedac caondash. Adomboen Nuquin Papabēd tabadte bunquin matsesēn ēbi tantiaquiac bēdambo ictsiash —quepondash Esus.

Nuquin Papan cuidte ushē Esusēn chiaid

⁴⁷ Adshumbic Esusēn naden chuipondash. —Tantia. Mibi chuinu. Nuēcquid nibedacbimboen naindami. Isadaidbon nuēcquid dadpenquio bedte nēshaid dapa acte nēnequin ⁴⁸ nēshaid cubu-cubuctsēcquio icnuc nuēcquid bedshun acte cuēman tabadquin nuēcquid nibedquid. Nuacquid sandobanquin pistsēcquid acte nēsecaquid. Aden Isadaidbon nuēcquid bedquid. ⁴⁹ Adomboembidi namendambi. Nuquin Papan cuidte ushē chonoc ambi abi yacnoshon uaido mayan bēdabo namendambi. Adoac choshon nibedacbimboen matses bēdambo icquido Nuquin Papa yacno nidmequimbi ⁵⁰ icsambo icquido chian anēdēnquiacno nēsecaindac. Adoac natiaic shubiquiendac —quequin Esusēn Nuquin Papan cuidte chuipondash.

⁵¹ Adshumbic: —¿Ada ēmbi chuiboedtedi tantie? —caquini: —Ai, tantiembi —quepondac. ⁵² Adsho tantiashun Esusēn chuipondashi. —Nuquin Papan chiaid chuibanquid mibi iquendac. Matsesēn aton na ēndenquimbo dayun uanēdaidbēdta aton na chuca ismequin chiacbimboen mimbi naindac. Nuquin Papan chiaid ēndenquimbo dada uampidbēdtabi Nuquin Papan chiaid utsi ēmbi chuiboedquio mimbi chiendac —quepondash Esus.

Nasaded yacno Esus nidaid

(Mad 6.1-6; Duc 4.16-30; Uan 4.44)

⁵³ Adanec auēshquiobi nidequi ⁵⁴ abi caninēdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bēdamequid yampash? ⁵⁵ ¿Nuqui isacmaidta nedic? Ma aton papa cuēte nacnenquid nepaboc. Ma aton tita Madia nepayoc. Aton utsibo nēidtedi iccosh. Nēidic Acobo. Nēidic Ose. Nēidic Simon. Nēidic Udas. Aidtedi aton utsibo iccosh. ⁵⁶ Aido nēmbo tabadosh. Aton chibichedotsen nēmbo tabadosh. ¿Comapenen tantiaquidta nedic? Ma adquidpenquio neyoc —quequin ⁵⁷ Esus chieshēnquin tantienquio icpondash.

Adsho tantiashun Esusën nadopondash: —Nuquin Papan: “Ëmbi tantiamiacpaden chuibanta,” caidën chiac utsibon tantiaquid. Adquidën abi caniacnoshon chuibansho tantienquo icquid —quepondash Esus. ⁵⁸ Adshun nadatiambo icquin nabanquin daëdpactsëc ismetsëccondash: —“Nuquin Papan chomiaidquo nec,” quetiapimbo iquec —queshun.

14

Uan acten mentoanquid

unës uaid

(*Mad 6.14-29; Duc 9.7-9*)

¹ Adnubien ancaquidën Edodes caidën Esusën comapenen tantiaquin nabanaid chuisho tantiapac caondash. ² Adshumbic aton yuabo chuipac caondash. —Uan pado acten mentoandened nepash icnui. Ëmbi mapi butemiondaiddi uincuempash icnui. Adquid icquin comapenen tantiaquin nabampash icnui —quepac caondash Edodes.

³⁻⁴ Edodesën Uan cuesuniac caondaiddi chuinu. Tantia. Uanën: —Mimbi bedaid Edodias caid min chidopenquo nec. Min utsi Uedipe caidën chido bedshun Nuquin Papan chiaiddi mimbi niaquec —cadoniaquien Edodesën chieshtoshon uidën uameshun Uan quënën nauedmepac caondash.

⁵ Adshumbic Uan cuesunetiadquo icquimbi aton matses: —Nuquin Papan chiaiddi chuibanquidquo nec —quesho tantiashun aido dacuëdënquin Uan badedi cuesunenquo icpac caondash.

⁶ Adshumbic Edodesën: —Ëbi tishaid ushë nec —queshun matses dadpen aton shubun puduedmeshun pemepac caondash. Adnubien ambi inaidën champin Edodesën pemiaido baidaquin ismepac caondash. Adsho isumbic Edodesën: —Bëdamboenshë mimbi naic —queshun ⁷ naden chuipac caondash. —Tantia, champi. ¿Atotsi buneque? Mibi bunaidquo mibi menenu. “Nuquin Papan cuidnushe,” quiaish muatiapimbo iquebique. En ëbi chui —capac caondash Edodesën. ⁸ Adoquien champin aton tita chuitampac caondash. Chuitanec choshon anin chiaiddi chuituidpac caondash. —Uan acten mentoanquidën mapi butetanquin pada-padaiddi dapan ananshun badedi ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

⁹ Adoquien Edodesën: —¿Atotsi quepequini ado? ¿Adoenquo ictiadtsimbi icpoba? —quequin ambi chuiboed niactiadquo icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰ Adoac quënën tsadacnobi Uan mapi buteshun ¹¹ mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

¹² Adnubien Uanböd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

Comapenen tantiaquin 5000tedi pemiaid
(*Mad 6.30-44; Duc 9.10-17; Uan 6.1-14*)

¹³ Nidshumbic: —Mibi acten mentondaid mapi butiaccosh —catuidpondash. Adsho tantianec cano antabëdtoshon chian potiash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

¹⁴ Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquio icquin daic-saidotedi bédamebampondash.

¹⁵ Ushë budambi Esusböd icquidon: —Inchësheque. Pete nibëdacno nuqui tabadeque. Nidaneme, Icbo. Shubu dadpen icquid utsi-utsiec yacno nidshun ma piucquid menequin ma pete bednu —caquien ¹⁶ Esusën: —Padi. Ma tabadnu. Mimbibi peme —capondashi.

¹⁷ Adoaquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. ¹⁸ Adsho: —Aidtedtsëqui beccho —cac meniondambi.

¹⁹ Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

²⁰ Adoaquien nua cubudcuededquin pebededpondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubucubuctsëcquio iquec pete cuësh-cuëshaid napi uaid. ²¹ Aden matses dadpenquio pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

Acte bëntse Esus choaid
(*Mad 6.45-52; Uan 6.16-21*)

²² Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. ²³ Adec nidanebon Nuquin Papa chuinec macuësh dectatoash abentsëqui Esus inçhëshpac caondash.

²⁴ Adnubien chian dapa potequi abëd icquidotsen inçhëshpondash. Chian nënantanquio yanubi cunquetu-idpondash. Adnuc acte comapenec tèccuasquampondash uncadenquio yec. Comapenec acte ishcuđnuc cano mentoadtiadpambo icpondash.

²⁵ Adnubien badiadte anoentsëqui acte bëntse Esus chopondash. ²⁶ Acte bëntse chosho isashini: —Podobitsi nec —quiash dacuëdtanec sidquecuededpondac. ²⁷ Adshobini Esusën: —Ëbien neque. Dacuëdenda —capondash. ²⁸ Adoaquien Petedon: —¿Con Icbombobida ne? Con Icho icquin: “Acte bëntse cho,” ëbi ca —capondash.

²⁹ Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëccondash. ³⁰ Esusuidi isec bëdamboec niduidtsequi acte comapenec tèccuasquesho isash dacuëdtanec acte bëntse niduidtsëcboedi mentoadtsempondash. —Ëbi bed, Icho. Mentoadebique —caquien ³¹ Esusën badedquio bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

³² Adtanec Petedobëdi cano antsadtonobien cunqueboedi cunquenquio yampondash. Actetsen tèccuasquenquio yanondash. ³³ Adsho isun cano antabëdquidon: —Mibi bëdamboshë iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

Quenesaded yacnoshon Esusën bëdamiaid
(Mad 6.53-56)

³⁴ Adashic chian potiash Quenesaded yacno pudundopondash. ³⁵ Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. ³⁶ Bë-bëshumbic: —Dashcuteuidtsëqui mishashi bëdantsiash —queshun Esus chuituidquin: —Min dashcute cuëmano daicsaido mishme —cac mishmiaqui bëdampondash abitedi.

15

Padiseyobo icsaid Esusën chiaid
(Mad 7.1-13)

¹ Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh chochoquin Esus istuidpondash. ² Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquo icquin nuquin tsusedpabon chiaid ma niac-niacpaboc —quepondash Esus chieshënquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc. ⁴ Tanta. Mibi chuinu. “Titabëdta papa chieshënenquo icquin bëdamboen tantiata,” quequin Nuquin Papan chiampidquo ma mimbi niacpaboc. Adem-bidi: “ ‘Con pa unëspashun,’ quec chieshëmënquid icsho unës uaquid. Adem-bidi ani icsamboen chuishunsho unës uaquid,” quequin Nuquin Papan chiampid utsi mimbi niacpec. ⁵ Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bëdambo ictsias,” mibi quepec. “ ‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquo iquembi. Nuquin Papa menetequid nec,’ quequidën ⁶ cudasënac bëdambo ictsias,” mibi quepec. Aden nuquin matsesën chiaid naquin Nuquin Papan chiaidquo ma mimbi niac-niacpayoc. ⁷ “Nuquin Papa tantiaquidquo nebi,” quec muaquid mibi nec. Ëndenquimboshë Nuquin Papan chuimiatic nuquin tsusedpa Isayas caidën mimbi icsamboen tantiate chuiquin dada uapampic naden.

⁸ “Isaidaidbo: ‘Nuquin Papambo tantiembi,’ quepec.

Adboedëmbi ëmbi chiaid niacquin ëbi tantienquo iquec.

⁹ ‘Ma Nuquin Papan ëbi bëdamboen isnu,’ queboedëmbi ëbi bëdamboen tantienquo iquec.

Ëmbi chiaidquo namenquo icquin aton matsesën chiaiduidi namepec,”

quequin Isayasën Nuquin Papan chiaid dada uapampic —quequin Esusën abi chieshënquido chushcapondash.

Ana shëcuënuësh choaid chiaid
(Mad 7.14-23)

¹⁰ Adshumbic abi isec datsidadquido ompoacbimboen chuipondash. —Tanta. Mibitedi chuinu. ¹¹ Ana shëcuën puduedaidën matses icsaten mimbi dampec. ¿Adquidënda matses icsapec? Padenquo. Ana shëcuënuësh choaidëmbien matses icsatsias —quequin Esusën chuipondash. ¹² Adnubien abëd icquidon: —Mimbi aden

chuiboed tantiashun padiseyobon mibi chieshënosh, Icho —caquien: ¹³ —Dacuëndenda. Icsa bescatanquin tsindoshon nêdëncacimboen ambi tantiamiabi yaido ambembi chuiquido Nuquin Papan cuideque. ¹⁴ Dacuëndenda. Padiseyobo bëshuaidbimboec icquido neque. Bëshuaidën aton matses bëshuaid utsi bëdamboen buantiapimbo iquec. Buanuec abi shëcuë ampaëdtsiash. Adembidi Nuquin Papan chiaidpenquoio namequin aton matses bëdamboen tantiametiapimbo iquec —quepondash Esus abëd icquido chiec.

¹⁵ Adshobien Petedon: —Mimbi ana shëcuënuësh choaid quequin chuiboed tantiambo iccombique. Aid sebadënquoio chui. Tantianu, Icho —caquien: ¹⁶ —¿Tantiamboda icco? ¹⁷ Chuinu. Tantia. Ana shëcuën puduedaid mimbi peboed min pucun uedoash chimute shëcuënuësh choec. Adquidën Nuquin Papan chiaid niacmenquoio iquec. ¹⁸ Matses onquaidimbi ana shëcuënuësh choaid caoc. Abibi uquëducuësh onquec: “Adoembi,” quequin otacquoio tantiaquin naic matses icsatsiash. ¹⁹ Icsambo icquido yec: “Ai, adoembi,” quequin otacquoio tantiashun Nuquin Papan chiaid niactsiash nadquidën. Nêidic unës uanquid. Nêidic aton chidopenquoio chudquid. Nêidic aton bënëpenquoio chudmequid. Nêidic aben uequid. Nêidic ampequid. Nêidic muaquid. Nêidic icsamboec chuishumënquid. ²⁰ Adquidtedi: “Ai, adote bunebi” quequin otacquoio tantiash icsaquid nec. Padnuen penush mëpamëdenquoio icquin Nuquin Papan chiaid niaquenquoio ictsiash —quepondash Esus abëd icquido chiec.

Isadaidpembo chidon Esus tantiaid
(Mad 7.24-30)

²¹ Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

²² Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuduedaid yec natiambo iqueque. Con champi bëdameta —caquien ²³ Esusën ëcbedenquoio icpondash. Ëcbedenquoio yaqui chidon tsibanbanquin cuënbampondash. Adsho tantiashun Esusbëd icquidon: —Chieshanquiecuëdpeque. Cuemepa —caquien ²⁴ Esusën cuemenquoio icquimbi aid chuiquin: —Nuquin Papan chiapaden Isadaidbo matsesba Nuquin Papa bëdamboen ismete tantiamenuec nebi. Bënudacimboec icquin Nuquin Papa tantienquoio icsho aidoba tantiamenuec nebi —quepondash Esus.

²⁵ Adsho tantiash nidenquo yec chido cuëdboed Esus ismequin danëshën sebudtsec: —Ëbi nashunta, Icbo. Con champi bëdameta —queshobien Esusën: ²⁶ —¿Aton bacuëbo pemenquo icquimbi aton opa pemiacta bëdambo icpatsiash? Padenquo. Adembidi Nuquin Papan con matses caidotedi tantamiabi utsibo ëmbi nashunac icsambo ictsias. Isadaidboba tantia-menuec nebi —quepondash Esus.

²⁷ Adsho tantiashun chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëccquid. Adembidi mimbi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta ²⁸ —caquien Esusën: —Ai. Ëbi tantiaquidquo mibi nec. Mimbi chiapadec min champi bëdanendac —quesho tantianec aton shubuno nidshun isquien aton champi bëdanac Esusën chuinubi.

Daicsaïdo dadpen Esusën bëdamiaid

²⁹ Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

³⁰ Tabadtuidsho isun matses dadpenquo chochoquin daicsaïdo dadpen Esus ismenuen bë-bëpondash. Tidinequido yec bëshuaido yec shëquëquenquo icquido yec onquesabo yec daicsaïdo utsibotedi yec quenuc bë-bëpondash. Adsho Esusën bëdamebampondash. ³¹ Bëdamiac onquenquo icboedi onquianondash. Bëshuacboedëmbi isbenondash. Capuenuquo icboedi capucuenondash. Daicsaïdo utsibo adecbidi bëdanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bëdamepash icnui. Nuquin Papa bëdambo iquec —quepondash Esusën bëdamiaid tantiash.

*Matses 4000tedi pemiaid
(Mad 8.1-10)*

³² Adec tabadsho isashien Esus: —Nëido tantiac unësquo iquec. Ëmbi nabansho isnuéc choash 3tedec ushquin piac ambi bëboed pete naimëdaccosh. Ëmbi: “Nid,” cac nidnuequi bunambi padishtiash. Pemiabi nidmetiapimbo iquebi —quepondash. ³³ Adsho tantiashun abëd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

³⁴ Adoquien Esusën: —¿Tedtsi panëmpi iquec? —cac: —Sieteted ictsec. Nuëccquidëmpi daëdpactsëc ictsec —quesho ³⁵ tantiashumbien abi datsidadquido chuiquin: —Nëmbo tabadbud —capondash. Adoac tabadbudpondash abitedi.

³⁶ Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bëdambo iquec, Papa —queshun pete cuësh-cuëshbantsëcshun abëd icquido menebampondash: —Pemeban —quequin. Adoac abitedimbo pemebampondash. ³⁷ Aden pemiach abitedimbo nua cubudcuededpondash. Piascho isun pequin napi uaid bedbanquin tsitsan 7ted icnuc cubu-cubuctsëcquio icnuc sandobampondambi. ³⁸ Esusën pemiaido dadpenquio icpondash. Tambanac 4000tedi dada icpondash. Chido bacuëbobëdta tambanambo iccondambi. ³⁹ Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mactada caid yacno pudundopondash.

16

Saduseyobon: Èbi isme, quiaid
(Mad 8.11-13; Duc 12.54-56)

¹ Pudundoanec nidshobi anocquidon abi chieshënquidon Esus chuituidpondash. —“Nuquin Papan chomiaid nebi,” quequin comapenen tantiaquin nabanquin ëbi isme —cabededpondash padiseyobobëdtan saduseyobon.

² Adshobien Esusën: —Nuquin matsesën chiaid mimbi tantiec. “Inchëshbudtsëqui abu piumbo icsho isash: ‘Tanunquio badiadec,’ quequid. ³ Badiadnubi abu inchëshpambo icsho isash: ‘Ue dapa choec,’ quequid,” quequin nuquin matsesën chiaid mimbi tantiec. Aden chiaid tantiacbimboen bëdamboen tantiatiadquidi Nuquin Papan nëbimbobi naid mimbi tantienquio iquec. ⁴ Icsambo icquid icquimbi mimbi: “Èbi isme,” cadednepec. Nëbi mibi ismenquio iquembi. Nuquin Papan nuquin tsusedpa Onas chishcambiecquid dapan chebudacsho daëdec ushun ucbudmiac bimboec unës uacsho chococac daëdec ushash uincuenendabi. Aden ëbi tantiesabo ismendambi —quianec nidpondash Esus.

Padiseyobon chiaid tantienda, quiaid
(Mad 8.14-21)

⁵ Adanec nidec chian budash cano antabëdtoshon chian poteapondash. Chian potequien Esusbëd icquido: —Pete nianchitombi. Bëtiadquidi nepobi —quepondash. ⁶ Adshobien Esusën abëd icquido chuiquin: —Padiseyobëdtan saduseyobon naid pan bidiscametebimboecquid iqueque. Ista —caquien ⁷ tantienquio yec abëd icquido nadec onquecuededpondash. —Nuqui niamboed pete chiequi nepanui —quepondash. ⁸ Adsho ambembi tantiash Esus: —Èbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquio. ⁹ ¿Bëshunashta mibi nepe? Pete 5tedtsëcboedi ëmbi

5000tedi pemiaidën napi uaid dadpen iccondaïd ¿tantiën-quioda yano? ¹⁰ ¿Adembidi pete 7tedi ictsëcboedi ëmbi 4000tedi pemiaidën napi uaid dadpen tsitsanën sandoboed tantiën-quioda yano? ¹¹ ¿Aden comapenen tantiaquid icquimbidambi pete niamboed chuipadi? Padenquio. Pan bidiscamete pictsëc cabiunac pan abichobi nua bidisquiacbimboecquid padiseyobobëdtan saduseyobon chiaïd iquec –quepondash Esus.

¹² Aden chuïsho tantiash abëd icquido nadpondash. –Pan chienquio icquimbi nuquin matses tsusiobon chiaïdshenda capec. Aïdo caic: “Icsamenda,” quepecshenda nïosh. “Padiseyobon chiaïdbëdta saduseyobon chiaïd tantienda,” quepecshenda nïosh –quepondash Esusbëd icquido.

Nuquin Papan Mado mibi nec, quiaïd

(Mad 8.27-30; Duc 9.18-21)

¹³ Adash yuectaniash puduanec nidequien Esus nidaïd utsi Sesadeya Uedipo caïdën nidanepondash. Adshumbic abëd icquido chuimepondash. –Utsibon ¿tsutsi ëbi caosh? –caquien: ¹⁴ –“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaïd oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh –capondash abëd icquidon.

¹⁵ Adsho tantiashun Esusën: –Ma mimbibi. ¿tsutsi ëbi mimbi cao? –caquien ¹⁶ Petedo Simon caïdën: –“Quidistu caïd Nuquin Papan chomiaïdquio nec,” caombi mibi. Aton Madombo mibi nec –capondash.

¹⁷ Adsho tantiashun Esusën: –Nuquin Papan aden tantiamic mimbi bëdamboen chioc, Petedo. Onasën mado Simon caïd yec matsesien mibi nec. Adquid icquimbi matsesën tantiaïd chienquio icquin Nuquin Papan tantiamiaïdquio mimbi abimbo chioc. ¹⁸ Tantia. Ëmbitsen mibi chuïnu. “Cuënotebimboecquid nec,” quequin mibi Petedo cuë nondambi. “Cuënote dapa utsi ictiapimbo yacimboc chieshtoenquio icquid iquendac,” qeshun mibia ëbi tantiaquido chuïquid dapambo icmendambi. Adec mimbi namiaïdo ëbi tantiaquido iquendac. Satanasën aïdo: “Nëïd yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac. ¹⁹ Padnuc Nuquin Papan chiacpadomboen ëbi tantiaquidon nate mimbi chiendac. Adembidi ëbi tantiaquidon natemaidtsen mimbi chiendac –quepondash Esus Petedo chiec.

²⁰ Adashic abëd icquido abitedi chuïoic: –“Nuquin Papan chomiaïdquio nec,” quequin utsibo ëbi chienda –quepondash Esus.

Abi unēs uate Esusēn chiaid
(*Mad 8.31-9.1; Duc 9.22-27*)

²¹ Adshumbic tauaquin abi unēs uate chuidondash. — Shubu dadpen icquid Edusaden caid yacno nidendabi. Anoshon nuquin matsesēn ēbi chieshēnquiendac nēidtedshun. Nēidic tsusiobon. Nēidic nēish yua abided unēs uaquido chuiquid dapabon. Nēidic Moisesēn dada uampid chuibanquidon. Aidedishun mēyanquioquin ēbi unēs uamendac. Adoacsho chococac daēdec ushash uincuenendabi — quequin chuisho ²² tantiashun Petedon uanotantsēcquin tsadumbudshun Esus chuipondash. — Unēsquio icnuc mimbi chieque. Aden chienda. Ma mibi unēs uatiapimbo icpayoc — capondash Petedon. ²³ Adoquien Esusēn: — Satanasēn oncamiac Petedo adec onquec — queshun Petedo isquin Satanas chushcapondash naden. — Cuen, Satanas. Nuquin Papan chiaid mimbi ēbi niacmetiadquio iqueque. Cuen — quetanec Petedobi chiec: — Matsesēn tantiaid chuiquimbi Nuquin Papan tantiaidquio mimbi chienquio iccoc — capondash.

²⁴ Adashic abēd icquidotedi chuioaic: — Ēbi tantiaquidon aton nauidi nainquio icquin ěmbi chiacpadomboen natsiash. Adsho chieshēmēnquidon: “Unēs uachitomane,” cac chieshtoenquio icquin ēbi tantiatsiash. Adquid ēbi tanti-aquidquio nec. ²⁵ Padnuen ēbi tantiatsēcquid: “Esus tantiasho unēs uachitoshe,” quiash ēbi tantienquio yanec unēsash Nuquin Papan cuidaidobēd nidendac. Padnuen chieshtoenquio icquin ēbi tantiaquid Nuquin Papa yacno tabadendac. ²⁶ ¿Nuquin Papa tantienquio yec tabadecta matses bēdambo icpatsiash? Abi bunaidtedi bedquin Nuquin Papa tantienquio yec unēsash ¿mitsimbo tabadpatsiash? Nuquin Papabēd tabadte bunquin ¿atotsi menepatsiash? ¿Piuquid meniashta Nuquin Papa yacno tabadpatsiash? Padenquio. Adotiapimbo iquec. ¿Atoda meniantiapimbo iquec? ²⁷ Ēmbien matses cuidte chiendac. Nuquin Papa yacnuēsh ambi abi yacnoshon uaido mayan bēdabobēd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bēdamboec tabadquid Nuquin Papabēd tabadmequin Nuquin Papa tantienquio yec icsaquido icsano nidmendambi. ²⁸ Tantia. Chuinu. Utsi-utsiec unēsabi icquin ēbi tantiaquido dadpen yansho mimbi isendac — quepondash Esus.

17

Esus bēchamauanquiecsho isaid
(*Mad 9.2-13; Duc 9.28-36*)

¹ Aden chiash 6tedec ushanec nidquimbi Esusēn abēd icquido 3tedtsēqui buampondash. Petedo yec Acobo

yec Acobon buchi Uan yec quetsëcnuc buanash macuësh dapa dectatoash mananënquoio tabadtuidpac caondash. ² Tabadtuidshun isquien Esus utsiacbinboec isadpec. Aton dashcutebëdi aton bêtantete ushëbimboec bëchamauanquiec yanac caondash.

³ Esus bëchamauanquiec icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash. ⁴ Adsho isashien Petedo: — Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuc shubumpi uatsëcnuna, Icho. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi ⁵ abu ushu bëchamauanquiec icquidën isadenquoio icnuc bëtimpac caondash. Adnubien abu ushu nënantanuëshquoio Nuquin Papa onquiampac caondash. —Nëid con Madombo nec. Èmbi tantiaidquoio yec èmbi bëdamboen isaidquoio neque. Nëidquoio tantiaata —quec dacuëdampamboec onquenubien ⁶ uinte paëdtampamboec dacuëdtanec uebudcuededpac caondash Petedo chedo.

⁷ Adshobien Esusën camishquin: —Dacuëdenda. Nidto —cac ⁸ nidtoquin isquien Esus abentsëqui iquec.

⁹ Adtanec macuësh budequi Esus: —Mimbi isboed nëbi utsibo chienda. Unës uac ëbi uincuenacsho isun chianta — quepac caondash abëd icquido chiec.

¹⁰ Adsho tantiaish Petedo chedo: —“Nuquin Papan chomiaidquoio nec,” quequin nëbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —qeshobien ¹¹ Esusën: —Abimbo chiosh. “Edias yampid bëyuc choshon: ‘Nuquin Papan chomiac bëdambo icquid choeque. Bëdamboec tabadta,’ quequin chiendac,” quequin abimbo chiosh. ¹² Adquid Ediasbimboecquid chondash. Choacsho tantienquoio icquin matsesën abi bunacpaden unës uapac caondash. Adembiti Nuquin Papan chomiaid icsho ëbitsen chieshënquin unës uaindac —quesho tantiaishien: ¹³ —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

*Madompi dapuduedaid podobitsi icsa cuemiaid
(Mad 9.14-29; Duc 9.37-43)*

¹⁴ Bëchamauanquiec ictanec choequi abëd icquido utsibo yacno choquin matses dadpen aido datsidadacsho Esusën is-tuidpondash. Adec Esus chosho isumbien unësanetsëcquidën

papan Esus ismequin danëshën sebudshun chuipondash.
 15 —Con mado bēdamboen isquin bēdameta, Icho. Baded-
 badedquiec unēsaneccuēten pichi-quianec. Adecbidi unēsaneccuēten
 acten mentoadtsenaccosh. 16 Mibēd icquidon bēdamete
 danquin bēuidombi. “Nē bēdame,” cac bēdamenuen tanui-
 dosh. Bēdamenquio iccoshe. Mimbimbo bēdameta —caquien
 17 Esusēn ambo icquidotedi chuipondash. —Ēmbi nadatiambo
 icquin nabanquin ismiaqui mimbi ēbi tantienquio iquec.
 Adsho isash chieshtoash cuentiadquio icchitebi. Adtiadquio
 yequi padenquio iquec nebique. Min mado beccho —cac
 18 bēsho istanquin Esusēn podobitsi icsa chushcapondash. —
 Padi. Daicsa uainda —cac podobitsi icsa cuenubi madompi
 bēdampondash.

19 Adsho isun abēd icquidon Esus chuipondash utsibo
 tantiamenquio icquin. —Ēmbi: “Cuemenu,” cac ŷatotsi
 quiash podobitsi icsa cuenenquio icposh? —caquien: 20 —
 Nuquin Papa bēdamboen tantiaquin mimbi bēdamboen nat-
 senoc. Mimbi bēdiactsēc tantiatsec. Pete ēshēmpi mostasa
 caid pistēcquidi siac nua yec canitsiash. Adecbidi Nuquin
 Papa tantiatsēcboedi: “Ambi natiapimbo ictequid nibēdec,”
 quequin abimbo tantiaquidquio yanshun comapenen tan-
 tiaquidbimboec mibi ictsiac. Adquidēn nēid macuēshquiobi
 cain: “Uquē manēd,” cac manēdtsiash. Aden mimbi: “Ēbi
 bēdamboen nameta, Papa,” quequin Nuquin Papa chianiac
 aidēmbi mimbi: “Ēmbi natiapimbo ictequid nec,” caid mibi
 bēdamboen nametsiash. 21 Nēbi ēmbi cuemeboed abembi
 cuentiapimbo icquid nec. Nuquin Papauidi tantianuen buna
 mēmunquin Nuquin Papa chianeshun adquid cuemequid —
 quequin Esusēn chuipondashi.

Abi unēste Esusēn chuioaid
 (Mad 9.30-32; Duc 9.43-45)

22 Adanec aton nidaid Cadidia yacnobi capucuenequimbi
 Esusēn abēd icquido chuipondash. —Ēbēd icquid
 abentsēcshun ēbi chieshēnquido ēbi bedmendac. 23 Bedshun
 ēbi unēs uamendac. Aden unēs uamiacsho chococaquini
 daēdec ushash uincuenendac —quesho tantiatanequien abēd
 icquido: —Unēsquio icnuc chiec —quiash shubiantiadtsēcquio
 icpondash.

Chuiquid dapa menetequid piucquid Petedon istuidaid

24 Aden chianec nidequi shubu dadpen icquid Capednaun
 caid yacno Esus chopondash. Adnubien Nuquin Papa tabadte
 shubu uashunaid nacnemenuequin piucquid bedquidon Pe-
 tedo chuituidpac caondash. —Nuquin Papa tabadte shubu

uashunaid nacnemenuen ¿ada min icbon dos dada uatsaid piucquid shocoshēmpi abentsēc menepatsiash? —cac ²⁵ Petedo: —Ai, menetsiash —quepac caondash. Adanec nidec shubun puduedshobien Esusēn ambia Petedo chuipondash. —¿Atotsi mimbi chie, Simon? Aton matsesēn na nacnemenuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aido bedshunenquio icquin ¿ada ambi bedaido aton yuabo piucquid bedshumpec? —caquien ²⁶ Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ēbi bedshuntiapimbo iquec. ²⁷ Aden tantiaquimbi: “Nēishmushe,” queshun menenun nanuna. Chianēn ansemetan. Tauaquin ansemiaidi ancanshun anisquin 4 dada uatsaid piucquid shocoshēmpi abentsēc mimbi istu-idendac. Aid bedshun piucquid bedshumēnquido menetanta. “Nē con icbon nabēdi con na nec,” quequin menetanta —capondash Esusēn. Adoac Petedon Esusēn chiacpadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaid

(Mad 9.33-37; Duc 9.46-48)

¹ Adshumbic abēd icquidon Esus chuipondash. —Abitedishun Icbo icquin matses mimbi namendac. Ēbi chedo caic ¿mitsicquid mibēdtan chuiquid dapa mimbi icmepatsia? —quesho ² tantiashun abi tabadacno nēnantanquio bacuē tsaduntsēcshun Esusēn chuipondash. ³—Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuēn amēn chiacpadomboen nachimboen ēbi tantiaquiota. Adash ambi namiaid yanash Nuquin Papa yacno mibi puduedendac. ⁴ Aden ēmbi chiacpadomboen naquidquio icsho mibi Nuquin Papan: “Bēdamboshē iquec,” caindac. ⁵ Nadquid bacuēbēdta ēbi tantiabentsēcquid bēdamboen tantiaquidēn ēbitsen bēdamboen tantiendac —quepondash Esus.

Tantiabentsēcquido icsamete chiaid

(Mad 9.42-48; Duc 17.1-2)

⁶ Adshumbic padpiden chiec: —Ēbi tantiabentsēcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unēsacsho isun: “Bēdambo iquec,” catsiambi. “Cuēnote yuēmboshē icquid tēdectanshun acte nēnepatecnēdan,” caimbi

icsamiantē bunquidquio. ⁷ Aden ēbi tantiatsēcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mēdanten naic mibi icsaic. Mēteshuniac bedtiapimbo yac bimboec icsainquio yec ēnēdta. Taēn capuec mibi icsaic. Tateshuniac caputiapimbo yac bimboec icsainquio yec ēnēdta. Ēnēdenquio icsho Nuquin Papan mibi cuidendac. ⁹ Adechidi ēshēn isec mibi icsate bunquiec. Ēshē chicshuniac bimboec icsainquio yec ēnēdacsho: “Bēdambo iquec,” catsiambi. Ēnēdenquio icsho Nuquin Papan chian anēdēnquiacno nēsecaindac —quequin Esusēn chuipondash.

*Matses ēbi tantiamete Nuquin Papa bunaid
(Duc 15.3-7)*

¹⁰ Adashic padpidec: —Nadquid bacuēmpin ēbi tantiatsēcsho isun: “¿Adtsēcquidēmpin quibida bēdamboen tantiapec?” cainda. Nuquin Papan abi yacnoshon uaid mayan bēda aid bacuēbo dayun uaquid icquin Nuquin Papa yacno puduedshun mimbi mamēnshumboed Nuquin Papa chuinushe. Adtsēcquidēmpi mamēnshunenda. Ēbi tantiabentsēcquido con Pan tantiaquieque. ¹¹ Ēmbitsen aido tantiēmbi. “Bēnudaid istuidac bimboen ēbi tantienquio icquidobi ēbi tantiaquido icmenu,” quiash matsesondabi —quepondash Esus.

¹² Adashic padpidec: —¿Mitsipadquio nuquin matses icpec? Nēish yua obeca dadpen 100ted dayun uaquidēn aton yua tambanac abentsēc nibēdsho istanquin utsitedi nianshun aid abentsēc nibēnbenequin istuidquid. ¹³ Aden istuidash comapenec cuishonquequid: “Con yua nibēdantsenquiac,” quiash. Aton yua utsi yacno bēash abi icboctedi icsho isash bēdambo icquid. Adechidi matsesēn ēbi tantiabensho isash Nuquin Papabēd cuishonquebi bēnudaid istuidac bimboec. ¹⁴ Icsaido cuidacno matses nidmete Nuquin Papa bunenquio iquec. Matses bēdamboen isquin abēd tabadmete Nuquin Papa bunquiec —quepondash Esus.

*Chieshēnquidobēdi onquete chiaid
(Duc 17.3)*

¹⁵ Adashic padpidec: —¿Ada ēbi tantiaquid utsin mibi icsa uaosh? “Ai, icsa uaoshi. Chieshēmiantiadquio icchitosh,” queshun nadoac bēdambo icsiash. Aid abentsēqui chuiquin aidbēd bēdamboec onquequin: “Ēbi icsa uaquin Nuquin Papan chiaid mimbi niac-niaccoc. Adec icsainquio yec ēnēdta,” mimbi cac: “Ai, adebi,” quiash mibēdi bēdamboec tabadtsiash Nuquin Papa tantiesabimboec icuidboedi. ¹⁶ Mimbi: “Icsainquio yec ēnēdta,” caqui: “Padi. Adequi icsaibi,” quesho

tantiaashun ëbi tantiaquid utsi beduanshun aidbëdtan chui-tanta. “Nuquin Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota. ¹⁷ Mimbi buanaidëntsen: “Adec icsainda,” caqui: “Adequi icsaibi,” qesho tantiatanec choashun mibëdtan ëbi tantiec ic-cuededquido chuiquido chuituidta. “Mimbisen chuitanta,” cac aidontsen chiaqui tantienquo icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ëbi tantiaquido cuëdënacno chomenda. ¹⁸ Aden mimbi: “Esus tantiesabimboecquid neque. Cuëdënacno chomenquo ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adec icsaboedi icsainquo yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

¹⁹ Padpiden chuinu. Tantia. Mimbi: “Nuquin Papa chuina,” cac: “Ai, adonona,” qesho tantiaashun aidbëdtan mimbi Nuquin Papa chianiac mimbi chiacpadomboen Nuquin Papan natsiash. ²⁰ Ëbi tantiec daëd tabadnuc aidbëd con Mayan yec ëbëd yachimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bëdamboen istiapimbo yaid

²¹ Adec: —Icsa uanec chieshtomiantiadquo iquec —Esus qesho tantiaashumbien Petedon Esus chuipondash. —¿Icsa uanec chieshtomianquid tedentsimbi chieshenquo icquin bëdamboen ispe? Chieshënquin padpiden icsa uac ¿padpidendambi bëdamboen isoape? ¿Mëdante utsiuc daëd tauadoquin sietetedembi nashun padpiden bëdamboen isenquo icquin ënacta bëdambo icpatsiash? —caquien ²² Esusën: —“Mëdante utsiuc daëd tauadoec sietetedi” quequin daëdpactsëcquo mimbi chuipec. ⁷⁰ por ⁷ caid ¿tedtsi icpec? Aideden ⁴⁹⁰tedembi ënenquo icquin bëdamboen isoadoniac bëdambo ictsiash —quepondash Esus.

²³ Adashic abi onquec: —Nuquin Papan chiacpadomboen matses bëdamboen iste mibi chuinu. Tantia. Tsusion yuabo dadpen icpac caondash. “Ma bënu,” quequin ambi meniatedi piucquid bednuen aton yuabo aton shubuno chomepac caondash. ²⁴ Abia chomiaidën piucquid dadpenquioshë bedshun aton icbo meniambo icpac caondash. ²⁵ Adsho icbon: “Mimbi bedactededi beccho,” cac: “Nibëdec,” quepac caondash yua. Adshobien icbon: “Aidededi piucquid bednuen matses utsibo mibi yuamenu. Min chido min bacuëbobëdtabi cuësh-cuëshëdmeshun aidededi piucquid bednu. Mibi icsambo

iqueque,” cac ²⁶ yua abi yuaquid ismequin danëshën sebudash: “Padi. Ĕbi yuamenuen cuësh-cuëshëdmenda. Chiata. Yuecshun aidtedi bedshun mibi menenun nanu,” capac caondash. ²⁷ Adoaquien icbon bëdamboen isquin: “Padi. Ĕbi menenda. Mibi utsibo yuamenuo iquembique. Dacuëdenda. Nidec nid,” quequin icbon aton yua bëdamboen nidmepac caondash.

²⁸ Adoac nidquimbien aid yuan icbon bëdamboen isboedën ambi: “Ma bënu,” quequin piucquid daëdpactsëc meniaid yua utsi istuidpac caondash. Istuidshumbic bedtanquin tëtëdinquin: “Mimbi bedactedi piucquid beccho. Unës uachitomane,” caquien ²⁹ aidtsen ambi piucquid bedshunondaïd ismenuen danëshën sebudtsec: “Chiata. Ĕbi unës uainda. Yuecshun bedshun mibi menenun nanu. Chiata,” quepac caondash yua utsi. ³⁰ Adsho tantiashun icbon bëdamboen isboedëmbi chieshënquin: “Padi. Mibi cuidmembi,” qeshun quënën nauedmepac caondash. “Piucquid aidtedi abi menianenquio yacpadequi ma quënënuësh mëyadbudchitono,” qeshun nauedmiac caondash.

³¹ Aden chieshënquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bëdamboen isboedëmbi min yua utsi quënën nauedmiac: ‘Piucquid menianenquio iquec,’ qeshun,” quequin icbo chuipac caondash. ³² Adsho tantiashun icbon ambi cuidenquio icquin bëdamboen isboed chomeshun chushcapac caondash. “Icsambo icquidquio mibi nec. ‘Chiata. Mibi menenun nanu,’ mibi qesho: ‘Padi. Ĕbi menenda,’ quequin mibi bëdamboen isombi. ³³ Ĕmbi mibi adobocpadomboen utsi bëdamboen istiapimboda icco? ‘Ma bënu,’ qeshun mimbi meniactedi bëabi icsho bëdamboen isec mibitsen bëdambo ictsenac. Mibi yacpadec nëishun mibi cuidembi,” quepac caondash icbo. ³⁴ Adshun quënën nauedmepac caondash. “Ambi bedactedi piucquid dadpenquio meniash ma puduempantu,” qeshun quënën nauedmiac caondash. ³⁵ Aden matses yuan icbon nacpadomboen Nuquin Papan naindac. Utsibon chieshënaqui chieshënanasho Nuquin Papan mibi bëdamboen istiapimbo iqueque. Chieshënanenda. Mibi chieshënquidobi bëdamboen ista —quepondash Esus.

19

*Chidobëd cuëshëdte Esusën chiaïd
(Mad 10.1-12; Duc 16.18)*

¹ Adanec nidaïd cuëshë Cadidia caïd yacnuësh puduanec nidec nidaïd cuëshë utsi Udeya caïdën nidquin acte Odan caïd potebidanec Esus nidpondash. ² Adec nidshobien matses

dadpeshun tsibanampondash. Abi tsibanansho isun nidtudishun daicsaidtedi Esusën bédamepondash.

³ Adnubien tsusedpabon chiampid namequido padiseyobon chieshënquin: —Nuquin Papan chiaid niacmenu —quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tiantanu —capondash.

⁴ Adoquien Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. ⁵ Adembidi: “Dadan canite chido uaid icsho dadan aton chido bedquid. Amë chedobëd icboedi aton chido bedash aid nianenquio yec aidbëd tantiananquiec dada aton chidobëd abentsëc yacbimboec tabadquid,” quequin dada uaid ma mimbi ispaboc.

⁶ Aden Nuquin Papan tantiacpadomboen aton chido nianenquio yec aidbëdi tantiananquiec abentsëc yacbimboec tabadac bédambo ictsiash. Padnuen aton chido nianec aidbëdi cuëshëdquin Nuquin Papan chiaid niactsiash. Adecbidi chido aton bënë nianec icsaquid —Esus qesho ⁷ tantiashumbien abi chieshënidon: —¿Abimboda mimbi capadi? Nuquin Papan chiaid dada uaqin ¿atotsieshun Moisesën naden chuiampic? “Aton chido bunenquio yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampid ma icpayoc —quequin chuipondash Esus chieshënidon.

⁸ Adsho tantiashun Esusën chuipondash. —Ai, Nuquin Papan chiapadec aton chidobëd bédamboec tabadtiapimbo icsho isun Nuquin Papan Moises aden dada uamepampic. Tauamboen matses uaqin Nuquin Papan aden chiambo icpampic. ⁹ Tantia. Mibi chuinu. Aton chidobëd cuëshëdshun chido utsi bedquin Nuquin Papan chiaid niactsiash. Padnuen aton chidon bënëpenquio chudmesho istuidash aidbëd cuëshëdquin Nuquin Papan chiaid niaquenquio ictsiash —quepondash Esus.

¹⁰ Adnubien abëd icquidon: —Adotiapimbo icte mimbi chuipec. Aton chidobëd cuëshëdenquio icte mimbi chuisho tantiashun: “Aton chido bedesambo dada bédambo ictsiash,” caimbi —quepondash abëd icquido. ¹¹ Adsho tantiash Esus: —Ai, utsi-utsiec pabiate shëcuë nibëdacbimboen ëmbi chiaid tantiatiapimbo iquiec. Utsiboen aton chido bedash Nuquin Papan chiapadec bédamboec tabadquid nec. ¹² Utsibic mimbi chiapadquid chido bedesa iquiec. Nëidtedi chido bedesa iquiec. Nëidic aton padibi impadishtsaid. Nëidic matsesën inicsa uaid. Nëidic: “Nuquin Papan yuambo icquin aidën chiapadomboenuidi naquin chido bedtiapimbo iquebi,” qeshun

chido bedesa. Adquidtedi chido bedesa nec. Ĕmbi chuiboed tantiashun Ĕmbi chiacpadomboen nac bĕdambo ictsiash — quepondash Esus.

Esusĕn bacuĕbo chiaid
(*Mad 10.13-16; Duc 18.15-17*)

¹³ Adnubien Esus ismenuen bacuĕbo bĕ-bĕpondash. — Mamishquin ma Nuquin Papa Esusĕn chuinu —quequin bĕ-bĕsho isumbimbi: —Padi. Bĕenda —cauidpondac. ¹⁴ Adshobini Esusĕn: —Chĕn. Ma bĕnu. Cuemenda. Bacuĕbimboecquid Nuquin Papa yacno puduedtequid nec. Amĕn chuisho tantiash bacuĕ badedi: “Abimbo caic,” quiachimboen ĕbi tantiaquid Nuquin Papa yacno puduedtequid nec. Bacuĕbo bĕdambo iqueque. Beccho —cac bĕ-bĕpondash. ¹⁵ Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquio dayun uaquid Esusbĕd onquiaid
(*Mad 10.17-31; Duc 18.18-30*)

¹⁶ Adnubien dada caniampinquo Esus chuituidpondash. — Mibi bĕdambo iquec. Bĕdamboen chuiquidquo mibi neque. Ĕbi chui. Padpidec unĕstiapimbo icquid icmenun bĕdambo icquid Nuquin Papan abi yacno puduedmetsiash. ĶAtotsi nasho Nuquin Papan ĕbi bĕdambo capatsiash? —caquien ¹⁷ Esusĕn: —ĶMitsipadquid bĕdambo icquid cai? Nuquin Papaidtsĕqui bĕdambo icquid nec. Aidbĕd tabadnuen ambi Moises dada uamiampictedi nata —capondash. ¹⁸ Adoquien cania: —Nuquin Papan chiaid Ķmitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquio chudenda. Min bĕnĕpenquio chudmenda. Ampenda. Muainda. ¹⁹ Titabĕdta papa chieshĕnenquo icquin bĕdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi —capondash Esusĕn. ²⁰ Adsho tantiash cania: —Aidtedi niaquenquo icquin nabanquidquo nebi. Bacuĕctĕc icquimbi tauaondambi. “Nuquin Papabĕd tabadnuen Ķatotsimbi utsi nape?” caimbi —quepondash.

²¹ Adsho tantiashumbien Esusĕn: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibĕdquido min piucquid uesquin menebanta. Adsho abĕd tabadmenun Nuquin Papan mibi bĕdamboen istsiash. Adota. Adotanequic ĕbĕd iquec cho —caquien ²² cania: —Con na dadpenquio icsho uesquin menetiapimbo iquebi —quiash shubiantiadtsĕcquo ictanec nidpondash Esusĕn chiacpadomboen natiapimbo yec.

²³ Adsho isun Esusën abëd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidsëqui tantiec. ²⁴ ¿Ada nëishamën pinchuc chichte ancumpadic? Padenquio. Adecbidi aton na dadpenquio dayun uaquidën aton nauidsëqui tantiaquin ëmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusën chuipondash.

²⁵ Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsudain Nuquin Papa yacno puduedtequid icchitotsiash? Nibëdchitequien iquec —quesho tantiashumbien ²⁶ Esusën abëd icquido bëisquin naden chuipondash. —Matses namiantiapimbo icnuc Nuquin Papan namianquidquo nec. Ambi natiapimbo ictequid nibëdec —quepondash.

²⁷ Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuec chopondabi. ¿Mitsimbo tabadtequidini nepe? ¿Atotsimbi nape? —caquien

²⁸ Esusën: —Tantia. Mibi chuinu. Nuquin Papan ambi uaid abitedi chuca uabocnoëshquio ëbëdtan chuiquid mibitedi iquendac ëmbi abitedi namiacnuëshquio. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubun-shubunquiec chuiquid dapabo mibitedi iquendac. ²⁹ Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadachimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio icnuc. ³⁰ Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

20

Chonoadquido chiaid

¹ Adshumbic abëd icquido Esusën ompoacbimboen chuipondash. —Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. ² Istuidshumbic: “Badiadnubi tauashun ushë budtsambi mimbi ënacsho nëdtedi piucquid

mibi menenu. Naic cho,” cac chonoadec cho-chopac caondash. ³ Ushë abucquo yanubi tied icbon pete meniacno nidshun utsibo nainquo yec samëdsho istuidpac caondash. ⁴ Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac ⁵ tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. ⁶ Inchëshbudtsëqui nidoaquin utsibo nainquo yec samëdsho istuidoashun: “¿Atotsi quiash samëduidequi ique?” cac ⁷ samëdquido: “Chonoa uanquid nibëdosh,” qesho tantiashun tied icbon: “Mimbítsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

⁸ Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia choboedo ënquimbi meneta,” cac menequin tauapac caondash. ⁹ Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cactedquo piucquid menepac caondash.

¹⁰ Adosho isashien badiadnubi choboedo: “Aido aden meneshun nuqui chonoadquioboed yuapambo nuqui menec,” qeshobi aidtedtsëcbidi piucquid menepac caondash. ¹¹ Aidtedtsëcbidi meniaquien tied icbo chushcapac caondash. ¹² “Tsyuec chonoadboed meniactedtsëcbidi meniosi. Icsambo iquec. Inchëshbudtsëqui chotsash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquo chonoadobi. Aidtedtsëc menianec mibi chieshanquiec iquec. Ëbi dadpen meniac bëdambo ictsiash,” quequin chushcapac caondash.

¹³ Adoaquien tied icbon: “¿Chieshanquiectabi ique? Ëmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidtedquo menepaboc. ¹⁴ Mimbi bedboed buanec nid. Ëbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? ¹⁵ ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi ëbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbimboen chuipondash Esusën. ¹⁶ Adashic: — Adembidi abi yacnoshon ambi tantiacpadomboen Nuquin

Papan naindac. Utsi-utsien chuiquid dapa icmequin utsi-utsien padenquo icmendac —quequin chuipondash Esusën.

Abi unëste Esusën padpiden chuioaid
(Mad 10.32-34; Duc 18.31-34)

¹⁷ Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquo icquin abëd icquido 12tedi icquid chuinuen uanotantsëcquin buampondashi. ¹⁸ Buanshun chuipondashi naden: —Edusaden yacno nidacsho Nuquin Papan matsesmiaid icsho ëbi chieshënquido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon ëbi bedshun: “Ma unës uamenu,” qeshun ¹⁹ matses utsibo isadaidpembo ëbi bedmendac. Aden bedmiac matses utsibon mamënshunquin ëbi cueshcaten comapenen cueshcaindac. Adshumbic ëbi unës uanuen cuesten dectanendac. Aden unës uaqui daëdec ushash uincuenendabi —quequin Esusën abi unës uate padpiden chuioapondashi.

Uanën titan chiaid
(Mad 10.35-45)

²⁰ Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ëmbi chiacpadomboen ëbi nashunta, Icho —caquien: ²¹ —¿Atotsi cai? —capondash Esusën. Adoaquien: —Nëid con mado daëdi nec. Abitedishun icho icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: ²² —Ëmbi naid tantienquo icquin mimbi chuipec —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibëd mëyadtsiabi —quepondash.

²³ Adsho tantiashien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dapa icmendac —quequin Esusën chuipondash.

²⁴ Adnubimbi: —Chuiquid dapa ëbi icme —Esus casho tantiashun Uan chedo nëishëmpondac. ²⁵ Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. ²⁶ Ëbi tantiaquido icquin mimbi adoenquo iquendac. “Bëdambo

mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac. ²⁷ Bëdambo icquid ictheadquo icquin yuan aton icbo nashunacimboen mimbi utsibo nashuntsiac. ²⁸ Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided cuidadec unësendabi —quequin Esusën abëd icquido chuipondash.

Bëshuaid daëd Esusën bëdamiaid
(*Mad 10.46-52; Duc 18.35-43*)

²⁹ Adashic yuecquo ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpenshun Esus tsibanampondash. ³⁰ Adnubien aid podqued cuëman bëshuaid dada daëd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icbo —quepondash Esus caic.

³¹ Adsho tantiashun matses dadpenshun chushcapondash. —Padi. Chën. Adec cuëdec chieshanquiec mibi iqueque —caquien abi niacbidanec buëdanquiec cuëdpondash. —Tsusedpa Dabidën tsyuecquid Nuquin Papan namiaidquo icquin ëbi bëdamboen ista, Icbo —queoapondash.

³² Adoaquien Esusën nidtuidshun ëcbepondash. —¿Atotsi chuinec ne? —caquien: ³³ —Isbente bunquiebi, Icbo —quepondash. ³⁴ Adsho tantiash: —Unësquo iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdانشun aidëntsen Esus tsibanampondash bëshuacboedëmbi.

Edusaden yacnoshon chuiquid dapabimboecnuc Esus bëdamboen isaid

21

Edusaden yacnoshon chuiquid dapabimboecnuc Esus bëdamboen isaid

(*Mad 11.1-11; Duc 19.28-40; Uan 12.12-19*)

¹ Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash. ² —Nëid podquedën nidquin shubu daëdpactsëc yacno nidshun cabayobitsecquid aton bacuë caniatsëcbëdta mimbi badedquo istuidendac. Istuidshun tënëshaid tëdiadsho tëchicta. ³ Mimbi tëchicsho isquidën: —¿Atotsi acnun nai? —cac: —Nuquin Icbo: “ ‘Bedtan,’ quiosh,” mimbi cac:

“Ai, buantan,” quendac —quequin Esusën chuipondash.
 4 Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

5 “Shubu dadpen icquid Sion caidën tabadquido chui. Edu-saden cain Sion capec.

‘Is. Mibi chuiquid dapa cabayobitsecquidën bacuë caniatsëc catsadtoash choeque. Ancanenquio yec bédamboshë icquidquio neque. Is,’ quequin chui,”

quequin dada uapampic. 6 Aden dada uampicpadomboen ambi: —Bedtan —caidon bedtampondash.

7 Adotanquin cabayobitsecquid anibëdta caniatsëc bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatsëquën Esus catsadtopondash.

8 Adanec nidsho istanquin matses dadpenhun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —qeshun. 9 Matses dadpen bëyuc nidnubi aitedebidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bédamboshë iquec.

Nuquin Papan chomiaid yec mibi bédamboshë iquec.

Mibi chomequid Nuquin Papatsen bédamboshë iquec. Ade-duya,”

quec cuëdëncuededpondash.

10 Adec Edusaden yacno matses dadpenquio cuëdënidëc nidsho isashien Edusaden yacnocquido: —¿Tsutsi tantiec cuëdëncuededpec? —quepondash. 11 Adsho tantiashun Esusbëd nidquido: —Esusquio tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquio chuiquid Esus tantiec nec —quepondash.

Esusën chushcaquin cuemiaid

(*Mad 11.15-19; Duc 19.45-48; Uan 2.13-22*)

12 Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquio puduedenquio yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bédamboen isnu,” qeshun

pichicametsiash —quequin aton nëish yua menequin piucquid dadpenquoio bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. ¹³ —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,” quequin Nuquin Papan chiacpadomboen aton shubun puduedshun aid chianetiadquidi mimbi adoenquoio iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bëdamepondash.

¹⁵ Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic cuëdëncuededsho tantiaash nëishquiopondash. ¹⁶ Adshumbic: —Icsambo iquec —queshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bëdambo iquec,’ caindac.”

quequin chuipampic —quepondash Esus. ¹⁷ Adanec nidec shubu dadpen icquid Betania yacno nidash ushtuidpondash.

*Esusën cuëte unës uaid
(Mad 11.12-14, 20-26)*

¹⁸ Badiadnubi ënden auchbidi nidoaic Edusaden yacnobidi nidoapondash. Piabi nidec bundoshon ¹⁹ podqued cuëman nidquid cuëtempi icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquio icpec. Adsho isumbien Esusën: —Adequi bacuëesambo yec unësta —capondash. Adoac bad-edquio unëspondash.

²⁰ Adosho isun abëd icquidon: —¿Atotsi quiash badedquio unësposh? —caquien ²¹ Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquoio icquin: “Nuquin Papan ambi chiacpadomboen naquidquio nec,” quesahun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain:

“Mananuc tabadboedi adqueiecbidi acte nantan tabadoata,” mimbi cac nēid macuēsh acte nantan tabadoatsiash. ²² “Ambi chiacpadomboen naquidquo Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiash —quequin Esusēn abēd icquido chuipondash.

¿Tsuntsin: Naic nid, cac nai? quequin Esus chuimiai
(*Mad 11.27-33; Duc 20.1-8*)

²³ Adcuidanec Edusaden yacno padpidec nidshun Nuquin Papa tabadte shubu uashunaid daquēnē uaidēn puduedshun Esusēn Nuquin Papan chiaid chuipondash. Adsho tantiashun con matses tsusiobon Esus chieshēnquidon chuituidpondash. —¿Tsuntsin: “Naic nid,” cac nai? En chui. Tiantianu —caquien ²⁴ Esusēn: —En mimbia chui. Ēmbia tiantianu. Mimbi chuisho tantiashun ēbi namequidtsen chuinu. ²⁵ ¿Tsuntsin namiac Uan padon acten mentopadenec? ¿Ambembida napadenec? —capondash Esusēn. Adoquien badedquo chienquo yec uanotantsec tabadec onquecuededpondash Esus chieshēnquido. —¿Atotsi nuqui chuipeba? “Nuquin Papan namiaidquo Uan pado nepadenec,” cac Esusēn: “¿Atotsieshun aidēn chiacpadomboen nainquo ique?” canushe. Aden chienquien ictiad. ²⁶ Nuqui: “Ambembi napondash,” qesho tantiashun nēmbō icquidon nēishēnushe: “Nuquin Papan namiaid Uan pado niondash,” qeshun. Aden chienquien ictiad —quepac caondash Esus chieshēnquido. Isadaidbo tsusiobobēdi nēish abided unēs uaquido chuiquid dapabo adpac caondash. ²⁷ Adashien Esus padpiden chuioaic: —Tsaudi. ¿Tsundan chiaquien nachitondash? —qeshobien: —Mimbi chienquo icsho tantiashun ēmbitsen ēbi namequid chienquo iquembi —capondash Esusēn abi chieshēnquido cuidquin chuiquin.

Mado daēdshun nacbimboecquido chiaid

²⁸ Adshumbic Esusēn padpiden chuipondash. —Tantia. Mibi chuinu. Ēmbi chiaid tantiashun ¿mitsicquid: “Bēdambo iquec,” catsia? Dada aton mado daēdpambo icquid icpac caondash. Abentsēc chuiquin: “Neshcaic nid, mado,” cac: ²⁹ “Padi,” quec chieshuidboedi yuec-yuecpectsēctanec: “Tiedimbi neshcatanchitec,” quiaish neshcaic nidac caondash.

³⁰ Adshumbic amēn aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquo icpac caondash. ³¹ ¿Mitsicquidēn aton papan chiacpadomboen napac caondash? En chui. Tiantianu —caquien Esus chieshēnquido: —Abia chiac chieshuidboedēn —qesho tantiashumbien Esusēn: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidacbimboecquid aidō nec. Aton matses piucquid bedshundenedo yec

aton piucquid bednuen dada chudmeboedo chido yec quequin Nuquin Papa tantiabenash abéd tabadtequido yanendac. Mibien padenquio iquec. ³² Uan pado acten mentoandeden Nuquin Papan chiaid chuiquin bédamboec tabadtechuiipadenec. Adsho mimbi tantienquio icnubi mimbi icsambo caidombi Nuquin Papa tantiabempondash. Adsho isun Uan padon chiapadomboen mibi icsaid éntiadquidi mimbi énenquio iccondac. Aton papan chiaid niacquidbimboecquid mibi nec –quepondash Esus abi chieshénquido chiec.

*Abi chieshénquido icsaid Esusén chuioaid
(Mad 12.1-12; Duc 20.9-19)*

³³ Adshumbic Esusén abi chieshénquido ompoacbimboen chuipondash naden. –Tied icbon chetequid nidtsinac caondash. Adoshombic aid tied daquénè uatanquimbic chetequid chintetsen nacnempac caondash. Adoshombic: “Ampequid chosho isnu,” queshun shubu abucquio icnuc shubu uapac caondash. Adoshombic: “Néid tiedén caniquid chetequid iquec. Aid chequin ébi neshcashunta,” utsibo canec énapen nidpac caondash. ³⁴ Adash yuectaneshumbien abéd nidondaido aton yuabo chuiquin: “Néen chetequid sinashe. Bedtan,” cac aton yuabo nidanepac caondash. ³⁵ Adec aton icbon tiedno nidaniacshobien neshcaquidon cudasénquin chieshèmpac caondash. Abentséc cuesunetanquin utsi cuénoten seshunequiopac caondash. Utsibic cuesquin cuemepac caondash. ³⁶ Aden cuemiaid choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquio icquin émbi chetequid menetsiash,” queshun aton madotsen nidmepac caondash ³⁸ Adoac nidec aton papan tiedno choacsho chetequid cudasquidon: “Tied icbo unésan aidén natedi aton madon bedtsiash. Nébieñ aton mado cuesunetiad. Aid nibédnuc icbo unésan aidén natedi nuquin nabi ictsiashe,” queshun ³⁹ tied tsitsuno buanshun cuesunepac caondash –quequin Esusén chuipondash.

⁴⁰ Adshumbic ambi chuiboedquio abi datsidadquido chuimenuen chuipondash. –Émbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiash? –quesho ⁴¹ tantiash datsidadquido: –Aido icsamboshé icsho comapenen cuidtsiash. Adshumbic ambi chetequid sinacsho abi cudasénesambo utsibo aton tied neshcametsiash –quecuededpondash datsidadquido.

⁴² Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bēdambo icquid istuidashi: ‘Nēidquio shubu uanun nitsinemi,’ quetiadquidi isuidacimboen Nuquin Papan namiaid chieshēnac.

Aden buintad isuidaidsin utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bēdambo iquec,’ caimbi,” quequin dada uapampic. ⁴³ Aden ambi namiaid ēbi

chieshënsho isash mibi caic Nuquin Papa nadpec. “Ēmbi con matses caid isadaidbo ēbi bēdamboen tantiametiadquidi chuiquid dapabon namenquio icsho isun utsibotsen: ‘Ēbi chuiquid icta,’ caindambi,” quepec Nuquin Papa. Aden ambi chiapadquidēn bēdamboen chuibanac abi tantiaquido dadpen yanendac. ⁴⁴ Mibien Nuquin Papan cuidtequido nec. Cuēte uebudquin catashac canite uesadec podquēd-podquēdacimboecnuc mibi comapenen cuidendac —quepondash Esus abi chieshēnquido chiec.

⁴⁵ Adsho tantiashun padiseyobobēdtan nēish abided unēs uaquido chuiquid dapabon: —Nuquien cachitec —quequin tantiabempanēdash. ⁴⁶ Adshumbic Esus cuesunemenuen bedtiadquio icquimbi bedenquio icpanēdash. —Abi datsidadquidon: “Nuquin Papan chiaid chuibanquidquio Esus nec,” qeshun Esus bedsho isun nuqui cuesnushe —qeshun aton matses dacuēdēnquin bedenquio icpanēdash.

22

Cacuidanaid chiaid (Duc 14.15-24)

¹ Adshumbic Esusën padpiden ompoacimboembidi chuipondash naden. ²—Tantia. Isadaidbon nacpadomboen aton mado chido bednuesho tantiashun amēn matses dadpen: “Pec cho,” cauidaidsin mibi chuinu. ³ Chuiquid dapan aton yuabo chuiquin: “ ‘Con icbon madon chido bedequē. Aidbēd cuishonquenuen pec cho,’ quequin ēmbi tantiaidotedi chuitan,” cac yuabon chuitanaqui choenquio icpac caondash.

⁴ Adsho isumbien chuiquid dapan aton yua utsibo chuiquin: “Nēish nua bēchichoquidquio dadpen codoquiaccoshe. Padpiden chuitan,” cac chuitanoaqui ⁵ choenquiobidi icpac caondash. Adec cacuidanquiec abentsēc aton tied nantan nidnubi utsi piucquid bednuequin ambi aton na menebante shubuno nidpac caondash.

⁶ Utsimbic abi: “Pec cho,” cashobi yuabo mëyanquin cuesun secapac caondash.

⁷ Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nêdëncapac caondash.

⁸ Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Ûtsibo chuitan.

⁹ Ęmbi: ‘Pec cho,’ cacmaidobi chuibenetan. Podquedën nidquin mimbi istuidaidtedi: ‘Pec cho,’ cabenetan,” cac nidshun ¹⁰ ambi istuidaidtedi chuibenetanac matses dadpenquo pec cho-chopac caondash. Icsambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsëcquo yec.

¹¹ Adshun chuiquid dapantsen puduedshun isquien dashcute bëdaidquo dasiuidabi icquid abentsëc tsadtsec.

¹² Adshobien chuiquid dapan: “¿Atotsi quiash dashcute bëdaidquo dasiuidambobi cho, buchi?” caqui ëcbedenquo yec tsadec. ¹³ Adshobien chuiquid dapan: “ ‘Chido bedacno isnuec dashcute bëdaidquo dasiuidquid,’ quepadenec. Mibi icsambo iqueque. Mibi cuidnu,” queshun aton yuabo chiec:

“Shëbunshun buanshun icsano netan,” capac caondash. Adoac taneshun netanac mëyadquiec natiaic shubiquiopac caondash.

¹⁴ Adembidi Nuquin Papan ambi matses bëdamboen iste dadpen tantiamiaqui utsin-utsinquien tantienquo iquendac. “Abi yacno puduednu,” queuidboedi bëdambo icte bunenquo yec abi tantiatiapimbo icsho Nuquin Papan comapenen cuidendac. Utsi daëdpactsëquien Nuquin Papan tantiacpadec abëd tabadtequid iquendac —quequin Esusën chuipondash.

Chuiquid dapa piucquid menete chiaid

(Mad 12.13-17; Duc 20.20-26)

¹⁵ Adsho tantianec nidash abi chieshënquido padiseyobo: —Esus icsamboen chuimenuna. Icsamboen chuisho tantiaishun bedshun unës uamechitono —queshun ambi chuibanquin tantiamiaido chuipac caondash. ¹⁶ —

Icsamboen chuimetan —caquien chuiquid dapa Edodes caid tantiaquidobëdtan icsamboen chuimenuec cho-choshon chuituidpondash. —Bëdamboen chuiquid mibi neque. En ëbi chui. Tantianu. Muesambo icquin Nuquin Papan chiapadec bëdamboec tabadte mimbi abimbo chuipoc. Matses dacuëdënenquo icquin Nuquin Papan chiaidquo mimbi chuipoc. ¹⁷ Adquid icquin ¿atotsi mimbi chuipe?

Tantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniac ¿ada bëdambo icpatsiash? –capondash. ¹⁸ Adoquien Esusën ambembi tantiashun: –Bëdambo icquid damianquiec mibi muambo nec. ¿Atotsieshun ëbi icsamboen chuimetiadquio ique? –quetanquin: ¹⁹ –Chuiquid dapa menetequid piucquid shocoshëmpi beccho –ambi cac ²⁰ bësho bedshun Esusën chuipondash. –¿Në tsutsibimboecnuc dada uaid në iquec? ¿Tsutsi cuëmëdquidbëdta dada uac? En chui. Tantianu –caquien: ²¹ –Ma nuqui yuaquid chuiquid dapambo Sesad neyoc –quepondash. Adsho tantiashumbien Esusën: –Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadomboen nabanta –quequin Esusën bëdamboen chuipondash. ²² Adsho tantiash icsamboen chuimetiadquio icboedi: –Bëdamboen chuipec –quetanec nidanepondash.

Matses uincuemete chiaid
(*Mad 12.18-27; Duc 20.27-40*)

²³ Adnubien aid ushëmbi Saduseyubo: –Matses unësaid uincuenesambo nec –quequidotsen: –Esus icsamboen chuimenu –quec cho-chopondash. ²⁴ –Bëdamboen chuiquidquio mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibëdeque. Con buchin madobimboecnuc tishmenu,’ quequin tishmequid,” quequin Moisesën dada uapampic. ²⁵ Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash ²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. ²⁷ Adashic bacuë tishambobi aid chidotsen unëspac caondash. ²⁸ Aid abitedi uincuemiac ¿mitsicquidën chido icpatsiash? –caquien ²⁹ Esusën: –Nuquin Papan chiaidquio tantienquio icquin Nuquin Papan nadatiambo icquin nabanquin uincuemete mimbi tantienquio iqueque. Chuinu. Tantia.

³⁰ Uincuemiatic dadan aton chido bedesa. Adembidi amèn aton champi menesa. Nuquin Papan abi yacnoshon uaido mayan bédabobimboec matses uincuemiaido iquen-dac. Aden uincuemiaidèn chido bedesa –quepondash Esus. ³¹ Adshumbic padpiden chuipondash. –Ambi unèsaid uincuemetete chuiquin Nuquin Papan dada uamepampid ¿isban-abida ictio? Ma mimbi aid isbampaboc. ³² Naden dada uapampic. “Abadauan caid yec Acoobo caid yec Isac caid yec quequidtedishun ëbi Papa capec,” quepampic Nuquin Papa ënden unèsampid chiequi. Unèsun matses tantienquien mimbi danec. Unèsash aton dada chodquiambic aton tantiate unèsambo icnuc abi Nuquin Papa tantiatsiash –quepondash Esus. ³³ Adsho tantiash abi datsidadquido: –¿Mitsipadquid nepec? Bédamboenshëen chuipec –quepondash.

*Moisesën dada uampid chiaid
(Mad 12.28-34)*

³⁴ Aden unèsaid uincuemetete chuisho tantiashumbien Saduseyobon padpiden: –En chui –cainquio icpondash. Adsho isashien Esus chieshënquid utsibo Padiseyobo: –Nuquin Papan chiaid Esus icsamboen chuimenu. Nid –quianec Esus chuimec cho-chopondash. ³⁵ Cho-choquin abentsëcshun Nuquin Papan Moises dada uamiampid tantiaquidquio icquin chuimetuidpondash. ³⁶ –Chuiquidquio mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bédamboshë iquec,” capatsiash? –caquien ³⁷ Esus: –“Nuquin Papa tantiaquiec ambi chiacpadec tabadte bunquiota,” quequin ³⁸ chiampidba naic Nuquin Papan chiacpadec mibi bédamboec tabadtsiandac. ³⁹ Adembidi Moisesën chiampid utsitsen naic matses bédamboec tabadtsiash. “Min dada mibibi datantiadachimboen utsibotsen tantiaquiota,” quequin chiampicpadomboen nasho Nuquin Papan bédambo catsiash. ⁴⁰ Aden matses bédamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic –quequin Esusën bédamboen chuipondash abi chieshënquido chuiquin.

*Nuquin Papan chomiaidquio chiaid
(Mad 12.35-37; Duc 20.41-44)*

⁴¹ Adshumbic Esusëntsen abi icsamboen chuimete bunquido Padiseyobo chuipondash. ⁴² –Ëmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesën madouidida nepec? –capondash Esusën abibi cadquimbi. Adoquien badedi: –Nuquin tsusedpa yampid Dabidën

tsyuecquid icsho Dabidën mado caimbi —quepondash Padiseyobo.

⁴³ Adsho tantiashumbien Esusën: —¿Bëdamboenda chuidio? Mimi chiapadquid aton mado icsho ¿atotsieshun Nuquin Papan Mayanën tantiamiacpadomboen Dabidën con Icbo capampic? Naden Dabidën dada uapampic.

⁴⁴ “Nuquin Papan con Icbo naden chiendac.

‘Con abiuc tsadash abitedishun Icbombo icnush nëmbo cho. Mibi chieshënquidobi con Icbo mibi camenu,’ quequin Nuquin Papan con Icbo chiendac,”

quequin Dabidën dada uapampic. ⁴⁵ Con mado cainquo icquin con Icbo capampic Dabidën. ¿Atotsieshun mimi: “Dabidën mado nec,” quequin tantiapic? —caquien

⁴⁶ ëcbedenquo yec otacquo tabadpondash. Esusën bëdamboen chuisho tantiash: —Icsamboen chienquien icchitec. Ëmbi padpiden: “Icsamboen chuimenu,” cac bëdamboembidi chuiotsiash —queshun abi chieshënquido abitedishun Esus padpiden chuimenquo icquin ënaccondash.

23

Bëdambo icquid damianquido tanenda, quiaid
(*Mad 12.38-39; Duc 11.43, 46; 20.46*)

¹ Adshumbic Esusën abëd icquidobëdta abi datsidadquido tantiamequin chuipondash. ² —Tantia. Moisesën dada uampid chuibanquidobëdta tsusedpabon chiampid namequido Padiseyobon naid mibi chuinu. Aidon: “Moisesën chiampicpadomboen nata,” quequin nuquin matses isadaidbo chuidenepec. ³ Aden Moisesën dada uampid abimbo chiac adenuidi mimi nac bëdambo ictsiash. Aden naquin padiseyobon nacpadomboen nainda. Aidon Moisesën chiampid chuiquimbi ambibi aidën chiaid niac-niaquec. ⁴ Chieshëmënquido nec. Nuquin Papan chiaid nametiadquidëmbi tsusedpabon ambimbi chiaid dadpenquo namepec chushcanquin. “Matsesën aidtedi natiapimbo iquec. Padi icnuna. Nuquin matsesën chiampidtedi nainda,” catiadquidi adoenuquo iquec.

⁵ Aden padiseyobon Nuquin Papa tantiaquidquo damequin matses ismenuenuidi naic. Nuquin Papan chiaid dada uaidëmpi sauedtsash bëdectamëdec abiuc daëdi pëdectamëdec quesahun matses ismenuenuidi naic. Adembidi aton dashcute tëdiadte nacnenuquin: “ ‘Nuquin Papa chianequidquo nec,’ ma ëbi canu,” quesahun sedquid shoyonaid ënapenpactsëcnuc cuididicash matses ismenuenec matses tabadacno capucenepec. Adec Nuquin Papa chianequid damianquiec. ⁶ “Chuiquid dapa nec,” cameteuidi

bunec. Isedec puduedash: “Chuiquid dapa icsho icbon abëdi tsadmequid,” quia sh icbobëdi tsadte bunquieci. Nuquin Papan chiaid chuibante shubun puduedash: “Tsusio dapambo nec,” camenuc utsibobëd tabadenquio yec tsusiobobëduidi tabadquid nec. ⁷ “Chuiquidquio yec mibi bëdambo iquiec,” camete bunquieci matses dadpen tabadacno nidtenepec.

⁸ Mibitsen adenda. Utsibo: “Mibiuidtsëqui bëdambo iquiec, Icho,” camenuc adenda. Min Icho abentsëcquiobi ëbi iquiec. Ëbi abentsëqui con Icho cata. Con yuabo yec con utsibo mibi neque. Bëdamboec isnanta. ⁹ Adembidi mibi chuibanquid chuiquimbi: “Mibiuidtsëqui bëdambo iquiec, Papa,” cainda. Nuquin Papauidtsëqui aden chuita. ¹⁰ Adembidi: “Chuiquid dapa yec mibiuidtsëqui bëdambo iquiec,” utsibo camenuuidi nainda. Ëbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquio utsi nibëdec.

¹¹ Padnuen ambi chiacpadomboen utsibo nashunquidquio utsibo dëniacte bunenquio icquid Nuquin Papan bëdamboshë catsiash. ¹² Utsien abibi cadequi: “Ëbiuidtsëqui bëdambo iquiec,” quequin utsibo ismenuuidi naquido Nuquin Papan icsambo catsiash. Utsibic Nuquin Papan chiacpadomboen naquiu utsibo nashunquid yec utsibo ismeteuidi bunenquio icsho Nuquin Papan bëdambo caindac —quepondash Esus abi datsidadaido chiec.

Abi chieshënquido Esusën chushcaid
(*Mad 12.40; Duc 11.39-45, 52; 20.47*)

¹³ Adshumbic abi chieshënquidotsen chuipondash. — Tantia. Moisesën chiampid chuibanquidobëdta Padiseyobo mibi chuinu. Nuquin Papan cuidtequidombo mibi nec. Bëdambo icquid damianquieci mibi icsambo iquiec. Nuquin matses: “Nuquin Papabëd tabadte tantianu,” qeshobi mimbi bëdamboen chienquio iquiec. Ëmbi Nuquin Papabëd tabadte bëdamboen chuisho mimbi tantienquio iquiec. Aden tantienquio icquin: “Aidën chiaid tantienda,” quequin mimbi utsibotsen Nuquin Papabëd tabadte tantiametiapimbo iquiec.

¹⁴ Nuquin Papan cuidtequido mibi nec. Muaquin unësboedën niante piucquid bedshunquido mibi nec. Nuquin Papa tantiaquidquio damenuen utsibo tantiamequinuidi buëdpambo cuëdquin Nuquin Papa chiacbimboen mimbi chianepec. Aid abimbo mimbi chienquio iquiec. Adec chieshanquiecscho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenecc. Nidaid utsi-utsieci yacno nidshun mimbi

chuibenesho tantiaquido mimbi tantiacpadquo yanash Satanasën yuambo yanec Nuquin Papan cuidtequidombo iquendac.

¹⁶ Nuquin Papan cuidtequido mibi nec. Isadaidbo chuiquid icquin bēdamboen tantiamenquien mimbi icchitec. “‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidēn Nuquin Papan chiaid niacquid,” quetiadquidi mibi adenquo iccoc. “‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquo iccoc. Padenquo yec: “‘Nuquin Papa tabadte shubu uashunaid dapan icquid shocosh piu nacnenaidquo utsi uatiapimbo yacpaden abimbo chiombi,’ quequid muesa nec,” quechitequien mibi iquec. ¹⁷ Aden tantienquo icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bēdapenquioda icpec? “Aid bēdamboshē icnubi aid nuntan icquid bēdiactsēc bēdambo iquec,” caimbi. Mimbien icsamboen tantiec. ¹⁸ Nadentsen mimbi icsamboen chiec. “‘Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish pichicate nacnenaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquo iccoc. “‘Nuquin Papa mabi bēdamboen isnuquin pichicatequid nēish utsi uatiapimbo yacpaden abimbo caimbi,’ quequid muesa nec,” mibi quepec. ¹⁹ ¿Adenda mimbi bēdamboen chuipe? Pashuacimboen mimbi bēdamboen tantienquo iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish pichicate nacnenaid dapa bēdambo icnuc aidēn pichicatequidi nēishquo bēdapabi ictsec. Nuquin Papamboen bēdamboshē iquec. ²⁰ Nēish pichicate nacnenaid caic: “Aid utsi uatiapimbo yacpaden abimbo caimbi,” quequin aid nantequid nēish abitedi chiaidbidi nec. Adembidi ambi: “Mabi bēdamboen isnu,” caid Nuquin Papatsen chuipec. ²¹ Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. ²² Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidēn chiaidquo tantiec: “Abimbo cacbimboen chuiquid icsaquid nec,” quetiadquidi mibi adenquo iccoc.

²³ Bēdambo icquid damianquid yec Nuquin Papan cuidtequido mibi nec. Nuquin Papan chiaid abentsēqui tantiatsēcquin min tiedēn canitsēcquid musuquēmpi bedshun Nuquin Papa mimbi menepec. Aden menequid icquimbi

mimbi Nuquin Papan chiaid utsi dadpen niac-niacpec. Chieshēmianquid icboedi: “Ēbi bēdamboen ista,” quesho bēdamboen istiapimbo mibi iquec. Adembidi bēdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquio iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquio icpaboc. ²⁴ Tantesa uatsēcquimbi mimbi utsibo icsamboen chiec. Manuampi nibedbantsēcquimbi utsi nuacquid nibedquiabi abi nēsamēdpanumbobi acacimboembien mimbi nachitec. “Nuquin Papa meneta,” quequin chiaiduidtsēqui natsēcshun adenuidtsēqui mimbi utsibo namepec. Adenuidtsēqui namequimbi Nuquin Papan chiaid utsien mimbi niac-niacchitec.

²⁵ Nuquin Papan cuidtequido mibi nec. Padiseyobo yec Moisesēn dada uapampid chuibanquido yec quequimbi mimbi icsamboen naic. Pada-padaidbēdta dēshote chieshquin cachocuidtsēqui dapanshun anauc ampanambo icquidi ampanaid damianacimboec mibi bēdamboec tabadquid damianquiec. Nuquin Papan chiaid dadpen nainquio icquin mitsanauidi bednuen mibi bunaiduidi mimbi napec. ²⁶ Pamumēdacimboec tantiatiapimbo mibi iquec. Dēshote abichobi bēdamboen ampanacimboec icsaid ucu dash bēdambo icta. Adec icsainquio yec ēnēdash Nuquin Papan chiacpadece mibi bēdamboec tabadtsiac.

²⁷ Bēdamboec tabadquido mimbi damesho isun Nuquin Papan mibi cuidendac. Unēsaid chococacno bēdamboen nacnenac bēdambo isadec ēnden pisenambi. ²⁸ Adembidi bēdamboec tabadquid mimbi damec. Matses ismec bēdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

Padiseyobo chedo cuidte chiaid

(Duc 11.47-51)

²⁹ Nuquin Papan cuidtequidombo mibi nec. Nuquin Papan oncamiadobēdta bēdamboec tabadquido nuquin tsusedpabon unēs uampido tantiaquin aido chococampicno shubu uaquin mimbi nacnempec. ³⁰ Adoshombic: “Nēmbo con tsusedpabon chieshēnquin unēs uampid chococac. Aidbēd tabadquin ěmbi unēs uainquio ictsenēdac. Ěmbien bēdamboen istsenēdac,” qeshun mimbi aido chococacno nacnempec. ³¹ Adoboedēmbi nuquin tsusedpabon bēdambo icquid unēs uampicpadomboen adoante bunquin mimbisen chieshtoshon adoaindac. ³² Ai, nuquin tsusedpabon Nuquin Papan

oncamiampid unēs uacpadombota —quepondash Esus abi unēs uate chiec.

³³ Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nēsecaquin mibi cuidendac. ³⁴ Icsaido icsho isun: “Ma Nuquin Papan bēdamboen iste tantiamenu,” queshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unēs uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadan-catanequin shubu utsin shubu utsinquien mimbi cuemeta-nendac. ³⁵ Adosho isun Nuquin Papan mibi cuidendac. Nuquin Papan chiacpadec bēdamboec tabadsho tsusedpan chieshēnquin tauamboen cuesuniampid Abed nepampic. Adoshombic adecbidi bēdamboec tabadsho tsusedpa utsibon utsi-utsien unēs uapampic. Adoshombic ēnquin Bedequias caidēn mado Sacadias caid unēs uapampic. Aidi Nuquin Papa tabadte shubu uashunaid dayunshunquio cuesunepampic. Aidtedi unēs uampido tantiaquin aido unēs uaquido cuidacimboen Nuquin Papan mibitsen cuidquien-dac. ³⁶ “Yuecshun min tsyuecquido cuidendac,” quecnenquio iquebi. Nēbi caimbi —capondash Esusēn abi chieshēnquido chuiquin.

*Edusaden yacnocquido Esusēn shubi uaid
(Duc 13.34-35)*

³⁷ Adshumbic Esusēn chuioapondash. —Tantia, Edusaden yacnocquido. Mibitsen chuinu. Mibi tantiac unēsquio iquec. Mibi yacnobidi tabadquin Nuquin Papan oncami-aidon chuisho nuquin tsusedpabon unēs uapampic. Adem-bidi Nuquin Papan: “Isadaidbo chiec nid,” caido chosho utsi-utsien cuēnoten seshunequiopampic. Adembidi mimbi nēbi naindac. Adquidombo icsho mibi tantiaquiemi. ¿Mitsipadec cachina aton bacuē cudaspec? “Penushe,” quiash aton bacuēmpi nua shoccoshon madadec cudasquid. Adecbidi: “Satanasēn yanushe,” quiash cudasquieci mibi Nuquin Papa bēdamboen ismete tantiametiadquio iccobi. “Tantiamenu,” cac tantiate bunenquio mibi icchitoc. ³⁸ Ēbi nidambic ēbi tantiatipimbo icsho Nuquin Papan namiac min shububēdtabi mibi nibēdamendac. ³⁹ Nēbi mimbi ēbi isenquio yanendac. Padnuen min matsesēn yuecash chosho ēbi isendac. Aden isash: “Nuquin Papa yacnuēsh choquid bēdambo iquec,” min matses quendac —quequin Edusaden yacnocquido Esusēn chuipondash.

24

Nuquin Papa tabadte shubu uashunaid nibëdante chiaid
(Mad 13.1-2; Duc 21.5-6)

¹ Adash Nuquin Papa tabadte shubu uashunaid daquëne uacno tabadanec nidequi Esusbëd icquido Nuquin Papa tabadte shubu uashunaid caic: —En is, Icho. Nëid shubu bëdamboen nacnenaidquio neque —quepondash. ² Adsho tantiashun Esusën: —Mimbi isboedquio cuënote bëdamboen nacnenaid matses utsibon cuënote chic-chiquendac nibëdquiecnuc —capondash.

Nuquin Papan cuidte ushë chiaid
(Mad 13.3-13; Duc 21.7-19)

³ Adanec nidequi macuësh dapa Odibos caidën pudundoec poctsebi tabadtuidshun abëd icquidon utsibo tantiamenquio icquin Esus chuipondash. —En mibi chote chui. Tantaranu. “Nëbi choec,” quequin mibi chote ¿mitsipadembimbi tantiape? Adechidi ¿atotsi isashini: “Nuquin Papan cuidte nëbi nec,” quepe? —capondash abëd icquidon. ⁴ Adoquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. ⁵ Adquido choshon: “Nuquin Papan chomiaidquio Quidistu caid nebi,” quequin muaquin chiaqui dadpeshun: “Ai, abimboen mimbi caic,” capendac.

⁶ Èbi choabi icnuc: “Matses dadpenquio cuesnan-cuesnanac caosh,” quecuededendac. Adsho tantiash dacuëdenda. Nuquin Papan matses abitedi cuidte ushë choabi icnuc ambi tantiacpadec matses adonanendac. ⁷ Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibëdquiecnuc icted-ictedendac. Nidaid utsi-utsiec yacno nidaidquiobi comapenec uëdëquedenendac. ⁸ Adsho isash chido bacuë nëncuenacsho isun: “Nëbien tishchitec,” quequin tantiacbimboen tantiata. “Nuquin Papan abitedi cuidte nëbi nec,” quequin tantiata —quepondash Esus.

⁹ Adashic abi onquec: —Èmbi chiacpadquio icnuc chieshëmënuquidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpeshun ëbi tantiaquido chieshënquiendac. ¹⁰ Adoac ëbi tantiatsëchoedëmbi chieshtoshon ëbi tantienquio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

¹¹ Padnuen muaquido: “Nuquin Papan chuiboedquio chuinu. Tantia,” quependac dadpen. Adsho tantiashun dadpeshun: “Ai, abimboen mimbi chiec,” caindac.

12 Matses dadpenquo icsamboecshë tabadsho isun ëbi tantiatsëcboedëmbi ëbi tantienquo yanendac. ¹³ Padnuembi ëbi choabi icshobi ënenquo icquin ëbi tantiaquido Nuquin Papa yacno tabadmendac.

14 Ëbi choabi icnuc: “Ma matses abitedishun Nuquin Papabëd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi –quepondash Esus.

Matses icsamboshë icquid chote chiaid
(*Mad 13.14-20; Duc 21.20-24; 17.22-24*)

15 Adashic abi onquec: –Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquo nec. ¹⁶ Aden: “Nuquin Papa tabadte shubu uashunaid dapa icsa uanuec puduedosh,” qesho tantiash Udeya yacnocquido macuësh dapa yacno ompodec cuenac bëdambo ictsiash.

¹⁷ Adec cuenec shubu dayun icquido puduedenquo yec: “Con na bednu,” quenquo yec umanucuëshi cuenac bëdambo ictsiash. ¹⁸ Adecbidi badedquo cuenuen tied nantan icquidon aton dashcute utsi aton shubuno beduanenquo yac bëdambo ictsiash. ¹⁹ Nidequi bacuë usunquid yec bacuë chishmequid yec quec badedquo cuentiapimbo yec mëyadquiendac. ²⁰ Adec cuente tantiec: “Ue sequenumbo cuemenquo icpashuni,” queta. “Pete bedmianenquo icnushe,” quiash “Chonoadenquo icte ushënquo cuemenquo icpashuni,” queoata. ²¹ Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquo natiambo chieshëmënquiec tabadendac. Nuquin Papan tauamboen matses uac adec tabadenquo ictenec. Nëbi adec tabadenquo iquec. Aido icsamboecshë tabadquido nibëdanambic utsibo adquidpenquo yanoaindac. ²² Adec icsamboecshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibëdanushe,” qeshun yuenquo icsamboen tabadmenquo icquin ënëdmendac –quepondash Esus.

²³ Nuquin Papan aden ënëdmiabi yac icsamboecshë tabadec utsibo: “Is. Nëid Nuquin Papan chomiaidquo Quidistu

neque,” quependac. Utsibic: “Is. Nèidquien Nuquin Papan chomiaidquo Quidistu caid neque,” quequin icsamboen chuioaindac. Adsho tantiashun: “Nuquin Icho Esus choashien nec,” cainda.

²⁴ Adec muaquidoba choendac. “Nuquin Papan chomiaidquo nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncami-aid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo caic,” catsempendac. Nuquin Papan bédamboen tantiamiaido yec adtiapimbo iquendac. ²⁵ “Chieshëmënquido iquendac,” quequin tantienquo icquidën ëbi tantienquo yanushe,” queshun: “Aden ëbi tantiaquido chieshënquidac,” quequin chiombi — quepondash Esus.

²⁶ Adashic padpidec onquec: —Ëmbi aden chuiboed tantiashun utsibo muasho tantienda. Ëbi caic: “Utsibo ismenquo yec matses nibédacno choac caoshe. Isnu. Nid,” cac istanenda. Adembidi: “Choash nèid shubun puduedac caoshe. Isnu. Nid,” cac adembidi istanenda. Muambo neque. ²⁷ Ëbimbo padpidec choquimbimbi abitedimbo ismendac. Abu ushëmbo yec bed-bedquetanesho ¿ada matsesën abitedishunquo isenquo icpadic? Ai, isec. Adembidi ëbi choasho matses abitedishunquo isendac. ²⁸ Adec choendabi. ¿Ada edeste pisen chec budenquo icpadic? Ai, budec. Adecbidi Nuquin Papan cuidte ushë chonoc choendabi — quepondash Esus.

Abi chote Esusën chiaid
(*Mad 13.24-37; Duc 21.25-33*)

²⁹ Adashic padpiden chiec: —Aden matses icsamboshë icquidon ëbi tantiaquido natiamenubi ushë chënquenquo yanendac. Inchëshën ushëtsen chënquenquo yanendac. Uispa chedo paëdbudnendac. Uispabimboecquid abitedimbo uëdëquendac. ³⁰ Adnubini abitedishun Icho yec dacuëdampambo yec abucuësh choendac. Ëbi nadatiambo icquin nabanquidquo yec chosho isash cuidadtequido abitedimbo dacuëdec natiaic shubiquiendac. ³¹ Adnuc nua shoncanubimbi Nuquin Papan abi yacnoshon uaido mayan bédabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquiec yansho isun: “Esus chote nèbi nec,” quequin tantiata. ¿Mitsipaden: “Seta taëec,” quequin tantiapec? Suc seccuduquiaid isun: “Nëbi seta taëec,” quequin tantiaquid. ³³ Adembidi ëmbi chuiboed isun: “Nëbimbobi

Esus choec,” quequin tantiata. ³⁴ ¿Muectabi nedi? Ęmbi chuibocpadquio iquendac. Ęmbi chiacpadec yanabi matses abitedi nibēdantiapimbo iquendac. ³⁵ Abimbo caimbi. Abu nibēdanendac. Nidaidtsen nibēdanendac. Padnuen Ęmbi chuibocpadquio nibēdantiapimbo iquendac. Bēnudenquio iquendac. Ucuttiapimbo iquendac. Ęmbi chuibocpadquio iquendac – quepondash Esus abēd icquido chiec.

*Esus chote ushē tantienquo icte chiaid
(Mad 13.32-33; Duc 17.26-35)*

³⁶ Adashic abi onquec Esus: –Ębi chote tantienquo iquembi. “Aid ushēnquo choendabi,” quetiapimbo iquebi. Adembidi mayan bēdabon tantienquo iquec. Ęmbibi Nuquin Papan Madonquiobi tantienquo iquembi. Nuquin Papanuidtsēquien tantiec. ³⁷ Matses Ębi caic: “Nēbi choec,” quetiapimbo icnuc choendabi. Noen cano nacenubi ¿mitsipaden aton matses icsambo icquidon tantiapampic? ³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacenash puduedpampic. ³⁹ Aton matses: “Nēbimbobini Nuquin Papan cuidchitec,” quenquo icnubi ue dapambo choec mauanquidēn matses abitedimbo unēsbudnepampic Noe ambi cano anshubu uaidēn nuadtonobi. Adecbidi Nuquin Papan cuidtequido Ębi caic: “Choec,” quenquo icnubini choendac.

⁴⁰ Choquin Nuquin Papa yacno tabadmenuen beduamendambi. Ęmbi: “Bedtan,” cac tied nantan dada daēd icsho istuidshun Ębi tantiaquid abentsēc icsho beduanendac. Utsibic Ębi tantiesa icsho nianendac. ⁴¹ Adembidi Nuquin Papa yacno tabadmenuen chido daēdshun macueso istuidshun abentsēc Ębi tantiaquid icsho aid abentsēc beduanendac. Chido utsibic Ębi tantiesa icsho nianendac.

⁴² Aden Ęmbi chuiboed tantiashun: “¿Nēbida con Icbo chopeba?” quequin Ęnenquo icquin tantiata. Ębi chote mimbi tantienquo iquec. ⁴³ ¿“Nēbi ampequidēn ampec,” quequinda tantiapadic? Padenquo. Tantiaquidēnquien aid ushēnquo aton na bēdamboen isquin ampemenquo ictsiash. Aden tantienquo icquin: “Ampesho isnu,” quequin Ęnenquo icquin isquid. ⁴⁴ Adembidi Ębi chote ushē mimbi tantienquo ye. ¿“Nēbida nuquin Icbo chopeba?” quec Nuquin Papabēd tabadte bunec bēdamboec tabadta. Matses dadpen: “Nēbien chochitec,” quenquo icnubini choendac – quepondash Esus abēd icquido chiec.

Esus bēdamboen cainte chiaid
(Duc 12.41-48)

⁴⁵ Adshumbic abi bēdamboen cainte Esusēn chuipondash. —Tantia. Aton icbo tantiaquin yua bēdambo icquidēn naid mibi chuinu. Icbon: “Ēbi nidan mibēdta yuaido pete sandoaid musucshun ěmbi chiacpadēn ěmbi chiacpadēnquien menianeta,” cac yua bēdambo icquidēn adotsiash. ⁴⁶ Adnubien icbon choshon ambi chiacpadomboen yuan nasho isun bēdamboen istsiash. ⁴⁷ Adshumbic aton yua chuitsiash. “Bēdamboen tantiaquid mibi neque. Con yua utsibo namequin con natedi dayun uata,” catsiash icbon yua bēdambo icquid caquin. ⁴⁸ Padnuen yua icsambo icquid: “Ēendenquimbo con icbo nidondash. Choenquien icchitec. Con nauidi nanu,” ⁴⁹ quiampatsiash. Adshumbic chieshtoshon abēdta yuaido cuesanetsiash. Adashic icsambo icquidobēdi icsamboec tabadtsiash. ⁵⁰ Adec: “¿Nēbida con icbo chopeba?” quenquio icnubien aton icbo chotsiash. ⁵¹ Choshon ambi chiacpadomboen nainquio icsho istuidshumbic: “Icsambo iquec,” queshun comapenen cuesquin cuesunetsiash. Adem-bidi Nuquin Papan icsambo icquido cuidendac. Bēdambo icquid damianquido cuidacno icsamboshē yacno nidmendac. Adoac natiaic shubiquiendac —quequin abi bēdamboen cainte Esusēn chuipondash.

25

Chido 10tedshun cainaid

chiaid

¹ Adshumbic Esusēn ompoachimboen chuiquin abi chote ushē tantienquio icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchēshēmbi chosho aton matsesēn bēquedtanquid. Bēquedtanec choec shubun puduedash cuishonquec aidbēd pec tabadquid. Adquido icpac caondash. Chido 10tedishun: “Champi bedtanec choquid bēquedtanu,” queshun aton tabote bēchin taboadquid icbo-icboen buanuen sanambededpac caondash. ² Aid chido 5tedi tantienquio icquido icnubi 5tedbidi bēdamboen tantiaquido icpac caondash. ³ Tantienquio icquidon: “Tabote bēchi naimēdsho cushtonon buanu,” quenquio icquin bēchi uesadbudtsaid taboteuidtsēqui sananquin caimpac caondash. ⁴ Padnuen bēdamboen tantiaquidon naimēdsho cushtonoequin tabotebēdta sedunten cushtoaid bēchi sananquin caimpac caondash. ⁵ Aden cainaqui: “Chido bedtanu,” quianec nidboed choenquio icsho isash abitedi ushcastoash ushcuededpac caondash.

⁶ Inchësh poctsemboen: “Choeque. Bëquednu. Nid,” cac
⁷ isucunshun chidobon tabonoen tabote dëbedpac caondash. Adoshon bëdamboen tantiaquidon ambi bëboed bëchi cushtonobien ⁸ icsamboen tantiaquidon: “Bëchi beccho. Con na naimëdeque,” caquien bëchi bëboedën ⁹ bëdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. ¹⁰ Adoac bëchi bedec nidnubien chido bedtanec dada chopac caondash. Chosho bëdamboen tantiaquidon aton tabote taboshon chido bedtanec choquid bëquedtampac caondash. Adtanec abëdi choash puduedshun bëtashte puduedtiapimbo icnuc bëdamboen bëtashpac caondash. ¹¹ Adnubien bëdamboen tantienquio icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,” ¹² caquien chido bedquid: “Padi. Èmbi tantiacmaido mibi nec,” quepac caondash.

¹³ Èmbi chuiboed tantiashun chido icsamboen tantiaquido tanenda. Bëdamboen nabi icsho: “Èmbi tantiacmaid mibi neque. Puduedenda,” aido cacbimboen èmbitsen Nuquin Papa yacno puduedmenquio icquin cacumechitomane. Èbi chote ushë tantiadenquio icnuc: “¿Nëbida con Icbo chopeba?” quequin èbi bëdamboen tantiec èmbi chiacpadec bëdamboec tabadta —quepondash Esus abëd icquido chiec.

Icbon piucquid daëd uaid chiaid

(Duc 19.11-27)

¹⁴ Adshumbic abi tantiaquidon ambi chiacpadomboen nate Esusën ompoachimboen chuoapondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuipac caondash. ¹⁵ “Nëidën bëdamboen tantiaquidquio icquin con piucquid èbi daëd uashuntsiash,” queshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid èbi daëd uashuntsiash,” queshun utsitsen 2tedi menepac caondash. Adshumbic: “Nëidëntsen bëdiactsëc tantiatsëcquin adembidi èbi con piucquid daëd uashuntsëctsiash,” queshun utsitsen piucquid abentsëcquiobi menetsac caondash. Adanec nidpac caondash icbo. ¹⁶ Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. ¹⁷ Adembidi piucquid 2ted meneboedën 2bidi daëd uapac caondash 4tedi icnuc. ¹⁸ Padnuen abentsëc meneboedën chieshquin aid daëd uainquio icquin ambi

uëdëshcaboed shëcuë anantsëcquin piucquid abentsëqui ompopac caondash.

¹⁹ Yuecquio ictaneshumbien icbon choshon ambi piucquid meniondaïdo chuituidpac caondash. “¿Atotsi nao?” cac ²⁰ sincoted meniondaïdën: “Is, icbo. Mimbi ëbi meniondaïdtedbidi daëd uaombi. Nëbi mitsana 10tedi iquec,” caquien ²¹ icbon: “Ai, con na daëdpacksëc icboedi daëd uaquin mimbi bëdamboen nac. Nëbi ëbëdtan chuiquid dapa icta. Èbëd cuishonquec tabadec cho,” capac caondash. ²² Adnubien piucquid 2tedi meniondaïdën: “Is, icbo. Mimbi meniondaïd 2ted icboedi daëd uaondambique. Nëbi mitsana 4tedi iquec,” caquien ²³ icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

²⁴ Adnubien piucquid abentsëcquiobi meniondaïdën chieshquidëntsen: “Mimbi ancaïdon nidtsinaïd peteuidi bedquid mibi nec, icbo. Mimbi chiacpadomboen nainquio icsho isash chushcanquidquio mibi nec. ²⁵ Adec dacuëdampambo icquid icsho mibi dacuëdënquin mimbi meniondaïd piucquid ompoquin chococaondambi. Në mimbi meniondaïduidtsëqui ictsec,” caquien ²⁶ icbon: “Chieshquiec mibi icsac. Èmbi chiacpadomboen nambo mimbi iquec. Èbi caic: ‘Ancanquid icquin ëbi chushcanushe,’ qeshun ²⁷ nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” ²⁸ quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. ²⁹ Adembidi naindambi. Èbi tantiaquin ëmbi chiacpadomboen naquid adembidi namequin bëdamboen tantiamendambi. Èbi tantiesabo ëmbi chiaïd niacquid bëdamboen tantiamenquio iquendambi. ³⁰ Aid yua icsambo icquid cuidacimboen Nuquin Papan ëbi tantiesabo cuidquiendac. Ambi icsaïdo cuidquiäcno nësecac natiaic shubiquiendac —quepondash Esus abëd icquido chiec.

Matses nashunesa cuidte chiaïd

³¹ Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Abitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. ³² Adshumbic matses abitedimbo cho-chomequin tsidadmendambi. Adshumbic

icbon aton nauidquio tsinacacimboen ëbi tantiaquido naden chiendambi. ³³ “Ëböd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Ëbi tantiesabo cuidadtequido mibi neque. Con copioc tabadec cho,” caindambi. ³⁴ Adshumbic ëbi tantiaquido padpiden chuiocaindambi. “Ëbëdi tabadec cho. Matses uaqin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaidombo yec ëbëdi bëdamboec tabadec cho. ³⁵ Mimbi ëbi nashundenec. Bundoacsho mimbi ëbi pemedenedec. Acte bundoacsho adembidi mimbi ëbi acmedenedec. Mimbi isacmaidquio icsho mimbi ëbi yuedtenec. ³⁶ Con dashcute nibëdsho mimbi ëbi dashcute menenedec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenedec,” caindambi. ³⁷ Adoquien bëdamboec tabadquido: “Tantiadenquio icnuc mimbi chuipec, icho. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. ³⁸ ¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. ³⁹ Mibi daicsacsho datsadambo iquebi. Quënën nauedacsho mibi istaniambo iquembi. Mimbi tantiadenquio icnuc chuipec,” ëbi caindac. ⁴⁰ Adoac naden chiendambi. “Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacimboen mimbi utsibo nashundeneque. Ëbëdi tabadec cho,” caindambi.

⁴¹ Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. ⁴² Ëmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquio ictenedec. Acte bundoacsho mimbi ëbi acmenquio ictenedec. ⁴³ Mimbi isacmaid icsho mimbi ëbi cacumedenedec. Dashcute nibëdsho mimbi ëbi menenquio ictenedec. Daicsacsho isash mibi ëbi datsadenquio ictenedec. Quënën nauedacsho mimbi ëbi istanenquio ictenedec,” caindambi. ⁴⁴ Aden chiaquien: “Tantiadenquio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquio icnuc

mimbi chuipec,” caindabi ěmbi chiacpadomboen naisabon.⁴⁵ Adoac naden chiendambi. “Ěbi tantiaquido nashunenquio icquin ěbibi nashunenquio yaczimboen ěmbi chiacpadomboen naisabo mibi neque. Nuquin Papan cuidacno nid,” caindambi.⁴⁶ Adoac icsamboec tabadquido ěnenquio icquin cuidacnombo nidnubi bědamboec tabadquido Nuquin Papa yacno ěnědenquio yec tabadendac —quequin Esusěn chuipondash.

26

Esus bedshun uněs uanuequin chiaid
(*Mad 14.1-2; Duc 22.1-2; Uan 11.45-53*)

¹ Aden abi chote ěnquin chuitanquimbic abi uněs uatetsen aběd icquido Esusěn chuipondash. ² —Daědec ushun nuquin matsesěn obeca bacuě uněs uaindac. Tsusedpabon: “Ma con mado uněs uainquio icnu,” queshun obeca bacuě abided uněs uampid tantiaquin badiadshun penun obeca bacuě uněs uaindac. Aid ushěmbi ěbi bedshun cuesten dectamendac —quepondash Esus.

³ Adnubien tsusiobobědi con matses chuiquid dapa dadpen abi chuiquid dapambo Caipas cuěmědquiděn shubun pudued-puduedpac caondash. ⁴ Adashic: —Něbien Esus uněs uametiad utsibo ismenquio icquin bedshun. ⁵ Nuquin matses obeca pec tabadnuc bedenquien ictiad. “Esus bědambo icquidi cuesunec,” queshun obeca penuec cho-choquidon nuqui cuesnushe —quepac caondash.

Chidon Esus machiuinaid
(*Mad 14.3-9; Uan 12.1-8*)

⁶ Adnubien Esus shubu dadpen icquid Betania caid yacno choash ambi daushumbo yec daicsaid bědamiondaid Simon caiděn shubun puduedpondash. ⁷ Puduedshun pec samědshobien chidon puduedshun ambi piucquid dadpenquio menequin bedaid těchumpin icquid bědambo nuadquid Esus machiuimpondash: —Esus bědamboshě icquid nec —queshun. ⁸ Adsho isumbien Esusběd icquidon: —ĵAdenda bědamboen nai? Ma icsambo yoc. ⁹ Utsibo menequin dadpen piucquid bedshun piucquid nibědquido aid piucquid menetiadquidi mibi nec —quequin chido chushcapondash.

¹⁰ Adsho tantiasumbien Ěsusěn: —ĵAtotsieshun chido chushcai? Ěbi bědamboen tantiaquin ěbi ismequin bědamboen nashunebique. Chushcainda. ¹¹ Mimbi chuiboed piucquid nibědquido ěnědenquio yec mibědi tabadendac. Ěbien mibědi tabadenquio yanendac. ¹² Ěbi uněs uashun chococate tantiaczimboen machiuinoshibique. Chushcainda. ¹³ Ěmbi chiaid

chuibeniactonshon nëid chidon ëbi machiuimboed chiendac
—quepondash Esus abëd icquido chiec.

Udasën Esus bedmenun piucquid bedaid
(*Mad 14.10-11; Duc 22.3-6*)

¹⁴ Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash. ¹⁵ Nidshumbic chuituidpac caondash. —Utsibo ismenquio icquin mibiuidtsëqui Esus bedmenu. ¿Tetsi piucquid ëbi menetsia? —caquien badedi pudunquin piucquid shocoshëmpi 30ted icnuc tambantanquin menepac caondash: —Baded ëbi bedme —quequin. ¹⁶ Meniac bedanec nidec: —¿Mitsishunquiemi utsibo ismenquio icquin Esus bedmepeba? —quepanëdash Udas. Adashic Esusbëdi tabadoaic chopondash.

Unësnush abëd icquidobëd Esus pec tabadaid
(*1Cod 11.23-26*)

¹⁷ Adnubien Esusbëd icquidon: —Equipito yacnuësh cunen pan bidiscamiabi yampid 7tedec ushquin tantiaquin tauaid ushë nëid nec —queshun Esus chuipondash. —Nuquin Papan nuquin tsusedpabo unës uamenquio icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën: ¹⁸ —Edusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiapadomboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid ¹⁹ —cac nidquimbi shubu icbo chuituidac caondash. Adoac: —Ai, ma chobono —quesho tantiashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

²⁰ Inchëshëmbi abëd icquido 12tedbëd samëdquin Esusën pepondash. ²¹ Pec samëdquin Esusën chuipondash. —Tantia. Mibi chuinu. Èbi chieshënquido ëbi bedmequid abentsëc nëmbobi iquéc —quesho tantiashun ²² unësquio yanshun abentsëcshun abentsëcshunquien Esus chuipondash abëd icquidon. —¿Èbida cai, Icbo? —quequin abi chuishobien ²³ Esusën: —Èbëdtan pete codocaid ënë punquid ëbi bedmequid nendac. ²⁴ Èbi Nuquin Papan chiaid dada uamepampicpadquid matsesmiaid yec unësendabi. Padnuen ëbi bedmequid comapenen cuidtequidquio nec. Anin aid tishenquio icpatecnëdan. Cuidac natiaquiendac —quepondash Udas caic.

²⁵ Adoaquien Udasën abi bedmequidënquoio: —ĴĒbida cai, Icho? —caquien: —Ai, mibibimbi caic —capondash. Adoac Udas puduenanec nidpondash.

²⁶ Adshumbic Esusën pete sananquin: —Mimbi pete uaid nëid nec. Mibi bēdambo iquec, Papa —quequin Nuquin Papa chuitanquin cuēsh-cuēshbanshun abēd icquido menebampondash. —Nēid cuēsh-cuēshquin nibēdamiacimboen ēbi mēyanquin unēs uaindac. Ēbi unēs uate tantiaquin nëid peta —cac pebededsēcondambi. ²⁷ Adshumbien Esusën dēshoten actequid cushtoshon sananquin: —Mimbi uaid nëid nec. Mibi bēdambo iquec, Papa —quequin Nuquin Papa chuishun: —Nēid abitedishun acbeded —cac dēshoten abentsen cushtoaid pictsē-pictsen acbampondambi. ²⁸ Aid actequid acshobien Esusën: —Nuquin Papan chiaid nuquin tsusedpan dada uapampicpadec ēbided cuidadec unēsendabi. Nēid acquin: “Esused Nuquin Papan cuidac aton intac siebudpamboec unēsposh. Aton Madoded cuidshun Nuquin Papan ēbi padenquoio iquec,” quequin nëid acquin tantiata —capondashi.

²⁹ Adashic: —Nadquid actequid padpiden aquec cuishonquec mibēd tabadenquoio iquendabi. Nuquin Papan abitedishun Icbombo icmiac abi yacnombo mibēdi cuishonquec tabadendabi —quepondash Esus ēbi chedo chiec. ³⁰ Adashic cuēdēnten abentsec cuēdēnash macuēsh dapa Odibos caid pudundonoec nidanepondash Esus Udas Esus chieshēnquido chiec nidbon.

Petedo chieshuidte Esusën chiaid
(*Mad 14.26-31; Duc 22.31-34; Uan 13.36-38*)

³¹ Macuēsh dapa Odibos caid yacno nidquimbi Esusën chuipondashi. —Nēid inchēshēmbi Nuquin Papan chiacpadec ēbi nianec mibitedi niquendac. Nuquin Papan naden chuipampic. “‘Icho cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. ³² Padnueni unēsash uincuenendac. Adanec mibi cainuec nidaid cuēshē utsi Cadidia caid yacno ēbia nidendabi —quepondash Esus abēd icquido chiec.

³³ Adoaquien Petedo: —Mibi cuesnuec cho-chosho isash utsibo dacuēdec niquenuec ēbimboen cuenenquimbo ictsandac —qeshobien ³⁴ Esusën: —Tantia. Mibi chuinu. Nēid inchēshēmbi cachina bēnē cuēdanabi icnuc: “Ēmbi isacmaidquoio aidi nec,” mimbi ēbi caindac. Cachina bēnē cuēdanabi icnuc 3tedec mibi adendac —caquien ³⁵ Petedo: —Pada. Adtiapimboeni iquec. Chieshēmēnquidon: “Esusbēd icquid mibi neque. Mibi cuesunenu,” caqui: “Ēmbi isacmaid neque. Padi,” quenquoio iquendabi. Mibēdquiobi

unëstsiandabi —Petedo quenubini: —Ai, ëbibic adecbidi ictsiac —quecuededpondabi Esusbëd icquidotedi.

Quetsemani caid yacnoshon Esusën Nuquin Papa chiaid
(*Mad 14.32-42; Duc 22.39-46*)

³⁶ Adanec nidequi cuëte dadpen nitsinacno Quetsemani yacno nidpondash. Auëshquio Esus nadpondash. —Ambobi tabadta. Udicsëc nidshun Nuquin Papa chuitanu —quepondash.

³⁷ Adashic Petedobëdta Sebedeyon mado daëd buanec nidpondash. Udicsëc nidequi unësquio yanec shubianti-adtsëcquio yampac caondash. ³⁸ Adshumbic Petedo chiec: —“Matsestedi icsaid ëmbi bedshunsho isun Nuquin Papan ëbi istiapimbo yanendac,” quiash unësquio iquebi. Èbi yacpadec ushenquio yec nëmbobi isec tabadta —quianec ³⁹ udicsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquio icpatsia, Papa? Mimbi: “Ai, mibi unës uamenquio iquembi,” cac bëdambo ictsiabi. Mimbi: “Nëbi mibi unës uamenu,” cac mimbi tantiacpadequi unësendabi —quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: —Ushenquio yec isequi tabadta —caboqui. —¿Yuec-yuecpactsec ushenquio icquin istiapimboda icco? ⁴¹ “Satanasën icsamenushe,” qeshun ushenquio icquin Nuquin Papa chuita. “Ushenquio iquebi,” queboedobi ushcas mëmunenquio yec mibi ushpec —capac caondash Esusën Petedo chedo chuiquin.

⁴² Adtanec padpidec nidoashun Nuquin Papa chuioaic: —Èbi unës uametiadquio icquin ëbi unës uameta, Papa. Èbi unës uametiapimbo icquin mimbi ëbi unës uamenquio ictsiac. Mimbi tantiacpadomboen nata, Papa —quetanec ⁴³ choaquin isquien Petedo chedo ushoaic ushcas mëmuntiapimbo yec.

⁴⁴ Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

⁴⁵ Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenuen ëbëd icboedëmbi icsambo icquido ëbi bedmeque. ⁴⁶ Nidnu nid. Is. Èbi bedmenuec ëbi bedmequid choeque —quepondash Esus Udas chosho isash.

Abi chieshënquidon Esus bedaid
(*Mad 14.43-50; Duc 22.47-53; Uan 18.2-11*)

⁴⁷ Adnubien Udasën Esusbëd icboedën bedtanac matses dadpen cuesantiadpambo yec chështebëdta cuate sanambededtsëcquieac cho-chopondash. Nëish yua abided unës uaquido chuiquid dapabobëdta con matses tsusiobon: —Bedtan —cac cho-chopondash. ⁴⁸ Ambi bedtanaidobëd cho-choquimbien

Udasën: —“Nëid Esus nec,” quequin adoendambi —abi quiacpadembi ⁴⁹ Esus tansudcatuidpondash: —Chobi, Icbo —quequin. ⁵⁰ Adoquien Esusën: —Ëmbi tantiaboedquio mibi nec. Ëmbi adoboedënquiobi mimbi tantiacpadomboen nata —qeshobien cho-choquidon Esus bedtuidpondash. Aden bedshun: —Cuidmenun chuiquid dapa yacno mibi buanu —capondash.

⁵¹ Aden Esus bedshobien abëd icquidën abi tsiusudaïd chështe chictanquin chuiquid dapan yua pateshunepondash.

⁵² Adoshobien Esusën: —Padi. Chën. Min chështe tsiusudoata. Cuesanquid icscho adembidi cuidnushe. ⁵³ ¿Tantienquioda ique? Ëmbi chiac con Pan ambi abi yacnoshon uaido mayan bëdabo dadpenquioshë ëbi cudasmenuen chometsish. ⁵⁴ Nuquin Papan aden ëbi cudasmiac bedadtiapimbo icscho ¿mitsipaden Nuquin Papan chuiquin dada uamiampicpadomboen ëbi naden bedpatsiash? —capondash pateshuni-anquid chuiquin.

⁵⁵ Adashic abi bedquido chiec: —¿Atotsi quenuc chështebëdta cueste sanambededtsëcquiec ëbi bednuec cho? ¿Nuqui chuiquid dapan chiaïd niac-niacquin matses cuesanquido chuiquid dapadabi nedi? Mabi mimbi isboedquiobi neyoc. Badiadquidën badiadquidënquien Nuquin Papa tabadte shubu uashunaid daquënë uaidën puduedshun chuideneshobi ma mimbi ëbi bedenquio icboc. ⁵⁶ Padenquio icboedombi Nuquin Papan tantiacpadënquiobi mimbi ëbi bedec. Ëbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec —quequin Esusën chuinubini niquepondac: —Cuenenquio ictsiabi —queboedi.

Caipas caïd yacno Esus buanaid

(Mad 14.53-65; Duc 22.54-55, 63-71; Uan 18.12-14, 19-24)

⁵⁷ Adnubien chuiquid dapambo Caipas cuëmëdquid yacno Moisesën dada uampid chuibanquidobëdi tsusio utsibo chopac caondash. Adnubien ambobi Esus bëpac caondash. ⁵⁸ Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaïdo sondadobëdi tsadtuidpac caondash Petedo.

⁵⁹ Adnubien cho-choboedo tsusio dapabo: —Esus unës uamenuen: “Esus icsasho isombi,” quequin muaquidon chuïsho tantianuna —qeshun chomiac muaquido dadpen-shun: —Esusën icsamboen nasho isombi —quequin chuïpac caondash. ⁶⁰ Aden Esusën naid muaquin chuiquin Esus unës uatiadquio icquid chiambo icpac caondash. Adnubien

muaquid daëdshun chuituidpac caondash. ⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidën Esus chuiquin: —¿Atotsi quenuec ado? ¿Atotsi nëidën chiec? —caquien ⁶³ Esusën ëcbedenquo icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” qeshun abimbo cata. ¿Nuquin Papan chomiaidquo aton Madombobida mibi nepe? —caquien ⁶⁴ Esusën: —Ai, mimbi chiaidquo nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun ⁶⁶ ¿Atotsi natiadquo ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash. ⁶⁸ Bëcuestanquin: —“Nuquin Papan madombobien nec,” canu. En chui. Tantuan. ¿Tsundan mibi naoshe? —cabededtsëcquien mamënshumpac caondash Esus.

Esus caic: Ëmbi isacmaid nec, quequin Petedon chiaid (Mad 14.66-72; Duc 22.56-62; Uan 18.15-18, 25-27)

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien: ⁷⁰ —Tantiadenquo icnuc mimbi chiec. Ëmbi isacmaidquo mimbi chiec —quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien ⁷² Petedo: —Ma ëmbi isacmaidquo Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpectsëcshumbien ambo tabadquidontsen Petedo chuipac caondash. —Aidbëd icquidien mibi nec. Caidia yacnocquid onquiacbimboec ma mibi onquepayoc —quesho tantiash ⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquio neyoc —queoapac caondash.

Adec 3tedec Petedo muanubien cachina bënë cuëdampac caondash. ⁷⁵ Adsho tantiashun Petedon Esusën chuiboedquio tantiactampac caondash. —Cachina bënë cuëdanabi icnuc mimbi ëbi caic: “Ëmbi isacmaid nec,” capendac tedesteden —quequin Esusën chuiboedquio tantiactanec umanuc pudue-nanec nidec Esus muauabosh natiaic shubinidpac caondash.

27

Pidato caid yacno

Esus buanaid

(*Mad 15.1; Duc 23.1-2; Uan 18.28-32*)

¹ Adnubien chuiquid dapabo aton tsusio utsibobëdi Esus isec ushenquio badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —queshun ² podo cataneshun ancanquid Pidato cuëmëdquid ismenuen Esus buampac caondash.

Esus bedmequid Udas têtaniadaid

³ Adnubien Udas Esus bedmeboed: —Unës uamechitembien iquec. Unës uametiapimbo iquebi. Ëmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash. ⁴ Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. ⁵ Adoquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

⁶ Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque. ⁷ Matsu nacnenquidën tied bedquin nëid menenuna. Nuquin matsespenquio isedquido unësacsho ambo chococanun aid tied bednuna —queshun piucquid meniac caondash. ⁸ Aidon bedacsho isun nëbi aid tied cuënquin nadopec. —Unës uamequidën bedaid tied nec —capec. ⁹ Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada

uapampic. “ ‘Aid bednuen Isadaidbon piucquid shocoshëmpi 30ted meneuidaid bedoashun ¹⁰ matsu nacnenquidën tied bedquin meneoapondash,’ quequin Nuquin Papan chiaid dada uaombi,” quepampic Edemias.

Pidato caidën Esus chuimiaid
(*Mad 15.2-5; Duc 23.3-5; Uan 18.33-38*)

¹¹ Adnubien isadaidbo yuaquid ancanquid Pidaton Esus bëacsho chuipac caondash. —¿Min matses isadaidbo chuiquid dapamboda mibi nepe? —caquien Esusën: —Ai, aid nebi —capac caondash. ¹² Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquio icpac caondash.

¹³ Adshobien Pidaton Esus padpiden chuioaquin: —Mibi ic-said dadpen chuipec. ¿Tantienquioda ique? ¿Ëcbedantiapimboda ique? —caquien ¹⁴ ëcbedenquio icpac caondash Esusën. —Nëidon muauac nebi —quequin chienquio icsho tantiash: —Adquid tantiambo iquembi —quepac caondash Pidato.

Esus unës ua, quequin chiaid
(*Mad 15.6-15; Duc 23.13-25; Uan 18.38-19.16*)

¹⁵ Nuquin Papan isadaidbo unës uainquio icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedenec. Pidaton: —¿Tsutsi abentsëquimbi cuemepe? —cac isadaidbon chiacpadquid abentsëc cuemedenec. ¹⁶ Esus bëabi icnuc uimanëmënquidquio Badabas cuëmëdquid nauedpac caondash.

¹⁷ Adnubien Esus cuidte chuisho tantianuec cho-choash dadpenquio tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. ¹⁸ —Esus chieshënquidon: “Nuqui padenquio yanuc nuqui dëniaquec Esus chuiquid dapa yanushe,” queshun Esus bëaccosh. Nëmbo tabadquidon: “Esusquio cueme,” capashuni —quequin tantiaquin aden chuipanëdash Pidaton.

¹⁹ Adashic matses icsaido cuidte chuinuec tsadte dapan abucquio tsadtopondash Pidato. Adshobien yuan chuituid-pondash. —Min chidon: “Chuitan,” cac chobi. Esus caic: “ ‘Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

²⁰ Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi

cuemepe?” cac: “Badabas cuemequin Esus unès ua,” cado-cadota –cac: –Ai, adoendambi –quecuededpondash.

²¹ Adnubien Pidaton padpiden: –¿Mitsicquidimbi cuemepe? –caquien ambo tabadquidon: –Badabas cuemeta –cadonepondash. ²² Adoaquien Pidaton: –Ma Esus Quidistu caid. ¿Mitsipadopembimbi aid ique? –caquien: –Unès ua. Cuesten dectanquin unès ua –quecuededpondash.

²³ Adoaquien Pidaton: –¿Atotsieshun mimbi adope? ¿Atotsi icsa uasho mimbi adope? –caquien buëdanquiec cuëdec: –Cuesten dectanquin unès ua –quecuededpondash.

²⁴ Adsho –Padi icnuna –caqui niacbidanquiec adequi unès uate bunquiec cuesantiadpambo yansho isash: –Acte becho –quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: –Nëid unès uametiapimbo iquebi. Nëid unès uamete bunec mi-bien cuidadtequidombo nendac. Ëmbien adotiapimbo iquec. Mëpamëdec bëchish ucuadacimboec mimbi icsamiaid ucu-debi –quiash mëpamëdquin ismepondash Pidaton. ²⁵ Adsho tantiashien: –Con nabobëdtsëqui adequi cuidadtequidombo icnuna –quecuededpondash abitedimbo.

²⁶ Adsho tantiashun Badabas caid cuemequin Esus cuesh-caten cueshcamepac caondash. Adshumbic: –Cuesten dectanquin unès uatan –quequin sondado buamepac caon-dash Pidaton.

Esus mamënshunaid
(*Mad 15.16-20; Uan 19.2-3*)

²⁷ Adoaquien sondadon Pidaton shubun Esus yuedshun: –Isec cho –cac aton sondado utsibo dadpen cho-chopac caondash. Cho-choshon Esus mamënshumbededpac caondash unès uanumbi. ²⁸ Abi dasiuidaid ënapen icquid chicshun: –¿Chuiquid dapada nedi? –quequin dashcute piumbo icquid dasiuintanquin ²⁹ mauete pinchuc-pinchucpambo icnuc nac-nenaid mauemepac caondash. Adshumbic aton matses chuiquid dapan sananacimboen sananuc abiucshun cueste sanamepac caondash. Adshumbic aton matses chuiquid dapa ismiacimboen mamënshunquin: –Is. Isadaidbo chuiquid dapambo neque –queshun danëshën sebudquin Esus ismepac caondash. ³⁰ Adshumbic dacuishtucatanquin ambi cueste sanameboed bedshuntanquin aidëmbi matombud-nepac caondash. ³¹ Aden mamënshuntanquin ambi dasiuim-boed chictanquin aton dashcutebidi dasiuinoapac caondash. Adoshon: –Ma unèsnuequin cuesten dectanec nidnu. Nid –quequin Esus buampac caondash.

Esus cuesten dectanaid
(*Mad 15.21-32; Duc 23.26-43; Uan 19.17-27*)

³² Buanquin Esus abi dectante cuate yuëmemebanquimbi dada nidaid Sidene caid yacnuësh choquid Simon cuëmédquid Esusën yuëmiaid sondadon chiadtomebidampondash. ³³ Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴ Choshombien sondadon uba chinaid actequid paëmbo dauë nēcushaid Esus meneuidpondash. —Në. Ac —cac pictšec tantanec: —Padi —quepondash aquenquio yec. ³⁵ Adshobien cuate napotiaid bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmédquidtedi dada uabanshun tēchun sandoshon cadotanequin dada uatempi puduemiaid isbanquin Esusën dashcute bedbampondash. ³⁶ Adash: —Esus unēsō isnu —quec sondado tabadcuededpondash.

³⁷ Adshumbic: —“Nadquid icsho cuidquin unēs uac,” quequin ma isquidon tantianu —queshun cuate cuëshën naden dada uapaccondash. —Nëidquio Esus nec. Isadaidbo chuiquid dapambo nec —quequin dada uaid Esusën mapino dectampondash. ³⁸ Ampequid daëd cuesten ëquë dectambudcuenquin dectantanquin nënantanquio Esus dectampondash.

³⁹ Adshobien podqued cuëmanquio Esus diadsho isbidanequin chieshënquin chuipondash. ⁴⁰ —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unēsenuio yec auëshquiobi bud —cabidanepondash. ⁴¹ Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamënshunec nadpondash. ⁴² —Ütsibo ismenuembien comapenen tantiaquin matses bēdamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. ⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unēsenuio icsho isnu —quepondash tsusiobo. ⁴⁴ Adnubien abēdta cuesten dectamboedon ampequidontsen Esus mamënshumpondash.

Esus unēsaid

(Mad 15.33-41; Duc 23.44-49; Uan 19.28-30)

⁴⁵ Adnubien ushë cuembo icnuc inchëshbocpadquiec inchëshpondash. Ushë cuembo icnuc inchēshtanec ushë budambi ushëmbo yanoapondash. ⁴⁶ Ushëmbo yanubien Esus comapenec cuēdec nadpondash. —Eloi, Eloi, lama

sabactani —quec con onqueten cuëdpondash. —¿Atotsieshun ëbi bëdamboen isenquio yano, Papa Edoen? —quec adondash.

⁴⁷ Adec cuëdsho tantiash isquido nadpondash. —Edias yampid cuënhitequien nec —quiampondash. ⁴⁸ Adnubien Esus isec tabadquid abentsëc titingianec nidshun shapushapupactsëcquid bedtampondash. Bedtanshumbic actequid mucacquid anidtsëcquidën shapu-shapupactsëcquid punshun cuate dëdectanshun abuc sananec: —Chishmenu —queuidpondash. ⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

⁵⁰ Adnubien padpidec buëdanquiec cuëdtanec Esus unëspndash. ⁵¹ Esus unësnubi Nuquin Papa tabadte shubu uashunaid yacnuësh: —“Quëñë uquëducquidën Nuquin Papa tabadtembo nec,” caidën utsi puduednushe —queshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. ⁵² Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. ⁵³ Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

⁵⁴ Nidaid uëdëquenuc dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

⁵⁵ Adnubien chidobo Cadidia yacnuësh Esusbëd choquin abi codocashumboedo Esus unëso isnu nec ancuenshun isec tabadpac caondash. ⁵⁶ Nëidted icpac caondash. Nëidic Madia Mactada yacnuësh choquid. Nëidic Madia utsi Acobon tita. Aid Ose cuëmëdquidën titabidi niosh. Nëidic Sebedeyon chido Uanën tita. Aid Acobo cuëmëdquidën titabidi niosh. Aidedi uanoshon isbededec tabadpac caondash.

Esus chococaid

(Mad 15.42-47; Duc 23.50-56; Uan 19.38-42)

⁵⁷ Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. ⁵⁸ Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. ⁵⁹ Aden bedtanshun Osen Esus dashcute bëchish nibëdquidënquio nuamboshë icnuc datanedonepac

caondash. ⁶⁰ Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bêtashte uaid bincumbëshun bêtimpac caondash. Adotanec nidpac caondash Ose. ⁶¹ Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶² Isadaidbon obeca bacuë unës uacpadën Esus unës uamiash abentsec ushashi chonoadtemaid ushëmbi Esus chieshënquido Pidato caid chiec nidpac caondash. Padisyobobëdi nidshun chiquid dapabon Pidato chuituidpac caondash. ⁶³ —Esus nadpadenec. “Unësash daëdec ushash uincuenendabi,” quec muapadeneque. ⁶⁴ Daëdec ushquin min sondado Esus nauedaid cudasmeta. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictsiashe. Min sondado: “Cudasta,” quequin chuita —capac caondash Esus chieshënquidon. ⁶⁵ Adoaquien Pidaton: —Ai, con sondado buantan. Aden buanshun: “Unësaid nauedaid cudasec databëdta,” cata —capac caondash. ⁶⁶ Adoaquien isadaidbo tsusiobon sondado buanshun cuënote dapa bêtashaid bucun bëbitaccapac caondash. —Bëbitaccaid isash: “Chiquid dapan bëbitaccamiaid nec. Cuidnushe. Esus chictiapimbo iquebi,” ma quenu —queshun bucun bëbitaccapac caondash. Adoshon: —Beduanushe. Isquiec tabadta —capac caondash sondado chedo chiquin.

28

Esus uincuenaid

(*Mad 16.1-8; Duc 24.1-12; Uan 20.1-10*)

¹ Esus unësbon abentsec ushash abi chonoadtemaidëntsen abentsecbidi ushash dominco badiadnuc chidobo Esus nauedshun bêtimboed isec tabadnuec padpidec choapac caondash. Mactada yacnuësh choquid Madia utsibëd isec choapac caondash. ² Choash isec tabadnubi nidaid uëdëquiampac caondash. Adnubien Nuquin Papan abi yacnoshon uaid mayan bëda abucuësh budtanquin cuënote dapa bêtashaid shëcbempac caondash. Adtanec cuënoten tsadtopac caondash. ³ Mayan bëda yec abu bed-bedquiacbimboec ushëmboshë bëchamuanquiec icpac caondash. Aton dashcute adquiobidi bëchish nibëdquiec ushumboshë icpac caondash. ⁴ Adec dacuëdampambo icsho

isashien unësaid cudasquido sondado dacuëdtanec uëdëquec tantiadempambo yec padishbudnepac caondash abitedi.

⁵ Adnubien mayan bëdan Madia chedo chuipac caondash. —Dacuëndenda. Cuesten dectanquin unës uaboed Esus isnuec mibi tabadec. ⁶ Nibëdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuioapac caondash. ⁷ —Mimbi isboed Esusbëd icboedo chiec nid. Badedquio nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chiec nid —caquien ⁸ auëshquiobi chidobo dacuëdboedi cuishonquec titinquier nec nidanepac caondash.

⁹ Titinquier nec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danëshën sebudquin taë uidën uapac caondash. ¹⁰ Adoaquien Esusën: —Dacuëndenda. Con utsibo ëbëd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuencho isun sondadon muauaid

¹¹ Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bëda chonoc Esus uincuenboed chuituidpac caondash.

¹² Adoaquien isadaidbo chuiquidon aton chuiquid utsibobëd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquo menepac caondash. ¹³ —Mimbi isboedquio chienquo icquin naden chuita. “Ëbi chedo ushtoan abëd icboedon Esus ampequin beduannaccosh,” quequin utsibo chuita. ¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —queshun ¹⁵ piucquid meniac bedanec nidec isadaidbo chuiquidon chiacpade muapac caondash sondado. Adembidi nëbi isadaidbo dadpenhun: “Esus ampiac,” quequin chuioaic.

Ëbi chuibeneta, quequin Esusën chiaid

(Mad 16.14-18; Duc 24.36-49; Uan 20.19-23)

¹⁶ Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepandac. ¹⁷ Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —queshun danëshën sebudpondambi. Utsibombien: —¿Con Icbombobida nepeba? —capondash.

18 Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquio nebique. Mibitsen namenu. 19 Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Ut-sibo ismenu,” quetanquin aden acten mentobeneta. 20 Mimbi mentoaido chuiban. “Nuquin Icbon chiapadec bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi ic-nuc mibi chedo nianenquio iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

MADCOSEËN DADA UAID

*Bëyuc choshon Uanën Esus chote chiaid
(Mat 3.1-12; Duc 3.1-18; Uan 1.19-28)*

¹ Madcos nebi. Nuquin Papan tantiampicpadquieac aton madombo Esus abi yacno matses yuedquid chote tauamboen chiaid bëda chuinu. Tantia.

² Abi aton mado Esus chieac onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomendambi. Aidën chuibanac ambi tantiaid icsa ënshun mibi cainquidombo iquendac, mado.

³ Shubu nibëdacnoshon comapenec onquequin mibi chotequid aidën chuibanendac naden:

Nuquin Icho choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chieac onquiaid Nuquin Papan Isayas dada uamiampid nec.

⁴ Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquio icsho mibi cuidenquio yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiacpadomboen naquid acten mentobampondash Uanën. ⁵ Aden Uanën chuibanubien matses dadpen tantianu quec chodedchodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chieac utsiutsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash.

⁶ Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacne- naid tsiuquid niondash. Shioשבimboecquid shuishun pequid niondash. Bacun chequid niondash. ⁷ Aidëmbi naden chuibampondash: —Con tsyuecquid choendac. Aidi nada-

tiambocquin naquidquio nendac. Aidi bëdamboshëcquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmiosi? quec tsadebi. ⁸ Mibi acten mentoquid nebi; aidien abipadquiocquid aton Mayan meni-anquidquio nendac —quepondash Uan.

Esus acten mentoaid
(*Mat 3.13-17; Duc 3.21-22*)

⁹ Adnubien ambi chian-chianaidquio Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. ¹⁰ Aden acten mentoac Esus pudundonobi abu bécadoacnoëshquio dëbimbimboec isadquid abipadquiocquid aton Mayan bedebedequemboec Esusbëd icnuec budpondash. ¹¹ Aden budmetanec ambi bécadoacnoëshi: — Mibentsëcquiobi icsho ëmbi tantiaidquio mibi nec, mado. Ëmbi bédamboen isaidquio mibi nec —quepondash aton Papa Esus chiec.

Esus Nuquin Papan chiaid niacmenuequin Satanasën tanaid
(*Mat 4.1-11; Duc 4.1-13*)

¹² Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. ¹³ Ambo tsadquimbi ushë abentsëc nidmec utsi choaid abutometsëcquieci tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bédabon cho-choshon nashumbededpondash.

Cadidia yacnoshon tauamboen chuibanaid
(*Mat 4.12-17; Duc 4.14-15*)

¹⁴ Ambo yuec tabadash Esus choambien isadaidpembon ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. ¹⁵ —Nuquin Papan chiampidpadquid abi yacno yuedanquid nëmbobi iqueque. Mibi icsaid ënshun ëmbi chiaid bëda tantiaata —quepondash Esus comapenec onquec.

Ëbëd iquec cho Esusën abia caido
(*Mat 4.18-22; Duc 5.8-11*)

¹⁶ Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. ¹⁷ Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus.

¹⁸ Adsho tantiash nëshaid abëd icquid menianec abi chuiquidbëd nidanepondash.

¹⁹ Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. ²⁰ Aden nacnensho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

Mayan icsa Esusën dapuduemiaid
(Duc 4.33-37)

²¹ Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenquo yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. ²² Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquo iccosh —quec onquec tabadcuuededpondash. ²³ Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: ²⁴ —Esus Nasaded yacnoësh choquid mibëd icquidpenquo nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash. ²⁵ Adoquien: —Otaquio tabad —quetanquin: —Dapuduen —capondash Esusën. ²⁶ Adoac comapenec abi dapuduedaid uëdëquenec sidquianec dapuduempondash.

²⁷ Adsho isash: —¿Abimbodambi ispo? ¿Mitsipadquidquo nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. ²⁸ Adec onquecuededash auëshquo nidaneshun ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

Simonën nachi bëdamiaid
(Mat 8.14-15; Duc 4.38-39)

²⁹ Ambi chuisho tantiaboedo nidanenubien Petedo Simon caidën shubu yacno Esus Acobo Uan aidtedi nidpondash. Aidën shubun icquidbidi aton utsi Andedes icpondash. ³⁰ Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. ³¹ Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquo bëdampondash. Adec

bëdanash nidtoshon codocashun abi choquidtedi pemebampondash Simonën nachin.

Esusën dadpen bëdamiad
(*Mat 8.16-17; Duc 4.40-41*)

³² Adnubien inchëshbudtsëqui Capednaun caid yacnocquidën daicsaidtedi bë-bëpondash. Adembidi mayan icsa dapuduedaidtedi bë-bëpondash. ³³ Bë-bëash Simonën shubu shëcuë cuëmano puduedabi tabadcuededpondash. ³⁴ Adsho isun daicsaidtedi Esusën bëdamebampondash. Adembidi mayan icsa dapuduedaid dapuduemebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe queshun oncamenquiocpondash.

Shubu nibëdacno Nuquin Papabëd onque Esus onquiaid
(*Duc 4.43-44*)

³⁵ Adashic badiadte anoentsëqui yanubi isucunanec puuanec shubu nibëdacno Esus nidpondash. Nidec tabadtuidshun Nuquin Papabëd onquequin chuibampondash. ³⁶ Esus nidacshobi isucunshun Petedo Simombëd icquidën nibënampondash. ³⁷ Aden nibënquin istuidashi: —Mibi isec choquidtedishun mibi nibëmbededec —quepondash Esus caic. ³⁸ Adoaquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. ³⁹ Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuioapondash. Adembidi mayan icsa dapuduemeoapondash.

Nami mishac tantiadenquiocquid bëdamiad
(*Mat 8.2-4; Duc 5.12-13*)

⁴⁰ Aden Esusën chuibanubien daushac bimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bëdame —quequin Esus chiec comapenec cuëdpondash.

⁴¹ Adec cuëdshobi nëid isash unësquio iquebi quequin ëquëducshun tantiaquin mishac Esus: —Mibi bëdamembique. Bëdambo icta ⁴² —quenubi daicsaid nibëdquio yec bëdampondash.

⁴³ Aden bëdametanquin nidmepondash: —Nidec nid.
⁴⁴ Nidquimbi, Esusën bëdamioshi quequin chuituidenda.

Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec onquianequid, isme. Adoshon dēbimbiecquid daēd meneta Moisesën chiacpadomboen ma anocquidēn napanueshun. Aden meniac abentsēc cuesuneshun utsi cuesunenu quenquiocquin cuesunaidēn intac puntanequin intac mibi daseccashun dēbimbiecquid utsi cuemeshun naden aidēn mibi chuipec. Nuquin Papan mibi bēdamboen istiapimbochoedi nēbi bēdamboen mibi isendac. Aden chuiquin mibi bēdamiaid Nuquin Papan naid nec quequin tantiatsiash —quepondash Esus ambi bēdameboed chiec.
⁴⁵ Adsho tantiaboshombi niacbidanquin Esusēn bēdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibēdacno capupondash. Adnubien Esus nibēnec nidaid utsi-utsiec yacnoēsh dadpen cho-chopondash.

2

*Cuembo yec uishquiaid Esusēn bēdamiaid
 (Mat 9.2-8; Duc 5.18-26)*

¹ Adashic Capednaun yacno nidoash shubun puduedpondash Esus. Adnubien, Esus chosh gesho tantiash padpidec dadpen cho-choapondash. ² Dadpen cho-choash puduedash tsucus-tsucustsēcquio yec tabadnubi adecbidi shēcūē cuēmano tabadpondash. Adec tabadsho isun Esusēn Nuquin Papa yacno shubu abentsēquēn tabadte iquec quequin chuibampondash. ³ Adnubien cuembo yec uishquiaid bēc dada daēd-daēdquiec 4ted cho-chopondash. ⁴ Cho-choshon matses tsucus-tsucustsēcquio yec tabadsho isun dectatoshon macano nacnenaid chic-chictanquin Esusēn dayunquio uishquiaid imbudpondash. ⁵ Aton dayunquio imbudsho isun Esusēn bēdamec quequin abi imbudboedēn tantiec quequin ambibi tantiapondash Esusēn. Adashic: —Mado, mibi cuidenquio yec mibi icsaid bēpiscudobi —quepondash Esus.

⁶ Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onqueniocquin icsamboen tantiapondash. ⁷ ¿Atotsi quiash adec Esus onquepeque? Tantiānu. Nuquin Papa icsamboen chuiquidien aid nechitec. Nuquin Papauidi matses cuidenquio yec abi icsaid bēpiscudquid nec, quetsēcquiec tabadpondash.

⁸ Aidon tantiaid tantiec nadpondash Esus: —¿Atotsieshun aden mimbi icsamboen tantiāpe? ⁹ ¿Mibi cuidenquio yec mibi

icsaid bēpiscudobi quequin ěmbi chiaidquoio bēdantequidpenda nedic? Adecbidi, ¿Mibi icsambochoedi mibi bēdanoque. Nid-toshon mibi imbudboed chiadtoshon buanec nid quequin ěmbi chiaid bēdantequidpembidida neoadic? ¹⁰ Ai, adquidquoio-bidi nec. Mibi cuidenquoio yec mibi icsaid bēpiscudobi queboed chidon tishac matses yanaid yequi chuiquidquoio Esus nec quequin tantiesabo mibi nepec. Adquid icsho ěbi tantiamenuquin ¹¹ cuembo yec uishquiaid naden chiembique Tantia. Mibi icsambochoedi mibi bēdamiombique. Nid-toshon mibi imbudboed chiadtoshon buanec nid –capondash Esusēn. ¹² Adoaquien nidtoshon abi imbudboed chiadtoanquin buampondash. Aden buansho isash: –Nideque. Is. Adomboen nasho isamboccondambi –quetsēcquieq onquiash Nuquin Papan naid nec quec cuēdēncuededpondash.

Ēbēd iquec cho Esusēn Debi caid
(Mat 9.9-13; Duc 5.27-32)

¹³ Adashic padpidec chian Cadidia caid cuēmano nidoapondash Esus. Ambobi tabadnubien aidēn chiaid tantianuec matses dadpen cho-choapondash. Cho-choasho isun Nuquin Papan chiaid chuibanoapondash Esusēn. ¹⁴ Aden chuibanec nidquimbi Debi, Adpeon madombo, tsadsho istuidpondash. Aidi Mateyobidi cuēnondash. Nidaid utsi yacno aton na utsi-bon buan-buansho isun piucquid bedshunquid Debi nepondash. Adembidi nidaid utsi yacnoshon aton na bē-bēsho isun piucquid bedshunoaquid Debi nepondash. Isadaidpembo ancaquidēn, Con matsespembon piucquid bedshunta, cac bedshunoaquid Debi nepondash. Adshobien: –Ēbēd iquec cho –Esusēn cac: –Ai, mibēd nidnu. Nid –quianec badedi Esus tsibananec Debi nidpondash.

¹⁵ Adshumbic Debin shubuno nidshun Esusbēd icquidon pepondash. Ashunquiobidi aton na buansho isun piucquid bedshunquid Debipadquidēn utsin-utsinquien pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. ¹⁶ Aden adquidbēdtan Esusēn pesho isun isadaidbon nadomboen nata quequin chiaid tantiamequid padiseyobo caid: –¿Atotsieshun piucquid bedshunquidbēdtambi isadaidbon nadomboen nata quequin chiaid naisabēdtambi mibi chuiquidēn pepec? Tantianu. Ēbi chui –quepondash padiseyobo Esusbēd icquido chiec.

¹⁷ Adsho tantiasien Esus: –¿Dada bēdambocquidta dauēchoquidēn bēdametequid nedic? Padenquoio. Daicsaidien dauēchoquidēn bēdamec. Adquiecbidi, icsaisa nebi quequin ambibi tantiaquid icsho mibi icsaid ěnta. Aden ěnash ěbēd

icquid mibi iquendac quequin chiesā nebi. Icsaquid nebi queshun mibi icsaid ěnta. Aden ěnash, ěběd icquid mibi iquendac quequin chuiquid nebi –quepondash Esus.

¿Atotsi quiash miběd icquid buna měmunesa nec? quiaid (Mat 9.14-17; Duc 5.33-39)

¹⁸ Adnubien abi chuiquid quěněn nauedan aid tantiec uněsquiocquin Uan acten mentoanquidběd icquiděn buna měmunubi padiseyoboběd icquidon uněsaid tantiec uněsquiocquin buna měmunoapondash. Aden buna měmunsho isanec nidequi Esus yacno nidash Esusběd icquidon buna měmunenquio icsho isash utsibo: –¿Atotsieshun Uamběd icquidon adembidi padiseyoboběd icquidon buna měmunubi miběd icquidon buna měmunenquio icpec? Tantuanu. Chui –quepondash.

¹⁹⁻²⁰ Adoaquien Esus: –Aton chido bednun pambid meniac chidon codocacsho abi inquiděn aběd icquido menec. Aden meniac isuidesa aběd icquido nec. Adecbidi ěbi abi chuiquid icnuc ěběd icquidon buna měmunenquiocquin isuidenquio iquec. Yucash chido inquid nibědanan aběd icboedo uněsquiocquin buna měmunquin isuidpec. Adecbidi ěbi nibědanan ěběd icboedo uněsqiuo yampec.

²¹ “Adembidi dashcute shěnibědta chucambocquid bětuscaisa matses nec. Shěnibědta chucambocquid bětuscatsaid aměec canchedoaic. Adecbidi abi icsaid ěnesa tantiaid běda pausudtiapimbo yec icsabudec. ²² Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shěnin icsa sandoshon nequid běenquiocquin. Adecbidi Nuquin Papan tantiacpadec pausudnu queshun mibi icsaid ěnacsho isun Nuquin Papan pausunendac –quepondash Esus.

Chonoadtemaid ushě icbo nebi quiaid (Mat 12.1-8; Duc 6.1-5)

²³ Adnubien chonoadtemaid ushě utsi icnuc ěnapen capuenquiocquin tied matanquin adosbiecquid trico caid ěshě bedshun Esusběd icquidon pepondash. ²⁴ Adshobien: –Miběd icquido is. Chonoadtemaid ushěn chonoadeque. Abi chuiquid mibi iquec ¿atotsi quiash, Padi. Chěn, quenquio ique? –quepondash padiseyobo Esus caic.

²⁵ Adoaquien Esus: –¿Chuiquid Dabidběd icquidon natia bunquin ambi petemaid pepondash quequin dada uapampid tantiamboda icconda? ²⁶ Nad icpampic. Aběd icquidoběd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quěněn puduedshun Nuquin Papa tantianuequin pan meniac sanaid bedshun ambi

petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenquiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

²⁷ Aden chuishumbic naden padiseyobo Esusën chuiopondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. ²⁸ Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenquiocobi —quepondash Esus abi chieshënquido padiseyobo chiec.

3

*Mëuesadaid Esusën bëdamiaid
(Mat 12.9-14; Duc 6.6-11)*

¹ Adashic padpidec Nuquin Papan chiaid chuibante shubun Esus puduedpondash. Ambo dada mëuesadaid tsadnubi ² Esus chieshënquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bëdamepeque. Nëid badiadën bëdamesho isun bedmeshun quënën nauedmenu quetsëcquiec padiseyobo tabadcuededpondash. ³ Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

⁴ Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bëdamepe? ¿Bëdamenquiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

⁵ Adoaquien nëishtanquimbi abi chieshënquido bëisbanec Esus, Nuquin Papan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bëdampondash. ⁶ Adosho isash pudue nanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquiec bunebi. ¿Mitsipadentsimbi cuesunemenuen bedmepeba? —quecuededpondash padiseyobo.

Esus yacno matses dadpen choaid

⁷ Adnubien Esusböd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. ⁸ Adnubien Esusën nabansho isboedon chiac nidaid Udeya caid yacnoquido dadpen cho-chonobi adecbidi Edusaden yacnoquido cho-chonobi adecbidi Idumeya yacnoquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnoquido cho-chonobi adecbidi shubu dadpen icquid Sidon caid yacnoquido cho-chopondash. Esus yacno ambi nabanaid utsibon chuisho tantiash cho-chopondash. ⁹ Adec cho-choash tsucus-tsucustsëcquio yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash aböd icquidquio caic. ¹⁰ Dadpen bëdamiosh cadoshe. Èbitsen bëdanu quequin ambibi tantiaquin Esus mishbededpondash. ¹¹ Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. ¹² Adoaquien: —Padi. Aden ëbi chienda —quepondash Esus.

*Aböd 12ted icquid Esusën tantiamenu caid**(Mat 10.1-4; Duc 6.12-16)*

¹³ Adashic macuësh dapa yacno nidnushi aböd 12ted icquido chomeshun nadopondash: ¹⁴ Èmbi tantiacpadomboen mibitedi tantiamembi. Adquid icquin ëböd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi. ¹⁵ Adembidi mayan icsa dapuduedaid dapuduemequidbidi mibi icmembi quequin aböd icquido Esusën chuipondash. ¹⁶ Ambi tantiamenu caid nëidtedi icpondash: Simon cashumbic Esusën Petedo capondash, ¹⁷ utsibic Sebedeyon mado daëd, Acoboböd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash. ¹⁸ Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. ¹⁹ Utsibic Udas Iscadiote, aidi abi chieshënquido Esus bedmenush Esusböd capuquid nepondash. Aidtedi Esusën tantiamenuin chuiquin ismiaido niondash.

*Bedtsibu caidën dausunaid Esus nec quiaid**(Mat 12.22-32; Duc 11.14-23; 12.10)*

²⁰ Aidedi chianec nidequi Esusböd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusböd icquidon penquo icpondash. ²¹ Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

²² Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënquid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec — quepondash.

²³ Adoaquien Esus: —Mimbi icsamboen tantieque. Mibi chuibanu. Tantieci tabadta. ¿Mayan icsan icbo ambi dapuduedmiaid dapuduemequidta nepadic? Padenquo.

²⁴ Adquiecbidi shubu icbo aböd icquido cuëshödmesa nec.

²⁵ Icbon aböd icquido cuëshödmiash shubu abentsëquën tabadtiapimbo iquendac. ²⁶ Adembidi ambi dapuduedmiaid dapuduemiasch adquidën icbo ictiapimbo Satanas iquec. Icbon icnuequid aböd icquid puduemesa nec. ²⁷ Dadpenshun icbo Satanas nec. Adquid icquin ambi matses dapuduedmiaid dëniacanquidënuidquo nadatiambocquin nabanquin cue-mepec. Adquid icquin ëmbi nac mayan icsa dapuduedaid Satanasën yua icboedi icbombo tantieci bëdambo yanec ëböd iquendac. ²⁸ Abimbo chiembique. Tantiata. Matses cuidenquiocquin abi icsaid bëpiscudquin paucquid Nuquin Papa nendac. Adecbidi Nuquin Papa icsamboen chuiboedi, Icsaobi, Papa, qesho tantiashun Nuquin Papan aid pauquendac.

²⁹ Utsien Nuquin Papan Mayan abipadquidën tantiamiac nasho isun Satanasën naid nec qesho pauquenquo iquendac. Adquid ënëdenquo yec icsaquid nendac —quepondash Esus ³⁰ Satanasën tantiamiac mayan icsa dapudemquid Esus nec abi caquido chieci.

Esus yacno aton utsibo aniböd choaid

(Mat 12.46-50; Duc 8.19-21)

³¹ Adashic Esus yacno aton utsibo aniböd chopondash. Aido choshon matses dadpen nuntan tabadsho istuidash: —Ëbi choaid con mado chuita —quepondash utsi chieci. ³² Adoac puduedshun Esus nënantan tsadsho isun: —Titaböd min utsibo choshon umanucshun mibi isnuen cainec —quequin

chuituidpondash. ³³ Adoaquin Esus: —Adquid utsi chuinu. Tantiata. ³⁴ Në tabadquido ëbëd icquido neque. Is — quepondash Esus abëd iccuededquido chiec. ³⁵ Adashic: — Nuquin Papan chiacpadomboen nabanquid ëbëd icquid nec. Adquid buchi caindambi. Adquid chido chuchu caindambi. Adquid utsi tita caindambi —quepondash Esus.

4

Tantiamequin pete ëshë nësecain chiaid
(*Mat 13.1-9, 18-23; Duc 8.4-15*)

¹ Adashic padpidec chian cuëmano nidshun Esusën tantiamequin chuibanoapondash. Aden chuibanuc cho-choquid dadpen icsho isash cano antabëdtopondash cho-choquid acte cuëmano tabadnubi. ² Adec tabadshobi, matses nadquio iquec quequin tantiaquin tiedën caniquid ëshë Esusën tantiamequin naden chuibampondash: ³ —Tied icbo pete ëshë nësecanuec aton tied yacno nidquid. ⁴ Adec nësecanuec nidshun pete ëshë nësecac maisec pudun-pudunaid uicchunën chequid. ⁵ Adnubien nidaid cuënote dadpen samëdacno utsi-utsiec paëdash badedquio dëyucuidtsash ⁶ tapunenquio iquec ushën shoedec. ⁷ Adnubien pete ëshë utsi-utsiec nisanquid dëyucacno paëdash dëyucash canidouidtsacsho nisanquidën bëtinaç podo sinash bacuëtiapimbo iquec. ⁸ Adnubien nidaid bëdambo yacno paëdaid dëyucaid caniaç dadpen pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec 100ted iquec —quepondash Esus.

⁹ Aden chiaç: —Ëmbi chuiboed tantianu quiach bëdamboen tantiec papuduedta —quepondash Esus.

¹⁰ Aden chuibanash udictsëc Esusbëdi nidshun utsibo choenquiocsho isun databëdtuidquin abëd icquidon: —Mimbi chuibamboed tantianu. Èbi chui —capondash Esus chuiquin.

¹¹ Adoaquin: —Nuquin Papan shubun tabadquid tanti-amendambi utsiboembi, Mibi nadquido iquec, quenquiocquin chuibanoc. ¹² Aden chiac:

“Nuquin Papan nabamboed isto-istoboedi ma padenquio tabadteneyoc.

Adembidi tantiado-tantiadoneboedi ma padenquio tabadteneyoc.

Aidon abimbo tantiaquin abi icsaid ëntsiandac. Aden abi icsaid ënsho isun cuidenquio yec Nuquin Papa abi icsaid bëpiscudtsiandac”

—quepondash Esus abëd icquido caic.

¹³ Aden chiaçic: —¿Mimbítsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibanasho mimbi tantiapë? Èmbi chuiboed nad iqueque.

Tantia. Chuinu. ¹⁴ Pete ëshë sequidbimboecquid Nuquin Papan chiaid chuibanquidquo nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec. ¹⁵ Nidaidën paëdash pete ëshë dëyuctiapimboesho uicchunën chiaidbimboec matses utsi-utsiec iquec. Adquid Nuquin Papan chiaid tantia sh papuduednu qesho Satanasën bëpiscudmiac tantienquo yanec Nuquin Papa yacno puduedtiapimbo iquec. ¹⁶⁻¹⁷ Nidaid cuënote dadpen samëdacno pete ëshë paëdash badedquo dëyucuidtsash tapunenquo yec ushën shoedaidbimboec matses utsi-utsiec iquec. Adquid Nuquin Papan chiaid tantiauidash bëdambo iquec queboedi ¿Esus tantiaquid nebi quecta icco? quequin utsibon mamënshunac badedquo tantiesa nebi quendac. ¹⁸⁻¹⁹ Nisanquid dëyucacno pete ëshë paëdash dëyucash canidoidtsacsho nisanquidën bëtinac podo sinash bacuëesabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi icsaid aitedi tantiaquin Nuquin Papan chiaid tantiesa yanshun bëdamboec tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec. ²⁰ Ëshë ut-sibic nidaid bëdambocquidën paëdash dëyucash cania sh dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bëdamboec tabadquin utsi ismequid nec. Aden ismiac Nuquin Papan chiaid tantiaquid daëdpactsëc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshë yanendac –quepondash Esus abëd icquido tantiamenuc.

*Tabote nënantan nanac chënquiacbimboec ictiad quiaid
(Duc 8.16-18)*

²¹ Aden chuishumbic abëd icquido naden Esusën chuipondash: –¿Tabote icbon ambi dayun uaboed taboshon tsadte tëdion nanshun isaidta nedic? Adembidi ¿Tabote matsun bëtashun isaidta neoadic? Padenquo. Nënantan tabote nanac chënquiacbimboec ismenu quec ictiad. ²² Adquibidi abi yacno yuedanquid ambi dayun uapampidi nëbi Nuquin Papan dayun uainquiocquin ëbi chomeshun ismec. Adembidi con mado chuiban quenquiocboedëmbi nëbi ëbi ismec ma con mado chuibanu quequid con Pa nec. ²³ Ambi chiaid tantianu qeshun tantiaquiec papuduedta –quepondash Esus.

²⁴ Aden chias sh Esus: –Chiaid bëda tantiatequidquo iquec qeshun tantiaquiec papuduedquid icta. Aden chiaiduidi tantiec papuduedquid abipadquid bëdambocquid ambia tantiaquidën Nuquin Papan mibi icmendac. ²⁵ Adquid ambi

tantiadoniaidquo iquendac. Aden tantienquioctsäcquidën tantiaid bëda uesadendac nibëdquiec –quepondash.

Ambi siaboed ichon isenquiocnoc bacuëec quiaid

²⁶ Adec onquequin abëd icquidquo chuishumbic chochoquidtsen naden Esusën chuipondash: –Nuquin Papan shubu abentsëquën tabadec caidaidquo chuibanu. Tantiata. Nidaid bëdan tiedën caniquid pete ëshë siash ²⁷ tabadquin cainquidquo icbo nec. Dadpen ushquin ambi seboed isenquio yec icbo tabadnubi ²⁸ ambi seboed dëyucash caniec tauitanec bacuëec. ²⁹ Ambi siaid isenquiocnoc canitanec bacuëacsho badedquo bedquid icbo nec. Adquiecbidi Nuquin Papan chiaid chuiban-chuibanubi papudedquid utsi-utsiec yanec chuibanquidën isenquiocnobi. Papudedquioshon tantiabenec. Adquid isash con shubun puduedquido neque. Bednu quependac Nuquin Papa –quepondash Esus.

*Mostasa caid ëshë chiaid
(Mat 13.31-35; Duc 13.18-19)*

³⁰⁻³² Adec onquequin chuibanashic Esus: –Nadquo Nuquin Papan shubun icquido iqueque. Chuinu. Tantia. Mostasa caid pistsëc ëshëmpi ictsëcquid nësecaid dëyucash nuamboshë caniec cuidi-cuidipambo iquec shubu-shubupambo yec podoc. Ambo uicchunën shubu uaic. Adomboembidi aton shubun abi tantiaquid dadpen dayun uaquid Nuquin Papa nec –quepondash.

³³ Aden chuibanshumbic adomboembidi Esusën chuibam-pondash. Aden chuibanash, aitedquio tantiapec abibi queshumbic aden chiaid chuiquin ëmpondash Esusën. ³⁴ Aden abited chuibanshumbic abëd icquiduidtsëqui bëdamboen tantiamequin chuipondash.

*Acte tēccoasquiaid ënëd cac ënëdaid
(Mat 8.23-27; Duc 8.22-25)*

³⁵ Adashic abi ushëmbi inchëshbudtsëc cano antabëdtoanec Esus: –Chian uquë cuëma utsiuc nuquiuidtsëqui nidnu. Nid –quiampondash abëd icquido caic. ³⁶ Aden chiac chian cuëman tabadcuededquido niananec badedquo nidquin canon Esus buampondash. Abëd icquidon potenubien cano antabëdtoanquin utsin-utsinquien potepondash. ³⁷ Aden potenubien cunquequid dapan acte tēccoasquequin cano acte uemiaidën mentoadtsempondash Esus tēotadec ushñubi. ³⁸ Adec uec usho: –Cunquequid dapan acte tēccoascaidën nuqui mentoeque. Isucunta, icbo –quequin Esus timpondash.

³⁹ Aden tinac uëtsëdtoshon Esusën: —Mibi comapenec cunqueque. Ënëd —cac badedquio ënëdpondash. Adem-bidi: —Mibi comapenec tëccoasqueque. Ënëd —cac badedquio ënëdoapondash acte.

⁴⁰ Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepes —quepondash abëd icquido caic. ⁴¹ Adec Esus cuënubi badedquio cunquequid dapa ënëdposh. Adecbidi acte tëccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquianquiondash abëd icquido.

5

Mayan icsa dadpen dapuduedaid bëdamaiaid (Mat 8.28-34; Duc 8.26-39)

¹ Adshumbic acte tëccoasquec ënëdmebon nidquimbi cuëma utsiuc potiash nidaid Cadada cashumbic Quedasa caid yacno choapondash. ² Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. ³ Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash. ⁴ Abi mëtaniaid shocosh bucu seccuduatanquin tës-tëstenepac caondash. Adosho isac abi tanebocpadquid utsi nibëdpac caondash. ⁵ Aidi inchëshën capucuenequi mëyanacimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

⁶ Aidi abi yacno Esus canon chosho isanec tinquianec choash: —¿Tsusio, ada cho? —quiashic: ⁷ —¿Mibëd icquidtabi nedi? Mimbi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita —quepondash mayan icsa dapuduedaid Esus chiec. ⁸ Adec mayan icsa dapuduedaid abi onqueshobien Esusën: —Dapuduen —cashic: ⁹ —¿Tsutsi cuëmëdquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacimboec onquec.

¹⁰ Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

¹¹ Adnubien macuësh potseshun chanco dadpenshun pec tabadpondash. ¹² Aden pec tabadsho isashien: —¿Ada mimbi ëbitedi chanco dapuduedmetsia? —quepondash mayan icsa Esus caic.

¹³ Adoaquien: —Dada dapuduencuededash chanco dapuduedcuededta —Esusën cac dapuduencuededash acte dapa quiusudacnombo comapenec niquec pudun-pudunec mentoadbudnepondash chanco nibëdquiec.

¹⁴ Adsho isash chanco pemequin isquido chiec nidanepondash. Adec nidquimbi shubu dadpen icquid uano-uanoec tabadquido chuituidac aidotsen isec cho-chopondash. ¹⁵ Esus yacno cho-choshon mayan icsa dapuduedaid bëdamiash quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquicochoedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsëcquiec tabadcuededpondash. ¹⁶ Adec tabadsho isun mayan icsa dapuduedaid bëdamequin chanco dapuduedmesho isboedon cho-choquido tantiamenuen chuibampondash. ¹⁷ Aden chuisho tantiaashun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chushcaquin.

¹⁸ Adsho tantiaash cano yacno nidequi cano Esus antabëdtonobien mayan icsa dadpen dapuduemboed choash: —Mibëd icte bunebi. ¿Adabi buane? —quepondash. ¹⁹ Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapuduemeboed Nuquin Papa tantiaquin chuiban. Nuquin Papan ëbi ad icsho unësquiocquin dapuduemiash quequin chuiban —quepondash Esus. ²⁰ Aden Esusën chiaquien nidpondash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bëdamiash, quec abibi onquec tabadcuededpondash.

*Nua intac budaid bëdameshun champi unësaid bëdamiash
(Mat 9.18-26; Duc 8.40-56)*

²¹ Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmano padpidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. ²² Adnubien Nuquin Papan chiaid chuibante shubun tabadquido isquid, Aido

cuëmédquid, chopondash. Adec choquimbi Esus istuidash mibi bédambocquid nec quequin ismenuec Esus tauebudshun: ²³ —Con champi unëseque. Aid mishquin bédamec cho —cac ²⁴ Aidobëdi Esus nidpondash.

Adec nidshobi matses dadpeshun tsibanampondash. Tsucus-tsucustsëcquio yec nidquin Esus tsibanampondash. ²⁵ Esus tsibanquidquio chido utsi icpondash. Aid chido seta 12ted matamec intac budash bédanenquiocquid icpac caondash. ²⁶ Dauë meniaqui bédanenquio icpac caondash. Dauëchoquid utsi-utsien piucquid menequin dauë bedshun chequi bédanenquio yec intac nuambo yampac caondash aton piucquid naimëdnubi. ²⁷ Adec intac icnubi capuquin Esusën nabanaid chuisho tantianec nidquimbi matses dadpeshun tsibananubi aidëntsen tsibanampondash. Aden matses dadpeshun tsibananubi ismenquiocquin cachoc choshon Esusën dashcute mishpac caondash. ²⁸ Aden aton dashcuteuidtsëqui mishec bédampatsiash icmane qeshun mishtsequi bédampac caondash. ²⁹ Intac bédanenquiocquid Esus mishec bédampac caondash. Èmbi tantiacpadquiequi bédanobi quequin ambibi tantiapondash.

³⁰ Adec chido bédanubien èmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

³¹ Aden chuisho tantiashun abëd icquidënquio: —Tsucus-tsucustsëcquio matses dadpen iquec, ¿tsuntsimbini mishosh, quecta ique? —capondash.

³² Adec abëd icquid cuëdnubi onquenquiocquin, ¿Midaquidënquio mishoshibique? Isnu, abibi quequin matses utsi-utsien bëispondash Esusën. ³³ Aden bëisbanubi, èmbi mishoc quenquio yec bédamboed uëdëquec choequi mibi nadatiambocquin naquid nec quequin tantiequi Esusën taëno uebudshun abi mishec bédanaid chuibampondash. ³⁴ Adoquien Esusën: —Champi, mimbi tantiacpadquiequi mibi bédanoc. Dada icsambo icboedi nëbi dada bédambo mibi iqueque. Bédambo yec nid —capondash chido chuiquin.

³⁵ Aden nidmenubien Aidon shubun icquid cho-choshon: —Min champi unësoshe. Tsusio chomenda —capondash Aido chuiquin.

³⁶ Adnubien Aido Nuquin Papan chiaid chuibante shubun tabadquido isquid caic: —Dacuëdenquiocquin èbi tantiata —quepondash Esus.

³⁷ Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobëdta Acobo Uan, Acobon utsimbo aidtedi buanec Esus nidpondash. ³⁸ Adec nidequi Aidon shubuno choquin

comapenec shubicuededsho tantiatuidpondash. ³⁹ Aden tantiequi puduedash Esus: —¿Atotsi quec comapenec shubicuedede? Champi unësenquo yec ushachimboec uec nec —quepondash.

⁴⁰ Adshobien tantiesa icquin mamënshumbededpondash. Adoquien aitedi puduemiash champin tita aton papa chedo abëd icquidbëd champi yacno Esus puduedpondash.

⁴¹ Ambo choshon mëdante mëdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. ⁴² Adoac badedquo isucunash nidtoash capupondash. Champi seta 12ted icquid niondash. Aidi bëdansho isun abitedishun, Adopenshenda iquec quequin isbededpondash. ⁴³ Aden champi bëdameshun Esusën: —Ëmbi naboed utsi chienda. Abimbo caimbi. Abentsëcquiobi chienda —capondash. Aden chuitanequi: —Champi peme —quepondash Esus.

6

Abi icnëdacnoshon Esus chieshënquido (Mat 13.53-58)

¹ Auëshquo puđuanec nidequi abi icnëdacno Nasaded caid yacno Esus choapondash. Abëdi abëd icquido chopondash.

² Ambo tabadashic chonoadtemaid ushën Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsëc: —¿Mitsishun chuibansho tantiaşun adomboen Esusën chuibampec? —quepondash.

Adnubien utsi: —¿Mitsicquidën ismiac Esusën nadatiambocquin nabampec? —queoapondash.

³ Adnubien utsi: —Nëmbocquid, cuëte nacnenquid, Osen mado nec —queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëidic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquieć tabadec onquecuededec chieshcuededpondash.

⁴ Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matses iquendac. Aton shubun icquido adecbidi iquendac —quepondash Nasaded yacnocquido chieć. ⁵ Aido abi chieshënquid icsho isun nadatiambocquin nabantiapimbo icpondash. Ëbi bëdamepec quequin tantiaquidquo daëdpactsëć icsho mishquin bëdamepondash. ⁶ ¿Atotsi quiash ëmbi chiaid tantiatiapimbo icpec? Adembidi

nadatiambocquin nasho istiapimbo icpec quepondash Esus abibi onquec.

Abëd icquido Esusën nidmiaid

(Mat 10.5-42; Duc 9.1-6)

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash. ⁷ Adec cuenadquin chuibanecqui abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun-daëdshunquien chuibanec nid. Chuibanquimbi mayan icsa dapuduedaid dapuduemeta. ⁸ Nidquin dadpen mitsana sauedshun buanenda. ⁹ Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuiddec nidaneta. ¹⁰ Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adquiecbidi tabadquin chuibanoata. Adenuidi naquin chuibanta. ¹¹ Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiapadomboen ismeta —capondash Esusën abëd icquido chuiquin.

¹² Aden Esusën chiaquien nidanepondash. Adec nidshumbic, mibi icsaid ënshun padpiden tantianu quenquiocquin Nuquin Papan chiapadomboen nabanta quequin chuibampondash Esusën nidmiaidon. ¹³ Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bédameoapondash Esusën nidmiaidon.

Uan acten mentoanquid mapi butiaid

(Mat 14.1-12; Duc 9.7-9)

¹⁴ Adnubien, Chuibanquimbi Esusën nadatiambocquin nabanosh, quequin isboedon ancanquid Edodes chuipondash. Aden chuiban-chuibanac dadpenshun Esusën nabanaid tantiapondash. Aden tantiaish: —Uan acten mentoanondaid mapi butemeboed uincuempash icnui. Adec uincuenshun nadatiambocquin nabanec nepanui —quecuededpondash tantiaquido.

¹⁵ Adnubien utsibo: —Ediasien nechitec. Nuquin Papan chiampicpadquiec choashien nec —quecuededpondash.

Adnubien utsibo: —Nuquin Papan chiaid chuiampidien Esus yanchitash —quecuededpondash.

¹⁶ Adnubien Edodes: —Ëmbi mapi butemiondaid, Uan pado, uincuempash icnui —quepac caondash.

¹⁷ Ënden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: ¹⁸ —Min utsin chido mimbi bedaid natemaid niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpenshun tantianushe qeshun Uan bedmeshun quënën nauedmepac caondash Edodesën. ¹⁹ Adoquien Uan Edodiasën chieshënquin: —Uan cuesunemetiadquidi mibi nec —quepac caondash aton bënë Edodes caic. ²⁰ Uan bédambocquid Nuquin Papan chomiaidbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiashe: ¿Atotsimbi nëid napeba? Ambi chuibanaid bédambo iquec. Aidën chuisho tantiashe bédambo iquebi, abibi qeshumbic Edodesën chomedednepac caondash chuisho tantianuen.

²¹ Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash. ²² Aden aidtedi cho-chomiashe tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen mimbi naoc —quecuededpac caondash Edodesën chomiaido champi caic.

Adec onquesho tantiashe Edodes aton chidon champi caic: —Mibi bunaid mibi menenu. Ëbi chui. ²³ Abimbo caimbi. Mibi bunaid ëbi chuita. Mitsanatedi bunebi ëbi casho tantiashe dadpen mibi menembi —quepondash.

²⁴ Aden Edodesën chuisho tantiashe: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ëbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashe anin: —Uanën mapi bunebi quequin chuita —capac caondash aton champi chuiquin.

²⁵ Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

²⁶ Adsho tantiashe Uan tantiec unësquio icpac caondash Edodes. Adec unësquiocquin ambi champi chiapadomboen natiapimbo iquec ëmbi chomiaido quenushë qeshun adoembi

abibi qeshun: ²⁷ —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin ²⁸ maspanën nandoshon bëshun champi meniac bedshun champin aton tita menetuidpac caondash. ²⁹ Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

Dada 5000ted Esusën pemiaid

(Mat 14.13-21; Duc 9.10-17; Uan 6.1-14)

³⁰ Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. ³¹ Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

³² Aden chiashic cano antabëdtoanec matses nibëdacno nidpondash aitedtsëqui. ³³ Adec nidsho isash matses dadpen abi nidte yacno tantiec: —U nidanec —quiash titinque choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. ³⁴ Adec aitedi abia cho-choambien Esusbëd icquido choapondash. Pudundoquimbi matses dadpenshun abi cainec tabadsho isashien Esus, Abi tantiamequin Nuquin Papan chiaid chuiquid nibëdacbimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

³⁵ Yuen Esusën chuibanubi ushë budpondash. Ushë budsho isun abëd icquidon: —Icho, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. ³⁶ Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

³⁷ Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquio yoc —quepondash abëd icquido Esus caic.

³⁸ Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid dosted iquec —quepondash.

³⁹ Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. ⁴⁰ Adoac ambi

chiacted-tedquieq tabadbudpondash. ⁴¹ Adec tabadbudsho isun panëmpibëdta nuëccquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembi —qeshun cuësh-cuëshun: —Meneban —Esusën cac abëd icquidon menebampondash. ⁴² Menebanac piash: —Padi. Piombi —quecuededpondash pequido. ⁴³ Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. ⁴⁴ Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin datedictsäqui tambampondash 5000ted iquec quequin.

Acte bëntse Esus choaid
(*Mat 14.22-27, 34-36; Uan 6.16-21*)

⁴⁵ Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembi —quepondash Esus abëd icquido caic. ⁴⁶ Adoac canon potenubi matsestedi nidmianec matses nibëdacno macuësh yacno Nuquin Papa chuinuec Esus nidpondash. ⁴⁷ Adnubien inchëshbudtsëqui abëd icquido acte nënantanquio canon noadpondash. Ambobi noadnubi Esus abentsëqui mananuc tsadpondash. ⁴⁸ Ashunquio Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboenoc acte bëntse choquin abëd icquido Esusën ismetuidpondash. ⁴⁹ Datantsensho isash, Mayambien nechitec, quequin ambibi tantieq sidquecuededec ⁵⁰ dacuëdcuededpondash.

Adsho isumbien: —Ëbibi nebique. Dacuëdenquio yec tabadta —capondash Esusën. ⁵¹ Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. ⁵² Panëmpi daëdpactsëc ictsëcquid matses dadpen menebamboedën naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquio icoapondash pamunacbimboecquin.

⁵³ Ashunquio chian potiashic nidaid Quenesaded caid yacno choshon cano nëshpondash. ⁵⁴ Aden nëshash mananuc pudundosho isec anocquido, Aidi bëdamianquid nec, quequin ambibi tantiaquimbi ⁵⁵ daicsaid aton ueten nandoshon Esus yacno bë-bëpondash. ⁵⁶ Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, qeshun daicsaido bë-bëpondash. Adoac —Min dashcute ëbi mishme —capondash bë-

bëaidon. Aden ambi tantiacpaden Esusën dashcute mishash bédancuededpondash.

7

Nuquin Papan paucaid (Mat 15.1-20)

¹ Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, ² Ëmbi mishboed mishtemaid ictsiash, quesa iquec tsusedpabon chuinëdacpadquiec mëpanudabi Esusbëd icquidon pesho ispondash. ³ Padiseyobo isadaidbobidi yec tsusedpabon chuinëdacpadquiec penush mëpanudanequid nec. ⁴ Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambì chuinëdacpadomboen dëshotetsen cachonouidi dapanquidquiobidi nec. Adembidi matsu nacnenaid cachonouidi dapanoaquidquiobidi nec. Shocosh matsu cachonouidi dapanoaquidquiobidi neoaic. Tsusedpabon chuinëdacpadomboen naquidquio nec.

⁵ Aden nabanquidquio padiseyobo nec. Adquiobidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinëdacpadomboen nainquiocquin mëpanudabi pepec — quepondash Esus caic.

⁶ Adoaquien Esus: —Isayasën ëndenquio dada uaquin mibitedi bëdamboen chiampidpadquid mibi nec. Ambì dada uampid nad iqueque. Tantia:

“Nuquin Papa bëdambocquid nec quequin chiacpadomboen tantiesa isadaidbo nec.

⁷ Abia Yampidënquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquio nec.”

⁸ Aden tsusedpabon chuinëdacpadomboen nabanquin Abia Yampidënquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuc.

⁹ Aden chuishumbic adomboembidi chuioc: —Badedquio Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape? ¹⁰ Nuquin Papan chiacpadomboen Moisesën dada

uampid nad iquec: “Titan papabëdtan chiaid chieshenquiocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. ¹¹ Mibien tsusedpabon chuinëdaid tantiaquin adoesa nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuoiaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec. ¹² Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoiaic utsibo. Adechidi, Tita, mibi nashunquin menetiapimbo iquebi, queoiaic. ¹³ Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec –quepondash Esus isadaidbo tsusiobo caic.

¹⁴ Aden Nuquin Papan chiacpadomboen niacquido chishic: –Utsibo, tantiec cho. Mibi bëdamboen chuinu. Bëdamboec papuedta. ¹⁵ Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. ¹⁶ Ëmbi chiaid tantiaquin utsi chuibanta –quepondash Esus.

¹⁷ Aden chiasch iccuededquido abi tabadnubi shubun puduedash tabadpondash Esus. Tabadsho isash: –Mimbi chuiboed ëbitedi tantieme –quepondash abëd icquido. ¹⁸ Adoaquien: –Utsitedishun tantienquio icbocpadquido mibitedi neque. Tantia. Mimbi piaidën mimbi tantiaid icsabudtiapimbo iquec. ¹⁹ ¿Min tantiate yacnoda mimbi piaid nidpec? Padenquio. Mimbi piaid min pucu yacno bud-budec auëshquio chimu nëncuenash puduenec –quepondash abëd icquido caic.

²⁰ Aden chiec onquiashic: –Mimbi tantiacpadquiequi mibi icsabudec. ²¹ Chido mimbi inacmaid isash chudtiadquio iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquio iquebi quequin mimbi tantiacpadomboen mimbi ampec. Cuesunetiadquio iquebi quequin mimbi tantiacpadomboen mimbi cuesuneppec. Utsin chido chudtiadquio iquec quequin mimbi tantiacpadomboen aidi mimbi chudpec. Dada utsin

ëbi bēdaidquiocsho ispec quequin mimbi tantiacpadomboen min bēnēpenquio chudmequid mibi nec. ²² Utsin bedactedi bednu quequin mimbi tantiacpadomboen bedquid mibi nendac. Adechidi utsin bedaid isash adomboembidi bednu queshun isuidesa iquec adomboen bedbanquidquio mibi yampec. Mibibi icsambocquid nec quiaish chieshēmēnquid mibi nendac. Adquid abimbo chiabimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bēdambo icsho isash chieshēnquid mibi icpec. Utsi icsamboen chuiquid mibi nendac. Utsin chuisho, Ēbentsēqui tantiaquidquio nebi, quequin mamēnshunquid mibi nendac. Adembidi nasho mamēnshunoaquidbidi mibi nendac. Ēmbia tantiaquid nebi, quequin mimbibi nabanaid icsa isash bēdambo iquec quec mibi mamēnec tsadec. ²³ Ēmbi chuiboedtedi icsaquidēn naid nec. Aden tantiaquid icsabudte nec —quepondash Esus.

Sidopenisia caid yacnoësh chido ambi tantiacpadquiec bēdanaid
(Mat 15.21-28)

²⁴ Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsēqui yacno choash shubun puduedash: —Nēmbo ëbi choaid chienda —quepondash Esus. Ambi chiacpadpenquiocnoc chuisho tantiapondash anocquidon. ²⁵ Adoac: —Esus chosh —quesho tantiaashien mayan icsa dapuduedaidēn tita Esus tabadacno nidpondash. Adec nidec puduedequi Esus taebudpondash chuiquid dapa nec quequin tantiec. ²⁶ Isadaidpembon chido nidaid Sidopenisia caid yacnocquid niondash. Aidi Esus taebudash: —Con champi mayan icsa dapuduedaid dapudueme, tsusio, —quepondash comapenen chiec.

²⁷ Adoaquien Esus: —Mabi con matses isadaidboba bēdamenuec choboc. ¿Bacuēbo cubudabicnubi opashēmpida pete menequin anin bēnepadic? Padenquio. Adembidi, ¿isadaidbotedi bēdamiabidambi matses utsibo, isadaidpembo, bēdamepadi? —quepondash Esus.

²⁸ Adsho tantiaashien chido: —Icho, mimbi bēdamboen chiec. Padnuen anin meniac bacuēbon pete sananaid cuēshēmpi paēdtsacsho opashēmpin ambibi bedshun pec. Adembidi mimbi nadatiambocquin nabanac isadaidbo dadpen bēdanubi isadaidpembo abentsēc tantiaquid yec bēdanoapec —quepondash chido.

²⁹ Aden chidon chuishobien: —Bēdamboen mimbi chiec. Aden tantiaquid mibi neque. Nidec nid shubuno. Mayan icsa

dapuduedaid dapuduenaque. Isec nid –capondash Esusën isadaidpembon chido chuiquin.

³⁰ Adsho tantianec choec shubun puduedquin isaquien aton champi uebocno ënden mayan icsa niquian bēdanash abi ushaidëmbi uec.

Pashu buëd onquenquiocquid Esusën bēdamiaid

³¹ Adashien Tido caid anoentsëcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. ³² Ambo choash tsadnubien dada icsa, pashu buëd onquenquiocquid, Esus yacno bēash tsadquin: –Nëid mishquin bēdame –capondash.

³³ Adsho tantiashun iccuededquido ismenquiocnuen uidictsëc dada icsa buanshun aton mēdante bushbi pashun pabiate pausuntanquin chicpondash Esusën. Adshun, min anatsen mishnu quetanquin ismequin uicchun mëpidadtanquin pashun ana mishpondash. ³⁴ Aden amishec abuc isec: –Epata –quepondash. Paucud, quec adpondash Esus. ³⁵ Adec Esus cuëdnubi pashu buëd onquenquiocboedi tantiadcuenash onquiampondash.

³⁶ Aden pashuaid bēdamiash: –Esusën naid nec quequin chienda –quepondash Esus. Adoboqui niacbidanquin chuibampondash. ³⁷ Aden chuisho tantiash: –Adquidshenda Esus nepec. Ambi naidtedi bēdambo iquec. Pashu paucquid nec. Adembidi ana onquesa oncamequid nec –quec onquecuededpondash.

8

4000ted matses Esusën pemiaid

(Mat 15.32-39)

¹ Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash: ² –Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac. ³ Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec –quepondash Esus abëd icquido chiec.

⁴ Adoquien: –Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? –quepondash abëd icquido.

⁵ Adsho tantiashien: –¿Tedtsi panëmpi mitsana iquec? –quepondash Esus.

Adoquien: –Siete iquec –quepondash abëd icquido.

⁶ Adnubien: –Tabadbud –quetanquin Esusën panëmpi sieteted bedshun sananquin Nuquin Papa ambi pete

icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. ⁷ Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiemi, Papa —queshun: —Nëidtsen meneban —Esusën cac menebanoapondash. ⁸ Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. ⁹ Peboedo dada caniaid dadpen 4000ted icpondash. Chidon aton bacuëbobëdtambi pepondash. ¹⁰ Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

Nadatiambocquin nata. Isnu, padiseyobo quiaid
(Mat 16.1-4; Duc 12.54-56)

¹¹ Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

¹² Adsho tantiash, Ëbi tantiesa nec, quec unësquo yec tsadequi —Ëmbi naid dadpen mimbi ispaboc. ¿Adosho isboshida, Ëbi isme, queoape? Nadatiambocquin nabanquin ëbi isme caqui ismenquio iquemi. Abimbo caimbi —quepondash Esus. ¹³ Aden chianec nidec cano antabëdtoanquin uquë cuëma utsiuc poteapondash.

Nuquin Papan chiaidbëdta ambi chiaid daëd uaquin chuiquid padiseyobo
(Mat 16.5-12)

¹⁴ Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc.

¹⁵ Aden potequimbi Esusën nadopondash: —Pan uanuequidën trico caid putubëdta bidiscamete acte pistsec cacushaqui nua yec bidisquec. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane quesahun ambi tantiacpadomboen nabanenda —capondash Esusën abëd icquido chuiquin.

¹⁶ Adsho Esusën chuiboed icsamboen tantiec abëd icquido: —¿Ëmbi panëmpi bëambo yaidta icbon chuipec? —quec onquecuededpondash.

¹⁷ Aden chiec onquecuedednubien tantiaquidquio icquin Esusën nadopondash: —¿Atotsi quiaish ¿ada panëmpi bëambo

yaid con Icbon chuipec? quepe, mibi? ¿Ëmbi nabamboed isenquio yec bëshu tsadachimboecta tsadpo? ¹⁸ Adecbidi ¿Ëmbi chuibanaid tantienquio yec pashuacchimboecta tsadoapo? ¹⁹ ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui –capondash Esusën.

Adoaquien: –Dosedet iccosh –quepondash abëd icquido.

²⁰ Adoaquien: –Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui –caoapondash Esusën.

Adoaquien: –Siete iccosh –quepondash abëd icquido.

²¹ Adoaquien Esus: –¿Nadatiambocquid Esus nec quequin ëbi tantienquioda mimi icpe? –quepondash abëd icquido caic.

Betsaida caid yacnoshon bëshu bëdamiaid

²² Adshumbic Betsaida caid yacno poteoapondash Esusbëdtambidi. Aden potiash chosho isun bëshuaid bëpondash anocquidon. Aden bëshun ismequin: –Nëid bëshumbo neque. Mibi bëdamaianquidquio icquin mishquin bëdame –capondash Esus chuiquin. ²³ Adsho Esusën bëshu mëdianquin Betsaida caid anoentsëqui buanshun uicchun bëcuishtuatanquin bëmishec: –¿Ada mimi isequè? Èbi chui –capondash Esusën.

²⁴ Adsho tantiash Esus isquin: –Bëdamboen isenquiocquin cuète podo inchëshquio yacchimboecnuc mibi isembi –capondash bëshuaidën. ²⁵ Aden chuishobi Esusën bëshuaid padpiden bëmishoaquien bëucudquiopondash bëdamboen isec.

²⁶ Aden bëdamboen iso isun: –Nëbi min shubuno nid. Shubu dadpen icquid Betsaida caid datambidanec nid –quequin Esusën nidmepondash.

Quidistu mibimbo neyoc, Petedo quiaid

(*Mat 16.13-20; Duc 9.18-21*)

²⁷ Aden nidmiashic ancanquid Uedipo caid tabadaid nidaid Sesadeya caid yacno nidequi: –¿Atotsi Matsesën ëbi capec? –quepondash Esus abëd icquido chiec.

²⁸ Adoaquien: –Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiacpadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec –quepondash abëd icquido Esus caic.

²⁹ Adsho tantiashun: –Ma mibitedishun ¿atotsibi cai? –capondash Esusën.

Adoaquien: –Quidistu, Nuquin Papan ambi tantiampicpaden abi yacnoshon chomiaidquio mibi neyoc –quepondash Petedo abëd icquid utsibo onquiacchimboen chuioaic.

³⁰ Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

*Abi unës uate Esusën chiaid
(Mat 16.21-28; Duc 9.22-27)*

³¹ Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesasho isadaidbo tsusiobon chieshënquin ëbi mëyanendac. Aden mëyanquin unës uaqui daëdec ushash uincuenoaindabi, quequin Esusën chuipondash. ³² Abi unës uatequid chuipecshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

³³ Aden Petedon chuisho tantiasch aubidi bidiadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Petedo Satanasbimboecquid nec quequin Satanas capondash Esusën Petedo chuiquin.

³⁴ Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin ëmbi chiaid tantiaquin nabanta. Ëbi mëyanacpadembidi mibi mëyante icnuc niaquenda. ³⁵ Esus tantiaquin ambi chiacpadomboen nanu queboedi unësmane quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmane quenquiocquin ëbi chuibanec tabadquid Nuquin Papa yacno tabadendac. ³⁶ Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic? ³⁷ ¿Nuquin Papa mitsana menecta abi yacno puduedpatsia? Padenquio. ³⁸ Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquidbimboecquid nec. Adquid chuiquin, Con utsi nec, caisa nendabi. Adembidi ëmbi chiaid chiesa caic, Con utsi nec, quequin Nuquin Papa chienquio iquendambi. Chuiquid dapa abipadquidquio con pan ëbi icmiac ëmbi abucshun uaido mayan bëdabobëdi nidaidën choaindabi. Adec aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

9

¹ Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan

nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

Esus bēdaidquio icmiaid
(*Mat 17.1-13; Duc 9.28-36*)

² Aden chuibanashic 5ted ushash: —Nidnu. Nid —quianec Esusbēd Petedo, Acobo, Uan, aitedi ambi chiactedi macuësh dapa yacno nidpondash. Ambo nidash tabadquimbi abi bēdambo isadaid aidon ispac caondash. ³ Abi dasiuidaid dashcute ichoedi nac-nacquio yampac caondash. ⁴ Edias, Moises, aid daēd ěnden yampidi Esusbēd onquesho ispac caondash Esusbēd choboedon. ⁵ Aden isequi: —Chuiquid Dapa, nuquibi nēmbō choash tabadquin mibi isec bēdambo iquebi. Min shubumpi 3ted icnuc shubu uanuna mitsana, Moisesën na, Ediasën na, aitedi icnuc —quepac caondash Petedo. ⁶ ¿Atotsimbi chuipe? quetiapimbo yec dacuēdcuededquin aden chuipac caondash Petedon.

⁷ Adec tabadshobien abu ushu choquidën ambo tabadquidtedi bētimpac caondash. Aden bētinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibanasho bēdamboen tantiata —capac caondash Nuquin Papan.

⁸ Adsho isbanquin isaquien Esusbēd choboeduidi icoapac caondash.

⁹ Adanec macuësh yacnoësh budtanequi: —Mimbi isboed nēbi chienda. Ĕbi Nuquin Papan mado matsesacsho unēsmiac ěbi uincuenan mimbi isboed chuita —capac caondash Esusën. ¹⁰ Adsho tantiash utsi chienquio yec abi uincuemete ¿mitsipadquio icpec? quec abibi onquecuededpac caondash Esusbēd choboedo.

¹¹ Adec onquecuededash: —Nuquin Papan chomiaidquio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ěndenquimboshē chopampic —quepondash abēd icquido Esus caic.

¹² Adoaquien: —Ai, Ediasën matses bēdamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquio yec matsesash nēbi tabadsho matsesën chieshënquin mēyanendac quequin chuipampid nec. ¹³ Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mēyanac. Ĕndenquimboshē Edias chiec onquequin dada uampicpadomboen Ediaspadquid chomiaid Uan choshon, Mibi icsaid ěnta, quequin chuisho abi

chieshënquidën mëyanondash — quepondash Esus abëd icquido chiec.

Mayan icsan buëd onquetiapimbo icmiaid Esusën bëdamiaid (Mat 17.14-21; Duc 9.37-43)

¹⁴ Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamequidon comapenec onquecuededquin bëtimpndash. ¹⁵ Adnubien Esus chosho isash iccuededquido, Bëdamanquid choec. ¿Atotsi aidën napatiashe? Isnu, quetanec titinque choec: —¿Ada cho? — quepondash.

¹⁶ Adoaquien: —¿Atotsi quec ëbëd icquidbëd comapenec onquecuedede? —quepondash Esus.

¹⁷ Adshobien: —Chuiquid Dapa, mibi ismenuen con mado bëombi. Mayan icsan buëd oncamenquio yaid nec. ¹⁸ Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh —quepondash mayan icsan buëd onquetiapimbo icmiaidën papa.

¹⁹ Aden chuisho tantiashe abëd icquido caic: —Esus nadatiambocquid nec quequin ëbi tantiesa mibi nepec. ¿Tedetsi icshun ëmbi chiacpaden mimbi tantiabempe? Mibi tantiesa icsho ¿mitsipadembimbi tantiampe? —queshumbic: —Madompi bec cho —capondash Esusën.

²⁰ Adsho tantiashe bun pondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ëcbacush-ëcbacushpambo yec cuididiquepondash.

²¹ Adsho isash: —¿Tedtsi seta matamec ad iccondashe? Chui. Tantanu —quepondash Esus madompin papa chiec.

Adoaquien: —Bacuë ictsequi ad iccondash. ²² Cuëte dëtsiadaid nënedeniosh abi dapuduedaidën. Actetsen nënedeniosh unësmenuequin. Mibi bëdamequidquio icquin ëbëdta tantiaquin ëbi con mado bëdameshun —quepondash madompin papa Esus caic.

²³ Adoaquien: —¿Mibi bëdamequidquio icquin ëbi con mado bëdameshun quecta ique? Nuquin Papa nadatiambocquid naquid nec quequin tantiaquidën tantiacpadomboen Nuquin Papan naindac —quepondash Esus.

²⁴ Adsho tantiashe: —Tantiembi. Ëmbi abimbo tantienquiosho isun ëbi tantiam, Icho —quepondash madompin papa Esus caic.

²⁵ Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquo yec dapuduen —capondash Esusën.

²⁶ Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: —Unësosh —quepondash isquido. ²⁷ Adnubien madompi mëdintanquin Èsusën uëtsëndopondash. Adoac abembi nidtopondash.

²⁸ Adnubien shubun puduedacsho: —¿Atotsieshumbimbi mayan icsa dapuduetiapimbo icpo? —quepondash abëd icquido Esus caic utsibon tantienquiocnobi.

²⁹ Adoquien Esus: —Dapuduen quequinuidi chuibudaqui adquidquo dapuduenesa nec. Ma Nuquin Papan nadati-ambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

Abi unës uate chuioaid
(*Mat 17.22-23; Duc 9.43-45*)

³⁰⁻³¹ Aden chianec nidaid Cadidia caid matanec nidpondash. Nidquimbi, Èbëd icquid 12tedtsëqui chuibanu, quec utsibo ismenquo yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuependac —quepondash Esus. Abi uincuentequid chiecshenda adec Esus onquepondash. ³² Aden chuisho bëdamboen tantienquo yequi dacuëdec ëbi bëdamboen tantiamequin chui quetiapimbo icpondash abëd icquido.

¿Mitsicquid chuiquid dapa icpec? quequin chiaid
(*Mat 18.1-5; Duc 9.46-48*)

³³ Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedën choec atotsi chiec onquecuededo? —capondash Esusën abëd icquido chuiquin. ³⁴ Adsho tantiash cuëdenquiocpondash abëd icquido. ¿Esusbëd icquid mitsicquid chuiquid dapa icpeque? Tantianu, quec onquequin ambi chiaid chienquo yec tabadpondash. ³⁵ Adec tabadnubi abi tsadacnoëshi: —Cho —quiampondash Esus abëd icquido caic. Aido choacsho isash: —Chuiquid dapa ëbentsëqui icnu quequid utsi nashunquidbidi ictiad —quepondash Esus.

³⁶ Adec onqueshumbic bacuëmpi abentsëc mëdintanquin abëd icquid tabadacno nënantanquo tsadumbudpondash. Aden tsadumbudshun bacuë icuquequi: ³⁷ —Esus tanti- aquid nebi quequin ismequin bacuë yuedquin nashunquid ëbi yuedquin nashunacimboecquid nendac. Èbi yuedquin

nashunquid ëbi chomiondaid Nuquin Papa yacno yuedquin nashunoac bimboecquid neoaindac – quepondash Esus abëd icquido chiec.

Nuqui chieshënesa nuqui bëdamboen chuibanquid nec quiaid (Mat 10.42; Duc 9.49-50)

³⁸ Adnubien utsin naid chiec Uan onquedopondash: – Icho, mimbi chiacpadomboen utsin chuïsho tantiapombi. Aidën: “Esus nadatiambocquin naquidquio nec, quequin tantiembi. Aden tantiaquin aidën chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbëd icquidpenquio mibi neque. Adenda quequin chuipombi – quepondash Uan.

³⁹ Adoaquien Esus: – Padicnuna. Nadatiambocquin naquidquio Esus nec quequin abimbo tantiaquin ëmbi nacpadomboen nabanquidën ëbi icsamboen chuitiapimbo iquec. ⁴⁰ Nuqui chieshënesa nuqui bëdamboen chuibanquid adquid nec. ⁴¹ Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bëdamboen naoaindac – quepondash Esus.

Icsa uanquin tantiabenabicquid ismequid cuidendac quiaid (Mat 18.6-9; Duc 17.1-2)

⁴² Abi Esusën onquequin chuibanec: – Adembidi abi icsacpadomboen bëdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuënote yuëmbocquidbëdta tëtaneshun acte dapa nënepatecnëdan. ⁴³⁻⁴⁴ Adembidi mimbi icsamboen tantiaquin mishaid ëntiapimbocquin ismedeniad adomboembidi utsin tantiec. Bednu quenquio yec mëtaniac bimboec tsad ënëdenquio yec chian anëdënquiacno nidmane quiash. ⁴⁵⁻⁴⁶ Adecbidi capuquin mibi icsaid mimbi ismebeneque. Capunu quequin tantienquio yec tateshuniac bimboec tsadta ënëdenquio yec chian anëdënquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. ⁴⁷ Adecbidi ëshën isec mibi icsaid ëntiapimbocquin mimbi ismedoniad adomboembidi utsin tantiec. Ëshë chicshuniac bimboec tsad ënëdenquio yec chian anëdënquiacno nidmane quiash ma mibi tsadacpadec mimbi ismiaid tsadoapanu. ⁴⁸ Icsa uadenequin ënenquio yash unësash chian anëdënquiacno nidash unësenquiocshobi chodquiaid pequid macun mibi pendac. Ënëdenquio yec chian anëdënquiacno mibi tabadendac. Icsadenequin ënenquiocquid comapenen cuidtequid nendac. ⁴⁹ Sa casecac pambid batambo yac bimboec Esuspadquid icnu quiash mibi icsaid ënëdnuen mëmunec mibi bëdambo yamec.

⁵⁰ Sa batambocquid bēdambo iquec. Sa batambocboedi batapenquio yec icsasho ¿mitsipadentsi batambo icmeoapec? Sa batambocquid casecac daēdash batambo yacpadec utsibēd bēdamboec tabadta –quepondash Esus.

10

Aton chido bedshun nidmequid
(*Mat 19.1-12; Duc 16.18*)

¹ Aden abēd icquido chuiquin nainashic Esus aidobēdi nidaid Cadidia caid yacnoēsh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen chochoapondash. Adec cho-chosho isun Nuquin Papan chiaid chuibanoapondash Esusën.

² Adecbidi cho-choquid padiseyobon Esus Nuquin Papan chiaid icsamboen chuinu qeshun: –Aton chido bedash bunenquio yanshun cuemec. ¿Aden naicta bēdambo iqueque? Tantuanu. Chui –capondash Esus chuiquin.

³ Adoaquien: –¿Atotsi quequin Moisesën chuipampic? –queoapondash Esus.

⁴ Adoaquien: –Aton chido bedash bunenquio yanshun, Con chido icsambocquid nec, quequin ambi tantiacpaden aton bēnën dada uashun nidmiacsho isash, Padi, quenquiocpampic Moises –quepondash padiseyobo.

⁵ Adoaquien Esus: –Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. ⁶ Nadomboen Nuquin Papan tauapampic. Dada abentsēc uashumbic chido abentsēcbidi uashun dada menepampic. ⁷ Adomboembidi nanuec dada aton tita aton papabēd tabadenquio yec aton chido bedash abēdi ambi quēnē uaidēmbi tabadec. ⁸ Aden aton chido bedash tabadequi matses abentsēc icboedi daēdec. Matses daēd icboedi abentsēc yachimboec tabadec. ⁹ Aden dada aton chidobēdta Nuquin Papan daēd uacsho ma cuēshēdmenquio icpanuna –quepondash Esus.

¹⁰ Aden chiash shubun puduedacsho: –Mimbi chuiboed ēbitedi tantieme –capondash abēd icquidon.

¹¹ Adoaquien: –Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. ¹² Adembidi chido aton bēnën bedac aton bēnē nianshun dada utsi bedmequid Nuquin Papan menepampid niacquin tantiesa neoaic –quepondash Esus.

Esus yacno bacuēbo bē-beaid
(*Mat 19.13-15; Duc 18.15-17*)

¹³ Adnubien: Con bacuë mishquin Esusën bëdambo icmet-shash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon. ¹⁴ Aden nidmesho isash nëishash: —Bacuëbo nidmenda. Ma cho-chono. Anin chiacpadomboen tantiaquidquo bacuëbo neque. Adomboembidi badedquo Nuquin Papan chiaid tantiendac. Nuquin Papan shubu abentsëquën tabadquid aido nec. ¹⁵ Abimbo chiembique. Tantia. Nuquin Papan chiaid bacuëbon badedquo tantiacpaden tantiesa Nuquin Papa yacno puduedtiapimbo iquendac —quepondash Esus. ¹⁶ Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuipondash Esusën.

Na dadpen icquid chiaid

(Mat 19.16-30; Duc 18.18-30)

¹⁷ Aden bacuëbo chianec auëshquio puduanec nidshobien dada abentsëc titinguec choquin bëquedtanec danëshën sebudash tsadec: —Chuibanquin tantiamianquid, bëdamboquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

¹⁸ Adoaquien Esus: —¿Nuquin Papabëdtabidabi mibi bëdamboquid nec, ëbi cape mimbi? Nuquin Papauidtsëqui bëdamboquidquo nec ¹⁹—quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidtedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëdtan titan chiaid chieshënenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

²⁰ Adoaquien: —Abimbo chiembique. Tantia, Icbo. Aidtedi nabanquidquo nebi. Bacuëctšëc icquimbi adquid nabanondambi ënenquiocquin —quepondash choboed.

²¹ Adsho tantiaash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquo menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquo mibi iquendac. Adec Nuquin Papa tantiaquidquo yec ëbëd iquec cho —quepondash Esus.

²² Adsho tantiaash choboed mamënenquo yec unësqquo yec nidpondash con na menebantiapimbo iquebi quiash.

²³ Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

²⁴ Aden Esusën chuisho tantias, ¿Abimboda capec? quequin ambibi tantiec abëd icquido otacquio tabadsho isec Esus: —Abuido, Nuquin Papan shubu abentsëquën matses badedquio puduedtiapimbo iquec. ²⁵ Adembidi shëcuën puduedte nidaidën capuquid dapan badedquio tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquio tantiatiapimbo iquec. Ambi tantiacpadequi puduedte bunec —quepondash Esus.

²⁶ Adsho tantias abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimbo cnoc ¿tsutsi puduedquid icpeba? —quepondash abëd icquido Esus chiec.

²⁷ Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbo cnoc Nuquin Papambien abi yacno yuedanquid mibi tantiamendac —quepondash Esus.

²⁸ Aden chiaquien Petedo nadpondash: —Chuinu. Tantia, Icho. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

²⁹ Adoaquien: —Abimbo chiembique. Tantia. Esusbëd icnu qeshun Nuquin Papan shubu abentsëquën tabadte iquec quequin chinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbo csho ³⁰ daëd uaquin Nuquin Papan menendac. Nëbi shubu utsin-utsin quiec mibi puduedcuenec. Adebidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquid bidi iquendac. Yuecash ënëdenquio yec Nuquin Papan shubun mibi tabadendac mibi chieshënquid nibëdacno. ³¹ Nidaidënshun chuiquid icboedi Nuquin Papa yacno tabadquin utsi nashunquid mibi iquendac. Adebidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid
(Mat 20.17-19; Duc 18.31-34)*

32 Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquiec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Èbëd icquiduidtsëqui padpiden chuiouanu —quiash Esus nidtuidshun cho-chosho isquin naden abi mëyante chuiquin tauapondash: 33 —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbinboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. 34 Aden meniac bedshun aidon ëbi oncaïn mamëshumbededquimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

Èbi daëdi nashunta Acobo Uambëd quiaid

(Mat 20.20-28)

35 Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Èbi daëdshun chiacpadomboen ëbi daëdi nashunenquioda mimbi icpe? —quepondash.

36 Adoaquien: —¿Atotsimbi mibi nashuneque? Èbi chui. Tantuanu —capondash Esusën.

37 Adoaquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta —capondash Uanën Acobobëdtan Esus chuiquin.

38 Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpatsia? —capondash Esusën.

39 Adoaquien: —Ai, adquid tantiembi —quepondash.

Adoaquien: —Ai, adomboembidi mimbitsen tantiendac —quepondash Esus. 40 Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Èmbi padenquio iquec —quepondash Esus Uambëdta Acobo chiec.

41 Aden Esusën chiaqui abëd icquidquio utsitedi Acobobëdtan Uanën chuiboed tantiash nëishcuededpondash.

⁴² Adec nëishash tabadsho isash: —Cho —quepondash Esus. Aden chomiash: —Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec. ⁴³ Aden namesa mibi nec. Chuiquid dapa icnu quiash utsi nashunquid icta. ⁴⁴ Adecbidi tsusio icnu quiash yuabimboe yec utsin namiaid icta. ⁴⁵ Adquid icnuec Nuquin Papan madombo matsesash nidaidën tabadobi. Ancanquid iquenquo yec nashumënquidquo nebi. Adquid yec matses icsaid bedshunash ëbided cuidadec unësendabi —quepondash Esus.

Bëshuaid, Badtimeyo cuëmëdquid bëdamiad
(*Mat 20.29-34; Duc 18.35-43*)

⁴⁶ Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash. ⁴⁷ Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

⁴⁸ Adec cuëdsho tantiashun: —Esus cuënenquo yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

⁴⁹ Adoac nidtuidshun Esusën: —Cuënquid chome —capondash.

Adoquien: —“Chome,” queque. Nidtoash nid —capondash utsibon.

⁵⁰ Adsho tantiash bëshuaid aton dashcute bëntsecquid chicanec badedquo nidtoanec Esus yacno chopondash. ⁵¹ Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Icbo —quepondash bëshuaid.

⁵² Adoquien: —Esusën ëbi bëshuaid bëuquec quequin mimbi tantiapadquiec mibi bëdanoque. Nidec nid —Esus quenubi isbenquiopondash bëshuaidën. Adec bëdanshun Esus nidsho isun tsibampondash.

11

Chuiquid dapabimboec yec Edusaden yacno Esus choaid
(*Mat 21.1-11; Duc 19.28-40; Uan 12.12-19*)

¹ Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidedi macuësh Odibos caid potsembo icpondash. Ambo choash ëbëd icquid

daëd shubuno nidmenu quequin tantiec nadpondash Esus:
² —Në shubu dadpen yacno nidec nid. Ambo nidshun cabay-
 obiecquidën bacuë caniabictsëcquid tënëshac tsadsho mimbi
 istuidendac. Aidi matses catsadabicquid neque. Aidi istu-
 idshun tënëshaid tëchicshun sananquin bëta. ³ Aden bedsho
 isun, ¿Atotsi canun aid bede? cac, Bëoaimbi. Nëid nuquin icbo
 bunaid nec, cata. Mimbi aden chiac, Buanec nid, quendac —
 quepondash Esus abëd icquid daëd chiec.

⁴ Aden Esusën chiaquien abi daëdi nidpondash. Adec
 nidanequimbi cabayobiecquid caniabictsëcquid shubu
 shëcuë cuëmano tënëshac tsadsho istuidshun tënëshaid
 tëchicpondash. ⁵ Aden tënëshaid tëchicsho isun: —¿Mitsipaden
 tantiaquin ëmbi tënëshaid mimbi tëchiqueque? Tantuanu. Chui
 —capondash anocquidën.

⁶ Adoaquien: —Tënëshaid tëchicshun bëta, con icbo queboc-
 paden naimbi —capondash tëchicquidën.

Adoaquien: —Buanec nid —queoapondash.

⁷ Adoac Esus yacno buampondash. Aden bëshun
 aton dashcute bëntsecquid chicshun cabayobiecquid
 capucpondash ma chuiquid aidën catsadtonoeshun.
 Adoaidën Esus catsadtopondash. ⁸ Adembidi chuiquid
 Esus nec quequin ismequin utsibontsen aton dashcute
 bëntsecquid chichbededshun podqued ansambampondash
 ma chuiquid dapa bëdambocquid capunueshun. Adembidi
 tantiaquin utsibon budëdbiecquid podo tebededshun
 podqued ansambanoapondash. ⁹ Aden ansambanash matses
 dadpen bëyucanec nidanenubi Esus nënantanquio nidnuc
 aitedbidi tsyuec choquin tsibambëpondash. Adec abitedi
 nidanec Esus tantiec nadeccuëdëncuededpondash: —¡Adeduya!
 Nuquin Papan bëdambo icmiaid ambi tantiacpadomboen
 chuitanta quequin chomiaid nec. Tsusedpa chuiquid
 dapa, Dabid cuëmëdquidën tsyuecquid, shubu abentsëqui
 tabadquido chuiquid dapambo choec nec. ¹⁰ Èbi chuiquid
 dapa Nuquin Papan abuc tabadquidën chomiaid Esus
 nec. Nuquin Papa bëdamboshë iquec. ¡Adeduya! —quec
 cuëdëncuededpondash Esusbëd nidquido.

¹¹ Adec cuëdëncuededequi Edusaden yacno cho-chopondash.
 Choashic Nuquin Papa tabadte shubu uashunaid quënë dad-
 pen yacno nidash Esus puduedpondash. Adec puduedshun
 abitedi isbanash ushë budtsambi Betania caid yacno nida-
 neoapondash Esus.

Cuëte bacuëesa chiaid
(Mat 21.18-19)

¹² Abadiadtsashi Betania yacnoësh nidanec Esus bundo-
 pondash. ¹³ Adec bundoshombi cuëte icueda caid podo

buntac-buntacpambo ancuenquo nidsho istuidec Esus: — Icueda podo buntac-buntacpambo podoash nideque. Is-bono. ¿Bacuëashida neque? —quianec nidpondash. Adec nidquimbi icueda podouidquo icsho ispondash. Ushë utsin bacuëtiadquidi bacuëabi podopac. ¹⁴ Ad icsho isun Esusën: — Adequi bacuëesa icsho ma matsesën chenquo icpanuna — capondash. Aden chuisho tantiapondash abëd icquidon.

Nuquin Papa tabadte shubu uashunaid yacnoshon cuemi-aid

(*Mat 21.12-17; Duc 19.45-48; Uan 2.12-22*)

¹⁵ Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. ¹⁶ Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. ¹⁷ Aden chushcasic: —¿Ëbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. ¹⁸ Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuededpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. ¹⁹ Adnubien inchëshbudtsëqui Edusaden yacnoësh nidoapondash Esus.

Cuëte bidiquiaid

(*Mat 21.20-22*)

²⁰ Abadiadtsashi Edusaden yacno nidoaquimbi cuëte icueda caid bidiquiacsho istuidpondash. ²¹ Aden istuidash Esusën icueda bacuëesa chiaid tantiec Petedo: —Cuëte bacuëabicsho mimbi chuiboed bidiquiaye. Is, Icbo — quepondash.

²² Adoaquien Esus: —Nuquin Papa nadatiambocquin nabanquid nec, quequin tantiaquiota. ²³ Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac

nëid macuësh acte nantan tabadoaindac. ²⁴Ëmbi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. ²⁵Aden Nuquin Papa chuinush mibi utsin icsambocquin naid tantienquo yec bēpiscudta. Adsho abucshun isash Nuquin Papan mimbi icsa uanquin naid tantienquo yec bēpiscudendac. ²⁶Adenquo mibi icsho isun Nuquin Papan mibi icsa uanaid bēpiscudenquiocquin mimbi chiaid tantiatiapimbo iquendac —quepondash Esus abēd icquido caic.

*¿Mitsicquidën chuibanta caid mibi ne? quiaid
(Mat 21.23-27; Duc 20.1-8)*

²⁷ Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: ²⁸ — ¿Mitsicquidën chuibanta cac chuiquid dapabimboecquin mimbi chieque? Tantianu. Chui —capondash.

²⁹⁻³⁰ Adoaquien: —Adembidi ¿Atotsi tantiaquin mimbi chuipe? Chui. Tantianu. ¿Matses mentondaidën, Uan padon Nuquin Papan chuimiapadomboen nabanquinda nadiondash? Padenquo, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantianu. Aden mimbi chiac ëmbitsen mibi chiemi —capondash Esusën tsusiobo chuiquin.

³¹ Aden Esusën chuisho tantiash udictsēc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantiash, ¿Atotsieshun aidën chiaid tantienquo icconda? quetsiash Esus. ³² Naden Uan padon ambi tantiacpadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiaid Uan pado niondash, quequin tantiabededquin nuqui cuēnoten seshunetsiash —quecuededpondash. ³³ Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquo iquemi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshēnquido isadaidbo tsusiobo chiec.

12

*Tied icbo nashunta quequin chiaid
(Mat 21.33-46; Duc 20.9-19)*

¹ Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: — Chuinu. Tantia. Icbon aton tiedën uba caiduidquio nitsinshun cueste bënitsinaidën otadnidec cuidian-cuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nacnemposh. Aden nacnenshun uba ampenushe qeshun isec tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

² “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. ³ Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh. ⁴ Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

⁵ “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

⁶ “Adsho isash tied icbo nadposh: Nëid, con madombo abentsëqui nec. Èbi cudasaid nec. Aidi tsyuec con tied yacno nidmembali. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

⁷ “Aden nidmiac ancuenquio chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqui icnun aidi cuesununa, quecuededposh tied icbo nashunquido.

⁸ “Adec onquetanquin aton icbon madombotsen bedshun cuesuneshun daquënë uaid mabudacquin nebudposh. ⁹ Adoacsho tantishun ¿atotsi tied icbon napec? Naden naindac. Utsibëd aton tied yacno nidshun abi nashunuidboed cuesuneshun utsibo abi nashunquido icmendac —quepondash Esus.

¹⁰ Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidën buintad isuidaiddi utsin abia nitsinaid icoaposh.

Adquiobidi Nuquin Papan chuimiaid matsesën tantiauidaiddi iquendac.

¹¹ Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tanti-
aquidënquio tantiec”

—quepondash Esus Nuquin Papan chiampidquio chiec. Nuquin Papan shubu abentsëquën abi tantiaquido yuedanquid nendac, quequin utsi chiacbimboec abibi chiadquin Esusën chuibampondash.

¹² Adsho tantiash, Ēbitedishun isuidaibimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpeshun tantiabededpondash. Dadpen icsho isash dacuëdcuededec Esus bednu quenquo yec nidanepondash chieshëmënkuido isadaidbo tsusiobo.

Bec cho quequin bedshunquid nec, quequin chiaid
(Mat 22.15-22; Duc 20.20-26)

¹³ Isadaidbo tsusiobo nidshun padiseyobo edodesbobëdta istuidshun: —Nëidon Esus icsamboen chuimetsiash —queshun aido Esus yacno nidmepondash. ¹⁴ Aden nidmiac Esus yacno choshon abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantianu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? ¹⁵ ¿Adambi menepeba? —quepondash padiseyobobëd edodesbo Esus caic.

Adoaquien, Ēbi icsamboen chuimenuc adec onquec, quequin ambibi tantiec: —Shocosh piucquid bec cho ma isnu —quepondash Esus.

¹⁶ Adsho tantiashun bëpondash. Adoaquien: —Sananquin isme. ¿Tsutsibimboecnuc dada uaid iqueque? Chui. Tantianu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

¹⁷ Adoaquien: —Ai, aidën na nec. Aid bec cho, queshe meneta. Adembidi Nuquin Papa Nuquin Icho icquin, Nata, cacpadomboen naban —capondash Esusën.

Aden bëdamboen chuisho tantiash, Bëdamboenshenda tantiapec, quequin ambibi tantiec Esus chieshënquido tabadcuëd-
edpondash.

Abuc tabadequi, ¿mitsicquidën chido neque? chui quiaid
(Mat 22.23-33; Duc 20.27-40)

¹⁸ Adnubien saduseyobotsen Esus yacno cho-chopondash. Unësaid uincuentiapimbo iquec quequin tantiaquido aido

nepondash. Aido cho-choash nadpondash: ¹⁹ —Moisesën dada uapampid nad iqueque. Tantia. chuinu. Chido-choquid bacuë tishmiabi yec unësan unësboedën chido aton utsin bedtequid nec. Aden bedshun ma bacuë tishmepanuna. Aden tishmiac unësaidën tishmiaidbimboec ma icpanuna, quequin chuipampid nec —quepondash saduseyobo. ²⁰ Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unëspondash. ²¹ Adsho isun abi tsibanquidën aid chidobidi bedshun bacuë tishmiambo yec unësoapondash. Adembidi abi tsibanquidën ²² aton utsi unësan aid chidobidi bedshun tishmiambo yec unësoapondash bacuë nibëdquio yec. Adecbidi datedi unësbudnepondash. Adecbidi chidotsen unësoapondash. ²³ Adec unësash abuc tabadequi, ¿Mitsicquidën chido aid icpatsiashe? Chui. Tantuanu —capondash saduseyobon Esus chuiquin.

²⁴ Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. ²⁵ Nad iqueque. Tantia. Unësaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bëda unësesa yacpadquiec matses uincuenash unësesa iquec caidesa nendac. ²⁶ Adembidi unësash uincuenaid tantianu queshun ¿Moisesën dada uaid isenquioda ictionda? Aidën cuëtampi abibi nëdënquesho istanec nïdtuidquin nadec Nuquin Papa onquesho tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën. ²⁷ Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tantia. Unësaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiatie icsho ambi uincuen uatequido Nuquin Papan tantiendac —quepondash Esus matses uincuenta iquec quequin saduseyobo tantiamenuc.

Naden nata quequin chiaid ¿mitsicquid adquidpadquid utsi nibëdpec? quiaid

(Mat 22.34-40)

²⁸ Adec Esusbëd saduseyobo onqueducdednubien tsusedpabon nadomboen nata quequin chiaid tantiamequid abentsëc chopondash. Bëdamboen Esusën saduseyobo chuisho tantiash Esus icsamboen chuimenuc aidtsen: —Ëmbitsen tantianu. Chui. Nadomboen nata quequin chiaid

Nuquin Papan dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? —quepondash.

²⁹ Adoaquien Esus nadpondash: —Nëid chiaidpadquid utsi nibëdeque. Chuinu. Tantia. “Nuquin Icho Nuquin Papa nec. Nuquin Icho Abentsëcquiobi iquec. ³⁰ Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquo yec Nuquin Papa bunacpadquieci icnu quec bëdamboec tabadta. Adembidi ambi tantiacpaden tantianu quequin adombota. Adembidi aid tantiaquin bëdamboen nabanquiota. ³¹ Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsi-bon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

³² Adoaquien Esus icsamboen chuimenuec choboed nadpondash: —Mimbi chuibod abimbo iquec. Nuquin Papa abentsëcquiobi iquec. Aidpadquid utsi nibëdec. ³³ Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquo yec Nuquin Papan tantiacpadquieci icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac —queoapondash choboed.

³⁴ Aden choboedën bëdamboen chuioasho tantiaquid: —Nuquin Papan shubu abentsëquën tabadaid mimbi bëdamboen tantiatsempoc —quepondash Esus.

Adoac Esus icsamboen chuimenu quetiapimbo icpondash utsibo.

*¿Tsuentsin mado Quidistu nepec? quiaid
(Mat 22.42-46; Duc 20.41-44)*

³⁵ Abi icsamboen chuimenuquid utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquo tsusedpa Dabidën mado nendac, quequin tsusedpabon chiaid tantiamequidon chieci. ¿Atotsi chuiquin naden chieque? Tantia. Chuinu. ³⁶ Naden Nuquin Papan Mayanën Dabid chuimiampic:

“Icho utsi icsho mibi chiembique. Tantia, mado, quequin chiec Icho Dapa nadpampic:

Ëquë con dayun abiucquoio cainec tsadec cho ma mibi chieshënquidtedi mîmbi namiaid ma icpanu,”

quequin chuipampic. ³⁷ Aden Nuquin Papa icho dapanquoio aton dayunquoio chomiaid chiec Dabid pado, Con icho nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidën icho yec ¿mitsipadectsi Dabidën tsyuecquid icoapec? –quepondash Esus abibi chiadequi.

Aden chiec onquesho tantiash badedquoio tantiatiadquoio yampondash utsibo. Bëdamboen chiec, quequin comapenen tantiapondash.

Nuquin Papan chiaid tantiamequidon chuisho tantienda quiaid

(Mat 23.1-36; Duc 11.37-54; 20.45-47)

³⁸ Aden tantiamequimbi Esusën nadopondash: –Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tantia. Tsusiobimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquoio yec tsusiobimboec isadnu quiash aton matses dadpen yacno capuquid nec. ³⁹ Adomboembidi ëbi isoanu quiash Nuquin Papan chiaid chuibante shubun puduedash tsusiobëd tsadec. Adomboembidi ismenu quiash isedquido dadpen yacno choash shubu icbon dayunquoio tsadoaic. ⁴⁰ Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac –quepondash Esus.

Nuquin Papa tantiaquin nianten meniaid

(Duc 21.1-4)

⁴¹ Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sando-sandonobi ⁴² aton na daëdpactsëcquidquoio niante choquimbi aton shocosh piucquid daëdquibictsëcquid sandopondash aton na utsi nibëdquiocnoc.

⁴³ Adosho isun abëd icquido chomeshun Esusën nadopondash: –Abimbo chiembique. Tantia. Niante aton na

bedtequid dayun uanu quenquioctscquin Nuquin Papa tantiaquiquin sandoquidquio nec utsibon aden sandoenquiocnobi. ⁴⁴ Utsibon aton na bedtequid dadpen uesenquiocquin sandobededposh. Aido daëdpactscïc icquid sandoacimboen sandoquido nec quequin tantiembi. Adquidpenquio niante nec. ¿Bednun tedtsimbi dayunoape? quenquiocquin aton na daëdquibictscïcquidi nibëdquiocnoc sandoposh nianten. Dadpen icquid sandoacimboen sandosho aid isembi —quepondash Esus.

13

Nuquin Papa tabadte shubu uashunaid chic-chicte chiaid
(Mat 24.1-2; Duc 21.5-6)

¹ Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaïd bëdaïdquio iqueque. Is, Icbo —quepondash abëd icquid abentsëc Esus caic.

² Adoquien: —¿Nëïd shubu dapa isecta ne? Shubu uaquin cuënote dapa tsindonëdaïd mimbi nëbi isaïd chic-chicac nibëdquïendac —quepondash Esus.

Abitedi naimbudte tauanun ismete chiaid
(Mat 24.3-28; Duc 21.7-24; 17.22-24)

³ Aden chiashic auëshquio nidanec macuësh Odibos caïd yacno tabadtuidpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aïted icpondash. Utsibon tantienquiocnoc aïdon: ⁴ —Cuënote nacnenaïd nebudte mimbi chuïboed ¿mitsipadën nebudte icpeque? Tantuanu. Èbi chui. Adembidi aïdi tauanun ismete ¿atotsi icoapeque? Tantuanu. Aid chuïoa —capondash.

⁵ Adoquien Esusën nadopondash: —Muaquin chiaïd tantiamane queshun Nuquin Papan chiaïd isban-isbanquiota. ⁶ Nuquin Papan chomiaïd nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac. ⁷ Adecbidi cuesnancuededec quen-dac. Adembidi cuesnancuededosh, quequin chuituidsho tantiaoaïndac. Aden chuituidsho tantiashe dacuëdenda. Ad icnuc abitedi naimbudte ushë choabi iquendac. ⁸ Ai, adquio iquendac. Adashic abëd tabadquïobëdi cuesnancuededendac. Adecbidi abi ancaquid dapan, Cuestan, quequin nidmiac nidaïd utsin icquïobëdi cuesnancuededoaindac. Adecbidi utsi-utsiec yacno nidaïd ish-cudendac canchednuec. Adecbidi bunquïote iquendac. Aïdtedi icsamboshëcquid taëyendac.

⁹ “Adquid yanubi Nuquin Papan chiacpadomboen nabanec tabadta. Mibi bedshun, Icsambocquid neque.

Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. ¹⁰ Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. ¹¹ Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

¹² “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquin adembidi aton titan chiaid niacoquin cuesunemendac. ¹³ Esus tantiaquid chieshënquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

¹⁴ “Adnubien Nuquin Papa chieshënte ushë choendac. Aid chonoc Edusaden yacno abi chieshënquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushë quiash anoentsëqui icquido cuenenquiocboedi ma cuempanuna. Abimbo chiembique. Bëdamboen tantiata caimbi. ¹⁵ Adecbidi shubu macano pada-padapambo yacno tabadquido yec umanuc dectatote uaid dectandoaidën budanec con na bednu quenquio yec cuenta. ¹⁶ Adecbidi aton tied nantan tabadquid yec aton dashcute bëntsecquid chicshun dectanaid bednuec bidadenquio yec badedquio cuenta. ¹⁷ Bacuë usunquid adecbidi bacuë chishmequin buanquid badedquio cuentiapimbocsho mëyampec. Adquid tantiec utsibo unësquio icchitec. Nuquin Papa chieshënte ushë icsamboshë iquendac. Adnuc badedquio cuenta. ¹⁸ Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquio cuempanu. ¹⁹ Comapenen Nuquin Papa chieshënquin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. ²⁰ Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Ëbi tantiaquid ambi cuënaido tantiec, Chën, quequin Nuquin Pa-

pan ëmendac. ²¹ Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, quesho tantienquo icta. ²² Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënquidombidi nadatiambocquin nabanendac. Adosho isun ëbi tantiaquidëmbi utsin-utsinquien tantiauidtsendac adquid. Nuquin Papapenquo aid nec, quequin Nuquin Papambo tantiaata. ²³ Ad iquendac quequin chiom-bique. Ad icnuc chieshenquiocquin Nuquin Papan chiaid tantiaquiota –capondash Esusën.

Nuquin Papan madombo choaid
(*Mat 24.29-35, 42-44; Duc 21.25-36*)

²⁴ Aden chiash abi onquec: –Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac. ²⁵ Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido ¿mitsimbo nuquin cuempeba? quendac.

²⁶ “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquo iquequi ëbi choasho isendac matsesën. ²⁷ Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaido bednuc nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido –quepondash Esus.

²⁸ Aden chiashic: –Abi chiembique. Tantia. Suc seccuduquiac nëbi cunquecuenec, quequin matsesën tantiec. ²⁹ Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuïnanta. ³⁰ Abimbo chiembique. Tantiaata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquo iquendac. ³¹ Aden matsesën isnubien nidaidbëdi abu ënëdendac. Ëmbi chiaidtedi abimbo yec adquiouidi iquendac.

Nëid ushënquo tauadoendac, quetiapimbo matses iquec quiaid

³² “Adnuc nëid ushënquo Nuquin Papa chieshënquin tauaindac quetiapimbo matses iquec. Ambi uaido mayan bëdabo

adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquiobien adquid tantiaquid nec. ³³ Aid tauadote ushë choaid tantiatiapimboquin Nuquin Papan chiaid niacmane queshun isbanquin nabanta. ³⁴ Nad iqueque. Tantia. Chuinu. Utsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh. ³⁵ Adec icbo nidan abi choate ushë mimbi tantienquoiqueque. Bëshunenquiocquin tantiaquiota. Inchëshbudtsëqui choapatsiash, quequin tantiata. Adembidi inchëshpotsembo chopatsiash queshun adembidi tantiaquiota. Adembidi, cachina cuëdanubi chopatsiash, queshun isucunshun tantiadenequiota ³⁶ ëmbi tantienquiocnoc con icbo chochitondac, queshun. ³⁷ Adquiecbidi bëdamboec tabadquin Nuquin Papan chiaid isted-istedta Nuquin Papa chieshënquidën niacmenushe queshun —quepondash Esus.

14

Esus cuesunete bunaid chiaid
(*Mat 26.1-5; Duc 22.1-2; Uan 11.45-53*)

¹ Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe queshun isadaidbo tsusiobon Esus nibëmbededpondash. ² Aden nibë nec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestsiashe —quepondash isadaidbo tsusiobo.

Esus unësec queshun nachimboen noadte machiuinte chiaid
(*Mat 26.6-13; Uan 12.1-8*)

³ Adnubien Betania caid yacno tabadquin Esusën Simonën shubun puduedshun pepondash. Simon daushac bimboecquid, namì mishac tantiadenquiocquid icsho Esusën bëdamiaid nepondash. Adec puduedshun pec tabadnubi comapenec noadquid bëc chido puduedpondash. Piucquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

⁴ Aden machiuinsho isash utsibo nëishun: —¿Atotsieshun machiuino? ⁵ Noadte menequin piucquid dadpen bedshun aton na nibëdquid dadpen menetsiandac —quec onquécuededpanëdash Esus machiuimboed chido chushcaic. ⁶ Aden chushcasha tantiashien Esus onquéc

nadpondash: —Chushcainda. ¿Mitsanada nediosh? Ambi noadte machiuimboed bēdaidquio nec. ⁷ Badiadquidēn-badiadquidēnquiec ēnēdenquio yec aton na nibēdquid ēnabi iquiec. Aidi menenu queshun mimbi menepec. Ēbien nashuntiapimbo iquendac. ⁸ Ēbi unēsabicnuc nēid chidon tantiaquin chococanuequin nacbimboen noadte machiuimpaboc. ⁹ Abimbo chiembique. Tantia. Nuquin Papan shubu abentsēquēn tabadaid chuiquimbi ēbi machiuimboedēn naidtsen tantiaquidon chuibenchuibenendac —quepondash Esus.

Esus bedmembali, Udas quiaid
(Mat 26.14-16; Duc 22.3-6)

¹⁰ Adnubien Udas Iscadiote, Esusbēd icquid abentsēc, Esus bedmenu, quianec isadaidbo tsusiobo yacno nidpondash. ¹¹ Adec nidequi isadaidbo tsusiobo yacno choshon Esus mibi bedmembali quequin chuituidac bēdambo icpac caondash aido. Adembidi: —Esus ēbi bedmesho isun piucquid mibi menembali —quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin cainpac caondash Udasēn.

Nidaidēn capuquidded cuesuniaid abēd icquidobēdtan piaid
(Mat 26.17-29; Duc 22.7-23; Uan 13.21-30; 1Cod 11.23-26)

¹² Adashien penun isadaidbo utsibon nidaidēn capuquid cuesunenubien: —Cuesuniaid pambid penu queshun, ¿mitsishunquiemi nacnempatsia? —quepondash Esusbēd icquido.

¹³ Adsho tantiash Esus abēd icquid daēd chiec nadpondash: —Edusaden yacno nidquimbi dadan acte bēsho istuidash tsibananec aidbēdi nidta. ¹⁴ Aden aid tsibanec puduedash, ¿Ēbi tabadte quēnē mitsimbo iquiec? ēbēd icquidobēdtan penu, quiosh chuiquid, quequin shubu icbo chuita. ¹⁵ Aden chiac buanshun dectatomesun abuc quēnē dapa mibi ismendac. Ambo pete sante cuate iquendac. Ashunquio penun nacentā —quepondash Esus ambi daēd chuimiaid caic.

¹⁶ Aden chiac abēd icquid daēd Edusaden yacno nidquin Esusēn chiacpadomboen bēquedshun tsibananash puduedshun penun nacnempondash.

¹⁷ Adnubien inchēshbudtsēqui aid daēdtsēqui yacno Esusbēd icquid utsibo chopondash. ¹⁸ Adec choash pec tabadnubien: —Abimbo chiembique. Tantia. Ēbēdtan pequid abentsēcshun isadaidbo tsusiobo ēbi bedmendac —quepondash Esus.

¹⁹ Adsho tantiash, Icsambo iquiec, quequin tantiec: —¿Ēbida chienquio ique? —quepondash abēd icquidtedi.

²⁰ Adoaquien: —Mibēd icquid nebi, quec mibitedi. Padnuen abentsēcshun ēbēdtambi pete cuēshēn ēnē punshun pequidēn

ëbi chieshënquido bedmendac. ²¹ Nuquin Papan chuimiapadomboen aton madombo chidon tishac matsesaid ëbi unës uate anoentsëqui yanec. Ëbi bedmequid icsamboshë iquen-dac. Abi cuidte icsamboshë icnushe qeshun aidi tishen-quiocpatecnëdan –quepondash Esus.

²² Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: –Nëid pete cuëshë ëmbi piaid con dadabëd daëdacpadquiec Esus unësash abi tantiaquid ëbi icnuc Esus ëbëdi iquec quequin tantiata –capondash Esusën.

²³ Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac apcondash.

²⁴ –Nëid acquin Esused Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiata. ²⁵ Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aque-ndambi –quepondash Esus abëd icquido caic.

²⁶ Aden chiash Nuquin Papan naid chiec cuëdënanec macuësh Odibos caid yacno nidoapondash.

Esus tantiesa nebi quequin Petedon chuite chiaid

(Mat 26.30-35; Duc 22.31-34; Uan 13.36-38)

²⁷ Adshumbic Esusën: –Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tanta, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëdendac,”

quequin Nuquin Papan chuipampid nec. ²⁸ Unës uac uincue-nash Cadidia yacno ëbia nidoaindabi. Mibitsen ambo nidta –capondash Esusën abëd icquido chuiquin.

²⁹ Adoaquien: –Esus tantiaquid nebi quenquio utsitedi icnuc ëbien padenquio iquec –quepondash Petedo.

³⁰ Aden Petedon chuisho tantiash: –Abimbo chiembique. Tanta. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac –quepondash Esus Petedo caic.

³¹ Adsho tantiash: –Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquio iquendabi –quepondash Petedo comapenec onquec. Adecbidi Esusbëd icquidtedi onquepondash.

Quetsemani caid yacno choash tabadaid chiaid

(Mat 26.36-46; Duc 22.39-46)

³² Adashic cuëte odibo caid dadpen icsho Quetsemani que-quin cuënacno choash nidtuidash: –Nuquin Papa chuinuec

udi nidebique. Nëmbobi tabad –quepac caondash Esus abëd icquido caic.

³³ Aden chianec Petedo, Acobo, Uan nëitded cho quianec bëyucanec nidec Esus, Matsestedi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash. ³⁴ Adquio iquec: –Ëbibi unësquioshë yec udictsëc nidebi. Chieshtomane qeshun nëmbobi tabadquin Nuquin Papa chuiban –quepac caondash Esus ambi nëid 3ted, Cho, caboed chiec. ³⁵ Aden chianec udictsëc nidash Nuquin Papa chuinec nidaidën uebudash uec onquec: –¿Adabi adquid icmenquioctsia? Papa –quepac caondash Esus Nuquin Papa chiec. ³⁶ Aden chuishumbic: –Papa, mimbi natiapimbo ictequid nibëdec. Adquid icquin matses cuidtequid bedshunquid con mado icmenquio iquemi qeshun mimbi adoenquioctsiandac, Papa. Ëbi bunacpaden nainquiocquin mibi bunacpadomboen nata, Papa –capac caondash Esusën Nuquin Papa chuiquin.

³⁷ Aden chiash choquin abëd choboed 3ted icquid usho istuidec Petedo caic: –Simon, ¿ushecta ne? ¿Ëbibi chieshmane quiash yuecpectsëc iquec ushenquio yec tabadtiapimboda icco? ³⁸ Chieshmane qeshun Nuquin Papa chuita Nuquin Papan chiaid niacmenuequidën Satanas caidën chiaid tantiamane qeshun. Chieshenquio iquebi quiash dacuëdash badedquio mibi chieshendac –quepac caondash Esus.

³⁹ Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuioapac caondash. ⁴⁰ Adtanec choashumbic abëd choboedo adecbidi ushacsho istuidoapac caondash. Ushcasquiec tabadec, Ushenquiocobi, quequin chuitiapimbo yec otacquo tabadpac caondash.

⁴¹ Adnubien padpidec nidoashun Nuquin Papa chuioatanec choec: –¿Uimabudashta tiboquec ushec ne? Padi. Ushenquio yec isucun. Nuquin Papan madombo chidon tishac matsesaid ëbi icsho nëbimbobi ëbi chieshënquidon bedmeque. ⁴² Nidtoash ëbëdi nid. Ënden choaye. Is –quetuidpac caondash Esus abi bednuec choquido isec.

Esus bedshun buante chiaid
(*Mat 26.47-56; Duc 22.47-53; Uan 18.2-11*)

⁴³ Aden chuinubien Esusbëd icboedquiobi Udasbëd matses dadpen cho-chopondash. Cho-choquid utsi-utsiec chështe sanampamboec chonobi utsi cuate sanampamboec chopondash. Aidted Udasën chiac isadaidbo tsusiobon chomiaind nepondash.

⁴⁴ Esus bednuequid tantiamenuen ambiabi Udasën: –Ëmbi tanchoccaid mimbi bedtequid nendac. Aidquiobi bedshun

buanta. Cuenushe qeshun bēdamboen ista —capac caondash. ⁴⁵ Aden chiashic aidobēdi choquimbi: —Icho —quequin Udasën Esus tanchoccatuidpondash.

⁴⁶ Aden Udasën tanchoccasho isun Esus bedpondash.

⁴⁷ Adnubien anocquid abentsēcshun chēshte sananquin isadaidbo tsusio dapan ancaidēn pabiate auc abentsēc pateshunepondash.

⁴⁸ Adnubien: —¿Cuesanquid Esus nec, qeshun utsin cuate sananubi utsibon chēshte sananec ēbi bedecta cho-choec ne? ⁴⁹ Badiadquidēn-badiadquidēnquiec Nuquin Papa tabadte shubu uashunaid umanuc daquēnē uaidēn tabadquin matses tantiamenuen chuibanionbi mibitedi tabadnubi. Ambo icsobi ¿atotsieshumbini mimbi bedenquiocpo? Nuquin Papan chiapadomboen nēbi mimbi ēbi bedec, —quepondash Esus abi bedquido caic. ⁵⁰ Adec onquesho tantiashun cuenquin abēd icquidtedishun Esus niampondash.

⁵¹ Adec cuenubini nēbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanshobi Esus chieshēnquidon bedpondashi. ⁵² Aden bedac dasiuidte bēdaidquio nianec dadauidquio cuempondabi.

Isadaidbo tsusiobo iccuededacno Esus buante chiaid
(*Mat 26.57-68; Duc 22.54-55, 63-71; Uan 18.12-14, 19-24*)

⁵³ Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. ⁵⁴ Aden Esus buanubi tsyuec choquin Petedo cuemboedēn tsibananec isadaidbo tsusio dapan shubu umanuc daquēnē uaidēn puduedpondash. Adec puduedash Esus cuenushe quequin isquido tabadacno ambotsen cuēte cuēc tsadpondash Petedo. ⁵⁵ Adec Petedo tsadnubien Esus unēs uate bunquin Esus icsambocquid nec quequin chuiquid ¿Ada icpec? quequin nibēnquin adquid tsusiobon istuidabicpondash. ⁵⁶ Abimbo chiacimboen dadpeshun chuibededpondash. Aden chuiquin abentsēcshun chiapadomboen chienquiocquin utsin chuioapondash.

⁵⁷ Adnubien, Chuinu. Tantia, qeshun Esusēn chiacimboen utsi uain chuipondash utsibon. ⁵⁸ Aden chuinubien utsi onquec: —Naden Esusēn chuisho tantiombique. Tantia. Chuinu. “Nēid, Nuquin Papa tabadte shubu uashunaid chicbanendambi. Aden chicbanshumbic daēdec ushquin matsesēn naidpenquio isadnuc ēmbibi naindambi,” quequin Esusēn chuipondash —quepondash utsi. ⁵⁹ Aden abentsēcshun chuinubi utsin aden chienquiocquin chuipondash.

60 Aden chuisho tantiash isadaidbo tsusio dapa nēnantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nēidtedi neque? Chui. Tiantanu —capondash isadaidbo tsusio dapan Esus chuiquin.

61 Adsho tantiash ěcbedenquio yec otacquo nidsho isash: —¿Nuquin Papan chomiaidquo, Quidistu caid, Bēdambocquidēn mado nebi, quecta mibi ique? —queoapondash isadaidbo tsusio dapa Esus caic.

62 Adoaquien Esus: —Ai, aidi nebi. Nuquin Papan madombo matsesaid abuc nidoashic Nadatiamboquidēn dayun abiucquo tsadash abu ushun ěbi chosho matsesën isendac —quepondash Esus.

63 Adsho tantiash, Icsamboen chiec, quec abi daēd da-siuidaid bēntsecquid dached-dachedquiash: —¿Atotsieshun Esusēn icsamboen naosh, quequin chuimenuen utsi nibēmpē nuqui? 64 Nuquin Papa icsamboen Esusēn chuisho mimbi tantioc. ¿Midapaden mimbi chieque? Tiantanu. Chui —capondash isadaidbo tsusio dapan tsusio utsibo chuiquin.

Adoaquien: —Icsambo iqueque. Unēs uametiad —quecuededpondash.

65 Adsho tantiashun Esus dacuishtuaquin utsibon tauapondash. Adotanquin dashcuten bēpucshun ambibi cuestanequi: —¿Tsuntsin mibi cuesposh? Comapenen tantiaquidquo mibi neque. ěbi chui. Tiantanu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

Esus ěmbi tantiacmaidquo nec quiaid

(Mat 26.69-75; Duc 22.56-62; Uan 18.15-18, 25-29)

66 Adnubien Petedo umanuc daquēnē uaidēn tsadnubi isadaidbo tsusio dapan yua chido chopondash. 67 Choshon Petedo cuēte cuēc tsadsho isun: —Nasaded caid yacnocquid Esusbēd icquid mibi nec —capondash.

68 Adoaquien, Esusbēd icquid nebi, quetiapimbo yec Petedo: —¿Atotsi mibi quepe? Tiantienquio yec tsadebi —quepondash.

Adtanec puduedte shēcuē anoentsēqui nidtuidash tsadnuc cachina bēnē cuēdpondash.

69 Adec Petedo ambo tsadsho chido yuaidēn istuidtanquin padpiden: —Esusbēd icquidquo nēid nec —quequin anocquido chuoapondash.

70 Adoaquien: —¿Aidbēd icquidtabi nedi? —quepondash Petedo.

Adnubien yuecpactsēc yash: —Aidbēdi Cadidia yacnocquid mibi nec —quepondash ambobidi tabadquido.

⁷¹ Adoaquien: —Ëmbi tantiacmaidquio nec quequin abimbo chiembi. Ëmbi abimbo chienquio icscho ma ëbi chian anëdënquiacno Nuquin Papan nënepanuna —quepondash Petedo comapenen chiec.

⁷² Adnubien cachina padpidec cuëdpondash. Adsho tantishun, “Cachina daëdec cuëdabicnuc ëmbi tantiacmaidquio Esus nec, quequin mimbi chiendac tedestedec onquequin,” quequin Esusën chioshi quequin tantiec unësquio yanec shubianquiopondash Petedo.

15

Pidato yacno nidshun Esus meniaid

(Mat 27.1-2, 15-31; Duc 23.1-5, 13-25; Uan 18.28-19.16)

¹ Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun buanshun isadaidpembo ancaquid Pidato caid menepondash. ² Aden meniac Pidato: —¿Isadaidbo ancaquidta mibi neque? Ëbi chui. Tantianu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

³ Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquio yec Esus tsadpondash. ⁴ Adec tsadsho isun: —¿Ëcbedanenquio yec otacquioda tsade? Mibi icsaid dadpen nëidon chuibanec —Pidaton caqui ⁵ adquiecbidi Esus tsadpondash. Adec tsadsho isash ¿Mitsipadquidquio Esus nepec? Utsimbien, Icsapenquiocquid nebi, quequin chuipec, Aden chienquio Esusën iquec, quequin ambibi tantiec Pidato tsadpondash.

⁶ Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec. ⁷ Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. ⁸ Adnubien Pidaton seta utsin quënën nauedmiaid abentsëc ambi nidmiondacaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

⁹ Adec onquesho tantiash Esus nidmetiadquiocquin Pidon: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash. ¹⁰ Esusbidi tsusio icpec matses quenushe quiaish isadaidbo tsusiobo Esus unës uate bumpec quequin tantiaquin Pidon aden chuipondash. ¹¹ Aden tantiec, ¿Adambi Esus nidme? quequin Pidon chiac, Padi. Badabas nidmeta, quequin isadaidbo iccuededquin chuipondash aton tsusiobon chiapadomboen. ¹² Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidon.

¹³ Adoaquien: —Cueste nitsinshun dectan —quec comapenec cuëdcuededpondash isadaidbo.

¹⁴ Adoaquien: —¿Atotsi icsa uaosh? —quepondash Pido.

Adoaquien: —Cueste nitsinshun dectan —queoaic comapenec cuëdcuededpondash.

¹⁵ Adsho tantiash Esus ëmbi nidmesho isun, Pido icsambocquid nec, quequin ëbi chuiquid dapa isadaidbo tsusiobon chuinushe queshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidon sondado chuiquid chuiquin.

Sondadon Esus mamënshumbededaid chiaid

¹⁶ Adoac Esus bedshun Pidon shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. ¹⁷ Choshon dashcute abichobicquid bëdaidquio bedshun ancanquid dasiuidacimboecnuc dasiuinshun pinchuc-pinchucquid mauete uashun Esus matoncashun ¹⁸ ancanquid cuënacpaden cuë nec: —Mibi isash bëdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. ¹⁹ Adoquimbi ancanquidën sanante cuate bëdaidquiobimboecnuc sananquin sondadon abentsëcshun-abentsëcshunquien Esus macuestanquin dacuishtucabudniash Esusën taëno danëshën sebudash uepondash. ²⁰ Aden mamënshumbededquin mëyanshun dashcute bëdambocquid ambi dasiuiamboed dachicshun aton dashcutebi dasiuinshun cuesten dectanuequin Esus buampondash.

Esus cuesten dectante chiaid

(Mat 27.32-44; Duc 23.26-43; Uan 19.17-27)

²¹ Aden abi dectante cuate Esusën buantiapimboenoc nidquimbi abi datanquid cuate chiadtometanquin buamepondash sondadon. Abi datanquid Sidene caid yacnocquid

nëbi Edusaden caid dëuequiacnoësh choquid nepondash. Ade-candedo, Dupo chedon papa Simon cuëmëdquid niondash. ²² Aden cuate Simonën buanubi macuësh Codocota caid yacno abitedi chopondash. Macuësh mapi canitebimboecsho Codocota quequin isadaidbon aton onqueten cuëmpondash. ²³ Ambo choshon uba sicaid paëacsho paëmbocquid dauë cashtanquin meniac aquenquicopondash Esusën. ²⁴ Aden isuidsho isun cuesten dectampondash. Aden dectanshun aton dashcute bednu quequin sondadon abi cuëmëdquidtedi dada uabanshun tēchun sandoshon cadotanegin dada uat-saidēmpi puduemiaid isbanquin Esusën dashcute bedbampondash.

²⁵ Ushë dectatoec 9 yanuc Esus cuesten dectampondash. ²⁶ Esus dectanaid mapino dada uaid cuate podectanaid diadpondash. Isadaidbo ancaquid nec quequin dada uaid nepondash. Esusën naden chiosh quequin isadaidbo tsusiobon chiapaden dada uaid nepondash. ²⁷ Cuesunetanquin ampequid daëd ēquē dectambudcuenshun nënantanquio Èsus dectampondash. ²⁸ “Dectanquin icsaquidbēdta dectanendac,” quequin Nuquin Papan chuimiampicpadembi napondash. ²⁹ Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamēnshumbedepondash. Adec cuenquin mamēnshunquin: —Nuquin Papa tabadte shubu uashunaid chicbanshun daēdec ushquin chuca uaimbi, quequin chiec mibi onquiondaque. ³⁰ Abimbo chuiquid yec unēstiapimbocquid nebi quianec mibibi budta —cabidanepondash.

³¹ Aden cuenquidën chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bēdamequimbi utsi unēsacsho uincuemeboed yec mētoccaid abembi chiquidtiapimbocquid nec —quepondash isadaidbo tsusiobo Esus caic. ³² —Quidistu, Nuquin Papan chomiaid, isadaidbo ancaquid nebi queboed mibibi bud. Mibi budaid isash, Quidistu nec, quequin tantiendambi —quepondash. Aden cuenquidën mamēnshunubi abēdta dectanaidën adembidi chuioapondash.

Esus unēs uate chiaid

(Mat 27.45-56; Duc 23.44-49; Uan 19.28-30)

³³ Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash. ³⁴ Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuëdpondash. Aton onqueten: Papa

Edoen, ¿atotsieshumbini bidiadquin isenquoio ique? quec adpondash Esus.

³⁵ Aden Nuquin Papa Esusën chuisho tantiaquido, Nuquin Papa cuë nec, quenquoio yec: —Edias cuëneque. Tantia —quepondash.

³⁶ Aden tantianubi badedi titingeshun sicaid mucambocquid nêcushtanquin puntanquin cueste dêdectanshun acmenuequin êccuëscadonequi: —Chiata. Edias Esus bedec chonoshe caimbono —quepondash.

³⁷ Adnubien comapenec cuëdec Esus unësbudpondash.

³⁸ Esus unësbudnubi abi inchëshacimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquoio yec. ³⁹ Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nêid nec —quepondash sondado chuiquid uquë tsadbudec.

⁴⁰ Adnubien ancuenquoio isec chidobo nêidtedi tabadpondash: Madia Mactada caid yacnocquid; Madia utsi, Acobo bushcuetsëcquidên tita, aidi Osen tita nepondash. Utsibic Sadome nepondash. Aidon Esus ancuenquoio diadsho isbededpondash. ⁴¹ Aidon Esus Cadidia caid yacno capusho isun abi nashumboedo nepondash. Aidobêdtan isquido chido utsibo Edusaden yacno choshon Esus buansho isun tsibanquido icpondash.

Esus chococate chiaid

(*Mat 27.57-61; Duc 23.50-56; Uan 19.38-42*)

⁴² Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. ⁴³ Aidi, Ose Adimateya caid yacnoshon tishaid Pidato yacno nidpondash. ⁴⁴ Adec nidshun: —Esusën dada bedshun chococatiadquoio iquebique. ¿Ada buantan mibi quepe? —caquien, ¿Ëndenda unësassosh? quequin tantiesa icquin sondado chuiquid Pidaton chomeshun: —¿Ada Esus unëssosh? —capondash.

⁴⁵ Adoac: —Ai —quesho tantishun: —Ai, bedshun buanta —capondash Pidaton Ose chuiquin.

⁴⁶ Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidên nauedshun cuënote dapan bêtashpondash. ⁴⁷ Aden Osen Esus chococasho Madia Mactada caid yacnocquidbêdtambi Madia, Ose utsin titan ispondash.

16

Esus uincuenta chiaid

(*Mat 28.1-10; Duc 24.1-12; Uan 20.1-10*)

¹ Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. ² Bedtsash badiadtsëcnubi dominco ushë caidën Esus chococacno nidanequi: ³ —¿Tsuntsin cuënote shëcnepeba? —quec onquecuedepac caondash.

⁴ Adec onquequin ancuenquo isquien cuënote ënden shëcniac. Cuënote dapa yuëmbocquid nepondash. ⁵ Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquo tsadpondash. Aidi isash dacuëdcuededec tabadpac caondash chidobo.

⁶ Adec dacuëdec tabadsho isun: —Dacuëdenquo yec tabad. Esus cuesten dectanaid mimbi nibënaid tantiembi. Uincuenash nidac. Nëmbobi nanac ueuidoshe. Is. ⁷ Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquo utsibobëdta chuituidec nid —quepondash nëbi caniquid chidobo chiec.

⁸ Aden chuisho tantiash uëdëquequi chococaid shëcuënuësh puduenanec titinquec dacuëdec onquenquo yec nidanepac caondash chidobo.

Esus abuc indote chiaid

(Mat 28.16-20; Duc 24.13-53; Uan 20.11-23)

⁹ Adnubien abi nibëmboed uincuenashun Madia Matcada caid yacnocquidba Esusën ismetuidpondash. Ambi mayan icsa 7ted dapuduemiaid Madia Mactada yacnocquid nepondash. ¹⁰ Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. ¹¹ Esus uincuenash capusho isombi, Madia qesho tantiash, Aidquo mimbi isambo iquec, quec tantienquo yec tabadcuuededpondash.

¹² Adashic tantienquo yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. ¹³ Aden ismiac aid daëdi aucbidi Edusaden yacno nidshun ambi isboed chuioapondash. Adembidi tantienquo icoapondash utsibon.

¹⁴ Adashic, abëd icquidquo 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquo mimbi icpoc. Chobique. Is —capondash Esusën.

¹⁵ Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbítsen chuiban. ¹⁶ Aden chuisho tantiaquid, Ëbi cuidenquiocquin Esusded Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimbofnoc. ¹⁷ Abi tantiaquid utsi-utsien Nuquin Papan nadatiambocquin nabanquid icmendac. Adquid icmi-aidën ëmbi nacpaden mayan icsa dapuduemendac. Adem-bidi, utsi onquiaid tantienquiochoedëmbi tantiaquin ëbi chuibanendac. ¹⁸ Adecbidi, nisinquio piaqui bidisquenquio iquendac. Adecbidi, unësmenuequin acmiaqui unësenquio iquendac. Adembidi, utsi unëstsenho mishac bëdanendac. Nuquin Papan nadatiambocquin namiaidënuquio adobanendac —quepondash Esus.

¹⁹ Aden chuiquin ënacsho Esus abuc buanaqui Nuquin Papan dayun abiucquio Esus tsadtuidpondash. ²⁰ Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Ëmbi abimbo chuiboedquio mimbi isec aidquio tantianeta. Padi. Aidtedi dada uaombi.

DUCASËN DADA UAID

Mibi ismenuequin dada uaquid Ducas nebi.

¹ Utsin-utsinquien ambi naidbëdtabi Esuquidistu chuibanquin dada uaid dadpen iquec. ² Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. ³ Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aitedi mibi chuibanquin dada uaimbi, chuiquid dapa, Teyopido. ⁴ Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

Uan, acten mentoanquid tishte chiaid

⁵ Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. ⁶ Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. ⁷ Edisabed bacuë tishesa icpanëdash. Adquid yequi aton bënëbëdi tsusio budpanëdash.

⁸ Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. ⁹ Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpadece Sacadias puduedpanëdash. ¹⁰ Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

¹¹ Adnubien utsi puduedtemaid quënë yacno Sacadias icnubi ambobi Nuquin Ibon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. ¹² Adec tabadsho isash dacuëdampambo iquec, quetanec Sacadias uëdëquiampanëdash. ¹³ Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëdenda, Sacadias. Min chido Edisabedën min

mado tishendac. Min mado tishacsho Uan cuënta, ¹⁴ Min chidon tishaid isash mibi bédambo iquendac. Aidi mibi bédambo icmequid iquendac. Aidën chuibanaid tantiash matses dadpen bédambo iquendac. ¹⁵ Aidi Nuquin Papan bédamboen isaidquio iquendac. Paëmbocquid min madon isuidendac. Abi tishaid ushën abéd icmenuequin Nuquin Papan aton Mayan meniaidquio min mado iquendac. ¹⁶ Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. ¹⁷ Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

¹⁸ Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

¹⁹ Adoquien: —Ëbibi, Cabaded nebi. Nuquin Papan abéd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique. ²⁰ Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

²¹ Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo. ²² Aden yuen caimbudnubien puduenash onquenequi buëd cuëdenquiocpanëdash Sacadias. Adsho isun: —Ushquin isacbimboen isbenac —cabededpanëdash. Adnubien Sacadiasën iccuededquido nidmenuen mëdante uic-uicapanëdash.

²³ Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. ²⁴ Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. ²⁵ Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon

ëbi isec. Ëbi tantiaquin Nuquin Papan usundomiaid nebi — quepanëdash Edisabed.

Esus tishendac, quequin chiaid

²⁶ Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. ²⁷ Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. ²⁸ Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icho mibëdi tabadendac — capanëdash Cabadedën.

²⁹ Adoaquien Madia, ¿Atotsi quepeba? quequin otacquo tantiec tsadpanëdash. ³⁰ Adec tsadsho isun Cabadedën: —Dacuëndenda. Mibi bëdamboen tantiaquin Nuquin Papan naden nanu quequin chiaid nad iqueque. ³¹ Chuinu. Tantiata. Bacuë usundoshon min mado mimbi tishendac. Tishun, Ëmbi tishaid Nuquin Papa yacno yuedanquidquio nec, quequin Esus cuënta. ³² Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. ³³ Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

³⁴ Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

³⁵ Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquio Madia usundomiaid, icsa nibëdquid, Nuquin Papan madombobi nec, utsibon cabededendac. ³⁶ Min utsi Edisabed macho icquin bacuë usundoenquiocboedëmbi nëbi bacuë usundoac. Usundoenquiocquid nec, cabededboedëmbi nëbi ushë 6ted nidan usundoac. ³⁷ Utsin natiapimbo yaid Nuquin Papan naidquio nec —quepanëdash Cabaded.

³⁸ Adoaquien Madia: —Ai, con Ibon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

Madia Edisabed isedec nidaid

³⁹ Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash. ⁴⁰ Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. ⁴¹ Adsho Edisabedën

tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed ⁴² Madia chiec nadec comapenec on-quepanëdash: —Nuquin Papan bédamboshë icmiaidquio mibi nec. Mimbi usundoaid adembidi bédamboshë icmiaidquio nec. ⁴³ Nuquin Icbon tita mibi yec ¿atotsi quiash ëbi isnuec cho? ⁴⁴ Mibi isec chobi, mibi qesho ëmbi tantianubi, Cuis-hon, quiacbimboec con bacuë cuididiquianosh. ⁴⁵ Nuquin Icbon tantiacpadomboen chuisho tantiaquid mibi iquec mibi bédambo icted-ictedendac —quepanëdash Edisabed Madia chiec.

Nuquin Papan naid chiec Madia cuëdënaid

- ⁴⁶ Adnubien Madia nadec onquec cuëdëmpañdash: “Nuquin Papan naid chuibanu. Tantia.
- ⁴⁷ Ëbi usundomiaid Nuquin Papa yacno Yuedanquid nec, quequin tantiec bédambo iquebi.
- ⁴⁸⁻⁴⁹ Ëbi ambi namiaid icsho bédamboen isquin Nuquin Papan naosh.
- Adoacsho, Nuquin Papan bédamboshë icmiaid Madia nec, quequin abitedishunquio tantiabededendac.
- Adembidi aton tsyuecquidon tantiabededoaic.
- Nuquin Papa icsaisa iquec. Icsatiapimbo iquec.
- ⁵⁰ Ambi chiaid tantiaquin naquid icsho, Mimbi naid icsa cuidnu, quenquiocquin abëdi shubu abentsëquën tabadacbimboecnuc adquid tabadmendac.
- Adenuidi tantiaquin nampidquio abi iquec.
- ⁵¹ Nadatiambocquin naded-nadedquidquio Nuquin Papa nec.
- Ëmbibi tantiacpadomboen naimbi, quequid icsho isun Nuquin Papan cacumiac uano tabadendac.
- ⁵² Ancanquid dapa icboedi utsin namiaidquio adquid iqendac.
- Utsin namiaid icboedi chuiquid Nuquin Papan icmendac.
- ⁵³ Ambi chiaid tantiec bédamboec tabadte comapenec bun-quiapaden naquidquio Nuquin Papan icmendac.
- Con na ëmbi bedaiduidi tantiec bédamboec tabadebi quequid unësacsho cacumiac uano tabadendac.
- ⁵⁴ Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan ëbi usundomiac.
- ⁵⁵ Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.
- Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdënash Madia ënëdpanëdash. ⁵⁶ Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

Uan tishaid

⁵⁷ Adnubien Edisabedën bacuë tishte ushë chonoc dada bacuë tishpanëdash. ⁵⁸ Bacuë tishenquiochoedëmbi nëbi aton bacuë tishosh, qesho tantiash aton matses ado shubu utsin- quidotedi Edisabedbëd bëdambo icpanëdash.

⁵⁹ Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi ⁶⁰ Edisabed: —Padenquio. Abi cuëmëdquid Uan nec —quepanëdash.

⁶¹ Adoquien utsibo: —Min matses utsi Uan cuëmëdquid nibëdec —qeshun ⁶² Sacadias ismenuequin mëdante uic- uiccaquin: —Abi cuëmëdquid chui. Tantaranu —capanëdash utsibon.

⁶³ Adoquien dada uate bedshun, Abi cuëmëdquid Uan nec, quequin dada uaquin Sacadiasën ismepanëdash.

Adoquien: —¿Abimboda mimbi cape? — quecuededpanëdash utsibo.

⁶⁴ Adnubien Nuquin Papan oncameoac Nuquin Papan naid Sacadiasën chuibampanëdash. ⁶⁵ Aden chuibansho tantiash: —Dacuëdampambo iquec. ¿Atotsiepashun onquen- quiochoedëmbi nëbi onquequin Nuquin Papan naid chuibam- pec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash.

⁶⁶ Adoac: —¿Mitsipadquidquio aton mado nepec? — quecuededpanëdash Sacadiasën mado Nuquin Papan tantiamiaidquio isbededec.

Sacadias oncamiaid

⁶⁷ Adnubien Uanën papa Sacadias Nuquin Papan Mayanën oncamiac nadec Esus chiec onquepanëdash:

⁶⁸ “Nuquin Papa isadaidbon Icho nec, quequin chuibanuna. Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mënchictequidquio isadaidbo iquendac.

⁶⁹ Abi mënchicquid nadatiamboquid nendac.

Tsusedpa Dabidën tsyuecquidquio aid nendac.

⁷⁰ Ambi chuimiaidon chiampicpadembi

Nuquin Papan adquidquio icmianac.

⁷¹⁻⁷³ Nuquin tsusedpa Abadauan tantiaquin

Nuquin Papan ambi chiampicpadembi nuquin tsusedpabo aton tsyuecquidbëdtabi abi chieshënquido

nidtiapimbo yacnombo abi yacno yuedanquid

Nuquin Icho Abentsëcquiobi nec.

⁷⁴ Abi cudasquin mënchicaid yec dacuëdenquio yec

Nuquin Papan namiaidombo iquendac.

⁷⁵ Adquid yec icsaisa abipadquio bëdamboec tabadquid icsho nuqui aidën isendac ënenquiocquin.”

Adec Esus chiec onquiashic nadec aton mado chiec Sacadias onqueoapanëdash:

⁷⁶ “Adnubien nëbi Nuquin Papan chomiaid chuibanquidquio mibi nec, quequin utsibon mibi cuënendac, mado.

Nuquin Icho choec, quequin utsibon tantiabicnuc bëyuc tantiashun abi chuiquidquio mibi iquendac.

⁷⁷ Adquid icquin mibi icsaquid icsho cuidnushe quiash abided cuidadquid tantiasho isash Nuquin Papa mibi icsaid tantienquio yec bëpiscudendac,

quequin chuibanquid mibi iquendac, mado.

⁷⁸ Nuquin Papan matses tantiaquin naquidquio icquin abipadquidquio icsaisa abi yacnoshon chomiaidquio iquendac.

⁷⁹ Aidën tantiamiac unësash abi iquendac.

Adquid shubu abentsëquën tabadacpadec tabadendac, quequin mimbi chiendac, mado,”

quec Uanën papa Sacadias Nuquin Papan Mayanën oncamiac onqueapanëdash.

Matses nibëdacno Uan tabadcueniaid

⁸⁰ Adashic, Sacadiasën bacuë Uan caniacsho Nuquin Papan tantiamiaid yequi matses nibëdacno tabadcuenepanëdash ambi Esus chuibante ushë choabicnuc.

2

Esus tishaid

(Mat 1.18-25)

¹ Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash.

Aucuston, ¿Ëmbi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuipanëdash. ² Sidenio nidaid Sidia caid yacnocquido chuiquid, cobednadod caid icpanëdash.

³ Min tsusedpa tishampid yacnoshon mibi cuëmëdquid mit-sanabëdtabi dada uanuec niddan, cac abëd icquido buanec isadaidbo nidaneapanëdash.

⁴ Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampidnom-bobi nidaid Udeya caid yacno shubu dadpen icquid Beden

caid yacno chopanëdash. ⁵ Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash. ⁶ Ambo choquin aton bacuë nuambo usumpanëdash. ⁷ Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi bëyuc usundoaid Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

Obeca pemebanquin buanquido Nuquin Papan uaidon chiaid

⁸ Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash. ⁹ Inchëshbudtsëqui choash tabadnubien inchëshnuc Nuquin Papan chomiatic ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëdcuededpanëdash. ¹⁰ Dacuëdsho isash: —Chiaid bëda chuinuec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac. ¹¹ Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. ¹² Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquiec uesho istuidash, Nuquin Papan chomiaid Quidistu nec, mibi quependac. ¹³ Aden chiec Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiec nadec cuëdëncuededpanëdash:

¹⁴ “Nuquin Papa abucquio tabadquid abitedi uaquidquio bédamboshë iquec.

Nuquin Papan bédamboen isaïdo ma abëdi tabadpanuna,” quec cuëdëmpañdash. ¹⁵ Adec cuëdënnash Nuquin Papan uaido mayan bédabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash. ¹⁶ Adec nidshun nidaidën capuquidën pete santen bacuë nanacsho istuidpanëdash. ¹⁷ Isanec nidquimbi ambi isboedbëdta ambi tantiaboed chiac ¹⁸ tantiaquidtedi: —¿Midapadquidien capec? —quecuededpanëdash. ¹⁹ Aden obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañdash.

20 Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: — Ëmbi isboed ëmbi tantiaboed Nuquin Papan naidquio nec — quequin chiec onquecuededpanëdash.

Nuquin Papa tabadte shubu uashunaid yacno Esus buanaid

21 Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bëdan chiacpadomboen cuënaid Esus nec, quequin Madian aton mado cuëmpanëdash.

22 Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiacpaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepanëdash. 23 Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. 24 Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bëdambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiacpadomboen nanuec aton madobëdi puduedpanëdash.

25 Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpanëdash. Aidi isadaidbo chuiquid dapa abentsëcquiobi cainquidquio icpanëdash. Aidi Nuquin Papan aton Mayan meniaidquio icpanëdash. 26 Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bëdamboen isaidquio choacsho unësabicquin isendambi, quequin tantiapanëdash. 27 Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpanëdash. 28 Esus bësho isun Simeyonën Esus bedshun icucquin Nuquin Papan naid naden chuibanpanëdash:

29-30 “Abitedishun Icbo icquin mimbi ëndenquio chiampid nëbi nëid isembi.

Nëid isash unësmane quenquio yec, Cuishon, quec unësebi, Papa.

31 Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

32 Nëidëmbi mimbi tantiacpaden chuibanquin

isadaidbo bēdambo icmendac,”
quepanēdash Simeyon.

³³ Aden chuibanubi, ¿Midapadquidquien con mado capec? quequin Madian aton bēnēbēdtambi tantiapanēdash.
³⁴ Esus chuibanquin naimbudshun Osebēdta Madia chiec Simeyon: —Bēdambo icmiaid mibi daēdi nec —quepanēdash. Aden chuishumbic Madiuidtsēqui naden Simeyonēn chuiopanēdash: —Chuinu. Tantiata. Nēid bacuē tantiesa isadaidbo utsi-utsiec icsho Nuquin Papan uquē nēsecaindac. Min mado tantiaquid utsi-utsiec icsho Nuquin Papan abi yacno puduedmiaid iquēc bēdambo iquendac. Min bacuē, Esus, Nuquin Papa yacno puduedmianquid nec, quesho tantiashun matses dadpenshun icsamboen chuided-chuidedendac. ³⁵ Adsho ambi ompoquin naid icsabēdta ambi tantiaid icša tantiamequid min mado iquendac. Adobanquin ismiac unēs uasho isash mibibi unēsquio yec, Con madon natiambo iquebi, mibi quendac —quepanēdash Simeyon Madia chiec.

³⁶ Aden Simeyonēn chuinubi Nuquin Papan naden nanu quequin chiaid chuiquid chido Ana cuēmēdquid icpanēdash. Aidēn papa Panued icpanēdash. Aidēn tsusedpa Ashed icpampic. Aid aton bēnēn bedac abēdi seta 7ted matamiash tabadnubi ³⁷ aton bēnē unēsapanēdash. Aton bēnē unēsān Nuquin Papa tabadte shubu uashunaid yacno nidshun Anan tabadec nidenquiocquin Nuquin Papauidi tantiaquin buna mēmumbudnequin Nuquin Papa chuidenepanēdash. ³⁸ Ambo icnubi Esus bēsho isun Anan Nuquin Papan naden nanu quequin chiampicpaden chuipanēdash: —Isadaidbo icsaquid icsho cuidnu caid mēnchictequid nēid nec —quepanēdash Ana Esus chiec utsibon tantianubi.

³⁹ Adashic, Nuquin Papan naden nata quequin chiacpaden nainash Osebēd Madia nidaid Cadidia caid yacno nidoash Nasaded caid yacno abi tabadacno choapanēdash. ⁴⁰ Ambo tabadnubi aton bacuē Esus dada bēdambo yec canicuempanēdash. Aidi comapenen tantiaquidquio Nuquin Papan bēdamboen isaidquio icpanēdash.

Canicuenash Nuquin Papa tabadte shubu uashunaidēn Esus tabadaid

⁴¹ Adashic, Ēmbi bēyuc tishaid unēs uamenushe queshun intaquēn aton shubu shēcūē ēcnoshcacsho isun aidon bēyuc tishaid unēsmenquiocquin Nuquin Papan uaid mayan bēdan matampampid tantiate ushē yanuc Madia Osebēd Edu-saden yacno nidoapanēdash. Nuquin Papan chiacpadequi setan-setanquiec nidtenepanēdash. ⁴² Adecbidi, Esus abi tishaid seta 12ted yanash canicuenash anibēd Edusaden

yacno nidpanëdash. ⁴³ Adec ambo nidashic nami uabicquid petequid tantiaid ushëtedi tantiec tabadtenepanëdash. ⁴⁴ Adec ambo tabadquin nainash Esus ambobi icnubi tantienquo yec Madia Osebëd auëshquio nidoapanëdash. Adec nidash inchëshbudtsëqui abëd choboedo yacno capuquin Esus nibëmbenepanëdash. ⁴⁵ Aden nibënquin istuidabi yec Edusaden yacno padpidec nidoapanëdash. ⁴⁶ Daëdec ushquin nibënshun Nuquin Papa tabadte shubu uashunaid yacno puduedshun Esus tsadsho istuidpanëdash. Ambo tsadec Nuquin Papan chiaid tantiamequin chuibanquidbëd onquecuededsho istuidpanëdash. ⁴⁷ Adec onquec tsadsho isquin, Bëdamboen tantiaquin chuibanquidquo nëid nec, quequin utsibon tantiabededpanëdash. ⁴⁸ Adnubien, ¿Mitsipadquid con mado nepec? quequin otacquo Madian tantiapanëdash. Aden tantiequi: —¿Atotsi quiash ëbi daëdi tantienquo yec nëmbo choash mibi tabade, mado? Unësquiocquin papabëdtambi mibi nibëmbeniombi —capanëdash anin.

⁴⁹ Adoaquien Esus: —¿Atotsieshun ëbi nibëno? Con Pa shubu uashunaidën tabadnuec chobosh nebi. ¿Tantienquioda mimbi icpe? ⁵⁰ Aden Esusën chuisho anibëdtan Osen tantienquiocpanëdash.

⁵¹ Adashien: —Nidnu. Nid, mado —anin cac cacuidenquo yec Nasaded yacno anibëdi choash tabadquin Madian chiaidbëdta Osen chiaid tantiaquin Esusën nadenepanëdash. Adec tabadnubi aton titan ambi isboedbëdta ambi tantienquo yaid bëpiscudenquiocquin tantiadenepanëdash.

⁵² Adnubien comapenen tantiec bëdamboec canidopanëdash. Adquid icsho Esus Nuquin Papan bëdamboen isacpadomboen adomboembidi matsesën isbededpanëdash.

3

Esus choec, quequin Uan mentoanquidën chiaid
(*Mat 3.1-12; Mad 1.1-8; Uan 1.19-28*)

¹ Adashic, seta 15ted matamec Tibedio Sesad cuëmëdquid, Doma yacno tabadequi abitedi ancaquid dapa, empedadod caid icpanëdash. Aidi Doma yacnocquido ancaquid dapa icnubien Ponsio Pidato cuëmëdquid, nidaid Udeya caid yacnocquido ancaquid, cobednadod caid icpanëdash. Aid daëd ancanquid icnubien Edodes cuëmëdquid, nidaid Cadidia caid yacnocquido ancaquid, cobednadod caidbidi icpanëdash. Ancanquid aidtedi icnubien Edodesën utsi, Uedipe cuëmëdquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanëdash. Ancanquid aidtedi icnubien Disanias cuëmëdquid nidaid Abidinia caid yacnocquido ancanquid

cobednadod caid icpanëdash. ² Ancanquid aidtedi icnubien Anashëdi Caipas isadaidbo tsusio dapabo icpanëdash. Aid daëdi isadaidbo tsusio icnubien Uan, Sacadiasën mado mattses nibëdacnombo tabadshobi Nuquin Papan, Ęmbi chiaid chuibanta, capanëdash. ³ Adoac acte Odan caid cuëmano capuquimbi naden chuibampanëdash. Mimbi tantiaid icsa ënta. Aden ënsho isun mimbi icsambocquin naboed tantienquo yacbimboen Nuquin Papan mibi bëdamboen isendac. Ęmbi tantiaid icsa nainquiocquin ënu, mibi qesho tantishun mibi acten mentono, quequin cho-choquid cho-choquidquien Uanën chuidednepanëdash.

⁴ Ęndenquimbo Nuquin Papan tantiamiac Isayasën Uan chuiquin dada uampicpadequi Uan icpanëdash. Naden Isayasën Uan chuiquin dada uapampic:

“Mattses nibëdacnombo tabadquidën ëcauanshun naden chierendac:

Nuquin Icbombo choeque. Aid tantianu, quequin mimbi tantiaid icsa ëmbanta.

⁵ Umbo ancuenquo chosho isnu quequin cuembocnoc andëdshun

ambescabanacimboen abimbo chuiquidënquo chiaid tantianu, quequin mimbi tantiaid icsa ëmbanta.

⁶ Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,”

quequin Isayasën Uan tishabicnuc chuiquin dada uapampid nec.

⁷ Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanëdash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi mënchictequid icta, quequin mibi chiosh? ¿Aidën chiaid tantiashta acten mentomenuec cho? ⁸ Mentomete bunquin mimbi tantiaid icsa ënshun bëdamboec tabadquin utsibo ismebanta. Nuquin tsusedpa Abadauan Nuquin Papan bëdamboen isaidquo icpampic. Ambi tishmiaidën tishmiaid caidaid ëbi icsho Nuquin Papan bëdamboen isaidquo nebi, quequin tantienda. Abadauampadquid ambi chiaid tantiaquid bunquin, Mattses icta, Nuquin Papan cac cuënotebi mattses iguendac —quepanëdash Uan. ⁹ Adequi onquebudec: —Cuëte icsatedi matenu, quequin cuëte bacuëesa dëdshun mateshun icbon nëdëncaquin tauiec. Adquiecbidi tantiaid icsambocquid cuëshëdmenu, qeshun bëdamboec tabadaid ismesa cuëshëdmeshun chian anëdënquequid Nuquin Papan nënendac —quepanëdash Uan.

¹⁰ Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? —quepanëdash iccued-edquido.

¹¹ Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

¹² Adecbidi ancanquid dapan matses utsin na bedtequid nëidted bedta caidotsen acten mentomenuec cho-chopanëdash. Choshon Uanën chuibansho tantiash: —Chian anëdënquequid nësiate ictiapimbocquin ¿atotsimbi napeba? —quepanëdash.

¹³ Adoaquien: —Ancanquid dapan chiactedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

¹⁴ Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaquin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

¹⁵ Aden Uanën chuibansho tantiash: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

¹⁶ Adsho tantiash: —Mibi acten mentoquidquio nebi. Pad-nuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan. ¹⁷ Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. ¹⁸ Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

¹⁹ Adshumbic, ancanquid Edodesën tantiaid icsatsen Uanën chuibampanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. ²⁰ Aden ambi tantiaid icsa chuibansho tantiashun Edodesën Uan bedmeshun quënën nauedmepanëdash abitedishun tantianushe qeshun.

Esus acten mentoaid
(*Mat 3.13-17; Mad 1.9-11*)

²¹ Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec ²² dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec naded aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

Esuquidistun tsusedpabo chiaidtedi
(*Mat 1.1-17*)

²³ Adashic, abi tishaid seta 30ted icquimbi Nuquin Papan chiacpaden naquin tauapanëdash Esusën. Aden tauaquin chuibansho tantiaish aton matses nadpanëdash. Osen mado nec, quiash, Nuquin Papan mado nec, quenquio yec matses onquepanëdash. Esusën papapenquio Ose icnëdash. Madia aton tita icbo icnuc Esusën tsusedpabo nëidtedi iquec: aton buchido Edi cuëmëdquid icpanëdash. ²⁴ Aidën papabic Matic cuëmëdquid, aidën papabic Debi cuëmëdquid, aidën papabic Ana cuëmëdquid, aidën papabic Ose cuëmëdquid, ²⁵ aidën papabic Matatias cuëmëdquid, aidën papabic Amos cuëmëdquid, aidën papabic Naun cuëmëdquid, aidën papabic Esdi cuëmëdquid, aidën papabic Nacai cuëmëdquid, ²⁶ aidën papabic Mac cuëmëdquid, aidën papabic Matatias cuëmëdquid, aidën papabic Semei cuëmëdquid, aidën papabic Ose cuëmëdquid, aidën papabic Uda cuëmëdquid, ²⁷ aidën papabic Uana cuëmëdquid, aidën papabic Desa cuëmëdquid, aidën papabic Sodobabed cuëmëdquid, aidën papabic Sadatied cuëmëdquid, aidën papabic Nedi cuëmëdquid, ²⁸ aidën papabic Medqui cuëmëdquid, aidën papabic Adi cuëmëdquid, aidën papabic Cosan cuëmëdquid, aidën papabic Edmodan cuëmëdquid, aidën papabic Ed cuëmëdquid, ²⁹ aidën papabic Osue cuëmëdquid, aidën papabic Ediesed cuëmëdquid, aidën papabic Odin cuëmëdquid, aidën papabic Matic cuëmëdquid, ³⁰ aidën papabic Debi cuëmëdquid, aidën papabic Simeyon cuëmëdquid, aidën papabic Uda cuëmëdquid, aidën papabic Ose cuëmëdquid, aidën papabic Onan cuëmëdquid, aidën papabic Ediaquin cuëmëdquid, ³¹ aidën papabic Medeya cuëmëdquid, aidën papabic Menan cuëmëdquid, aidën papabic Matata cuëmëdquid, aidën papabic Natan cuëmëdquid, ³² aidën papabic Dabid cuëmëdquid, aidën papabic Isai cuëmëdquid, aidën papabic Obed cuëmëdquid, aidën papabic

Bos cuëmédquid, aidën papabic Sadomon cuëmédquid, aidën papabic Nason cuëmédquid, ³³ aidën papabic Aminidad cuëmédquid, aidën papabic Adan cuëmédquid, aidën papabic Eston cuëmédquid, aidën papabic Pades cuëmédquid, aidën papabic Uda cuëmédquid, ³⁴ aidën papabic Acobo cuëmédquid, aidën papabic Isac cuëmédquid, aidën papabic Abadauan cuëmédquid, aidën papabic Tade cuëmédquid, aidën papabic Nacod cuëmédquid, ³⁵ aidën papabic Seduc cuëmédquid, aidën papabic Dacau cuëmédquid, aidën papabic Pedec cuëmédquid, aidën papabic Ebed cuëmédquid, aidën papabic Sada cuëmédquid, ³⁶ aidën papabic Cainan cuëmédquid, aidën papabic Adpashad cuëmédquid, aidën papabic Sen cuëmédquid, aidën papabic Noe cuëmédquid, aidën papabic Damec cuëmédquid, ³⁷ aidën papabic Matusaden cuëmédquid, aidën papabic Enoc cuëmédquid, aidën papabic Aded cuëmédquid, aidën papabic Macadaded cuëmédquid, aidën papabic Cainan cuëmédquid, ³⁸ aidën papabic Enos cuëmédquid, aidën papabic Sed cuëmédquid, aidën papa abia uampid Adan cuëmédquid, aidën papambo Nuquin Papa abia yanampidquio nec. Abi tabadec. Aidedi Esusën tsusedpabo nec.

4

Satanas Esus icsamete bunaid (*Mat 4.1-11; Mad 1.12-13*)

¹ Adshumbic, Matses nebi, quequin Nuquin Papan chiacpaden nanuen acten mentomepanédash Esusën. Aden Uanën acten mentoaquien Nuquin Papan Mayanën chiacpadec acte Odan caid yacnoësh puduanec matses nibédacnombo nidash tsadpanédash. ² Ushë utsi nidash utsi choaid abuc-totsécquiecnuc ambobi tsadpanédash. Aidedi ushquin penquo yash Esus bundopanédash.

³ Bundoacsho isash Nuquin Papa chieshënquid choash Satanas nadpanédash: —Nuquin Papan madombo icquin penun cuënotebi pete icta cata —capanédash Satanasën Esus chuiquin.

⁴ Adoaquien: —Padi: “Peteuidi pec bédamboec tabadtemaid nec,” quequin dada uapampic —quepanédash Esus Satanas caic.

⁵ Adoshombic, macuësh dapa abucquio yacno Esus buan-shun Satanasën badedquio nidaidtedi ismebampanédash.

⁶ Ismiash: —Nidaidën icquidtedishun icbo icmiaidquio nebi. Abitedi con na nec. Ęmbi menenu cac aidedi mitsana iquendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibédendac.

⁷ Nidaidën tabadquidtedi chuiquid dapa icnu quequin, Con

icho mibi nec, ëbi casho adquid mibi icmembi —quepanëdash Satanäs Esus caic.

⁸ Adoaquien: —Padi. Nuquin Papan chiaid dada uapampid nad iquec: “Nuquin Papa abentsëcquiobi mimbi tantiaiduidtsëqui min icbombo neque. Aidën namiaidquio icta” —quepanëdash Esus Satanäs caic.

⁹ Adoshombic Edusaden yacno Esus buanshun Satanäsën Nuquin Papa tabadte shubu uashunaid macano abucquio tsadumpanëdash. Aden tsadunshun: —Mibi Nuquin Papan madombo yec nëuëshquio dacuëdenquio yec pudunta.

¹⁰ Naden dada uapampid iqueque. Tantiä. Chuinu.

“Mibi pudunsho isun, Tscatequin bëdamboen budmeta, quequin Nuquin Papan ambi uaido mayan bëdabo chien-dac.

¹¹ Aidombi min taën tsasimbocquid tincanushe queshun uidën uaquin mibi bëdamboen budmendac.”

Aden min Papan chiaid icnuc dacuëdenquio yec pudunta —capanëdash Satanäsën Esus chuiquin.

¹² Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanëdash Esus Satanäs caic.

¹³ Aden chiaquien Satanäsën Esus icsamboen namenuen tanquin naimbudpanëdash. Aden naimbudequi, Padpidemboen ëmbi chiaid namenuequin Esus tanun nanuna, quequin ambibi tantianec Esus nianec Satanäs nidpanëdash.

Nasaded yacnocquido Esus bunesabo

(Mat 4.12-17; 13.53-58; Mad 1.14-15; 6.1-6)

¹⁴ Adashic, Nuquin Papan Mayanën tantiamiaidquio iquequi matses nibëdacnoësh Cadidia yacno Esus choapanëdash. Choacsho isun, Nuquin Papan Mayanën tantiamiaidquio nec, quequin abi isquidon chiac dëuequidon tantiapanëdash.

¹⁵ Adnubic, Nuquin Papan chiaid chuibante shubu utsin-utsinquec puduedcuenequin Nuquin Papan chiaid Esusën chuibampanëdash. Aden chuisho tantiash, Nuquin Papan chiaid tantiaquidquio Esus nec, quec cuëdëncuededpanëdash.

¹⁶ Adashic, Nasaded yacno abi caninëdacno Esus nidoapanëdash. Ambo choash chonoadtemaid ushën Nuquin Papan chiaid chuibante shubu yacno nidash

abi puduedteniacpadequi puduedash Nuquin Papan chiaid isec onquenush nidtopanëdash. ¹⁷ Nidtosho isun Nuquin Papan chiaid Isayas cuëmëdquidën dada uapampid

anocquidën Esus menepanëdash. Aden aid meniac sananquin seccudoabanquin isbanec nadec Esus onquepanëdash:

¹⁸ “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ëmenuen chuibanta caidquio nebi. Aidëmbidi Satanasën yuaid Nuquin Papan bacuë icmenuequin chuibanta caidquio nebi.

19 Aidën Nuquin Icbon bëdamboen iste chuibanta caidquio nebi.”

20 Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. 21 Adoac: —Nuquin Papan chiaid mimbi tantiaboed nëbimbobi tauadoec —quepanëdash Esus abibi chiadequi.

22 Adoquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

23 Adoquien: —Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Ëmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. 24 Abimbo chiembique. Tantiata —quiash Esus abi onquec: —Nuquin Papan ëmbi tantiamiacpaden chuibanta caidën abi caniacnoshon chuibancho tantienquiocquid icpec. 25 Ëndenquimboshë adomboembidi Nuquin Papan ëmbi tantiamiacpaden chuibanta caid Edias cuëmëdquidën chuibancho tantiesa icpampic. Aidi icnubien isadaidbon bënua chidobo dadpen icpampic. Aido adquid icnubien seta abentsëc chotsëcnuac matamec aton pete nibëdquieac yanubi isadaidbon bënua bunc tabadpampic. 26 Adec bunc tabadsho isun, Isadaidbon bënua yacno nidta, quenquiocquin isadaidpembon bënua yacno pemenuc nidta cac Edias nidshun ambi chiacpadomboen isadaidpembon bënua nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. 27 Adashic, adecbidi isadaidbo abi daushumbo yacno mishac mishadenquio yacbimboecquido dadpen icpampic. Adquido icnubien Nuquin Papan namiadquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembon abentsëc Naman cuëmëdquid Ediseyon bëdamepampic. Ëbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

28 Aden Esusën isadaidpembon nashumpampid chuisho tantiaish iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash. 29 Adec nëishash nidanec nuntanuësh

puduenanec shubu ënëdacno nidshun acte dapa quiusudac-nombo nebudnuequin Esus buampanëdash. ³⁰ Aden nidmi-
aquien matses dadpen icquid natsusash Esus nidpanëdash.

Mayan icsa dapuedaid cuemete
(*Mad 1.21-28*)

³¹ Adec abi caniacnoësh Nasaded caid yacno nidtanashi nidaid Cadidia yacno nidequi Capednaun caid yacno Esus choapanëdash. Ambo choash chonoadtemaid ushë icnuc Nuquin Papan chiaid chuibante shubun puduedshun Nuquin Papan chiaid chuibampanëdash. ³² Aden chuibansho tantiaash: —Ambia tantiaquidën chiacpaden chuibanquidien Esus nechitec —quecuededpanëdash anocquido.

³³ Aden Esusën chuibanubien Nuquin Papan chiaid chuibante shubu nuntan mayan icsa dapuedaid icpanëdash. Aidi comapenec sidquetanec onquec: ³⁴ —¿Nasaded yacnocquid Esus caid atotsi quec mibi cho? ¿Ëbipadquidtedi naimbudmenuecta cho? Ëmbi isaid mibi nec. Nuquin Papan bëdamboen isaidquio, icsapenquiocquidquio mibi nec —mayan icsan caquien: ³⁵ —Otacquio tabad. Adec tabadec dapuduenta —Esusën cac mayan icsan abi dapuedaid tacpanën nebudec icsa uainquio yec dapuduempanëdash.

³⁶ Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec —quepanëdash Capednaun yacnocquido. ³⁷ Aden tanti-aquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

Daicsambocquid dadpen Esusën bëdamiaid
(*Mat 8.14-17; Mad 1.29-34*)

³⁸ Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

³⁹ Simonën nachi yacno choash dayunquio nidtuidec: —Chumbocquid daebudta —Esus quenubi badedquio daebudpanëdash. Adec daebudash nidtoshon codocashun Esusbëd icquido pemepanëdash Simonën nachin.

⁴⁰ Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. ⁴¹ Adembidi mayan icsa utsi-utsien dapuduemepanëdash. Adoac, Nuquin Papan madombobi

mibi nec, quec sidquesho tantiashun: —Nuquin Papan chomiaid nec, quequin ëbi chiec adec onquenda —Esusën cac mayan icsa ënëdpanëdash.

⁴² Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquoio yec ëbëdi tabadta —capanëdash istuidquidon.

⁴³ Adoaquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuc nidendabi. Nuquin Papan chomiaid icquin chuibanun nabono —quepanëdash Esus abi nibënquin istuidquido chiec.

⁴⁴ Aden chiashic Nuquin Papan chiaid chuibante shubu utsin-utsinquiec puduedcuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

5

Abëd tabadmenuen chomiaid (Mat 4.18-22; Mad 1.16-20)

¹ Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash. ² Adnubien masi yacno aton cano daëd nëshun icbon aton nëshaidtedi pambampanëdash. ³ Adsho isanec nidash Simonën cano antsadtoshon, Udictsëc ëbi buan, Esusën cac Simonën udictsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

⁴ Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

⁵ Adoaquien: —Icbo, inchëshëmbi nuëcquid bednuen nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

⁶ Adash shodombo yacno nidshun nëshaid nënetanquin nuëcquid dadpenquioshë bedac nëshaid tèsëdec taëpanëdash. ⁷ Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon cano cubucubutsëcquiocnoc nuëcquid sandoac cano daëd mentoadtsempanëdash.

⁸ Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquoio yec nidaneta. Icsambocquid nebique —capanëdash Esus chuiquin. ⁹ Abëd icquidobëdtan nuëcquid dadpen bedboed tantiadempambo

iquec, Esus nadatiambocquid nec, quequin tantiec on-quepanëdash Petedo. ¹⁰ Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanëdash Esus Petedo caic. ¹¹ Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

Daushumbocquid bëdamiaid

(Mat 8.1-4; Mad 1.40-45)

¹² Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

¹³ Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

¹⁴ Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidtequidquio meneta —capanëdash Esusën ambi bëdameboed chuiquin.

¹⁵ Adnubien Esusën bëdamesho isquidon Esusën bëdamiaid chuibanac matses dadpen Esusën chiaid tantianuec chochopanëdash. Adecbidi, daicsambocquido bëdanuec chochoacsho Esusën bëdamepanëdash. ¹⁶ Adashien matses nibëdacnombo nidash Nuquin Papa chiec onquepanëdash.

Dada shëquëquenquiocquid bëdamiaid

(Mat 9.1-8; Mad 2.1-12)

¹⁷ Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac matses bëdamenuec Esus icpanëdash. ¹⁸ Aid icnubien dada shëquëquenquiocquid aton din nandoshon aton utsibon bëpanëdash. Aden bëquin shubu nuntan

nënantanquio Esus icnubi ¹⁹ matses tsucus-tsucustsëcquiocsho isash puduedtiapimbo yec macano pada-padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

²⁰ Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

²¹ Aden chuisho tantiaash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bëpiscudquidquio nec —quepanëdash ambibi tantiacpadec onquec.

²² Aidon tantiaid tantiec Esus: —¿Atotsi quiash mim-bibi icsamboen tantiec onquepe? ²³ ¿Mimbi tantiaid icsa cuidenquio yec bëpiscudtequidquio nendac ëmbi chiaidquio bëdantequidpenda nedic? Adechidi, ¿Mibi icsambochoedi mibi bëdanoque. Nidtoash nidta, quequin chiaid bëdantequidpenda nedic? ²⁴ Nuquin Papan chomiaid icquimbi mimbi tantiaid icsa cuidenquio yec bëpiscudtequidquio nendac ëmbi cac ad iquendac. Nuquin Papan chuimiaidquio nec mibitedi camenuen dada shëquëquenquiocquid naden chiembique Tantia. Nidtoash nidquin min di buanec nid —capanëdash Esusën dada shëquëquenquiocquid chuiquin. ²⁵ Adoac nidtoshon aton di bedanec Nuquin Papan naboed chuibanequi aton shubuno nidpanëdash.

²⁶ Adsho isash tantiadempambo yec Nuquin Papan naid chiec onquecuededec tabadpanëdash: —Aden bëdamiaid isenquiochoedëmbi nëbimbobi aid isbempombi —quecuededpanëdash.

*Debi, ëbi tsibanec cho, quequin Esusën chiaid
(Mat 9.9-13; Mad 2.13-17)*

²⁷ Adashic, capucuenequin Debi cuëmëdquid Esusën istuidpanëdash. Debi nec qeshumbi Mateyo cuëmpanëdash. Ancanquid dapan utsibon na bedtequid bedshumbanta caid Debi icpanëdash. Ancanquidën chiapaden Debin utsibon na bedtequid bedbansho isun: —Ëmbi chiaid tantianush ëbi tsibanec cho —Esusën cac ²⁸ Debi nidtoanec aton natedi nianec Esus tsibananec nidpanëdash.

²⁹ Adshun aton shubuno Esus buanshun Debin pemepanëdash. Ancanquidën utsibon na bedtequid bedbanta caido abipadquido dadpembëdtabi Esus Debin pemepanëdash. ³⁰ Aden adquidobëdtan Esusën pesho

isash padiseyobo: —¿Atotsieshun mibi chuiquidbëdtan mibitedishun icsambocquidbëdtan pepeba? —quepanëdash Esusbëd icquido caic.

³¹ Aden chuisho tantiash Esus nadpanëdash: —Ëbi bédamec cho, quenquoio bédambocquid iquec. Daicsambocquidien, Ëbi bédamec cho, quendac. ³² Adecbidi, Nuquin Papan bédamboen isaidquio icsho, Mimbi tantiaid icsa ënta, quequin chuinuec choenquoio iccondabi. Nuquin Papan icsamboen isaidquio icsho, Mimbi tantiaid icsa ënta, quequin chuinuec chondabi —quepanëdash Esus padiseyobo caic.

Buna mëmunaid
(*Mat 9.14-17; Mad 2.18-22*)

³³ Aden Esusën chuibansho tantiashun naden padiseyobon Esus chuipanëdash: —Uambëd icquido buna mëmunec Nuquin Papa chiec onquedenec. Adquiecbidi ëbëd icquido buna mëmunec Nuquin Papa chiec onquedenec. Adenquoio mibëd icquido iquec. Aidon buna mëmunenquiocquin peshun sicaid actenec —quepanëdash padiseyobo Esus chiec.

³⁴ Adoaquien: —Aton chido bednun pambid meniac chidon codocacsho abi inquidën abëd icquido menec. Aden meniac isuidesa abëd icquido nec. Adecbidi ëbi abi chuiquid icnuc ëbëd icquidon buna mëmunenquiocquin isuidenquoio iquec. ³⁵ Yucash chido inquid nibëdanan abëd icboedo unësquiocquin buna mëmunquin isuidpec. Adecbidi ëbi nibëdanan ëbëd icboedo unësquio yampec —quepanëdash Esus padiseyobo caic.

³⁶ Aden chuibanequi abi Esus onquec: —Dashcute chuca cuëshun dashcute shëni bëdta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. ³⁷ Adembidi dadpen icquid chodo uashun sandoc. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. ³⁸ Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiaidquid yanec icsabudendac. Mibi adquid iquec, quequin tantiaquin utsi chiacimboen Esusën padiseyobo chuipanëdash. ³⁹ Adashic ambi ënden chiaid tantienquiocboedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

6

Chonoadtemaid ushë tantiaquid
(*Mat 12.1-8; Mad 2.23-28*)

¹ Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. ² Aden pesho isquin padiseyobon: —¿Atotsieshun chonoadtemaid ushën chonoadpeque? Tantuanu. Ëbi chui —capanëdash Esusbëd icquido chuiquin.

³ Adoquien: —¿Tsusedpa Dabid caidbëd icquidon piasquin pepampid tantiamboda ique? ⁴ Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: ⁵ —Ëbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

Mëuesadaid bëdamiaid
(*Mat 12.9-14; Mad 3.1-6*)

⁶ Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash. ⁷ Ambobidi tabadquimbi Esus chieshënnquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. ⁸ Aden cainubien abi chieshënnquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

⁹ Adsho isashien: —Tantuanu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daic-said utsi-utsiec unëspec? —quepanëdash Esus.

¹⁰ Aden chuishumbic iccuededquido isbanquin: —Ëbi mëd —cac Esus mëdequi mëuesadaid bëdampanëdash.

¹¹ Adec mëuesadaid bëdansho isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënnquido.

Esusën, Ëbi chuibeneta, caido
(*Mat 10.1-4; Mad 3.13-19*)

¹² Adashic, ushë utsin macuësh yacno matses nibëdacno Nuquin Papa chiec onquenuc nidash inchëshën ushenquio yec Nuquin Papa chiec Esus onquepanëdash. ¹³ Badiadshun abëd icquido dadpen chomeshun, Ëbi chuibeneta, quequin

12tedictsëqui chuipanëdash. ¹⁴ Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; ¹⁵ utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancanquid isadaidpembo bunesa; ¹⁶ utsibic, Udas, Acobon mado; utsibic, Udas Iscadiote, yuecshun Esus chieshënquido Esus bedmequid. Aidedi, Esusën, Ēbi chuibeneta, caido icpanëdash.

Nuquin Papan bëdamboen isaido icnuc ambi icsamboen isaido

(Mat 4.23-25; 5.1-12)

¹⁷ Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus niduntpanëdash. Nëidted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aido Esusën chuibansho tantianuec chochoash tabadnubi, Ēbi bëdamepec, quequin tantiec utsibo choash tabadpanëdash. ¹⁸ Adec choquido mayan icsa dapuduedaid icsho isun Esusën dapuduemepanëdash. ¹⁹ Adsho isun nadatiambocquid Esus neque. Mishnu, qeshun mishequi bëdancuededpanëdash.

²⁰ Adshumbic abëd icquidombo isbanquin naden Esusën chuibampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaido iquec abuc nidan con natedi mitsana nendac.

²¹ “Nëuëshquio bundodenesho isun Nuquin Papan bëdamboen isaido yec abuc ëbëd tabadec bundoesa iquendac.

“Nëuëshquio matses Nuquin Papan chiaid tantiesa icsho isash unësquio yec shubidednequid Nuquin Papan bëdamboen isaid yec abuc nidash ëbëd tabadec bëdambo iquebi quependac adquido.

²² “Esus tantiaquid icsho chieshënquin pudued cainquio yaid adembidi mua uaquin chuishunaid Nuquin Papan bëdamboen isaidquio nec.

²³ “Adomboembidi ëmbi ëndenquimbo chuimiaid aton matsesën icsamboen chuishundeniampic. Adomboembidi mibi min matsesën icsamboen chuishundenetsiash. Nidaidënsnun adoaid iquec Nuquin Papa yacno choacsho ambi bëdambo icmiaid mibi iquendac. Adquid iquendabi quequin tantiec mibi icsamboen chuishunaqui, Cuishon, queta.

²⁴ “Padnuen, con na dadpen iquec, quequin tantiec bëdamboec tabadebi, qesho Nuquin Papan icsamboen isaido mibi nec. Nidaidënsnun mimbi bedteniaiduidi tantiec Nuquin

Papa yacno puduedtiapimbocquid mibi iquendac. Nidaidën bēdamboec tabadquin ěnden bedondaidi mibi nec.

²⁵ “Nidaidēnshun abi bunaidtedi bedquido Nuquin Papan icsamboen isaido nec. Abi bunaiduidi tantiaquin Nuquin Papan chiaid tantianu qeshun tantiatiapimbo iquendac.

“Mitsanauidi tantiec, Bēdambo iquebi, quec mamēnec tabadquido icsho Nuquin Papan icsamboen isaido mibi nec. Adquido Nuquin Papa yacno puduedte bunsho, Padi, cac shubiquiendac.

²⁶ “Bēdamboquid nec, quequin mibi dadpenshun chuisho tantienda. Adomboembidi mua uain Nuquin Papan ěndenquimbo chuimiaidpembon chuipampic. Aidon chiaid tantiashun tsusedpabon Nuquin Papan chiaid tantienuo yanampic. Adquido Nuquin Papan icsamboen isaido nec —quepanēdash Esus.

Mibi uimanēnquido tantiaquin nabanta, quiaid
(Mat 5.38-48; 7.12)

²⁷ Aden chiashic abi Esus onquec: —Ĕmbi chiaid tantiaquidquio nad iqueque. Chuinu. Tantiata. Mibi chieshēnquido bēdamboen tantiaquin nabanta. ²⁸ Adembidi mibi icsamboen chuiquid bēdamboen chuita. Adembidi, ěbi icsamboen naquido bēdamboen tantiaquin cuidenda, Papa, quequin Nuquin Papa chuita. ²⁹ Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bēdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. ³⁰ Utsibic, aton na nibēdquid, Bec cho, qesho meneta. Adembidi utsin mitsana ampesho isun cuidenquiocquin bēdamboen naoata. ³¹ Adembidi ěbi bēdamboen nashuntiadquidi nepec quequin mimbi tantiacpadomboen utsi tantiaquin nashunta.

³² “Ĕbēd tantiananquiduidi tantianu, quec ¿bēdamboda mibi icpe? Padenquio. Adembidi Esus tantiesan abipadquiocquido tantiec. ³³ Adecbidi, Ĕbi bēdamboen tantiaquin nashunquiduidi tantiaquin nashunoanu quec ¿bēdamboda mibi icpe? Padenquio. Esus tantiesan adembidi nashunquidquio nec.

³⁴ Adecbidi, Ĕbi menequiduidi menenu, quec ¿bēdamboda mibi icpe? Padenquio. Esus tantiesan adenuidi menec.

³⁵ Naden nata, quequin chuinu. Tantia. Mibi chieshēnquid icsho aid tantiaquin bēdamboen nabanta. Adembidi mibi meniantiapimbocquid, Bec cho, qesho, Yucash cuidnannun nanuna, quenquiocquin meneta. Mimbi adosho isun Nuquin Papan mibi bēdamboen isendac. Adobanec bēdambo iquebi quec mibi tabadendac. Adomboen nabanquido

Nuquin Papan nacpadomboen nabanquid nendac. Adquido aton mado iquendac. ³⁶ Nuquin Papan abi chieshënquido nashundeniacpadomboen mibi chieshënquido nashundeneta —quepanëdash Esus.

Icsambocquid nec, quequin chienda, quiaid
(Mat 7.1-5)

³⁷ Aden chuibanashic Esus abi onquec: —Ëmbi tantiacpadomboen naisa icsambocquid nec, quenda. Adesa abi yacno choacsho Bëdambocquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquio icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquio yec bëpiscudta. Adquid, Cuidnu, quenquio yec mimbi icsamboen tantiaquin naid Nuquin Papa bëpiscudendac. ³⁸ Aton na nibëdquid bëdamboen tantiaquin meneta. Adembidi, mibi tantiaquin abi utsibëd bëdamboec tabadtequid Nuquin Papan mibi menendac. Utsi tantiaquin mimbi meniactpadomboen mibi tantiaquin bëdamboen tabadmetequid daëd uashun Nuquin Papan mibi meneoaindac —quepanëdash Esus.

³⁹ Aden chuishumbic utsin tantienquio ictequid abëd icquido naden Esusën chuipanëdash: —¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ampaëdpatsiash. ⁴⁰ Adembidi tantianuequidën abi tantiamequid dëniactiapimbo iquec. Tantiamiac abi tantiamequidpadquid iquendac —quepanëdash Esus.

⁴¹ Adoshombic adembidi tantiamequin naden Esusën chuipanëdash: —¿Atotsi quiash utsi bëtsiadaid pistsëcquid isequi mibi bëtsiadaid dapa isadtiapimbo icpec? ¿Mibibi bëtsiadaid dapa bëbedadabicquin mitsipadentsi mimbi utsi bëtsiadaid pistsëcquid bedshunuen ispe? ⁴² Adembidi, utsin tantiaid icsa abentsëc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ënta, quequin utsi chuipe? Mimbi tantiaid icsa nibëdacimboen mimbi chuipeque. Adoenda. Mimbi tantiaid icsa ënshun utsin tantiaid icsa icsho isun ëmenuequin chui —capanëdash Esusën.

Cuëte abipadquid aton bacuë nec, quequin chiaid
(Mat 7.17-20; 12.34-35)

⁴³ Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquibidi bacuëoaic. ⁴⁴ Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquio matses iquec. Adecbidi, echo bacuë isash, Bata nec, quenquio matses icoaic. ⁴⁵ Adembidi bëdamboen tantiaquidën ambi tantiacpadomboen utsi bëdamboen tantiaquin

nabanendac. Adecbidi ambi tantiacpadec bédamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

Tantiaquidquo icnuc tantiauidquid nec, quequin chiaid
(Mat 7.24-27)

⁴⁶ Adoshombic: —¿Atotsieshun, Con Icho mibi nec, queshumbi ëmbi chiacpadomboen naisa mibi ne? ⁴⁷ Èbi yacno choshon ëmbi chuibansho tantiaquiash nidshun nadomboen naquidquo iqueque. Chuïnu. Tantiata. ⁴⁸ Cunquequid dapan chimeshnushe queshun shubu uaquidën shëcuë ëquëduc uëdëshcashun buintad nitsinquid. Adembidi, natiamianquiec cametequid yanabicnuc tantesa uainquiocnuen ëbi tantiaquidquo icquin ëmbi chiaid papuduedshun adomboembidi nabanquid nec. Adquidën tantesa uainquio iquendac. ⁴⁹ Utsibic nad iqueque. Tantia. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudueduidtsacpadomboen nabanenquio yec natiamianquid chonoc abi papudueduidtsaid bëpiscudendac. Adquid uquë nësecatequid nendac —quepanëdash Èsus.

7

Sondado chuiquidën tantiaid
(Mat 8.5-13)

¹ Aden iccuededquido chuiquin nainash Capednaun caid yacno Esus nidoapanëdash. ² Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadtsëcquio icpanëdash. ³ Aton yua unëstiadtsëcquio icnubien, Nënquid bédamequid Esus nëmbobi iquec, quequin utsibon chiac:

—Aidën con yua bédametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

⁴⁻⁵ Adoaquien: —Ai —quianec Esus yacno isadaidbo tsusiobo nidshun chuituïdec: —Sondado chuiquidën chuitan caido nebi. Con yua unëstiadtsëcquio iqueque. Esus bédamequid neque. Chuitan, cac mibi chiec chobi. Sondado chuiquid bédambocquid nec. Nuquin Papan chiaid chuibante shubu uamiondaïdquio nioshe. Ambi chiacpadomboen aton yua bédametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. ⁶ Adec aidobëd Esus nidshobi sondado chuiquidën chomiaïd utsibo choquin bëquedtuïdash nadpanëdash: —Sondado chuiquidën chomiaïd

nebi. Aidën chiaid chuinec chopobi. Naden chuita, caposhi: “Padicnuna, Icho. Icsambocquid nebique. Mibi bēdamboquid iquec con shubun puduedenquioctiadquidi mibi nec. 7 Ēbi icsambocquid iquec mibi bēquedec nidenquiocobi. Mibi bēdamequid yec con shubun puduedenquiocquin mibi yacnoshombi, Bēdanta, mimbi cac con yua bēdampec. 8 Ēbien sondado chuiquid nec. Ēmbi nidta cacpadquiequi sondado nidec. Adecbidi, Cho, ěmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidën cabocpadembi mibi chuipombi —quepanēdash sondado chuiquidën chuitan caido Esus caic.

9 Adoquien: —¿Abimbobida cai? —qeshun ambi chiaid tantiamenuequin iccuededquido Esusën bēisbanquin nadopanēdash: —Chuinu. Tantiata. Sondado chuiquid isadaidpembo ěbi tantiaquidpadquid isadaidbo nibēdec —quepanēdash Esus. 10 Aden chiaquien sondado chuiquidën chuitan caido auchidi nidoash shubun puduedshun sondado chuiquidën yua bēdamiaid istuidpanēdash.

Nianten mado uincuen uaid

11 Adashic, ushē utsin shubu dadpen icquid Nain caid yacno Esus nidpanēdash. Aidbēdi abēd icquido nidpanēdash. Adecbidi matses utsibo dadpen nidpanēdash. 12 Adec nid-equi Nain tsasi uaid quēnē shēcuē anoentsēqui choquimbi unēsaid bēquido bēqueduidpanēdash. Unēsaid epa icnubi ani niente icpanēdash. Niantebēd Nain yacnocquido dadpen cho-chopanēdash. 13 Adec cho-choec niente shubisho isash Esus unēsquio yec: —Shubienquio yec ěnēd —quepanēdash. 14 Adec, Ēnēd, quetanec udictsēc nidshun unēsaid nanaid Esusën mishnubi abi bēquido nidtuidpanēdash. Niduidsho isun: —Abuido, uētsēdtota —cac 15 uēdtsēdtoash tsadec unēsboed on-quepanēdash. Adsho isash ani caic: —Nē, unēsboedi min mado uincuenoshe. Abēdi nidec nid —capanēdash Esusën.

16 Aden unēsaid uincuemesho isash cho-choquido: —Adopenshenda uincuemec —qeshun Nuquin Papan naid chuibampanēdash. Aden chuibanec: —Nuquin Papan matses bēdamboen isnuen ambi chomiaidquio nuquibēd icmiosh —quec isquido onquecuededpanēdash.

17 Aden isash nidshun unēsaid uincuemiaid isquidon chuibansho isadaidbon nidaid Udeya caid yacnocquidon tantiabempanēdash. Adembidi chiac dēuequidontsen tantiapanēdash.

*Ēbitedishun cainaid mibi nec, quequin Uanën chiaid
(Mat 11.2-19)*

18 Adnubien, acten mentoanondaid Uan cuëmédquid quënën nauedaaid icsho abëd icquidon Esusën nabanaid chuibampanëdash. Adoaquien abëd icquido daëd chomeshun Uanën nadopanëdash: 19 —Esus yacno nidshun nadota. ¿Ëbitedishun cainaid Nuquin Papan chomiaid abentsëcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanën cac aid daëdi Esus yacno nidpanëdash.

20 Adec Esus yacno choash: —Acten mentoanondaidëmbi Uanën chomiaido nebi. Uan nadosh: “¿Ëbitedishun cainaid Nuquin Papan chomiaid abentsëcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanëdash Uanën chomiaido Esus caic.

21 Aden chiaquien icsambocquid bédamequinc, mayan icsa dapuduedaid dapuduemequinc, bëshuaid bédamequinc caquin Esusën ismebampanëdash. 22 Aden nabanquin nainashic: —Mibi chuiquid Uan caid yacno nidshun ëmbi nabamboedtedi mimbi isboed naden chuitanta. Bëshun isbenosh. Adecbidi canite icsaidi capuanosh. Adecbidi daushumbocquidon nami bédanosh. Adembidi pashun tantiabenosh. Adembidi unësaid uincuemiosh. Adembidi aton na nibëdquido tantiamenuen Nuquin Papan chiaid Esusën chuibanosh, quequin Uan chuitanta. 23 Ëmbi aden nabansho isun tantesa uainquiocquin Nuquin Papan bédamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiec.

24 Adashic, Uanën chomiaido nidambi iccuededquido tantiamebanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ishçunaid isnuecta niddionda? 25 ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta niddionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. 26 Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ëbi ëndenquimbo chuiquido ëbi isesabo icpampic. 27 Ëbi cain naden Uan Nuquin Papan chuimiampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

28“Adembi Uan chuibanu. Tantiata. Nuquin Papan chuimaid Uampadquid matsesën tishaid utsi nibëdec. Aidën ëbi

chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

²⁹ Aden Esusën chuibansho tantias: —Nuquin Papan naid bëdambo iquec —quepanëdash Uanën mentobanondaïdo. ³⁰ Utsiboen ambi tantiaid icsa ënenquio icquin Uan Esusën chuisho tantias, Nuquin Papan naid bëdambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamequido icpanëdash.

³¹ Aden Uan chias Esus: —¿Nuquin Papan chiaid nëbi chuisho tantiesa mitsipadquid nepeque? ³² Adquid chuinu. Tantia. Ambi tantiacpaden naisa icsho isash bacuëbo yacimboc nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquio iquec. Adquidën Nuquin Papan chuimiaidën nabansho icsamboen ispec. ³³ Nua cubudquin pesa Uan icsho isash, Mayan icsa dapuedaid nec, queposh Uanën chuisho tantiesa. ³⁴ Ëmbi peshun acsho isec, Nua peshun tantienquiocquin acquid nepec. Aidbidi icsambocquidobëd icquid nec, ëbi caposh. ³⁵ Aden tantienquiocquid, Bëdamboen tantianu, queshun bëdamboen tantiaquidënquio chuibansho tantias abi tantiamequidpadquid iquendac —quepanëdash Esus.

Chidon Esus tanoshcaid

³⁶ Adashic, Ëbi yacno pec cho, padiseyobo abentsëcshun cac aïbëd nidash shubun puduedash pete santen cuëshnudash Esus uepanëdash. ³⁷ Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. ³⁸ Aden bëequi Esus yuedacno choash puduedshun abi bëdamequid Esus istuidash, Ëbi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaïdën taucshun taë tachocabanshun noadte bëdan chidon tanoshcapanëdash. Chidon aton na bedtequid dadpen menequin comapenec noadte bëda bedshun Esusën taë tanoshcapanëdash chidon.

³⁹ Chidon adosho isash Esus yuedquid, Simon caid, abibi onquec: “Ëmbi yuedaid Nuquin Papan chuimiaid iquec, Ëbi mishquid icsambocquid nec,” quequin chido mishmenquio icpec, quepanëdash Simon.

⁴⁰ Adoaquien, tantiaquidquio icquin Esusën: —Mibi tantiamequin chuinu. Tantiata, Simon —capanëdash.

Adoaquien: —Aden chuiban. Tantianu —quepanëdash Simon.

⁴¹ Aden tantiashun Esusën Simon ambi tantiaid icsa tanti-
amenuen utsi chuiquin nadopanëdash: —Bec cho. Yuecshun
menenun nanuna, quepondash daëd. Abentsëcshun dadpen
bedshunubi utsin daëdpactsëc bedshumpondash. ⁴² Aden
bedshunshun yuecshun ambi bedshunacted abi daëdi me-
niantiapimbo icpondash. Adsho isun: “Padi. Mimbi
bedondaid ëbi cuidenda,” quequin abi bedshunëdaidën abi
daëdi chuipondash. Adoacsho, ¿Mitsiquid abi bedshunëdaid
ënenquiocquin tantiec bëpiscudenquio icpec? —quepanëdash
Esus Simon caic.

⁴³ Adoaquien: —Ambi dadpen meneshun cuidenda caidien
nechitec —quepanëdash Simon.

Aden chiaquien: —Ai, bëdamboen tantiaquin mimbi chioc
—quiash ⁴⁴ Simon ismenuec Esus chido yacmi bidiadshun
naden chuipanëdash: —Min shubun puduedacsho mimbi
taë pante ëbi menenquiococ. ¿Nëid chido isquindactio?
Aidëmbien aton bëunën taë chucu uashun aton manëdaidën
con taë bëchishaid ucposh. ⁴⁵ Min shubun ëbi puduedsho
isun tanchoccanesa mibi nec. Padnueni ëbi puduedacsho
isun nëid chidon ëbi tantiaquioquin yuen con taë tachoccan-
iosh. ⁴⁶ Bëchin manoshcanesa mibi iccoc. Padnueni nëid
chidombi noadte bëdan tanoshcaniosh. ⁴⁷ Adembidi mibi
chiembique. Tantiata. Mayan icsa dadpenshun tantiamiaid
icsho nëid chido bëdamepombi. Aden bëdamiashic abi icsaid
tantienquio yec bëpiscudpobi. Ëmbi aden nac ëbi comapenen
tantiaquioquin ëbi nashunquidquio nëid chido nec. Padnuen
utsi icsaid daëdpactsëc mibi icsaidtedtsëcbidi icpec. Adquid
icsaid bëpiscudebi ëbi quenuc ëbi bëdiactsëc tantiatsec mibi
nashumë nec —quepanëdash Esus Simon caic.

⁴⁸ Aden Simon chiashic chido caic: —Icsaquid nec,
quenquiocquin icsainquio yacbimboecquid mibi isembi
—quepanëdash Esus chido chuioaic.

⁴⁹ Adsho tantiash: —Icsainquio yacbimboecquid mibi
isembi, quec ¿mitsipadquid Esus nepec? —quepanëdash ic-
cuededquido. ⁵⁰ Aden iccuededquidon tantianubi chido caic
Esus: —Ëbi tantiaquid yec Nuquin Papa yacno puduedquid
mibi neyoc. Bëdamboec tabadaid tantiamiaid mibi iqueque.
Dacuëdenquio yec nidta —quepanëdash chido caic.

8

Chidobo abi nashunquido

¹ Adshumbic, Esusën shubu dadpen yacno-yacnomboen
chuibanquin Nuquin Papa yacno shubu abentsëqui
yacbimboec nidaidën tabadaid chuibenepanëdash. Abi

bëdamequid tsibananec chidobo nidpanëdash. ² Ambi mayan icsa dapuduemiaidobëdtan ambi bëdamiaidon Esus tsibanampanëdash. Madia, Macada yacnoshon tishaid chedon Esus tsibampanëdash. Mayan icsa 7ted dapuduemiaid Madia icpanëdash. ³ Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

Pete ëshë sequid

(Mat 13.1-23; Mad 4.1-20)

⁴ Aden chuibenias tabadtuidtsëcnubi ambi chuiquin tantameboedo cho-choquin tsibanampanëdash. Cho-chosho isun, Mibibimboecnuc chiemi, quenquiocquin Esusën nadopanëdash: ⁵ —Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë secabanac maisec utsi-utsiec podqued nantan paëdacsho matsesën manenubi utsi-utsien uicchunën chec. ⁶ Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. ⁷ Utsibic, nisanquid dëyucacno secac aïdbëdi dëyucash canidouidtsacsho nisanquidën bëtinac unësquid. ⁸ Utsibic, nidaid bëdan secac dëyucash canias dadpen ëshëendac —quepanëdash Esus.

Aden chuibanashic: —Tantiate bëdambocquidën ëmbi chui-boed tantiapec —quepanëdash.

⁹ Adoaquien: —¿Mitsipadquid tantiaid mimbi chuiboed icpec? Èbitedi tantamequin chuoia —capanëdash abëd icquidon.

¹⁰ Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabenec. Padnuen utsibon tantienquio yaid aid iquec. Aden chiac:

“Èshë bëdambocquid icquimbi tantiesa icquin ma Nuquin Papa yacno isenquiocpanuna.

Adembidi tantiate bëdambocquid icquimbi tantiesa icquin ma abimbo chiaid tantienquiocpanuna”

—quepanëdash Esus.

¹¹ Aden chiashic: —Èmbi chuiboed nad iqueque. Tanti. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. ¹² Podquedën nidaid tsasimbocquidbimboecquid nad iquec. Nuquin Papan chiaid tantias papuedtiapimbocsho Satansën bëpiscudmiaid

adquid nec. ¹³ Cuënote dadpen samëdacno nidaidbimboecquid nadquid iquendac. Nuquin Papan chiaid tantiash, Bëdambo iquebi, quiashic natiavianquiecametequid icnuc aid tantiec Nuquin Papan chiaid papudueduidquid iquendac. ¹⁴ Nisanquid dëyucaid dadpen yacno nidaidbimboecquid nad iquec. Nuquin Papan chiaid tantiash abi bunaid, abi nënaid, ambi natequid adquid tantiaquin Nuquin Papan chiaid bëtashacimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatiapimbo iquendac. ¹⁵ Nidaid bëdabimboecquidien nad iquec. Nuquin Papan chiaid tantiadonec bëdamboec tabadquin utsi ismequidquio nec. Adquid natiavianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuec.

Tabote nënantan nanac chënquiacimboecquid
(*Mad 4.21-25*)

¹⁶ Aden chuishumbic naden Esusën chuiopanëdash: —Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid. ¹⁷ Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidëmbi chuibanendac. ¹⁸ Ad icnuc ëmbi chiaid bëdamboen tantiaquiota. Nuquin Papan chiaid tantianuequin ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauidboed, Bëdamboen tantiëmbi, qeshun papuduedmenquiocquin bëdamboen ismesa nec. Aden ambi tantiauidaid uesadendac —quepanëdash Esus.

Aton utsibo aton titabëd choaid
(*Mat 12.46-50; Mad 3.31-35*)

¹⁹ Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Èbi choaid chuita, cac ²⁰ shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

²¹ Adoquien: —Adquid chuinu. Tandia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

Acte tëccoasquesho ënëdmiaid
(*Mat 8.23-27; Mad 4.35-41*)

²² Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash.

23 Adec nidec cano anuequi Esus ushtopanëdash. Adec ush nubien cunquequid dapa comapenec cunqueubi acte tëccoasquequidën acte uemiac cano mentoadtsempanëdash. Adsho isash dacuëdec 24 Esus ushacno nidshun tinec abëd icquido: —Nuqui mentoadeque. Isucun, Icho — quec comapenec cuëdpanëdash abëd icquido. Adsho tantiasish isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpanëdash. Adembidi: —Mibi comapenec tëccoasqueque. Ënëd —Esusën cac badedquio acte tëccoasquequid ënëdoapanëdash. 25 Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacadepuqui ënëdchitosh, quec abëd icquido abibi onqueddedpanëdash.

*Mayan icsa dapuduedaid dapuduequin bëdamiaid
(Mat 8.28-34; Mad 5.1-20)*

26 Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash. 27 Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. 28 Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien 29 mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

30 Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoquien: —Sinco midted dapuduedonaid nebi —quepanëdash mayan icsa dapuduedaid onquec. 31 Aden chiashic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiashic 32 chancho dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.

Adoquien: —Aido dapuduedtan —Esusën cac 33 dapuduequeni chancho mayan icsa dadpen dapuduedash acte quiusudacno chancho comapenec ni quec chian pudunpudunec mentoadbudnec nibëdquieq unësbunepanëdash.

³⁴ Adsho isash chancho pemequin isquido titinquianec shubu dadpen yacno choshon ambi isboed chuituidac
³⁵ anocquido istanu quianec Esus yacno cho-chopanëdash. Adec choshon mayan icsa dapuduemequin bëdamaiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash.
³⁶ Dacuëdsho isun mayan icsa dapuduemequin bëdamaiaid isquidon ambi isboed dacuëdquido chuipanëdash. ³⁷ Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

³⁸ Adsho isun: —Mibëd nidtiadquio iquebi —quepanëdash ambi mayan icsa dapuduemequin bëdamaiaid Esus chiec.

³⁹ Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduemequin bëdamaiaid nidanec aton shubu yacno choshon anocquidtedi Esusën naid abi mayan icsa dapuduemequin bëdamaiaid chuibanoapanëdash.

*Chido intac budaid bëdanaid icnuc champi uincuemiaid
 (Mat 9.18-26; Mad 5.21-43)*

⁴⁰ Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. ⁴¹ Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: ⁴² —Con champi abentsëc tishaid unësanekidquio iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. ⁴³ Adnubien, chido seta 12ted matamec intac budaid chopanëdash. Aidi dauëchoquid dadpenshun bëdametiapimbo icpanëdash. ⁴⁴ Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

⁴⁵ Aden mishac: —¿Tsuntsimbini mishosh? —quepanëdash Esus. Aden chuisho tantiash abi datsidash capuquido mishambo yec otacquio tabadcuuededpanëdash. Adec tabadnubien: —Matses dadpenshun tsucus-tsucustsëcquiocquin mibi cuëscabededec —capanëdash Petedon.

⁴⁶ Adoaquien: —Matses abentsëcshun ëbi mishosh. Ëmbi nadatiambocquin natequid bëuesadtsac —quepanëdash Esus.

⁴⁷ Adec Esus onquesho tantiash chido, Ambi tantiacpadom-boen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsid-adquidon tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

⁴⁸ Adoaquien: —Mimbi tantiacpadquiec mibi bëdanaye. Dacuëdenquio yec bëdamboec tabadec nid, champi —capanëdash Esusën.

⁴⁹ Aden Esusën chuinubien Aidon shubun icquid ut-sibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nid-nunda —capanëdash abi yacnoësh choquidon Aido chuiquin.

⁵⁰ Aden chuisho tantiash: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

⁵¹ Aden chianec Aidon shubuno nidash cho-choquidotedi, Ëbëd puduedenda, quequin chianec Petedo, Uan, Acobo aited buanec Aido cuëmëdquidën champi yacno Esus puduedpanëdash. ⁵² Ambo puduedshun anocquido unësquio yec shubisho tantiashun: —Mibi shubieque. Ënëdta. Champi unësenquio yec usheque —capanëdash Esusën.

⁵³ Adsho tantiashun, Champi unësacsho isombi, quequin Esus tantienquiocquin shubiquidon mamënsumbededpanëdash. ⁵⁴ Mamënsumbedednubi Esusën Aido cuëmëdquidën champin mëdante mëdinquin: —Nidto, champi —comapenen cac ⁵⁵ aton tiboedte unësabi yec champi badedquio nidtopanëdash. Champi nidtosho isash: —Peme —quepanëdash Esus. ⁵⁶ Aton champi nidtosho isash: —Adopenshenda iquéc —quepanëdash ani amëbëdi.

Adoaquien: —Mimbi isboed chuibanenda —quepanëdash Esus.

9

Esusën ëbi chuibeneta, quequin ambi nidmiaido
(Mat 10.5-15; 14.1-12; Mad 6.7-29)

¹ Adashic ambi ëbi chuibeneta caido 12tedtsëqui chometan-quin Esusën nadopanëdash: —Ëmbi nadatiambocquin nabanacpaden mibitedishun nabanendac. Mayan icsa dapuduemequinc daicsaido bëdamequinc cain mibi capucueni-acnoshon mimbi ismebenendac. ² Nëbi mibi nideque. Adec capucuenequin chuibenequimbi bëdamebeneta. ³ Nidquin

cueste uidën nidte buanenda. Shictoachte buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio nidtan. ⁴ Adec nidash mibi yuedquidën shubun puduedshun ëmbi chiacpadomboen nabanec anouidi tabadta. ⁵ Mibi nidacno mibi yuedquid nibëdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanëdash Esusën abëd icquido chuiquin.

⁶ Aden chiac nidash abëd icquido abi yuedacno puduedash tabadquin Esusën chiacpadomboen Nuquin Papabëd tabadaid chuibanquimbi daicsaido bëdamebenepanëdash.

⁷ Adnubien Esusën nabansho isquidon Edodes chuibanpanëdash. Edodes Cadidia yacnocquido ancaquid icpanëdash. Aden Esusën nabanaid chuisho tantiashun, ¿Tsudain nepec? Edodesën caquien,

Acten mentoanondaid, Uan cuëmëdquid uincuempash icnui, quenubien; ⁸ Edias Nuquin Papan ambi chiaid chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanëdash, quequin chuipanëdash Esusën nabansho isun chuiquidon Edodes tantiamequin.

⁹ Adoaquien: —Mambi uincuentiapimboconoc Uan mapi budtemiondac. ¿Tsudain ëmbi tantiacmaidquio adobanquid icpec? —quiashic Esus iste bumpanëdash Edodes.

Matses dadpen pemiaid

(Mat 14.13-21; Mad 6.30-44; Uan 6.1-14)

¹⁰ Adashic ambi nidmeboedo Esus yacno padpidec choapanëdash. Choashumbic ambi nabamboedtedi chuibanpanëdash. Aden chuibanansho tantiash Esus abëd icquido bëyucanec shubu dadpen icquid Betsaida caid anoentsëqui nidpanëdash. ¹¹ Aido nidsho isun cho-choquidon tsibanampanëdash. Adsho isun Esusën Nuquin Papa yacno tabadaid chuibanquimbi daicsaido bëdamepanëdash.

¹² Adashic ushë budtsan Esusbëd icquidombo Esusën dayunquio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin chochoquido chuita —capanëdash Esus chuiquin.

¹³ Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidtedtsëqui icsho isunda cho-choquidtedi pemenuquin ëbitedi bedtan, cai? —quecuededpanëdash abëd icquido.

¹⁴ Ambobi tabadsho chido bacuëbobëdtabi tambanenquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac ¹⁵ ambi chiacpadomboen tabadmepanëdash. ¹⁶ Aden tabadmesho isun panëmpi 5tedbëdta nuëcquid daëd sananquin abuc isec: —Mibi bëdambocquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

¹⁷ Aden menebanac piash cubudambic napi uaid san-dobanquin tsitsan 12ted icnuc Esusbëd icquidon bedbampanëdash.

Chuiquid dapa abentsëcquiobi iquec, quiaid
(*Mat 16.13-19; Mad 8.27-29*)

¹⁸ Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

¹⁹ Adoaquien: —Acten mentoanondaaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

²⁰ Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomiaidquio yec Quidistu caid ma mibi neyoc —quepanëdash.

Abi unëste chiaid
(*Mat 16.20-28; Mad 8.30-9.1*)

²¹ Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. ²² Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiaimequido yec quec aitedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

²³ Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmane quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac. ²⁴ Cuesunenu cac unësmane

quiash Esus tantiaquid nebi queboedi Esus tantiesa nebi quequid unēsash Nuquin Papa yacno tabadenquio iquendac. Utsibo, Esus tantiaquid nebi, quiashic abi cuesunenuequiv ic-nuc adecbidi Esus tantiaquid nebi, queoapec. Adquid unēsash Nuquin Papa yacno tabadendac. ²⁵ ¿Atotsieshun Nuquin Papa yacno tabadaid tantienquio yec nidaidën bēdamboec tabadnuequin bedted-bedtede? Mimbi bedaidënquio Nuquin Papa yacno puduedtiapimbo mibi iquec. ²⁶ Esusbēdtabi ambi chiaid tantiaquid nebi nidaidënuësh quetiapimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. ²⁷ Nad iquendac. Tanti-aquiota. Chuinu. Ëbi tantiaquid dadpen yansho ënabicquid utsin-utsinquien isendac —quepanēdash Esus.

Esus bed-bedquesho istiapimbo yaid
(Mat 17.1-8; Mad 9.2-8)

²⁸ Aden chiashic Esus mēdante utsiuc tauadoec ushash Nuquin Papa chiec onquenuc macuësh yacno nidoapanēdash. Petedo, Uan, Acobo aited buanec macuësh yacno Esus nidpanēdash. ²⁹ Adec macuësh yacno nidash Nuquin Papa chiec Esus onquenubi aton bēsbed aton dashcutebēdi nac-nacquio ushë chënquiachimboec icpanēdash. ³⁰ Adsho isnubien badedquio dada utsi daëd choash adquiobidi Esusbēd nidec. Nēidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. ³¹ Aid daëdi Esusbēd tabadquin Nuquin Papan tantiampicpadec Edusaden yacnoshon Esus unēs uate ushë chiec onquecuededpanēdash. ³² Adnubien Esusbēd choboedo abēd icquido 3ted ushcasmash tabadtuidquin Esusbēd utsi daëd nac-nacquiocquid dasiuidachimboec bed-bedquesho isbededpanēdash. ³³ Esusbēd daëd nidtuidsho isash Petedo nadpanēdash: —Nëmbobi iquec bēdambo iquebique. Nëmbobi mibi tabadmenun abentsëc chotsëcnuç shubumpi uanuna, Icho. Abentsëc mitsana, utsibic Moisesën na, utsibic Ediasën na, quequin shubu uanuna —quepanēdash Petedo.

³⁴ Adec Petedo onquenubien abu ushun isadenquiocnoc abitedi bētimpanēdash. Adsho isash Esusbēd choboedo dacuēdpanēdash.

³⁵ Adnubien abu ushunuësh onquec: —Nëidic ëbēd icte bunquidquio, con madombo, ëmbi bēdamboen isaidquio neque. Aidën chiaidquio tantiata —quepanēdash Nuquin Papa Esusbēd icquido tedestedshun isenquiocnobi.

³⁶ Adec onquiash ënēdambi Esusuidtsëqui nidsho abēd icquidon ispanēdash. Adoshombic Esusbēd icquidon ambi isboed utsibo chienquiocpanēdash.

Mayan icsa dapuduedaid madompi
(*Mat 17.14-21; Mad 9.14-29*)

³⁷ Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. ³⁸⁻³⁹ Chochoash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquio sidquianesho aidëmbidi bedshun bëcunedeniac con mado ëcbacushaniosh. Dapuduenenquio icquin con mado aidën uimambo icmedeniosh. ⁴⁰ Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuequin aidon tanac dapuduenenquio iccosh —quepanëdash dada abentsëc Esus caic.

⁴¹ Adoquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash. ⁴² Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

⁴³ Adsho isash: —Nuquin Papan nadatiambocquin naid uinsadpambo iquec —quecuededpanëdash isquido.

Abi unëste chuioaid
(*Mat 17.22-23; Mad 9.30-32*)

⁴⁴ Adoquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

⁴⁵ Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquo tabadcuededpanëdash abëd icquido.

¿Tsutsi chuiquid dapa icpec? quequin chiaid
(*Mat 18.1-5; Mad 9.33-37*)

⁴⁶ Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

⁴⁷ Adoquien Esus tantiaquidquio icquin bacuëmpi chomeshun aton dayunquio tabëcash: ⁴⁸ —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen

nashunquid iquec ëbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquio iquec ëbi chomiondaid, Nuquin Papa tantiaquidquio icoaindac. Nidaidënuësh utsi nashunquidquio icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

Abimbo tantiaquid ëbëd icquid nec quiaid
(Mad 9.38-40)

⁴⁹ Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuec nadposh: “Esus, nadatiambocquin naquidquio mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

⁵⁰ Adoaquien: —Adquid, Padicnuna, cainda. Nadatiambocquin naquidquio Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

Esus bunesabo, Samadia yacnocquido

⁵¹ Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash. ⁵² Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien ⁵³ Esus isadaidbo nec, quequin yuedenquiocpanëdash Samadia yacnocquidon.

⁵⁴ Adoaquien, Acobobëd Uan nadpanëdash: —¿Ënabicquido unësmenuen mimbi nëdëncatequid chome, Papa, quequindambi Nuquin Papa chuipe, Icho? —quepanëdash.

⁵⁵ Adoaquien: —Padicnuna. ¿Matses unësmenuectabi chodio? —quianec ⁵⁶ shubu daëdpactsëc yacno nidoapanëdash abëd icquidobëd.

Esus tsibante bunquidën natequid
(Mat 8.19-22)

⁵⁷ Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

⁵⁸ Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin

Nuquin Papa yacno tabadaid chuibenec nebi —quepanëdash Esus.

⁵⁹ Adoshombic: —Ëbi tsibanta —Esusën caquien utsi:

—Con pa unësacsho chococashun mibi tsibanec nidendabi, Icbo —quepanëdash.

⁶⁰ Adoquien: —Nuquin Papa yacno tabadnu quequin unësaid chococaquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

⁶¹ Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

⁶² —Mibi tsibanu queboedi utsiba tantiec ëbipadquid icti-apimbo mibi icpec —quepanëdash Esus.

10

Abi bëyucanec nidquid 72ted icquido
(Mat 11.20-27; 13.16-17)

¹ Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. ² Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. ³ Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac.

⁴ Ëbi chuibenec nidanequin mitsana buanenda. Mitsana bedtequidbëdta shictoachte buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. ⁵ Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. ⁶ Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac. ⁷ Mibi yuedacnuidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

⁸ “Shubu dadpen yacno mibi choacsho yuedshun pete meniac isuidec, Utsitsen bec cho, quenda. ⁹ Ambobi tabadquin

daicsaid bēdameshun naden chuita: Nuquin Papan Chomiaid abi yacno yuedanquid neque. Aid tantiata, quequin chuita. ¹⁰Shubu dadpen yacno choshon mibi yuedquid nibēdsho isun aton podquedēn nidquin naden chuita: ¹¹Nuquin Papan chomiaid mibi chuinec chobi. Ēbi daēdi yuedenquiocsho mibi chuitiapimbo iquebi. Adoac abi yacno ambi chomiaidēn mibitedi yuedtiapimbo iquendac. Nuquin Papan chomiaid tantiata bunesa mibi icsho isash mibi yacno capuec ēbi tabitacquiaid tabesquenu. Is, quequin ismequin adota –capanēdash Ēsusēn ambi nidmetequad 72ted icquido chuiquin. ¹²Aden chiashic aido chiec abi Esus onquec: –Naid icsabēdtabi naid bēda chuibante ushē chonoc mibi yuedesa Nuquin Papan comapenen cuidendac. Ēbi choabicnuc Sodoma yacnocquido icpampic. Ēbi choabicnuc aidon ēbi tantiatiapimbo icpampic. Adquido Nuquin Papan bēdiactsēc cuidendac –quepanēdash Esus.

¹³Aden ambi nidmetequad 72ted icquido chuibanshumbic utsibo isac bimboen Esusēn nadopanēdash: –Nēbi icquido, shubu dadpen icquid tantiec unēsquiocquin mibi chiembigue. Tantiata. Shubu dadpen icquid Codasin caid yacnoshon ēmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnocquido mibi nec. Aden ēmbi nasho isash ēbi tantiesa mibi icoapec. Ēnden yampido isadaidpembon ēmbi nadatiambocquin nabansho isun, Icsaquid nebi, qeshun unēsquiocnoc shubiquin abi icsaid ēntsempampic. ¹⁴Aden Tido yacnocquidobēdtan Sidon yacnocquidon tantiashun abi icsaid ēntsempampic. Adquido Nuquin Papan bēdiactsēc cuidendac. Isadaidbo Codasin yacnocquidobēd Betsaida yacnocquido ēbi isquido mibitedi nec. Ēbi tantiesa icsho Nuquin Papan mibi comapenen cuidendac. ¹⁵Adecbidi, nēbi icquido, Capednaun yacnocquido mibi unēsash ¿Nuquin Papa yacnoda mibi nidpe? Padenquo. Ēmbi nadatiambocquin nabansho isun tantiesa yec chian anēdēnquiacno mibi nidendac –quepanēdash Esus abi tantiesabo chiacbimboec onquec.

¹⁶Aden chiashic, ambi nidmenu caido 72ted icquido tantiamenuen chuibudec: –Mibitedishun ēbi chiac ēbi tantiaquido utsibo iquendac. Adquiobidi mimbi ēbi chiac ēbi tantiesabo icoaindac. Adomboembidi ēbi chuibansho tantienquo yash ēbi chomiondaid tantiesambo nendac –quepanēdash Esus. Aden chiac ambi nidmenu caido nidanepanēdash.

¹⁷Adec nidanequin Esusēn chiapaden nabeniashic, Bēdambo iquebi, quecuededec Esus yacno cho-choapanēdash.

Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquo dapuduenta ëmbi caidtedi mayan icsa dapuduemposh, Icbo —quecuededpanëdash ambi nidmiaido 72ted icquido ambi naboed Esus chuibanec.

¹⁸ Adoaquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacbimboecnuc bedquetanacbimboec Satanas abucuësh badedquo paëdsho isec niobi. ¹⁹ Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac. ²⁰ Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chome-nuequin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

²¹ Aden chuibanshumbic ambi nidmiaidon chiaid tantiaash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiaash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

²² Aden Nuquin Papa chiec onquequin nainec: —Con pa abia yampid icquin abitedi tantiaquidquo nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquo con pa nec. Adecbidi abëd abia yampid icquin con pa bëdamboen tantiaquidquo nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

²³ Aden iccuededquido chuibanshumbic naden ambi 72ted icquido nidmian choaedouidtsëqui Esusën chuoapanëdash: —Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. ²⁴ Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin

aidon istiapimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

Utsi tantiaquin bëdamboen naquidquio

²⁵ Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atot-simbi napeba? chuibanquin tantiamequidën ëbi chui —capanëdash.

²⁶ Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

²⁷ Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

²⁸ Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

²⁹ Aden Esusën chiac ëbi otacquio icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantiashun Esusën chuimeboed: —¿Mitsicquid con utsi nepec? —quepanëdash.

³⁰ Adoaquien Esus: —Utsi chuinu. Tantiata. Edu-saden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. ³¹ Adoambi, cuestanquin nianaïd uiacno podquedën choquin isadaïdbo tsusion, Con matses nenushe. Isnu, quenquiocquiuano datamposh. ³² Utsibic, Nuquin Papa tabadte shubu uashunaïd nuntan nashunquid choquin, Con matses nenushe. Isnu, quenquiocquiu adembidi uano datanoaposh. ³³ Utsibic, Samadia yacnoësh choquid aid podquedëmbi choquin cuestanquin nianaïd istuidash unësquiocquiu ³⁴ aton dayun tsadbudshun cuestanquin nianaïd chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaïd aton cabayo canandoash aton cabayobëdi nidequi capuquido

puduedmete shubu yacno choash abëdi tabadquin bëdamboen isquin nashumposh. ³⁵ Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ēmbi bēboed ampequidon cuestanquin nianaid bëdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanëdash Esus. ³⁶ Aden chuishumbic: —Ēmbi chuiboed utsi-utsiec icposh. ¿Mitsicquid ampequidon cuestanquin nianaidën utsibimboecquid icposh? —capanëdash Esusën.

³⁷ Adoaquien: —Ampequidon cuestanquin nianaid istuidash unësquio yanquin abi nashumboedien con utsi nec, capendac —quepanëdash Esus chuimequid.

Adoaquien: —Adembidi mimbembi ěmbi chuiboedbimboecnuc utsibo tantiaquin nashunoata —quepanëdash Esus.

Madtan nabanubi Madian tantiaid

³⁸ Adashic, Esusbëd nidequi abëd icquido shubu daëdpactsëc yacno chosho isun anocquid chidon Madta caidëmbi Esusbëdta abëd icquido aton shubun yuedpanëdash.

³⁹ Adoac ambo puduedash tsadquin Esusën chuibansho Madian Madtan chibinguio datsadbudshun tantiapanëdash.

⁴⁰ Adec tsadquin Madian tantianubi Madtan ambi natiadquio yaidtedi tantiaquin nabampanëdash. Aden nabanequi Esus yacno choshon: —¿Con chibin ëbëdtambi nainquiocsho isenquioda mimbi ique? Min utsibëdtan nabanta, cata, Icbo —capanëdash Madtan Esus chuiquin.

⁴¹ Adoaquien: —Mimbi natiadquio yaid dadpen tanti-aquidquio mibi iqueque. ⁴² Ēbi tanti-aquidquio icta. Adquid min utsimbo Madia icsho, Padicnuna. Min utsibëdtan nabanta, catiapimbo iquebi —quepanëdash Esus Madta caic.

11

Nuquin Papa chiec onquianete

(Mat 6.9-15; 7.7-11)

¹ Adashic ushë utsin Nuquin Papa chiec Esus onquepanëdash. Aden Nuquin Papa chiec onquequin nainacsho isun abëd icquidon nadopanëdash: —Nuquin Papa chiec onquianeta quequin Uan padon abëd icquido tantiamapanëdash. Adembidi Nuquin Papa chiec onqueta quequin ëbitedi tantiamequin chuioa, Icbo —capanëdash.

² Adoaquien: —Nuquin Papabëd onquequin naden chuita: “Bëdambocquidquio mibi nec, Papa.

Adquid mibi icsho matsesedishun mibi con icbo capashun,
Papa.

Mibi yacnoshon mimbi uaido mayan bëdabon mimbi chiac-
padomboenuidi naic.

Adomboembidi matses abitedishunquo napashun, Papa.

³ Tantiaquidquo, mibi cadoque. Bumianenquiocquin ba-
diadquidën-badiadquidënquien con pete ëbi bedmedene,
Papa.

⁴ Adecbidi utsin ëbi chieshënsho cuidenquo yec ëbi abi ic-
said bëpiscudacpadquiequi ëbi icsasho cuidenquo yec
bëpiscudoata, Papa.

Adembidi, Satanasën icsa uanushe qeshun ëbi cudasquin
dayun uata, Papa, quequin chuïta”

—quepanëdash Esus.

⁵ Adtanequic Esus nadpanëdash: —Mibëd nashunanquid
iquec. ¿Adquid icnuda inchëshpotsembo abi yacno nidshun
pete mimbi bedshumpatsia? ⁶ Inchëshpotsembo pete bed-
shunuec mibëd nashunanquid yacno nidash: ‘Ëbi yacno utsi
chosho pete nibëdnubi yuedombi. Con pete nibëdsho isash
pemenun bedec chobi. Mimbi meniaid cuidquin adquidi
mibi meneoaimbi,’ quepatsiac mibi mibëd nashunanquid
caic.

⁷ “Adoquien, nuntanuëshi: ‘Padi. Shëcnandombi. Con bacuë
ishcunec din ictoshon mibi menetiapimbo iquebi,’ quequin
mibëd nashunanquidën mibi chuitsiash.

⁸ “Aden aidën chiaqui min pete nibëdnuc chuidonetsiac
mimbi. Aden chuidoniac mibi menetsiash. ¿Abëd nashunan-
quid icshoda mibi menepadic? Padenquo. Mimbi niden-
quiocquin chuidonesho tantiashun mimbi chuiboedtedi mibi
menepatsiash —quepanëdash Esus.

⁹⁻¹⁰ Aden chiec abi onquec: —Adomboembidi Nuquin
Papa chuidonesho mimbi bedtiadquo yaid aidëmbi mibi
bedmendac. Adembidi, Nuquin Papa tantianu quequin
abi chuidonesho mibi tantiamendac. Adembidi, abi
chuidonesho Nuquin Papan aton Mayan mibëd tabadmiac
aidën Nuquin Papa mibi tantiamendac.

¹¹ “Adembidi chuinu. Tantia. ¿Min mado, Nuëcquid
bec cho, qeshoda mimbi nisimbo menedi? ¹² Adembidi,
¿Cachinan bacuë bec cho, qeshoda mimbi chichun menedi?

¹³ Padenquo. ¿Aden icsaquid icquin min bacuë tantiaquin
bëdamboen menequid mibi icnuc Nuquin Papa icsaisa icquin
mibi, Min Mayan ëbi mene, qesho tantiashun menenquïoda
mibi ictic? —quepanëdash Esus.

Bedtsibun namiaid Esus nec, quequin chiaid
(Mat 12.22-30; Mad 3.19-27)

¹⁴ Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduempañdash. Adec dapuduenan ambi eme uaid onquepañdash. Adsho isash tantiadempambo yec iccuededquid dadpen tabadcuededpañdash. ¹⁵ Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepañdash Esus chieshënquido.

¹⁶ Adnubien iccuededquid utsibo: —Nuquin Papan chomiaidquio icquin Nuquin Papa mimbi chiac aidëmbi abuschun naquin ëbi isambo yaid nadatiambocquin ismepatsiashi. Aden mimbi Nuquin Papa chiac aidën nadatiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepañdash iccuededquid utsibo Esus caic.

¹⁷ Aden chuisho tantiash tantiaquidquio yec abi icsamboen chuimenuquido chiec Esus nadpañdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. ¹⁸ Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiatic abëd icquido nibëdenquioda ictic? ¹⁹ Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? ²⁰ ¿Nuquin Papan tantiamiac mayan icsa dapuduemequid ëbi yec ambi chomiaidquio matses chuiquid dapa mibi yacno ënden choabida ictio? —quepañdash Esus abi chuimequido chiec.

²¹ Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. ²² Aden namiatic tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepañdash Esus.

²³ Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepañdash Esus.

*Abibi dapuduemboed mayan icsa dapuduedoaid
(Mat 12.43-45)*

²⁴ Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquio icposh. Adquid istuidambo yec, Abibidi dapuduedoanu, quianec anobidi nidoaposh. ²⁵ Adec nidshun abi dapuduemboed naden istuidposh. Mayan icsa nidan, Ēbibi bëdambo iquec. Adash bëdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemboed choshon aid abentsëcquio ²⁶ istuidashic nidoashun abipadquid chuituidac utsi 7ted abëdi choash abitedi dapuduedcuededac dada icsamboshë yamposh — quepanëdash Esus.

²⁷ Aden Esusën chiambien iccuededquid chido: —Mibi tishacsho shuma chishmiondaid Nuquin Papan bëdamboen isaid icpec —quepanëdash Esus caic.

²⁸ Adoaquien: —Aden nasho padenquio. Nuquin Papan chi-aid tantiashun nabansho Nuquin Papan bëdamboen isaidquio nec —quepanëdash Esus chido caic.

Onasën ismiampicpaden ismiaid
(*Mat 12.38-42; Mad 8.12*)

²⁹ Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquio iquendac. Nuquin Papan Onas ismiampicpaden ismiaid mimbi isendac. ³⁰ Ninibe yacno nidshun ambocquido icsaid cuidte Nuquin Papan chuimiapcaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnoquidon ëmbededpampic. ³¹ Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquio nëmbobi iqueque. Ēmbi chiaid tantiata. ³² Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnoquidon Onasën chiaid tantiapadomboen Nuquin Papan chiaid abimbo iquec, quequin tantienquio icsho Nuquin Papan mibitedi isendac. Nuquin Papan chuimiapcaden Onasën chuisho Ninibe yacnoquidon tantiabededpampic. Onas Nuquin Papan matses icsaid cuidte

chuimaidquo icpampic. Padnuen mibi icsaid bedshunash abided cuidadtequid nēmbobi iqueque. Ĕmbi chiaid tantiata —quepanēdash Esus abibi chiadequi.

Tabote taboshon bētashenquo yacimboec abi bēdamboec tabadaid ismequid

(*Mat 5.15; 6.22-23*)

³³ Aden chuishumbic Esusën abi chuibanec: —Tabote taboshon ompoesa. Adembidi matsun bētashesambo icbo nec. Ma ěmbi yuedaidon isnueshun tabote nēnantan nanguid. ³⁴ Adoaidbimboec min tantiata iquec. Min tantiata bēdambocquid icquin bēdamboec tabadquin ismequid mibi nendac. Bētashacimbboec min tantiata icnuc icsamboen ismequid mibi nendac. ³⁵ Con icbo ěbi bednuec choec queshun bēpiscudenquiocquin isted-istedta. ³⁶ Min tantiata icsaisa icsho Nuquin Papan chiapadomboen tantiaquidquo aidi nec, quequin utsibon mibi isendac —quepanēdash Esus.

Nuquin Papan icsamboen isaidquo

(*Mat 23.1-26; Mad 12.28-40; Duc 20.45-47*)

³⁷ Aden Esusën chuibanshobien padiseyobo abentsēcshun: —¿Ada ěbi yacno pec nidtsia? —capanēdash. Adoac aidbēdi nidash pete sanaid cueste dayunquo Esus tsadbudpanēdash. ³⁸ Adec Esus tsadsho isash, ¿Adpecshenda iquec. Penush mēpamēdenquo Esus icpec? quec abibi onquequin padiseyobon Esus yuedquidēmbi tantiapanēdash.

³⁹ Adoquien, tantiaquidquo iquec Esus nadpanēdash: —Ĕndenquimbo padiseyobon peshun acnun dēshote cachocbēdtabi pada-padaid cachoc bēdamboen dapanta quequin chuinēdacpaden mimbi naoaic. Aden dapanshun mimbi codocaidbēdtabi mimbi actequid nitsinaid anauc ampanenquo mimbi icpec. Mibitedi adquo iquec. Nesquin bēchish uquec dapanudquin mimbi tantiaid icsa ěnenquo mimbi icpec. Adecbidi, mibi bunaid bednuen icsamboen naquin ampequid mibi nec. ⁴⁰ Nuquin Papan chiaid tantiesabimboecquid mibitedi nec. Nuquin Papan matses uaquin dadabēdtabi tantiata uainquioda icpampic. ⁴¹ Ai. Adquid icnuc aton na nibēdquid tantiaquin mimbi pada-padaidēn nitsinaidpadquid menebanta. Aden mimbi nadenesho isun Nuquin Papan min tantiatebēdta min dada bēdamboen isendac —quepanēdash Esus.

⁴² Aden chiashic padiseyobo caic Esus nadpanēdash: —Uno bedanquin dies yacno ěnquin min tiedēn caniquid ěshē tambanshun, Nuquin Papan chiapaden con na 9ted icnubi abentsēc Nuquin Papan na nec, quequin aid abentsēc menenuequin mimbi dayun uaic penquiocquin. Aden nabanquin Nuquin Papan ambi matses bēdamboen tantiaquin

nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsëc menebanshun utsibo bëdamboen tantiaquin nabantiadquidi mibi neyoc. Adesa icsho Nuquin Papan icsamboen isaidquio mibi nec, padiseyobo. ⁴³ Adembidi, tsusio dapabimboecsho bëdamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adomboembidi tantiec matses iccuededacno nidequi, Èbi bëquedquidon èbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquio mibi nec. ⁴⁴ Adembidi, matses unësaid chococate manenushe queshun ismequin mabiunu, quenquio yacpadomboen èbi icsaid tantianushe quequin ompoquid mibi nec —quepanëdash Esus padiseyobo chiec.

⁴⁵ Adoaquien, Nuquin Papan naden nata quequin chiaid tantiemi, quiash utsibo tantiamequid abentsëc: —Padiseyobo chuiquin èbipadquido mimbi chuioapec —quepanëdash.

⁴⁶ Adoaquien: —Nuquin Papan èndenquimbo naden nata quequin chiaidbëdta mimbi naden nata quequin chiaid dadpen chuibanquin matses mimbi namec. Adoac aited matsesën natiapimbo icpec. Adsho isash, Mimbi natequid dadpen iqueque. Mibi nashunu, qesa icsho Nuquin Papan icsamboen isaid mibi nec.

⁴⁷ “Adembidi, Nuquin Papan chuimiaid dadpen min tsusedpabon cunesunepampic. Tsusedpabon cunesuniampido ènenquiocquin tantianu quiacimboen mimbi shubumpi uabanec. Èmbi shubumpi uaido isun utsibon bëdamboen ispashuni, quequin aden mimbi nabanec. ⁴⁸ Aden naquin tantiec, Nuquin Papan chuimiaido cunesunequin bëdamboen tsusedpabon napampic, quiacimboen tantiaquid mibi icnuc ambi chuimiampido cunesuniampidobimboecsho Nuquin Papan mibi isec. Nuquin Papan icsamboen isaidquio mibi nec. ⁴⁹ Èmbi chiacpaden chuibanta, cabicquin naden Nuquin Papan chuipampic. Èmbi chuimiaid utsi-utsien aton matsesën mëyampec. Utsi-utsien mëyanshun cunesuneppec, quec Nuquin Papa abitedi tantiaquidquio adpampic. ⁵⁰ Aden min tsusedpabo Nuquin Papan chuimiaidon chuisho tantiesa icquin aido mëyampampic. Min tsusedpabopadquid nèbi icquido icquin Nuquin Papan chuimiaid tantiesambo mibi nec. Adquido iquec ènden mëyanampidpadquido mibi neoaic. Aido cunesuniampidpadquido mibi neoaic. ⁵¹ Tsusedpan abia abed cunesunepampid icnubi ambi tsyuec Sacadias cunesunepampic. Aid Nuquin Papa tabadte shubu uashunaid

dayunquiobi aidon cuesunepampic. Ai, Nuquin Papan chiaid tantiesatedi ambi chuimiaido cuesuniampidpadquido nëbi icquid neoaic.

⁵² “Nuquin Papan naden nata quequin chiaid tantiembi, qeshun utsibo tantiamenquiocsho Nuquin Papan icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

⁵³ Aden chiashic, Ëbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënquidombo padiseyobo: —Esus icsamboen chuimenu —quiampanëdash. ⁵⁴ Adquid icquin Esusën chuibanacno nidaneshun chuimeoanuequin naden padiseyobon tantiapanëdash: Ëbitedishun chuimiatic Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomiaid nec, quec mibi muasho tantiashun, Unës uametiadquo iquebi, quequin Esus chiembi, quequin tantiaquin Esus chuimepanëdash padiseyobon.

12

Natiamiantequidbëdtabi dayacmetequid (Mat 10.28-31)

¹ Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquoio yec tabadpanëdash. Aido tsucus-tsucustsëcquoio yec tabadnubien abëd icquido Esusën nadopanëdash: —Sicaid nami uaid cabiunac amëec bidisquedoec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. ² Matsesën ompoquin naid Nuquin Papan abitedi ismendac. Matsesën ompoquin chienquoio yaidbidi abitedi tantiamendac. ³ Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

4 “Adembidi chuinu. Tantiata. Mibi cuesunenuequivu dacuëdënenda. Adquidën mibi cuesunequin mibi nibëdametiapimbo iquendac. 5 Nuquin Papauidsëqui dacuëdënta. Icsadednequivu icsho aidën mibi cuesunemeshun chian anëdënnequivu nësecaindac. Adoanquiduidtsëqui dacuëdënta. 6 Nuquin Papa tantiaquivu yec dacuëdenda. Nuquin Papan ambi uaidtedi tantiec. Padichucu dadpen icquivu abentsëc cueso isun aid Nuquin Papan tantiapec. ¿Adquid tantiaquina Nuquin Papan mibi tantienquiu ictic. 7 Ai, mibi tantiaquieci. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

Esus tantiaquid nebi, quequin utsibon tantianubi chiaid
(Mat 10.32-33; 12.32; 10.19-20)

8 “Abi chiembique. Tantiapiota. Utsibo icnubi Esus tantiaquivu nebi, quequin abimbo chuiquivu Nuquin Papa yacno chosho isun, Nëid ëbi tantiaquivu neque. Puduedme, quequin chiendambi. 9 Adecbidi, utsibo icnubi, Esus tantiaquivu nebi, quetiapimbocquivu Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bëdabo chiendambi. 10 Èbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Èmbi mibi icsamboen chienquiu yacnimboeci bëpiscudta, Papa, quesho tantiaquivu aidën icsamboen chienquiu yacnimboeci Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequivu icpec. Aidën chiaid bëpiscudenquiocquin Nuquin Papan abi yacno adquid yuedenquiu iquendac.

11 “Adembidi chuinu. Tantiapiota. Mibi chieshënquido iquendac. Adquid icquin chuiquivu dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquivu dapa chuipe? quequin tantienda. 12 Nuquin Papan Mayanën mimbi chuibante mibi tantiaquivu —quepanëdash Esus abëd icquido caic.

Aton na dadpen icquidën tantiaid icsa

13 Adashic, abi datsidadquivu abentsëcshun: —Con pa unësan con pan na dadpen con buchin bedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

14 Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. 15 Aden aid

chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquoio mibi Nuquin Papa yacno puduedtiapimbo iquendac.

16 “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: 17 ‘Con tiedën caniquid bacuë dadpen iqueque. ¿Atontsimbimbi aitedi dayun uapeba? 18 Naden naimbi. Tiedën caniquid ëshë dayun uate shubu shënitedi chicbanshun aitedi nuamboshëcnuc shubu uabannuna. Aden nuamboshëcnuc shubu uashun aidënquoio con tiedën caniquid bacuëtedi sandoshon dayun uanuna. 19 Aden dayun uashumbic nadopembi: Con na dadpen iquec yuecash naimëdenquoio iquec. Ad icnuc nainquoio yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onqueposh.

20 “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh — quepanëdash Esus.

21 Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unësash Nuquin Papa yacno tabadtiapimbo iquec —quepanëdash Esus.

*¿Atotsimbi napeba? quesa icta, quequin chiaid
(Mat 6.25-34)*

22 Aden iccuededquido chuishumbic Esusën abëd icquido nadopanëdash: —Aton na dadpen icquidën tantiacpaden tantienda. ¿Con na nibëdnuc atotsimbi pepeba? quec dacuëdenda. Adecbidi, ¿Atotsimbi dasiuidpeba? quec dacuëdenda. 23 Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda. 24 ¿Uicchunënda ambibi cuëte ëshë siac bacuëacsho chepadic? Padenquoio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquoio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? 25 Adecbidi, ¿mibi unëste ushë abimbo chonoc, Padi, quepecta mibi icti? Padenquoio. 26 Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

27 “Adembidi, cuëtempo chuinu. Tanta. ¿Cuëtempinda aton bacuë ictequid daëdcapec? Padenquoio. Adoenuquoio yaid aton bacuë ictequid bëdaidquoio iquec. Cuëtempo bacuë ictequid bëdaidquoio yapadquid chuiquid dapa Sadomonën dashcute

adquo ictiapimbo icpampic. ²⁸ Padnuen cuëte bacuë ictequid bēdaidquo icboedi badedquo sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquo ictsiash quequin Nuquin Papa bēdiactsēc tantienda. ²⁹ Aden tantienquo yec ¿Atotsimbi peshun aque? quec dacuëndenda. ³⁰ Nuquin Papa tantiesan abi bunaiduidi tantianubi Nuquin Papa tantiaquidquo icquin pete actequidbēdta èbi bedmedonec, quequin tantiec tabadta. ³¹ Adembidi, Nuquin Papabēd tabadnu quequin tantiec tabadta. Aden tantiaquin mimbi bedtiadquo yaid mimbi bedendac.

Abi yacno choacsho meniaid
(Mat 6.19-21)

³² “Nuquin Papan abi yacno mibi chomeque. Dacuëndenda, èbi tantiaquido caimbi. ³³ Ambo nidabi icquin mitsana menebanquin mitsana bedtequid bedshun aton na nibēdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidēn bedtemaidquo iquendac. Capishton petemaidquo aid iquendac. ³⁴ Mimbi tantiaidquo mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bēdamboec tabadte cudasquin mimbi dayun uaid iquendac —quepanēdash Esus.

Chieshenquiocquin caintequid
(Mat 24.45-51)

³⁵⁻³⁶ Aden chuishumbic Esusën nadopanēdash: —Aton icbo u isec nidan con icbo chonoshe quiash dasiuidacchobi ushenquiocquin tabote dēbedtonequin, Con icbo chosho puduedmeshun nashunu, quequin aton yuabon caimpec. ³⁷ Aden abi cainquido aton icbon bēdambo icmequin nadopec: “Èmbimbo mibi pemenu. Nēmbo tabadec cho,” queshun ambi yuaido icbonquo pemequin bēdambo icmendac. ³⁸ Adembidi, icbo inchēshpotsembo choshon abi nashunuequin cainquido icsho icbon bēdambo icmiaido iquendac. Adembidi, cachina cuēdanabi badiadabicnuc choshon abi cainquido icbon bēdambo icmiaido iquendac. ³⁹ Adquidpenquo icbo utsi chuinu. Tantia. Aidi abi cainquid nibēdnubi aton na icnuc isedtanec choshon isac ampequid ènden nidac. Adsho isash, Ampequid choec, quequin tantiaquid yec nidenquo ictsenobi, quependac icbo. ⁴⁰ Adquiecbidi ampequid choacbimboec Nuquin Icho choeque. Ad icnuc, Chosho èmbibi tantienquiocchitomane queshun chieshenquiocquin èbi cainta —capanēdash Esusën.

⁴¹ Aden Esusën chuisho tantiash Petedo: —¿Utsi chuiquin mibëd icquidoudi tantiamenuenda chio? ¿Abitedi tantiamenuenda chio? Tantaranu. Ëbi chui —quepanëdash Esus caic.

⁴² Adoaquien: —¿Icbon chiac mitsipadquiocquin ambi namiaido bëdamboen napeba? Adquid chuinu: Pete tambanshun musucshun ëmbi namiaid utsitedi bëdamboen menebanta, quequin ambi namiaid utsi abentsëc chianec icbo nidac. ⁴³ Adec nidashic choshon ambi chiacpaden ambi namiaidën chieshenquiocquin nabanacsho isun icbon bëdambo icmiaid nendac. Adquid naden chuipec: Ëbi nidan chieshenquiocquin mimbi nabanoque. ⁴⁴ Ëmbi namiaid utsibotedi ëbipadquiocquin chuiquid icta. Adquid icquin con natedi dayun uata, quequin chiendac icbon. ⁴⁵ Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshënquin cuesbanshun ambentsëqui nua peshun tantienquio yanquin aquec. ⁴⁶ Aden nabanquin tantienquiocnoc aton icbo choshon ambi namiaidën icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

⁴⁷ “Adembidi, ambi chiacpaden nabanesa icsho isun, Comapenen cuesta, icbon cac cuesendac. ⁴⁸ Aton icbo bunaid tantiabicquidën cuesmetiadquiocquin nabansho aton icbon bëdiactsëc cuesmendac. Adembidi, Nuquin Papan dadpen tantiamiaido ambi chiacpaden nashuntiadquio iquendac. Adembidi, icbon dadpen meniaidon dadpen meneoatiadquidi nendac —quepanëdash Esus.

Utsibëd bëdamboec tabadnu quesa icquin cuëshëdmequid (Mat 10.34-36)

⁴⁹ Aden chiashic abi onquec: —Ëbi tantiaquid icnuc ëbi tantiesa yec cuëshëdendac. Aido ënden cuëshëdondan ëbi tantiaquidombo bëdamboec tabadtsiandac, quec tsadebi. ⁵⁰ Adecbidi, Yuecshun ëbi unës uanun mëyantequid iquendac, quequin tantiec, Ënden mëyanondaid iquec abuc Nuquin Papabëd tabadtsiandabi, quec tsadebi. ⁵¹ ¿Nidaidënsnun abitedi bëdamboen tabadmenu quectabi chodionda? Padenquio. Ëmbi chiaid tantiesa ëbi tantiaquidbëd icboedi cuëshëdtsiash quianec chopondabi. ⁵² Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuëshëdec adquid. ⁵³ Nadec cuëshëdtsiash: aton papa ëbi tantiaquid icnuc con papadquid icnu quesa aton mado cuëshëdendac. Shubu utsin aton mado ëbi tantiaquid icnuc aton papa adquid icnu quenquio yec cuëshëdendac. Adecbidi aton tita ëbi tantiaquid icnuc con tapadquid icnu quenquio yec aton champi cuëshëdendac. Shubu utsin,

aton champi ëbi tantiaquid icnuc aton tita padenquio yec cuëshëndendac. Shubu utsin aton chaya ëbi tantiaquid icnuc aton babanën padenquio yec cuëshëndendac. Shubu utsin, aton babanën ëbi tantiaquid icnuc aton chaya padenquio yec cuëshëndendac —quepanëdash Esus. Abi tantiesa cuëshëdtequid chuibanec.

Nuquin Papan ismianta isun nad iquendac, quequin tantiaid (Mat 16.1-4; Mad 8.11-13)

⁵⁴ Aden abèd icquidombo chuishumbic Esusën naden iccuededquido chuiopanëdash: —Inchësh chosho isec, Ue choec, quiacpadec choec. ⁵⁵ Adecbidi, ushë chënquec chosho isash, Chumbo yampec quiacpadec iquec. ⁵⁶ Aden isquin mimbi ëmbi nidaidënshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

Utsibëd chushcananquid (Mat 5.25-26)

⁵⁷ Aden chiashic: —Utsibëd chushcananquido mibi nec. Adece tabadec ¿atotsi quiash, Naden natiadquidi nebi, quequin tantiashun mibi icsaid ënenquio ique? ⁵⁸ Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. ⁵⁹ Aden nauedaqui mimbi icsamboen naboed cuidnante meniabicnuc quënë yacnoësh mibi puduentiapimbo iquendac —quepanëdash Esus.

13

Utsibo unësmiacpadec unësmemane quequin mibi icsaid ënta caid

¹ Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantia. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intacbëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanëdash Esus chiec.

² Adoaquien: —¿Cadidia yacnocquido utsitedi icsaid daëdpactsëc icnuc cuesunemiaido icsaid dadpen icsho aido cuesunemias, quequinda mimbi tantiape? ³ Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe queshun. ⁴ Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaïd uebudquin abëd icquido 18ted cuesac unësosh, quiosh. ¿Edusaden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequinda mimbi tantiape? ⁵ Mimbi icsamboen tantieque. Utsibo unësacpadec unësmene quequin mibitedishun mibi icsaid ënta —capanëdash Esusën abi chuimeboedo chuiquin.

⁶ Aden chuishumbic utsitsen chiec: —Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. ⁷ Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuec choidobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

⁸ “Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshtatanquin seta abentsëc matamequin nidaïd chëshë chodquiaïd ëbi bëdamboen tasi-ameta. Adoac bacuëtsias. ⁹ Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh —quepanëdash Esus. Ëmbi tantiacpadec tabadenquiocboedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

Cashuebudaid bëdamiaïd

¹⁰ Adashic, chonoadtemaïd ushën Nuquin Papan chiaïd chuibante shubun puduedshun Nuquin Papan chiaïd Esusën tantiamenubien ¹¹ seta dadpen 18tedi matamequin mayan icsan shuabudaid icpanëdash. ¹² Adquid icsho isun Esusën: —Shuabudaid icboedi nëbi cacueoaid mibi iquendac, chido —cashun ¹³ mishac cacuiash, Nuquin Papan nadatiambocquin naïd nec, quequin chiec chido onquepanëdash.

¹⁴ Aden chonoadtemaïd ushën Esusën chido bëdamesho isun Nuquin Papan chiaïd chuibante shubu isquidon: —Nëïd ushë chonoadtemaïd ushë neque. Bëdamenu quequin nëïd ushënquio bëdamenda. Chonoadtequid ushënquio bëdameta —capanëdash iccuededquido chuiquin.

¹⁵ Adoaquien Esus: —Mimbi chiacpaden naisa mibi neyoc. ¿Chonoadtemaïd ushë icnuc, Con yua acte acmebono queshun mimbi yuaïd tënëshacchobi acte yacno buanenquioda mimbi

icpe? ¹⁶ ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

¹⁷ Aden Esusën chuisho tantiash, Adenda, quequin bëdamboen chiombi, quetiapimbo yec otacquo tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

Cuëte ëshëmpi chiaid

(Mat 13.31-32; Mad 4.30-32)

¹⁸ Adashic: —¿Nuquin Papan shubun icquido mitsipadquidquo icpec? ¹⁹ Nadquidquo iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochuquidën shubu uabededec. Adquiecbidi, Nuquin Papan chiaid chuisho tantiatsëcquidën tantiabenash bëdambocquid icsho isash matses utsibo ëbi tantiaquid Nuquin Papan shubun icquido dadpen yanec —quepanëdash Esus.

Sicaid nami uaidpadquid

(Mat 13.31-33)

²⁰ Aden chuishumbic utsitsen chuioaic: —¿Nuquin Papan shubun icquido mitsipadquidquo icpec? ²¹ Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adombombidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

Pudued-puduedtequid shëcuë pistsëcquio chiaid

(Mat 7.13-14, 21-23)

²² Adashic, Edusaden yacmi nidoaquin shubu dadpen icquid utsi-utsiec yacno isbidanquin shubu daëdpactsëcquid utsi-utsiec yacnotsen isbidanoquin anocquidotsen tantiamenuen chuibenenu, quec Esus nidpanëdash. ²³ Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tantuanu. Èbi chui.

Adoquien Esusën nadopanëdash: ²⁴ —Nuquin Papa yacno pudued-puduedtequid shëcuë pistsëcquio iquendac. Esusquo tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, ²⁵ Nuquin Icbon, Èbi yacno puduedte ushë naimbudosh, caqui cho-choshon, Èbi puduedme, quequin comapenen cuëmbededpec.

“Adoaquien: ‘Ëböd icquidpenquoio mibi neque. Mibi puduedmetiapimbo iquebique. Miböd icquido yacno nidtan,’ caindac Nuquin Icbon adquid.

²⁶ “Adoaquien: ‘Mibödambi peshun acbededombi. Ëbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuippec.

²⁷ “Adoaquien: ‘Icsaquido mibi neque. Nëmbo puduedenda,’ quepec Icho. ²⁸ Aden chiaqui Abadauan yec Isac yec Acoho yec quec Nuquin Papan chuimiaido aidtedi Nuquin Icho yacno tabadsho isash abi tantiesadatiapimbo yec chian anödênquiacno tabadec shubiquiec, Nuquin Papa icsambo iquec, quec nëishpec. ²⁹ Nuquin Papa yacno abi tantiesapuduedtiapimbocnobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. ³⁰ Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac – quepanëdash Esus.

*Edusaden isash anocquido Esus unësquiqtequid
(Mat 23.37-39)*

³¹ Aden Esusën chuibanquin naimbudnubien padiseyobo utsi-utsiec cho-choshon: –Ancanquid Edodes mibi cuesunemete bunecque. Nëuëshquio nidec nid –capanëdash Esus chuiquin.

³² Adoaquien: –Edodes cuesunemenuecbimboec onquequidquio nec. Aid yacno nidshun naden chuita. Nëbi mayan icsa dapuduemequin utsibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquin adomboembidi nabanoaimbi. Adobanquimbi naimbudembi. ³³ Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita –capanëdash Esusën.

³⁴ Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: –Nuquin Papan chuimiaido cuesunequido mibi nec. Adembidi, Nuquin Papan mibi yacno chomiaido cuënoten se-sequido mibi neoaic. Ëbi tantiaquid icmenu, quequin chuideniombi. Cachinan, Con bacuë chieshënquid choec, qeshun nua shoccotsëcshun aton bacuë cudasquin mabësec aton podon. Adembidi: Mibi chieshënquid choec, qeshun mibi cudasquin chuibanombi. Aden chuisho tantiatiapimbo yec mibi tabadpoc. ³⁵ Adquido

yec nēbi min shubun icquido cudasquid ēbipadquid nibēdec. Nad iqueque. Tantia. Mibi chieshēnec cuesunenuequido choabicnuc ēbi nidacsho yuen ēbi isenquio mimbi iquendac. Yuecash abucuēsh choasho isash, Ambi chomiaid Nuquin Papan bēdamboen isaidquio nec, quequin tantienquiochoedēmbi tantiendac —quepanēdash Esus Edusaden uano icnuc Edusaden yacnocquido tantiamequin chiacbimboec onquec.

14

Padiseyobon shubun Esus puduedash tabadaid

¹ Adashic, chonoattemaid ushē utsin padiseyobo tsusio dapa isedec Esus puduedsho isun, Nēid ushēn natemaid icnuc Esusēn bēdamenushe queshun isnuequin padiseyobo utsibo tabadquin caimbededpanēdash. ² Aden caimbedednubien podo nidte chedo bidisquiaid uano tsadsho isun Esusēn: ³ —¿Chonoattemaid ushēn daicsambocquid bēdamenquiocte ushē nec, quequina mimbi tantiape? —caquien ⁴ abi caimbededquido otacquio tabadcuededpanēdash. Adec aido otacquio tabadcuedednubien podo nidte chedo bidisquiaid dada Esusēn bedshun bēdameshun: —Nidec nid —cac bēdambo yec nidpanēdash.

⁵ Aden aid nidmeshun abi bēdamenushe quequin caimbededquido caic: —¿Chonoattemaid ushēn nua uēdēshcaidēn min baca ampaēdacsho isun badedquio bedtanquin indoenquioda mimbi ictsia? —quepanēdash Esus. ⁶ Aden chuisho tantiash adquiobidi otacquio tabadcuededpanēdash.

⁷ Adashic, tsusiobon dayunquio tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusēn nadopanēdash: ⁸ —Pec cho, cac choshon tsadte bētinenda. Tsadte mimbi bētinambien shubu icbon ambi pec cho caid utsi mibi chuiquid tsusio chosho ⁹ isun: “Chuiquid dapa choeque. Uano tabadad,” icbon cac icsamboen naombi quiash natiaic uano tsadpec mibi. ¹⁰ Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nēmbō, chuiquidbēd tsadec cho,” capec mibi shubu icbon. ¹¹ Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanēdash Esus abēdta yuedaido caic.

¹² Aden aido chuishumbic abi yuedquid Esus nadpanēdash: —Pemenu, quequin mibēd icquid mīn utsibo aton na dadpen icquidoudi pec cho cainda. Aido pemiac, mibi pec cho caoic. ¹³ Pemenu, quequin aton na nibēdquido, daic-saidobēdta bēshuaido pec cho cata. ¹⁴ Adquido mibi cuidquin

pemetiapimbo iquec. Adquido pemiash, Bëdambo iquebi, mibi quepec. Nuquin Papa yacno nidash puduedsho ambi bëdambo icmiaid mibi iquendac —quepanëdash Esus abi yuedquid caic.

Nuquin Papa yacnoshon pequido

¹⁵ Aden Esusën chuisho tantiash abëdtan pec tsadquid abentsëc: —Nuquin Papa yacno nidshun abëdtambi pec bëdambo iquebi —quepanëdash.

¹⁶ Adoaquien aidi tantiamenuen utsi chiacbimboec Esus nadpanëdash: —Yuednu, quequin nadënquio pec chota, quequin ambi yuedtequid dadpen chuiposh. ¹⁷ Ambi chiacpadën ushë chonoc: ‘Ëmbi chuiboedtedi pec cho quequin chuitanta,’ cac aton yua nidposh. ¹⁸ Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaïd abentsëc nadposh: ‘Ëmbi sëuëmboed dëdabi nidtiapimbo iquebi,’ queposh.

¹⁹ “Utsibic: ‘Baca bedshun, Bëdamboen nimbanquina buaneque. Isnu,’ qeshun isedtanenquiocquin ambi bedboed nimbameposh.

²⁰ “Utsibic: ‘Con chido bedombique. Nidenquio iquebi,’ queposh.

²¹ “Aden chuisho tantiash nidshun aidon chiacpaden aton yuan icho chuioaposh. Adsho tantiash nëishun icbon: ‘Ëmbi isedacmaido yacno nidshun, Pec cho, cata. Aton na nibëdquidbëdta daicsaid, bëshuaïd chedo chuitan,’ cac aton yua nidposh.

²² “Nidshun chuitanec aidobëdi choshon, ‘Mimbi chui-boedo bëombi. Aïdo icnubi abi tabadte iquec,’ queposh yua.

²³ “Adoaquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna. ²⁴ Abia ëmbi pec cho caïdon ëbëdtambi petiapimbo iquendac,’ queposh icho —quepanëdash Esus.

Esuspadquio ictequidquio

²⁵ Adashic, nidsho matses dadpenshun tsibanac abi choacmi bidiadshun isec Esus nadpanëdash: ²⁶ —Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. ²⁷ Unësmane quiash mëyanac

dayactiapimbocquid ëbipadquio ictiapimbo icoaindac — quepanëdash Esus.

²⁸ Aden chiec Esus abi onquec: —¿Shubu uanu, queshun abia shubu uaid isec, Nëidtenquio nanu, queshun aitedquio-bidi bëshun toccashun shubu uainquioda icpec? ²⁹ Aden tantienquiocquidën abentse-abentsen bë-bëtsëcquin baded naintiapimbo iquec. ³⁰ Adsho isun utsibon mamënsyumpec. Bëdamboen isun shubu uaquidpadquid, Esuspadquio icnu, queshun ëmbi chiaid bëdamboen tantiabenash adquiobidi icpec. Èbi tantiauidtsëcquid ëbipadquio ictiapimbo iquec.

³¹ “Adembi chuinu. Tantiata: ‘Mibëd icquidobëd cues-nanuec chuiquid utsi nëmbo cho-choec,’ quesho tantiashun nëmbobi icquido chuiquidën naden tantiapec: ‘Èbëd icquido daëdpactsëc iquec. Aitedtsëqui iquec dayacquiocquid icquin chuiquid utsi abëd icquido cuemepec, queshun ma chobono,’ quequin caimpec. ³² Padnuen, abëd icquido dayactiapimbo icsho isun chuiquidën: Chuiquid utsi bëquedtanta. Bëquedshun, Mibëdi ictsiabi. Èbëd icquido chuiquid icta, ëbi chuiquid quiosh, quequin chuita, quequin chuiposh. ³³ Adembiidi ëbipadquio icnuequidon bëdamboen tantiata. ¿Èbi chuiquid Esus nec, quequin ambi chiacpadendambi nabampeba? Ai, adonona, queshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

Sa batapentsëcquiocquid
(*Mat 5.13; Mad 9.50*)

³⁴ Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? ³⁵ Padenquio. Secatequid adquid nendac. Adecbidi Esuspadquio icnu quiash ëbipadquio yanesa chian anëdënquequid nësiatequid nendac. Adquid ictiapimbo iquebi, quequin, Tiantianu, queshun tantiacpadomboen nabanta —quepanëdash Esus.

15

Obeca abentsëc bënudtequid
(*Mat 18.10-14*)

¹ Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tiantianu, quiash Esus datsidadpanëdash. ² Adsho isash padiseyobo Esus tantiamenquio yec chushquiacbimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuedepanëdash.

³ Adoquien, tantiaquidquo iquec Esus: ⁴ —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibënec nidenquioda mibi icpe? ⁵ Aidi nibënquin istuidash, Con obeca istuidbosh bëdambo iquebi, queshun chiadquin buanec icbo nidec. ⁶ Shubuno choshon abëd icquido ambi yuedaidobëdta chomeshun: “Con obeca bënudaïd istuidshun bëbosh bëdambo iquebique. Nuquibi penuna,” quequin icbon chuipec. ⁷ Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuedependac — quepanëdash Esus.

Aton na bedtequid bënudtequid

⁸ Aden icbon aton yua bënudaïd chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec? ⁹ Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

¹⁰ “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec — quepanëdash Esus.

Aton mado cuëshëdquid

¹¹ Aden chido chiashic utsi chiacbimboec Esus nadpanëdash: —Aton mado daëd icnubi ¹² tsyuec tishaid aton papa caic: ‘Tsusio budquin mimbi chiondacadpen nëbi ëbi aïdted meneta, papa,’ quepondash. Adoac aton na musucshun aton mado abi daëdi menebampondash.

¹³ “Aden meniac daëdpactsëc ushash aton mado tsyuecquid aton natedi sandoshon buanec nidaïd utsi yacno nidash icsamboen nabanec tabadnuc aton natedi naimëdpondash.

¹⁴ Aden aton natedi naimëdambic tiedën caniquid unësbulan abi nidacnocquidon pete naimëdan tsusion mado chedo comapenec bundocuededpondash. ¹⁵ Adec bundoquiec

abi nidacnocquid abentsëc yacno nidshun: ‘Mimbi nami-aid ictiadquio iquebi,’ caquien: ‘Con chancho pemebanta,’ queshun aton chancho yacno tsusion mado nidmepondash.

¹⁶ Aden nidmiac nidquin chancho pemebanequi ambi chancho pemiaïd petiadquio yec tabadshobi anocquidon menenquio icpondash.

¹⁷ “Adec natiambo bunec tabadquin aton papa ambi ni-anondaidbëdta abi icsaid utsitedi tantiec abibi onquec nadpondash: ‘Con pan namiaïdon pete dadpen icnubi con na nibëdnuc unëspebi. ¹⁸ Nëbi con pa yacno nidshun naden con pa chiembi: Nuquin Papan chiacpaden nainquiocquin

mibi tantienquo yec nidshun icsamboen nabanombique. ¹⁹ Adquid icsho con mado nec, ëbi cainda, papa. Nëbi min yuapadquid ëbi icme,' quequin chiembi, ²⁰ abibi quianec aton papa yacno nidoapondash. Adec nidec ancuenquo yacno aton mado nidondaïd casenash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash. ²¹ Adoac ambibi tantiabocpaden aton papa chuiquin: 'Nuquin Papan chiacpaden nainquiocquin mibi tantienquo yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,' capondash aton madon.

²² "Aden chiaquien bëdambo yanshun ambi namiaïdombo naden aton papan chuipondash: 'Con mado ënden nidondaïd choashe. Dasiuidte bëdaïdquo bëshun con mado dasiuinta. Adoshombic mësusdtetsen mësusnta. Adoshombic tapucudtetsen tasiuinta. ²³ Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. ²⁴ Con mado unësacimboecboedi nëbi ëbëdi tabadoaic. Aidi bënudacimboecboedi nëbi istuidacimboec choash iquec,' cac bacan bacuë cuesuneshun codocacsho pebededpondash.

²⁵ "Adnubien bëyuc tishaid tied nantan icpondash. Auëshquo nidec shubu anoentsëqui choquin tentencate cuëdëmec matses cuëdënsho tantiatuidpondash. ²⁶ Aden tantiatuidashien aton papan namiaïd istuidash: '¿Atotsi naic nec?' quepondash bëyuc tishaid.

²⁷ "Adoquien: 'Min utsi ënden nidondaïd choaposh. Aidi chosho isash unësquiocquin nuquitedi bëdamboec tabadquin pemenuquin aton bacan bacuë nuacquid dapa papan cuesunemiosh,' cac ²⁸ bëyuc tishaid nëishash shubun puduedenquo icpondash.

"Adsho isash, Puduedenquo iccosh, quequin chiac bëyuc tishaid yacno nidshun: 'Min utsibobëd bëdambo icnuec cho, mado,' capondash aton papan. ²⁹ Adoquien: 'Seta dadpen matamequin mimbi chiacpadomboen nabanteniombi. Adquid icsho ëbëd capuquidobëdta ëbi pemenuen yua utsin bacuë mimbi cuesunemenquiocpaboc. ³⁰ Nëbi mimbi meniaïdtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cuesunemepaboc,' quequin bëyuc tishaidën aton papa chushcapondash.

³¹ "Adoquien: 'Mado, ëbëd icquid mibi nec. Adquid icnuc con natedi mitsana neyoc. ³² Min utsi unësacimboecboedi nëbi choash tabadoaic. Aidi bënudacimboecboedi nëbi istuidaïd nec,' quequin aton papan choboedën buchi chuipondash — quepanëdash Esus.

16

Icbon na icsamboen isquid

¹ Adshumbic, abëd icquido Esusën naden chuipanëdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. ² Adoac, ambi con na ista caid chomiash icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nëbi ¿Ëmbi tambamboed abitedida iqueque? Con na daëd uata quequin ëmbi meniac mimbi daëd uabanquin dada uaid bec cho. Isnu,’ queposh icbo.

³ “Aden chiac icbon na isquid otacquo onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibëdeque. Bec cho, quetiapimbo icoaibi. ⁴ Naden natsiambi. Con icbon na meniondaid abitedi cuidmenquo yac ëbi yuedtsiash,’ queposh.

⁵ “Aden tantiashun ambi icbon na meniondaid abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuidenquiocpaccoc?’ caquien:

⁶ “ ‘Bëchi shocosh nuacquid dapan cushtoaid 15tedi bedshun cuidamboccombi,’ queposh.

“Adoaquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

⁷ “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquo mimbi icpo?’ caquien:

“ ‘Tsitsan dapa dadpen 1000ted tiedën caniquid ëshë bedombi,’ queposh.

“Adoaquien: ‘Mimbi aidted bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun cuidembi, quequin dada uata,’ quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

⁸⁻⁹ “Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquo iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidotsen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

¹⁰ Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin

nashunquid icquin adembidi icbon na dadpen isbanquin bēdamboen nashunendac. Padnuen, icbon na daēdpactsēc isbanquin icsamboen nashunquid iquin adomboembidi aton na dadpen icsamboen isbanoaindac. ¹¹ Adembidi mimbi nidaidēnshun bedquin mimbi icsamboen nabansho isun, ¿Ēbi tantiaquid bēdamboen ista, quequinda Nuquin Papan mibi chuipeba? Padenquio iquec. ¹² Adembidi, ¿utsin na isquin bēdamboen nashunquio icsho isun abi yacno chosho isun mibi menependa ictic? Padenquio.

¹³ “Adecbidi, chuiquid daēd icnuc aid daēdshun nami-aidquio ictiapimbo mibi iquec. Abentsēcshun chiaiduidi tantiaquin utsin chiaid mimbi chieshēnec. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanēdash Esus.

¹⁴ Aden chuibanubi aton na bedtequid ambi tantiaidquio icnuc chieshec padiseyobo tabadcuededpanēdash. ¹⁵ Adec tabadsho isun Esusēn: —Bēdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bēdamboen naquidbimboecsho matsesēn ispashuni, quequin tantiaquin nasho Nuquin Papan bēdamboen istiapimbo iquec.

¹⁶ “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesēn dada uampidbēdta Nuquin Papan chuimiaid utsibon dada uampid mimbi ēnden tantiondaid nec. Nuquin Papa yacno puduedmianquid iquec, quequin nēbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadec puduedte bunec. ¹⁷ Abubēd nidaid ēnēdtequid icnuc Nuquin Papan naden nata quequin chiaid ēnēdtiapimbo iquendac.

Aton chido nianquid

(Mat 19.1-12; Mad 10.1-12)

¹⁸ “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bēnē niamboed chido bedquid Nuquin Papan chiaid niacquid neoaic —quepanēdash Esus.

Aton na dadpen icquid icnubien aton na nibēdquid

¹⁹ Adequi onquequimbi utsi chiacbimboen Esusēn naden chuipanēdash: —Dada, aton na dadpen icquid bēdaidquio dasiuidquidēn badiadquidēn-badiadquidēnquien nua peshun acposh. ²⁰ Adnubien aton na dadpen icquidēn shubu dayun bēshun tsadunac aton na nibēdquid, Dasado cuēmēdquid, chiuē dadpen icquid tsadposh. ²¹ Bunquiec ambo tsadec aton na dadpen icquidēn peshun secaid bedshun penuec

tsadtsëcsho menenquiocposh. Aden menenquiocnoc tsadshobi opa choquin aton chiuë bêtashuntuidposh.

²² “Adnubien, aton na nibëdquid Dasado unëso isun Nuquin Papan uaido mayan bédabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi ²³ chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. ²⁴ Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebudoaquin ëbi ëcpanun Dasado acte bëme, papa,’ caposh.

²⁵ “Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec bédambo mibi tabadnubien Dasado comapenec bunquiec tsadposh. Nëbi aidi ënabi bédamboec tabadnubien anchumbo yec mibi tënquebudec. ²⁶ Adboedi, uquëmbo mibi iquec cuëma utsiuc potetemaïd icnuc nëuëshquio nidtiapimbo iquec. Adquiobidi mibi yacnocquido nëmbo chotiapimbo icoaic,’ quequin Abadauanën aton na dadpen icboed chuiposh.

²⁷ “Adoaquien: ‘Ëbi yacno potetemaïd icnuc con pan shubu yacno Dasado nidme. ²⁸ Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,’ queposh aton na dadpen icboed.

²⁹ “Adoaquien: ‘Nuquin Papan chiaïd, Moisesën dada uampidbëdta dada uaid utsi isec tsusiobo onquepayoc. Aden chiaïd ma min buchi adon tantiaquiopanuna,’ quequin Abadauanën chuiposh.

³⁰ “Adoaquien: ‘Aid tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

³¹ “Adoaquien: ‘Padicnuna. Nuquin Papa tantiesa icquin uincuemiaïdën chiaïd min utsibon tantienquio icpatsiash,’ caposh Abadauanën aton na dadpen icboed chuiquin — quepanëdash Esus.

17

Matses icsaid chiaïd, ambi Esus tantiaïd chiaïd, ambi natequid chiaïd

(Mat 18.6-7, 21-22; Mad 9.42)

¹ Aden chuishumbic abëd icquido Esusën nadopanëdash: — Icsa uanquid iquendac. Adquid Nuquin Papan comapenen cuidendac. ² Adquid ëbi tantiabenabicquid icsa uanabicsho cuënote yuëmbocquid têtanetanquin acte shodomboshë yacno

nënepatecnëdan. ³ Aid tantiec aidpadquid icmane quequin bëdamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ qesho tantiash aidi icsainquio yacimboec bëpiscudta. ⁴ Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbinboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedecbidi aidi icsambo yenquio yacimboec bëpiscudoata –capanëdash Esusën abëd icquido chuiquin.

⁵ Adoquien: –Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid ëbi icme, icbo –capanëdash abëd icquidon Esus chuiquin.

⁶ Adoquien: –Cuëtempi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nëid cuëtempi caic, Cuëte mananuc tabadboedi adquiecbidi acte nantan tabadoata, quequin mimbi chiacpadec acte nantantsen abi tabadacpadececbidi tabadoaindac –quepanëdash Esus.

⁷ Aden chiashic Esus abi onquec: –¿Min yua mimbi neshcata cac nidshun neshcaquin nainash shubuno chosho isun: “Nëmbo tsadquin pec cho,” caquinda mimbi icpe?

⁸ Padenquio. “Con pete codocashun ëbi pemeshun acte mentanquin mimbitsen peshun acta,” mimbi caic. ⁹ Aden mimbi chiac mimbi chuiboedtedictsëqui nabanquin mimbi yuaidën naimbudec. Aden naimbudsho isash: “¿Bëdamboen mimbi naoc,” quecta mibi icpe? ¹⁰ Padenquio. Ambembi nainquio iccosh. Mimbi chiacpaden min yuan nabanosh. Adem-bidi Nuquin Papan chuiboedtedtsëqui nabanash Nuquin Icbo caic: “Mimbi chuiboedtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac –quepanëdash Esus.

Daushumbocquido bëdamiaid

¹¹ Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec ¹² shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquedtuiddanëdash.

13 Adquido yec uano tabadquin: —Ëbitedi bēdamboen tantiaquin nadatiambocquin naban, icho —cabededpanēdash comapenen cuēnquin.

14 Adsho tantiashun Esusën: —Isadaidbo tsusiobo yacno nidshun ismetanta —capanēdash. Adoac nidanequi abitedi bēdambudnapanēdash.

15 Adoac bēdamboed abentsēc dēbidiadanec Nuquin Papan naid chiec onquec choaic 16 Esusën taēno tsadbudash: —Mimbi bēdameboc bēdambo iquebi —quepanēdash Esus caic. Aidi Samadia yacnocquid isadaidpembo napanēdash.

17 Adoaquien: —¿Diestedidambi bēdamepo? —quepanēdash Esus dēbidiadanec choboed caic. 18 Aden chiashic iccuededquidtedi caic: —Nēdi isadaidpembo yequi dēbidiadanec choash Nuquin Papan naid chiec onquenubi ambi chiacpadomboen bēdameboed utsibo isadaidbo icquimbi Nuquin Papan naid chienquio icpec —quepanēdash Esus. 19 Aden chuishumbic: —Mimbi tantiapadequi mibi bēdanoque. Nidtoanec nid —capanēdash Esusën daushumbo ichoedi chuiquin.

Chuiquid dapabēd bēdamboec tabadte chote ushē

(Mat 24.23-28, 36-41)

20 Adshumbic: —¿Chuiquid dapa abentsēcbēd bēdamboec tabadte ushē choaid mitsipadēnquio nuqui ispeque? Tantiānu. Èbi chui —capanēdash padiseyobon Esus chuiquin.

Adoaquien: —Chuiquid dapabēd bēdamboec tabadte ushē chote ismete nibēdendac. 21 Adecbidi, nēmbobi chuiquid dapa abentsēc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsēcbēd tabadte nēmbobi iquec caimbi —quepanēdash Esus padiseyobo abi chuimeboedo caic.

22 Aden padiseyobo chuishumbic abēd icquido Esusën nadopanēdash: —Yuecash natiamiantequid icnuc abuc Esusbēd tabadte ushē chopashun, quec èbi iste mibi bunquimbi èbi isenquio mimbi iquendac. 23 Adec èbi iste bunubien: “Bēdamboec tabadte chuiquid ambo choshe. Istan,” cac abēdi nidenda. Adembidi: “Nēmbobi choshe. Isnu. Cho,” cac istanenda. 24 Nuquin Papa yacno bēdamboec tabadte ushē chonoc abu bedquetaniacimboec uēshēmo chēnquec èbi chosho abitedishun isbededendac. 25 Aid ushē choabicnuc èbi natiametequid iquendac. Adembidi, chuiquid dapa nec cainquiocquin èbi isadaidbon chieshēmbededec —quepanēdash Esus.

26 Aden chiec Esus abi onquec: —Ëndenquimboshē Noe tabadnuc matsesën icsamboen tantiaded-tantiadednēdacpadomboen èbi choate ushē icnuc adembidi

matsesën tantiadenepec. ²⁷ Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bedpampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësibunepampic —quepanëdash Esus.

²⁸ Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabadpampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. ²⁹ Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiabimboecquid nëdënquetequid ue sequiachimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

³⁰ Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. ³¹ Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc aid ushë chosho isash shubu yacno mitsana bednuec nidenquio yec badedquio cuenta. ³² Mibi yacnocquidtedi unës uanushe bidiadshun isenquio yec cuenta, cac Dod cuenubien aton na tantiec aton chido auchidi bidiadsho unës uampidpadquid iquenda. ³³ Unësmane queshun ambi tantiacpadec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. ³⁴ Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. ³⁵ Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. ³⁶ Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

³⁷ Aden chuisho bëdamboen tantienquiocquin abëd ic-

quidon: —¿Mitsimbo budpec, icbo? —capanëdash.

Adoaquien: —Unësaid yacno edeste bud-budec. Adquiechidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

18

Cadonequidquo chido chiaid

¹ Adashic, Èbëd icquido chieshenquo yec Nuquin Papa chiec onquian-onquianquidquo ma icpanu quec aido tantiamenu quec Esus nadpanëdash: ² —Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. ³ Adnubien uano tabadquid niante chido icposh. Aidi icsambocquid cuidte chuiquid yacno nidshun: ‘Èbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

⁴ “Aden chuidoniaqui abi icsambocquin naquid cuidte chienquiocboedëmbi chido ënëdenquo yec ⁵ choded-chodedquin adomboembidi chuioasho tantiashun: ‘Nuquin Papabëdta matses tantiesa nebi, quequimbi niante ënëdenquo yec chodednesho isun uimabudmane qeshun abi icsamboen naquid cuidte chuiquiono,’ qeshun cuidte chuiquidën chuiquioposh.

⁶ Aden chiashic Esus: —Choded-chodedquin chidon chuioasho tantiash: “Mibi icsamboen naquid cuidte chuinu,” queposh icsambocquid cuidte chuiquid. ⁷ ¿Adomboembidi ambi cuënaidon, Èbi chieshënquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? ⁸ Abitedi padenquioctsiash. Utsi nëbimbobi cuidenquiocquin choshon cuidendac. Badedquo cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

Padiseyobo abentsëc icnuc ancanquidën utsin na bedtequid bedmianiaid chiaid

⁹ Adashic, bëdambocquid nebi, quiash utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: ¹⁰ —Nuquin Papa tabadte shubu uashunaid yacno Nuquin Papa chiec onquenuc nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. ¹¹ Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi

tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adechidi, choboed, ancanquidën utsin na bedtequid bedmianiaidpadquidpenquio nebi, Papa. ¹² Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

¹³ “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquin nabanquid nebique. Èbi tantiaquin pauc, Papa,’ quepash —quepanëdash Esus.

¹⁴ Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yacimboec, Bëdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuioaindac —quepanëdash Esus.

Bacuëbo Esus yacno bë-bëaid
(*Mat 19.13-14; Mad 10.13-16*)

¹⁵ Adshumbic, aton bacuëbo Esus mishmenuequin utsin utsinquien bë-bësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

¹⁶ Aden chuisho tantiash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquio bacuëbo nec. ¹⁷ Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac —quepanëdash Esus.

Nëbi caniquid chuiquidën chiaid
(*Mat 19.16-30; Mad 10.17-31*)

¹⁸ Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquio icquin ëbi chui. Tantanu —capanëdash Esus chuiquin.

¹⁹ Adoaquien: —¿Mitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. ²⁰ Abi yacno

nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec –capanëdash Esusën nëbi chuiquid caniquid chuiquin.

²¹ Adoaquien: –Canidotsëcquimbi aden nadeniondambi –quepanëdash nëbi caniquid.

²² Aden chuisho tantiash: –Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniaash ëbëd iquec chota –quepanëdash Esus.

²³ Aden Esusën chuisho tantiash aton na dadpen tantiec unësquio yanshun Esusën chiapaden natiapimbo icpanëdash.

²⁴ Adsho isun: –Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac.

²⁵ Adquiecbidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamic puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequi puduedte bunec –quepanëdash Esus.

²⁶ Aden chuisho tantiash iccuededquido nadpanëdash: –¿Tsutsi Nuquin Papa yacno puduedquid icpec? –quepanëdash Esus caic.

²⁷ Adoaquien: –Matses ambibi tantiacpadeq puduedtiapimbocnoc Nuquin Papambien abi yacno yuedanquid matses tantiamendac –quepanëdash Esus.

²⁸ Adoaquien Petedo: –Mibëd icnu, quequin ëbëd icquidbëdta con natedi nianondambi, icbo –quepanëdash Esus caic.

²⁹ Adoaquien: –Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho ³⁰ ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac –quepanëdash Esus Petedo chiec.

*Ëbi unës uaindac, quequin Esusën chiaid
(Mat 20.17-19; Mad 10.32-34)*

³¹ Adashic, abëd icquido uano buanash: –Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquin ëbi

nabanendac. ³² Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamënsumbededquimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuesten dectanquin unës uaindac. ³³ Adoalui daëdec ushtanec uincuenendabi –quepanëdash Esus abëd icquido chiec.

³⁴ Aden abi unëste Esusën chuisho abëd icquidon bëdamboen tantienquo yec tabadpanëdash.

Bëshuaid bëdamiaid
(*Mat 20.29-34; Mad 10.46-52*)

³⁵ Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid. ³⁶ Adec tsadquimbi matses dadpen cuen-cuensho tantiashun: –¿Atotsi quec cuen-cuene? –capanëdash. ³⁷ Adoaluen choquid abentsëc: –Nasaded yacnoësh choquid Esus cuenec nec –quepanëdash.

³⁸ Adsho tantiashun bëshuaidën: –Dabid, tsusedpan mado mibi icquin ëbi tantiaquin nata –capanëdash Esus cuënquin.

³⁹ Adshobien: –Adec cuëdenquo yec tsad –capanëdash choquidon.

Adoaluen bëdiactsëc cuëmboedëmbi comapenquien: –Tsusedpa Dabidën mado mibi icquin ëbi tantiaquin nashunta –caopanëdash bëshuaidën.

⁴⁰ Adoac nidtuidshun Esusën: –Aidi bec cho –cac abi yacno bësho isun: ⁴¹ –¿Atotsimbi mibi nashumpeba? –capanëdash Esusën bëshuaid chuiquin.

Adoaluen: –Bëshuaid nebique. Èbi bëucshune, Icho –capanëdash.

⁴² Adoaluen: –Mimbi tantiacpadomboen padpidemboen is –cac ⁴³ badedquo isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidote-dishuntsen Nuquin Papan naid chuibededpanëdash.

19

Saqueyo, ancanquidën utsin na bedtequid bedmianiaid dapa

¹ Adec nidequi Edico caid yacno datambidanec Esus nidpanëdash. ² Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash. ³ Adoaid icquimbi utsi, Esus cuenec, quesho tantiash, ¿Mitsipadquidquo

Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuctsëcquid icquin Esus Saqueyon isenquio icpanëdash. ⁴ Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

⁵ Adec tsadnubien aid podquedënquio choec nidtuidshun Saqueyo bushcuctsëcquid istuidshun Esusën: —Nëbi mibi yacno nuquibi tabadec nidnu. Baded bud —cac ⁶ Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

⁷ Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

⁸ Adnubien, aton shubu nuntanuësh nidtoash Saqueyo: —Chuinu. Tantia, Icbo. Nëbi con na mais uaquin aton na nibëdquid menenun nabono. Adoshombic, con matses: “Con na mimbi ampioc,” quesho tantiaashun ëmbi ampiaidbëda daëd-daëdquiecnuc daëd uaquin menebanembi —quepanëdash Esus chiec.

⁹ Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec. ¹⁰ Icsambocquid Saqueyo icbocpadquid nibënquin istuidshun nësecanushe queshun mënchicnuc chopobi —quepanëdash Esus Saqueyobëd icquido caic.

Aton na bedtequid 10ted icquid meniaid

¹¹ Aden Esusën chuisho tantiaashun Edusaden yacno choash chuiquid dapa Esus yantsiash, quequin utsibon icsamboen tantiapanëdash. ¹² Aden tantianubi tantiaquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ ¹³ queshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

¹⁴ “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe queshun chuiquid dapa yacno chuitanta,’ queshun abëd icquido chuimenuen chuiquid dapa yacno nidmeposh.

¹⁵ “Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con

na bedtequid ¿tedsi daëd uapashba? abibi qeshun ambi meneboedo chomeposh.

16 “Adoac bëyuc choquid: ‘Mitsana bedtequid abentsëc ichoedi utsi 10ted icnuc daëd uaombi, icbo,’ queposh.

17 “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

18 “Adnubien utsi: ‘Mitsana bedtequid abentsëc ichoedi utsi 5ted daëd uapombi,’ queposh.

19 “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

20 “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. ²¹ Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiaash dacuëdec tsadteniobi,’ queposh.

22 “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? ²³ ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquio icco? Aden meniac daëd uashun bedtsenombi,’ queposh abi chuiquid.

24 “Aden aton na daëd uaisa chuishumbic iccuededquido chuiquin: ‘Ëbi chieshëinquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

25 “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

26 “Adoaquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. ²⁷ Adembidi ëbi chieshë nec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën — quepanëdash Esus.

Chuiquid dapabimboec yec Edusaden yacno Esus choaid (Mat 21.1-11; Mad 11.1-11; Uan 12.12-19)

28 Aden chuibanashic Esus Edusaden yacmi nidequi anoentsëqui choash nidtuidpanëdash. ²⁹ Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid

icpanëdash. Adec nidtuidash abëd icquid daëd caic: ³⁰ —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tēnēshaid mimbi istuidendac. Aid istuidshun tēnēshaid tēchicshun nēmbo bēta. ³¹ Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icho bunaid nec,” quequin chuita —quepanëdash Esus.

³² Adoac nidshun istuidtanquin ³³ cabayobitsecquidēmpi tēnēshaid tēchicsho isash: —¿Atotsi canuen aid tēchique? —capanëdash icbon.

³⁴ Adoaquien: —Con Icho bunaid nec —qeshun Esus yacno nimbanquin abi tēnēshaidën buampanëdash Esusbëd icquidon.

³⁵ Aden bēshun, Chuiquid dapa Esus nepanui, quec onqeshun Esusbëd icquidon aton dashcute bēntsecquid chictanquin cabayobitsecquid capucshun Esus catsadumpanëdash. ³⁶ Aden Esus catsadunash nidnubien iccuededquidontsen aton dashcute bēntsecquid chictanquin podqued ansambanec nidanepanëdash. Chuiquid dapa Esus nepanui, qeshun aidontsen adopanëdash.

³⁷ Adec nidanec macuësh Odibos caid budtuidequi iccuededquidtedimbo bēdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

³⁸ —Nuquin Papan chomiaid ambi chuiquid dapa icmiaid ambi bēdambo icmiaidquibidi nec. Nuquin Papa yacno abēdi bēdamboec tabadequi icsaisatedi iquendac —quepanëdash iccuededquido comapenec cuëdcuededec.

³⁹ Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

⁴⁰ Adoaquien: —Ëmbi naid chiec aitedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

⁴¹ Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: ⁴² —Ëbi bēdambo icmequid Esus nec, quec nēbi ëbi tanti-aquid mibi ictsandac. Tantiesa icquin mibi chuiquid mimbi nibēnacpadquid mimbi istuidtiapimbo iquendac. ⁴³ Yucash choquin uimanēmēnquidon mibi cuentiapimbocnoc tsicatebudcuenendac. ⁴⁴ Aden mibi tsicatebudcuenshun min bacuëbobëdtabi naimbudquin mibi unës uashun nendac. Min shubutedi nibëdquidendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus.

Edusaden uano icnuc abi tantiesabo tantiec unësquio icnuc anocquido chiacbimboec adpanëdash.

Nuquin Papa tabadte shubu uashunaid yacnoshon cuemi-aid

⁴⁵ Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash.

⁴⁶ Cuemec: —Nuquin Papan chuipampid nad iqueque. Tanta: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aitedi cuemec.

⁴⁷ Adoshombic, badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cuesunepeba? quequin caimbededpanëdash.

⁴⁸ Aden caimbededquimbi Esusën chiaid tantianu quec dadpen Esus datsidadacsho isun ashunquio isadaidbon Esus cuesunemenuen bedtiapimbo icpanëdash.

20

*¿Tsundan chuibanta caid mibi ne?
(Mat 21.23-27; Mad 11.27-33)*

¹ Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquec, quequin Esusën chuibanubien isadaidbo tsusiobo cho-chopanëdash. ² Cho-choshon: —¿Tsundan chuibanta caid mibi neque? Tantaranu. Ëbitedi chui —capanëdash.

³ Adoaguien: —Ëmbia tantianu. Ëbi chui. ⁴ ¿Nuquin Papan ëmbi chiaid chuibanshun mentobanta caidta Uan icpondash? Padenquio mibi quenuc, ¿Matsesën nata caidta nepondash, quequina mimbi tantie? —quepanëdash Esus isadaidbo tsusiobo caic.

⁵ Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, ëbitedi qesho tantiash Esus nadpendac. ¿Atotsieshun Uanën chuisho mibitedishun tantienquio icponda? ⁶ Matsesën nata caid Uan pado niondash, ëbitedi qesho tantiashun iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

⁷ Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

⁸ Adoaquien: —Mimbi chienquio yacpadembi ëmbitsen ëbi chuita caquid mibi chienquio icoaimbi —quepanëdash Esus.

Neshcashunquidon icsambocquin naid
(*Mat 21.33-44; Mad 12.1-11*)

⁹ Aden isadaidbo tsusiobo chuishumbic, Utsi chuinu, quiacbimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi ëbi neshcashunta caidtedi istuidash tied icbo nidposh. Nidaid utsin yuec tabadshumbic: ¹⁰ ‘Tiedën caniquid ënden bacuëpash. Ëbi neshcashunquidën musucaid con na bedmenu,’ queshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoposh. ¹¹ Adoshombic, icbon aton tied yacno ambi namiaid utsi nidmeoposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoposh. ¹² Adoshombic, ambi namiaid utsitsen icbon nidmeoposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

¹³ “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi ëbi cudasaid con tied yacno nidmembali. Aidi con tied yacno chosho bëdamboen ispec,’ quequin aton mado nidmeposh.

¹⁴ “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cuesunenuna. ¹⁵ Aden cuesunian icbo unësan aton natedi nuquin na ictsiandac,’ quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec? ¹⁶ Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiaash: —Adoenquio icpashun —quepanëdash iccuededquido. ¹⁷ Adoaquien iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuipampid nad iquec: “Shubu

uanuequidën isuidaid buintad utsin ambia nitsinaid icposh.”¹⁸ Buintad sec uebudec podquëd-podquëndac. Adem-bidi buintad uebudquin matses tish-tishendac. Adem-bidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac – quepanëdash Esus.

¹⁹ Aden Esusën chuisho tantiash: –Nuqui naid chiacbimboen chiec Esus niosh –quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

Sesadën shocoshëmpi neque. Mene, quequin chiaid
(Mat 21.45-46; 22.15-22; Mad 12.12-17)

²⁰ Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdamboecquid nebi, quequin ismiacbimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiaquin nidmepanëdash. ²¹ Aden nidmiac choash Esus ista caid abentsëc: –Mimbi tantiamequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec. ²² Adquid mibi icquin ëbi chui. Tantianu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? –quepanëdash isadaidbo tsusiobon ista caid Esus caic.

²³ Aden chuisho tantiashun choboedën icsamboen tantiaid tantiaquin Esusën nadopanëdash: ²⁴ –Piucquid shocoshëmpi ancanquidën bec cho caid sananquin abuc cadota –cac sananquin abuc cadosho isash: –¿Tsuntsin podo bitsi dada uaid aidën icpec? –quepanëdash Esus.

²⁵ Adoaquien: –Ancanquid Sesadën na nec –quepanëdash tsusiobon ista quequin chomiaid.

Adoaquien: –Ancanquid, Bec cho, qesho meneta. Nuquin Papan naden nata cac adobanta –capanëdash Esusën. ²⁶ Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuededpanëdash.

Uincuen uaid chido bedesa nec, quequin chiaid
(Mat 22.23-33; Mad 12.18-27)

²⁷ Adashic, saduseyobo caido yec ²⁸ unësaid uincuen uate nibëdec quequin chuiquido Esus yacno chopanëdash. Aido choash: –Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. ²⁹ Aden Moisesën dada uaid icnuc dada 7ted

iccuededposh. Aided dada icnuc bëyuc tishaidën aton chido bedshun bacuë tishmiabi yec unësposh. ³⁰ Aton buchi unësan aidën chido bedash adecbidi bacuë tishmiabi yec unësoaposh aton utsi. ³¹ Adembidi, bëyuc tishaid tsi-banquidën-tsi-banquidënquien chido abentsëqui bedto-bedtoec bacuë tishmiabi yec unësbuneposh. ³² Yucash chidotsen unësoaposh. ³³ Adec chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Èbi chui. Tiantianu —quepanëdash saduseyobo Esus caic.

³⁴ Adoquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec. ³⁵ Uincuen uate ushë choan Nuquin Papan bëdamboen isaido abëdi tabadquin chido bedenquo iquendac. Adembidi, aton champi menenquo aton papan iquendac. ³⁶ Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquo iquendac. Nuquin Papan uincuen uatequido aton bacuëbo nendac. ³⁷ Adembidi chuinu. Tantia. Cuëtempi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuiquin nadopampic: “Tsusedpa Abadauanën papa cain cuënaid mibi nec. Adecbidi tsusedpa Isaquën papa cain cuënaid mibi neoaic. Adecbidi tsusedpa Acobon papa cain cuënaid mibi nec,” quequin Moisesën chuipampic. ³⁸ Moisesën tsusedpabo ambi chuiboed ënden unësampidën nami chodquiaidën papa cain Nuquin Papa cuëntiapimbo iquéc. Aton nami chodquiash abi tantiaquidquo icquin tantiec tsadquidën papa cain Nuquin Papa cuë nec —quepanëdash Esus saduseyobo chiec.

³⁹ Aden Esusën chuisho tantiash Nuquin Papan naden nata quequin chiaid tantiamequid padiseyobo utsi-utsiec nadpanëdash: —Bëdamboen mimbi chuibanoc —quepanëdash Esus chiec. ⁴⁰ Aden Esusën chuisho tantiashun Esus chuimetiapimbo utsibo icpanëdash.

*¿Tsuntsin mado Quidistu nepec? quiaid
(Mat 22.41-46; Mad 12.35-37)*

⁴¹ Aden utsibon abi icsamboen chuimetiapimbo icsho isun Esusën nadopanëdash: —Èbi abia yampid icsho ¿mitsipadentsi tantiaquin tsusedpa, Dabidën mado Quidistu caid nec, quequin matsesën chuipéc? ⁴² Dabidën ambibi Sadmo caid dada uaquin naden chuipampic:

“Icho utsi yec con mado mibi chiembique. Tantia, quequin chiec icho dapa nadpampic:

‘Èquë con dayun abiucquo cainec tsadec cho

⁴³ ma mibi chieshënquidtedi mimbi namiaid ma icpanu, ”

quequin Nuquin Papan Esus chiaid Moisesën dada uapampid nec. ⁴⁴ Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidën? — quepanëdash Esus abi chieshënquido caic.

Naden nata quequin chiaid tantiamequidpadquid iquenda, quequin chiaid

(Mat 23.1-36; Mad 12.38-40; Duc 11.37-54)

⁴⁵ Aden chuishun iccuededquidon tantianubi abëd icquido Esusën nadopanëdash: ⁴⁶ —Nuquin Papan naden nata quequin chiaid tantiamequidpadquid iquenda. Aido ancanquidbimboecsho utsibon ispashuni quequin nabanesa dasiuidacpadec dashcute ënapen icquid dasiuidcuededpec. Adomboembidi tantiec matses dadpen iccuededacno nidash capuequi, Ëbi bëquedquidon ëbi chuiquid dapabimboecsho isash onquequin chuipashuni quec tabadec. Adomboembidi tantiec Nuquin Papan chiaid chuibante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuiquid dapabimboecsho ispashuni, quec tsusiobo tsadacno tsadtenec. Adquidpadquid iquenda. ⁴⁷ Aidon bëdamboen nabanacimboen nianten natedi bedbanec. Aidombidi Nuquin Papa abimbo tantiacimboec yuen chiec onquec. Aden bëdamboen nabanacimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

21

Nianten piucquid shocoshëmpi meniaid

(Mad 12.41-44)

¹ Adashic, Nuquin Papa tabadte shubu uashunaid yacno tabadtuidash tsadquin Esusën isbampanëdash. Ambi isaido Nuquin Papa tabadte shubu nacnemete cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash. Aton na bedtequid dadpen icquidon dadpen sandobededsho isquimbi ² nianten aton na nibëdquidëmbi aton na bedtequid shocosh daëd ictsëcquid sandosho ispanëdash. ³⁻⁴ Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niente isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

Abitedi naimbudte ushë choec quequin chuite

(Mat 24.1-35, 42-44; Mad 13.1-37)

⁵ Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

⁶ Adoaquien: —Mimbi nëbi isaid yuecash nidbëdquiendac. Matses utsibon nëid shubutedi chic-chicbudendac —quepanëdash Esus.

⁷ Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiente icpeque? Tiantianu. Chui —quepanëdash utsibo.

⁸ Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. ⁹ Adecbidi: “Cuesnancuededec,” quesheo tantiash dacuëndenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

¹⁰ Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. ¹¹ Adecbidi, nidaid utsi-utsiec yacno canchednuec ishcu-dishcuendac. Adecbidi, utsi-utsiec yacno bunquiotte iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucuësh natiambo icsho mimbi isbededendac.

¹² “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac ¹³ aidotsen tantiaquid yantsiash qeshun ëbi chuibanta. ¹⁴ Aden buanaqui, ¿atotsimbi ancanquid cape? quequin tantiec tsadenda. ¹⁵ Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënquido iquendac. ¹⁶ Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiash. Animbi aton mado adembidi adotsiash. Utsi aton buchimbi adoatsiash. Utsi aton chuchumbi adoatsiash. Utsin abëdtan isedquidëmbi adoatsiash. ¹⁷ Èbi tantiaquid chieshënquid dadpen iquendac. ¹⁸⁻¹⁹ Aden nabanquin mibi cuesunemenu, cac chieshenquio yec, Esus tantiaquid nebi, quequid icta. Adquid iquec unësash ënëdenquio yec Nuquin Papabëd mibi tabadendac.

20 “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushë choec, quequin mimbi tantien-dac. 21 Aden tantiec ma Cadidia yacnocquido macuësh dapa yacno cuempanuna. Adecbidi, Edusaden yanocquido ma auëshquio cuempanuna. Adecbidi, dëuequido Edusaden yacno ma nidenquiopanuna. 22 Aid ushë icnuc Nuquin Papan chiapadomboen cuidtequid iquendac. 23 Aid ushë chonoc matses utsibon Edusaden yacno tsicatebudac pete naimbud-nuc bacuë usunquidobëd bacuë chishmequido mëyadec natiquendac. Edusaden yacnocquido abi tantiesabo icsho Nuquin Papan natiambocquin cuidte iquendac. 24 Edusaden yacnocquid utsi-utsien chështen cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chën, quenquiocnoc adec tabadendac. Chën, quenuc nidendac.

25 “Adec Nuquin Papa, Chën, quian badiadën ushë, inchëshën ushë uispa chedo aitedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuëdec matsestedi tabadcuededendac. Acte natiambo chëuëdsho isash adquiecbidi comapenec dacuëdec matsestedi tabadcuededoaindac. 26 Adecbidi, uispa utsi-utsiec paëdted-paëdtednubi utsi-utsiec tididiquendac. Adsho isash matses dacuëdec padishendac. 27 Adnubini Nuquin Papan chomiaid matsesaid ëbi dasiuidaid bëchomauanquiec ushë chënquiacbimboec uëshëmbo yec nadatiambocquin nabanquidquio abu ushun ëbi budsho matsestedishun isbededendac. 28 Natiambocquin naid tauadoacsho isun, Nuquin Papa yacno ëbi yuedte ushë chote anoentsëqui yanec, quequin bëdambocquin abuc isteneta —quepanëdash Esus.

29 Aden chuishumbic ambi chuiboed ushë chote tantiamenuen nadopanëdash: 30 —Cuëtempi bacuëacsho isash, Ènden suc secduquiac nëbi seta taëc, quequin matsesën tantiec. 31 Adembidi ëmbi chuiboed icsho isun, Nuquin Papabëd tabadte ushë choec, quequin mimbi tantiec. 32 Abimbo chiembique. Tantiata. Èmbi chuibamboed naimbudabicnuc con tan matses isadaidbo naimëdbudenquio iquendac. 33 Abubëdta naimbudtequid nidaid nendac. Èmbi chiaid abimbo iquendac.

34-35 “Adembidi chuinu. Tantiata. Nidaidën capuquidën, Nëbi ëbi sec, quequin tantienquio yec capusho badedquio siac cuentiapimbo iquec. Adembidi, Natiata ushë choec, quequin tantienquio yec chieshquin badiadquidën-badiadquidënkuien

paëmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushë choendac. ¿Matsestedi cuidte ushë choenda ictic? Ai, aid ushë choendac, quequin caimbudec bëdamboec tabadta. ³⁶ Ënenquiocquin aid ushë chote caimbunec tabadquin Nuquin Papa naden chuidoneta. Chieshmane mibi tantiaquidquio ëbi icme, Papa. Adembidi natiambocquin cuidte ushë chonoshe qeshun ëbi mënchicta, Papa. Aid ushë chonoc ëbi bedshun mimbi chomic matsesaidën dayun tsadquidquio ëbi icmeta, Papa, quec onquedeneta –capanëdash Esusën.

³⁷ Aden chuishumbic, badiadquidën-badiadquidënquien Nuquin Papa tabadte shubu uashunaid yacno nidshun matses tantiamenuen Esusën chuided-chuidedpanëdash. Adecbidi inchëshquidën-inchëshquidënquiec macuësh Odibos caid yacno nidash tabadtenepanëdash. ³⁸ Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

22

Esus bedmenu, quequidquio Udas

(Mat 26.1-5, 14-16; Mad 14.1-2, 10-11; Uan 11.45-53)

¹ Adashic, nami uabicquid pete tantiate ushë, Pascuas caid, anoentsëqui yampanëdash. ² Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash. ³ Adnubien Udas cashumbic Iscadiote caid Esusbëd icquid dapudedshun Satanasën tantiamiac ⁴ Esus chieshënquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshënquid utsibo iquec quianec aido yacno Udas choash, Esus bedmete bunebi, quequin chuipanëdash. ⁵ Aden chiac isadaidbo tsusiobo bëdambo iquebi quetanquin: –Esus bedmiacsho mibi piucquid menenu –capanëdash Udas chuiquin. ⁶ Adoquien: –Adonuna –quianec Esus yacno nidoash abëd capuquimbi Esus tantiec datsidquido nibëdacnoshon abi chieshënquido, isadaidbo tsusiobo, Esus bedmembi, quequin isted-istedpanëdash Udasën.

Ënquin nidaidënshun Esusën pebanaid

(Mat 26.17-29; Mad 14.12-25; Uan 13.21-30; 1Cod 11.23-26)

⁷ Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë

unës uanushe queshun obeca bacuëded cunesuneshun shubu shëcuë ëcnoshcaid isun unës uainquiocquin Nuquin Papan uaido mayan bédabon matanampid tantiate ushë icpanédash.
⁸ Aid ushë chonoc Uambédta Petedo chuiquin: —Matante ushë tantianuequin obeca bacuë cunesuniaid penun nacnenta —capanédash Esusën.

⁹ Adoaquien: —¿Mitsishumbimbi aid nacnempe? — quepanédash Uambéd Petedo.

¹⁰ Adoaquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun ¹¹ shubun puduedabi naden shubu icbo chuita: ¿Mitsishumbimbi matante ushë tantiaquin ëbéd icquidobédtan pepe? quiosh Esus, quequin chuita. ¹² Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanédash Esusën.

¹³ Aden Esusën chiac nidaneshun Esusën chiacpadom-boen istuidshun matamepampid ushë tantiaquin penun Uambédambi Petedon nacnempanédash.

¹⁴ Adashic, inchëshën choash abéd icquidobéd pete sante cuate dayun uequi Esus: ¹⁵ —Ëbi mëyante yanabicnuc bëyuc tishaid cunesunianquidën cunesunenquiocquin matanampid tantiaquin pec mibédi tabadtiadquio yanobi. ¹⁶ Matanampid tantiaquin obeca cunesuneshun nuqui pebocpadomboen mibédambi nidaidënshun padpiden penquio iquendambi. Matses icsaquid icsho cuidnushe queshun obecaded cunesuniaidpadquiocquid yanshun Nuquin Papa yacno choash tabadquidobédambi ashunquio pendambi —quepanédash Esus.

¹⁷ Adoshombic dëshote sananec Nuquin Papa chiec on-queshun actanquin abéd icquido menec: —Në, aniactse-aniactsen acban mibitedishun. ¹⁸ Tiedën caniquid ënë nidaidënshun padpiden aquenquio iquendambi. Nuquin Papa yacno choash tabadquidobédambi ashunquio aquendambi —quepanédash Esus.

¹⁹ Adoshombic, pete bedshun Nuquin Papa chiec on-queshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cunesuniaid tantiaquin pebeded —capanédash Esusën.

²⁰ Adoshombic pete utsi petanquin dëshoten sicaid cush-toshon menec: —Ënden, Icsambocquin naombi, queshun obecaded cunesunemenuen isadaidbon menedeniac. Aden cunesuniaidën intac siquéc unëso isun, Obeca cunesuneboed ëbi icsaquid icsho cuidnushe queshun cuidtequid nec, quiampic-paden abi chiec. Padnuen nëbi unës uashun siac aton intac

siquec matses icsaid bedshunash Esusedd cuidadac, quequin tantiatequidquo nendac. ²¹ Èbi chieshënquido èbi bedmenuequin chuiquid pete sante dayun èbèdi uec. ²² Nuquin Papan chiampicpaden èbi matsesacsho unès uaid iquendac. Èbi chieshënquido bedmenuequin chuiquid comapenen cuidte iquendac —quepanèdash Esus.

²³ Aden Esusën chuisho tantiash abèd icquido: — ¿Midacquidien capec? —quecuededpanèdash.

²⁴ Adashic: —Dosedet nuqui iquec. ¿Tsudain chuiquid icpec? quequin utsibon ispec —quepanèdash Esusbèd icquido.

Aden chuitanec, Chuiquid nec, quequin utsibon èbi ispec, Esusbèd abitedi nëishash comapenec chushcanampanèdash.

²⁵ Adec chushcanansho tantiash Esus nadpanèdash: — Isadaidpembo ancaquidën comapenen aton matses namebanquin daèdpactsëc menebanec. Aden meneshun, Èmbi namiaido bèdambo icmequid nebi, quequin muaquin chiec. ²⁶ Mibitedi adquid iquenda. Nadquidquo icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. ²⁷ Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nèbi mibèdi pec tsadequi mibi nashunquid nebi. ²⁸ Èbi chieshënquido icnuc èbi nianesa ²⁹ icsho con Pan èbi chuiquid icmiacpadquid chuiquid mibitedi icmendambi. ³⁰ Aden chuiquid icmiac èbèd icquin èbèdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bèdabèdta ambi naid icsa cuidte èbèdtambi mimbi chuibanendac —quepanèdash Esus abèd icquido caic.

Esus èmbi isacmaid nec, quequin Petedon chiaid

(Mat 26.31-35; Mad 14.27-31; Uan 13.36-38)

³¹ Aden chuishumbic Esusën nadopanèdash: —Mibi chuinu. Bèdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacbimboen mëyantanguin èbèd icboedi mibi cuëshèdmetiadquio iquec. ³² Aden mibi Satanasën yuatiadquio iquec, quequin tantiaquin Nuquin Papa naden chiombi. Simon èbèd icquidquo iqueque. Yuadnushe qeshun Satanasën niac-niacmete chiaid Petedo tantienquio icmeta, Papa, quequin chiombi. Adec èbèd icboedi cuëshèdtsembosh choashun comapenen èbi tantiaquin èbèd icquid utsibo adomboembidi comapenen èbi tantiameta, Simon —capanèdash Esusën Petedo chuiquin.

³³ Adoaquien: —Mibi caic, Quënën nauednu, quenuc mibèdi nauedadebi. Adecbidi mibi caic, Unès uanu, quenuc adecbidi mibèdi unès uadebi, Icbo —quepanèdash Petedo Esus caic.

³⁴ Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac —quepanëdash Esus.

Buanenda, queboedëmbi, Buanta, quequin chiaid

³⁵ Aden Petedo chuishumbic abëd icquidtedi chuiquin: — Mitsana bedtequid buanenquio yec shictoachte buanenquio yec dashcute utsi buanenquio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

³⁶ Adoaquien: —Ënden adquid buanenda, queboedi, Ëbi nibëdnuc mitsana bedtequid shictoachtebëdtabi buanta. Chështe bednu, qeshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. ³⁷ Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

³⁸ Adoaquien Esusën chuiboed tantienquio yec abëd icquido: —Në, chështe daëd iqueque. Is, Icho —quepanëdash.

Aden abëd icquidon tantienquiocsho isash: —Ai, padi —quepanëdash Esus.

Macuësh Odibos caid yacnoshon Esusën Nuquin Papa chiaid (Mat 26.36-46; Mad 14.32-42)

³⁹ Adashic, Edusaden caid yacnoësh macuësh Odibos caid yacno abi nidteniäpadën nidnuc abëd icquidon tsibanampanëdash. ⁴⁰ Adec nidequi abi tabadteniäcno choshon Esusën: —Chieshëmëñquidën ëbi namete bunäcpaden natiäpimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. ⁴¹ Aden chiashic äbiuidtsëqui uano nidash danëshën nidäidën sebudash Nuquin Papa chiec nädac yuec Esus onquetan-onquetampanëdash: ⁴² —Mëyanquin mibi unës uanu, ëbi chieshënquidon casho tantiash bunenquio yec, Adoenda, quepatsiäc mibi Papa. Adoshombic mibi bunäcpadomboen nameta, Papa —capanëdash Esusën Nuquin Papa chuiquin. ⁴³ Aden Esusën bädad-bädadquien chuishobi Nuquin Papan uaid mayan bëda choshon Esus chieshtomenquio icpanëdash. ⁴⁴ Aden uidën uaqui ädec uëshquec Nuquin Papa chuiquiequi ichäcbëd intacash nidäidën siquepanëdash.

⁴⁵ Aden Nuquin Papa chiashic nidtoash abëd icquido yacno choaquimbi ämbi chuisho tantiäboed tantiec uimäbudash ushec uesho istuidshun: ⁴⁶ —¿Atotsi quiash ushe? Nidtoшон ëbi chieshënquidën nametiädquio yäcpaden natiäpimbocquid

ëbi icmeta, Papa, quequin adenuidi Nuquin Papa chuideneta –capanëdash Esusën abëd icquido chuiquin.

Esus bedaid

(*Mat 26.47-56; Mad 14.43-50; Uan 18.2-11*)

⁴⁷ Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: ⁴⁸ –¿Ëbi matsesaid icsho bedmenuen tanchoccaquinda ëbi chieshënquido isme, Udas? –quepanëdash Esus.

⁴⁹ Aden Udasën nac Esus bednuesho isash Esusbëd icquido: –¿Cho-choquido nuquida cuesten cuespe? –quec ⁵⁰ onquetanquin abentsëcshun isadaidbo tsusio dapan yuan pabiate opioc pateshunepanëdash.

⁵¹ Adosho isash: –Padi. Chën. Adoenda –quetanquin Esusën tsusio dapan yuan pabiate patiacno mishquin bëdamepanëdash.

⁵² Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: –¿Matses cuëshëdmequid nec, queshunda utsin-utsinquien chështe sananubi utsin-utsinquien cueste sananec cho-chopec? ⁵³ Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquo mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac –quepanëdash Esus.

Ëmbi isacmaid nec, Petedo quiaid

(*Mat 26.57-58, 69-75; Mad 14.53-54, 66-72; Uan 18.12-18, 25-27*)

⁵⁴ Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. ⁵⁵ Adec choec umanuc cuëte dëtsiadaid cuëc utsibo tabadacno Petedo cuëte cuëc tsadpanëdash. ⁵⁶ Ambo Petedo tsadsho isash tsusion yuaid chido anoentsëqui choshon bëdamboen isec: –Nëid bëboedbëd icboedi nec –quepanëdash.

⁵⁷ Adoaquien: –Bëboed ëmbi isacmaidquo nec –quepanëdash Petedo.

⁵⁸ Adashic, yuecpactsëcshun Petedo isec utsitsen: –Ma mibi bëboedbëd icquid neyoc –quepanëdash.

Adoaquien: –Aidbëd iquenquo iccobi –quepanëdash Petedo.

⁵⁹ Adashic yuec-yuecpactsëc ictanec utsitsen: –Nëid Caidia yacnoshon tishaid iquec. Ma bëboedbëd icquidi neyoc –queoapanëdash.

⁶⁰ Adoaquien: —Mimbi chiaidbëd icquidpenquio nebi —quepanëdash Petedo. Aden chuinubien cachina bënë cuëdampanëdash. ⁶¹ Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantiash ⁶² unësquio yec umanuc nidash Petedo shubiquiopanëdash.

Esus sondadon mamënshunaid
(*Mat 26.67-68; Mad 14.65*)

⁶³ Adshumbic Esus cuenushe qeshun abi isquidon, sondadon, Esus mamënshumbedequin cuesbededpanëdash. ⁶⁴ Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquio icquin çmidaquidën mibi nëbi cueseque. Tiantianu. Chui —capanëdash Esus chuiquin. ⁶⁵ Aden cuesbededquin Esus icsamboen chuiipanëdash.

Isadaidbo tsusiobo yacno Esus buanaid
(*Mat 26.59-66; Mad 14.55-64; Uan 18.19-24*)

⁶⁶ Adshumbic badiadnubi isadaidbo tsusiobo iccuededacno Esus buanshun ⁶⁷ nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tiantianu. Chui —quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquio iquendac. ⁶⁸ Adembidi, çMitsipadquidquio Nuquin Papan chomiaid neque? Tiantianu. Èbi chui, cac ëcbedenquio mimbi iquendac. ⁶⁹ Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin Papan dayunquio tsadendabi —quepanëdash Esus isadaidbo tsusiobo tantiamequin chiec.

⁷⁰ Adoaquien: —çNuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

⁷¹ Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquio iquembi ut-sibo chuiquin. Adquid iquec, quequin nuquí tantiec —quepanëdash isadaidbo tsusiobo.

23

Pidato yacno Esus buanaid
(*Mat 27.1-2, 11-14; Mad 15.1-5; Uan 18.28-38*)

¹ Aden ambibi chiec Esus muéc nec, isadaidbo tsusio abentsëc quesho tantiash isadaidbo tsusiobotedi niddoshon Esus bedshun Pidato yacno buampanëdash. ² Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh — quepanëdash isadaidbo tsusiobo Pidato chiec.

³ Adoquien Pidato: —¿Isadaidbo chuiquid dapada ne? — quepanëdash Esus caic.

Adoquien: —Mimbi chiaidquio abimbo iquec — quepanëdash Esus.

⁴ Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

⁵ Adoquien: —Ambi tantiamiaidënquio Cadidia yacnoquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiameoposh —quepanëdash isadaidbo tsusiobo Pidato caic.

Edodes yacno Esus buanaid

⁶ Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

⁷ Adoquien: —Ai. Cadidia yacnoësh choquid Esus nec — quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, quesho tantiashun.

⁸ Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec ⁹ Esus chuimenu quec Edodes onquepanëdash. Adoqui Esusën ëcbedenquio icpanëdash. ¹⁰ Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. ¹¹ Adoac Edodesbëd sondado Esus icsamboen chuiquin mamënshumbededshumbi chuiquid dapan dashcutebimboecquid abichobicquid Esus dasiunshun Pidato yacno buameoapanëdash. ¹² Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

Esus cuesten dectameta quiaid

(Mat 27.15-26; Mad 15.6-15; Uan 18.39-19.16)

¹³ Adashic, isadaidbo tsusiobobëdta isadaidbo utsibo chomeshun ¹⁴ Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aibdëdi onquiash, ¿Cuëshëmianquidta nedic? quendabi. ¹⁵ Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquiocquidquidi nec. ¹⁶ Aden tantiaquin mëyanshun aidi nidmenuna —quepanëdash isadaidbo tsusiobo caic.

¹⁷ Aden chiac naden isadaidbon tantiapandash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo naded cuëdcuededquin: ¹⁸ —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. ¹⁹ Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepandash.

²⁰ Adec isadaidbo cuëdcuededsho tantiash Esus nidmetiadquio iquec: —Esus cuidenquiocquidquidi nec —quepanëdash Pidato isadaidbo caic.

²¹ Adnubien: —Cuesten dectame —capanëdash isadaidbon yuec comapenec cuëdcuededquin.

²² Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantuanu. Ma unës uainquiocquidquidi neyoc. Aden tantiaquin mëyameshun Esus nidmembi —quepanëdash Pidato.

²³ Adoaquien: —Cuesten dectame —quepanëdash cuëdcuededoic isadaidbo Pidato, Ai, camenuc.

²⁴ Adoac iccuededquidon chiacpaden namenuc

²⁵ Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

Esus mëyanaid

(Mat 27.32-44; Mad 15.21-32; Uan 19.17-27)

²⁶ Pidaton, Esus cuesten dectameta, cac sondadon abi decante cuate Esus buamequimbi Simon, Sidene yacnoshon tishaid, chosho bëquedtuiddanquin Esus decante cuate Simon buamiac Esus tsibambëpanëdash. ²⁷ Adec Esus nidsho isun matses dadpenshun shubiquin tsibanampanëdash. Adembidi abi tsibanquid chidobo icpanëdash. ²⁸ Adec chidobo abi tsibanec shubisho tantiash bidiadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta. ²⁹ Yuecash mëyantequid ushë choendac. Aid ushë chonoc bacuë tish-tiapimbocquid caic utsibo nadendac: “Bacuëbo nibëdquid

icquin min bacuëbo natiasho isenquoio mimbi iquec. Adquid yec bédamboshë mibitedi iquec.”³⁰ Mëyantequid ushë chonoc matses utsibon natiambocquin mëyanaqui naden mimbi Nuquin Papa chiendac:

“Natiastianqueique. Acte quiusudquid macuësh dapa catash-metabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

³¹ Èbi buansho isec shubiequi, Èbi mëyantequid ushë choec, quequin tantiesa mibi icpec. Nédënquenuioctiadquidi achuëshquiocquid nédëncasho isash: “¿Tanunquiocquid badedquio nédënquenuio icpec,” quecta mibi icti? Adembidi: “Cuidenquioctiadquidi nec,” queboedëmbi èbi icsaisa unës uasho isash: “¿Èbitedi icsambocquid comapenen cuidenquio icpec,” queopecta mibi ique? Ai, quequin tantiatiad — quepanëdash Esus.

³² Adnubien Esusbëdta icsambocquid dada daëd nidmequimbi ³³ macuësh mapi canite caid yacno choshombi èquë daëd dectambudcuentanquin nënantanquoio Esus dectampañëdash. ³⁴ Dectanac diadequi Esus Nuquin Papa caic: — Èbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacbimboec bëpiscudta, Papa — quepanëdash. Adnubic Esusën dashcute bednuequin sondadon dada uashun tēchun sandoshon cadotanequin dada uatempi puduemebanquin isquin Esusën dashcute bedbampañëdash.

³⁵ Adnubien matses dadpenshun isnubi Isadaidbo tsusiobo isec tabadquin mamëshumbededec: —¿Utsi-utsien Nuquin Papa yacno yuedanquidta nec? Aidi matses mēnchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu — quec onquecuededpañëdash.

³⁶ Adembidi sondadon mamëshumbededquin paëmbocquid mucambocquid sananquin Esus ismequimbi: ³⁷ —Isadaidbo chuiquid dapa iquec unësenquoio iquebi, quiash nëid bednush bud — capañëdash sondadon.

³⁸ Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpañëdash: “Nëid, isadaidbo chuiquid dapa nec,” quequin dada uashun Esusën mapino dectamepañëdash.

³⁹ Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac èbi daëdi mibëd budebi — quepanëdash abëd diadquid.

⁴⁰ Adec Esusbëdta dectamboed abentsëc onquesho tantiash aibdëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? ⁴¹ Icsamboen nabanacsho cuidaid ëbi daëdi nec. Aidi bëdamboequin nabanquid icsho cuidenquioctiadquidi nec —quepanëdash.

⁴² Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

⁴³ Adoaquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

Esus unësaid

(*Mat 27.45-56; Mad 15.33-41; Uan 19.28-30*)

⁴⁴ Adec onquenubi ushë cuembo yanuc bëtinaçbimboec inchëshquio yashic ushë budtsan chënquedoapanëdash.

⁴⁵ Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash. ⁴⁶ Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpanëdash.

⁴⁷ Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdamboequid niosh. Aidi unësenquioctiadquidi unës uaposh —quepanëdash. ⁴⁸ Ambo tabadquin isquid utsibo Esus unëso isash unësquio yec aton shubuno nidanepanëdash. ⁴⁹ Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbededpanëdash.

Esus nauedaid

(*Mat 27.57-61; Mad 15.42, 47; Uan 19.38-42*)

⁵⁰ Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdamboequid icpanëdash. ⁵¹ Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose. Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquio icpanëdash. ⁵² Aidi Esus unëso isash Esusën dada nauedtiadquio yec Pidato yacno nidshun ambi tantiacpaden Osen chuipanëdash. ⁵³ Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaid chucanquio Esus Osen badedquio nauedpanëdash.

⁵⁴ Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

⁵⁵ Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash.

⁵⁶ Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempänëdash. Nacnenash inchëshbudtsëqui seis icnuc Nuquin Papan chiacpadec chonoadtemaid ushë nec, quiash Esus nauedacno nidenquoio yec tabadpanëdash. Nuquin Papan chiacpadec tabadpanëdash.

24

Esus uincuente

(*Mat 28.1-10; Mad 16.1-8; Uan 20.1-10*)

¹ Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocono isec chidobo nidpanëdash. ² Ambo choshon Esus nauedshun bëtashaid cuënote shëcniacsho isashi ³ shëcuën puduedash aton Icho Esusën dada nibëdsho isec tabadpanëdash. ⁴ Adec tabadnubien dada daëd dashcute dasiuidac bimboec dasiuidash chënquec chopanëdash. ⁵ Aid isash dacuëdcuededequi isenquoio yec chidobo tabadpanëdash. Adsho isash dada daëd: —¿Atotsi canuen unësacsho nauedac uincuemiaid nibëne? ⁶ Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuisho tantienquioda icco? ⁷ Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoai bi,” quequin Esusën chiondash —quepanëdash dada daëd chidobo caic. ⁸ Aden chiac chidobon Esusën chiaid abi bëpiscudaaid padpiden tantiapanëdash.

⁹ Aden tantiash Esus nauedaid shëcuë yacnoësh pudue nanec Esus tantiaquid dadpen tabadacno choec puduedshun ambi isboedbëdtabi ambi tantiaboed chidobon chuibampänëdash. ¹⁰ Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Ebi chuibeneta caido chuipänëdash. ¹¹ Aden chuisho tantiash: —Mimbi chiaid tantiatiapimbo iquebi —quecuededpanëdash iccuededquido. ¹² Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaid dashcuteuidi uesho ispanëdash. Aden isanec nidequi: —¿Atodain nechitec? —quepanëdash Petedo tantienquoio yec.

Emaus yacmi nidte
(Mad 16.12-13)

¹³ Adashic abi ushëmbi Edusaden yacnoësh utsibobëd ic-cuededboed dada daëd shubu daëdpactsëc icquid Emaus caid yacno nidpanëdash. ¹⁴ Adec nidequi ambi Edusaden yacnoshon isboedbëdta ambi tantiaboed chiec onquepanëdash. ¹⁵ Aden chiec onquec nidshobi Esusën aid daëdi chinunash aidobëd nidpanëdash. ¹⁶ Aden abi chinuntuidsho isac utsi-bimboec Esus isadpanëdash.

¹⁷ Adec nidequi Esus: —¿Atotsi chuibanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

¹⁸ Adec nidtuidash Quëdeyopas cuëmëdquid: —¿Edusaden yacno tabadtuidquin anoshon naboed mimbiuidtsëqui tanti-amboda icco? —quepanëdash Esus caic.

¹⁹ Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiaid icquin ambi chuibaniaid ambi nabanaidbidi Nuquin Papabëdtan matses dadpenshun bëdamboen isaid icposh. ²⁰ Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. ²¹ Nëbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tanti-apombi. Ëmbi caboedi unës uaposh. Aidi unës uan daëdec ushobi. ²² Adec daëdec ushun dacuëdanquiecnuc chidobon naden chuibededposh: “Esusën dada nauedbocno badiadnuc nidshun isac ²³ nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh. ²⁴ Aden chidobon chuisho tantienquio yec ëbëd icquido Esusën dada nauedbocno nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

²⁵ Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiaidon dada uampid bëdiactsëc tantiatsec tantiesabidi ma mibi neyoc.

²⁶ ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus. ²⁷ Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiaidon dada uampid tantiamequin Esusën chuibanpanëdash.

²⁸ Aden chuibanequi shubu daëdpactsëc icquid Emaus caid yacno anoentsëqui choshon datanshobimboecnuc Esus isun:

29 —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

30 Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. 31 Aden nasho isun badedi, Esus nec, quequin tantianubi Esus nibëdquio yampanëdash. 32 Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

33 Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi utsibo iccuededacno puduedacsho isash: 34 —Abimbo iquec. Nuquin Icbo uincuem-paccosh. Uincuenanec choquin aidëmbi Simon ismetuid-posh —quepanëdash iccuededquido. 35 Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuiapanëdash.

Abëd icboedo yacno Esus chote

(Mat 28.16-20; Mad 16.14-18; Uan 20.19-23)

36 Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

37 Adec aid chosho isash: Podo bitsi nec, quec dacuëdequi abëd icquido tabadpanëdash. 38 Adsho isashien Esus: —¿Atotsi quiash, ¿Esusida nepec? mibitedi quepe? 39 Con mëdantebëdta con taë is. Èbibi nebique. ¿Mëtoccaïd taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

40 Aden chuitanquin abi bëchun shuin mëtoccacaid chiuë aton mëdantebëdta aton taë Esusën ismepanëdash. 41 Aden ismiac, Aidquiobi nec, quenquio yec abëd icquido mamëncuededquin isec bëdambo yanec, Adec uincuentequidshenda dectampac-cosh, quequin tantiec tabadpanëdash. Adec tabadsho isun: —¿Ada pete iquec? —Esusën caquien 42 nuëcquid shëaid cuëshë menepanëdash. 43 Aden meniac bedshun Esusën pepanëdash abëd icquidon isnubi.

44 Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuc.

45 Aden chuishumbic abëd icquido tantiamequioquin:

46 —Nuquin Papan dada uamiampid nad iquec: “Nuquin

Papan chomiaid, Quidistu caid, matsesën mëyanquin unës uaqi daëdec ushash uincuenendac. ⁴⁷ Aid tantiashun mibi icsaid mimbi ënsho isash, Icsaquid nec, quenquo yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoaindac. ⁴⁸ Mëyanquin unës uaqi ëbi uincuenacsho mibitedishun ispoc. ⁴⁹ Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” –capanëdash Esusën.

Esus abuc indote
(*Mad 16.19-20*)

⁵⁰ Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: –Nëidtedi bëdamboen ista, Papa –quepanëdash Esus. ⁵¹ Aden chiacsho abëd capucuenequido niamequin Esus aton Papan abuc indopanëdash. ⁵² Aden indoshu isash, Èbitedishun icbo nec, quequin ismec shuebudash: –Bëdambo iquebi –quianec Edusaden yacno nidanepanëdash. ⁵³ Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nitted-nittedquin Nuquin Papan naid chuidenepanëdash.

Padi. Aidedtada uaoombi, Teyopido.

UANËN DADA UAID

Nuquin Papa tantiamanquid chiaid

¹ Ēndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquibidi yec: —Nadquio Nuquin Papa iquec —quec tantiamanquidquio nec. ² Aidëmbi Nuquin Papabëd icquin ³ abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. ⁴ Aidquio Nuquin Papa yacno tabadmianquid nec. Nuquin Papapadquidquibidi yec: —Nadquio Nuquin Papa iquec —quequin paposhquiacbimboecnuc tantiamanquidbidi Esus nec. ⁵ Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niac-niaquec mibi icsamboec tabadec —quequin chuisho tantiatiapimbo icquin matsesën Esus chieshëmpondash.

⁶ Aden Esusën chuibeniyabi icnuc con shënisio acten mentoanquidëmba Nuquin Papan chiacpadomboen ambi chiaid chuibampondash. ⁷ —“Nuquin Papa yacnuësh abi tantiamequidquio choendac,” quequin Uanën chuibansho tantiashun ma dadpenshun ambi chuiboed tantianu —quequin Nuquin Papan con shënisio abi chuibanquid icmepanëdash. ⁸ Nuquin Papa yacnuësh choacmaidëmbi con shënisio: —Nuquin Papan chomiaid Esus nec —quequin chuibampondash. ⁹ Aden ambi chuiboedquio Nuquin Papa tantiamenuec matsespanëdash Esus.

¹⁰ Adash matsesbëd tabadsho ambi matses uaidombi tantienquio icquin chieshëmpondash. ¹¹ Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquibi dadpenshun Esus tantienquio icpondash. ¹² Utsibombien daëdpactsëcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanëdash. ¹³ —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin ¿ambembi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

14 Adec Nuquin Papa tantiamequidquo Esus matsespanëdash. Nuquin Papan Mado abentsëqui yec bëdamboshë icpondash. Èbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën. 15 Aid con shënision chuipondash. —Èmbi chuiboedquo nec. “Èbi icsaquid icnuc bëdamboshë icquidquo choec,” èmbi caboedquo nec. “Èmbia Nuquin Papan chiaid chuibambon aidëntsen tsyuec choshon chuibanendac. Èbi bëyuc tishaidi tishabi icnubi aid ënden icpampic,” èmbi caboedquiobi Esus nec —quepondash con shënisio.

16 Con shënision chiacpadquidquo icquin abi tantiaquido Nuquin Papan bëdamboen isaïdo icmeshun adenuidi Nuquin Papa nuqui bëdamboen ismec. 17 Èndenquimboshë Nuquin Papan chiaïd dada uaquin Moisesën Nuquin Papan matses icsaïdo cuidte tantiamepampic. Padnuen Esuquidistun Nuquin Papan bëdamboen iste tantiamequin: —Nadquo Nuquin Papa iquec —quequin matses bëdamboen tantiamepondash. 18 Ambi isacmaïdquo icsho matsesën Nuquin Papa bëdamboen tantiatiapimbo iquec. Padnuen aton Mado abentsëcshunquo aton dayun tsadquidëinquiobi matsesun Nuquin Papa bëdamboen tantiamepondash. Aidquo chuïnu. Tantia.

*Tsusiobon chuimiac Uan acten mentoanquidën chiaïd
(Mat 3.11-12; Mad 1.7-8; Duc 3.15-17)*

19 Con shënisio Nuquin Papa tantiabenquid acten mentobenequid niondash. Aden acten mentobenesho isash Moisesën chiampid namequido aid chuimenuc chochopondash. Edusaden yacnocquido isadaïdbo tsusiobon: —Chuïmetan —cac cho-choquin con shënisio chuituidpondash. 20 —¿Tsuntsin chiac nai? ¿Mimbembida nai? “Bëdamboshë icquidquo Nuquin Papan chomendac,” quequin nuquin tsusedpan ¿dada uapampidta ne? —catuidpondash. Adoquien: —Padenquo. Aidpenquo nebi —quepondash. 21 Adshobien: —¿Tsumintsi ne? ¿“Naden naindambi,” quequin Nuquin Papan chiaïd chuibanquidquo unëspampid Edias uincuenaidta ne? —caquien: —Padenquo. Aidpenquo nebi —queoapondash. Adshobien padpiden: ¿Tsumintsimbo ne? “Moïsespadquidquo choendac,” ¿capampidta ne? —caquien: —Padenquo. Aidpenquo nebi —queoapondash con shënisio.

22 Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuïmetan,” caboed chiec nidnu. Baded èbi chui —caquien: 23 —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bēdamboshē icquid chomiabi icnuc aid bēyunquec utsiba choendac. Aidēn shubu nibēdacno capucuenequin chuibanendac naden.

‘Chuiquid dapambo choeque. Podqued andēdbanshunta,’ quiaczimboen chuiquin: ‘Nuquin Icbo choeque. Icsaid ēnash bēdamboec tabadta,’

quequin chiendac bēyuc choshon,”

quequin chuipampid nebi —quepondash con shēnisio.

²⁴ Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shēnisio chuituidpondash. ²⁵ —Utsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: ²⁶ —Nuquin Papan chiacpadomboen abi tantiabenquido acten mentobenec nebi. Ēmbi aden bēdamboen nanuc utsimbien bēdamboenshē naindac. Aidi mibēdi tabadshobi ma mimbi tantienquio icboc. ²⁷ Ēmbia Nuquin Papan chiaid chuibanombi. Aidēntsen tsyuec choshon comapenen tantiaquin Nuquin Papan chiaidquio chuiquin Nuquin Papambo tantiamendac. “Aidi bēdamboshē icquid icnuc ēbi icsaquid icsho ¿atotsieshun: ‘Aid choec,’ quequin chuiquidquio Nuquin Papan icmioshi?” quec tsadebi —quepondash con shēnisio padiseyobo chiec. ²⁸ Acte Odan caid uquē cuēmatsiucuešh shubu dadpen icquid Betania caid yacnuēšh adpondash.

Abided cuidadtequid nendac, Esus caid

²⁹ Badiadshun padpiden con shēnision matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquio obeca bacuēbimboecquid choeque. Aidi isadaidbon obeca bacuēded cuidquin unēs uaczimboec matses icsaid bedshunec abided cuidadec unēsendac. ³⁰ Ēmbi chianeboedquio nec. “Ēbi bēyuc tishaidi tishabi icnubi aidi ēnden icpampic,” quiash: “Ēbi bēdapabi icnuc bēdamboshē icquidquio choendac,” quepobi. ³¹ Aid chosho con matses isadaidbo tantiamenuen Nuquin Papan acten mentobenequid icmiondashi. Adondaidēmbi ēmbibi badedquio tantienquio iccombi. “Nuquin Papan chomiaid nec,” quequin tantienquio iccombi —quepondash con shēnisio.

Esus mentoaid

(Mat 3.16-17; Mad 1.9-11; Duc 3.21-22)

³² Adashic abi onquec: —Nuquin Papan naden ismiac tantiabenombi. Aton Mayan aton dada nibēdquieci dēbimbimboec budec: “Matsadtoendac,” quebocpadequi Esus matsadtosho ispombi. ³³ Adsho isash: “Adquidshenda caposh Nuquin

Papan: ‘Acten mentoanquid icta,’ ëbi caboedën. ‘Con Mayan dëbimbimboec budec matsadtoedën abi tantiaquidobëd con Mayan tabadmendac,’ Nuquin Papan caboedshenda nepec,” quiobi Esus caic. Ëmbembi tantienquio ictsenombi. ³⁴ Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquio Esus nec,” quequin mibi chiec nebi – quepondash con shënisio.

Nëid dada uaquid Uan Esusbëd yanaid

³⁵ Adashic badiadash ambi acten mentobambocno con shënisio nidoapondash. Aid tsibanequi nidoapondabi.

³⁶ Adec nidquin isquien Esus cuempec. Cuensho isashien con shënisio: –Is. “Nuquin Papan namiaidquio obeca bacuëbimboecquid nec,” ëmbi caboed cueneque –quepondash.

³⁷ Adsho tantiatanequini con shënisioibëd iccondaïd utsibëd Esus chinunec nidpondac. ³⁸ Nidquin chinunac bidiadquin istanequien: –¿Atotsi quec ne? –quepondash Esus. Adshobimbi: –Mibi isec nebi, Dabi. ¿Mitsimbo mibi ushaque? Isnü –capondambi. –Chuiquidquio nec –quequin con onquetembi Dabi caondambi. ³⁹ Adoac: –En isec cho –cac abi ushacno isec nidondabi. Ushë abucquio icnuc puduedash yuec tabadec onquetaniash inchështsëcnubi chondabi.

⁴⁰ Ëbëdtan Esus chinunondaïd Andedes niondash. Shubu dadpen icquid Betsaida caïd yacnuësh caniquid niondash. Aton buchi Petedo niondash. Petedobidi Simon capondash. ⁴¹ Adnubien Andedes aton buchi chiec nidpondash. Adec nidquin Petedo istuidash: –Nuquin tsusedpabon chuipampid Nuquin Papa yacnuësh choquid Mesias caïd istuidombique. En isec cho, buchi –capac caondash. Nuquin Papa yacnuësh choquid Quidistu cashumbic con onqueten Mesias caic.

⁴² Aden chiaquien aton buchi Esus isec chopondash. Chosho isash Esus: –Uanën mado mibi nec. Mibi Simon nec. “Nidaïd moco utsi uatiapimbo yacbimboec mibi chieshtoenguo icquid yanendac,” quequin mibi nidaïd moco cuëmendambi –quepondash Esus Petedo caic. Con onqueten nidaïd moco cain Sepas capondash Esusën. Quidieco mat-sesën onqueten Petedo capondash.

Esusën Uedipebëdta Natanaïd istuidaïd

⁴³ Badiadash: –Con nidaïd Cadidia caïd yacno nidnu –quianec nidpondash Esus. Adec nidquimbi Uedipe istuidpondash. Istuidshun: –Nuquibi icnu. Cho –caquien Uedipe chopondash. ⁴⁴ Betsaida yacnuësh caniquidbidi nepondash aid.

⁴⁵ Esusbëd icquid yanashic dada utsitsen Natanaïd caïd chiec nidpondash Uedipe. Adec nidquin istuidshumbien: –Isec

cho. Moisesën chiampicpadomboen chuiquin nuquin tsused-pabo utsibon: “Bëdamboshë icquid choendac,” quequin dada uapampicpadequi choshe. En isec cho. Shubu dadpen icquid Nasaded caid yacnuësh caniquid neque. Osen mado nec – quepac caondash. ⁴⁶ Adsho tantiash: –¿Nasaded yacnuështa dada bëdambo icquid chopatsiash? Auëshquio dada bëdambo icquid chotiapimbo iquendac –quepac caondash Natanaid. Adsho tantiash: –En isquiec cho –quepac caondash Uedipe.

⁴⁷ Adoac choshobien Esusën: –Is. Isadaidbombo neque. Muesambo nec –caquien ⁴⁸ Natanaidën: –¿Mitsipaden ëbi tantie? Mabi mimbi isacmaidquio nepayoc –capondash. Adoaquien: –Uedipen bedtanabi icnubi mibi cuëte icueda caid tayun tsadsho tantiombi –capondash Esusën. ⁴⁹ Adsho tantiashumbien: –Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac –capondash Natanaidën: –Istiapimbo yacno chiosh –quequin tantiashun. ⁵⁰ Adoaquien Esusën: –“Cuëte icueda caid tayun tsadsho mibi tantiombi,” ëbi qesho ¿tantiash: “Nuquin Papan Madombobien nec,” badedquio que? Padpiden comapenen tantiaquin nabansho isun mimbi ëbi tantiaquiotsiandac. ⁵¹ Tantia. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bëdabo Nuquin Papa yacno dectationesho isash: “Aidbëd tabadte Nuquin Papan ëbi tantiame-tiadquio iquec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abëd tabadte tantiamec,” quequin mimbi ëbi tantiendac – quepondash Esus abëd icquido chiec.

2

Esusën ambembi actequid uaid

¹ Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobëd Esusën tita puduedpondash. ² Esustsen puduedpondash. ³ Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. – Actequid naimëdoshe. Comapenen tantiaquid icquin mimbi tantiacpadomboen nata, mado –capondash. ⁴ Adoaquien: –¿Atotsi quequin mimbi ëbi chuipe, tita? Chiata. Con Pan tantiacpadënquio naimbique –quepondash Esus. ⁵ Adsho tantiatanquin anin yuabo actequid cushtobanquido chuipondash. –Con madon chiacpadomboen nata –capondash.

6 Ambobi tëchu dapa 6tedi tabëcaid icpondash. Mëpamëdtembo acte nua 120 ditedos cactembi anidboedi acte naimëdaid icpondash. 7 Adnubien Esusën: —Në tabadquidën acte cushtoban —cac cubu-cubuctsëcquio icnuc acte cushtobampondash yuabon. 8 Cushtobanacsho isun Esusën: —Ueshun buanshun mibi ancaquid acmetan —cac acmetampondash.

9 Adoac acquin tanaquien actequid bédamboshë icquid icpac caondash acte ichoedi. —Nibëda damboedquio ¿mitsimbo bedpash? —quepac caondash yuabo ancaquid. Adsho tantia-shun yuabon: —Esusënquiobien naccosh —quequin tantia-pac caondash. Adnubien yuabo ancaquidën chido bednuequid chuipondash: —Aidën actequid bēpash —qeshun. 10 —Nuquin matsesën actequid bédambo icquidba isedanquido acmequid nendac. Adquid acmiac matses nua cubudacsho isash: “Actequid icsactsëcquidtsen acmenu,” quequid yendac. Aden mimbi nambo. Bédambo icquidquio ma mimbi nëbi acmianeyoc —quepondash yuabo ancaquid chido bednuequid chiec. Adnubien yuabon actequid bédamboshë icquid abitedi acmebampondash.

11 Aden comapenen tantiaquid icquin ambembi actequid uaquin Esusën tauamboen ismebempondash. —Nuquin Papa yacnuësh choquid yec comapenen tantiaquidquio nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshon-quo. Adosho isun: —Con matsesën chiampid Nuquin Papan chomiaidien nec —quequin tantiaabenondambi.

Esusën chushcaquin cuemiaid

(Mat 21.12-13; Mad 11.15-18; Duc 19.45-46)

12 Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abëd icquido yec ëbi yec quec Esusbëd nidaniondabi. Ambo daëdpactsec ushec tabadondash. 13 Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unës uainquio icquin Nuquin Papan matamiampid inchësh tantiaquin obeca bacuë pec nëbi tabadeque. Isec nidnu. Nid —quianec nidanepondash. 14 Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nëish yua chedobëd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec ut-sibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen

bedshun ampeshunquin daëdpactsëc menequido niondash. ¹⁵ Adec tabadsho istanquimbien Esusën cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiacbanquin piucquid siabudshumbampondash. ¹⁶ Adotanquimbic dëbimbimboecquid yuaquidotsen chushcapondash. —Baded mitsana buanec nid. ¿Piucquid bednuen shubu uaidta nedic? Ma con Pa tantiata shubu neyoc —quequin chushcapondash.

¹⁷ Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusën nate chuiquin dada uapampic —quequin tantiondambi.

¹⁸ Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien ¹⁹ ismenquio icquin ompoacbimboen Esusën chuipondash. Abibi cadequi: —Mimbi nëid shubu icsa uabocsho padpiden nacennoaindambi bëdambo icnuc. Daëdec ushquin nacenquin nainendambi —quepondash Esus. ²⁰ Adsho tantiash Nuquin Papa tabadte shubu uashunaid dapa ca danec: —¿Badedquioda nacenmpatsia? Nëid nacenquin seta dadpenquioshë 46tedquiobi matamiac cadenec —quepondash con matses chuiquido.

²¹⁻²² Yuecquio ictaneshun Esusën aden chiaid tantiondambi. Unës uacsho chococac daëdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daëdec ushquin nacenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

Dadpeshun Esus tantiauidaid

²³ Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen comapenen tantiaquin nabanquin Esusën ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —queshun Esus bëdiactsëc tantiatsëccondash. ²⁴ Aden tantiatsëcsho ambembi tantiash: —Ai, ëbi tantiaquidquio nec —quenquio icquin: —Ëbi bëdiactsëc tantiatsec —quequin tantiapanëdash. ²⁵ Utsin chiambobi ambembi tantianëdash. Aden matses abitedishun otacquio tantiaid ambembi tantiaquidquio Esus niondash.

3

Esusën Nicodemo caid chiaid

¹ Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. ² Inchëshën Esusbëd onquenuec chopondash. Choshombic aidëmbi: —“Nuquin Papan icmiacpadquid chuiquidquio mibi nec,” quequin tantiembi. Mimbi comapenen tantiaquin nabansho isun: “Nuquin Papan nami-aidënuidsëquien adotsiash,” mibi caombi —quepondash.

³ Adsho tantiashun: —Ai, adquid nebi —quenquio icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquio ictsiac ⁴—quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapimboen iquec —quepondash Nicodemo. ⁵ Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquio iquebi,” quiash bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. ⁶ Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. ⁷ “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec. ⁸ Tantia. Mibi chuinu. Cunquequid isadenquio icquid nec. Isadenquio icquimbi cuncac cuëte ishcu-dsho isash: “Abi cunquec,” mibi quepec. Adquiobidi isadenquio Nuquin Papan Mayan iquec. Isadenquio icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienguio icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

⁹ Adsho tantiash: —¿Midapadec? —quepondash Nicodemo. ¹⁰ Adoaquien: —¿Tantienguioda ique? Ma isadaidbo Nuquin Papan chiaid chuibanquid mibi neyoc. ¹¹ Ënden ushë utsin mibi chedo chiombi. Ëmbi isondaidquio chuiquinc ëmbi tantiondaidquio chuiquinc caombi. Adsho tantiash: “Tantiadenquio iquec,” ma mibi quebec. ¹² ¿Ëmbi chuiboed tantiadenquio icnubi padpiden chuiquin ëmbi Nuquin Papan abi yacnoshon naid chuishomenda tantiatsia? ¹³ Nuquin Papa yacno matses nidtanambo iquec. “Istanombi. Nadquio iquec,” quequin chuitiapimbo matses iquec. Ëmbien Nuquin Papa yacnuësh chondaidënguio: “Nadquio iquec,” quequin Nuquin Papa tantiamendac. ¹⁴ ¿Atotsi canuen nuquin tsusedpa Moisesën nisibimboecnuc shocosh nacnenaid dec-

tampampic? “Nuquin Papan chiapadec ma aid isec nisin pi-aid bēdanu,” quequin cuesten dectampampic. Adomboembidi matses cuidmenquo icnuec cuesten dectamēdendabi ēbided ciudadec unēsec. ¹⁵ Ēbi tantiaquido unēsacsho cuidenquo icquin Nuquin Papa yacno ēbēd tabadmenuec adendabi —quepondash Esus Nicodemo chiec.

Nuquin Papan matses abitedi tantiaquin naid

¹⁶ Aden Esusēn abided ciudadec unēste chuipondash. Nuquin Papan: —Ma adec abided ciudadec unēsnu —quequin Esus chomepanēdash. —Unēsquo iquec —quequin matses abitedi tantiaquidquo icquin Nuquin Papan cudasenquo icquin matsesmeshun aton Mado abentsēcquiobi abided cuidpanēdash. —Ēmbi adoaid con Mado tantiaquid unēsacsho ic-saido cuidacno nidmenquo icquin ēbēdi tabadmendambi —quequin aton Madoded cuidpanēdash. ¹⁷ ¿Matses cuidnuenda Nuquin Papan Esus matsesmeapanēdash? Padenquo. Matses cuidenquo icnuen napanēdash.

¹⁸ Aden aton Mado Esus tantiaquido cuidenquo icquin Esus tantiesabo cuidendac: —Con Mado chieshēmpec —queshun. ¹⁹ Nuquin Papan matsesmiaidēn Esusēn abi ic-said chuisho matses icsambo icquidon tantiatiapimbo iquec. Ambi icsamboen naid ėntiapimbo icquin Esus tantiatiapimbo iquec. ²⁰ Adquidon: —Ēbi icsaid Esusēn utsibo tantiamenushe. “Icsambo iquec,” ēbi canushe —queshun Esus chieshēmpec. ²¹ Nuquin Papan chiapadec tabadquidombien Esus chieshēnenquo iquec. —Nuquin Papan namiacpadec tabadquid nebique. Ma Esusēn ėmbi bēdamboen naid chuibampanuna —quiash Esus tantiate bumpec.

Uan acten mentoanquidēn Esus chuioaid

²² Adec Nicodemobēd onqueboshien Esus nidpondash. Edusaden yacnuēsh nidec aid nidaidēmbi Udeya caidēn capucueniondash. Abēd nidshobini Nuquin Papan chiaid Esusēn chuibampondash. Adec nidshun Nuquin Papa tantiabenuido acten mentobeniondambi. ²³ Adnubien adomboembidi con shēnisiontsen acten mentobeniac caondash. Enon caid yacnoshon Sadin caid anoentsēqui chunquen diadacnoshon matses dadpen acten mentoac caondash con shēnision. ²⁴ Chieshēmēnquidon quēnēn nauedabi adoac caondash.

²⁵ Adnubien con shēnisiobēd icquido con matses utsibēd: —Mimbi icsamboen chiec —quec chushcananac caondash.

Con shënisiobëd icquido: —Uanën Nuquin Papa tantiabenquido bēdamboen acten mentobamposh —quesho tantiash: —Padenquio. Esusēmbien bēdamboen acten mentobaniosh —quepac caondash. ²⁶ Adshumbien con shënisiobëd icquidon: —Nuqui chuiquid chiec nidnu. Nid —quianec nidquin con shēnisio chuituidpac caondash. —Acte Odan caid uquē cuēmatsiucshun ħmitsicquid: “Nuquin Papan chomiaid nec,” mimbicadio? Aidēn mimbic naid dēniacquin matses dadpenquio acten mentobeniac caosh. ħAda bēda icpec? —caquien: ²⁷ —“Nuquin Papan chiapadomboen Esusēn nash. Adombombimbi naic,” quesahun Esus chieshēntiapimbo iquendabi. ²⁸ “Nuquin Papan chomiaidpenquieni nec,” quequin mibic chiondambi. “ ‘Nuquin Papan chomiac bēdamboshē icquid choendac,’ quequin bēyuc choshon aid chiec nebi,” quiondabi mibic chiec. ²⁹ “Ēmbic chuibod nec,” quias Esus chosho istanec cuishonquepobi. “Con matses aton chido bedmimbi,” quias cuishonquiacbimboec cuishonquepobi. ħAden chido bedmequidēn: “Min bēnēbēd nidenda,” caquinda ictiosh? Padenquio. Bēnēbēd nidmias bēdambo yacbimboec Esusbēd nidanesho isash bēdambo iquebi. ³⁰ Ēmbic Nuquin Papan chiapadomboen Esus tantiamequin ēnquin chuibanic ēmbic acten mentoaido daēdpactsēc yanendac. Ēmbic chuibodquio Esus tantiaquidoen dadpenquio yanendac. Aidquio bēdamboshē iquec —quepac caondash con shēnisio abēd icquido chiec.

Nuquin Papa yacnuēsh choquid chiaid

³¹ Adshumbic con shēnision naden chuiyac caondash. —Esusquio bēdamboshē iquec. Nuquin Papa yacnuēsh choquid abipadquid utsi nibēdec. Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusēmbien ³² ambic isondaidbēdta ambic tantiondaidquio chuipec. Aden chiaqui matses dadpen: “Abimbo caic,” quenquio icpec. ³³ Esus tantiaquidon: “Nuquin Papa muesambo nec. Ambic: ‘Bēdamboshē icquid choendac,’ quequin dada uamepampidquio Esus nec,” capec. ³⁴ Nuquin Papan chomiaidquio icquin Nuquin Papan chaidquio Esusēn chuibanic. Nuquin Papan aton Mayan abēd tabadmiaid icquin comapenen tantiaquin ismebanquin chuibanic. ³⁵ Ambic tantiaidquio icsho aton Papan abitedishun Icbombo icmiac. ³⁶ Adnuc: “Abitedishun Icbombo Esus nec,” quequin aton Mado tantiaquido unēsacsho Nuquin Papan abēd tabadmendac padpidec unēsenuio icnuc. Esus chieshēnquidoen Nuquin Papa yacno isenuio yec icsaido cuidquiacno nidendac —quequin con shēnision chuiyac caondash.

4

Acte uequid chido Esusën chiaid

¹ Esusbëd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: —“Uan acten mentoanquidën naid dëniacquin Esusën matses dadpenquio acten mentobanosh,” quiosh —queshun Esus chieshëmpac caondash. ² Esusën nainquio icnuc ëmbimbo nasho isun chiaqui aden Esus chieshënac caondash. ³ —Mibi adosh —cac: —Con nidaidën nidnu —quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

⁴ Aid podquedën nidequi nidaid utsi yacno Samadia caid yacno nidpondash. ⁵⁻⁶ Adec nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: —Ëbi unësan nëid tied: “Con na nec,” cata, mado —quequin aton mado Ose chiampid tied niondash. Ambo aidën uëdëshcampid acte uete icpondash. Aid dayunquiobi: —Tiboquenu —quec Esus tsadtuidpondash. ⁷⁻⁸ Adec tsadtu-idnubini: —Pete bedtanu —quianec shubuno nidanepondac. Esus abentsëqui nianec nidaniondabi. Adec nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien: ⁹ —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbëd onquesambo isadaidbo nec —quequin tantiec adac caondash.

¹⁰ Adshobien Esusën badedquio cuembo chienquio icquin chuipac caondash. —Nuquin Papan bëdamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bëdambo icmianquid mibi acmetsiambi —quepac caondash Esus. ¹¹ Adoquien acte uequid chidon actembo ca danquin: —¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte uquëducquio iquec? ¿Mitsimbo acte bëdambo icmianquid ueshun ëbi acmetsia? ¹² Nëid acte nuquin tsusedpa Acobon uëdëshcapampid nec. Aton yuabobëdtan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquio icquin nai? ¿Bëdamboshë icquid icquinda mimbi acte bëdamboshë icquid ëbi acmepatsia? —capondash acte uequid chidon. ¹³ Adoquien: —Nëid acash mibi bundoac. ¹⁴ Ëmbi acmiac mibi bundoenquio ictsiac. Acte bëdambo icmianquid acmiac ënëdenquio yec tabadquid mibi yantsiac —quepac caondash Esus badedi cuembo chienquio yec. —Ëbi tantiaquidobëd con Mayan tabadmiac bëdambo

yanec unēsacsho ēbēdi tabadmendambi —quequin tantiec adac caondash.

¹⁵ Adsho tantiashun padpiden acte ca danquin: — Adquidquo ēbi acme. Bundoenquo yec nēmbo acte uec choenquo ictsiabique —caquien: ¹⁶ —Min bēnē bedtan —capac caondash Esusēn. —Nuquin Papan chomiaidquo yec comapenen tantiaquid mibi nec —camenuen adoac caondash. ¹⁷ —Min bēnē bedtan —caquien acte uequid chido: —Con bēnē nibēdec —quepac caondash. Adshobien Esusēn: —Abimbo mimbi caic. Min bēnē nibēdec. ¹⁸ Dada mēdante auc abentsēctedquiobi min bēnē icpadenec. Aidon mibi niambudnian nēbi mibēd icquid min bēnēpenquo nec. Abimbo mimbi caic —quepac caondash Esus.

¹⁹ Adsho tantiash: —Isambobi comapenen tantiaquidien mibi nechitec. Mibipadquidquo chiec: “Nuquin Papan chomiaidquo nendac,” quepec con matses. Adquid icquin en ēbi chui. ¿Mitsishunquiemi Nuquin Papa bēdamboen tantiape? ²⁰ Con matses: “Nēmboen Nuquin Papa iquec. Nēid macuēsh dapanshunuidtsēqui Nuquin Papa tantiac bēdambo ictsiash,” quepec. Min matsesien: “Edusaden yacnoshonuidtsēqui Nuquin Papa tantiac bēdambo ictsiash,” quepec —quepac caondash acte uequid chido. ²¹ Adsho tantiashun Esusēn: —Tantia. Mibi bēdamboen chuinu. Nēbi nēid macuēsh dapanshunuidtsēqui Nuquin Papa tantienquo icquin Edusaden yacnoshonuidtsēqui tantienquo icquin nidaid utsi-utsiec yacnoshon adembidi Nuquin Papa tantiabededendac. ²² Min matsesēn Nuquin Papan chiaid daēdpactsēc tantiatsēcshun Nuquin Papa bēdiactsēc tantiatsec. Con matses isadaid-bombien Nuquin Papan chiaid dadpen tantiashun: “Nuquin Papan chomiaid nuquin matses bēdambo icmianquid nuquin matsesēn tishendac,” quequin bēdamboen tantiec. ²³ Nēbien utsin-utsinquien muainquo icquin: “Con Icho nec,” quequin Nuquin Papa tantiendac. Ambi chiacpadec bēdamboec tabadsho isash: “Adquid ēbi tantiaquidquo nec,” quetsiash Nuquin Papa. ²⁴ “Nuquin Papa tantiaquid ictiadquo iquebi,” quequidēn Nuquin Papan Mayanēn tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

²⁵ Adsho tantiash chido: —“Nuquin Papan matses bēdambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidēmbi nuqui tantienquo yaidtedi tantiametsiash. Aid-bimboecquidien mibi nechitec —caquien: ²⁶ —Mimbi chi-aidquiobini nec —quepac caondash Esus chido chiec.

Esus Samadia yacnocquido chiec tabadaid

²⁷ Adnubini pete bedtanec chopondac. Adshun isquien chidoböd onquepec. Adsho isash: —¿Atotsi chiec chidoböd onquepec? —quepondabi utsiböd otacquo onquec. —¿Atotsi chiec chidoböd onquo? —cainquo iccondambi Esus. ²⁸ Adec ëbi chonobi tēchu nianec acte uec choquid chido nidpondash aton matses chiec shubuno nidec. ²⁹ —Isec cho. Ęmbi isacmaid dadan Ęmbi naid abitedi chioshi. ¿Nuquin Papa yacnuësh choquid Quidistu caidta nioshe? En isec cho —catuidac: ³⁰ — En isnu. Nid. Aidien nechitashe. Isnu —quianec matses dadpen cho-chopondash.

³¹ Aido choabi icnubi: —Në pete, Icbo —ëmbi caquien: ³² — Padi. Mimbi tantienquo yaid con na utsi iquec —quepondash Esus petepenquo chiequi. ³³ Adsho tantiashini pete ca danec: —¿Utsibonda pete bëshumpash? —quecuededpondac ëbitedi. ³⁴ Adsho tantiash Esus: —Ębi cuishoncamete utsi iquec. Ębi chomiondaid Nuquin Papan chiacpadomboen naic bēdambo iquebi pete piacbimboec. Ambi chiaidtedi nainuec dayacquio iquebi —quepondash. ³⁵ Adashic padpidec: — “Ushë daëd-daëdquiecnuc nidmeshun nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden ¿yuecshunda nēmbi icquidon ëbi tantiabempec? Padenquo. “Nëidon Esus tantiendac,” mimbi cacmaidobi cho-choeque. Is. ³⁶ Acte uequid chido ëmbi chuiboedën chiac matses dadpen cho-choeque. Chuibanuna. Ębi tantiash Nuquin Papaböd tabadtequid yanendac. Adsho isash nuqui cuishonquendac piucquid bedashbimboec. ³⁷ Tied icbon: “Con na peta,” cac ambi nidtsinacmaid matsesën bedec. ³⁸ Aden ambi nitsinacmaid bedachimboen mimbi naic. Utsibomba Nuquin Papan chiaid chuibanēdaido nēmbi icquido mimbitsen chuibanec. Adoac nēmbi icquidon Nuquin Papabēdta ëbi tantiabenec. Cho-choeque. Is. En chuiban —capondash Esusën aböd icquido chuiquin.

³⁹ Adnubien Esusböd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. ⁴⁰ Cho-choquimbi badedi: —Ębi yacno ushquin chiec cho —quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. ⁴¹ Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. ⁴² Adashic acte uequid chido chiec: —Mimbi chuishouidi tantiaboedëmbi nēmbi aidēnquo chuisho bēdamboen tantiaquioc. “Nuquin Papa matses bēdamboen ismequid nec,” quequin tantiembi —quiampondash Samadia yacnocquido dadpen.

Chuiquid dapan mado Esusën bēdamiaid

⁴³ Daēdec ushanec Samadia yacnuēsh Esus nidondash. Abi caniondacno nidaid Cadidia caid yacno nidpondash. ⁴⁴ — Ēmbi chiacpaden abi caniondacnoshon Nuquin Papan chiaid chuibanquidēn chuisho aton matsesēn tantienquio iquec. Con nidaidēn nidsho con matsesēn abi chuiquid dapa icmeti-apimbo icpebi —quianec aton nidaidēn chopondash. ⁴⁵ Adsho isun: —Tantiesa nendac —Esusën caboedombi abi bēdiactsēc tantiatsēccondash. —¿Choecta icco? Nuquin Papan nuquin tsusedpabo unēs uainquio icquin matamiampid inchēsh tantianuec Edusaden yacno nidshun mimbi nadatiambo icquin nabansho isondambi —quepondash abi bēdiactsēc tantiatsēcquido Esus chiec.

⁴⁶ Adec aton nidaidēn nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidēn mado unēs-tiadtsēcquio yampac caondash. ⁴⁷ Adashic: —Esus Udeya yacnuēsh choac caoshe. Istanu —quianec chopac caondash unēstiadtsēcquio icquidēn papa. Adec Esus yacno choshombien: —Con mado unēstiadtsēcquio iccoshe. Bēdamec cho —caqui ⁴⁸ nidenquio yec abi datsidadquido chiec: —Ēbimbo mimbi tantienquio iquec. Ēmbi bēdameteuidtsēqui mimbi tantiec. Ēmbi comapenen tantiaquin nabansho isunuidtsēqui: “Nuquin Papan chomiaidien nechitec,” quequin mimbi tantiec —quepondash Esus.

⁴⁹ Adec onqueshobien abi niachidanquin padpiden: —Baded cho. Con mado unēstiadtsēcquio iccoshe —capondash. ⁵⁰ Adoaquien Esus: —Padi. Min mado unēsenquio ye. Nidec nid —quesho tantiash: —Abimbo caic —quianec nidpondash. ⁵¹ Adec nidquimbi abi chiuuec cho-chosho aton yuabo bēquedac caondash. Aden bēquedaqui yuan: —Min mado bēdanosh —quesho tantiashun: ⁵² —¿Mitsimbo ushē icnuc con mado bēdanosh? —cac: —Ēnden ushē yaquēduidsēcnubi da una yantsēcnubi bēdanosh —quepac caondash aton yuabo. ⁵³ Adsho tantiash: —Adēnquioshendabi: “Min mado unēsenquio ye. Nidec nid,” caposh Esusën —quepac caondash unēstsemboedēn papa. Adshun: —Nuquin Papan chomiaidquio yec comapenen tantiaquin nabanquidquio Esus nec —quequin aton shubun icquidobēdtambi Esus tantiapac caondash. ⁵⁴ Adec Udeya yacnuēsh choash Cadidia yacnobidi ambi uba chinaid actequid uaquin ismequin tauaondacnobidi tabadquin bēdamequintsen Esusën ismepondash.

5

Esusën dada icsatsaid bēdamiaid

¹ Yuecquoio ictanec Esus: —Edusaden yacno cuēdēnuec nuquin matses cho-choeque. Nuquitsen nidnu. Nid —quianec nidanepondash. ² Shubu dadpen icquid Edusaden caid dacuenadquin daquēnē uaid puduedte shēcuē dadpen icnuc abentsēc obeca puduedte caid icpondash. Aid anoentsēqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mēdantetedi icpondash. ³ Acte nēnantanquoio icnuc dacuenadquiec shubumpi tabadquidēn matses dadpen tabadpondash daicsaidouidquoio. Bēshuaido yec capuenquoio icquido yec canite tsasiaido yec quec tabadpondash. ⁴ —“Nuquin Papan abi yacnoshon uaid mayan bēdan tēccuascaid acten abia mentoadquid bēdanquid,” quedeneque. Tēccuascaic ma chobono —quiash cainec tabadpondash.

⁵ Adnubien Esusën ēnden caniaidquoio ambobi uesho istuidpondash. Ēndenquimboshē aton dada icsabudash seta dadpen 38tedquiobi matamec capuenquoio yec icsabudt-saidquoio nepondash. ⁶ Adsho istuidshun: —Ēdenquoio daic-sabudaid nec —quequin tantiashun: —¿Bēdanteda bune? —catuidpondash Ēsusën. ⁷ Adoaquien: —Ai ¿mitsipadequini bēdampe? Ēbi bēdiactsēcquoio nidnuc utsiba badedquoio mentoadteniosh. Ēbi buanquin mentoquid nibēdec —quepondash daicsatsaid. ⁸ Adshobien Esusën: —Min ushte nacentanquin buanec nid —cac ⁹ badedquoio aton dada bēdantanquin aton ushte buanec nidpondash. Aid ushē chonoadenquoio icte ushē niondash.

¹⁰ Aden buanshobien con matses chuiquidon: —¿Chonoadenquoio icte ushēnda ushte buampaid? Chonoadte ushēmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. ¹¹ Adoaquien: —Ēbi bēdameboedēn: “Buanec nid,” cac mambi naiyoc —quepac caondash Esusën bēdameboed. ¹² Adsho tantiashun: —¿Tsuntsin naosh? —caquien: ¹³ —Tsauidi. Ēmbi isacmaid Ēmbi isquiambobi badedquoio nidaccosh matses dadpen icnuc —quepac caondash bēdameboed.

¹⁴ Adshumbic Nuquin Papa tabadte shubu uashunaid daquēnē uacno puduedshun ambi bēdameboed daicsacboed Esusën istuidpondash. Istuidshumbien: —Tantia. Mibi chuinu. Ēmbi bēdameboedquoio mibi neque. Mimbi icsamboen naid ēnash bēdambo icta. “Nuquin Papan cuidquiac bēdanenquoio yec daicsabudquiochitomane,” quiash adta —capondash Esusën.

¹⁵ Adoquien bédameboed abi: “¿Tsuntsin naosh?” caboedo chiec nidpac caondash. Nidshumbic: —Ëbi bédameboed Esus niosh —quequin chuituidpac caondash. ¹⁶ Aden chuisho tantiatanequien: —Chonoadenquio icte ushënuidi bédamepac caosh. Icsambo iquec —quequin con matses chuiquidon Esus chieshëmpac caondash. ¹⁷ Adnubien: —Mibi adosh —quesho tantiashun abi chieshënquido istuidshun Esusën naden chuipondash. —Mimbi Nuquin Papa caid con Pa ënenquio icquin matses nashunquidquio nec. Adecbidi ënenquio icquin matses nashunquidquio nebi. Chonoadenquio icte ushëmbidi con Pabëdtan adoquid nebi —quepondash Esus. ¹⁸ Adsho tantiatanequien: —“Chonoadenquio icte ushën naquid icsambo iquec,” nuqui caboedquio: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquio nebi,” quechitequien nioshe. Cuesunequimbien ictiad —quepac caondash con matses chuiquido.

Nuquin Papan Mado nebi, quiaid

¹⁹ Adec abi chieshënquido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquio. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. ²⁰ Ëbi tantiaquin Con Pan ambi naidtedimbo ëbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenquio icquid bédamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. ²¹ Con Papadquidquio yec unësaid uincuemquidquio nebi. Matses ëmbi tantiaidotedi ëbëdi tabadmenuen uincuemendambi. ²² ¿Ëbi tantiesabo cuidnuen ambiuidtsëqui chuiquidta con Pa nedic? Padenquio. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesa icsambo icsho cuidnuna,” caindambi con Pa. ²³ Aidëmbi: “Ëbi tantiacpaden ma con Madotsen bédamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatiapimbo icquidon ëbi chomiondaid Nuquin Papatsen tantienquio iquec. ²⁴ ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësascho cuidenquio icquin ëbëdi tabadmendambi. Cuidtequid icboedi ëbi tantiash ëbëdi tabadtequid yanendac —quepondash Esus.

²⁵ Adashic padpidec onquec: —Tantia. Mibi padpiden chuinu. Unësaidën tantienquio yacbimboen ëbi tantien-

quo icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësacsho uincuemeshun ëbëdi tabadmendambi. ²⁶ Con Pan icmiacpadequi unësaid uincuemequid nebi. Abibi unëstiapimbo icquid icquin unësaid uincuemequidquo con Pa nec. Ambi icmiacpadquiequi abi yacpadquidquo iquebi. ²⁷ Adec unëstiapimbo iccondaidi matsesash icsaisambo icsho Con Pan matses ic-saido cuidquid icmiondashi. ²⁸ Ëbi adsho tantiashun: “¿Abimbobida capeba? Muequien nechitec,” ëbi cainda. ¿Muectabi nedi? Padenquo. Con Pan tantiacpadënquo ëmbi cuënac unësaidotedi uincuenendac. ²⁹ Adec uincuenacsho ëbi tantiaquido ëbëdi tabadmequin ëbi tantiesabo icsaido cuidacno nidmendambi. ³⁰ Ëmbentsëqui nainquo iquemi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquo icquin Con Pa bëdambo icmenuen aidën chiacpadomboen naimbi –quepondash Esus abi chieshënquido chiec.

Utsintsen ëbi chiec, quequin Esusën chiaid

³¹ Adshumbic Esusën abi chieshënquido chuiopondash. –Nuquin matsesën naden chiec. “Abentsëcshun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” qesho tantiashun: “Abimbo mimbi caic,” mimbi ëbi catiapimbo iquec. ³² Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. ³³ Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec. “¿Nuquin Papa yacnuësh choquidta ne?” quequin mimbi chuitanac: “Padenquo. Esusuidi Nuquin Papa yacnuësh choquid nec,” quepadenec Uan pado. ³⁴⁻³⁵ Aden chieshtoenquo icquin bëdamboen chuipadenec. Chuisho tantiatsash mibi bëdambo icuidtsëcondac. “Ëmbi Uan padon naid chuisho tantiashun: ‘Abimbo mimbi caic,’ ëbi capashun. Ëbi adosho bëdamboen istsiambi,” quequin mimbi tantiondaid Uan caombi. Matses icquimbi Uanën ëbi bëdiactsëc tantiamequin chuipadenec. ¿Adquid matsesënuidtsëquidabi abimbo chuipec? ³⁶ Con Pambien: “Con Mado neque. Matses ismenu,” qeshun comapenen tantiaquidquo icmepondashi. Ambi adomiaid icquin comapenen tantiaquin nabanquin ëmbi ismesho isash: “Ai, adquid nec,” quetiadquidi mibi nec. ³⁷ Ëbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onqesho ¿ada mimbi tantiapadio? ¿Nuquin Papada istio? Padambo mimbi iquec. ³⁸ Adembidi ambi dada uamequin chiampidquid ma mimbi bëdamboen

tantienquoio yoc. Aid bēdamboen tantiashumbien Nuquin Papan chomiondaid ēbitsen mimbi tantiatsiac. ³⁹ Mibi nadpec. “Nuquin Papan chiaid nuquin tsusedpabon dada uampid tantiaquidquoio nebi. Aid isbanquid yec Nuquin Papabēd tabadtequid nebi,” mibi quepec. Ma ēbimbo chuiquin Nuquin Papan dada uamepampid neyoc. ⁴⁰ Aden dada uamepampid isbanquidombi mimbi ēbi tantienquoio iquec. Ēbi tantiashoembi mibi Nuquin Papa yacno ēbēd tabadmetsiandac. ⁴¹ “Ēbi adsho tantiashun ma matsesēn ēbi: ‘Bēdambo mibi iquec,’ canu,” ¿quectabi ique? Padenquoio. Con Pan chiacpadomboen nanuembimbi aden chioc. ⁴² Ēbi tantienquoio icsho isun: “Nuquin Papa tantiesabo nec,” quequin mibi tantiembi. ⁴³ Ēmbien Nuquin Papan chiacpadomboen naic. Aden nasho mimbi ēbi tantienquoio iquec. Utsi: “Nuquin Papa yacnuēsh choquid nebi,” quec muaquidien mimbi badedi tantiatsiac. ⁴⁴ Mibibi tantiadec: “Mibi bēdambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bēdambo iquec,” cametiapimbo iquec —quepondash Esus abi chieshēnquido chiec.

⁴⁵ Adashic padpidec: —¿Ēmbentsēquidambi: “Ēbi tantiesabo neque. Cuidnuna,” quequin mimbi naid Nuquin Papa chuipe? Padenquoio. Mimbi tantiaidēnquoio Moisesēntsen: “Nēido icsambo iquec,” mibi caindac. ⁴⁶ Aidēn chiampid bēdamboen tantiaquimbien mimbi ēbi tantiatsiac. Aidēn chiampidi mabi neyoc. ⁴⁷ Aden Moisesēn chiampid tantienquoio icquin ēmbi chuiboedtsen mimbi tantiatiapimbo iquec —quequin Esusēn abi chieshēnquido chuipondash: —Moisesēn chiampid tantiaquidquoio nebi —quequido chuiquin.

6

*Esusēn pete uatanquin 5000tedi pemiaid
(Mat 14.13-21; Mad 6.30-44; Duc 9.10-17)*

¹ Yuecquoio ictaniash Edusaden yacnuēsh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabēdtoshon potiacpondash. Aid chiambidi matses utsibon Tibedias capondash. ²⁻³ Poteshun nandoash pudundoanec macuēsh dapa dectatoash macuēsh poctsebi tabadtuidpondash. Ambo tabadquin ēbi chedo chuipondash. Adnubien Esusēn matses dadpen bēdamesho isboedo Esus isnuec cho-chopondash. ⁴ Nuquin Papan isadaidbo unēs uainquoio icquin matamiampid inchēsh tantianuec pec tabadte ushē nēbi yanuc niondash.

⁵ Aido cho-chosho istanequien Esus: —Uedipe, piucquid buanshun ¿mitsimbo pete bedtane nēido pemenun? — quepondash Uedipe chiec. ⁶ —¿Atoda queque? Tantuanu — quiash adpondash Esus. —Pete bedabi icnuc ëmbibi pete uanu —quequin otacquo tantiequi adondash. ⁷ Adoaquien Uedipe: —Ma aidtedquo pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac aidtedquo pemiadenquo ictsiash —quepondash Uedipe.

⁸ Adnubien Andedesën Petedon utsin: ⁹ —Ma nē madompin panëmpi 5tedtsëc icpayoc, Icho. Nuëcquidëmpi daëdquiobi ictsec. Matses dadpenquo iquec. Aidtedtsëcquid pemetiapimbo iquec —caquien ¹⁰ Esusën: —Padi. Aidi bēdambo iquec. Abitedi: “Nēmbo tabad,” caban —cac: —Nēmbo tabad —cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

¹¹ Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bēdamboshë iquec. Mimbi uaid nēid pete bēdambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanquimbic nuëcquidëmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembi pebedednubi utsibon ambi piactembidi pebededpondash. ¹² Aden ambi piactembi pebededacshobien Esusën: —Napi uaid secainda. Sandoshon dayun ua —cac ¹³ tsitsan dapan napiuaid sandoshon dayun uapondambi tsitsan 12tedquiobi sandoaid icnuc.

¹⁴ Aden pemiaquien pemiaido: —Comapenen tantiaquin Esusën pete dadpenquo icmiac. Moisesën chuipampidshenda nepec. “Nuquin Papan bēdamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquo yec. ¹⁵ Adsho ambembi tantiashien: —Abi chuiquid icmenuen ëbi “Bednu,” caique. Nēbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

Esus acte bëntse choaid
(Mat 14.22-27; Mad 6.45-52)

¹⁶ Esus cuembon inchëshbudtsëqui chian budondabi ëbitedi. ¹⁷ —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. ¹⁸ Adnubien cunquequid dapa cunquetuidpondash. Acte

comapenec tēccuasquenuc ¹⁹ uncadenquo yampondash. Ēnapan nidabi nēbi 6 quidometedos cactiontsēqui nidshun isquien matsesbimboec acte bēntse chopec. Adsho istanec dacuēdquiondabi. ²⁰ Adshobini: —Ēbi neque. Dacuēdenda —capondash. ²¹ Adoac: —Esus nec —quetanquin badedi antsadtomiondambi. Aid antsadtometanquin badedquo potepondambi. Nandoash ambobi ushondabi Capednaun yacno.

Pemiaidon Esus istuidoaid

²² Adnubien abi pemebocnobi matses ushpac caondash. Badiadnuc isucunshun isaquien Esus nibēdec. Nibēdsho isashien: —Ma cano abentsēcquidēmbi abēd icquidon potepaboc. Ma aibdēd nidenquo icpaboc. ¿Mitsimbo nidpash? —quepac caondash pemiaido. ²³ Adnubien shubu dadpen icquid Tibedias caid yacnocquidon cano dadpen bē-bēpac caondash. Pete pemebocno anoentsēqui nando-nandosho isash: ²⁴ —Potequimbien Esusēn yashe. Nēid canobi antabēdtoshon potenuna —quetanec antabēdtoshon potiac-potiacpac caondash.

Potiac-potiacash Capednaun yacno pudundoshon ²⁵ Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquo yec: ²⁶ —Tantia. Mibitedi chuinu. ¿Ēbimbo tantianucta chodio? Padenquo. Ēmbi pete uasho isash: “Nuquin Papan namiaidēn naoshe. Istanu,” ¿quecta ictio? Peteuidtsēqui tantiaquin ma mimbi ēbi nibēneyoc. ²⁷ Peteuidtsēqui tantiaquin pete bednuen naquidquo ma mibi neyoc. Aidquo chodquetequid nendac. Chodquetiapimbo icquid tantiaquin bēdamboen nata. Aden nash ēmbi icmiacpadquiec Nuquin Papabēd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus. ²⁸ Adsho tantiash: —“Nuquin Papan chiacpadomboen nata,” quepequien mibi iquec. Adomboen natiadquo icquin ¿atotsimbi nape? —caquien: ²⁹ —Nuquin Papan chiacpadomboen natiadquo icquin ambi chomiondaidquo tantiata —quepondash Esus ambi pemiaido chiec.

³⁰ Adoquien: —¿Mimbi aden chuishouididambi: “Adquid nec,” quequin tantiape? ¿Atotsi utsi comapenen tantiaquin mimbi ēbi ismepatsia? ³¹ “Ēndenquimboshē pete nibēdacnoshon Moisesēn con tsusedpabo nibedbēdi sequiaid pete pemi-anepampic,” quequin dada uapampid isombique. Adquid nacnenquin ēbi isme —quepondash pemiaido peteuidtsēqui tantiec. ³² Adoquien Esus: —Nuquin tsusedpa Moisesēn nainquien icpampic. Con Pambien aden pemepampic. Nēbi

ambi chomiondaid petebimboecquid utsien Nuquin Papan mibi tantiametiadquio iquec. ³³ Aid petebimboecquidën matses bédambo icmetsiash pete piacbimboecnuc —quepondash Esus abibi cadequi.

³⁴ Adsho tantiash petembo ca danec: —Ënenquoio icquin adquid ëbi pemeta —quepondash pemiaido ambi peboe-duidtsëqui tantiec. ³⁵ Adshobien Esusën: —“Ëbiuidtsëqui petebimboecquid icquin matses bédambo icmequid nebi,” caïmbi. Ëbi tantiaquid ënenquoio icquin bédambo icmendambi petebëdi acte bundoenquoio yacimboecnuc. ³⁶ Ëmbi chuibocpadom-boen ma mimbi ëbi tantienquoio icboc. Ëmbi comapenen tantiaquin nabansho isumbi ma mimbi ëbi tantienquoio icboc. ³⁷ Utsibombien ëbi tantiendac. Nuquin Papan tantiamiaidtedishun ëbi tantiasho bédamboen isquin cacumenquoio iquendambi. ³⁸ ¿Ëmbi tantiacpadomboen naquidtabi nedi? Padenquoio. Nuquin Papan chiacpadomboen nanuec mabi abi yacnuësh chondac. ³⁹ Aden aidën chiacpadomboen nanuen ëbi tantiaquido unësacsho uincuemeshun cuidenquoio icquin ëbëdi tabadmendambi. Unësaid abitedi uincuemetete ushën adoendambi. ⁴⁰ Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombo tabadmendambi —quepondash Esus ambi pemeboedo chiec.

⁴¹ Adec: —Nuquin Papa yacnuësh chondaïd yec petebimboecquid nebi —quesho tantiashien con matses chuiquido: ⁴² —¿Adquidida nepec? Ma icsamboen chuiipayoc. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmëdquid neyoc. Ma Osen mado neyoc. Anitsen tantiembi. Matsesën tishaid Nuquin Papa yacnuësh choquid ictiapimbo iquec —quecuededpondash.

⁴³ Adshobien Esusën: —Shoshquetsëcquin ëbi icsamboen chienda. Abimboembi caoc. ⁴⁴ Ëbi chomiondaïdën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatsiac. Aden Nuquin Papan ëbi tantiamiaido unësacsho unësaid uincuemetete ushën uincuemendambi. ⁴⁵ Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bédamboen iste matses tantiamendac,” quequin chuiapampic. Aden Nuquin Papan tantiamiaido ëbi tantiaquido yantsiash. ⁴⁶ “Ambi tantiamiaïdën matsesën Nuquin Papa ispash,” quenquoio iquebi. Ëmbiuidtsëqui abëd icquin Nuquin Papa isondambi. Aden abëd icquin abi isondaïdi matsesondabi —quepondash Esus: —Matsesi nec —abi caquido chiec.

⁴⁷ Adashic padpidec: —Abimbo caombi. Ëbi tantiaquido

Nuquin Papa yacnombo ëbëdi tabadmendambi.
⁴⁸ Petebimboecquid icquin aden tabadmendambi. Adecbidi bëdamboec tabadmianquid nebi. ⁴⁹ Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi. ⁵⁰ Petebimboecquid utsien Nuquin Papa yacnuësh chonaid nëmbobi iquec. Aid piash ëmbi chiacpadquiec padpidec unësenquio yec Nuquin Papabëd tabadtequid yanendac. ⁵¹ Adquidquio nebi. Con nami piash matses unëstiapimbo icquid yanendac. Adquidquio matses icmenuec ëbided cuidadquin con nami menendambi –quepondash Esus ompoacbimboen chiec. –Ëbi tantiaquido nëbi bëdamboen tabadmeshun unësascho Nuquin Papa yacno ëbëdi tabadmendambi padpidec unëstiapimbo icnuc –quequin tantiec: –Petebimboecquid icsho ëbi piash matses unëstiapimbo icquid yanendac –quepondash Esus. –Ëbi tantiaquido cuidmenquio icnuc ëbided cuidadec unësendabi –quequin tantiec: –Con nami menendambi –quepondash Esus.

⁵² Adec: –Con nami piash matses unëstiapimbo icquid yanendac –quesho tantiashien namimbo ca danec con matses chuiquido onquecuededpondash. Utsi-utsiec: –¿Mitsipaden Esusën aton nami nuqui pemepatsiash? Aidquio tantiatiapimbo iquebi –quecuedednubi utsi-utsiec: –¿Atotsi chuitiadquio yec niosh? Chuisho tantianu –quecuededpondash. ⁵³⁻⁵⁴ Adsho tantiashun Esusën ambi chiacpadomboembidi chuiopondash. –Tantia. Mibi chuinu. Matses tantiacquidquio nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bëdamboec tabadquid yanash Nuquin Papabëd tabadtequid mibi yanendac. Adquid icsho unësaido uincuemete ushënquio uincuemendambi ëbëdi tabadmenuen. Ëmbi chiacpadomboen nainquio yash Nuquin Papabëd tabadtiapimbo mibi iquendac. ⁵⁵ Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bëdambo icpatsia? Adecbidi con intac chididiquec con nami icsabudec ëbided cuidadec unësaid tantienquio yec mibi bëdamboec tabadtiapimbo iquendac. ⁵⁶ Aden ëmbi namibëdta intac chuisho bëdamboen tantiashun ëmbi chiacpadomboen matsesën natiadquio yanendac. Adsho isun aidbëd tëshnanenquio icquin bëdamboec tabadquid icmendambi. ⁵⁷ Nuquin Papa unëstiapimbo icquid yec matses uincuemequidquio nec. Aidën chomiac ambi namiacpadomboenuidi naquin ëbi tantiec tabadquid unësascho uincuemequin unëstiapimbo icquid icmendambi. ⁵⁸ Aden ëmbi naid

tantiamenuec: “Nuquin Papa yacnuësh chondaid petebimboecquid utsi iquec,” quiobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampidpadquidpenquoio nebi. Adquid pequidi tsusiobudash unëspampic. Ëbi tantiaquidien padpidec unëstiapimbo icquid yanendac ⁵⁹—quepondash Esus Nuquin Papan chiaid chuibante shubunuësh Capednaun yacnuësh.

Abi tantiauidquidon Esus nianondaid

⁶⁰ Adec: —Con nami pequinc con intac acquinc cash mibi bëdambo ictsiac —Esus qesho tantiashien abëd icquido utsi-utsiec: —Aidën chiacpadomboen natiapimbo iquebi. Icsamboen chiec —quepondash Esus tantiamenquoio yec. ⁶¹ Adec onqesho ambembi tantiash Esus onqueoapondash. —¿Ëmbi chuiboed tantiash chieshtotiadquioda ique? ⁶² Nuquin Papan matsesmiad yequi unësash ëbi iccondacno ëbi nidacsho isash ¿atoda mibi quendac? Abimbo caombi. Nuquin Papa yacnuësh chondaidini nec. ⁶³ Namimbo intacquiobëdta ca danequien mibi nec. ¿Namimbo pequinc intacquoio acquinc cashta mibi bëdambo icpatsia? Padenquoio. Nuquin Papan Mayanën ëmbi chuiboedbëdta ëbi tantiamenquin matses bëdamboec tabadquid icmetsiash. Adoaid unësash Nuquin Papa yacno ëbëdi tabadtsiash —quepondash Esus cuembo chiec. ⁶⁴ Adashic padpidec: —Ëmbi aden bëdamboen chiacqui utsin-utsinquien mimbi ëbi tantienquoio yanendac —quepondash abi tantiauidquido chiec. Aido tauamboec abëdi nidnuc: —Nëidën ëbi tantienquoio yanendac. Nëid utsin ëbi chieshënquido ëbi bedmendac —quequin ambembi Esusën tantiapanëdash.

⁶⁵ Adashic padpidec: —Ëbi tantiauidquido tantiaquin naden chiombi. “Nuquin Papan tantiamiabi yaidën ëbi tantiatiapimbo iquendac. Nuquin Papan tantiamiadënenquien ëbi tantiatsiash,” quequin chiombi —quepondash Esus. ⁶⁶ Adsho tantiashun dadpenshun Esus nianondash. ⁶⁷ Aden nianaquien Esusën abëd icquido 12ted icquid chuipondash. —¿Mimbitsendabi niampe? —caquien ⁶⁸ Petedo: —Padenquoio. ¿Tsudabëd icnuendambi mibi nianuc? Mibipadquid utsi nibëdec. Mimbuidtsëquien: “Ëbi tantiaquid bëdamboen isquin unësacsho uincuemeshun ëbëdi tabadmendambi,” quequin chuipoc. ⁶⁹ “Abimboen caosh,” quequin mibi tantiembi. “Nuquin Papa yacnuësh chonëdaid yec bëdamboshë icquidquien nec,” caombi mibi. Mibi niantiapimbo iquebi —quepondash Petedo Esus caic. ⁷⁰ Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ëmbi adonaid abentsëc Satanasën

namiaidquio yec icsamboshë iquendac —quepondash Esus.
⁷¹ —Simon Iscadioten mado Udasën ëbi chieshënquido ëbi
 bedmendac —quequin ambembi tantiash adondash Esus.

7

Aton utsibon Esus tantienquio yaid

¹ Abi tantiauidquidon nianac Cadidia yacnoudi yuec
 Esus capucuenepondash. —Nidaid Udeya caid yacnoc-
 quido con matses chuiquidon ëbi cuesunetiadquio iquec
 —quiash Udeya yacno nidenquio icpondash. ² Adnubien
 con matses abitedi: —Edusaden yacnuësh cuëdëntanu —
 quiampondash. Adanec nidaid utsi Udeya caidën nidec
 7tedec ushec cuëdënuec matses dadpen nidacno Edusaden
 yacno nidanepondash. Cuëdënuec Esus nidenquio icpon-
 dash. ³ Adec nidenquio icsho isumbien aton utsibon: —
 Edusaden yacno nidec nid. Mibëd ictiadquio icquid ano
 icnushe. Comapenen tantiaquin nabanquin aido ismec nid.
⁴ ¿“Ma matses dadpenshun ëbi tantianu,” quequinda matses
 daëdpactsëc yacnoshonuidi napec? Matses dadpen yacno
 nidshun comapenen tantiaquin nabanquin ismec nid —
 capondash aton utsibon. ⁵ —Nuquin Papan chomenëdaidquio
 nec —quequin tantienquio icquimbi adopondash aton utsi-
 bon.

⁶ Adoaquien Esus: —Matses dadpen nidnuc nidtiadquio
 yec mibia nidta. Abitedishun isnuc nëbi nidtiapimbo ique-
 bique. ⁷ Mibien anocquidon chieshëntiapimbo ye. Mibia nidta.
 “Nuquin Papan chiaid niac-niaquec mibi icsaic,” ëmbi cac
 chieshënondashibique. ⁸ “Cuesunenushe,” quiash nëbi nidti-
 apimbo iquebique. Mibia nidta. Nuquin Papan tantiacpadec
 nidendabi ⁹ —quiash anobi Cadidia yacno Esus tabadpon-
 dash.

Esustsen Edusaden yacnuësh cuëdënuec nidaid

¹⁰ Aden aton utsibo nidanemiash yuec-yuecpactsëc ictanec
 abitsen Esus nidpondash Edusaden yacnuësh cuëdënecc nidec.
 Abitedi ismenquio yec tsyuec Esus nidpondash. ¹¹ Adnubien
 con matses cuëdëncuededacnoshon abi chieshënquidon Esus
 nibëmpac caondash. —¿Mitsimbo icpec? ¿Ada nëmbo chosh?
 —quequin chuibenepac caondash. ¹²⁻¹³ Adsho tantiash con
 matses Esus chieshënquido dacuëdënecc utsibo tantiamenquio
 yec sho-shoshquetsëcquiecc onquepac caondash. Utsi-utsiecc:
 —Esus bëdamboshë icquid nec —quenubien utsi-utsiecc: —Ma
 icsambo icquid neyoc. “Nuquin Papa yacnuësh chondaidini
 nec,” quec ma muequi neyoc —quec onquecuededpac caon-
 dash.

¹⁴ Adnubien con matses cuëdë nec taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. ¹⁵ Adsho tantiash: —¿Mitsipaden tantiashun chuipen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. ¹⁶ Adsho tantiash Esus: —Ëmbembi chienquio icquin ëbi chomiondaidën chiaidquio chiec nebi. ¹⁷ Nuquin Papan chiacpadomboen natiadquio icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquio chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. ¹⁸ Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquieni nec. Ëmbien: “Ëbi chomiondaidquio ma matsesën tantianu,” quequin ambi chiaidquio chiendac. ¹⁹ Mimbien adoenquio iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquio dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshëncquido chiec.

²⁰ —Mimbi ëbi: “Cuesunenu,” caoc —Esus quesho tantiashumbien ano tabadquidon: —Podobitsi icsa dapuduedash mibi tantiadenquio yec onquepec. ¿Tsuntsin mibi cuesunepatsiash? —capondash. ²¹ Adoaquien Esus: —Nëidën ëbi cuesunetsiash —quequin chienquio yec: —Chonoadenquio icte ushën comapenen tantiaquin dada bëdamepondambi. Aden bëdamicsho isash: “Adopenshenda naic. Chonoadenquio icte ushën daicsatsaid bëdamequin Nuquin Papan chiaid niac-niacposh,” ma mibi quepondac. ²² ¿Ëmbentsëquidambi chonoadenquio icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” qeshun Abadauanëmbien shui dëbid dëteshunequin tauapampic. Yuecquio ictaneshun adem-bidi Moisesëntsen adopampic. Nëbi adem-bidi naic chonoadenquio icte ushëmbi chonoadquimbi ma mimbi shui dëbid dëteshuneyoc. ²³ Aden Moisesën chiampid niaquenquio icquin shui nacnenquin mimbi bëdamboen naic. Ëmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? ²⁴ Chonoadenquio icte ushën dada bëdamequid icsho: “Icsambo mibi iquec,” mimbi ëbi capec. Aden ëbi bëdamboen tantienquio icquin mimbi icsamboen

chiec. Ëbi bēdamboen tantiaquioshon ëmbi naboed bēdamboen chui –quepondash Esus abi chieshēnquido chiec.

Esus bedshun cuesunetiad, cauidaid

²⁵ Adec Esus: –Chonoadenquio icte ushēn naondambi –quesho tantiashien anocquido Edusaden yacnocquido nadec onquecuededpac caondash. –Nuqui chuiquidon: “Cuesunetiad,” caboedien nēid nechitec. ²⁶ En is. Abi chieshēnquidobēdi tabadquin chieque. Chuisho ma chuiquidon chushcainquio icboc. “Nuquin Papa yacnuēsh choquid Quidistu caid Esus nec,” quequin tantiashumbien nachitec –quetanequien ²⁷ aidobidi: –Nuquin Papa yacnuēsh choquid ictiapimboen aid iquec. Abi caniacno tantiembi. Nuquin Papa yacnuēsh choquid abi caniacno tantiadenquio ictsiash –quepondash ano tabadquido.

²⁸ Adsho tantiashun Esusēn Nuquin Papa tabadte shubu uashunaid daquēnē uacnoshon chuibanquin abitedi tantiamenuen naden chuipondash. –“Ëmbi isonaid nec. Aton nidaid Cadidia caid yacnuēsh caniquid nec,” ¿quequindabi bēdamboen tantiapadi? Ma mimbi padenquio yoc. Ëbembi chondaidpenquio nebi. Ëbi chomiondaid abi iquec. Ma mimbi aidquiobi tantienquio yoc. ²⁹ Ëmbien aidquio tantien-dac. Aidbēd tabadondaaidquio nebi. Adsho aidēn: “Nid,” cac chondaid nebi –caquien ³⁰ –“Con pa Nuquin Papambo nec,” quechitequien nec –queshun abi chieshēnquidon: –Cuesunemenuembien bedtiad –quetanquin: –Bednu –caqui bedadenquio icpondash. –Nēbi ma Esus unēs uainquio icnu –Nuquin Papa quenuc bedmenquio icquin Esusēn mētampañēdash. ³¹ Esus cuesunetiadquio icnubien ut-sibon dadpenshun Esus tantiabempondash. –Nēidpadquid utsi nibēdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tanti-aquin Esusēn matses bēdamebamposh. Nuquin Papa yacnuēsh choaid Quidistu caid Esus nec –quequin dadpenshun Esus tantiabempondash.

Ëbi istuidenquio iquendac, quequin chiaid

³² Aden Esus chiec sho-shoshquetsēcquieq onqueshobien Esus chieshēnquidon padiseyo caidon tantiapac caondash. Adshun abēdtan chuiquid utsibo chuipac caondash. –Ëmbi chuibocpaden Esusien bedtiad. Icsamboec onquioshe –cac: –Ai, adembien ictiad –quepac caondash. Adshumbic abēd icquido sondado chuiquin: –Baded bedtan –capac caondash. ³³ Adoac nidanequin tantiatuidaquien nadec Esus onquepondash. –Yuec-yuecpactsec mibēd icashic ëbi chomiondaidbēdtsen tabadoaic nidendabi. ³⁴ Ëbi nibēnquin

ëbi istuidenquo mimbi iquendac. Ëbi nidacno mibi nidtiapimbo iquec —quepondash Esus.

³⁵ Adsho tantiash abi chieshënquido: —Nuqui istuidmenquo icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuiatsiash? ³⁶ Tantiadenquo yec onquepec. ¿Atotsi quepec? “Ëbi nibënquin mimbi ëbi istuidenquo iquendac. Ëbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

Aton Mayan abi tantiaquidbëd tabadmete chiaid

³⁷ Adnubien cuëdënec ënëdte ushënquiobi con matses abitedimbo cuëdënuec cho-chopondash. Cho-choash tabadbudnubien nidtoash comapenec onquequin Esusën chuipondash. —Acte natia bunacimboec Nuquin Papa tantiate bunquin ëbi bëdamboen tantiata. ³⁸ Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobëd tabadmendambi. Adoac mibëd tabadquin mibi bëdamboen tabadmequin ut-sibotsen Nuquin Papa tantiate bumetsiash —quepondash Esus. ³⁹ —Nuquin Papabëdta ëbi tantiamequidquo Nuquin Papan Mayan nec —quequin tantiec adondash. Adquid abi tantiaquidobëd tabadmequin chomiabi aden chuipondash Esusën. Nuquin Papa yacno nidambien abi tantiaquidobëd Nuquin Papan Mayan tabadcuenondash.

¿Nuquin Papan chomiaidta nepeba? Esus caid

⁴⁰ —Nuquin Papa tantiate bunquin ëbi tantiata —Esus qesho tantiashien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chimpidien Esus nechitec —quenubien ⁴¹ utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? ⁴² Padenquo. Nuquin Papan chiaidquo naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquo nec —quepac caondash. ⁴³ Adec dadpen: —Bëdambo icquid nec —quenubi aitedbidi: —Icsambo iquec —quepac caondash. ⁴⁴ Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

Isadaidbo chuiquid dapabon Esus chieshënaid

⁴⁵ Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien: ⁴⁶ —Ma bēdamboenshē chuiboc. “Adomboen chuibanquid utsi nibēdec,” queshun bedtiapimbo iccobi —quesho ⁴⁷ tantiashien: —Aid muasho tantiashun: “Abimbo caic,” ¿cainda icco? ⁴⁸ ¿Adambi Esus muasho tantiadio? ¿Ada tsusiobon tantiadiosh? Padenquio iccosh. ⁴⁹ Utsibombien tantiash. Adquidon ěmbi bēdamboen tantiacpadomboen Nuquin Papan chiampid tantienquio iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshēnec.

⁵⁰ Adnubien inchēshēn puduedash Esusbēd onquiondaid Nicodemo caid abitsen chuiquid yec nadpac caondash. ⁵¹ —¿Abibi chuimiabida cuidpec? Nuquin Papan chuipampid nad iquec. “ ‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bēdambo ictsias. Chuimiabi cuidac icsambo ictsias —quepac caondash Nicodemo abēdtan chuiquid utsibo chiec. ⁵² Adoquien chuiquido: —Esus yacpadec Cadidia yacnuēsh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuēsh Nuquin Papan chiaid chuibanquidquio choenquio iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic. ⁵³ —¿Chuimiabida cuidpec? —quetsēcsho aden Nicodemo chushcanec abitedi nidaniac caondash aton shubuno ushec nidec.

8

Bēnēpenquio chudmequid cuēnoten seshunetsenaid

¹ Nicodemo chushcabon Esus macuēsh dapa Odibos caid yacno ushec nidondash. ² Adtanec choashic Nuquin Papa tabadte shubu uashunaid daquēnē uaidēn puduedpondash. Puduedsho isash matses dadpen cho-choec abi datsidadsho Esusēn chuipondash.

³ Aden chuinubien con matses tsusiobon aton bēnēpenquio chudmesho istuidshun chido bēpondash. Moisesēn dada uampid chuibanquidobēdtan tsusedpabon chiampid namequido padiseyobon Esus yacno bēshun chido nēnantanquio nitsimpondash. ⁴ Adshumbien Esus chuipondash. —Aton bēnēpenquio chudmesho istuidshun nēid bēombi. ⁵ Nuquin Papan chiaid Moisesēn naden dada uapampic. “Aton bēnēpenquio chudmesho istuidshun cuēnoten seshunequin unēs uaquid,” quepampic. ¿Adembidida mimbi tantie? —quepondash chido bēquido. ⁶ —¿Atotsi Esus quepatsias?

Nuquin Papan chiampidquio chienquio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquio icquin shuebudshun mëdanten nidaid dada uapondash. ⁷ Adshobien padpiden: —¿Adembidida tantie? —cado-cadoac nidtotanec: —Nuquin Papan chiaid niaquesambo icquin en mimbria cuënoten se —quetanec ⁸ padpidec shuebudshun mëdanten nidaid dada uaoapondash.

⁹ Adnubien: —Nuquin Papan chiaid niaquesambo icquin en mimbria cuënoten se —cac: —Nuquin Papan chiaid niaquesamboen nibëdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouditsëqui Esusbëd icnuc. ¹⁰ Adec nidanian Esusën nidtoquin isquien nibëdec. Nidaniac. Abi bëboedo nidaniacsho istanquin: —¿Mitsimbo nidosh, champi? ¿Mibi cuënoten sequidta nibëdosh? —Esusën cac: ¹¹ —Ai, nibëdosh —quesho tantiashien: —Ëmbimbo mibi cuënoten senquio iquembique. Mibi icsaid ënash bëdamboec tabadec nid, champi —capondash Esusën. Adoac chido nidondash.

Pabiate cuembo icnuc tantiamequid

¹² Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshënquido tantiamequin padpiden chuoapondash. —Pabiate cuembo icnuc con Pan bëdamboen iste matses tantiamequidquio nebi. Ëmbi tantiamiac ëbi tantiaquido icsateuidi bunenquio yanec bëdamboec tabadte bun-cuenendac. Adec ëbëd tabadtequid yanendac —quepondash Esus.

¹³ Adsho tantiash abi chieshënquido: —Mibentsëqui: “Adquid nebi,” quesho tantiatiapimbo iquebi. Muequien mibi nechitec. Matses daëdshun chiac bëdambo ictsiash —quepondash. ¹⁴ Adsho tantiash Esus: —Ëbibibi abimbo cadebi. “Con Pa yacnuësh chondash anobidi nidendabi,” quec muainquio iquebi. “Aton papa yacnuësh choash anobidi Esus nidoaindac,” quequin ma mimbi ëbi tantienquio icboc. ¹⁵ Cadidia yacnuësh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nëid icsambo iqueque. Cuidnuna. Nëid bëdambo iqueque. Cuidenquio icnuna,” quequin nëbi chienquio iquembi. ¹⁶ Aden chuiquin abimbo chuitsiambi. Ëmbentsëqui chienquio icquin ëbi chomiondaid Nuquin Papabëdtambi chuiquin abimboshë chuitsiambi. ¹⁷ Nuquin Papan chiaidquio Moisesën naden dada uapampic. “ ‘Icsaosh,’ quequin daëdshun chuisho tantiash: ‘Abimbo chiec,’ quequid yendac. Adecbidi: ‘Bëdambo iquec,’ quequin

daëdshumbidi chuisho tantiash: ‘Abimbo chiec,’ quequid yendac. Abentsëcshun chuishoen mua caquid yendac,” quequin Nuquin Papan chiaidquio Moisesën dada uapampic. ¹⁸ Aden Moisesën dada uampid tantiashun ëmbentsëqui chienquio iquemi. Ëbi chomiondaid con Pabëdtantsëqui chiemi –quepondash Esus.

¹⁹ Adsho tantiashun abi chieshënquidon: –¿Mitsimbo papa icpec? –capondash. Adoaquien: –Con Pa ëbëdta ma mimbi tantienquio icboc. Ëbi tantiaquimbien mimbi con Patsen tantiatsiac –quepondash Esus abi chieshënquido chiec. ²⁰ Abi chieshënquido onquecuededec quënë tabadnubi aid quënë cachotsëqui Nuquin Papa tantiaquin piucquid menequin nauedte tabëcacoshon Èsusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: –Ma ëmbi tantiacpadënquio matsesën unës uanu –quenuc Esus bedabi icpondash.

Utsibon Esus tantiauidaid

²¹ Adnubien Esusën abi chieshënquido padpiden chuiopondash. –Nidendabi. Ëbi nidan ëbi nibënquin mimbi ëbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac –quequin chuipondash Esusën. ²² Adsho tantiash Esus chieshënquido: –¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Ëbi nidacno mibi nidtiapimbo iquec,” quepec? –quepondash abi chieshënquido. ²³ Adsho tantiash Esus: –Mibi matses nec. Ëbien con Pa yacnuësh chondaidquio nec. ²⁴ “Adquid icsho ëbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi –quepondash Esus.

²⁵ Adsho tantiash abi chieshënquido: –¿Mitsipadquid icquin ëbi aden chie? –quepondash Èsus caic. Adoaquien: –Ëmbi chianeboedquiobi mabi neyoc –queoapondash Esus. ²⁶ Adashic padpidec: –Mimbi naid dadpen chuiquin mibi cuidte chiendambi. Ëmbembi chienquio icquin ëbi chomiondaid muesanquio chiaidquio chiendambi. Aidën chiaiduidi matses abitedi chiendambi –quenubien ²⁷ Esus chieshënquidon: –Abi chomiondaid Nuquin Papambo nec –quequin tantienquio icpondash. ²⁸ Aden tantienquio icsho isun Esusën padpiden chuiopondash. –Matsesmiadquio icshobi ëbi cuesten dectanshumbic mimbi ëbi tantiabenendac. “Ambi chiapadquidshenda nepadenec.

Ambembi chiaid chienquo icquin aton Papan chiaidquo chuiquin aidën chiacpadomboenshenda napadenec,” quequin ëbimbo mimbi tantiendac –quepondash Esus. ²⁹ Adashic padpidec: –Nëbi ëbi chomiondaid ëbëd iquec. Aid bëdambo icmuenen ambi chiacpadomboen nasho isun ëbi nianenquo iquec –quepondash Esus.

³⁰ Adsho tantiashun: –Abimboen Esusën caic. Nuquin Papa yacnuësh choquidien nec –qeshun Esus tantiauidtsëcondash dadpeshun.

Satanasën yuabo nec, quequin Esusën chiaid

³¹ Adsho isumbien Esusën abi bëdiactsëc tantiauidtsëboedo chuipondash. –Ëbi tantiaquidën ëmbi chiacpadomboen natiadquo iquendac. ³² Nuquin Papabëdta ëbi aden tantiasho icsamianquidën yua icboedi aidën yuapenquo mibi icmetsiambi –quepondash Esus abi tantiauidtsëboedo chiec. ³³ Adec Esus: –Yua –quesho tantiashien: –Abadauan yampidën tsyuecquido yec utsin yuacmaido nebi. Tantiengquo icquin mimbi icsamboen chiec. ¿Atotsieshun: “Mibi yuapenquo icmetsiambi,” quequin ëbi chio? –capondash abi tantiauidtsëboedon Esus chuiquin.

³⁴ Adoaquien: –Tantia. Mibi abimbo chuinu. Uidën uacimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. ³⁵ ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. ³⁶ Aden con Pan aton Madombo icsho ëbi bëdamboen isquin ëbi tantiaquidotsen bëdamboen isendac. Aden ëbi tantiaquido bëdamboen isquin bëdamboec tabadte bumequin abi yacno ëbëd tabadtequido icmendac –quepondash Esus.

Satanasën madobimboecquido chiaid

³⁷ Adshumbic Esusën abi chieshënquido chuioapondash. –“Con tsusedpa Abadauan icpampic,” quequin mimbi abimbo chioc. Adboedëmbi ëbi cuesunetiadquo mibi iquec. Ëmbi abimbo chuisho tantiante bunenquo icquin ëbi cuesunetiadquo mibi icpec. ³⁸ “Con Pabëd tabadquin isondambi,” quequin ëmbi bëdamboen chuisho tantiengquo icquin min papabimboecquidën chiacpadomboen mimbi naindac –quepondash Esus abi chieshënquido chiec. ³⁹ –Min papabimboecquidën chiacpadomboen mimbi naindac –qeshobien: –Con tsusedpa Abadauanën nacpadomboen mambi napaboc –capondash Esus chieshënquidon. Adoaquien Esus: –Ma mimbi adoengquo yoc. Abadauanën nacpadomboen naquin mimbi bëdamboen natsiac. ⁴⁰ Bëdamboen natiapimbo icquin mimbi ëbi cuesunetiadquo iquec. Nuquin Papan chiaidquo

abimbo chuisho mimbi adotiadquio iquec. Nuquin Papan chiaid tantiec ma Abadauan cuesuniantiapimbo icpampiyoc. ⁴¹ Min papabimboecquidën namiacpadomboen naquidien mibi nec –capondash Esusën abi chieshënquido chuiquin. Adoquien: –Mambi Nuquin Papauidtsëqui tantieyoc. Utsi tantiatiapimbo icquin Nuquin Papauidtsëqui con pa caimbi – quepondash Esus chieshënquido.

⁴² Adsho tantiashien Esus: –Nuquin Papambo tantiaquim-bien mimbi ëbitsen tantiatsiac. Ëbembï choenquio iccondabi. Nuquin Papan: “Matsesbëd tabadec nid,” caquini chondac. Adoaid icsho Nuquin Papa tantiaquidën ëbitsen tantiatsiash. ⁴³ ¿Mitsipadquid yec ëmbi chiaid tantiash: “Tantiadenquien icpec,” quepe mibi? Ëmbi abimbo chuisho tantiate bunenquio yec pamumëdabimboec mibi iquec. ⁴⁴ Min papabimboecquid Satanas nec. Aid bunacpadenuidi mimbi natiadquio iquec. Ëndenquimboshë Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiacpadomboen namenquio yec chieshënec muaquidquio nec. Aton padibi icquid yec matses muamequidquio nec. Aidën madobimboecquin mimbi ëbi tantiatiapimbo icpec. ⁴⁵ Ëmbi Nuquin Papan chiaidquio abimbo chuisho mimbi tantiatiapimbo iquec. Icsambo icquidën ambembï chuisho mimbi tantienquio yaquien bëdambo icsiash. Mabi icsambo icquidpenquio neyoc. ⁴⁶ ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe? ⁴⁷ Nuquin Papa tantianuequidën Nuquin Papan chiaidquio chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec – quepondash Esus abi chieshënquido chushcaic.

Esus chieshënquido cuënoten siantiadpambo yanaid

⁴⁸ –Nuquin Papa tantiesabombo ma mibi neyoc –Esus qesho tantiashien abi chieshënquido: –Ma mibi podobitsi icsa dapuduedash neyoc. Tantiadenquio yec mibi onquec. Samadia yacnocquidobimboec icsamboshë ma mibi iqueyoc –caquien ⁴⁹ Esus: –Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiec,” catiadquidi mimbi ëbi: “Muec nec,” capec. ⁵⁰ “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi

cuidendac. ⁵¹ Tantia. Mibi bēdamboen chuinu. Ēmbi chiacpadomboen naquidquio unēsenquio ictsiash —quepondash Esus ompoacbimboen chiec. —Ēbi tantiaquido unēsacsho uincuemeshun Nuquin Papa yacno ēbēdi tabadmendambi padpidec unēstiapimbo icnuc —quequin tantiec adondash.

⁵² —Unēsenquio ictsiash —quesho tantiash Esus chieshēnquido: —Ma mimbi tantiadenquio icnuc chuipayoc. Adsho: “Mayan icsa dapudedashien nec,” mibi caombi. “Ēmbi chiacpadomboen naquidquio unēsenquio ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bēdamboen isaidombo abitedi unēspampic. ⁵³ ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

⁵⁴ Adoquien Esus: —Ēmbembi: “Mabi: ‘Bēdambo iquec,’ canu,” quequin ěmbi nac icsambo ictsiash. Mimbi: “Aiduidtsēqui tantiembi,” caboedēmbini: “Nēid con Mado Esus bēdambo iquec,” quequin ěbi comapenen tantiaquin namec. ⁵⁵ “Tantiembi,” mimbi caboed Nuquin Papa ma mimbi tantienquio yoc. Ēmbien Nuquin Papa tantiaquiec. “Aid tantienquio iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. ⁵⁶ Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuēsh choash bēdambo icmianquidquio matsesbēdi tabadendac,” quequin tantiec cuishonquepadenec. Nuquin Papan tantiamiac ěbi aden tantiapadenec —quepondash Esus. ⁵⁷ Adsho tantiashun Esus chieshēnquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanēn mibi tantiatiapimbo icpampic —caquien ⁵⁸ Esus: —Abimbo caimbique. Tantiata. Abadauan tishabi icnubi ěndenquimboshē ictenebi. Nuquin Papapadquidquio nebi —quepondash Esus. ⁵⁹ Adsho tantiash nēishtanequien: —¿Icsamboenda chuipec? ¿Nuquin Papada muauapebac? —quetanquin cuēnote dapa bedtanequin: —Seshunenu —cac siadenquio yec ompodanec cuempondash Esus.

9

Esusēn bēshuaid bēdamiaid

¹ Yuecquio ictaniash chonoadenquio icte ushēn capucuenequin Esusēn dada bēshuaid istuidpondash. Anin bēshuacshobi tishnēdaid niondash. ²⁻³ Aid istuidshumbimbi: —En chui, Icho. Tantanu. ¿Atotsieshun Nuquin Papan bēshu uapanēdash? ¿Aton papabēd ani icsasho isun Nuquin Papan

cuidquin bëshu uanëdaidta nepec? –caquien: –Padenquoio. Utsi icsasho isun Nuquin Papan nambo icpanëdash –quepondash Esus. Adsho tantiashun padpiden: –¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? –caondambi. Adoacquien: –Padenquoio. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec. ⁴ Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën matses chonoadesa –quepondash Esus. –“Con Pan tantiaidtedi nainabi unëshmane,” queshun unëshabi icquin con Pan chiaidtedi nainendambi –quequin tantiec: –“Nainabi inchëshmane,” quiash comapenec chonoadnuna –quiondash Esus. ⁵ Adashic: –Matsesbëd icquin Nuquin Papa bëdamboen tantiamequidquo nebique. Nëidtsen tantiamenu ⁶ –quetanquin nidaidën uicchun cuishtucatanquin nidaidbëdta uicchun cabiuntsëcshun bëshuaid bëbitaccapondash.

⁷ Adotanquimbic: –Acte tiquidimbo icquid Sidoe caidën bëpamëdec nid –cac nidash bëpamëdtanec bëdamboen isec aton shubuno nidpac caondash. Aid acte con onqueten Sidoe quequin buanaid caic. ⁸ Aton shubuno nidshobi aton shubu anoentsëcquidon bëshuacboed istuidpac caondash. Adembidi utsibon: –Bëshuaid nebique. Piucquid beccho –quedonetsec tsadtsëcsho isboedontsen istuidpac caondash. Istuidshun: –¿Nuqui isboedquiobida nepec? “Beccho,” ¿quedoneboedquiobida nepec? –cabededpac caondash. ⁹ Utsi-utsiec: –Ai, aidquiobi nec –quenubi utsibo: –Padenquoio. Aidbimboecquidien nec –quesho tantiash: –Aidi nebi –quepac caondash bëshuacboed. ¹⁰ Adsho tantiashun: –¿Mitsipadec bëdano? –caquien: ¹¹ –Esus caidën bëdamioshi. Nidaidën uicchun cuishtucashun nidaidbëdta uicchun cabiunshun bëbitaccashun: “Acte tiquidimbo icquid Sidoe caidën bëpamëdec nid,” cac nidash bëpamëdec bëdanobi. Nëbi bëdamboen isembi –quepac caondash bëshuacboed. ¹² Adsho tantiashun: –Mibi bëdamequid ¿mitsimbo iquéc? –cac: –Tsaudi –quepac caondash bëshuacboed.

Bëshuaid bëdameboed chuimiai

¹³ –Bëdamioshi –quesho tantiashun: –¿Abimboda capec? Ma con chuiquidon chuimenu –quequin padiseyobo yacno bëshuacboed buampac caondash. ¹⁴ Buanacshobien padiseyobon: –Chonoadenquoio icte ushën nac caosh –quequin tantiaquin: ¹⁵ –¿Mitsipadec bëdano? –caquien: –Esusën nidaidbëdta uicchun cabiunshun bëbitaccac bëpamëdec

bëdanshun nëbi bëdamboen isembi —quepac caondash bëshuacboed.

¹⁶ —Bëpamëdec bëdanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquo ictsiash. Chonoadenquo icte ushën nëid bëdamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bëdamepatsiash? Ma comapenen tantiaquin nacnempaboc —quepac caondash. Adshumbic abitedishun: —Esus icsambo iquec —cainquo icquin ¹⁷ bëshuacboed chuipac caondash. —Mibi bëdamequid ¿tsutsi mimbi cape? —caquien: —Nuquin Papan: “‘Yuecshun naden naindami,’ quequin chiaidquo chuiquidien nec,” caimbi —quetanec bëshuacboed nidpac caondash.

¹⁸ Aid nidnubien Esus chieshënuquido: —Bëshupenquien niashe. Muequien niashe. Anibëdta amë chuimenun chomenuna —quetanquin ¹⁹⁻²⁰ chomeshun bëshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bëshuacshobida tishonda? —capac caondash. Adoaquien: —Ai, bëshuacshobi tishonaid nec —ani queshobien: —Bëshuaid ¿mitsipadec bëdanosh? —capac caondash. ²¹ Adoaquien: —Tsaudi. Bëdansho isambo iccombi. ¿Tсандambien bëdamechitash? Dada ënden caniaid neque. Aidi chuime —quepac caondash bëshuacboedën tita amëbëdi. ²² —“Nuquin Papa yacnuësh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuëdec: ²³ —Dada ënden caniaid neque. Aidi chuime —quepac caondash.

²⁴ Adoac padpiden bëshuacboed chomeoapac caondash padiseyobon. Chomiash: —“Nuquin Papan bëdamioshi. Nuquin Papa bëdambo iquec,” ¿quecta icco? Ma Esus Nuquin Papan chiaid niac-niacquid neyoc. Ma icsamboshë icquid neyoc —quepac caondash. ²⁵ Adsho tantiash bëshuacboed: —Icsamboshë icquidien Esus nechitec. Aden tantienquo iquemi. Mabi bëdameboc. Isenquo icboedëmbi mambi nëbi bëdamboen iseyoc. Adenuidtsëqui tantiemi —quepac caondash. ²⁶ Adsho tantiashun: —¿Mitsipaden mibi bëdamiosh? —caquien: ²⁷ —Mambi mibi chuipaboc. Ma mimbimbobi tantienquo icboc. ¿Atotsi quequin padpiden: “Èbi chui,” cai? ¿Esus tantiatadiquoda icti? —capac caondash bëshuacboedën.

²⁸ Adsho tantiash nëishtanquin chushcapac caondash. —Mibi Esus tantiaquidquo nec. Mibi icsambo iquec. Èbien nuquin tsusedpa Moises tantiaquidquo nec. ²⁹ “Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bëdamequidën

napash? Ma mibi bédamequid ëmbi tantiacmaidquio neyoc —quepac caondash chuiquido. ³⁰ Adoaquien bëshuacboed: —¿Abida cai? “Dadpenquio tantiembi,” ma mibi quepaboc. Adboedi: “Ëmbi tantiacmaidquio nec,” ¿quecta ique? Mimi tantiacmaidëmbini bédamiosh. Ma bédambo yoc. ³¹ Abi icsaid ënabi icquidën chianesho Nuquin Papan tantienquio ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash. ³² Anin bëshuacshobi tishaid bédamenquio ictenec. Adquid bédamequid nibëdpadenec. ³³ Nuquin Papa tantienquio icquin Esusën ëbi bédamenquio ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac caondash bëshuacboed. ³⁴ Adsho tantiash nëshquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshënuquidon bëshuacboed Nuquin Papan chiaid chuibante shubun padpiden puduedmenquio icpac caondash.

Ambi bédameboed istuidoashun Esusën chiaid

³⁵ Adnubien: —Mimi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmiadquio caic: “Nuquin Papa yacnuësh choquid nec,” ¿quequinda mimi tantiape? —capondash Esusën ambi bëshuaid bédameboed chuiquin. ³⁶ Adoaquien: —¿Tsutsi neque? Isnu —cac: ³⁷ —Ëbi nec. Mibi bédameboedi nebi —caquien: ³⁸ —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquio yec mibi bédamboshë iquec —quetanec ismenuec danëshën tinquëbudpondash.

³⁹ Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbëd tabadec Nuquin Papa yacnuësh chondabi. Ëmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiembi,” quec muaquidon ëbi tantiatiapimbo icquin Nuquin Papa tantienquio iquec —quepondash Esus. ⁴⁰ Adsho tantiash nështanec: —¿Nuquin Papa tantiesabodabi nedi? —quepondash Padiseyobo. ⁴¹ Adsho tantiashien: —Nuquin Papa tantiesambo icsho ëmbi tantiamiac Nuquin Papabëdta ëbi tantiasho Nuquin Papan mibi bédamboen istsiash. “Nuquin Papa tantiaquiembi,” quec muaquin ambi chiaid bédamboen tantienquio icsho Nuquin Papan mibi bédamboen istiapimbo iquec —quepondash Esus abi chieshënuquido chiec.

10

Obecabimboecquido chiaid

1-2 Adshumbic abi chieshënquido Esusën padpiden chuoapondash ompoacbimboen chuiquin. —Tantia. Mibitedi chuinu. ¿Mitsipaden nuquin matsesën aton yua obeca dadpen dayun uaquin napec? Obeca daquënë uaidën puduedte shëcuënquio obeca icbo puduedquid. Daquënë uaid mayadec puduedquidien ampequid nendac. ³ Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. ⁴ Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënc. Con icbo nec,” quequin icbo tsibanquid obecan. ⁵ Utsibon cuënaquien tsibanenquio yec dacuëdec cuenquid obeca. Icbouidtsëqui tsibanquid obeca nec —Esus quesho tantiashien: ⁶ —Tantiadenquio yec mibi onquec —quepondash Esus chieshënquido.

⁷ Adsho tantiashun Esusën chuipondash. —Tantia. Mibi bëdamboen chuinu. Obeca daquënë uaid puduedte shëcuëbimboecquid nebi. ⁸⁻¹⁰ Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno matses puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bëdamboen dayun uaquin bëdamboec tabadquid icmendambi. Aido unësacsho uincuemeshun Nuquin Papa yacno ëbëdi tabadmendambi. Adec ëbi bëdambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquio iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquio icquimbi ëmbi chiaiduidtsëqui tantiendac —quepondash Esus abi chieshënquido chiec.

Ëbi tantiaquido dayun uaimbi, quequin chiaid

¹¹ Adashic Esus padpidec onqueoapondash. —Obeca icbo-bimboecquid nebi. Icbo cudasacbimboec ëbi tantiaquido cudasnuec ëbided cuidadec unësendabi. ¹²⁻¹³ Utsiboen adenquio ictsias. Piucquid bednuen obeca isquidbimboec iquec. ¿Mitsipadopaid obeca isquidën? Bëdi dapa chosho isun: “Con napanquio nec,” quetanquin badedi obeca nianquid. Obeca

nianacsho bēdin acshun siaquid. Aden utsi acsho isash acshun secabi icquid niquequid obeca. Obeca isquidēn icbonpenquio nianacsimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquio iqueyoc —quepondash Esus abi chieshēnquido chiec.

14-15 Adashic abi onquec: —Ēmbien matses bēdamboen tantiamenquin ēbi tantiaquido dayun uaindac. Nuquin Papabēd ēbi tantiananacpadquiec ēbi tantiaquidobēdtsen tantiananquiebi. Aden ēbi tantiaquido tantiec Nuquin Papa cuidmenquio icnuec ēbided cuidadec unēsendabi. ¹⁶ ¿Nēid matses isadaidbouditsēqui tantiectabi adec unēspadi? Padenquio. Matses utsibontsen Nuquin Papan tantiamiaido icquin ēbi tantierendac. Aidobēdta nēid matses con matses caquin abitedi bēdamboen dayun uaindami. ¹⁷ Con Pan tantiamiacpadec ēbided cuidadec unēsendabi. Aden ambi chiacpadomboen ēmbi nasho con Pan ēbi tantiaquiec. Unēsash ēbemi uincuenendabi. ¹⁸ Matsesēn ambembī ēbi unēs uatiapimbo ictsiash. Ēmbi tantiacpadquiequi matsesēn unēs uadendabi. Adecbidi uincuentiadquio yec ēbemi uincuenendabi. Aden con Pan namiacpadomboen naindami —quepondash Esus.

¹⁹ Adsho tantias con matses chuiquido nadec onquecuedepac caondash. ²⁰ Esus chieshēnquido: —Podobitsi icsa dapuduedash tantiadempambo yec onquepec. ¿Atotsi quequin aid tantie? Aidquio tantiatiapimbo iquendabi —quenubien ²¹ utsibo: —Podobitsi icsa dapuduedashta ¿adec onquepatsiash? Bēdamboequien onquiosh. ¿Podobitsi icsa dapuduedaidēnda aden bēshuaid bēdamepatsiash? Bēdambo icquidēmbien adotsiash —quepac caondash.

¿Quidistu caidta ne? quequin chiaid

²² Yuec ictanec con matses cuēdēnuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenēdaid ushē tantiec cuēdēntanu,” quianec cho-chopondash. Ambo iguenuampamboec icpondash aton padibi. ²³ Iguenuampamboec icnubien Esus Nuquin Papa tabadte shubu uashunaid daquēnē uaidēn puduedash shubunquio puduedabi quēnē cachoqui capupondash. Aid quēnē cachoc: “Sadomonēn nacnenaid nec,” caondash. ²⁴ Ambo Esus capusho isashien con matses chuiquido Esus natia datsidadshun: —En sebadēnquio chui. Tantienquio yec tsadiapiambo iquebique. Mimbi cuembo chuisho tantiatiadquio iquebi. ¿Nuquin Papan chomiaid Quidistu caidta ne? —capondash con matses chuiquidon. ²⁵ Adoquien Esus: —Mambi mibi chuipaboc. Ma mimbimbobi ēbi tantienquio icboc. Con Pan: “Adota,” cac

comapenen tantiaquin nabandeniombi. Mibi bēdamboen tantiamenuen adodeniombi. ²⁶ Adosho isash mibi: “Ai, Nuquin Papa yacnuēsh choquidien nec,” quetiadquidēmbi mimbi ēbi tantienquo iccoc. Nuquin Papan tantiamiabi yaido icquin mimbi ēbi tantiatiapimbo iquec. ²⁷ Con Pan tantiamiāidien ēbi tantiaquid yanendac. Adshun obecan aton icbo tsibanacimboen ēmbi chiacpadomboen natiadquo yanendac. ²⁸ Aido unēsacsho uincuemeshun Nuquin Papa yacno ēbēdi tabadmendambi padpidec unēstiapimbo icnuc. Unēsabi icsho: “Con na nec,” qeshun bēdamboen dayun uaindambi. Ēmbi adoacsho bedshunacimboen icsambo icquidēn yuaquin Nuquin Papan cuidtequido icmeoatiapimbo iquendac. ²⁹ Con Pansen ēbi tantiaquido dayun uaindac. Abipadquid utsi nibēdquiecnuc con Pan ēbi tantiaquido dayun uasho adembidi mēnchictiapimbo iquendac. ³⁰ Aden ēbi bedshuntiapimbo icquin con Patsen bedshuntiapimbo iquendac. Con Papadquidquo nebi —quepondash Esus.

Cuēnoten seshunetiadpambo yanoaid

³¹ —Nuquin Papapadquidquo nebi —Esus qesho tantiaash nēishtanquin cuēnote dapa bedshun abi chieshēnquidon Esus seshunetiadquo icoapondash. ³² Adsho isash: —Sianenda. Con Pan namiacpadomboen comapenen tantiaquin nabanombi. ¿Ēmbi adobansho isboedēmbidabi seshunepe? —quepondash Esus. ³³ Adoaquien: —¿Bēdamboen nabanshodambi: “Mibi seshunenu,” cadī? Padenquo. “Con Papadquidquo nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiaashumbimbi mibi seshunec —quepondash abi chieshēnquido.

³⁴ Adshobien Esusēn: —Nuquin Papan chiaidquo nuquin tsusedpan naden dada uapampic. “Nuquin Papa nadec onquec: ‘Min matsesēn ēmbi chiacpadomboen nasho: Ēbipadquid nec, caombi,’ queposh Nuquin Papa,” quequin dada uapampic. ³⁵ Matses caic: “Ēbipadquid mibi nec,” quequin Nuquin Papan chuiampic isun mimbi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” qeshun mimbi chushcambo iquec. Nuquin Papa adoambobi ¿ēbida chushcai? ³⁶ Nuquin Papan namiacpadec abi yacnuēsh chondaid nebi. Adquid yec: “Nuquin Papan Madombo nebi,” quiobi. Ēbi adsho tantiaashun ¿atotsi quequin ēbi chushcai? ¿Nuquin Papadambi muauadio? Mambi abimbo caboc. ³⁷ Ēmbi chiaidquo tantiatiapimbo icquimbi ēmbi naidquo tantiata. Ēmbi Nuquin Papan namiacpadomboen comapenen

tantiaquin nabanenquoio icsho isun mimbi ëbi mua catsiac. ³⁸ Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papa-padquidquibidien Esus nec,” quequin mimbi tantiabentsiac —quepondash Esus.

³⁹ Adsho tantiash padpidec nëishtanquin abi chieshënquidon: —Bedchitono —caqui bedadenquoio icpondash. ⁴⁰ Adashic acte Odan caid potiash con shënision tauaquin matses acten mentodenecono Esus nidoapondash. Ambo ëbi chedobëdi tabadpondash. ⁴¹ Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. ⁴² Adshumbic: —Nuquin Papa yacnuësh choquidien Esus nec —quequin Esus tantiabempondash.

11

Dasado caid unësaid

¹ Udeya yacnuësh Esus cuembon Dasado Esusën utsibim-boecquid unëstiadtsëcquoio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. ² Madian aton manëdaidën ucbanquin Esus tanoshcabi icnuc adec aton utsi unëstiadtsëcquoio yanac caondash. ³ Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquoio unëstiadtsëcquoio yanoshe. En isec cho —catuidpondash. ⁴ Adoquien Esus: —Chiata. ¿Unësash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” queshun naindami —quepondash. ⁵ Adbosh Dasado aton chuchubëdta tantiaquidquoio yequi ⁶ badedquoio nidenquoio yec anobi daëdec ushpondash Esus.

⁷ Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. ⁸ Adoquimbi: —Icho, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. ⁹⁻¹⁰ Adoquien cuembo chienquoio icquimbi: —Badiadën capuec tocoshquetanec uebudesa. Inchëshëmbien tocoshquetanec uebudquid —quequin Esusën chuipondashi. —Nëbi ëbi

unës uatiapimbo iquec. Badiadën nidac bimboen con Pan tantiaidtedi nainabi icsho ëbi unës uatiapimbo iquec. Inchëshën uebudac bimboen ambi tantiaidtedi nainshobini ambi tantiacpadënquiobi matsesën ëbi unës uaindac –quequin tantiec adondash Esus.

¹¹ Adshumbic Esusën padpiden ompoacbimboen chuiopondash. –Ëmbi con utsi caid Dasado ushtoaccoshe. Isucumec nidnu. Nid –quesho ¹² tantiashini: –Ma ushnu. Ushash isucunquid –quepondac. ¹³ Esusën Dasado unësaid chuinubi Dasado ushe dantsëccondambi. ¹⁴ Adnubien Esusën sebadënquio chuipondash. –Dasado unësaccosh. ¹⁵ “Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen tantianu,” qeshun Dasado unëso istanambo iccombique. Nëbi mibi ismec nidnu. Nid ¹⁶ –caquien: –Ai, abëdquiobi unësec nidnu. Nid –quiampondash Tomas anin abi ushëmbi daëdpambo tishaid. Adanec abitedi nidondash.

Unësaid uincuemequidquio nebi, quiaid

¹⁷ Adashic unësacno anoentsëqui Esus chopondash. Choshon: –Unësacsho chococash daëd-daëdquiec ushobi –quetsëcquiec onquecuededsho tantiatuidpondash. ¹⁸⁻¹⁹ Esus choabi icnuc con matses chuiquido Dasado unësacnuësh sedenquenuec Edusaden yacnuësh cho-chopac caondash. Unësaid nëbi ictsëcnuc tedes quidometedos tiontsëcquidën badedquio cho-chopac caondash. Cho-choash unësaidën chuchubëd sedenquec tabadpac caondash. ²⁰ Adnubien: –Esus choec –quesho tantiash Madta bëquedec chopondash aton chibi Madia shubuno sedenquec tsadnubi. ²¹ Choequien Esus bëquedec: –Mibi icnuc con utsi unësenquio ictsenosh, Icho. Con utsi unësosh. ²² Mimbi chiacpadomboen Nuquin Papan nëbi natsiash –quepondash Madta: –¿Ada con utsi uincuemetsia? –quequin chuitiadquio yequi. ²³ Adoaquien Esusën: –Min utsi uincuenendac –capondash. ²⁴ Adsho tantiash: –“Ai, yuecash unësaido abitedimbo uincuemete ushën con utsi uincuenendac,” quequin tantiemi –quepondash Madta. ²⁵ Adsho tantiashun Esusën: –Ëbibi matses unësaid uincuemequidquio nebi. Ëmbi tantiacpadënquio uincuenendac. Aden ëbi tantiaquido unësacsho uincuemendambi. ²⁶ Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantiash: “Ai, abimbo mimbi caindac,” ¿quequina tantie? –capondash Esusën. ²⁷ Adoaquien Madta: –Ai, adembi tantiemi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien

nec,” mibi caombi –quetanec ²⁸ nidpondash aton chibi chiec. Nidshun: –Nëmbo cho, chibi. Chuinu –cac aton chibi choshobien: –Esus chosh. Mibi iste bunoshe. En isec cho, chibi –caquien ²⁹ Esus bëquednuec badedi choquin istuidpondash. ³⁰ Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash. ³¹ Adec Madia nidsho isun chococacnobi sedencaic nide danquin abëd sedenquenuequidon tsibanampac caondash. ³² Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: –Mibi unësquio iccoc, Icbo. Bëdambo icquid mibi nec. Mibi icnuc con utsi unësenquio ictsenosh –quepondash Madia Esus caic.

³³ Adnubien Madia tsibanec cho-choec con matses chuiquido sedenquetuidpondash. Madiabëd sedenquecuedesho istanec: –Ai, unësquio icnuc nec –quiash Esus abitsen shubiantiadtsëcquio icpondash. ³⁴ Adec shubiantiadtsëcquio tsadacnuëshien Esus: –¿Mitsimbo mimbi chococaye? En isnu. Nid –quepondash. Adoac: –En isec cho –quianec nidnubien ³⁵ shubinidequi nidpondash Esus. ³⁶ Adec shubinidsho isumbien: –Ma Dasado unësquio icnuc shubieyoc –cabampondash con matses chuiquidon. ³⁷ Adnubien ut-sibo: –¿Atotsieshun bëshuaid bëdamiondaidëmbi Dasado unëso bëdamenquio icposh? –quepondash.

Esusën Dasado uincuemiaid

³⁸ Nidquimbi chococacno istuidequi Esus shubiantiadtsëcquio yanoapondash. Nidaid cuënoteuidpambo icquid macuësh tsimpiduc shëcuë uaidën unësaid nauedshun cuënote dapan bëtinacnuësh shubiantiadtsëcquio iccondash. ³⁹ Adashien Esus: –Cuënote bidiacquin shëcuë shëcne –quepondash. Adsho tantiaish unësaidën chuchu Madta: –Padi. Ënden pisenashe. Chococash mabi daëd-daëdquiec ushboc –quepondash. ⁴⁰ Adoaquien Esus: –Dacuëndenda. Mambi mibi chuiboc. Mimbi: “Nuquin Papan Madombobien mibi nec,” ëbi casho: “Ëmbi comapenen tantiaquin nabansho mimbi isendac,” mambi mibi capaboc. En na. Baded bëcune –cac ⁴¹ cuënote shëcuë bëtinaid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. –Papa, ëmbi nëbi chuisho mimbi tantiec. Ëmbi chuibocpadomboen mimbi naindac. Mibi bëdambo iquec, Papa. ⁴² Ëmbi otacquo chianiaid mimbi tantioc. Ëbi datsidadaido tantiamenuen nëbi comapenec onquequin mibi chiembi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,”

queshun comapenec onquequin mibi chiemi, Papa. Padi, aitedtsëqui mibi chiemi, Papa —quepondash Esus. ⁴³ Adtanquimbien comapenen cuënquin: —Dasado, puduenec cho —capondash. ⁴⁴ Adoquien Dasado badedquo puduenanec chopondash abi dashcute dataniacchobi. Ünësacsho uesquin dashcuten datanetanquin dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

Nëbien Esus unës uametiad, quiaid
(*Mat 26.1-5; Mad 14.1-2; Duc 22.1-2*)

⁴⁵ Aden Esusën ënden unësaidquiobi uincuemesho isashien Madia tsibanec sedenquec cho-choboedo abentse-abentsec: —Nuquin Papan chomiaidien Esus nec —quiampondash. ⁴⁶ Adnubien utsin Edusaden yacno nidshun Esus chieshënquido padiseyobo chuituidpac caondash. —Esusën unësaid uincuemiosh —quepondash. ⁴⁷ Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. ⁴⁸ Aden Esusën nabansho isun nuqui ëmiabi icsho nuquin matsesën abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquo chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? —quepac caondash chieshëmënuquido.

⁴⁹ Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —¿Midapadotsëcquien mimbi chiendac? Tantiadentsëcquio icnuc ma mimbi chuipaboc. ⁵⁰ Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquio icnueshun Esused unës uamenuna —quepac caondash chuiquid dapambo abëdtan chuiquido chiec. ⁵¹ Aden chuiquin ambembi chiambo Nuquin Papan oncamiac Nuquin Papan chiaidquo aden chuipac caondash. —Nëid setan abëdtan chuiquido chuiquid dapambo nec —queshun Nuquin Papan aden oncamiaqui Caipas onquepanëdash. —Matses cuidmenquo icnuec con Madoded ciudadec unësendac —queshun Nuquin Papan Caipas aden oncamepanëdash. ⁵² Aden Caipasën chuinëdaid tantiaquin ëmbitsen chuinu. Tantia. ¿Isadaidboudtsëqui cuidmenquo icnuecta Esus abided ciudadec unëstiondash? Padenquo. —Matses utsitsen abi tantiaquid yansho isun

abëdi tabadmenuec Esused cuidadec unëspondash —quequin tantiemi. Nëbi Caipasën chuisho tantiashun tsusiobon chiaid chuinu. ⁵³ Aden Caipasën Esus unës uamete chuisho tantiashien Esus chieshënquido: —Nëbimbobien Esus unës uametiad —quecuededpac caondash.

⁵⁴ —Tsusiobon mibi adosh —quesho tantiatanequien chieshëmënquido ismenquio yec Esus cuempondash. Cuenequi nidaid utsin nidash masi dapa yacno anoentsëqui shubu dadpen icquid Epadain caid yacno nidpondash. Ambo tabadquin ëbi chedo Esusën chuibampondash. ⁵⁵ Epadain caid yacno tabadnubien Nuquin Papan con tsusedpabo unës uainquio icquin matamiampid inchësh tantiec cuëdënuec Edusaden yacno con matses nidanepac caondash. Cuëdë nec taëabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuëdëntemaid,” quedeneque —quianec nidanepac caondash. ⁵⁶⁻⁵⁷ Adshumbien Edusaden yacnoshon Nuquin Papa tabadte shubu uashunaid daquënë uaidën puduedtanquin Esus iste bunquin nibëntuidpac caondash mishtemaid mishquidon. Nibëntuidshobien: —Nuqui chuiquido nadpac caosh. “Esus istuidshun ëbi chuita. Bedshun unës uamechitono,” quepac caosh —quesho tantiashien: —¿Ada Esus chopeba? “Unës uamenushe,” quia sh choenquien icchitec —quecuededpac caondash.

12

Madia Dasadon chuchun Esus tanoshcaid (Mat 26.6-13; Mad 14.3-9)

¹ Aden mishtemaid mishquidon abi nibë nubien Edusaden anoentsëqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchësh tantiec cuëdë nec taënushi niondash. ² Ambo chosho isash: —Esus bëdambo iqueque. Pemenu —queshun: —Pec cho —cac puduedash tabadpondash nëidtedi. Nëidic Esus. Nëidic Dasado. Nëidic shubu icbo. Nëidic Esusbëd icquid ëbi chedobi. Nëidic Dasadon chuchu daëd. Aidtedi icpondash. Adec penuec tabadsho Madtan pete menebampondash. ³ Adnubien Madian: —Esus bëdamboshë iquec. Ismenu —quetanquin bëdamboshë nuadquidën Esus tanoshcapondash. Tanoshcatanquin aton manëdaidën taucondash. Aden tanoshcaid shubu anuestsëcquiec comapenec nuadpondash. Piucquid dadpenquio menequin bedaid niondash. Sedunten cushtoaid bëdambo nuadquid nado caid niondash. ⁴ Adsho isun Esus bedmequidën Udasën Madia chushcapondash. ⁵ —Padi. Mimbi uesquieque. Utsi uain nata. Nëid

danoshcate meneshun piucquid dadpenquo seta abentsëc matamec chonoadaidtedquiobien bedtiad. Adoshombien piucquid nibëdquido aid piucquid menetiad –capondash Udasën. ⁶ Adomboen chuisho tantiashun Udas bëdambo icquidquo danondambi. Esusbëd icquido ëbitedishun piucquid bedshun sauedten sauedshun dayun uaquidquiemi danondac. Piucquid bëdamboec dayun uashumënenquo yequi abibi ampeshumënashi adondash Udas. Aden ambi ampiaid tantiequi: –Piucquid nibëdquidoen menetiad –quequin muaquin Madia chushcapondash. ⁷ Adshobien Esusën: –Padi. Chushcainda. Ma nanu. Ma nuquin matsesën unësaid bëdambo nuadnuc danoshcapaid yoc. “Nëbi con Mado unësendac,” quequin Nuquin Papan tantiamicpadomboen ëbi unëso chococate tantiaquin Madian ëbi tanoshcaquin naic. ⁸ Piucquid nibëdquido dadpen iquec. Nibëdenquo iquendac. Èbien mibëd icboedi nëbi nibëdquido yanendac. Èbi tantiec Madia bëdambo iquec –quepondash Esus Udas chiec aidi: –Abi chieshënquido Esus bedmenu –quepanuda.

Dasadotsen cuesunetiadquo yaid

⁹ Adnubien: –Betania yacno Esus choaccosh –cac Edu-saden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash. ¹⁰⁻¹¹ Cho-choshon Dasado uincuemiondaid isumbien abentsëcshun abentsëcshunquien: –Comapenen tantiaquin nabanquidquo yec Nuquin Papan padquidquibidien Esus nec. Nuquin Papan chomiaidien nec –quequin Esus tantiabempondash. Esus tantiaben-shumbic abi chuiquidon chiaid tantienquo yampondash. Adsho isash nëishtanequien chuiquid dapabo: –“Uincuemiaid Dasado isun Esus tantiabenosh,” quioshe. Dasadotsembien unës uatiad –quianac caondash chieshëmënquiec.

Chuiquid dapa ismiacimboen Esus ismiaid

(Mat 21.1-11; Mad 11.1-11; Duc 19.28-40)

¹² Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdënuec cho-choboedon: –Esus choec –quesho tantiatanquin ¹³ niste podobieccquid bedbëtsenec Esus bëquedec cho-chopondash. Esus bëquedshumbien: –Chuiquid dapa nec –quequin ismequin ambi bedbëtsemboed uic-uiccabededpondash. Aden uic-uiccai qui:

“Mibi bëdamboshë iqueque. Èbi bëdamboen ista.

Nuquin Papan chomiaid yec mibi bëdamboshë iquec.

Con matses isadaidbo chuiquid dapambo mibi nendac,”

quecuededpondash Esus caic. ¹⁴ Ambi podquedën choquin bedbëtsemboed cabayobitsecquidëmpi catsadtoanec Esus

chosho isash adcuededpondash. Adec aid catsadte Nuquin Papan tantiamiacpadomboen con tsusedpan dada uaquin naden chuipampic. ¹⁵“Edusaden yacnocquido chiec:

‘Dacuëndenda, Edusaden yacnocquido.

Is. Cabayobitsecquidëmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic. ¹⁶ Adec Esus catsadtoanec chosho isun aden chuipampid tantienquo iccondambi. Esus abuc nidambimbi ëbitedishun tantiabenondac. —Esus chuiquinshenda nuquin tsusedpan dada uapampic. Aidën chiacpadomboen niste podo uic-uiccaquin: “Bëdambo iquec,” quequin nuquin matsesën Esus ismebededpondash —quequin tantiabenondambi.

¹⁷ Esus cabayobitsecquidëmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepanëdash.

¹⁸ Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec chochoshon aden niste podo uic-uiccaquin ismepondash. ¹⁹ —Esus bëdamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

Matses utsibo: Esus isnu, quiaid

²⁰ Edusaden yacno cuëdë nec cho-choboedo matses utsibo isadaidpembotsen icpondash. ²¹ Adnubien adquido matses utsibon Esus iste bunquin shubu dadpen icquid Bet-saida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun ²² Esusbëd icquid utsi Andedesba chuibëtsenec Andedesbëd choequi Uedipe Esus chiec chopondash. —Matses utsibon mibi istiadquio iquec —caquien ²³ aid matses utsibo isadaidpembo tantiamenu nec Esus comapenec onquepondash. —Nuquin Papan matsesmiondaidquio icquin nëbimbobimbi ambi chiaidtedi nainendac. Ëmbi adoacsho Nuquin Papan: “Mibi bëdambo iquec,” ëbi caindac —quepondash Esus abi unës uate chiequi. ²⁴ Adshumbien ompoachimboen chuipondash. —Tantia. Mibi chuinu. ¿Mitsipadquio pete ëshë chococaid icpec? Chococac caniyash bacuëc bëdambo icpaid yoc. Chococabi bëdambo ictiapimbo iquec. Adoachimboen chococabi yac matses bëdambo icmetiapimbo iquendabi. Unësacsho chococac matses bëdambo icmequid nendabi —quepondash Esus. ²⁵ Adashic padpidec: —Ambi naiduidi naquin ëmbi

chiaid niacquido Nuquin Papan cuidtequido nendac. Ambi naiduidi nainquio icquin ëmbi chiacpadomboen naquido ëbëdi tabadtequido yanendac. ²⁶ Adquid ëmbi chiacpadomboen natiadquio yec ëbi yacpadec chieshtoenquio ictsiash. Adquidquio unësash uincuenash ëbëdi tabadsho Nuquin Papan: “Nëid con Mado tantiaquid bëdambo iquec,” capendac — quepondash Esus.

Esusën abi unës uate chiaid

²⁷ Adashic abi unës uate tantiec Esus nadpondash. — Unësquioshë yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi — quepondash Esus.

²⁸ Adtanequien Nuquin Papa chiec: — Nuqui tantiacpadomboen nëbi nainembi, Papa. Ëmbi aden nainacsho: “Nuquin Papa bëdambo iquec,” matses cameta, Papa — quenubien abucuëshquio Nuquin Papa comapenec onquepondash. — Ai, ëmbi namiaid mibi icsho: “Nuquin Papan namiaid nec. Nuquin Papa bëdambo iquec,” matses camepombi. Nëbi padpiden adomeoaindambi — quepondash Nuquin Papa.

²⁹ Abucuësh onquesho bëdamboen tantiabi yec utsibo: — Abu cuëdtoec nec — quenubien utsibo: — Nuquin Papan abi yacnoshon uaid mayan bëdan Esus chuipash — quecuededpondash. ³⁰ Adsho tantiash Esus: —

¿Ëbi tantiamenuecta onquediosh? Padenquio. Mibi tantiamenuequien niosh. Aden tantiashun ëmbi bëdamboen chuisho tantiata. ³¹ Nuquin Papa chieshënquid Satanasën yuaido matses dadpenquioshë iquec. Nëbi Nuquin Papan tantiacpadomboen aido utsi-utsien Satanas bedshunendambi: “Chën. Con na neque,” quequin. ³² Ëbi abuc dectanac aden matses ëbi tantiaquid icmendambi — quepondash Esus. ³³ — Ëbi cuesten dectanquin unës uaindac — quequin tantiec: — Ëbi abuc dectanendac — quepondash Esus.

³⁴ Adsho tantiash abi datsidadquido: — “Ëbi dectanendac,” quiosh. “Unësebi,” quepequien iccosh — quiashien Esus chiec: — “Nuquin Papa yacnuësh choquid Quidistu caid unësesambo nendac,” quequin Nuquin Papan chiaid nuquin matsesën chuinubi: “Unësebi,” ¿quecta icco? “Unësebi,” quequid Nuquin Papa yacnuësh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? — quepondash Esus datsidadquido. ³⁵ Adoaquien Esusën: — Nadquid nebi — quenquio icquin ompoacbimboen naden chuipondash. — Mibi bëdamboen tantiamequid nëbi isadenquio iquendac. Aid nibëdnuc bëdamboen mimbi tantienquio iquendac. Nidabi aidën chuisho bëdamboen tantiata.

³⁶ Nuquin Papan bēdamboen iste tantiamequid tantiata. Adsho bēdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

Isadaidbon Esus tantienquio yaid

³⁷ Ēmbi dadpen chuiquin dada uabanacpadomboembi Esusēn comapenen tantiaquin dadpen nabansho isun con mases isadaidbon Esus tantiatiadquidi Esus tantienquio icpondash. ³⁸ Aden Esus tantienquio icte con tsusedpa Isayasēn Nuquin Papan tantiamiacpadomboen chuiquin dada uapampic.

“Nuquin Papa yacnuēsh choash nadec onquendac.

‘Mimbi chiaidquio chuibansho tantiashun: Muequien mibi nec, ēbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuēsh choquidien nec, quetiadquidi adenquio iquendac, Papa,’ quependac,”

quequin Esusēn chuite Isayasēn dada uapampic.

³⁹ Nuquin Papan pamumēdacbimboecnuc icmiac con masesēn Esus tantienquio icpondash. Aden chuiquin Isayasēn padpiden dada uapampic.

⁴⁰ “Isadaidbon ēbi tantiatiapimbo icsho isun

‘Ma adembi tantienquio icpanuna,’ caimbi.

Ma adequi pabiate shēcuē nibēdacbimboec icchitono.

Ēbi tantiasho abi icsaid bēpiscudquin bēdamboen ismane,”

quequin Nuquin Papan ambi con mases caido nēishēnshun chushcaid Isayasēn dada uapampic. ⁴¹ Nuquin Papambo Esusbēd uinsadpambo yec tabadsho isondaicquid Isayasēn aden Esus tantienquio icte chuiquid.

⁴² Con mases dadpenishun Esus tantienquio icnubi con mases chuiquidon abentsēcshun abentsēcshunquien Esus tantiauidpac caondash. Adoboedi: —“Nuquin Papan chiaid chuibante shubun puduedenda,” canushe —quiash dacuēdquin: —Esus tantiaquid nebi —quequin chuitiadquidi utsibo chienquio icpac caondash. ⁴³ —Ma con masesēmbi ēbi bēdamboen isnu —quequinuidtsēqui tantiaquin aton mases chuitiapimbo icpac caondash. —Ma Nuquin Papan ēbi bēdamboen isnu. Aton Mado tantiaquid nebique —quetiadquidi adenquio yac caondash.

Cuidenquio icte chiec nebi, quiaid

⁴⁴ Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpided comapenec onquepondash. —¿Ēbi tantianuequidēn

ëbiuidtsëquida tantiapadic? Padenquo. Ëbi tantiaquidën ëbi chomiondaidsen tantiatsiash. ⁴⁵ Adembidi con Papadquiobidi ëbi icscho isun: “Ai, adquiobidien Nuquin Papa iquec,” quequin tantiatsiash. ⁴⁶ Nuquin Papan matses bëdamboen iste tantiamenuc matsesbëd tabadec chondabi. Adec matsesash: “Ëbi tantiaquido ma Nuquin Papan bëdamboen isquin bëdamboen tabadmenu,” quiash nebi. ⁴⁷ “Ëmbi aden chuisho tantiatiapimbo icquido nëbi cuidnu,” ¿quectabi icti? Padenquo. Nëbi Nuquin Papan bëdamboen isquin cuidenquo icte chuinuequini nec. ⁴⁸ Nuquin Papan cuidte ushëmbien ëbi tantiesabon: “Nuquin Papan chiaidshenda chuipadenec. Aid tantienquo yec icsabudquiopobi,” quequin ambibi tantiendac. Adsho Nuquin Papan cuidendac. ⁴⁹ ¿Ëmbembi chuiquindambi nadi? Padenquo. Ëbi chomiondaid con Pan chiaidquo chiequini nec. ⁵⁰ “Ëbi tantiaquid ëbëdi tabadendac padpidec unësenquo yec,” qeshun Nuquin Papan chiaiduidtsëqui chiequini nec —quepondash Esus.

13

Esusën abëd icquido tapanaid

¹⁻² Esusën comapenen tantiaquin nabanaid chuiquin aidtedi chiombi. Nëbi abi tantiaquido tantiaquiec abided ciudadec unësaid chuiquin unësash abi uincuenaidtsen chuinu. Tantia. Nuquin Papan con tsusedpabo unës uainquo icquin matamiampid inchësh tantiaquin pec tabadte ushë nëbi yanuc inchëshën Esusbëd pec bëdamboec tabadondabi. Padnuen Udas Simon Iscadioten mado Satanasën tantiamiacpadomboen Esus bedmete tantiec tsadpanëdash. Adnubien Esus: —Nëbi con Pa yacno nidebi nëido nianec. ³ Con Pabëd tabadec ambi tantiacpadec abëdi abitedishun Icbombo iccondaidi nëbi anobidi nidoash adquiobidi icoaindabi. Adquid icquin nëido bëdamboec tantianante ismenu —quequin tantiaquin ⁴ yuan nachimboen nadopondash. Uequin peboedi niddotanec dashcute bëntse icquid dachiquidtanec daucudte tsibidiquepondash. ⁵ Tsibidiquetanquin pada-padaid dapan acte cushtotanquin abëd icquido tapambampondash. Daucudten tauchanquin tapambanondash.

⁶ Aden tapambanquimbi: —Mibitsen tapanu —cac Petedon: —¿Icbonda yua tapampaid? Ëbi tapanenda, Icho. Padi —capondash. ⁷ Adoquien Esusën: —Ëmbi nasho nëbi mimbi tantienquo iquec. Yueshun mimbi tantiendac. En tapanu —caquien: ⁸ —Padi. Mibi bëdamboshë icquid nec. Ëbien icsaquad nec. Yua namiacximboen mibi tapametiapimbo

iquebique. Padi —caoapondash Petedon. Adoaquien: —
 Ęmbi tapanabi yac con yuambo mibi ictiapimbo ictsiac —
 capondash Esusën. ⁹ Adsho tantiashun Petedon: —En na,
 Icho. Tapantanquimbi mapinobëdtabi ëbi mëpanta —caquien:
¹⁰ —Padi. Nesboed mibi nec. Taënouidtsëqui bëchishacsho
 tapanembi. Ęmbi bëchish ucac mibi bëdambo iquec. Abentsëc
 icsambo iquec —quepondash Esus. —Bëchish ucacimboen
 ëmbi nasho Nuquin Papan mibi bëdamboen isendac icsaid
 ucudacimboecnuc —quequin tantiec: —Ęmbi bëchish ucac
 mibi bëdambo iquec —quepondash Esus. ¹¹ —Udasën ëbi
 unës uamenuen bedmendac —quequin tantiec: —Abentsëc
 icsambo iquec —quepondash Esus.

¹² Aden tapambanash dasiuidash samëdquin pebededquin
 abëd icquido Esusën chuipondash. —Ęmbi naboed ¿ada tantie?
 Tantia. Mibi chuinu. ¹³ “Ębi chuiquidquio mibi nec,” mimbi
 ëbi capec. Adembidi: “Con Icho mibi nec,” mimbi ëbi capec.
 Bëdamboen mimbi chiec. Adquid nebique. ¹⁴ Ęmbi naboc-
 padomboen mimbitsen nata. “Ębëd icquid tantiaquioquin
 tapanquin nashunu,” queshun naombique. Adecbidi nashu-
 nanta. Naden tantiashun nata. “Esus tantiaquido tanti-
 aquiembi. Con buchibimboecnuc nashunu,” quiash nashu-
 nanta. ¹⁵ Ęmbi nabocpadomboen namenuen adombique.
 Mimbitsen nata. ¹⁶ En chuinu. Tantia. ¿Icbon chiac-
 tacia chieshpadic? ¿“Nid,” cacta nidenquio icpadic? Icbon
 chiacpadomboen yuan naquid yendac. Adomboen tantiaquin
 ëmbi chiacpadomboen nata. ¹⁷ Ęmbi aden chuisho tantiashun
 ëmbi chiacpadomboen naic mibi bëdambo iquendac —
 quepondash Esus.

¹⁸ Adashic padpidec: —Mibitedi caic: “Bëdambo iquec,”
 quetiapimbo iquendabi. Tauamboen: “Nuquibi icnu. Cho,”
 ëmbi caondaido con yuabotedi tantiembi. Abentsëc icsambo
 iquec. “Aid con yuapenquio nec,” quequin ëmbi tanti-
 aidi nec. Nuquin Papan tantiamiac aidën icsamboen nate
 chuiquin nuquin tsusedpan dada uapampic naden. “Ębëd-
 tan planeboedëmbi ëbi unës uamenuen bedmendac,” quequin
 dada uapampic. ¹⁹ “‘Abi unës uametebi chioshi. Nuquin Pa-
 papadquidquioibi icquimbien naosh,’ quequin ma tantianu,”
 queshun mibi chiombi. ²⁰ Mibipadquidën nate mibi chuinu.
 Tantia. Mibipadquidën ëbi chuibansho tantiash: “Ai, abimbo
 caic,” queshun utsibon ëbi tantiatsiash. Adembidi ëbi tan-
 tiashun ëbi chomiondaid Nuquin Papatsen tantiatsiash —
 quepondash Esus.

Abi bedmequid Esusën chiaid

(Mat 26.20-25; Mad 14.17-21; Duc 22.21-23)

²¹ Adshumbien abi bedmequid Udas tantiac unësquio icnuc Esusën chuipondash. —Tantia. Mibitedi chuinu. Ëbéd icquidëmbi ëbi chieshënquido ëbi bedmendac —quesho
²² tantiaash abéd icquidobéd bëisanec: —¿Tsutsi capec? Nëidien cachitec —quecuededpondabi otacquo tantiec.

²³ Ëbi tantiaquidquo yec con cachoxtsëqui Esus uepondash.
²⁴ Adec Esusën dayuntsëqui ueshobini: —“¿Tsutsi cai?” ca —capondash Petedon mëdquin onquenquo icquin.
²⁵ Adoquimbi cachoc isquin: —¿Tsutsi cai, Icbo? —capondac.
²⁶ Adoquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash.
²⁷ Adoac penubi Satanasquo Udas dapuduedquiopanëdash ambi tantiaidquo namenuc. Adshobien Esusën: —Mimbi tantiacpadomboen baded nëbimbobi naic nid, Udas —capondash.

²⁸ Adsho tantiaashini ëbitedi: —Tantiadenquo yec onquepec. ¿Atotsi quiash: “Baded naic nid,” quepec? —quepondac.
²⁹ Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibëdquido piucquid menetan,” quepequien iccosh —quecuededpondash. ³⁰ Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmuen chiec nidec.

Tantiananquiota, quequin chiaid

³¹ Abi bedmuen chiec Udas nidbombien Esus: —Nuquin Papan matsesmiaidquo icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac. ³² Ëbitsen bëdambo icmuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash.
³³ Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacpadomboen mibi chuioanu. Tantia, mado. Ëbi nidacsho mimbi ëbi istuidenquo iquendac. Ëbi nidacno mibi nidtiapimbo iquendac. ³⁴ Aden tantiaquin Nuquin Papan chiaid utsi mibi chuinu. Ëbi nidan ëmbi chiapadomboen nata. Ëmbi mibi tantiaquiacpadquiec tantiananquiota. ³⁵ Ëbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiaashiash —quepondash Esus.

*Petedo: Ëmbi isacmaid nec, quete chiaid
 (Mat 26.31-35; Mad 14.27-31; Duc 22.31-34)*

³⁶ Adec –Nidebi –quesho tantiashun Petedon: –¿Mitsimbo nide, Icho? –capondash. Adoaquien Esus: –Nëbi mibi nidtiapimbo yacno nidebi. Yuecash ambo mibitsen nidendac –quepondash Esus. ³⁷ Adsho tantiash Petedo: –¿Atotsi queti-adquio yec: “Nëbi ëbëdi nidtiapimbo mibi iquec,” quepo mibi? Mibëd nidec dacuëdenquio ictsiabi. Mibi chieshënquidon: “Unës uanu,” mibi casho tantiash: “Ëbien natiad,” quetsiandabi –quepondash Petedo.

³⁸ Adsho tantiashien Esus: –“Ëbien natiad,” ¿quecta icpatia? Padenquio mibi ictsiac. Cachina bënë cuëdanabi icnuc mibi chieshtouidendac. “Ëmbi isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac –quepondash Esus. Adsho tantiashini Esusbëd icquido ëbitedi dacuëdcuededpondac.

14

Nuquin Papabëd tabadmendambi, quiaid

¹ Ëbitedi dacuëdcuededsho isashien Esus: –Dacuëdenda. “Ëbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota. ² Mimbi tantiacpadquio Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Ëbi tantiaquido ëbëdi tabadmendambi,” quequin chiombi. ³ “Adquid iquec,” quiash ëbia nidshun con Pa chiendambi. “Ëbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choaindabi. ⁴ Ëbi nidan ëbi nidacno nidte mimbi tantiec –quepondash Esus.

⁵ Adsho tantiashun Tomasëntsen: –¿Mitsimbo nide, Icho? Tantiambo iccombi. Podqued tantienquio iquembique. Ëbi chui –caquien ⁶ Esus: –Nuquin Papa yacno nidte tantiamequidquio nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin Papabëd tabadmendambi. Ëbi tantiesan Nuquin Papa tantiatiapimbo ictsiash. Ëbi tantiaquidënuidtsëqui Nuquin Papa tantiatsiash. ⁷ Ëbi caic: “Nuquin Papan Mado nec,” quequin mimbi Nuquin Papatsen tantiendac. Nëbi abipadquid ëbi icsho isun Nuquin Papambo isachimboen mimbi tantiendac –quepondash Esus.

⁸ Adshobien Uedipentsen: –Nuquin Papa ëbi isme, Icho. Nuquin Papa iste bunebique. Aid isash bëdambo ictsiabi –caquien ⁹ aidtsen Esusën: –¿Tantienquioda ique, Uedipe? Yuec mibëdi tabadobi. ¿Mimbi isacmaidtabi nedi? ¿Mibi

chianenquiodambi ictio? Nuquin Papapadquidquibidini nec. Èbi adquid icsho isun: “‘Adquidquibidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa èbi isme,” cai? ¹⁰ “Nuquin Papapadquidquio nebi,” èbi qesho tantiash: “Ai, abimbo caic,” ¿quenquioda icco? Èmbembi chienquio iccombi. Con Pan chiaidquio chiequini nec. Adembidi èmbembi nabanenquio iccombi. Èbèd tëshnanenquio icquin con Pan namiaquimbi naoc. Èmbembi nainquio iccombi. ¹¹ “Con Papadquidquio nebi,” èbi qesho tantiashun: “Ai, abimbo caic,” cata. Èmbi chiaid tantiatiapimbo icquin èmbi comapenen tantiaquin dadpen nabamboedquio tantiata. Aden èmbi nabamboed tantiaquin: “Nuquin Papan chomi-aidènuidtsèquien adotsiash,” quequin tantiata. ¹² Tantia. Mibi chuinu. Èmbi nacpadomboen èbi tantiaquidontsen comapenen tantiaquin nabanendac. Èmbi chuibanac daèdpactsècshun èbi tantiabentsèccosh. Con Pa yacno nidshun èmbi chomiaidèn con Mayanèn namiac mibipadquidèn èbi chuibanac dadpen-shun èbi tantiabenendac. ¹³ Èmbi chiacpadomboen naquidèn: “Èbi nashunta, Icho,” qesho tantiashun ambi chiacpadomboen nashunendambi. “Nuquin Papa bèdamboshè iquec,” camenuen ¹⁴ èbi tantiaquidèn chiacpadomboen nashunendambi –quepondash Esus abèd icquido chiec.

Nuquin Papan Mayan tabadte chiaid

¹⁵ Adashic abèd icquido padpiden chiec Esus: —Èbi abimbo tantiaquidèn èmbi chiacpadomboen natiadquio iquendac. ¹⁶ Adotiadquio icsho isun con Pabèd icquin con Pa chien-dambi naden. “Nuqui tantiaquido bèdamboen tantiamenuen nuquin Mayan aidobèd tabadmenuna, Papa,” èmbi cac Nuquin Papan con Mayan mibèdi tabadmendac. ¹⁷ Adoac mibi nianenquio yec mibèdi tëshnanenquio iquendac. Mibèd icquin èbi chuiquin mibi abimbo tantiamendac. Aid isadenquio icsho èbi tantiesabon aid tantiatiapimbo iquec. Mimbien aid tantiec. Con Pan èbèd icmiaidquio nec. Ambi namiaid èbi icsho aid tantiashumbimboen mimbi tantiec. Èbi nidan choash mibèdi tëshnanenquio yec tabadendac con Mayan. ¹⁸ ¿Shiadimpi mëyadacbitsec icnudambi mibi niampe? Padenquio. Nuquin Papan Mayan con Mayambi nec. Mibèd aid icnuc èbèd yacbimboequi con Mayan tantiadendac. ¹⁹ Nèbi èbi nidacsho èbi tantiesabon èbi isenquio icnuc mimbi èbi isendac uincuenacsho. Adec uincuenaid icquin con Mayan mibèd tabadmequin mibi unèsacsho uincuemeshun èbèdi tabadmendambi. ²⁰ Èbi uincuenaid ushèmbi mimbi naden tantiendac. “Esusèn Nuquin Papa

tantiaquiec aibdëd tëshnanenquio icquin aidën chiacpadom-boenuidi naindac. Adecbidi Esusbëd tantiananquiec aibdëd tëshnanenquio icquin aidën chiacpadomboen natiadquio yec tabadebi,” quequin mimbi tantiendac. ²¹ Ëmbi chiacpadomboen naquid ëbi tantiaquidquio nec. Ëbi tantiaquidquio mibi icsho con Pabëdtan mibi tantiaquioquin: “Adquio aton Papabëd Esus iquiec,” camequin mibi bëdamboen tantiamendambi —quepondash Esus.

²² Adsho tantiashun Udas utsin abi bedmequidënpenquio: —“Nuquin Papa yacnuësh choash con matses chuiquidquio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantiamë, Icho? —caquien ²³ Esus padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquioquin aibdëdi con Mayan tabadmendambi. Adoac con Mayanën tantiamiac ëbëd iquiec con Pabëd iquiec quiacbimboec tantiadendac. ²⁴ Ëbi tantienquio icquidoen ëmbi chiaid niac-niacquido nendac. ¿Ëmbiuidtsëqui chiaidta adquidën niac-niacpadic? Mambi Nuquin Papan chiaidquio chuiboc. Aidën chiaidquio adquidën niac-niaquec —quepondash Esus abëd icquido chiec.

²⁵ Adashic padpidec Esus onquiondash. —Mibi bëdiactsëc tantiamequin mibëd icquin con Pan chiaid chuibanombi. ²⁶ Con Pa yacno nidshun ëmbi: “Nuquin Mayan aidobëdi tabadmenuna, Papa,” cac con Pan con Mayan matsesbëd tabadmendac. Adoac ëmbi naidbëdta ëmbi chiondaidtedimbo mibi bëdamboen tantiamendac. ²⁷ Con Pa yacno nidshun con Mayan mibëdi tabadmequin dacuëdenquio icquid mibi icmendambi. Adoac dacuëdenquio yec bëdamboec tabadta. Ëbi tantiesabo dacuëdacobimboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquio yec bëdamboec tabadta. ²⁸ “Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantiash ëbi tantiaquidombo cuishonquetsiash. “Esus abi namequid aton Papabëd tabadec nidec,” quiash ëbi tantiec cuishonquetsiash. ²⁹ Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadec ëbi adsho isun ma nëidon: ‘Esusën abimboshenda capondash. Ambi chiondacadquid Nuquin Papan Madombo nec,’ quequin tantianu,” quiash adobi. ³⁰ Nëbi ënquimbi chuinu. Ëbi tantiesabon icho Satanas ëbi unës uamenuëc choec. Ambembi aidën ëbi unës uametiapimbo iquiec. ³¹ Con Pan

tantiacpadequini unësendac. Ēbi adec unëso isash: “Nuquin Papa tantiaquin ambi chiacpadomboen naic abided cuidadec Esus unëzac, quequin ma matses abitedishun tantianu,” quiash adebi. Nëbimbobimbi naique. Nidec nidnu. Nid — quepondash Esus.

15

Shancuinbiecquid uba caid chiaid

¹ —Nidec nidnu. Nid —quetanquimbi padpiden chuipondashi ompoacbimboen chuiquin. —¿Mitsipadquio shancuinbiecquid uba caid icpec? Mapictsëc ictsequi cuidi-cuidipambo yanquid. Adquidic shancuin bacuëbimboec didiquequid. Uba dadan aton cuidi canimequin bëdambo icmequid. Adomboembidi ëbi tantiaquido bëdambo icmendambi. Nuquin Papain uba icbobimboecquid nec. ² Uba aton icbon cuidi utsiuc bacuësa icsho pateshunepaid yoc. Adoacbimboen ëbi tantiauidtsëcboedon ambi icsamboen naid ëntiapimbo icsho con Pan ambi icsaido cuidacno nënendac. Uba icbombidi bëdamboen bacuëmuenen dadpen cuidi icquid cuidi dadpen pateshun siaquid. Adomboembidi ëbi tantiaquido bëdamboshë icmuenen Nuquin Papan aidon icsamboen naid ëmetsiash. ³ Ēmbi chiacpadomboen naic mibi bëdambo iquec. Aden ëbi tantiasho Nuquin Papan mibi bëdamboen isec. ⁴ Ēbi adembidi tantiaquin ëmbi chiacpadomboen nata. Adsho isash mibi bëdamboen tabadmec mibëd iquendabi. Uba cuidi padquëdaid bacuëtiapimbo iquendac. ⁵ Adecbidi ëbëdi tëshnanash matses bëdambo ictiapimbo iqueque. Ēbëd tëshnanenquio yec bëdamboec tabadta. Bëdamboec tabadquin mimbi utsibo ëbi tantiametsiac. ⁶ Uba icbon cuidi utsiuc bacuësa icsho pateshun tsindoshon nëdëncapaid yoc. Adoacbimboen ëbi tantiesabo unëzacsho Nuquin Papan ambi icsaido cuidacno nësecaindac —quepondash Esus.

⁷ Adshumbic Esusën padpiden chuipondash. —Ēbi tantiaquin ëmbi chiacpadomboen naquidën: “Ēbi nashunta, Papa,” cac ambi chiacpadomboen Nuquin Papan nashuntsiash. ⁸ Nuquin Papan adoshonac: “Nuquin Papa bëdambo iquec,” mimbi catsiac. Adembidi utsibotsen: “Nuquin Papa bëdambo iquec,” camenuen bëdamboec tabadquin ëbi tantiameta. Mimbi adosho: “Ai, ëbi tantiaquidquio nec,” caindambi. ⁹ Con Pan ëbi tantiaquiacpadomboembi mibi tantiaquiembi. Adoaid icquin ëbitsen tantiaquioquin ëmbi chiacpadomboen nata. ¹⁰ Abi tantiaquioquin ambi chiacpadomboen nashobini con Pan tantiaquiec. Adembidi ëbi tantiaquidën ëmbi chiacpadomboen nasho ëmbitsen aid tanti-

aquiendambi. ¹¹ “Ëbi cuishonquiacpadquiecbidi ma ëbi tantiaquiec cuishonquequiono,” qeshun aden mibi chiemi — quepondash Esus abëd icquido chiec.

Tantiananta, quequin Esusën chiaid

¹² Adashic abëd icquido padpiden chiec Esus: —Ëmbi mibi tantiaquiacpadquiec tantiananta. ¹³ Nadquiec caimbi. “Min utsi cuesnu,” cashunac: “Ëbien natiad,” quiacbimboec tantiananta. Aden mibi tantiec ëbided cuidadec unësendabi. ¹⁴ Ëmbi chiacpadomboen nasho mibi con utsi caimbi. ¹⁵ Ëmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bëda icpec?” quequin aton yua chienquo icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. ¹⁶ “Esusbëd iquec nidnu,” ¿quequina mimbembi tantiadionda? Ëmbien mibi: “Nuquibi icnu. Cho,” caondac. “Utsibo tantiamequin ma nëidon ëbi chuibenenu. Adoac utsibotsen ëbëd tabadtequid yanendac,” qeshun mibi cho caondambi. Aden ëmbi chiacpadomboen naquidën Nuquin Papa chuiquin: “Min Mado Esus tantiaquid ëbi icsho ëmbi chiacpadomboen ëbi nashunta, Papa,” mimbi cac mimbi chiacpadomboen Nuquin Papan mibi nashuntsiash. ¹⁷ Ëbi adsho tantiash ëmbi chiacpadquiec tantiananta —quepondash Esus.

Esus tantiaquido chieshënte chiaid

¹⁸ Adashic padpidec Esus onquepondash. —Ëbi tantienquo icquidon chieshënac: “Aden Esusba chieshënondash,” quequin tantiata. ¹⁹ Ëbi tantiesabo icsho ëbi chieshënquidon mibi bëdamboen istsiandac. Adquid iccondaidi ëmbi: “Cho,” cac ëbi tantiaquid mibi yanondac. Adec ëbi tantiaquid icsho mibitsen chieshënoaindac. ²⁰ “Yuan icbon chiacpadomboen napaid yoc,” quequin ëmbi ¿chuiboedta tantie? Aden ëmbi chiacpadomboen nasho ëbi chieshënquidon mibitsen chieshënoaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo icoaindac. Padnuen ëmbi chiaid tantiaquidën mimbi chiaidtsen tantiendac. ²¹ Ëbi chieshënquidombi ëbi chomiondaidquo tantiaquin ëbi chieshënenquo ictsish. Ma ëbi chomiondaid Nuquin Papa tantienquo icquin aidon ëbi chieshëmpayoc. Adomboembidi ëbi tantiaquidotsen chieshënoaindac. ²²⁻²³ ¿Ëbi chieshënquidon ëbiuidtsëquida chieshëmpadic? Ma ëbi chieshënquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshënquido ëbi chieshënec icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnuc Nuquin Papan ëbi chieshënquido: “Mibi

icsamboshë iquec,” caindac. ²⁴ Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshë nec mibi icsambo iquec,” cainquo ictsenosh. Utsibon nabanacmaidquo comapenen tantiaquin mambi nabamboc. Adosho isash ëbi chieshënquido: “Icsapenquo iquebi,” quetiapimbo iquendac. Ëmbi nabansho isun ëbi chieshënquin con Patsen chieshë nec. ²⁵ “Aden matsesën ambembi ëbi chieshëmpec,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshënquidon isbanaidi nec —quepondash Esus.

²⁶ Adashic padpidec: —Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” qeshun Nuquin Papan chomiac mibëdi tabadquin abimbo chuiquin ëbi tantiamequiendac. ²⁷ Adoac mimbisen ëbi chuibanendac. “Yuec aibdëd tabadondashun Esus tantiembi,” qeshun mimbi ëbi chuibanendac. Aden mimbi chuisho ëbi chieshënquidon mibitsen chieshënendac. Adoac dacuëndenda.

16

¹ “Chieshtonoshe,” qeshun mibi aden chiombi. Mibitsen chieshë nac dacuëndenda. Mibëd con Mayan tabadmembique. ² Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsiec yacnuësh adendac. Adomboembidi mibi chieshënquin utsi-utsien cuesun secash: “Nuquin Papa tantiaquidquo icquin Esus tantiaquido cuesun secaombi,” quependac. ³ Aden Nuquin Papa ëbëdta tantienquo icquidon ëbi tantiaquidotsen chieshënendac. ⁴ Mibi chieshë nac: “ ‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” qeshun nëbi mibi chiembi. “Ëbi icnuc ëbi tantiaquido cuesun secadenquo iquec. Ëbi nidambien aido cuesun secabenendac,” quequin tantiaquin ënden aden mibi chienquo iccondambi. “Nëbi nidebi,” qeshun nëbi mibi chiembi —quepondash Esus.

Nuquin Papan Mayan chote chiaid

⁵ Adashic: —Nëbi ëbi chomiondaibdëd tabadec nidendabi —quepondash Esus. Adsho tantiash padequimbo tabadpondabi. Adec ëbi padequimbo tabadsho isash Esus padpidec onquepondash. —“¿Mitsimbo nide?” ¿quenquioda ique? ⁶ Ai, ëmbi chuiboed tantiac unësquo icnuc nuen mimbi ëbi chienquo icchitec. ⁷ Ëbi nibëdnuc mibi bëdambo iquendac. Ëbi nidenquo icnuc con Mayan mibi bëdamboen tantiamenuec

choenquio ictsiash. Nidshumbimbi mibëdi tabadmenuen chomendac. ⁸ Adoac matses ambi icsamboen naid tantiamenquin ëbitsen tantiamendac. Adomboembidi Nuquin Papan cuidtetsen tantiamendac. ⁹ Aden Nuquin Papan Mayanën tantiamiac: “Esus tantienquio yec icsambo icchitebi,” quendac matses. ¹⁰ Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiashoeni Nuquin Papan bëdamboen istsiash,” quendac matses. Ëbi isadenquio yec con Pa yacno nidan con Mayanën tantiamiac matses adendac. ¹¹ Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquio icquidobëdta Nuquin Papan cuidendac,” quendac matses. Con Mayanën tantiamiac adec matses onquendac –quepondash Esus.

¹² Adashic abëd icquido chiec Esus: –Mibi dadpenquio chuitiadquio icquimbi nëbi dadpen chienquio iquembi. Nëbi ëmbi chuïsho mimbi tantiatiapimbo iquec. ¹³ Nuquin Papan Mayan choshombien mibi abimbo chuiquin ëbi tantiamendac. Ambembi chienquio icquin Nuquin Papan chiaiduidi chiendac. “Nadquio iquendac. Adecbidi nadquid choendac,” quequin mibi dadpen tantiamendac. ¹⁴ Adembidi ëmbi naidbëdta ëmbi chiaidtedi tantiamenquin: “Esus bëdamboshë iquec,” camendac. ¹⁵ ¿Ëbiuidtsëqui tantiamenuenda con Mayanën adopec? Padenquio. Ëmbembi chiaid mambi chiambo yoc. Nuquin Papan chiacpadomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quiobi –quepondash Esus abëd icquido chiec.

Abi nidte Esusën chiaid

¹⁶ Adashic padpidec: –Nëbi isadenquio yanebi. Adashic yuecpactsëc yash isadcuenendabi –quepondash Esus. –Nëbi unësash uincuenash padpidec isadebi –quequin tantiec adondash. ¹⁷ Adsho tantiashini ëbitedi: –¿Atotsi quepec? Tantiadenquio yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquio yec: “Nëbi isadenquio ictanec yuecpactsëc yash isadcuenendabi,” queposh? ¹⁸ ¿Atotsi quepec nec? –quepondabi Esusbëd icquidobëd onquec. Esus tantiamenquio yec shoshquetsëcquiec onquepondabi. ¹⁹ Adsho ambembi tantiasash: –Ëbëd icquidon ëbi chuitiadquio iquec –queshun Esusën: –“¿Atotsi chuitiadquio yec nio?” quequin ëbi chuite mibi buneque. ²⁰ Tantia. Mibi Chuinu. Ëbi unëso isash

mibi sedenquenubi ëbi tantienquo icquido cuishonquendac. Adec sedenqueboedobi mibitsen cuishonquianendac. ²¹ ¿Mitsipadquo bacuë tishec chido icpec? Bacuë cuididiquenuc natiamboshë icboedi bacuë tishash cuishonquepaid yoc. ²² Adecbidi nëbimbobi ëbi unëso isash mibi natiaguiendac. Adboedi yuecpectsëcshun ëbi padpiden isash mibi cuishonquendac ënëdenquo yec. ²³ Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiebique. Ëbi nashunta, Papa,” cac ëbi tantiaquin con Pan mibi nashunendac. ²⁴ Aden mimbi Nuquin Papa chianenquo iccoc. Nëbi adomboen chianeta. “Min Mado Esus tantiaquid icsho ëbi nashunta, Papa,” quequin chianeta. Mimbi adoac mimbi chiapadomboen mibi nashunquin Nuquin Papan mibi cuishoncamendac –quepondash Esus abëd icquido chiec.

Esusën abëd icquido ënquimbi chiaid

²⁵ Adashic abëd icquido padpiden chiec: — Ompoachimboen dadpen chuibanionbi. Yuecpectsëcshun: “Con Pa nadquo iquec,” quequin mibi sebadënquo chiendambi —quepondash Esus. —Uincuenshun aden chiendambi —quequin tantiec adondash Esus. ²⁶ Adashic padpidec: —Con Pa yacno ëbi nidan mimbi: “Min Mado Esus tantiaquid nebique. Ëbi nashunta, Papa,” quequin Nuquin Papa mimibi chianendac. “Ëmbiuidtsëqui: ‘Ëbi tantiaquid nashunta, Papa,’ cac ëbiuidtsëqui tantiaquin Nuquin Papan mibi nashuntsiash,” ¿quectabi ique? Padenquo. ²⁷ Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuësh choquid Esus nec,” quequin ëbi tantiaquid mibi icsho con Pan mibitsen tantiaquiquin mibi nashunendac. ²⁸ Matsesbëdi tabadec Nuquin Papa yacnuësh chondash nëbi con Pa yacnobidi nidendabi —quepondash Esus.

²⁹ Adsho tantiashini ëbitedi: —Adquidshenda mibi nepec. Ma nëbi mimbi sebadënquo chieyoc. ³⁰ Mibi: “Nëbi isadenquo yanebi,” quioc. Adashic: “Yuecpectsëc yash isadcuenendabi,” mibi qesho tantiash mibi tantiamenquo yec sho-shoshquetsëcquiec: “¿Atotsi quepec?” quecuededpobi. Mibi chuimetiadquo iccobi. Ëmbi chiambobi ma mimibi tantiapaboc. Comapenen tantiaquidquo icquin ma mimbi abitedimbo tantiapayoc. Aden tantiaquid yec Nuquin Papa yacnuësh choquid mibi nec —quepondabi ëbitedi. ³¹ Adsho tantiash Esus: —Ai, nëbi mimbi ëbi tantiaquiec. ³² Aden

ëbi tantiaquidquibi ëbi chieshënquin bedsho isanec mibi niquendac ëbi nianec. Mimbi niamënubi con Pan ëbi nianenquio iquendac. ³³ “Ëbi nidan Nuquin Papan Mayan mibëd tabadendac. Ëbi tantiaquid Con Pan tantiaquiec,” quequin dadpen chuibanombi. “Ëbi tantiec dacuëdenquio yec ma tabadnu,” qeshun mibi aden chuibanombi. Ëmbi chiaid tantiashun chieshëmënquido dacuëdënenda. Satanasën: “Icsamenu,” cac icsainquio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuëdenda —quepondash Esus abëd icquido chiec.

17

Esusën Nuquin Papa chiaid

¹ —Dacuëdenda —qeshumbic ëbi tantiamenuen abuc isquin Esusën Nuquin Papa chuipondash. —Nuqui tantiactedi ëbi naimeta, Papa. Ëbi naimetanquin comapenen tantiaquin ëbi bëdambo icmeta. Aden mimbi bëdambo icmiac mibitsen bëdambo icmendambi, Papa. ² Ëndenquimboshë mimbi ëbi chiondac naden chuiquin. “Nuqui matses uaidon abitedishun Icho mibi nec, Mado,” quequin mimbi ëbi chiondac. Mimbi adonaid icquin mimbi tantiactedi matses nuquibëd tabadtequido icmendambi, Papa. ³ Matsesën nadosho adoendambi. “Abipadquid utsi nibëdnuc Nuquin Papa iquec. Ambi chomiondaidquio Esus nec,” quequin tantiasho nuquibëd tabadtequido icmendambi, Papa. ⁴ Mimbi chiacpadomboen naquin nëbimbobimbi nainec. Ëmbi adoacsho isash matses: “Ambi chomiaid tantiasho Nuquin Papan nuqui bëdamboen isec. Nuquin Papa bëdamboshë iquec,” quependac, Papa. ⁵ Nuqui tantiactedi ëmbi nainacsho mibi yacno nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

Esusën abëd icquido Nuquin Papa chiaid

⁶ Adshumbic Esusën abëd icquido ëbitedi chuiquin aton Papa chuioapondash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaidquio chiac: “Ai, adotiadquio iquebi,” quiosh, Papa. ⁷ Adembidi aidon: “Nuquin Papan namiaidquio nec. Ambembi nainquio iquec,” quequin ëbi tantiaposh. ⁸ Mimbi chiaid ëmbi chuisho tantiashun mimbi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi ëbëd icquidon, Papa. ⁹ Ëbi tantienquio icquido mibi chienquio iquembi, Papa. Ëbi tantiaquidouditsëqui mibi chiec nebi. Mibi tantiaquido

icsho mimbi tantiamiac ëbitsen tantiec aidon. ¹⁰ Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icho mibi canu. Mimbi chiacpadec bëdamboec tabadtiadquido iquebi,” quequin bëdambo icmioshi, Papa. ¹¹ Mibi bëdamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënquidon chieshtomenushe. Nëido bëdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantiananquiacpadquiec ma ëbi tantiaquido tantiananu. Nëido bëdamboen dayun uata, Papa. ¹² Aidobëd icquin mimbi chiaidquido bëdamboen chuibanquin chieshtomiambo iccombi. Aden bëdamboen dayun uaqun ëbi tantiaquido cudasënquin Satanas yuamiambo iccombi. Udas abentsëquien Satanasën yuatsaccosh. Mimbi chiaid matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidtequid iquendac.

¹³ Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” qeshun mibi otacquio chienquido iquembi. “Ëmbi abi dayun uate chuisho tantiashe ëbi yacpadec ma cuishonquenu,” quequin mibi otacquio chienquido iquembi, Papa. ¹⁴ Mimbi chiaidquido nëido chuibanombi. Adoac ëbi tantiaquido yansho ëbi chieshënquidon nëidotsen chieshëmpec. Ëbi yacpadec mimbi chiaid niac-niacte bunenquido icshobidi nëido chieshënquiec, Papa. ¹⁵ Aden tantiashe: “Ëbi tantienquido icquidobëdi ëbi tantiaquido tabadmenda,” ¿quectabi ique? Padenquido. “Ëbi tantiaquido chieshtomenda,” caimbi, Papa. Satanasën yuanushe. Bëdamboen dayun uaqun chieshtomenda, Papa. ¹⁶ Ëbi tantiesabo tabadacpadec tabadenquido icquin ëmbi nabocpadomboen natiadquido iqueque. ¹⁷ Mimbi chiaidquido pausunquidoquin bëdamboen tabadme, Papa. ¹⁸ Mimbi ëbi: “Matses chiec nid,” caondacpadomboen aido: “Ëbi chuibeneta,” caindambi. Adoac nëidon ëbi chuibenendac, Papa. ¹⁹ Nëido tantiaquiec nëbimbobini mimbi chiacpadec ëbided ciudadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiash ëbi tantiaquido min yuabombo icmenuec adebi, Papa —quepondash Esus aton Papa chiec.

Esusën abi tantiaquid utsibo Nuquin Papa chiaid

²⁰ Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquido yanendac.

Ëbi tantiaquidotedi tantiaquin mibi chiec nebi, Papa.
²¹ Nuqui tëshnanenquio yacpadequi nuquibëd tëshnanenquio icquid icmeta, Papa. Nuqui tantiananquiapadec ëbi tantiaquidotedi shubu abentsëquën tabadac bimboecnuc tantianameta, Papa. Adsho isash nuqui tantienquio icquido nadtsiash. “Esus tantiec bëdambo iquec. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitec,” quetsiash.
²² “Mibëd ëbi tantiananquiapadquiec ma ëbi tantiaquido tantiananquiono. Ma chieshënanenquio icnu,” quequin mimbi ëbi namiapadomboen ëbi tantiaquido namiombi, Papa.
²³ Nuqui tëshnanenquio yacpadec aidobëd tëshnanenquio iquendabi. “Chieshënanenquio yec tantiananquiec ma bëdamboec tabadnu,” quec aidobëd tëshnanenquio iquendabi, Papa. Adec ëbi tantiaquido bëdamboec tantianansho isun matsesën naden tantiatsiash. “Ambi chiapadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiapadomboen Nuquin Papan aid tantiaquido tantiaquiec,” quequin matsesën tantiatsiash, Papa.
²⁴ Mimbi ëbi tantiaquido icmiaido nuqui tabadac nombo tabadmeta. “Nuqui matses uabi icquin mimbi: ‘Ëmbi tantiaidquio mibi neque. Nuquibi nanuna, Mado,’ cac nuqui bëdamboshë yec tabadtenecpadequi nuqui tabadsho ma ëbi tantiaquidon isnu,” qeshun mibi: “Nuqui yacno tabadmeta, Papa,” caimbi.
²⁵ Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa.
²⁶ Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiapadomboen ma nuqui daëdi tantiaquiash ma tantiananquiono,” qeshun con Mayan aidobëd tabadmendambi. Adoac ëbëd icac bimboec con Mayan tantiadendac, Papa —quepondash Esus Nuquin Papa chiec.

18

Esus bedmiaid

(*Mat 26.47-56; Mad 14.43-50; Duc 22.47-53*)

¹ Aden Nuquin Papa yuen chianec Esus nidpondash. Ëbi chedobëd nidquin acte Sededon caid potiash tiedno cuëte odibos caid nitsinacno ëbitedi chiec tabadteneboc-nombo chopondash. ² Ambo tabadnubien Udas: —Ëbi abëd

tabadtenebocno tiednoen nidchitash —quianec Esus bedmenuec ³ chopondash. Aden chieshëmënquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëdtan padiseyobon namiaido sondado chedo. Nëidic con matses yuaquido Doma yacnoquido sondado dadpen. Nëidic aid sondado chuiquid. Aidtedi Udasën bëpondash. Tabotebëdta cueste sanambededtsëcquieic cho-chopondash. Utsibombic chështe.

⁴ Adec cho-chosho isash bëquedbanec nidquin: —Ëbi unës uamec —quequin tantiaquin Esusën: —¿Atotsi quec ne? ¿Tsutsi nibëne? —cac ⁵ —Nasaded yacnuësh caniquid Esus bednuec nebi —quepondash sondado chuiquid. Adshun isac aidbëd Esus bedmequid Udas icpondash.

⁶ Adshobien Esusën: —Në iquebi —capondash. Nuquin Papapadquidquiobi icquin adoac dacuëdec: —Auchidi cuenu —quec uebudcuededpondash bednuequidotedi. ⁷ Adshobien padpiden Esusën: —¿Tsutsi nibëne? —cac: —Nasaded yacnuësh caniquid Esus bednuec nebi —queoasho tantiaishun: ⁸ —“Në iquebi,” caombi. Èbiuidtsëqui bedta. Èbëd icquido bedenda —capondash Esusën. ⁹ —“Mimbi ëbi tantiaquid icmiaido Satanas chieshtomiambo iccombi, Papa,” quequin ëmbi Nuquin Papa chuibocpadomboen nëido chieshtometiapimbo iquebi —quequin tantiec: —Nëid bedenda —quepondash Esus.

¹⁰ Adnubien Petedon abi tsidiadaid chështe chictanquin chuiquid dapan yua abiucquio pateshunepondash. Aid yua Madco niondash. ¹¹ Adosho isashien Esus: —Padi. Chën. Min chështe naued. Nuquin Papan chiacpadec paëmbo icnuc unësendabi —quepondash Esus.

Anasën shubuno Esus buanaid
(*Mat 26.57-58; Mad 14.53-54; Duc 22.54*)

¹² Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash. ¹³⁻¹⁴ Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshënec: —Nuquin matsestedi unës uamenquio icnuen Esusded unës uamenuna —queboed Caipas niondash. Aton cucu chuiquid dapabidi niondash. Aidí Anas niondash. Anasën shubunoba Esus buampondash. Ashunquio Caipas ismenuen buampondash.

Petedon: Èmbi isacmaid Esus nec, quequin chiaid
(*Mat 26.69-70; Mad 14.66-68; Duc 22.55-57*)

¹⁵ Esus buansho isun Petedobëdtan chinunondambi. Chinuntuidash nidequi Caipasën shubuno choash daquënë uaidën puduednueshō tantiaishun shëcuë isquid

chidon puduedmiondashi. Ambi isondaïd icsho aden puduedmiondashi. ¹⁶ Èbi puduedmequin Petedo ambi isacmaid icsho puduedmenquoio icpondash. Adsho istanquin: —Èbèd icquid neque. Shëcñeshun. Ma puduednu — capondambi. ¹⁷ Adoac puduedmeshun shëcuë isquid chidon: —¿Në bedboed Esusbèd icquidta mibi ne? —capondash Petedo chuiquin. Adoquien Petedo dacuëdec: —Padenquoio —quepondash muequi. ¹⁸ Adnubien iquendoshon daquënë uacnoshon cuëte dëtsiadoshon sondado chedobèd anocquido yuabo cuëte cuëc tabadpondash. Adsho isashien Petedotsen cuëte cuënuëc nidpondash èbi shubunquoio puduednuc.

Caipasën Esus chuimiäid

(*Mat 26.59-66; Mad 14.55-64; Duc 22.66-71*)

¹⁹ Adec èbi puduednubien Caipasën Esus chuimepondash. —Mibèd icquid ¿tedtsi iquec? ¿Èbèd icquido dëniaquecta icpec? Mibèd icquido ¿mitsipaden chuibano? —capondash. ²⁰ Adoquien Esusën chuipondash. —¿Ompoquindambi chuibandio? Nuquin Papa tabadte shubu uashunaïd daquënë uaidën puduedshun mambi chuibandeneboc. Nuquin Papan chiaïd chuibante shubun-shubunquieç puduedcuenequin mambi chuibeneboc. Ompoquin chiambo iccombi. ²¹ Mimbì: “Icsamboen naosh,” caïd èbiuidtsëqui chuimenda. Èbèd icboedotsen chuime. Èmbi chiaïd abitedi tantiashun aidombi mibi chuïtsiashe. Aidotsen chuime —quepondash Esus.

²² Adsho tantiashun: —¿Chuiquid dapada adopaid? —quetanquin sondado chuiquidën mëdanten bëcuespondash Esus. ²³ Adoquien: —¿Icsamboendambi chuidio? ¿Atotsimbi icsa uaque? En chui. Mambi abimbo chuiboc. ¿Abimbo chuiquidta cuespaid? —quepondash Esus. ²⁴ Adondash Esus Anasën abi cataniacchobi Caipasën shubuno bëac.

Petedon: Èmbi isacmaid Esus nec, quequin chuioäid

(*Mat 26.71-75; Mad 14.69-72; Duc 22.58-62*)

²⁵ Adnubien Petedo abi cuëte cuëc tsadsho abëdtan cuëte cuëc tabadquidon: —Esusbèd icquidien mibi nechitec — capondash. Adoquien Petedo: —Padenquoio. Mabi aïdbèd icambo yoc —quepac caondash. ²⁶ Adshobien chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien ²⁷ padpidec: —Padenquoio. Mabi ano nidambo yoc. Èmbi isacmaidquoio ma Esus neyoc —quenubien Esusën chuiboedquoio cachina bënë cuëdampac caondash.

Pidato caïdën shubuno Esus buanaïd

(*Mat 27.1-2; Mad 15.1-5; Duc 23.1-5*)

28 Adnubien Caipas aton chuiquid utsibobëd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsesbëd pec tabadtiapimbo icchitomane —quiash Pidaton shubun puduedenquio icpondash. 29 Adnubien Pidaton aton shubunuësh pduentanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien 30 —¿Bëdambo icquidtamibi mibi ismenuen bëdio? Con matses chuiquid dapa ictiadquio icquin icsamboen naoshe. Cuidquiota —quepondash chieshëmënquido. 31 Adoquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uacsho isash min matses chieshtonoshe. Min matsesën: “Con matsesënuidtsëqui unës uaquin cuidaquien bëdambo ictsiash,” queshun ëbitedi chieshënushe —quepondash Esus chieshënquido Pidatombi Esus unës uametiadquio yec. 32 Ënden abi chieshënquidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuec adpondash.

33 Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien 34 Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. 35 Adoquien Pidaton: —¿Isadaidbodabi nedi? Padenquio. Ëmbi tantiacpadquid caimibi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien 36 Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

37 Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiatsiandac —quepondash Esus.

38 Adsho tantiash Pidato: —¿Tsuntsin matses uaquid quequin abimbo chuipatsiash? —quetanec pduenshun Esus chieshënquido chuioapondash. —¿Icsambo icquidta Esus

nedic? Ma icsapenquo icquid neyoc. ³⁹ Nëid cuidtiapimbo icquin chuinu. Nuquin Papan matamiampid inchësh tanti-ate ushën min matses quënën nauedaaid abentsëc cuemedendonambi. Adembidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: ⁴⁰ —Padenquo. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cunesun siaquin cuemete bunquidquo icnuc adcuededpondash Esus chieshënquido Esus unës uamete bunquiec.

19

Esus cueshcaid

(*Mat 27.27-31; Mad 15.16-20*)

¹ —Badabasquo cuemeta —quesho tantiatanquin Pidaton: —Në Esus cueshcanuen buan —capondash. Adoquien buanshun sondadon canite cuëshë dëdectanquin nacnenaid cueshcanten Esus comapenen cueshcapac caondash. ² Cueshcatanquin pinchuc-pinchucpambo icquid mauete nacnenaid Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: ³ —Adec dasiuidquid chuiquid dapambo nec —quequin sondadon Esus mamënshumpac caondash. Aden mamënshunquimbi: —Isadaidbo matses chuiquid dapambo Esus neque. Is —quetanquin mëdanten bëcuesbanepac caondash. Adotanquin Pidato yacnobidi buanoapac caondash.

Esus unës ua, quiaid

(*Mat 27.15-26; Mad 15.6-15; Duc 23.13-25*)

⁴ Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquo iquec. Icsambo icquid icsho: “Unës uata,” catsiambi badedi. Icsapenquo icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien ⁵ Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduenshobien Pidaton: —Is. Mimbi bëboed choeque —cac ⁶ chosho istanequien: —Cuesten dectanquin unës uata. Cuesten dectanquin unës uata —quecuededpondash Esus chieshënquido comapenec cuëdec. Adoquien Pidaton: —Mimbi cuesten dectanquin unës uatan. Ëmbimbo adotiapimbo iquebi. Icsapenquo icquid icsho Esus unës uatiapimbo iquebi —capondash Pidaton.

⁷ Adoaquien Esus chieshënquidon: —Con matsesën: “Nuquin Papa muauaquid unës uaquid yendac,” cacpadomboen natiadquio iquebi. Esusën: “Nuquin Papan Madombo nebi,” quequin Nuquin Papa muauaoshe. Unës uaquimbien ictiad —quepondash. ⁸ —“Nuquin Papan Madombo nebi,” quiosh —quesho tantiashien Pidato dacuëdquiec yampac caondash. ⁹ Adash aton shubun Esusbëdi puduedoashun Pidaton Esus chuiopondash. —¿Tsutsimbo ne? ¿Mitsiuëshquio chonda? —caqui Esusën ëcbedenquio icpondash.

¹⁰ Aden ëcbedenquio yac nëishashien Pidato: —¿Chuitiapimboda ique? ¿Tantienquioda ique? Ëmbi: “Cueme,” cac mibi cuemet-siash. Ëmbi: “Cuesten dectanquin unës ua,” cac mibi adotsi-ashe. En chui —caquien Esus: ¹¹ —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquid-penquio icquin mimbi ëbi cuesten dectanquin unës uame-tiapimbo ictsiac. Ëbi cuesten dectanquin unës uamenuc mibi icsambo icnuc ëbi bëboedo chuiquid dapabo icsamboshë iquec —quepondash Esus.

¹² Adsho tantiashien Pidato: —Esus unës uatiapimbo icchitebi. Cuemetiadquio iquebi —quetanquin padpiden Esus chieshënquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caid: “Ëbentsëqui chuiquid dapambo nebi,” quiac caosh. Aid dëniaquec Esus chuiquid dapa icte bunquiec. Esus cuemequin mibi chuiquid dapambo mimbi nëishmeque. Esus cuesten dectanquin unës ua —quecuededpondash. ¹³ Adsho tantiashun Esus puduemeoatanec cuënote nacnenaid abuc tsadunaidën cuidte chuinuec tsadten tsadtopondash Pidato. Aid cuënote nacnenaid con onqueten Cabata capondash. ¹⁴ Nuquin Papan matamiampid inchësh tantiate ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. ¹⁵ Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënquido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unës ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

¹⁶ Adoaquien Esus chieshënquidon chiacpadomboen: —Esus

cuesten dectanquin unës uatan —capondash Pidaton aton sondado chuiquin.

*Cuesten dectanquin Esus unës uaid
(Mat 27.32-56; Mad 15.21-41; Duc 23.26-49)*

¹⁷ Adoac buanquin: —Nëidën dectanu —qeshun sondadon cuate daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. ¹⁸ Ambo nidshun aton dashcute dachictanquin bëchun shuin mëtoccaquinc tatoccaquinc catanquin cuate daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uguë diadbudcuenec diadnuc Esusquio nënantanquio dectampondash.

¹⁹⁻²⁰ Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cuate pada uaidën dada uapac caondash. Aton matses Doma yacnoquid onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshëquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onqueten-onquetenquien dada uaid matses dadpen-shun isnushe —quiash ²¹ Pidato chiec nidpac caondash. —Icsamboen chuiquin ma mimbi dada uapac boc. ¿Con matses chuiquid dapada Esus nedic? Adquidpenquio nec. Utsi uain dada uata. “‘Isadaidbo matses chuiquid dapa nebi,’ quequid Esus nec,” quequin cuate cuëshë utsin dada uata —caquien ²² —Padi. Mambi ëmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

²³ Adnubien Esus dectanquido sondado daëd-daëdquieic icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi icquid niondash. ²⁴ Adquid icsho isun: —Canchenquio icquin ¿tsundanquio bedequè? Isnuna —qeshun abi cuëmëdquidtedi dada uabanshun tëchun sandoshon cadotanëquin dada uaidëmpi abia puduemiaid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “‘Abentse-abentsen con dashcute bedosh. Con dashcute utsi bednu,

quequin dada uaidëmpi abia puduemiaid isnuen naosh,' quependac," quequin dada uapampic.

²⁵ Adnubien Esus dectanaid cueste tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi Mactada yacnuësh choquid. Aidtedi chido icpondash. ²⁶ Në chido tabadnuc ambobi uquëctšëc tabadondabi. Adec ambi tantiaidquio ëbi icsho isun Esusën aniba chuipondash. —Nëid con mado cata, tita. Ma mibi bëdamboen dayun uanu —capondash Esusën. ²⁷ Adshumbic ëbitsen chuiquin: —Con ta tita cata. Adshun bëdamboen ëbi dayun uashunta —cac con shubunobi buanon-dambi bëdamboen Esus dayun uashunuen.

²⁸ Adboshien unësquionoshi Esus: —Con Pan chiacpadomboen nainembi. Matses tantiec ëbided cuidadec unësebi —quequin tantiec con tsusedpan dada uaquin chuipampicpadec: —Acte bundobi —quepondash Esus. ²⁹ Adsho tantiashun matsun acte mucambo icquid anidquid shapu-shapupactsëcquidën punshun cueste dëdectanshun abuc sananquin ëccuëscadonetsëcquin chishmepondash. ³⁰ Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tëdquëdbudpondash Esus unësequi.

Esus uinte masiaid

³¹ Adnubien Esus chieshënquido: —Badiadash Nuquin Papan matamiampid inchësh tantiate ushë iquec. Chonoad-enquio icte ushë nec. Aidën cuesten dectanquin unës uaid chococac icsambo ictsiashe. Nëbimbobi chococamenu —qeshun Pidato chuitampac caondash. —Baded nidte podquënquin unës uame. Inchësheque —cac ³² Pidaton aden chiac sondadon nidte podquëntanondash. Esusbëdta dectanaid ëquë diadquidba nidte podquënshumbic utsiuc diadquidtsen. ³³ Adotanquin isquien Esus ënden unësac. Adshobien nidte podquënenquio icpondash.

³⁴ Adotanquimbic: —Unësabi icnushe —qeshun: —Unës uaquiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebëdi. ³⁵ —Adosho ëmbimbo isondambi —caimbi. —Ëmbi dada uaid isun ma Esus tantianu —qeshun abimbo chuiquin dada uaombi nëid dada uaquin. ³⁶ Nuquin Papan tantiamiac con tsusedpan: “Canite podquënenquio iquendac,” quequin dada uapampicpadomboen canite podquënenquio icpondash Esus. ³⁷ Adembidi podo ansete dada uapampic. “Ambi podo anseboed isec tabadendac,” quequin dada uapampic.

Esus unësacsho chococaid

(*Mat 27.57-61; Mad 15.42-47; Duc 23.50-56*)

38 Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshënquido dacuëdënquin: —Esus tantiaquid nebi —quequin utsibo chienquio icboedëmbi Pidato chuitampac caondash. —Esus chococanun buanendambi —cac: —Ai —cac Esus buampondash. 39 Aidbëdi Nicodemo inchëshën Esusbëd onquiondaid nidpac caondash. Bëdambo nuadquid mida adoebëdta cabiunaid unësaid dabiunte bëac caondash. Nuamboshë. Yuëmbo icnuc 35 quidostembi icnuc bëac caondash. 40 Adshumbien Osebëdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoquin. Adshumbic padpiden dabiunoaquin. Adshumbic dataneoquin. Chococanun con matsesën adoquid. 41-42 Adashic: —Badiadash Nuquin Papan matamiampid inchësh tantiate ushën unësaid chococac icsambo ictsiashe. Badedquio chococanu —qeshun tied nëbi ictsëcquidën Esus buampac caondash. Buanshumbic cuënote dapa shëcuë uaid chucan matses chococabi icquidën Esus nauedpac caondash. Shëcuën nauedtanquin bëtimpac caondash cuënote dapambidi.

20

Esus uincuenaid

(Mat 28.1-10; Mad 16.1-8; Duc 24.1-12)

1 Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. 2 Cuënote dapa bëcunepamboen shëcniacsho istanec titinquianec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

3 Adoquin: —Istanu —quianec 4 titinquianec chococacno Petedobëdi nidpondac. Petedo nianec ëbia nidpondabi. 5 Adshumbimbi puduedenquio icquin shëcuë anshuebudshun anispondac. Adshun isquien dashcute dataniaiduidtsëqui uec. 6 Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. 7 Në dataniaid uenubi uidictsëc dashcutempi bëpucaid bëdamboen shëbunaid uiondash. 8 Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec. 9 —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquio

icboedi adondabi. ¹⁰ Aden istanec ëbi ushboconobidi chiec choapondabi.

Esusën Madia Mactada yacnocquid ismiaid
(*Mad 16.9-11*)

¹¹ Adnubien ëbi chuiamboed Madia chococacnobidi isec nidoapac caondash. Nidash shëcuë cuëmano tsadec seden-quetuidpac caondash. Adec shëcuë cuëmano tsadec seden-quetanec shëcuë anshuebudshun isaquien ¹² Nuquin Papan abi yacnoshon uaido mayan bëda daëd ushumbo icquid dasiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. ¹³ Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquio iquebi. ¿Mitsimbo buampashba? Unësquio iquec —quetanec ¹⁴ auchbidi nidnuec bidiadshun isquien Esusquio icpec. Utsi dansho ¹⁵ Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Ëbi isme. Shëcuë utsin chococanun buanu —capac caondash Madian Esusquiobi chuiquimbi.

¹⁶ Abi adoshobien Esusën: —Ëbi nebi, Madia —cac bëisquotanequien: —Esus nec. Ëbi chuiquidquio nec —quetanquin con onqueten cuënquin: —Dabi —capac caondash. Adotankuimbien Esus dayumbudpac caondash unësquio icsho. ¹⁷ Aden abi dayumbudshobien Esusën: —Ëbi dayunenda. Padpidec nidenquio icte danquin ëbi dayunenda. Ëmbi chuibocpadec con Pa yacno nidabi yuec-yuecpactsec tabadtanec nidebique. Ëbëd icboedo ëmbi con utsibo caboedo ëmbi chuiboedquio chuitan. “ ‘Nuquin Papa yacno nidendabi,’ quiosh,” catan —quepac caondash Esus. ¹⁸ Adoaquien ëbi chiec Madia chopondash. —Nuquin Icbo Esus isombi. Uincuenaccosh. Ambi chuiboed chuinu. Tantia —quequin Esusën abi chiaidquio chuituidpondashi Madian Mactada yacnocquidën.

Uincuenashun Esusën abëd icquido ismiaid
(*Mat 28.16-20; Mad 16.14-18; Duc 24.36-49*)

¹⁹ Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënquido dacuëdënquin umanucuësh utsi puduedtiapimbo icnuc bëdamboen bëtashash tabadnubien shëcuënuësh puduedenquio icboedi nuntanquiobi Esus isadcuempondash. Adtanequien: —Dacuëdenda —quepondash. ²⁰ Adtanquin abi bëchun shuin mëtoccaid abi podo ansiaidbëdta ismiaquini cuishonquiampondac: —Nuquin Icbo uincuenac —quiash.

²¹ Adec cuishonquesho isashien ambi chuibocpadecebidi: —Dacuëndenda —quetanec: —Tantia. Mibi chuïnu. Con Pan: “Matses chiec nid,” ëbi caondacpadomboebidi: “Ëbi chuibeneta,” mibi caimbi —quepondash Esus. ²² Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac. ²³ Mibëd icquin Nuquin Papan tantiaidquio tantiamequin Nuquin Papan Mayanën mibi utsibo chuïbamendac. Adoac mimbi aden chuïbanaido caic: “Nuquin Papan chiaïd niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadomboen Nuquin Papan bëdamboen istsiash. Utsien: “Nuquin Papan chiaïd niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadomboebidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanequi isadenquio yanoaondash.

Esusën Tomas ismiaïd

²⁴ Adec Esus isadenquio yanoanubien Esusbëd icboed utsi Tomas abi ushëmbi anin daëd tishaid chopondash. ²⁵ Choshobi: —Esus isombi —cac: —¿Aidquiobida nepash? Utsien nechitash. Bëchun shuin mëtoccaid shëcuë isun aid shëcuë mëdanten bëmishquinc podo ansiaïd bëmishquinc caquioshombimbi: “Ai, nuquin Icho uincuenac,” quequin tantiatsiac. Padambobi: “Con Icbobien niash,” quetiapimbo iquebi —quepondash Tomas. ²⁶ Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoapondash. Adashic: —Dacuëndenda —queoapondash. ²⁷ Adtanequien: —Is con mëdante, Tomas. Shëcuë bëmishec cho. Në podo ansiaïd iqueque. Aidsen bëmishec cho. Adshun: “Uincuenabien icchitash,” queboedëmbi: “Uincuenaccosh,” quequin tantiata —caquien ²⁸ mishenquio yec badedi: —Tso. Con Icbombo ma mibi neyoc. Nuquin Papapadquidquiobidi ma mibi neyoc —quepondash Tomas. ²⁹ Adsho tantiashien Esus: —Ëbi isun: “Nuquin Papapadquidquiobidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquiobidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

³⁰ Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. ³¹ Padi, aidtedi chiombi. —“Nuquin Papan chomiaïdquio yec Nuquin Papan

Madombobien Esus nec,” quequin aid tantiash ma Nuquin Papa yacno abëd tabadtequido icpanu –quequin aitedi dada uaombi.

21

Chian cuëmanuësh Esus isadoaid

¹ Tantia. –Edusaden yacnuësh isadboshic chian Tibedias caid cuëmanuështsen Esus isadpondash –quequin mibi chuinu. ² Esus uincuenash daëdec isadan con nidaid Cadidia caid yacno nidanepondabi. Nidanianash nëidtedi tabadpondabi. Nëidic Petedo. Nëidic Tomas anin abi ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aitedi icpondabi. ³ Adnubien Petedo: –Ëmbi bedtenecpaden nëshaidën nuëcquid bedtanu –quepondash. Adshobimbi: –Nid. Nuquitedi nanu –capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

⁴ Badiadquionobi acte cuëman masi dapan Esus nidsho istuidpondambi. Utsiembi dampondac. ⁵ Adshobini Esusën cuëmpondash. –Con utsibo ¿tedsi bedo? –cac: –Padambo. Nibëdosh –capondambi. ⁶ Adsho tantiashun: –Mimbi nëniauc nënenquio icquin cano utsiuc nëshaid nëne. Adoac nuëcquid bedadec –cac ambi chiauc nëshaid nënetanquin: –Indono –cac nëshaid indotiapimbo yuëmboshë icpondash. Nuëcquid dadpen bedac.

⁷ Adsho isumbimbi: –Ma Esus neyoc, Petedo. Nuquin Icho nec –capondac. Adoaquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec. ⁸ Ëbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactiontsëc nidondabi. ⁹ Tsyuec choash pudundoshon isquien pambëdi nuëcquid cuëten shëadtsec. ¹⁰ Adnubien Esusën: –Mimbi bedboed daëdpactsëc beccho. Penu –cac ¹¹ Petedo: –Ai, bedtanu –quianec nidash cano anidtoashon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdtiadtsëcquio icnuc indondambi.

¹²⁻¹³ Adshumbic ambi: –Pec cho –cac cho-choash tabadsho pamba menebantanquin nuëcquidtsen Esusën menebampondashi. Adoac: –¿Tsutsi ne? –quenquio icquin: –Esus

nec. Comapenen tantiaquin nuëcquid nuqui bedmiosh — quequin tantiondambi ëbitedishun. ¹⁴ Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

Esusën Petedo chiaid

¹⁵ Aden chian dapa cuëmanshun Esusbëdtan piondambi. Adshumbic Onas caidën mado Petedo Esusën chuipondash. — Tantia. Mibi chuinu, Petedo. Nëidon ëbi bëdiactsëc tantianuc ¿ada ëbi tantiaquie? —caquien: —Ai, mibi tantiembi. Aden ëmbi tantiaid mimbi tantiec —quepondash Petedo. Adsho tantiaash: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacbimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. ¹⁶ Adshumbic padpiden: —¿Ada ëbi tantiaquie, Petedo? —cac: —Ai, mambi mibi tantieyoc —quesho tantiashien padpidec: —Ëbi tantiaquin con obecabimboecquido ëbi dayun uashunta —queoapondash Esus. ¹⁷ Aden daëden chuishumbic padpiden Esusën: —¿Ada ëbi tantiaquie, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quiash shubiantiadtsëcquio yanondash. Adashic: —Mibi con Icho nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho tantiaash Esus padpidec: —Ëbi tantiaquin con obecabimboecquido ëbi dayun uashunta —queoapondash Esus.

¹⁸ Adashic Petedobidi chuioaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumesahun utsibon ëquë mëdimbudcuentsëcshun mibi nidte bunacmanombo mibi buanendac —quepondash Esus. ¹⁹ —Aden mimbítsen Nuquin Papan chiacpadomboenuidi nabansho ëbi chieshënquidon mibi unës uaindac —quequin tantiec adpondash Esus. Adashic: —Ënenquio icquin ëbi tantiata —quetanquimbic: —Cho. Nidnu —cac ëbitedi pduanec nidondabi.

²⁰ Tsyuec nidshobini Petedon bidiadquin ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachochtsëqui uesho aidën: “¿Tsutsi cao, Icho?” capondash. ²¹ ¿Mitsipadec aid unëspatsiash? —queshun: —Ma nëid. ¿Mitsipadec unëspec? —capondash Petedon ëbi unëste Esus chuimequin. ²² Adoaquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadec unësenquio

ictsiash. Adecbidi: “Ëbi choabi icnuc ma unëspanu,” ëbi quiacpadece unëstsiash. “Nadec unësendac,” quequin mibi chienquo iquembique. Ënenquo icquin ëbi tantiata –quepondash Esus. ²³ Adec: –Unësenquo ictsiash –Esus qesho tantiash ëbi caic: –Esusën tantiaidquo yec Uan unësenquo iquendac –quecuededpondash Esus tantiaquido. ¿Adenda Esusën chuidiondash? Ma padenquo iccondac. –Ëbi bunacpadequi aidi unësendac. “Ëbi Nuquin Papa yacnuësh choabi yacpadece ma unësenquo icnu,” ëbi quiacpadequien unësenquo ictsiash. “Adecbidi ëbi choabi icnuc ma unësnu,” ëbi quiacpadece unëstsiash –quequien iccondash.

²⁴ Aden Esusën nabanondaaid ënquin chiombi. Ëmbi isondaaidquo chuiquin abimbo chuiquin aidtedi dada uaombi. ²⁵ Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaqin dada uate dadpenquioshë naimbudnetsiambi. Padi. Aidtedi dada uaombi.

ESUS CHUIBENEQUIDON NAID

Esus aton Papan abuc indote

¹⁻² Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. ³ Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampanëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choaqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. ⁴ Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. ⁵ Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

⁶ Adshumbic, padpidec Esusbëd icquin abëd icquidon: —Yuen matses utsibon namiaido nuquin matses nec. ¿Nëbimbobida mibi nuquin matses chuiquid dapa icpeque? Tiantianu. Chui —capanëdash Esus chuiquin. ⁷ Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. ⁸ Aden chuishumbic: —Aton Mayan Nuquin Papan meniac aidënquio tantiamequin pausunac ëbi chuibenequidquo mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

⁹ Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsibon isbedednubi. Aden isec tabadnubi abu ushun Esus bëtimpanëdash.

¹⁰ Adec Esusbëd choboedo isec tabadnubien dashcute ushumbocquid dasiuidquid daëd choash tabadec: ¹¹ —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

Matias Esus chuibeneta quequin iccuededquidon chiaid

¹² Aden Esus abuc indosho isash abëd macuësh Odibos caid yacno chobedo Edusaden caid yacno nidoapanëdash. Chonoadtemaid ushë nec, quec aidtionsëqui capunëdash. Aido Edusaden yacno choash abuc quënë yacno abi tabad-bocno dectatoash tabadoapanëdash. ¹³ Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Ad-peon mado Acobo cuëmëdquid, utsibic isadaidpembo name-quin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidtedi Esusën ëbi chuibeneta caido aid quënë nuntan tabadnubi ¹⁴ utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiabimboec onquecuededpanëdash.

¹⁵ Adashic Esus tantiaquid 120ted iccuedednubi nënantanquio nidtoshon Esusën ëbi chuibeneta caid abentsëcshun Petedon naden chuipanëdash: ¹⁶⁻¹⁷ —Udas pado chuibanu. Tantiata. Esusbëd icquin piucquid dayun uaquid icquimbi Esus chieshënquido Udasën Esus bedmepondash. ¹⁸ Aden Esus bedmeshun ambi piucquid bedboed menequin aton tiedëmpi bedashic aid tied nantanuësh têtaniadash pobidisquiash paëdec aton pucu tishidpac caondash. ¹⁹ Pucu tishidec intac chiuidaid tied icsho tantiaquin Edusaden yacnocquidtedishun Aquedama cain aton onqueten cuëmbededpondash. ²⁰ Adembidi ëndenquimboshë Udas pado tishabicnuc chuiquin Nuquin Papan Mayanën tantiamiacpadomboen tsusedpa Dabid caidën Udas cuidte tantiec cuëdënte Sadmo caid naden dada uapampic:

“Ma adequi aton shubu mosadpanuna ma aibidi aton mat-ses nibëdquid shubu icpanuna.”

Aden Udas pado cuidte chuiquin cuëdënte Sadmo caid utsit-sen naden Dabid Padon dada uaoapampic:

“Aidën icsain nacpaden tanenquiocquin ma utsin bëdamboen napanuna,”

quequin Dabid padon dada uapampic —quepanëdash Petedo. ²¹ Aden chiashic abi onquec: —Udas pado nibëdnuc Esus chuibeneta quequin abentsëc nuquitedishun chuinuna. Nëid quënë nuntan nuquibëd capuquido dada dadpen iquec. Nuqui Esus chuibeneta caid nadquid ictiad. Chuinu. Tantiata. ²² Esus Uan padon acten mentosho isash niamëdenquio yec Esusbëd capucueneshun Esus indosho isquidquio icsho, Esus chuibeneta, quequin nuqui chuitiad. Adoac Esusën ëbi chuibeneta caidobëdtan Esus uincuemiaid chuibantiad —quepanëdash Petedo iccuededquido chiec.

²³ Aden Petedon chuibanac daëd istuidash Petedobëd iccuededquido, Petedon chuibocpadquid nëid daëd iquec, quequin chuipanëdash aidon. Ambi istuidaïd abentsëc Ose cashun Badsabas cashumbic Ustus, quequin cuënaïd nepanëdash. Utsibic, Matias cuëmëdquid icpanëdash. Nëid daëd Petedon chuibocpadquid nec, quesheo tantiashun: —Nënantanquio tabadec cho —cac abi daëdi choash tabadsho isash ²⁴ Nuquin Papa chiec nadec iccuededquido onquepanëdash: —Nënantanquio chomeboed nëid daëd iqueque. Is, Papa. ¿Mitsicquidimbi Esus chuibeneta, cape? Èbitedi tantiame, Papa. ²⁵ Udas pado taudtiadpambo chian anëdënquiacno nidboedën nauidaïd namenu, quequin mimbi bëdamboen isaid abentsëc ëbi isme. Papa. Aden mimbi ismiac ma aidëntsen Esus chuibenepanuna —quepanëdash Nuquin Papa chiec. ²⁶ Aden chuitanquimbic aid daëd abi cuëmëdquid abentse-abentsen dada uatempin dada uashumbic tëchun sandoshon cadotaniac dada uatempi abia puduenaïd istanquin, Matias cuëmëdquid nec, quequin isbededboshic, Esusën ëbi chuibeneta caïdo onseted icboedi nëbi Matiasbëd doseted yanosh, quequin chuibededpanëdash nuntan iccuededquidtedishumbi.

2

Aton Mayan Esus tantiaquidtedi menebanaid

¹ Adashic isadaïdbon ambi aton tiedën caniquid abia ëshëaid bedaid tantiad ushë chotsëcnubi Esus tantiaquidtedi shubunuëshi iccuededoapanëdash. ² Ambo iccuededquimbi badedquio shubu nuntan cunquequid dapa choec natiambo cunquiabimboecsho abitedishun isbededpanëdash. ³ Aden aid isbedednubi cuëte dëtsisidacimboecquid budec mais-maisec Nuquin Papan Mayan matsadtocuededpanëdash abi isquidtedi. ⁴ Nuquin Papan ma aidobëd tabadnueshun aton Mayan Esus tantiaquidtedi menebanac matses utsi-utsiec onquetenquio onquecuededpanëdash ambi matsadtomiaïdotedi.

⁵ Aden Nuquin Papan aton Mayan menenubien isadaïdbo utsibo Edusaden yacno cho-choash dadpen tabadpanëdash. Aïdo Esus tantiesabo yequi aton tsusedpabon chiampicpaden nanuec nidaïd utsi-utsiec yacnoësh Edusaden yacno cho-chopanëdash. ⁶ Ambo cho-choash tabadnubi Nuquin Papan aton Mayan meniaïd-meniaïdquiec nëmbobi choquidon onqueten-onquetenquiec onquesheo tantiash nëbi cho-choboedo utsi-utsiec: ⁷ —¡Padtec! Dacuëdanquiopaic. Èbipadquiecshenda onquepec. ¿Onquequidotedi nidaïd Cadidia yacnocquidoda nepec? ⁸ ¿Mitsipaden con onquete bedash

onquecuededpec nec? ⁹ Ēbitedi nidaid utsi-utsiec yacnoësh cho-choquido nebi. Padtia yacnoësh choquido; utsibic, Media yacnoësh choquido; utsibic, Edan yacnoësh choquido; utsibic, Mesopotamia yacnoësh choquido; utsibic, Udeya yacnoësh choquido; utsibic, Capadosia yacnoësh choquido; utsibic, Ponto yacnoësh choquido; utsibic, Asia yacnoësh choquido; ¹⁰⁻¹¹ utsibic, Pidiquia yacnoësh choquido; utsibic, Pampidia yacnoësh choquido; utsibic, Equipito yacnoësh choquido; utsibic, Dibia Sidene udictsëcuësh choquido; utsibic, shubu dadpen icquid Doma caid yacnoësh choquido; utsibic, acte nēnantan nidaid nacrēdquid Quideta caid yacnoësh choquido; utsibic, Adabia caid yacnoësh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibansho tantiembi. ¹² ¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

¹³ Adnubien: —¿Bēdamboec onquepequida onquec? Paēmboquid cubudquin acshun tantienquiocquido nepanui —queoapanēdash utsibo.

Iccuededquido Petedon chuibanaid

¹⁴ Adec onquesho tantiashun Esusēn ēbi chuibeneta caido cho-choquin Petedon nidtoshon tantiamenu quequin naden cho-choboedo comapenec onquequin chuipanēdash: —Mimbi icsamboen tantiaid chiembique. Tantiata. ¹⁵ Ushē abuc-totsēcnuibi ēbitedishun paēmboquid acamboccombi. ¹⁶ Utsin-utsinquie onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matsesbēd tabadnueshun aton Mayan menenun chiaid naden aidēn dada uampic:

¹⁷ Nēid nidaid naimbudnubi

Con Mayan matses utsi-utsien menendambi.

Aidon madobobēdtan aidon champibontsen ēmbi yuecquio icshun nanun chiaid chuibanendac.

Adembidi caniabontsen ushquin ēmbi chiacpaden isendac.

Adembidi tsusiobontsen ushquin ēmbi chiacpaden isendac.

¹⁸ Aden con Mayan meniac ambi tantiacpadomboembidi ēmbi chuiquin namiaidon dadan chidobēdtan

ēmbi yuecquio icshun nanun chiaidquiobidi chuibanoaindac.

¹⁹ Adembidi, con Mayanēn tantiamiac ēmbi yuecquio icshun nanun chiaid matsesēn chuibanubien abucuësh uin-sadpamboctequid icnubi

| | | |
|----------------|--------|-----------------------------|
| nidaidēnshun | ismete | intac bimboectequid bēdtabi |
| nēdēnquetequid | cuēte | pushudquid bimboectequid |

abembi pushudquidbēdta adquidtedi mibi
ismendambi.

²⁰ Adquid icnuc badiadēn ushē chēnquenquiocnoc
inchēshacimboectequid inchēshēn ushē piu-piupambo yec in-
tachimboecsho mimbi isbededendac.

Ēmbi ismiaidtedi icambi matses cuidte ushē choendac.

²¹ Ismequimbi con Icbombo nec ēbi caquidquio
mēnchiquendambi,
quequin Nuquin Papan chuimiapaden Oedēn dada uapampic.

²² “Adembidi Nuquin Papan chomiaid chiembique. Tantiata, isadaidbo. Nasaded caid yacnoēsh choquid, Esus, Nuquin Papan chomiaid icquin nadatiambocquin nabanquin ismebansho mimbi isondac. ²³ Aidi Nuquin Papan tantiampicpaden Esus bedshun mimbi isadaidpembo chuiquid menequin, Unēs uata, cac cuesten dectanquin Esus unēs uapanēdash. ²⁴ Aden mimbi nac unēsacsho icsaisa chococacno yuec ictiapimbo iquec, qeshun Nuquin Papan Esus uincuemepanēdash. ²⁵ Adembidi ēndenquimboshē tsusedpa Dabid padon Esus chuibanquin naden dada uapampic:

‘Con Icbo abuc nidec bēyucanquid ēbēd tsadacimboecsho isec nebi.

Aidi con dayun tsadquid icsho isquin natiaic cametequid dacuēdēnenquio iquendambi.

²⁶⁻²⁷ Aid unēsash uincuenta tantiec ēbitsen uincuenendabi, Papa, quec cuēdēnec bēdambo iquebi.

²⁸ Nuquin Papa yacno tabadacpadec nidaidēn tabadquin ismiac

mibi yacno nidash mibēdi tabadec bēdamboshē iquebi mimbi camiaid iquendabi,’

quequin Esus tantiaquin Dabid padon dada uapampic.

²⁹ “Adomboen tantiaquin dada uash Dabid unēsacsho chococapampid nēbi shēcuē iquec. ³⁰ Dabid Nuquin Papan ambi yuecquio icshun nanun chiaid chuiquid icquin nadopampic. Yuecquimboshē yash mibi ēndenquimbo unēsampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. ³¹ Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unēsacsho chococaqui aton nami chodquenquio yec uincuenendac, quequin chuipampic Dabid padon. ³² Ai, Dabid padon chiampicpadembi Nuquin Papan Esus uincuemepanēdash. Aid uincuemiacsho isondaic icquin mibitedi chuibanec nebi.

³³ Aid uincuenash Nuquin Papan dayunquio tabadendac nēbi. Ambo choacsho matses tantiaquin Nuquin Mayan ma

aidbēd tabadnueshun matses mimbi meneta, aton Papan cacpaden abi tantiaquidtedi menebanquiac onquete utsin-utsinqueic onquesho nēbi mibitedishun tantiec. ³⁴ Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquio icshun nanun chiaid naden Dabid padon chuibampampic:

‘Nuquin Papa Icbo Dapa icquin abipadquid icbo cain: Nēbi ēbēdi tsadec cho.

³⁵ Mibi chieshēnquido dēniacquidquo mibi icmenun nabono.

Chiata,’

quequin Nuquin Papan nanun chiaid Dabid padon dada uapampic.

³⁶ “Aden tantiaquin Dabid padon chuiampampid Esus mimbi cuesten dectanquin unēs uaid uincuemequin matses icsaid bedshunash abided cuidadquid Nuquin Papan icmepondash. Adoac ēmbi chiaid abimbo iqueque. Esus tantiaquidquo icta, isadaidbo —quepanēdash Petedo.

³⁷ Aden Petedon chuisho tantiash iccuededquido abi ic-said tantiec unēsquo yec: —Esus tantianuequin ¿atotsi nuqui nape? —quepanēdash utsi-utsiec Petedobēdta Esusēn ēbi chuibeneta caid utsibo chiec.

³⁸ Adoaquien Petedo: —Mibi icsaid ēnshun, Esus con Icbombo nec, quequin abimbo tantiaquin acten mentometa ma ēbi icsaid Nuquin Papa bēpiscudnu queshun. Adoacsho aton Mayan mibi menendac. ³⁹ Adembidi tantiasho isun min tsyuecquidtsen menendac. Adembidi nidaidtedi yac-nocquidēn tantiasho isun aton Mayan meneoaindac ambi chiampicpaden —quepanēdash Petedo Esus isquidquo.

⁴⁰ Aden chuibanequi: —Mimbi icsamboen tantiaid ēnta. Aden ēnash Esus tantiaquidquo icta —quequin chuibudquin Petedon ēmpañēdash.

⁴¹ Aden chuisho tantiash, Tantiapiembi, quepanēdash utsi-utiec. Aid ushēmbi dadpenquioshē tedes midted Esus tantiaquid yampanēdash. Adquid icsho isun acten mentobampañēdash.

Esus tantiaquido iccuededaid

⁴² Adashic, Esus tantiembi, queboedo tantiabenabi iquec Esusēn ēbi chuibeneta caidon Esus chuibansho tantiec tabadequi Nuquin Papa chiec onquedenepañēdash. ⁴³ Adec tabadcuededsho isash: —¡Padtembo! Dacuēdampambo iquec —quec utsibo tabadpañēdash. Adnubien Esusēn ēbi chuibeneta caidon nadatiambocquin nabampañēdash. ⁴⁴ Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpañēdash.

⁴⁵ Aton na menequin piucquid bedshun utsin na

nibēdsho isun menepanēdash. ⁴⁶ Adecbidi badiadquidēn-badiadquidēnquiec Nuquin Papa tabadte shubu uashunaid yacno nidash iccuededpanēdash. Adecbidi shubu utsi-utsiec yacno nidash iccuededquin Esus unēsaid tantiaquin panēmpi cuēsh-cuēshun peded-pededpanēdash. Adembidi bundoshon pebededoapanēdash. Adobanequi ēbi icsaid bedshunash Esus cuidadaid tantiec bēdambo iquebi, quec ⁴⁷ Nuquin Papan naid chiec cuēdēncuededpanēdash. Adec tabadsho isash, Bēdamboquido nec, quec utsibotsen Esus tantiaquid yanash abi tantiaquid utsitedibēd iccuededpanēdash.

3

Caputiapimbo icquid bēdamiaid

¹ Adnubien abi nidteniacpadēn ushē budec 3 yanuc Petedo Uambēd Nuquin Papa tabadte shubu uashunaid yacno Nuquin Papa chiec nidpanēdash. ² Ambo nidnubien caputiapimbocquid aid shubu shēcuē Bēdaidquio caid yacno utsibon buampanēdash. Anin tishacchobi yec caputiapimbocquid icpanēdash. Aidi badiadquidēn-badiadquidēnquien buandenequin aid shēcuē cuēmano nanded-nandedac uequimbi cho-chosho isun: —¿Adabi piucquid menetsia? — cabampanēdash. ³ Ambo Petedobēd Uan chosho isquin: —¿Adabi piucquid menetsia? —capanēdash caputiapimbocquidēn uequin.

⁴ Adoaquien Uambēd nidtuidash nidquin Petedon: —Ēbi daēdi is —capanēdash caputiapimbocquid bēisquin. ⁵ Adoaquien, Ēbi menepashun, quequin abi daēdi isobien, ⁶ Petedon: —Piucquid con na nibēdec. Ēmbi tantiaidēn ēbi tantiamebocpaden naimbique. Nasaded yacno iccondaidēn Esusēn bēdamiacpadec bēdanash nidtoash nidec nid —capanēdash. ⁷ Aden chuiquin caputiapimbocquidēn mēdante abiucquio bedtanquin Petedon nidtomiac badedquio nidtopanēdash caputiapimbochoedi. ⁸ Bēdambo yec nidtoash capupanēdash. Adec bēdanash Petedobēd Uan chedobēd capuashic Nuquin Papa tabadte shubu uashunaidēn puduedash, Nuquin Papan bēdamioshi, quec pudundotan-pudundotanec: —Cuishon —quepanēdash. ⁹ Adec capusho isquidon nadobededpanēdash: ¹⁰ —Nuquin Papa tabadte shubu uashunaid shēcuē, Bēdaidquio caid yacno uetsequi, Piucquid ēbi menepashun, queboedi capueque. En is. ¡Adpaidie. Is! Tantiadempamboctequid nec —quequin isbededpanēdash.

¹¹ Adec capuequi Petedobēdta Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash.

¹² Adec tabadsho isun Petedon naden chuibampanëdash: — ¿Atotsi quiash padtec quequin ëbi daëdi comapenen bëise? ¿Ëbi daëdshun nacta nëid capupadic? ¿Ëbi bëdambocquid icquindambi nadio? Padenguio. Nuquin tsusedpabon Papa caidën bëdamiaid nec. ¹³ Aidi Abadauan padon Papa caid nec. Aidbidi Isac padon Papa caid neoaic. Aidbidi Acobo padon Papa caid neoaic. Aidon Papa caidëmbi ambi nidaidën chomiaid Esus nëbi aton Papabëd tabadoaic. Aton Papa yacno nidoabicsho Esus bedshun Pidato meniaquien, Nëid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unës uaquimbien ictiad, quequin mibitedishun chuipondac. ¹⁴ Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. ¹⁵ Abia uincuentequid mibi chuiquid dapa mimbi unës uacshobien Nuquin Papan aidi uincuempondash. Aid uincuenacsho ëbitedishun isondambi. ¹⁶ Esusën ëbi bëdamepec, quequin tantiash nëid taë icsacboedën Esus tantiash capusho mibitedishun isec.

¹⁷ “Utsibo, Nuquin Papan chomiaid nec, quequin tantienquiocquin mibi chuiquidobëdtan mimbi Esus unës uamiondac. ¹⁸ Ëmbi matses chuiquid dapa icmenu caid matsesën mëyanaid iquendac, quequin ambi chuimiaidtedi Nuquin Papan dada uamiampicpaden mimbi naondac. ¹⁹ Nëbi mimbi icsamboen tantiaid ënquin Nuquin Papa tantiata ma mibi icsaid bëpiscudpanuna; adecbidi ma abëdi tabadebi, quequin tantiec mibi bëdambo icpanuna; ²⁰ adecbidi ma ambi chuiquid dapa icmiaid Esus mibi bedmenuen chomepanuna. ²¹ Nuquin Papan abitedi icsaisa icmete ushë choabicnuc ambi chiampicpadequi nëbi Esus abuc aton Papabëd tabadec. ²² Adembidi chuiquin Moisesën dada uampid nad iqueque. Tantiata:

‘Chuiquid Dapa ëbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bëdamboen nabanta.

²³ Ambi chiaid tantiesa Nuquin Papan nësecaindac,’ quequin Moisesën dada uampic.

²⁴ “Adomboembidi Samuedën chuibampampic. Adomboembidi Nuquin Papan chuimiaid utsibon chuibanoampic. ²⁵ Nuquin Papan chuimiaidon tsyuecquido mibitedi nec. Tsusedpa Abadauanën tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuoaid mibitedi nec. Naden Abadauan Nuquin Papan chuipampic:

‘Mibi ëdenquimbo unësampin aton matsesbëdta matses utsi-utsien min tsyuecquidën bëdambo icmendac.’

26 Nuquin Papan Abadauan chiampicpadec aton tsyuecquid choacsho mimbi unēs uapondac. Aidi Nuquin Papan uincuemiatic ma isadaidbomba abi icsaid ēnsho ma ambi bēdambo icmiaid icpanuna — quepanēdash Petedobēd Uan.

4

Ambi naid Petedobēdta Uan isadaidbo tsusiobon chuibami-aid

¹ Aden Petedobēdtan Uanēn chuibanubien isadaidbo tsusiobo cho-chopanēdash. Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash. ² Esus unēs uacsho Nuquin Papan uincuemiaticpadembi matsetsen unēsacsho uincuemeoaindac, quequin Esus chuibenequidon chuibanubi chopanēdash aidō. ³ Choshon Petedo Uambēdta bedash: —Inchēsheque. Badiadshun nēidēn chiaid tantianush nidnu. Nid —quianec puduanquimbi Petedobēdta Uan quēnēn nauedmepanēdash isadaidbo tsusiobon. ⁴ Aid daēdi bedabicnuc Petedobēdtan Uanēn chuibansho tantiaquido Esus tantiaquid dada dadpen sinco midted yampanēdash.

⁵ Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoēsh iccuededpanēdash. ⁶ Nēidtedi icpanēdash: ancanquid dapa daēd Anashēdi Caipas icpanēdash. Nēidic aton shubun icquido abipadquido: nēidic Uan, utsibic Adecandedo, aidtedi chochoash iccuededpanēdash. ⁷ Iccuededshumbic Petedobēdta Uan bēmeshun nēnantanquio nidtomesun: —¿Tsutsi chuiquin caputiapimbocquid bēdamio? —capanēdash tsusiobon.

⁸ Adoquien Petedo Nuquin Papan Mayanēn comapenen tantiamiac nadpanēdash: ⁹ —Caputiapimbocquid tantiaquin bēdamiaid isec ¿mitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata. ¹⁰ Caputiapimbocquid Esuquidistu Nasaded yacno iccondaidēn bēdamiaid niosh. Mimbi unēs uacsho Nuquin Papan uincuemiaidēn nac nēid caputiapimbochoedi nēbi nidtoash capusho mimbi isec. ¹¹ Aid bēdamequid mimbi tantienquio yaid Nuquin Papa yacno yuedanquidquio nec. ¹² Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

¹³ Adec Petedobēd Uan dacuēdenquio yec comapenec onquesho tantiash tsusiobo: —Aid daēdi tsusiopenquio iquequi adecbidi Nuquin Papan chiampid tantiabenabicquid iquequi

Esusbëd icquid aid daëd icquin ¿mitsipadomboen caputiapim-bocquid bëdamepashba? —quec tantiadempambo yec tsusiobo tabadpanëdash. ¹⁴ Aden ambi bëdameboed aibdëdi icsho isash, Icsamboen mimbi naoc, quetiapimbo tsusiobo tabadpanëdash. ¹⁵ Adshun Petedo Uambëdta nidmiash, Tantuanu, quec onquecuededec tsusiobo: ¹⁶ —¿Mitsipadomboen aid daëd nuqui napeba? Nadatiambocquin nasho Edusaden yacnoquidtedishun isbededposh. Ad icnuc, Caputiapimbocquid bëdanambo iquec, ëbitedi quetiapimbo iquebi. ¹⁷ Dadpenshun tantianushe queshun, Esus padpiden chuibanoainda, quequin aid daëdi chuinuna —quecuededpanëdash tsusiobo. ¹⁸ Adshun Petedobëdta Uan chomeoashun: —Padpiden Esus chuibanoainda. Aidën chiaid chuiquin tantiamenda —capanëdash tsusiobon.

¹⁹ Adoaquien: —¿Mitsicquidën chiaid ëmbi natequid icpec? ¿Nuquin Papan chiaid niacquindambi mimbi chiacpaden nadi? ²⁰ Nuqui isboed nuqui tantiaboedbidi chuitequidquio iquendac —quepanëdash Petedo.

²¹⁻²² Adoaquien: —Ëmbi chiacpaden nainquiocsho isun mibi daëdi mëyantsiambique. Baded nid cueschitomane —capanëdash tsusiobon. Abi tishaid seta 40ted icquid caputiapimboesho bëdamepanëdash. Aid Nuquin Papan bëdamicsho isash utsibo cuëdëncuededpanëdash. Adsho tantiash Petedobëdta Uan mëyantiadquiocboedi adotiapimbo yec tabadpanëdash tsusiobo.

Isadaidbo tsusiobon chiaid Esus tantiaquidon chuioaid Nuquin Papa chiaid

²³ Tsusiobon nidmiac nidash iccuededboconombo choash puduedshun tsusiobon chuiboed Petedobëdta Uanën chuioapanëdash. ²⁴ Adoac abentsëc onquiacbimboen naden Nuquin Papa chuipanëdash: —Con Icbombo mibi nec. Abubëdta nidaid acte chedo uashun aidënquio icquidtedimbo mimbi uabampampic. ²⁵ Adembidi ëndenquimboshë mimbi tantiacpaden min Mayanën tantiamiac mimbi chuimaid, Dabid padon naden dada uapampic:

“¿Atotsieshumbini ëbi dëniactiapimbo icquidombi isadaidpembo comapenec nëishash ëbi dëniacte buncuededpec? Adquiecbidi ¿Atotsi quiash ëmbi chomiaid icsamboen nanushbimboec isadaidbo onqueuidoapec?”

²⁶ Ancanquidobëd chuiquid utsibo ëmbi chomiaid aton Icbobi mëyanuec iccuededec.”

²⁷ Ai, mimbi Dabid pado dada uamiampicpadembi ënabi Edusaden yacno isadaidpembo ancaquid daëd Edodesbëd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onquecuededpondash. ²⁸ Mimbi

tantiampicpadembi unēs uapondash, Papa. ²⁹ Adquidēn Petedobēdta Uan chushcasha mimbi tantioc. Cuesambocquid ēbitedi icmequin mimbi chiaid ēbi chuibame, Papa. ³⁰ Icsaisan Esusēn bēdamiacpaden nadatiambocquin naban, Icho —quepanēdash Esus tantiaquido Nuquin Papa caic.

³¹ Adoac abi iccuededacno ishcutpanēdash. Adec ishcutnuc ambocquid Nuquin Papan Mayanēn comapenen pausunac dacuēdenquiocquin Nuquin Papan chiaid chuibampanēdash.

Abentsēc yacbimboec tabadaid

³² Aden chuibanequi abentsēc onquiacbimboec tabadec Esus tantiaquido, Con na nec, quenquio yec, Nuquin Papan na nec, quec tabadcueneapanēdash. ³³ Adequi tabadcuenequimbi dacuēdenquiocquin, Esuquidistu uincuenacsho isombi, quequin chuibeneapanēdash. Adec Esus tantiaquido tabadsho utsibon bēdamboen isbededquin aidēn chuibansho bēdamboen tantiapanēdash. ³⁴⁻³⁵ Adembidi nidaid icho utsin-utsinquien aton nidaid menequin piucquid bedshun Esus chuibenequido meneapanēdash. Adembidi, shubu icho utsin-utsinquien aton shubu menequin piucquid bedshun meneoapanēdash. Aden meniac aton na nibēdquid icsho isun Esus chuibenequidon menebanac bunenquio tabadpanēdash. ³⁶ Adecbidi ambo acte nēnantanquio nidaid nacdēdquid shubu uaidēnshun Chipide caid yacnoshon tishaid Edusaden yacno choash Ose tabadpanēdash. Aidi, Bēdamboen mimbi naoque. Adobanta, quedenesho Bednabe cuēmpanēdash. ³⁷ Aidēmbi aton nidaid menequin piucquid ambi bedaidtedimbo Esus chuibenequido meneoapanēdash.

5

Ananiasbēd aton chido Sapida muaid

¹ Adnubien dada utsi Ananias cuēmēdquid aton chido Sapidabēdtan aton nidaid menequin piucquid bedpanēdash. ² Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniacbimboen meneapanēdash Ananiasēn. ³ Adnubien, Piucquid abitedi meniacbimboen Ananiasēn mua uaposh, quequin Nuquin Papan Mayanēn tantiamiac naden Petedon Ananias chuipanēdash: —Satanasēn tantiamiaid icquin ¿mitsipaden tantiaquin Nuquin Papan Mayanēn isnubi mua uaqin ēbi menio? ⁴ ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidedi mitsana niosh. ¿Mitsipaden tantiaquin piucquid abitedi meniacbimboen meniano? Aden bēquin abimbo chienquiocquin Nuquin

Papambobi mimbi mua uaboc⁵ —Petedo quesho tantianec Ananias unësequi uebudpanëdash. Adsho isash Esus tanti-aquidtedi dacuëdpanëdash.⁶ Unësacsho isun dashcute cuëshën dataneshun buanshun caniabon chococatampanëdash.

⁷ Bënë chococambic ushë abuctoan unësboedën chido aton bënë unësaid tantienquo yec choapanëdash.⁸ Choasho isumbien: —¿Ada min nidaid menequin nëidtedi piucquid bedo? —Petedo quesho tantiashien:

—Ai, aitedi bedombi —quepanëdash Sapida.

⁹ Adoquien Petedo: —¿Nuquin Papan Mayanën ëbi muasho tantiapec, quequin tantienquiocquinda min bënëbëdtambi min piucquid abitedi meniabcimboen meniano? Nëbi min bënë chococaboedon mibitsen buanendac —Petedo quenubic¹⁰ Petedon tayumbi uebudec Sapida unëspanëdash. Aidtsen unësacsho buanshun aton bënëbëdtabi chococatampanëdash.¹¹ Adoac aid daëdi unësaid tantiash Esus tantiesatedi Esus tantiaquidobëd comapenec dacuëdcuededpanëdash.

Bë-bëaidtedi bëdanaid

¹² Adashic Sadomonën tacpan caid yacnoësh Esus tanti-aquido iccuedednubi Esus chuibenequidon nadatiambocquin nabampanëdash.¹³ Adomboen nabansho isash Esus tantiesabo dacuëdec tacpan yacno chotiapimbo yequi: — Esus tantiaquido bëdamboshë iquec —quecuededpanëdash.¹⁴ Adec tabadequi utsi-utsiec dadpen dadabëdi chido Esus tantiaquido yampanëdash.¹⁵ Adec Esus tantiaquid yanshun, Daicsaido Petedon bëdamepec, quequin tantiaquin daicsaido bë-bëshun Petedo capuacno nambededpanëdash.¹⁶ Adembidi dëuequidon Edusaden yacno daicsaid bë-bënubi mayan icsan mëyanaido bë-bëoapanëdash. Aden bë-bëaidtedi bëdampanëdash.

Esus chuibenequido tsusiobon quënë nãuedmiaid

¹⁷ Adnubien isadaidbo ancaquidbëd tsusio dapa utsibo saduseyobo caid isec otacquio tabadboedi matses dadpen Esus chuibenequido yacno cho-chosho isash nëishcuededpanëdash.¹⁸ Adec nëishcuededshun Esus chuibenequido bedmeshun quënë nãuedmepanëdash.¹⁹ Aid inchëshëmbi Nuquin Papan uaid mayan bëda choshon quënë shëcuë bëtashaid bëcadoquin abitedi puduemec:²⁰ — Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata —quepanëdash Nuquin Papan uaid mayan bëda.

²¹ Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoaic tabadoapanëdash aitedi. Chuibanubien isadaidbo

tsusio dapan abëd icquidobëdtambi tsusio utsibotedi cho-chomeshun: —Esus chuibanquido bedtan —cac ²² quënën nauedaid puduenushe quequin isquido chuiquid nidshun isquien Esus chuibenequido nibëdec. ²³ Adsho isash choaquin: —Quënë shëcuë bëdamboen bëtashquin quënën nauedaid puduenushe quequin isquido shëcuë cuëmano capusho isombi. Shëcuë bëcadoash puduedshun isaquien ënden puduen-puduenac —quepanëdash quënën nauedaid puduenushe quequin isquido chuiquid. ²⁴ Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec. ²⁵ Adnubien dada utsi choshon: —Mimbi quënën nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash. ²⁶ Adoaquien quënën nauedaid puduenushe quequin isquido chuiquid capitan caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi se-senushe qeshun mëyanenquiocquin Esus chuibenequido bëoapanëdash.

²⁷ Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: ²⁸ —Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamebanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo. ²⁹ Adsho Esus chuibenequido utsibon tantianubi Petedonuidi: —¿Matsesën nata caidodabi nedi? Nuquin Papan nata caid icquin nabanembi. ³⁰ Mimbi cuesten decantanquin unës uaondaaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec. ³¹ Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna. ³² Esuquidistun nabansho isbempodambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic —quepanëdash Petedo.

³³ Aden Petedon chuisho tantiash tsusiobo: —Icsambo iquiec —quiash Esus chuibenequido cuesunete bumanëdash. ³⁴ Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboedtedi buantan —cac ³⁵ buanambic: —Icsamboen nanushe qeshun bëdamboen tantiaquiota. Aido cuesunete

mibi bunegue. Cuesunenushe chiata. ³⁶ Ëndenquio utsi Teyudas cuëmëdquid icpondash. Aidi tsusio dapa icnuequin chuisho tantiash dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash. ³⁷ Adashien matses tambanta caid ushëmbi utsi Udas cuëmëdquid Cadidia yacno icnëdaïdbëd matses dadpen capupanëdash. Udastsen cuesuniac abëd icnëdaïdtedi padpidec choenquio yec adecbidi udimbo nidanepanëdash. ³⁸ Adec umanuc buamboedo chuiquid nibëdanaque. Aidbëd icboedo mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëdendac. ³⁹ Aido Nuquin Papan namiac chuisho mimbi ëmetiapimbo iquendac. Nuquin Papa chieshënushe qeshun aido nidmeta.

⁴⁰ Aden Camadiedën chiac: —Adonona —qeshun: —Buamboedo bëoata —cac bëacsho cueshcanten cuesmepanëdash. Aden cuestanquin: —Esus chuibanoainquio yec nidtan —qeshun puduemepanëdash. ⁴¹ Puduemiac Esus mëyanaid tantiec nidequi abi chuibanasho mëyanaid yec bëdambo iquebi, quec tabadpanëdash. ⁴² Adshumbic badiadquidën-badiadquidënquien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibampanëdash aidon. Shubu utsi-utsiec yacno nidshun adomboembidi chuibenepanëdash.

6

Niante chidobo pete menebanquid icta caid

¹ Adashic badiadquidën-badiadquidënquie Esuquidistu tantiaquid dadpen-dadpenquie yanubi isadaïdbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc —quepanëdash. ² Adoaquien Esuquidistu tantiaquid utsibo abi yacno cho-chomiash Esus chuibenequido 12ted: —Niantebo pemebanuec Nuquin Papan chiaïd chuibanquin ëntiapimbo iquebique. ³ Niantebo meneta canuen nadquidquio istuidshun chuita. Nuquin Papan aton Mayan meniäc tantiamiäc bëdamboec tabadsho mimbi bëdamboen isaidquio istuidta. Adquid 7ted istuidshun, Niante chidobo pete menebanquid icta, cata. ⁴ Aidtedshun niante pemebanubimbi Nuquin Papa chuido-chuidoendac. Adembidi Nuquin Papan chiaïd chuibenendambi —quepanëdash Esus chuibenequido.

⁵ Adoaquien: —Mimbi bëdamboen chioc —quepanëdash Esuquidistu tantiaquid utsibo. Aidën chuibocpadembi aïdtedi

istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquio Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. ⁶ Aidedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

⁷ Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiash Esuquidistu tantiaquido yampanēdash.

Esteban bedaid

⁸ Adnubien Nuquin Papan Mayan meniaidēnquio. ambi comapenen tantiamiaidēnquio, Estebanēn nadatiambocquin ismebampanēdash. ⁹ Aden nadatiambocquin ismenuc bēdamboen tantienquio yec utsibo comapenec onquecuedepanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidedi Edusaden yacno cho-choash tabadec Estebambēd comapenec onquepanēdash. ¹⁰ Comapenec onquequin Esteban Nuquin Papan aton Mayan meniaid icsho aidēn comapenen tantiamiac onquesho dēniaquec utsibo onquetiapimbo icpanēdash. ¹¹ Onquequin dēniactiapimbo icquin utsibo naden aidon chuipanēdash: —Tsusiobo naden chiec nidtan: Estebanēn nuquin tsusedpa Moises caidēn dada uampidbēdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash. ¹² Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismepanēdash. ¹³ Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec. ¹⁴ Naden Estebanēn chioshe. Tantia: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata

quequin chiaid natiapimboctequid nec, quequin Estebanën chuibanosh, quequin muaquin chuipanëdash Esteban dëniactiapimbocquidon chomiaidon. ¹⁵ Aden Estebanën chiaid muaquin chuiquin naimbudquimbi tsusiobobëdtambi comapenen Esteban bëisquin Estebanën bëtantiate ushëbimboec ushumbo yec chënqesho isbededpanëdash.

7

Estebanën chuibanaid

¹ Adec Estebanën bëtantiate ushëbimboec chënqesho isec tsusio dapambo Esteban chuiquin: —¿Abimboda mimbi naid chuiposh? ² —caquien yuecquio onquequin Estebanën naden chuipanëdash: —Chiembique. Tantiaguiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uëshëmbo yec dasiuidteniaid matsesën istemaid bëchomaoanquiec icquid Abadauan ismepampic. ³ Aden ismec nadec onquepampic: “Min utsitedi nianec nidaid utsi yacno mibi ëmbi ismenu caid yacno nidta.” ⁴ Adsho tantiash Candeyabon nidaid yacnoësh nidashic nidaid Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic. ⁵ Aden chomeshun Nuquin Papan naden Abadauan chuipampic: “Nëid nidaidën mibi capuacno mitsanapenquio nec. Yuecshun mibi menenun nanuna. Mimbi tishmiambochoedi min chidon tishaid abentsëc min madombo nëid nidaid menendambi. ⁶ Nëid nidaid bedabi yec mimbi tishmiaidën tishmiaid caidaido matses utsibon nidaidën tabadendac. Ambo tabadshobi anocquidën aido yuashun seta dadpen 400ted matamequin mëyanendac. ⁷ Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaid caidaido abi mëyanacnoësh nidashic nëid macuësh yacno choshon ëmbi chiacpadomboen nabanendac.” ⁸ Aden chuishumbic, Nidaid menenun nanuna, quequin Nuquin Papan naden Abadauan chuioapampic: “Dada bacuëbëdta dada caniaidtedi shui dëbid dëtemeta. Adobansho isun, Èmbi chiaid bëdamboen naquidquio aidtedi nec, quequin ismendambi,” quepampic Nuquin Papa. Nuquin Papan chiaid tantiashun Abadauanën ambia dëtemeshun dadatedi aidëmbidi shui dëbid dëtemeoapampic. Adoshombic yuecquio icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic adembidi Isaquën aton mado tishacsho Acobo cuënquin aidtedecbidi ushun Isaquëntsen Acobon shui

dëbid dëtemeoapampic. Adoshombic, canishun Acobon tishmiaido 12ted icpampic. Abentse-abentsen tishmeshun aidtedecbidi ushun aton madon shui dëbid dëtemeoapampic. Adoaquien yuecash Acobon madotedi tsusiobudnepampic —quepanëdash Esteban isadaidbo tantiamenu quequin chiec.

⁹ Aden chiec abi onquec: —Aid 12ted nuquin tsusedpabo icampic. Acobon mado, chido utsin tishaid, Ose icpampic. Aidi aton papa cudasaidquo icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoaquin Equipito yacnocquid Ose meneoapampic. ¹⁰ Adoac, Yuanu, qeshun natiamiaid Ose icsho isun Nuquin Papan aid dayun uaquin dacuëdenquo icmequin comapenen tantiaquidquo bëdamboen chuiquidquo Ose Nuquin Papan icmepampic. Adquidquo icsho isun Equipito yacnocquido ancaquidën Padaon caidën Equipito yacnocquido chuiquidquo Ose icmepampic.

¹¹ “Yuecash Equipito yacnocquido chuiquid, Ose, icnubi nidaid Equipito caid yacnocquidbëd nidaid Canan caid yacnocquido natiambo buncuededpampic. Adnubi nidaid Canan yacno nuquin tsusedpabo Isadaidbon pete nibëdquiec yampampic. ¹² Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaido nuquin tsusedpabo chuiquin: ‘Equipito yacno pete iquec, qesho tantiambique. Bedtan,’ cac Osen utsibo aton papan chiacpadec pete bedec nidanepampic. ¹³ Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose qesho tantienquiocboedëmbi Padaonën tantiabempampic.

¹⁴ Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. ¹⁵ Adashic, Equipito yacno yuec tabadashi tsusio budashi Acobo unëspampic. Auëshquiobidi nuquin tsusedpabo Acobon madotedi adecbidi unësoapampic. Unësaçsho Equipito yacno chococapampic. ¹⁶ Adashic, yuecquo yash Equipito yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abaduanën tied bedshunëdacno chococapampic.

17 Aden chuishumbic Estebanën nadopanëdash: — Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuiampid ushë chote anoentsëc yanuc nuquin tsusedpabo dadpen yanec caidpampic. 18 Dadpen caidsho isun Equipito yacnocquido ancaquid utsin Ose pado tantienquo icpampic. 19 Aidëmbi mua uaquin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. 20 Adnubien dada bacuë Moises tishacsho Nuquin Papan, Aid bëdaidquo iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. 21 Ompoqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. 22 Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

23 “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesën istuidpampic. 24 Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneopampic. 25 Ëmbi adoshö isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquiec nidnubi aton matsesën tantienquo icpampic. 26 Badiadash aton matses yacno padpidec nidquin aton matses daëd cuesnansho istuidshun, Ëmenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. 27 Adoquien Moises cuëscatanec: ‘¿Ëmbi nasho cuidquin ëbi chuiquid tsuntsin mibi icmioshe? Chui. Tantiyanu,’ quetanequi: 28 ‘¿Equipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic. 29 Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

30 “Adashic, seta dadpen 40tedbidi matamec nidaid

Madian caidèn tabadec cuëtempiuidquio yacno matses nibëdquiec yacno macuësh dapa Sinai caid anoentsëqui Moises chopampic. Ambobi tabadquimbi cuëtempi nëdënquiacbimboecquid nënantanquio Nuquin Icbon Chomiaid tabadsho Moisesën ispampic. ³¹ Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuipampic: ³² 'Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,' quesho tantiash dacuëdec uëdëquiec istiapimbo yec Moises nidtuidpampic. ³³ Nidtuidsho isec Nuquin Icho Moises chiec nadpampic: 'Nëmbo ëbi icsapenquio icquid icnuc caputemaid nidaid iqueque. Min tapucudte chicshun tantiata. ³⁴ Min matses ëbi cudasaido Equipito yacnoquidon mëyanac uëshquiec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,' quepampic Nuquin Icho Moises chiec.

³⁵ "Aden cuëtempi nëdënquiacbimboecquid nënantanquio ichoedën Nuquin Papan Chomiaidën isadaidbo bëyucanquin buanquid icta cac: '¿Ëmbi naid icsho cuidquin ëbi chuiquid tsuntsin mibi icmioshe? Chui. Tantienu,' abi caondaïdo bëyucanquin buanquid Moises icpampic. ³⁶ Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquiec yacno seta dadpen 40tedbidi matamec abi tabadcueniactacnoshontsen nadatiambocquin nabanquin isadaidbo Moisesën ismeoapampic. ³⁷ Aidëmbi naden chuipampic: 'Yuecquio icshun ëbipadquid mimbi tishmiaidën tishmiaïdon caidaïd Nuquin Papan chuiquidquio icmendac,' quequin Moisesën chuipampic. ³⁸ Isadaidbo bëyucanquin chuiquid Moises matses nibëdacno isadaïdbobëd macuësh dapa Sinai caid yacno choash Nuquin Papan chomiaïdobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padambocquidën ambi naden nata quequin dada uaid Moises menepampic. ³⁹ Aden aid dada uaid bedshun bëyucanquin chuïsho tantiesä yanec nuquin tsusedpabo Moises bunenquio yec Equipito yacno nidoate bumpampic. ⁴⁰ Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuïbededpampic: '¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash?

Nuquin Papan uacpadquiocnoc nacententa. Nacnenash bëyucanquin chuiquid aid iquendac,' tsusedpabon cac
 41 bacan bacuëbimboecnuc Adonën nacnempampic. Ambi nacnenaid tantiaquin isadaidbon nidaidën capuquid yua cuesuneshun cuëdënëmbodedpampic. 42 Adquid cuëdënënsho tantiash isadaidbobëd ictiapimbo iquec Nuquin Papa, Padi. Adenda, quenquoio icpampic. Adquido Nuquin Papan ëndenquimbo tantiaquin naden chuiampic: 'Adomboen mimbi nacnenaid tantiec tabad.' Adembidi Nuquin Papan yuecquoio icshun nanun chiaid isadaidbo chuiquin naden dada uamepampic:

'¿Matses utsi nibëdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid tauidenio? Padenquoio.

43 Ëmbi uaid badiadën ushë, ëbitedishun bëyucamembi, queshun aidpadquid nacneshun Modoc cuënquin aton shubumpi nuntan namposh.

Aidbëdtabi uispa dapatsen ëbitedishun bëyucamembi, queshun aidpadquidbidi nacneshun Dempan cuë nec danëshën sebudec shuebudshun, Mibi tantiaquid nebi, quequin adquid mimbi chuihoc.

Aden nasho isun ëmbi menenu caid nidaid yacno mibi nidmenquoio icquin nidaid utsi, Babidonia caid udi mibitedi nidmeoaindambi.'

Aden ambi chiaid niacquido isadaidbo tantienquoio icquidobi Nuquin Papan chuiampic —quepanëdash Esteban isadaidbo chiec.

44 Aden chiec yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic. 45 Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquoio shubu uaoampic. Aden aid shubu nacnenoanubien isadaidbo chuiquid dapa nuquin tsusedpa Dabid yampampic. 46 Aidi Nuquin Papan bëdamboen isaidquid aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bë-bëmepampic. 47 Aid shubu uabi Dabid unësam bic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. 48 Aden matsesën shubu uaidën Nuquin Papa tabadenquoio iquec. Adembidi Nuquin Papan chuimianiaidën naden chuiampic:

49 “Abutenquiobi con tsadte dapa iquec. Adecbidi nidaidten-
quiobi ěmbi tincatequid nendac.

¿Adquid icnubidabi matsesĕn nidaidĕn shubu uashun tabad-
mepadic? ¿Nidaidĕnuidi tsadpectabi tiboquendac?

50 ¿Tauaquiouimbi abitedi uambodambi ictionda?”

quequin Nuquin Papan chuimiaidĕn dada uapampic
—quequin chiashic Esteban abi onquec: 51 —
Pacuĕnĕdacbimboen Nuquin Papan chiaid tantiash icsaquin
ĕnesa mibitedi nec. Aton Mayanĕn tantiamenu cac
tsusedpabotedishun chieshĕmpampicpadembi mibitedishun
chieshĕnoaic. 52 ¿Nuquin Papan ambi yuecquio icshun
naden nanuna quequin chiaid ambi chuimiaidtedi min
tsusedpabon mĕyanenquioda icpampic? Adembidi, Nuquin
Papan chomiaid choendac, quequin chuiquido tsusedpabon
cuesunepampic. Aidon nacpaden Nuquin Papan chomiaid
mibitedishun unĕs uamiondac. 53 Nuquin Papan chiaid ambi
uaidon mayan bĕdabon meniaqui Nuquin Papa chieshĕnquido
mibi nec —quepanĕdash Esteban isadaidbo chuiquin ĕnec.

Esteban se-siaid

54 Adec Esteban onquesho tantiashun nĕishĕnshun
Esteban iccuededquidon chushcapanĕdash. 55 Adoaquien
Nuquin Papan Mayan meniaidquio icquin Estebanĕn
abuc isquin Nuquin Papa uĕshĕmbo yec matsesĕn
istiapimbo bĕchomaoanquiec ictequid abichobi dasiuidteniaid
chĕnquenubi Nuquin Papabĕd tancandaĕdquiec Esuquidistu
nidtuidsho ispanĕdash. 56 Aden isequi: —Abuc shĕcuĕ uaid
shĕcniaye. Is. Umbo Esuquidistu, matsesondaid, Nuquin
Papabĕd tancandaĕdquiec tsadsho isembi —quepanĕdash
Esteban.

57 Adsho tantiash tsusiobo comapenec sidquianec
pamumĕdanec titinquequin Esteban bedshun 58 cuĕnoten
se-senuen shubu nibĕdacno udi buampanĕdash. Aden
Esteban buanshun aton dashcute Saudo cuĕmĕdquidĕn taĕno
sampanĕdash Esteban se-senuequidon. 59 Sanshun se-siaquic
Estebanĕn Esuquidistu cuĕnquin naden chuipanĕdash: —Ĕbi
yued, Icbo —quiashic, 60 danĕshĕn sebudash comapenec
nadec onquec: —Ĕbi se-sequido icsaid cuidenquio yec
bĕpiscudta, Icbo —quepanĕdash. Adec onquetanec Esteban
unĕspanĕdash.

8

Saudon Esus tantiaquido mĕyanaid

1 Esteban se-senu caquien, Ai, adota, quiash isec
uano Saudo tsadpanĕdash. Esteban se-siaid ushĕmbi
Edusaden yacnoshon Saudon Esus tantiaquid utsi-utsien

comapenen mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. ² Adnubien Nuquin Papan chiacpadomboen naquin Esteban chococaic comapenec sedenquec shubipanëdash. ³ Adnubien Saudo Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepanëdash.

Samadia yacnoshon Esus chuibanaid

⁴ Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanëdash. ⁵ Adembidi niante chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. ⁶ Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash. ⁷ Aidëmbi nadatiambocquin nabanac mayan icsa dapuduedaid icboedi mayan icsa sidquianec cuempanëdash. Adecbidi canite icsaidbëdta caputiapimbocquid dadpen bëdampanëdash. ⁸ Adsho isash Samadia yacnocquido, Bëdambo iquebi, quec tabadpanëdash.

⁹ Adnubien Samadia yacno ënden chondaid, Nadatiambocquin nabanquid dapa nebi, quequin mayan icsan tantiami-acpaden Simon cuëmëdquidën nabampanëdash. ¹⁰ Adosho isash: “¡Eee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdta abi chuiquidon comapenen tantiapanëdash. ¹¹ Aden yuen Simonën ismiac, Isnuequid dadpen badiadquidën-badiadquidënquiec abi yacno choash iccuededpanëdash. ¹² Adnubien, Nuquin Papa yacno puduedmi-anquid Esus nec, quequin Uedipen chuibansho tantiaquid yampanëdash dadabëdi chido chedo. Adsho aittedi acten mentomepanëdash. ¹³ Simontsen: —Esus tantiaquid nebi —quesho acten mentoaqui Simon Uedipebëd capuquimbi Uedipen nadatiambocquin nabansho isun, Adopenshenda nabanec, quequin ispanëdash Simonën.

¹⁴ Adashic yuecash Samadia yacnocquido Edusaden yacno nidash nadpanëdash: —Nuquin Papan chiaid Samadia yacnocquidon tantiabedec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmepanëdash. ¹⁵⁻¹⁶ Adec aid daëd nidaneshun: —Esus tantiaquid acten mentoaidouidi nëidtedi nec —anocquido

quesho tantiashun: —Nëidtedi min Mayan mene, Papa —quec onquequin ¹⁷Petedobëdtan Uanën mëdanten Esus tantiaquido mamishbampänëdash. Aden mamishbanubi aidtedi Nuquin Papan aton Mayan menepänëdash.

¹⁸ Aden Petedon nasho isash Simon: —Ma adquiec mëquiadnueshun mibi piucquid menenu. ¹⁹ Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

²⁰ Adoaquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu. ²¹ Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. ²² Mimbi icsamboen tantiaid ënta. Aden icsaid ënsho isash Nuquin Papa mibi icsaid bëpiscudendac. ²³ Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

²⁴ Adoaquien: —Ëbi tauiantiadpambo chian anëdënquequid nënensushe quiash mibi Uambëd Nuquin Papa chiec bëdamboec onquebudneta —quepanëdash Simon.

²⁵ Adec Samadia yacno tabadquin Petedobëdtan Uanën: Esus ispondambi, queded-quedaquid Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuioapanëdash aidëmbidi.

Uedipe Etiopia caid yacnocquidbëd icaid

²⁶ Adoshombic, Samadia yacno Uedipe icsho Nuquin Papan uaid mayan bëdan nadopanëdash: —Nëuëshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibëdacno podquedën nidash nidtuidtanec chotan.

²⁷ Adoac nidtoanec nidquimbi Nuquin Papan uaidën mayan bëdan chuibocno choquin Etiopia caid yacnoësh choquid Uedipen bëquedtuipänëdash. Ancanquid chido Candase cuëmëdquid aton na dayun uashunquid aid dada nepänëdash. Aidi Edusaden yacno nidash tabadquin Nuquin Papa chianec ²⁸ padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanëdash. ²⁹ Adnubien Nuquin Papan Mayanën: —Nidaid cano chinunta —cac ³⁰ Uedipen titinquequin chinumpanëdash.

Aden Etiopia yacnoësh choquid dada uaid isec onquesho isash: —¿Isbanec onquequina tantiaquie? —quepanëdash Uedipe.

³¹ Adoaquien: —Tantiamequid nibëdnuc ¿mitsipadentsimbi tantiape? Èbëdi antsadtoec cho —cac Uedipe abëdi antsad-topanëdash.

³² Aidbëdi antsadtoshon Etiopia yacnoësh choquid Nuquin Papan dada uamiampid isec onquesho Uedipen naden tantiapanëdash:

“Obeca cuesunenuen nimbambocpadomboembidi mëtaneshun nimbanoaposh Nuquin Papan chomiaid unës uanuequin.

Adecbidi obeca bacuë abi datasnuequid icnuc cuëdenquio yacpadec abi unës uanuequid icnuc cuëdenquio icoaposh Nuquin Papan Chomiaid.

³³ Aidi Icsaisa icsho mëyansho isec, Icsambocquidta neque. Isnu, quenquiocpash aton matses.

Aidi chido inesa yec ambi tishmiaid nibëdnuc ¿Tsuntsin ambi naid chuipadic?”

³⁴ Aidtedtsëqui abi isec onqueboed Uedipe ismeshun Etiopia yacnoësh choquidën: —Èbi isec onqueboed ¿mitsicquid chiequini onquepo? ¿Abibi chiadaidtabi isec onquepo? ¿Utsida chuibaneque? Èbi chui. Tantianu —capanëdash Etiopia yacnoësh choquidën Uedipe chuiquin.

³⁵ Adoaquien, Matsestedi icsaid bedshunash abided ciudadec Esus unësaid Nuquin Papa yacno puduedmianquid nec, quequin dada uapampidën chiec, quequin Etiopia yacnoësh choquid tantiamenuen chuibanpanëdash Uedipen.

³⁶ Adoanec nidquimbi Etiopia yacnoësh choquid Esus tantiaquid yanshun actempi istuidshun: —Actempi iqueque. Is. ¿Adabi mentoe? —capanëdash.

³⁷ Adoaquien Uedipe: —Esus tantiaquidquio nebi, quesho mibi acten mentono —capanëdash.

Adoaquien: —Nuquin Papan mado Esuquidistu nec, quequin aid tantiaquid nebi —queshun Etiopia yacnoësh choquidën: ³⁸ —Nidtuïd —cac nidaïd cano nidmequidën cabayo nidtuïdmian acte budshun Etiopia yacnoësh choquid Uedipen mentopanëdash. ³⁹ Adashic, acte nantanuësh abi daëdi dectatosho Nuquin Papan Mayanën Uedipe buampanëdash. Adoac Uedipe padpiden isenquio yequi, Esus tantiec bëdambo iquebi, quec Etiopia yacno nidoapanëdash.

⁴⁰ Adnubien Uedipe Nuquin Papan Mayanën nidaïd utsi Asoto caïd yacno buampanëdash. Ambo capucuenequin shubu dadpen icquid yacno-yacnomboen Esus chuibëec onquec choequi shubu dadpen icquid Sesadeya caïd yacnotsen choapanëdash.

9

Saudon tantiate paucaid

¹ Adnubien Edusaden yacnoësh Esus tantiaquid utsi-utsiec nidanenubien Saudo Edusaden yacno tabadpanëdash. Ambo tabadec chushquec Esus tantiaquidtedi cuesunemetiadquio yec isadaidbo chuiquid dapabo yacno Saudo choash ² shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bëmete bunebi. Damasco caid yacnoshontsen adote bunebi. ¿Ada mimbi adota quequin dada uashun ëbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanëdash Saudon.

³ Aden chiac dada uaid bedash Edusaden yacnoësh puduanec nidec Damasco anoentsëqui yanshobi abucuësh bed-bedquequin Saudo dëcatepanëdash. ⁴ Aden dëcatiac Saudo paëdash uesho isun nadec abucuësh onquec: — Saudo, ¿atotsieshun ëbi tantiaquido mimbi mëyampeba? Èbitsen mëyantiadpambocquin mimbi aido mëyanec —quepanëdash.

⁵ Adoaquien: —Icbo, ¿Tsutsi mibi ne?

⁶ Adoaquien: —Mimbi mëyanaid Esus nebi. Èmbi chiaid chieshë nec mibi tabadeque. Nidtoash Damasco yacno nidtan. Anoshon ëmbi nata cacpadomboen anocquid mibi chuimembique. Nidtan.

⁷ Adec abucuësh onquenubi Saudobëd cho-choquido nidtuidshun tantiequi onquequid isenquio yec tabadtuidpanëdash. ⁸ Onquec ënëdan nidtoash Saudo istiadquio iquequi bëshupanëdash. Adsho isun mëdinanquin Damasco yacno buampanëdash. ⁹ Adequi Damasco yacno choash 3tedec ushec isenquio yec buna mëmunquiec Saudo tsadpanëdash.

¹⁰ Adashic, Saudo puduedash tabadacno ëdibictsëc tabadquid Esus tantiaquid Ananias cuëmëdquid icpanëdash. Aid usho Esusën: —Chuïnu. Tantia —caquien:

—¿Atoda? Nëbi uebi, Icbo —quepanëdash Ananias.

¹¹ Adoaquien: —Nidtoash podqued cuembocquid caid yacno nidtan. Ambo choash Udasën shubun puduedshun shubu dadpen icquid Tadso caid yacnoshon tishaid Saudo cuëmëdquid Nuquin Papa chiec onquec tsadsho mimbi istu-identac. ¹² Adec aid ushacimboec tsadsho mibi choshon aidi padpiden ismenuen mimbi mëdanten mamishac isoshe. Aidi istan —capanëdash Esusën.

¹³ Adoaquien: —Con matses dadpeshun Saudon naid icsa chuibansho tantiombi, Icbo. Aidëmbi Edusaden yacnoshon mibi tantiaquido mëyamepac caoshe. ¹⁴ Aidbidi Edusaden yacnocquido chuiquid dapanquio dada uaid sananquin nëmbotsen mibi tantiaquido bedmeshun tanemenuec aidi chopac caosh —quepanëdash Ananias Esus chiec.

¹⁵ Adoaquien: —Aidi ëbi chuibeneta caidquio icmeshun ëmbi bëdamboen isaid neque. Aid dacuëdënenquio yec nidshun istanta. Aidën isadaidbo abi chuiquidobëdta isadaidpembo abi chuiquidobëdtabidi ëbi chuiben-chuibenec capuendac. ¹⁶ Èbi chuibenesho mibi mëyantequid iquendac, quequin Saudo tantiamembi —quepanëdash Esus.

¹⁷ Adsho tantianec Ananias nidash Udasën shubun puduedshun Saudo mamishec: —Con utsi, mibi podquedën chosho chuiquidën Nuquin Icbonquio, Esusën mibi padpiden ismenuen Nuquin Papan Mayan mibi menenuembidi chomi-aid nebi —quepanëdash Ananias Saudo chiec.

¹⁸ Aden Ananiasën chuinubi nuëcquid bitsibimboecquid ëshënuësh paëdnubi bëshuacboedëmbi, Saudon, bëdamboen ispanëdash. Aden isec capusho isun acten mentopanëdash. ¹⁹ Adecbidi Saudo penquio yec padishacboedi piash padpidec uidëncuenoapanëdash.

Damasco yacnoshon Saudon Esus chiaid

²⁰ Adec uidëncuenash Saudo Esus tantiaquidobëd tabadpanëdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanëdash Saudon.

²¹ Aden chuisho tantiash tantiadempambo yec tabadec: —¿Edusaden yacnoshon Esus tantiaquido mëyameboedida nec? ¿Adecbidi nëmbo choshon tanemeshun isadaidbo Edusaden yacnocquido chuiquid dapabo yacno buamenuec choabida ictic? —quepanëdash Damasco yacnocquido.

²² Aden anocquidon tantianubi Nuquin Papan Mayanën oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuidedchuidedpanëdash.

Isadaidbo Esus tantiesa abi cuesunete bunsho isash Saudo cuenaid

²³ Adembidi yuec ushquin Saudon ënenquiocquin chuibansho tantiash, Icsamboen chiec, quiash isadaidbo utsibo yec abi cuesunete bunsho isun tantiaquidën chuisho Saudon tantiapanëdash. ²⁴ Adnubien Saudo cuesunenuen shubu dadpen icquid abichobi tsicatequin daquënë uaidën shëcuë cuëmanoshon abi chieshënuquidon caimpanëdash Saudo

puduensho bednu quequin. ²⁵ Aden cainsho isun Saudo cuesunenushe queshun chiac inchëshëmbi onquenquiocquin tsitsan dapan Saudo antsaduntanquin tsicatiaid quënë cachoc Saudo budmepanëdash.

²⁶ Budanec Saudo Edusaden yacno nidoash Esus tantiaquidobëd tabadnuesho isash, Saudon mua uaquin ëbi bednushe quiash dacuëdcuededpanëdash aido.

²⁷ Adnubien, Saudobëd Esus tantiaquid utsitedi yacno choshon Bednaben yuedpanëdash. Aden yuedshun: — Saudon Damasco yacno nidquin Nuquin Icbo ispac caosh. Nuquin Icbo Saudobëd onquepac caosh.

Adanec Damasco yacno choshon dacuëdenquiocquin Esus chuibampac caosh, quequin Saudon naid Bednaben chuibanpanëdash. ²⁸ Aden Bednaben chuibanac Esus tantiaquido Saudo dacuëdenquiocnobi aidobëdi capuquin

Saudon anoshombidi Esus chuibanoapanëdash. ²⁹ Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuquin aidontsen cainoapanëdash. ³⁰ Aden Saudo cuesunenuen, cainec quesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsëqui

nidmepanëdash.

³¹ Adashic Saudo nidmian cuesunenushe quenquo yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuëdenquo yec tabadpanëdash. Adec tabadquin, Nuquin Papan chiaid tantiabenu, quesho Nuquin Papan Mayanën adomboembidi tantiamiac bëdamboec tabadpanëdash. Adec tabadquin Esus chuisho tantiesa icboedi Esus tantiaquid dadpenquo yampanëdash.

Petedon Ananias Dodcastsen bëdamiaid

³² Adnubien, utsi-utsien isbidanec nidequi Dida caid yacnontsen Esus tantiaquid utsibo isec Petedo nidoapanëdash.

³³ Ambo choshon dada, Eneyas cuëmëdquid, seta dadpen 8ted matamec canite tsasiaid Petedon istuidshun: ³⁴—Esusën mibi bëdamiaque. Nidtochon min uete buanun nacnenta, Eneyas —Petedon cac Eneyas badedquo nidtoash capupanëdash.

³⁵ Eneyas capusho isash Dida yacnocquidobëdi nidaid Sadon caid yacnocquido Esus tantiaquid yampanëdash.

³⁶ Adnubien Dida uidsitëc shubu dadpen icquid Ope caid yacnocquid, Esus tantiaquid utsi, chido, Tabita cuënshumbi quidiecon onqueten Dodcas cain cuënaid tabadpanëdash. Aidi bëdambocquid icquin badiadquidën-badiadquidënenquien pete nibëdquido menedenepanëdash. Adembidi aton na

nibëdquido Dodcasën menedenepanëdash. ³⁷ Aidi Petedo Dida yacno icnubi icsabudec unëso isun abëd icquidon dapanshun shubu abuc quënë icquidën nampanëdash. ³⁸ Aden nanshun, Petedo Dida yacno tabadec, quesho tantiashun aid chomenuequin dada daëd Petedo tabadacno nidmiac aid daëdi Petedo tabadacno choshon Dodcas unësboed chuishun: —Nidtuidenquio yec badedquio ëbëdi cho —cac ³⁹ abëdi badedquio Ope yacno Petedo nidpanëdash. Adec nidec Ope yacno chosho isun abuc quënë icquidën puduedmepanëdash. Ambo puduedsho isun shubiquimbi niantebon Dodcasën tuscaboed dashcute dadpen Petedo ismepanëdash.

⁴⁰ Adosho isun abitedi puduemiash danëshën sebudash Nuquin Papa chiec onquetanec nidtoshon unësboed isquin: —Nidto, Dodcas —Petedon cac uincuenequi Petedo isec Dodcas badedi uëtsëdtopanëdash. ⁴¹ Uëtsëdtosho isun mëdinquin nidtomeshun niantebobëdta Esus tantiaquid utsibo cuënquin cho-chomeshun uincuemboed ismepanëdash. ⁴² Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanëdash. ⁴³ Adnubien Petedo Ope yacnocquid nidaidën capuquid bitsi uashun chodcashun nacnenquid Simombëd yuec Petedo tabadpanëdash.

10

Petedo Codnedion chomiaid

¹ Adnubien shubu dadpen icquid Sesadeya caid yacno Codnedio cuëmëdquid isadaidpembo nidaid Itadia caid yacnoësh Sesadeya caid yacno choash tabadpanëdash. Aidi sondado dadpen 100tedi chuiquid icpanëdash. ² Aidi aton shubun icquidobëdi Nuquin Papa tantiaquid icquin isadaidbo aton na nibëdquid icsho isun menebanquid icpanëdash. Adecbidi Nuquin Papa chiec onquianedenepanëdash. ³ Adquid yec ushë budtsambi tedes yanuc Nuquin Papa chiec onquequimbi ushachimboecquin Nuquin Papan uaid mayan bëda Codnedion ispanëdash. Nuquin Papan uaid mayan bëda choshon: —Codnedio —capanëdash.

⁴ Adsho tantiash dacuëdquin comapenen isec: —¿Atotsibi name, Icbo? —quepanëdash Codnedio.

Adoaquien: —Abi chiec mibi onquedenesho Nuquin Papan tantiec. Adembidi aton na nibëdquid tantiaquin menedenequid mibi icsho Nuquin Papan bëdamboen isaid mibi neque. Chuinu. Tantiata. ⁵ Nëbi Simon cuënshumbic Petedo cuënoaid ma bednu mimbi namiaido Ope yacno nidmetan. ⁶ Simon utsi nidaidën capuquid bitsi uashun chodcashun

nacnenquidbēd tabadec. Aidēn shubu acte cuēmambi iquec — quepanēdash Nuquin Papan uaid mayan bēda Codnedio chiec.

⁷ Aden chianec Nuquin Papan uaid mayan bēda nidambi Codnedion aton yua daēdbēdta sondado abentsēc chomeshun

⁸ Nuquin Papan uaid mayan bēdan chuibocpaden Petedo bedmuenen ambi namiaido Codnedion nidmepanēdash.

Petodon ushac bimboec tsadquin isaid

⁹ Adashic, ushē cuembocnoc Ope anoentsēqui Codnedion nidmiaido chonobi Petedo Nuquin Papa chiec onquenuc shubu macano pada-padapambocquid yacno dectatopanēdash. ¹⁰ Adec dectatoash shubu icbon codocanubi Petedo bundoec ushac bimboec tsadquimbic ¹¹ abu posonianec

abi yacmi dabidiete dapabiecquid bucun dēnēshbudcuenaid budsho Petedon ispanēdash. ¹² Aidēnquoio ambi petequid ambi petemaid chedo nidaidēn capuquid tachidēn capuquidbēd podochoquid chedo antabēdpanēdash. ¹³ Adnubien: — Nidtoшон cuesuneshun pe, Petedo —capanēdash abucuēsh onquequin.

¹⁴ Adoaquien: —¿Abida cai? Ēmbi petemaid tauishun mibi shēdmetemaidquoio antabēdquid nec. Adquid piamboccombi, Icho —quepanēdash Petedo.

¹⁵ Adoaquien padpidec abucuēsh onquec: —Nuquin Papan bēdambo icmiaid icsambo iquec cainda — quepanēdash. ¹⁶ Adotanquimbic antabēdquid abuc buanshun adomboembidi abentsēc chotsēcnuc budmequin adembidi Petedo chuishun abuc shēcuē uaid yacno badedquoio buanshun puduedmeopanēdash.

¹⁷ Adosho isash Petedo ambi isboed tantiec tsadnubi Codnedion chomiaido Simonēn shubu istuidash shēcuē cuēmano choec nidtuidpanēdash. ¹⁸ Choec nidtuidash: —¿Nēmboda Simon Petedo tabadec? —quetuidpanēdash.

¹⁹ Aden chuituidnubi ambi isboed tantiec Petedo tsadsho Nuquin Papan Mayanēn: —Dada abentsēc chotsec choshon mibi nibēnec. ²⁰ Ēmbi chomiaido neque. Budash cacuidenquoio yec aidobēdi niddan —capanēdash.

²¹ Aden chiac budshun Codnedion chomiaido isash: —Mimbi nibēnaid nebi. ¿Atotsi quec cho? —quepanēdash Petedo.

²² Adoaquien: —Codnedio cuēmēdquidēn chomiaid nebi. Aidi sondado dadpen chuiquid bēdambocquidquoio nec. Adquid icquin Nuquin Papan chiacpaden nabansho isun isadaidbon bēdamboen isaidquoio nec. Aidi Nuquin Papan chomiaid mayan bēdan naden chuipac caosh. “Simon cuēnshumbic Petedo cuēnoaid bedmetan. Bēac chuibansho tantiata,” quequin Nuquin Papan uaid mayan bēdan ēbi chuiposh quequin

Codnedion ëbitedi chuioaposh —quepanëdash Codnedion chomiaido Petedo chiec.

²³ Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnocquid utsinutsinquien tsibanampanëdash. ²⁴ Adec nidanec Sesadeya caid yacno chopanëdash. Adnubien, Nëid ushëmbien chotech, quequin tantiaashun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash. ²⁵ Aden iccuededmiac tabadnubi utsibobëd choec Petedo chedo puduedsho isash, Mibi bëdamboquid icnubi adesa nebi, quequin Petedo ismec danëshën sebudec shuebudash Petedo bëisenquio yec Codnedio uepanëdash.

²⁶ Adec uesho isash Petedo: —Mibipadquid nebique. Nid-tota —quepanëdash Codnedio caic.

²⁷ Adtanec Codnediobëd onquetanec quënë utsin puduedshun isadaidpembo dadpen Petedon istuidpanëdash. ²⁸ Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac ²⁹ mimbi ëbi bedmiaido choacsho isash, Mibëd capuesa nebi, quenquio yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquio yec puduedobi. Nëbi Tantanu. Chui. ¿Atotsieshun ëbi chomio? —quepanëdash Petedo Codnedio chiec.

³⁰ Adoaquien Codnedio: —Abentsëc choec ushanec ushëbudec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bed-bedquiacbimboec dasiuidquid ëbi yacmi Nuquin Papan budmiac onquec: ³¹ “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquio icquin tantiec. ³² Nuquin Papa bëdamboen tantianuen Simon cashumbic Petedo caid Ope yacnocquidbëd tabadquid ma chono qeshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda onqueposh. ³³ Aden chiac: “Petedo bedtan,” quequin ëmbi namiaido nidmiombi. Adoac bëdamboquid yec cacuidanenquio yec badedquio mibi choc. Adec mibi choacsho isash bëdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanëdash Codnedio Petedo chiec.

Codnedion shubu nuntanshun Petedon chuibanaid

³⁴ Aden Codnedion chuiban cac Petedon naden chuipanēdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nēbi abimbo tantiemi. ³⁵ Nuquin Papan chiaid tantiashun matses utsin-utsinquien chieshēnenquiocquin bēdamboen nabansho isun, Aidedi Nuquin Papan abi yacno yuedendac, quequin tantiemi. ³⁶ Ēndenquimboshē Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsēqui matsestedi chuiquid icnubi utsibēd bēdamboec tabadendac. ³⁷ Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac. ³⁸ Ma abēd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bēdamboen nabanquin abi chieshēnquidēn Satanas caidēn mēyanaido Esuquidistun bēdamebampondash. Adosho mibitedishun isbampondac. ³⁹ Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unēs uaqui ⁴⁰ uincuenash, Uincuenobi, quequin Esuquidistun ismebempondashi. ⁴¹ Aidi uincuenashun matsestedi ismenquiocquin aibdētan peshun acquidotedictsēqui Esuquidistun ismepondashi. ⁴² Abēdi icshobi, Ēbi chuibanquin matses icsaid cuidte chuibante ushē choec quequin chui, cac nebi. ⁴³ Adembidi Nuquin Papan chuibanacpadomboen dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ēnsho isash abi icsaid Nuquin Papa bēpiscudendac. Esuquidistu chuiquin aden dada uapampic —quepanēdash Petedo Codnedion shubun iccuededquido tantiamequin chiec.

Isadaidpembo Nuquin Papan aton Mayan meniaid

⁴⁴ Aden Petedon chuibanshobi abitedi tantiaquid icsho isun Nuquin Papan ma abēd tabadnueshun aton Mayan menepanēdash. ⁴⁵⁻⁴⁶ Aden meniac isadaidpembo nēbi Esuquidistu tantiaquido yanshun abi onquiacmaidēnquio utsin onqueten onquequin Nuquin Papa chiec cuēdēmpanēdash. Adsho tantiash Petedobēd cho-choboedo isadaidbo aton tsusedpabon nacpaden shui dēbid dētemequido: —¡Padtec! Tantiadempamboctequid nec. Isadaidpembotsen Nuquin Papan

aton Mayan meniac —quepanēdash isadaidbo Petedobēd chochobedo.

⁴⁷ Adoquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? ⁴⁸ Aid, acten mentometa —capanēdash Petedon.

Aden acten mentoalui: —Nuquibi tabadnuna —cac Petedobēd chochobedo acten mentoaidobēd daēdpactsēc ushec tabadpanēdash.

11

Isadaidbo Petedon ambi naid chiaid

¹ Adnubien utsibo Sesadeya caid yacnoēsh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bēdamboen tantiash Esuquidistu tantiaquido yanosh, quequin chuipanēdash. Anoshon chuibētsenec Edusaden yacnotsen choshon adomboembidi chuiopanēdash. ² Aden chuisho anocquidon Esuquidistu tantiaquid utsibon tantiash tsusedpabon chiacpadomboen shui dēbid dētemequido yec Petedo nēmbo choacsho isun, Aidi ambi nabanaid chuimenu, quequin cainpanēdash. Aden cainubic Petedo choacsho isash ³ comapenec onquecuedec: —Isadaidpembo shui dēbid dētemesabo icnuc aton shubun puduedtemiaidquio nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantanu —quepanēdash Edusaden yacno tabadquido.

⁴ Adoquien Petedon nadopanēdash: —Aidobēd ēbi tabadboed chuibanu. Tantiata. ⁵ Ope yacnoēsh Nuquin Papa chiec onquequin ushacimboen naden ispombi. Abuc posonianec ēbi yacmi dabidiete dapabiecquid dēnēshbudcuenaid budposh. ⁶ Aidēnquio nidaidēn capuquid tachidēn capuquidbēd podochoquid chedo antabēdsho ispombi. Aidēn antabēdquid nuqui petequidbēd nuqui petemaid icposh. ⁷ Adquid icsho isnubi: ‘Nidtoson cuesuneshun pe,’ caposhi. ⁸ Adsho tantiashun: ‘Aidtedi ēmbi petemaid tauiquin mibi shēdmetemaidquio nec. Adquid pesambo nebi, Icbo,’ capombi. ⁹ Adoquien abucuēsh padpidec onquequin: ‘Nuquin Papan bēdambo icmiaid icsambo iquec cainda,’ caposhi. ¹⁰ Adomboembidi abentsēc chotsēcncuc tabēcaido abuc buanshun padpiden budmeshun adembidi chuishun buanshun abitedi abuc puduedmeoaposh. ¹¹ Abuc buanoabombic dada abentsēc hotsec Sesadeya caid yacnoēsh choquido shubu shēcuē cuēmano nidtuidash nidpac caosh. ¹² Aidtedi icnubi Nuquin Papan Mayan: ‘Aidobēdi cacuidenquio yec

nidtan,' qesho tantiash aidobëdi nidpobi. Aidobëd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi puduedposh. ¹³ Puduedacsho isash Codnedio: 'Nuquin Papan chomiaidën ambi uaid mayan bëdan naden chuiposhi: Simon cuënshumbic Petedo caid Ope yacno tabadeque. Aid bedmuenen mimbi namiaido nidmeta. ¹⁴ Aidëmbi mibëd icquidtedi Nuquin Papa yacno puduedmi-anquid chuibanendac, quequin Nuquin Papan uaid mayan bëdan chuiposhi,' quequin Codnedion chuioposhi.

¹⁵ "Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. ¹⁶ Aden meniacsho isun Nuquin Icbo Esuquidistun chiondaid ëmbembi tantiatsëcquieci tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icbo Esuquidistun. ¹⁷ ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanëdash Petedo shui dëbid dëtemequid utsibo chieci.

¹⁸ Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abëd icquid icmeoapac —quepanëdash Nuquin Papan naid chieci.

Antioquiya yacnoshomba Esus tantiaquido iccuededaid

¹⁹ Esteban cuënoten seshuniash: "Esuquidistu tantiaquido cuesunenu," qesho tantiash ëbitsen cuesunenushe quianec Edusaden caid yacnoësh Esuquidistu tantiaquid utsi-utsiec nidanepanëdash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacnëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidboudi Esuquidistu chuibanpanëdash. ²⁰ Adshumbic, utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpembo Esuquidistu tantiamenuen chuibanpanëdash. ²¹ Aden chuibanu, qesho Nuquin Papan bëdamboen tantiamiac aidon chuibanaid tantiashun isadaidpembon: Ëbi icsaid ënu, quequin ënash Esuquidistu tantiaquid dadpen yampanëdash.

²² Adec isadaidpembo Esuquidistu tantiaquid dadpen yanosh, qesho tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanëdash. ²³ Aidi Edusaden yacnoësh puduanec nidequi Antioquiya yacno choshon anocquido

Esuquidistu tantiaquido Nuquin Papan bēdambo icmiaid icsho isash: —Cuishon. Bēdambo iquec. Adembi tantiaquin chieshenquiocquin Esuquidistu tantiata —quepanēdash Bednabe. ²⁴ Bednabe bēdambocquid icsho Nuquin Papan aton Mayan meniac Esuquidistu bēdamboen tantiaquidquio icquin Esuquidistu chuibanac Esuquidistu tantiaquid utsi-utsiec dadpen yampanēdash.

²⁵ Adashic Antioquiya yacnoēsh puduanec Saudo bednuec nidequi shubu dadpen icquid Tadso caid yacno choshon ²⁶ Saudo istuidash Antioquiya yacno aibdēdi Bednabe choapanēdash. Ambo choash seta abentsēc matamec anocquid Esuquidistu tantiaquidobēd iccuededquin Esuquidistu chuibanquin aid daēdshun tantiamepanēdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuēmpañdash.

²⁷ Bednabebēd Saudo Antioquiya yacno tabadnubien Edusaden yacnoēsh Antioquiya yacno Nuquin Papan yuecquio icshun nanun chiaid chuiquido cho-chopanēdash. ²⁸ Cho-choshon abentsēqui Accabo cuēmēdquid Nuquin Papan Mayanēn oncamiac: —Yuec-yuecpactsēc yash nidaidtedi yacnocquidon pete nibēdendac —quepanēdash. Aden chiambic shubu dadpenquioshē icquid Doma yacnocquido ancaquid Quēdaudio cuēmēdquid icnubi pete nibēdquiec yampanēdash. ²⁹ Adnubic, Udeya yacnocquidon pete nibēdec, qesho tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanēdash. ³⁰ Esuquidistu tantiaquido Edusaden yacnocquido chuiquido nēid piucquid menetanta ma pete bunquido menenueshun, quequin ambi dayun uaidtedi Bednabebēdta Saudo menequin Edusaden yacno buamepanēdash Antioquiya yacno tabadquin Esus tantiaquidon.

12

Acobo cuesuniaidbēdta Petedo quēnēn nauedaid Nuquin Papan puduemaiid

¹ Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmepanēdash. ² Aido quēnēn nauedmeshun Esuquidistun ēbi chuibeneta caid abēd capucueboed Acobo cuēmēdquid chēshten cuesunemepanēdash. Acobon utsimbo Esuquidistun ēbi chuibeneta caid abēd capucueboed utsi

Uan nepanēdash. ³ Adoac, Acobo cuesuniosh, quesho tantiash isadaidbo utsibo, Esuquidistu tantiesabo: —Bēdamboen Edodesēn naosh —quepanēdash aidō. Adec onquesho tantiash Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmepanēdash. ⁴ Aden quēnēn nauedmeshun Petedo cuenushe queshun sondado 4ted quēnē nuntan tabadmeshun pan nami uambocquid petequid tantiaid ushētedi naimēdambi ambi naid icsa Petedo chuimenuequin Edodesēn caimpanēdash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcuē ēctabēdquin Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcnubi badiadnuc isboedo choapanēdash. Adecbidi isboed utsibo inchēshēmbi padpiden isec choapanēdash. ⁵ Adnubien Esuquidistu tantiaquido iccuededash Nuquin Papa Petedo quēnēn nauedaaid chiec yuec onquepanēdash.

⁶ Adshumbic, Badiadshun Petedo bēmembali, quequin Edodesēn tantianubi aid inchēshēmbi Petedo bucin mētaniacchobi ushnubi ⁷ Nuquin Icbon chomiaid, ambi uaid mayan bēda, nibēdquiochoedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mētaniaid mēchiquidpanēdash. ⁸ Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho ⁹ Nuquin Papan uaid mayan bēda nidsho isacbimboecquin abimbo tantienquioquin Petedon tsibanampanēdash. ¹⁰ Adec nidquimbi sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcuē abembi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampanēdash. ¹¹ Abēd icboed nibēdnubien Petedo padpiden tantiaquiec: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuec ambi uaid mayan bēda chomiosh. Abimbo iccosh —quianec Petedo nidpanēdash. ¹² Adec nidequi Nuquin Papan abi

puduemeboed tantiequi Uan cashumbic Madcos caidën titan shubu yacno Petedo chopanëdash. Aidën tita Madia cuëmëdquid icpanëdash. Ambobi Esuquidistu tantiaquid dadpen iccuededec Nuquin Papa chiec onquepanëdash. ¹³ Adnubien choshon Petedon shëcuë tosh-toshcasha tantiash chido yua Doda cuëmëdquid isnuec nidtopanëdash. ¹⁴ Aid shubu shëcuë yacno choshon Petedon cuënsho tantiash bédamboshë iquequi shëcnenquio yec auchidi titinquec: — Petedo shëcuë yacno choash nidec —quequin iccuededquido chuituidpanëdash.

¹⁵ Adsho Nuquin Papa chiec iccuededquidon abimbo tantienquiocquin: —Muequi mibi nec. Aidida ispash neba — quepanëdash iccuededquido.

Adoquien: —Ma aidquiobi neboc. ¿Utsida neque? Mim-bimbo mua quenun istan.

Caquien: —Petedo dayun uaquin isquid, Nuquin Papan uaid mayan bëda ischitashien nec —quepanëdash tantiesa.

¹⁶ Adnubi padpiden Petedon tosh-toshcasha shëcnequin isash: —¡Tso! Abimbo caic —quecuededpanëdash.

¹⁷ Adnubien mëdante uic-uiccaic Petedo: —Onquenquio yec tabadquin tantiata. Èbi nashunquin Nuquin Icbon naboed chuibanu —quepanëdash Petedo abi quënën nauedacnoshon Nuquin Papan puduemaiid chuibanec. Aden chiash: —Èbi puduemaiid Esuquidistun utsi, Acobobëdta Esus tantiaquid utsibo chuitanta —quianec puduenanec utsi yacno Petedo nidpanëdash.

¹⁸ Adashic, badiadnubi quënë nuntan Petedobëd icboed sondadotedi: —¿Mitsimbo nuquibëdta mëtaneboed icpec? Nibëdeque. Is —quec dacuëdpanëdash.

Adashic, Petedo nibëdec, quequin sondadon chiac ¹⁹ Edodesën: —Nibëntan —cac nidshun sondadon istuidenquiocsho isun quënë nuntanshun Petedo isquido ambi quënën tabadquin nabamboed chuimeshumbi aidotedi Edodesën cuesunemepanëdash.

Edodes unësaid

Adashic, Edodes nidaid Udeya caid yacno abi tabadacnoësh puduanec shubu dadpen icquid Sesadeya caid yacno choash tabadpanëdash. ²⁰ Sesadeya caid yacno anoentsëcbidi shubu dadpen icquid Tido caid icnubi aid yacnoësh anoentsëqui shubu dadpen icquid utsi Sidon caid icpanëdash. Tido caid yacnocquidbëd Sidon caid yacnocquido Edodesbëd chushcananquido icboedi padenquio yanec tabadpanëdash. Adec chushcananenquio yec tabadquin, Sesadeya yacno Edodes choash tabadosh, quesho tantiash Edodesën yua Bëdasto cuëmëdquidbëd onquenuec cho-chopanëdash. Cho-choshon,

Ëmbi pete nibëdsho isun Edodesën menioshi. Nëbi aid chushcainquo iquembi, quiosh, quequin cho-choquidon chuituidpanëdash. Aden chiac adomboembidi Bëdaston Edodes chuiopanëdash. ²¹ Aden adomboembidi Bëdaston chuiasho tantiashun Edodesën: —Ëmbi chiacpadën cho-choata, quiosh Edodes, quequin chuita —cac cho-choquido Bëdaston chuiopanëdash. Aden chiac Edodes onquesho tantianuec ambi chiac tedec ushash dashcute nac-nacquiocquid dasiuidash abembi onquenuec tsadten abuc tsadtoash onquec taëpanëdash. ²² Aid onquesho tantiash: —Nidaidëns hun tishaid onquaidpenquo nec. Abuc tabadquid nuquin papa caidien Edodes nechitec —quec iccuededquido comapenec cuëdcuededpanëdash. ²³ Aden chuisho tantiash, Mimbi Nuquin Papa caidpenquo nebique. Aidi abia yampid abentsëcquiobi iqueque. Aiduidi tantiata, quequin chuitiadquidëmbi chienquo icsho tantiashun Nuquin Papan chomiaidën ambi uaid mayan bëdan daicsa uac chichan dadpen yanec Edodes badedi unëspanëdash.

²⁴ Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanëdash.

²⁵ Adnubic Antioquiya yacnocquidon Esuquidistu tantiaquidon aton piucquid ambi menenuen dayun uaid Bednabebëdta Saudo meniac buanec Edusaden yacno choshon anocquido Esuquidistu tantiaquido menetanashic auëshquo puduanec Antioquiya yacno nidoapanëdash. Aidobëdi Uan cashumbic Madcos caid nidpanëdash.

13

Saudobëdtabi Bednabe nidmiaid

¹ Adashic, Esuquidistu tantiaquid utsi-utsiec Nuquin Papan yuecquo icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanëdash. Nëidic, Bednabe; utsibic, Simon, Dada Chëshë caid; utsibic, Sidene yacnoësh choquid, Dusio cuëmëdquid; utsibic, Cadidia yacnoësh choquid, tsusio dapa, Edodesën shubun icquid icboedi, Manain cuëmëdquid; utsibic, Saudo cuëmëdquid. ² Aidedishun Esuquidistuidi tantianuen buna mëmunsho Nuquin Papan Mayanën: —Saudobëd tan Bednaben aid daëdshun ëmbi chuibocpaden ma napanuna —capanëdash. ³ Adoquien, buna mëmunquin nainash Nuquin Papa chiec onqueshun abëd icquid utsibon mëdanten Saudo Bednabebëdta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd icquidon.

Chipide yacnoshon Esuquidistu chuibanaid

4-5 Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquio nidaid nacnëdquid Chipide caid yacno nidtampänëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebëdtan chuibampanëdash. ⁶ Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabadobëd icquidon. Satanasën tantiamiaid icquin abimbo chiacimboec, Nuquin Papan yuecquio icshun nanun chiaid chuiquidquio nebi, quequin muaquin chuipanëdash Badesusën. ⁷ Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquio Paudo cuëmëdquid icpanëdash. Aidi tantiaquiono, quec tabadquin, Isedquido chosh, qesho tantiash, Aidon chuibanaid tantianu, qeshun Saudobëdta Bednabe chomeshun tsusion yuedpanëdash. ⁸ Yuedac Pabadon Esuquidistu chuibampanëdash. Saudo quequin isadaidbon cuënubi Pabado quequin isadaidpembon cuëmpanëdash. Aden Pabadon Esuquidistu chuibansho tantiec tsusio tsadsho isun Badesusën tantiamenquiocnuen utsi uain chuiopanëdash. Ambi ompoaid ismianesa Badesus icsho Edimus cuëmpanëdash. ⁹ Aden utsi uain chuisho tantiashun Nuquin Papan Mayanën tantiamiac Edimus bëisequi Pabado: ¹⁰ –Satanasën bacuë yec bëdamboen naidbëdta bëdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaquin muaquin mimbi adenuidi chuibanecque. Tanta. ¹¹ Nëbi con Icbon mibi mëyanquin bëshu uaindac. Ushë chënqesho mimbi yuen isenquio iquendac –quepanëdash Pabado Edimus chieci.

Aden chuibon Edimusën ëshë cuen-cuempambo yec inchëshbudacimboec yanash: –¿Tsuntsimbini mëdinshun buampeba? –quequin nibëdacno mishquin uëmbampanëdash. ¹² Aden Edimus bëshu uacsho isec: –Nuquin Icbon chiaid abimbo iquéc –quiash tsusio Sedquio Paudo cuëmëdquid Esuquidistu tantiaquid yampanëdash.

Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid

¹³ Adashic, Chipide yacnoësh puđuanec nidaid Pampidia caid yacno Pabadobëd icquido canon potepanëdash. Aden potiaş nidaid Pampidia caid yacno choaş Pabadobëd Bednabe puđundonobi Uan cashumbic Madcos caidbidi Edusaden yacno nidoaic cuëshëdpanëdash. Adec Pabadobëd Bednabe puđundoanec nidquin shubu dadpen icquid Pedque caid ¹⁴ isbidanec nidaid Pisidia caid yacno shubu dadpen icquid Antioquiya yacno chopanëdash. ¹⁵ Ambobi tabadequi chonoadtemaid ushën Nuquin Papan chiaid chuibante shubun puđuedaş tabadpanëdash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanëdash.

¹⁶ Adoaquien abi tsadacnoëshi nidtoashi Pabado: — Nuquin Papan naid mibi chiembique. Tantiaquiota. ¹⁷ Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi ¹⁸ tsusedpabon Nuquin Papan chiaid chieshëmpampic. Adoaquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. ¹⁹ Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsëccquieç 7tedi icquido naimbudmeshun aidon nidaidtedi nuquin tsusedpabo menebampampic. ²⁰ Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmëdquid tsusedpabo chuiquid icmepampic. ²¹ Aidi isadaidbo chuiquid icnubic, Matses utsibo ancaquidpadquid bunebi, quequin tantiaşhun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmëdquid, isadaidbo ancaquid icmepampic. ²² Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmëdquid

tsusedpabo ancaquid icmeoapampic. Aidi Nuquin Papan chiapadomboen nabanquidquio icsho isash Nuquin Papa: 'Dabid, Isain mado, ëbi bēdamboshē icmequid, ëbi bunacpaden nabanquidquio mibi nec,' quepampic Nuquin Papa —quepanēdash Pabado aton matses Antioquiya yacnocquido tantiamenuen chiec.

²³ Aden chiec abi onquec: —Dabidēn tishmiaidēn tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanēdash. ²⁴ Aidēn nadatiambocquin nabanquin ambi nabanaid tauabicnuc Uan padon, acten mentoanquidēn: 'Mimbi tantiaid icsa ēnshun acten mentome,' capanēdash. ²⁵ Adec onquetanequic matses acten mentobudquin nainec: '¿Mitsipaden ëbi isquin cuēmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi chosho isun: ¿Ëbi icsambocquid icsho atotsieshun mibi choec? quequin chuiquidquio Nuquin Papan icmioshi, caindambi,' quepanēdash Uan acten mentoanquid —quepanēdash Pabado.

²⁶ Aden Uan padon chiapaden chuibanashic: —Abadauanēn tishmiaidēn tishmiaid caidaido nuqui icsho nuquitedi icsaid bedshunash abided cuidadec Esuquidistu unēspanēdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanēdash. ²⁷ Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobēd aton tsusio dapabo, Icsambocquid neque. Unēs ua, quequin chuipanēdash. Aden chuiquin utsibēd iccuededte ushēn-ushēnquien abi isec onquiaid Nuquin Papan dada uamiampicpadembi aidon napanēdash. ²⁸ Esuquidistu icsaid nibēdquidquio caiqui, Icsambocquid neque. Aid unēs uatiadquidi mibi nec, quepanēdash Isadaidbo Pidato caic. ²⁹ Adoaquien Nuquin Papan dada uamiampicpaden nabanambien Esuquidistu cuesten dectanquin unēs uacsho chicshun, Ëbi unēsacsho nēidēn ëbi nauedec, quequin ambi shēcuē uain nacnenaid chucanquio Osen Esus nauedpanēdash. ³⁰ Adoacsho Nuquin Papan Esuquidistu uincuemiac ³¹ capusho Cadidia yacnoēsh Edusaden yacno abēd capucueboedon aidi isbempanēdash. Aden isun aidombi Esuquidistu chuibededec. Adembidi aid isboedobēdtambi abimbo chuibanquidquio nebi —quepanēdash Pabado.

³² Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi ³³ Nuquin Papan uincuemiasho nuqui isondaaid aidi nec.

Aidi chuiquin Nuquin Papan dada uamiampid nad iqueque.
Tantia. Chuinu.

‘Con madombo mibi nec.

Nëbi ëmbi uincuemiaqui ëmbi chiactedi mimbi naimbudoc.

Adosho isun ëbipadquiocnoc chuiquid dapa mibi icmembi.’

Aden ëndenquimboshë aton mado tantiaquin Nuquin Papan
chiampic. ³⁴ Adecbidi ambi uincuemetequid Esuquidistun
nami chodquesa icpanëdash. Aid chuiquin dada uamiampid
nad iqueque. Tantiata. Chuinu.

‘Dabid chiampicpadembi mibi icsaisa icsho ëmbi bëdamboen
isaïd mibi nec, mado,’

quequin Nuquin Papan dada uamepampic. ³⁵ Ambi dada
uamiampid utsi nad iquec:

‘Icsaisa icsho aton nami chodquesa icmenuna,’

quequin Nuquin Papan chiampic.

³⁶ “¿Aden dada uamequin Dabid pado chiecta
onquepampic? Padenquo. Aidi Nuquin Papa

bunacpadomboen naimbudquin nabanash Dabid unësacsho
isun aton mëdimbon nami chodquiacno Dabid chococac
aidën namitsen chodquepampic. ³⁷ Nuquin Papan

uincuemetequidën namien chodquesa icpanëdash. ³⁸ Aidi
icsainquiocquid yec ëbitedi icsaid bedshunash abided
cuidadpanëdash. ³⁹ Adoac abi tantiaquidquiotsen icsaisabidi

Nuquin Papan isec. Nuquin Papan naden nata quequin
dada uamiampidtedi matsesën natiapimbo iquec. Aden

ambi chiacpaden natiapimbo yec, Nuquin Papan bëdamboen
isaïd nebi, quetiapimbo icboedëmbi, Matses icsaquid icsho
cuidnushe quiaash abided cuidadec Esus unësapanëdash,

quequin tantiaasho, Esuspadquid icsaisa Nuquin Papan
nuqui isec. ⁴⁰ Nuquin Papan chomiaid choec, quequin

tsusedpabon tantienquo icampidpadquid iquenda. Aido
chuiquin Nuquin Papan dada uamiampid nad iqueque.
Tantia.

⁴¹ ‘Ëmbi ëndenquimboshë dada uamiampicpadembi adquid
chomembi.

Ëmbi chomiaid isquidon chiac mimbi tantienquo icpec.

Adquid yec, Tantiadempambo iquec, quec mamënshumënquid
ëbëdi tabadtiapimbo iquendac.

Adquid icmane qeshun tantiaquiota’

—quepanëdash Pabado iccuededquido chiec.

⁴² Aden chuibudashic Pabado Nuquin Papan chiaid
chuibante shubu yacnoësh abëd choboedobëd puduenanec
nidsho isash: —¿Iccuededte badiad utsi chonoc iccuededquin
chuinucta mibi choape? —quepanëdash iccuededquid

utsibo Pabado chiec. ⁴³ Aden chianec Pabodobëd
Bednabe nidsho isun isadaïdbo utsin-utsinquiembëdtan

isadaidpembo isadaidbopadquid icnuequid utsin-
utsinquinen tsibanampanēdash. Aden abi tsibanansho isash:
—Nuquin Papan bēdamboen isaid yec bēdamboec tabadta
—quepanēdash Pabado Bednabebēd.

⁴⁴ Adashic, chonoadtemaid ushē icnuc Nuquin Papan chi-
aid tantianuec Antioquiya yacnocquid dadpen iccuededo-
apanēdash. ⁴⁵ Dadpen iccuededsho isash isadaidbo tsusiobo:
Ēmbi chuibanansho tantianuec aidtedi choenquio iccosh, que-
quin tantiec nēishpanēdash. Adec nēishash: —Mimbi Nuquin
Papan chiaid icsamboen chuibanec —quepanēdash Pabado
caic.

⁴⁶ Adoaquien, dacuēdenquio yec Pabadobēd Bednabe: —
Mibitedi con matses icsho, Nuquin Papan dada uamiampid
chuibanu, queboedēmbi tantiesa icsho isun mibi chuiba-
nenquio iquembi. Mibi tantiesa yec Nuquin Papabēd
tabadte bunsabidi icnuc isadaidpembo Esuquidistu chuiba-
nendambi. ⁴⁷ Nuquin Icbon naden tantiamioshibique. Tan-
tia. Chuinu.

“Isadaidpembo ěmbi chiaid chuibanquid mibi icmembali
ma nidaidtedi yacno ěbi tantiaquido ěbi yacno puduedquid
ma icpanuna,”

quequin chioshi —quepanēdash Pabado abi chieshēnquido
isadaidbo Nuquin Papan dada uamiampicpaden chiec.

⁴⁸ Adsho tantiash isadaidpembo: —¡Padtec! Nuquin Papan
chiaid bēdamboshē iquec —quecuededpanēdash. Adoaquien,
Nuquin Papan ěbēdi mibi tabadmendambi, quequin chiaid
ambi tantiamiactedi Esuquidistu tantiaquid yampanēdash.

⁴⁹ Adec Esuquidistu tantiaquid yanash auēshquio
dadpen nidequi nidaid dēuequid utsi-utsiec yacno choash
tabadquin aidontsen Esuquidistu chuibanapanēdash.

⁵⁰ Adosho tantiash, Pabado icsambocquid nec, quequin
isadaidbo tsusiobon Antioquiya yacnocquidon chidobobēdta
anocquido chuiquid dapa nēishmeshun Pabadobēdta Bednabe
mēyantankuin ashunquio nidmepanēdash. ⁵¹ Aden nidta
cac puduanec nidtuidash, Esuquidistu ěmbi chuisho
tantiesabo aido nec, quequin nidaid putu tasequequin
ismish nidanec shubu dadpen icquid Iconio caid yacno
chopanēdash. ⁵² Pabadobēd Bednabe Antioquiya yacnoēsh
nidan Antioquiya yacnocquid Esuquidistu tantiaquido: —
Bēdambo iquebi —quecuededpanēdash. Adembidi aidtedi
aton Mayan Nuquin Papan menepanēdash.

1 Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash. 2 Aido Esuquidistu tantiaquid yanubi isadaidbo utsibo Pabadon chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nëishmepanëdash. 3 Aido nëishmiambi Iconio yacno yuec tabadquin Pabadon Bednabebëdtan dacuëdenquiocquin Esuquidistu chuibampanëdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobëdta Bednabe icmepanëdash. 4 Aden icmiac aid daëdshun nadatiambocquin nasho isash, Isadaidbo tsusiobon chuibocpadec Pabadobëd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanëdash. 5 Aden chuishumbic, Pabadobëdta Bednabe cuestanquin cuënoten se-senuequin Esus tantiesabo isadaidpembon aton tsusio dapabobëdtan cainubi adembidi isadaidbon aton tsusio dapabobëdtan cainoapanëdash. 6-7 Aden caimbededosh, quequin tantiaquidën chiac cuenec nidequi nidaid Dicaonia caid yacno Pabadobëd Bednabe choash shubu dadpen icquid Disteda caid yacno choash tabadquin Pabadobëdtan Bednaben Esuquidistu chuibampanëdash. Adtanec auëshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanëdash. Adtanec auëshquio puduanec nidshun dëuequieci shubu dadpen icquid utsi-utsiec yacnocquidotsen chuibampanëdash.

Disteda yacno

8 Disteda yacno tabadnubien anocquid taicsaidi anin tishaid caputiapimbo icpanëdash. 9 Aidi Pabadon Esuquidistu chuibansho tantiec, Esuquidistun ëbi bëdamepatsiash, quec otacquo tsadpanëdash. Aden caputiapimbocquidën tantiacpadomboen Nuquin Papan Pabadotsen tantiamiac 10 caputiapimbocquid comapenen bëisquin: —Nidto —Pabadon cac badedi nidtoash taicsaid bëdanash capupanëdash.

11 Aden taicsaid bëdamic capusho isash anocquido aton onqueten cuëdcuededquin: —Disteda yacnocquidon tantiaid matesbimboec yanash abucuësh budoshe. Nëid daëdi isec cho —capanëdash. 12 Adtanequi Bednabe otacquo tsadquid icsho isash ambi tantiaid abentsëc Upited icnuc Upited cain Bednabe cuënquimbi Pabado chuiquidquo icsho isun ambi tantiaid utsi Medcudio icnuc Medcudio cain Pabado

cuëmpañédash Disteda yacnocquidon. ¹³ Aden cuënsho tantiashun baca bënë daëd bëec: Mibi daëdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaïd Upited caïd dayun uaquido baca cuesunenu, quepañédash.

¹⁴ Aden baca cuesunenuen bësho isun abi dasiuidaid aton dashcute bëntsecquid shoyonquin cancheuidashic iccuededquidon nënantanquio nidash Pabadobëd Bednabe comapenec nadpañédash: ¹⁵ —Ëbi daëdi mibipadquid matsesquio nebi. Mimbi tantiacmaid nebique. Baca cuesunenda. Chiaïd bëda mibitedi naden chuinuec chobi. Nuquin Papa caïd abentsëcquiobi iquec. Aidëmbi abubëdta nidaid uashumbic aidënquiocquidtedi uabanampidquido neque. Aiduidtsëqui tantiaquin ambi uaidbimboecnuc matsesën nacnenaïd tantiesa icta. ¹⁶ Ëndenquimbo Nuquin Papan, Adoenda, cainquiocnoc matsesën ambi tantiacpaden nabampampic. ¹⁷ Aden, Adoenda, cainquiocquimbi, Abitedishun icbo icquin bëdambocquid nebi, quequin ismequin ue secamedenequinc, cuëte bacuëmequinc, nuqui penun tiedën nitsimbeniaïd canimequinc caquin Nuquin Papan nac bëdamboen nuquitedi pebededec. Aden nabanquin Nuquin Papan, Bëdambo iquebi. Cuishon, camiaïdo nuquitedi nec —quepañédash Pabadobëd Bednabe Disteda yacnocquido chiec. ¹⁸ Aden chuido-chuidoiqui baca cuesunenuic ipañédash Disteda yacnocquidon.

¹⁹ Adnubien Antioquiya caïd yacnocquidobëd Iconio yacnocquido Disteda yacno cho-choshon, Pabado icsambocquid nec, quequin chiac Disteda caïd yacnocquido nëishcuededpañédash. Adec nëishcuededshun Pabado cuënoten se-siash, Unësosh, queshun nimbanquin buanshun shubu nibëdacno Pabado netampañédash. ²⁰ Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobëd Disteda yacno choec shubun puduedpañédash. Badiadash puduanec shubu dadpen icquid Dedbe caïd yacno Pabadobëd Bednabe nidoapanédash.

Nidaid Sidia caïd shubu dadpen icquid Antioquiya yacno choaid

²¹ Adec Dedbe yacno choash tabadquimbi Pabadobëdtan Bednaben chuibanac Esuquidistu tantiaquid dadpen yampañédash. Auëshquio puduanec nidoaic padpidec Disteda caïd yacno choash tabadquin, Dadpen tantiamequiono, quequin chuibanpañédash. ²²⁻²⁴ Aden chuibanshumbic: —Natiastianquid iquendac. Adquid icnuc Nuquin Papa yacno puduedash Esuquidistu tantiaquid yec ambo

nuquitedi tabadendac, quec nēbi dayacquio yec tabad — capanēdash Pabadon. Adotanquin ambia Esus tantiaquid utsi-utsien Pabadobēdtan Bednaben: —Bēdamboec tabadquin ismequin Esuquidistu tantiaquid utsibo chuiban — capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmunquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanoapanēdash. Adecbidi Antioquiya yacno choashun adomboembidi chuibanoapanēdash. Antioquiya yacnoēsh puduanec nidec nidaid Pisidia caid datambēsenec nidaid Pampidia caid yacno choash nidec ²⁵shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. ²⁶Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. ²⁷Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobēdtan Bednaben chuibampanēdash. Isadaidpembo dadpen Esuquidistu tantiaquid yamposh, quequin chuipanēdash. ²⁸Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

15

Edusaden yacnocquido iccuededec tantianu quiaid

¹ Pabadobēd Bednabe Antioquiya yacno choabicnubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid dētemesa abi yacno Esuquidistun yuedtemaid nendac, quequin chuipanēdash. ² Adnubic Pabadobēd Bednabe Antioquiya yacno choash tabadquin aidon chiaid tantiash: —Nuquin Papan aden chiambo iqueque. Aden chienda — quepanēdash.

Adsho comapenec cuēdquin chushcapanēdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobēdta Bednabe chuishumbic Esuquidistu tantiaquid utsibo chuioaquin aido nidmepanēdash. ³ Adoac Antioquiya yacnoēsh puduanec nidec nidaid Penisia caid yacno choash tabadquin,

Isadaidpembotsen Esuquidistu tantiaquid yamposh, quequin chuipanēdash. Adsho tantiash: —Aid tantiec bēdambo iquebi —quepanēdash anocquid Esuquidistu tantiaquido. Adtanec auēshquio nidequi nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido. ⁴ Auēshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobēdtan Bednaben chuibanoapanēdash. ⁵ Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dēbid dētemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanēdash.

⁶ Adoquien Esuquidistu ambia tantiaquido tsusiobobēd Esuquidistun ēbi chuibeneta caido: Tantiabono, quiash onquecuededpanēdash. ⁷ Adec yuec onquecuededash nidtoash Petedo nadec onquepanēdash: —Chuinu. Tantiata. Ēnden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ēmbi chuioasho mibitedishun tantiondac. ⁸ Ēmbi isadaidpembo Esuquidistu chiac abi tantiaquid aido yampondash. Matsesēn tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniacpadembi isadaidpembo meneoapondash. ⁹ Utsibo nec, quenquiocquin aidotsen tantiamequin paucoapondash. ¹⁰ Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? ¹¹ Padenquio icnuna. Matsestedi icsaquid icsho cuidnushe quiash abided cuidadac, quequin tantiaquiec unēsash abēdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanēdash Petedo.

¹² Aden Petedon chuiquin ēnambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuipanēdash. Adembidi Bednaben chuioapanēdash. ¹³ Aid daēdshun chuibanquin nainan Esusēn utsi Acobo, Esus tantiaquido tsusio dapa, nadpanēdash: —Ēmbitsen chuinu. Tantiata. ¹⁴ Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibēdta aton matses icmiac.

¹⁵ Adomboembidi Nuquin Papan chuimaidën dada uampid nad iqueque. Tantia. Chuinu:

¹⁶ “Isaidaidboböd yuec tabadenquiochoedi padpidec choash aidoböd icoaindabi.

Dabid padon tsyuecquido isadenquiochoedi isadcuenendac

¹⁷ ma aton Icho matstedishun istuidpanuna;

ma adembidi isaidaidpembon ëmbi cuënaidon aidbidi istuidpanuna,

¹⁸ quec Nuquin Icho ambi ënden tantiampicpadomboen chi-aid nec”

—quiashic abi Acobo onquec: ¹⁹ —Nuquin Papan chiampid tantiaquin nuquin tsusedpabon naden nata quequin chiacpaden nata isaidaidpembo cainquio ictiad. ²⁰ Nëiduidtsëqui

dada uaqin isaidaidpembo chuibanuna nuquibi: Nuquin Papan uaidbimboecnuc nacnenaïd tantiaquin pete sanaid penda; adembidi, min chiduidtsëqui chudta; adembidi, min bënëuidtsëqui chudmeta; adembidi, Nëish tëtaniaïd intachobi codocaid penda, quequin isaidaidpembo chuibanuna.

²¹ Adec Moisesën dada uaid iccuededquin isec nuqui onquedenec. Aid icnuc, Adomboembidi nata, quequin isaidaidpembo chuïnuna —quepanëdash Acobo iccuededquido chiec.

²² Adashic Esuquidistu tantiaquido iccuededec onquec ënëdshun ëmbi dada uaid Antioquiya yacno buanuec Edusaden yacnocquid daëd nidta, quequin Pabadobëdta Bednabe nidmepanëdash. Abentsëc Udas cashumbic Badsabas cuënaïd; utsibic, Sidas cuëmëdquid. Aid daëdi Nuquin Papan chi-aid comapenen tantiaquidquio icpanëdash. ²³ Isaidaidpembo chuiquin Edusaden yacnoshon Esuquidistu tantiaquidon naden dada uapanëdash:

“Esuquidistun ëbi chuibeneta caidobëdi ambia Esuquidistu tantiaquido Edusaden yacnocquido yec min utsibimboecquido nebi. Isaidaidpembo Esuquidistu tantiaquido Antioquiya yacno tabadquidobëdta nidaïd Sidia yacno tabadquido, nidaïd utsi Sidisia yacno tabadquido chedo mibitedi chuiquin dada uaombique. Isec onqueta.

²⁴ Èbëd icquido nëuëshquio nidash mibi yacno choash puduedshun, Isaidaidbon naden nata quequin chiaïd natiadquidi mibi nec, quequin mibi icsamboen chiosh, quequin utsibon chioshi. ²⁵ Aden chuisho tantiashun nëmbocquidobëd iccuededec onquequin abentsëcshun tantiachimboen dada uaombi. Aidi nëmbocquid daëdi Pabado Bednabebëdta buantan, quequin chiëmbi. ²⁶ Unësmene,

quenquio yec capucuenequin Esuquidistu chuibanquido Pabadobëd Bednabe nec. ²⁷ Adquid aid daëd icsho isun aid chedobëdta Udas Sidas chedo mibi yacno nidmembi.

Adoac ëmbi dada uacpaden ma mibitedi chuioapanuna

abimbo iquec camenuen. ²⁸ Nuquin Papan Mayanën ëbitedi tantiamiacpaden isadaidbon naden nata quequin chiacpaden nata mibi caisa nebi. ²⁹ Nëidtedtsëqui ëbitedishun nata caid nec: Nuquin Papan uaidbimboecnuc nacnenaïd tantiaquin utsibon abi yacnoshon sanaid penda; adembidi, min chiduidtsëqui chudta; adembidi, min bënëuidtsëqui chudmeta; adembidi, mimbi nëish cuesuniaïd intacchobi codocashun penda. Adoac ëmbi chiacpaden nabanec mibi bëdambo icpec. Padi aïdtedtsëqui chiembi.”

³⁰ Aden dada uaqin nainshun ambi nidtan caboed meni-
niac Antioquiya yacno nidoapanëdash. Antioquiya yacno
choash puduedshun Esuquidistu tantiaquido Edusaden yac-
nocquidon dada uaid menepanëdash. ³¹ Aden meni-
niac is-
banash: —Mimbi bëboed dada uaid isash bëdambo iquebi —
quepanëdash isadaïdpembo Antioquiya yacnocquido.

³² Adnubic Udasën Nuquin Papan chiaïd chuibanquin
Esuquidistu tantiaquido Antioquiya yacno tabadquido
bëdamboen tantiamepanëdash. Adomboembidi chuibanquin
Sidasën tantiameoapanëdash. ³³ Aden dadpen ushquin
chuibanshun: —Edusaden yacno nidoaibi —caquien:

—Ai, mibi nidsho isash unësquio icquimbi mibi chomequido
yacno nidtan, mibi caimbi —quepanëdash Esuquidistu tan-
tiaquido Antioquiya yacno tabadquido. ³⁴ Adec aïdo Edu-
saden yacno nidnubien ³⁵ Pabado Bednabe chedobëdtan
Antioquiya yacno tabadquin Esuquidistu tantiaquid utsibo
Nuquin Papan chiaïd bëdamboen tantiamenuen chuiban-
panëdash.

Pabadobëd Bednabe cuëshëdaïd

³⁶ Adashic, yuecash Pabado Bednabe caic: —¿Midapadec
nuqui capucuenequin Nuquin Papan chiaïd chuibeneboedo
tabadeque? Isec nuquibi nidnu. Nid —quepanëdash.

³⁷ Adoaquien: —Ma Madcosbidi nidoanu. Chuita —
quepanëdash Bednabe.

³⁸ Adoaquien: —Chieshec aïdi cuëshëdondashe. Padi. Nuqui
daëdtsëqui nidnu. Nid —quepanëdash Pabado.

³⁹ Adoaquien Bednabe aden tantienquio yec Pabadobëd
comapenec onquiash Madcosbëd cano antabëdtoanec Chipide
yacno nidoapanëdash. ⁴⁰ Adnubien Pabado Sidas abëd
Edusaden yacnoësh choboed caic: —Nuquibi nidnuna —
quepanëdash.

Adec aïd daëd nidnuesho isash anocquid Esuquidistu tan-
tiaquido: —Ma Nuquin Papan mibi daëd bëdamboen nidme-
quin ma mibi bëdamboen namepanuna —cac Pabadobëd Sidas

nidpanēdash. ⁴¹ Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bēdamboen tantiamenuen chuibampanēdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsinquiec iccuededacnomboec puduedcuenequin Pabadon chuibanoapanēdash.

16

Pabadobēd Timoteyo nidaid

¹ Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobēd Sidas choapanēdash. Ambo Esuquidistu tantiaquid Timoteyo cuēmēdquid tabadpanēdash. Aidēn tita isadaidbo Esuquidistu tantiaquid icnubi aidēn papa isadaidpembo quidieco matses icpanēdash. ² Timoteyo bēdambocquid nec, quequin Disteda yacnocquidon Pabado chuipanēdash. Adomboembidi shubu dadpen icquid Iconio yacnocquidon chuiopanēdash. ³ Aden dadpeshun chuisho tantiash Timoteyo buante bumpanēdash Pabado. Adec, Timoteyo buanu, qeshun ēbi capucueniacno isadaidbo dadpen iqueque. Aidon Timoteyo isash, Aidēn papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dēbid dētemepanēdash. ⁴ Aden nashic nidec Esuquidistu tantiaquid utsibo yacno yacnomboec choash puduedshun Esuquidistu tantiaquido Edusaden yacnocquidon dada uaquin chiaid Pabadon chuiopanēdash. ⁵ Adembidi Nuquin Papan chiaid chiac ēnden Esuquidistu tantiaquidon tantiabenquiocnobi utsi dadpen Esus tantiaquid yanoapanēdash.

Ushquin Masedonia yacnocquid Pabadon isaid

⁶ Adanec nidaid Sidisia caid yacnoēsh nidsho Nuquin Papan Mayanēn: —Nidaid Asia caid yacno Esuquidistu chuibanuec nidenda —cac Pabadobēd icquido nidaid Pidiquia caidtsen datambidanec nidaid Cadasia caidbidi datambidanec ⁷ nidaid Misia caid yacno chopanēdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanēn aido tantiameoapanēdash. ⁸ Adoac nidaid Misia datambidanec shubu dadpen icquid Todoas caid yacno ēbi tabadacnobi chopondash. ⁹ Ambo choash tabadec inchēshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ēbitedi Esuquidistu chuibanec cho —quec onquesho Pabadon tantiapondash. ¹⁰ Aden tantiash:

—Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ëbitsen Pabadobëd nidpondabi.

Didia cuëmëdquid Esuquidistu tantiaquid yanaid

¹¹ Adanec Todoas yacnoësh puduanec cano antabëdtoanec cuebi nidequi acte nënantanquio nidaid nacnëdquid Samotodasia caid yacno choash Pabadobëd icquido tabadtuidpondash. Badiadash auëshquio puduanec cano antabëdtoanec nidquimbi potebidanec nidaid Masedonia caid yacno ëbitedi chopondabi. Aid nidaidën acte cuëmambi shubu dadpen icquid Niapodis caid yacno pudundoanec ¹² nidequi shubu dadpenquio icquid Pidipos caid yacno domanobo dadpenquioshë tabadacno yuec ushec tabadpondash.

¹³ Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibëdacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabadon chuibampondash. ¹⁴ Pabadon chuibanacno chido Didia cuëmëdquid shubu dadpen icquid Tiatida caid yacnoësh choquid icpondash. Aidën piucquid bednuen dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. ¹⁵ Aidbëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobëd icquido tabadpondash.

Pabadobëdta Sidas quënën nauedaid

¹⁶ Adashic padpidec Nuquin Papa chiec onquedeniacno Pabadobëd icquido nidoasho chido yuaidën bëquedtuidpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneoapanëdash. ¹⁷ Pabadobëd icquido bëquedtuidshun tsibambëec choec aid chido: —Nëid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nëid dadatedi nec —quec ¹⁸ badiadquidën-badiadquidënquiec comapenec cuëdpondash.

Adec cuëdtonesho tantiate bunenquio yec amibidi bidiadquin mayan icsa dapuduedaid chido chuiquin comapenen Pabadon: —Esuquidistun nadatiambocquin naidënquio dapuduenta —cac badedquio mayan icsa

dapuduempondash. ¹⁹ Aden dapuduemiach chido bēdanacsho isun abi yuaquidon: —Nēbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneotiapimbo iquec, quequin tantiash nēishun Pabadobēdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bēshun utsibon sambanaid anoentsēqui abi chuiquido icsho isun chido yuaquidon Pabadobēdta Sidas ambo buampondash. ²⁰⁻²¹ Aden abi chuiquid tsadacno bēash: —Nēid dada daēd isadaidbo nec. Nēmbo choshon abi chuiquidon naden nata quequin chiaid chuibanec. Ēbitedi domanobo icquin ambi chiaid ēbitedishun natemaid icnuc matsestedi chushquecuededosh —quepondash chido yuaquido abi chuiquido chiec. ²² Aden chuisho tantiaquidon chiac dadpen cho-choash iccuededquin Pabado bēquidon chiacpadomboen aidontsen chuoac abi chuiquido: —Bēboedon dashcute chicshun cueshcaten cuesta —cac sondadon cuespondash. ²³ Aden comapenen cuesmeshun buameshun quēnēn nauedmeshun ambi quēnēn nauedaid ista caid chuiquin Pidipos yacnocquido chuiquidon: —Puduenanec cuenushe queshun nēid daēdi bēdamboen isquiota —capondash. ²⁴ Adsho tantiashun ambi ista caidēn Pabadobēdta Sidas nēnantanquio quēnēn nauedquin tsadunshun cueste shēcūē uaidēn tausunash puduantanquin quēnē bēdamboen bētashpanēdash.

²⁵ Aden bētashash aton shubu dayunquiocquidēn puduedambic inchēshpotsembo Pabadobēd Sidas Nuquin Papa chiec onquepanēdash. Adecbidi Nuquin Papan naid chiec cuēdēmpañēdash. Adec cuēdēnsho utsibon tantianubi ²⁶ comapenec nidaid ishcudnubi mētaniaidtedi mēchiquidpañēdash. ²⁷ Adnubien ista caid isec tsadboedi ushtanec isucunquin isac shēcūē bētashaid ēnden shēcniac. Adsho isash ista caid: —Quēnēn nauedaido puduenpuduepacnui —quetanec: —Chuiquid dapabon ēbi cuesunemetsiash —queshun siadnuequin chēshte abi tsiusudaid chicsho ²⁸ istanquin Pabadon: —Quēnēn nauedaidtedi nēmbo iquebique. Seshuniadenda —quequin comapenen cuēmpañēdash.

²⁹ Adoaquien, seshuniadtsemboedēn: —Tabote bec cho —cac ambi namiaidēn tabote bedtanquin meniac tabote bedshun sananec badedi quēnēn puduedash dacuēdec uēdēquec Pabadobēd Sidas tabadacno choash danēshēn sebudec shuebudpañēdash. Mibi daēdi bēdambocquid icnubi adquidpenquo nebi, quequin tantiaquin ismepañēdash. ³⁰ Adsho

isun Pabadon nidtomiaqui seshuniadtsemboed bëyucanec nidquin aton shubun Pabadobëdta Sidas yuedash: —¿Nuquin Icho yacno puduednush mitsipadequibi ëbi icsaid cuidad-peque? Chui. Tantanu —quepanëdash seshuniadtsemboed.

³¹ Adoaquien Pabado: —Mibibi cuidadtiapimbo iquec. Mibëdta min shubun icquido icsaquid icsho cuidnushe quiash abided cuidadec unësash Esuquidistu aton Papa yacno puduedash abi tantiaquido yuedquid neque. Mibi icsaid ënash, Esuquidistu con Icho nec, quequin abimbo tantiaata
³² —queshumbic seshuniadtsemboedbëd icquido Esus tantiamenuen Nuquin Icbon chiaid Pabadon chuipanëdash.

³³ Adoaqui Pabadobëdta Sidas cuesaid chiuë acten bëpanshunquin nainacsho aton shubun icquido Esuquidistu tantiaquido yansho isun aitedi Pabadobëdta Sidasën acten mentobampanëdash. ³⁴ Aden mentobanaqui aton shubun yuedshun pemepanëdash. Adashic, Nuquin Papan chiaid abimbo tantiaquid yec ambi bëdambo icmiaido seshuniadtsemboedbëd icquido icpanëdash.

³⁵ Adashic, badiadash Pidipos yacnocquido chuiquidon: —Nauedaaid shubu yacno nidshun quënën nauedboed daëd pudueme, quequin chuitanta —cac quënë yacno nidshun ista caid adomboembidi chuioapanëdash. ³⁶ Aden chiac ista caidën: —Quënën nauedboed daëd pudueme, quequin chuiquid dapabon chiosh, quequin aidon chomiaidën chioshibique. Dacuëdenquio yec nid —capanëdash Pabadobëdta Sidas chuiquin.

³⁷ Adoaquien Pabado: —Ëmbi naid chuimenquiocquin ëbi daëdi domanobo icsho utsibon isnubi cuesmeposhi. ¿Nëbi puduemenuen utsibo isenquiocnobida ëbi daëdi nidmepec? Padenquio caimbi. Ëbi daëdi puduemenuec ma chuiquid dapabo abibi chopanuna —quepanëdash.

³⁸ Aden chiac puduenanec nidequi abi chuiquido yacno choshon, Mimbi quënën nauedmeboed daëd domanobo nec, quequin chuisho tantiaash chuiquid dapabo comapenec dacuëdcuededpanëdash. ³⁹ Adec dacuëdec nidequi nauedaaid shubuno choash: —Domanobo nec, quequin tantienquiocquin mibi quënën nauedmiombi —queshun puduemetanec: —Pidipos yacnoësh nidtan —capanëdash Pabadobëdta Sidas chuiquin. ⁴⁰ Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bëdamboen tabadmenuequin Pabadon chuibanpanëdash. Aido chuibidanec Pabadobëd icquido nidoapanëdash.

17

Tesadonica caid yacnocquido isadaidbo nēishcuededaid

¹ Pidipos yacnoësh puduanec nidequi Pabadobëd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiash Tesadonica caid yacno Pabadobëd icquido tabadpanëdash. ²⁻³ Ambo tabadec isadaidbo iccuededte badiadën abi nidteniacpadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ënden chiampid chuibanpanëdash. Nuqui icsaid bedshunash abided cuidadec Esuquidistu unësaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanëdash Pabadon. Sabado 3ted matamequin adomboen chuibanpanëdash. ⁴ Aden chuibanaqui Esus tantiaquid utsiutiec yampanëdash. Nëidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanëdash.

⁵ Aden Pabadon chuibanac Esus tantiaquid dadpen yansho isash isadaidbo utsibo nēishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nēishmiac natia chushquecuededpanëdash. Adec chushquec nidequi Pabadobëdta Sidas bednuec Ason cuëmëdquidën shubuno puduedec nidpanëdash. ⁶ Ambo choshon Pabadobëd Sidas nibëdsho isun Esuquidistu tantiaquido Asombëd icquido bedshun abi chuiquid dapabo yacno Pabado chieshënquidon buanec abi chuiquid dapabo yacno choash: —Nidaid utsi-utsiec yacno capucuenequin chuitemaid chuibanquido nëmbo ⁷ choacsho Asonën aid daëd yuedaccosh. Nuqui ancaquid Sesadën chiaid niacquin ancanquid utsi Esus cuëmëdquid iquec, quequin chuibanec —quepanëdash Pabado chieshënquido abi chuiquido chiec.

⁸ Aden, Ancanquid utsi iquec, quequin Pabadobëdta Sidasën chiec, qesho tantiash chuiquid dapabo iccuededquidobëd comapenec chushquecuededpanëdash. ⁹ Adtanec abi chuiquid Asombëd icquido caic: —Nëbi, ¿Atotsi tantiaquin Pabadobëdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ëmbi chuimiabi Tesadonica yacnoësh nidenda. Ëmbi chiacpaden nanuequin piucquid ëbi mene —capanëdash Tesadonica yacnocquido chuiquid dapabon Asombëd

icquido chuiquin. Adoaquien piucquid meniac bedshun: — Min shubuno nidtan —cac nidanepanēdash Asombēd icquido.

Bedeya yacnotsen tabadaid

¹⁰ Adshumbic bednushe queshun aid inchēshēmbi Tesadonica yacnocquido Esuquidistu tantiaquidon Pabadobēdta Sidas shubu dadpen icquid Bedeya caid yacno nidmepanēdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanēdash. ¹¹ Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ēnden dada uamiampid Pabadon chuibanasho tantiaquidon bēdambocquid icquin, Abimbobida chuibanoshe. Isbono, quequin Nuquin Papan chiampid isban-isbampanēdash Bedeya yacnocquidon. ¹² Aden isbanec, Abimbo caic, quiash Esuquidistu tantiaquid dadpen isadaidbobēd isadaidpembo Esuquidistu tantiaquido yampanēdash. Adecbidi isadaidpembo chuiquid dapabo quidieco matses utsi-utsiec aton chido chedobēd Esuquidistu tantiaquid yampanēdash.

¹³ Adnubien, Bedeya yacnoshontsen Pabadon chuibanec, qesho tantiaquid Tesadonica caid yacnocquido, isadaidbo, Asombēd icquido bedmeboedo, Bedeya yacno choshon anocquidotsen nēishmiac comapenec chushquecuededpanēdash.

¹⁴ Adsho tantiaquidon Esuquidistu tantiaquidon Bedeya yacnocquidon acte dapa cuēmano Pabado nidmepanēdash. Adnubi Sidasbēd Timoteyo nidenquio yec Bedeya yacno tabadnubien ¹⁵ Bedeya caid yacnoshon utsibon bēyucanquin Pabado buampanēdash. Aden buanec nidequi shubu dadpen icquid Atenas caid yacno chopanēdash. Ambo choash abia bēyucanquido: —Ēbi chobocnobidi Bedeya yacno nidoaibi — qesho tantiaquidon Pabadon:

—Mibi yacno choash, Badedquio Atenas yacno chota, quiosh Pabado, quequin Sidasbēdta Timoteyo chuita — capanēdash. Aden Pabadon chiaquien Bedeya yacnocquido abi yacno nidoapanēdash.

Atenas yacnotsen Pabado tabadaid

¹⁶ Abia bēyucanquido Bedeya yacno nidambi Atenas yacno Pabado tabadquin, Sidasbēd Timoteyo choec, queshun cainec capuquimbi Atenas yacnocquidon nacnenaid isbampanēdash. Aidon Nuquin Papan uaidbimboecnuc nacnenaid dadpen tabēcaid papa cain cuēnaid ambi tantiaido icsho isash, Nuquin Papa Abentsēcquiobi iquec, quequin tantiesa Atenas yacnocquido nec, quequin tantiec Pabado unēsquio yampanēdash. ¹⁷ Adec unēsquio yec

Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampanēdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanēdash. Isadaidbobēd onquequin Esuquidistu Pabadon chuipanēdash. Adembidi isadaidpembobēd onquequin Esuquidistu chuioapanēdash. ¹⁸ Anoshon chuibansho tantiash epicudeyo cuēmēdquidēn chuinēdacpaden tantiaquido Pabadobēd onquepanēdash. Adembidi tantiash estoico cuēmēdquidēn chuinēdacpaden tantiaquido Pabadobēd onquepanēdash. Aido Pabadobēd onquequin Pabadon Esus chuisho tantienquo yec: —¿Atodain comapenec onquequin nēid dadan chuipash? —quepanēdash. Adnubien utsi: —Matses utsibon papa cain cuēnaid chuibanec nepanui —quepanēdash. Pabadon Esuquidistu unēsash uincuenaid chuisho tantiash adpanēdash. ¹⁹⁻²⁰ Adec onqueshumbic, Utsin tantiaid tantianu, quec Adeyopaco caid yacno iccuedednuequidon bēyucanquin bēash Pabado: —Mimbi chiaid ěmbi tantiacmaid nec. ¿Midapadquidquo mimbi chuibanec? Tantianu. Chuiban —quepanēdash abi bēquido caic. ²¹ Abi bēquido Adeyopaco caid yacno nidash Atenas yacnocquido dadpen utsi-utsiec yacnoēsh cho-choquido badiadquidēn-badiadquidēnquiec utsin-utsinquien ambi tantiacpaden chuibansho tantianuec iccuededpanēdash.

²² Aden mimbi tantiacpaden chuibanta caquien nēnantanquo nidtoshon naden Pabadon chuibampanēdash: —Chuibanu. Tantiata. Mimbi papa cain cuēnaid mimbi tantiaid iquec, quequin tantiemi. ²³ Capucuenequin mimbi tantiaidbimboecnuc nacnenaid dadpen isombi. Mimbi papa cain cuēnaid dadpen tabēcaid icnubi mimbi cuēnacmaid abentsēc iccosh. Aid mimbi cuēnacmaid icnuc abibimboecnuc nacnenaid nibēdosh. Aton shubumpiuidtsēqui iccosh. Mimbi cuēnacmaid mimbi tantiacmaid mibi chuibanu. Tantiata.

²⁴ “Ěmbi Nuquin Papa cain cuēnaid nidaidbēdtabi abu uashumbic aidēnquiocquidtedi uaquidquo nec. Abitedi uaquidquo yec abitedishun icbombo aidi nec. Aidi tabadmenuequin matsesēn shubu uashunaidēn tabadesa nec. ²⁵ Aidi abitedishun Icho icnuc abitedi aton na nec. Adquid icsho, Con na mibi menenu, matsesēn aid catiapimbo iquec. Aidēn tantiacpadec ěbitedi nēmbobi tabadebi. Aidēn tantiacpadec ěbitedi tiboquebi. Aidēn tantiacpaden ěbitedishun bedbanoaimbi. ²⁶ Aidēmbi bēyuc dada uampidēn tsyuecquido ěbitedi nec. Aid bēyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taēnuec ue yanendac.

Adecbidi, inchështanec badiadoaic. Adecbidi, ushë nidash choaic. ²⁷ Aidëmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuntsin nabanaid nepec? queshun ëbi tantiaquin Icho ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. ²⁸ Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantia. Chuinu: Nuquin Papan bacuëbo ëbitedi nebi, quequin min mëdimbon chuipanëdash.

²⁹ “Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquioctiadquidi matses nec. ³⁰ Ënden matsesën ambi nacnenaid aden cuënsho tantiaquin Nuquin Papa, Chën. Adoenda, quenquicoboedi nëbi, Mimbi icsamboen tantiaid ënta, quequin chiec. ³¹ Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiaidën cuidbanendac. Ambi abipadquid matses icmiaid, Nuquin Papan matsesën naid chuibanquid icmenu caid unësacsho isun ambi chiampicpaden nanuequin Nuquin Papan uincuemepondash —quepanëdash Pabado Adeyopaco yacno iccuededquido Esus tantiamenuec.

³² Adec aidi unësacsho Nuquin Papan uincuemepondash, quequin Pabadon chuisho tantiaquin utsi-utsiec mamënsyumëubi utsi-utsiec: —Aidën chuiboed padpiden tantianuna —quepanëdash. ³³ Adoquien, Pabado Adeyopaco caid yacnoësh nidpanëdash. ³⁴ Adec nidshun yuec ushquin chuisho tantianu quec Pabadobëd iccuededquin utsin-utsinquien padpiden-padpidemboen tantiabededpanëdash. Aden Pabadon chuibanac utsi-utsiec Esuquidistu tantiaquid yampanëdash: Nëidic, Dionisio cuëmëdquid Adeyopaco caid yacno iccuededquido chuiquid nepanëdash. Utsibic, chido Damadis cuëmëdquid adecbidi Esuquidistu tantiaquid yampanëdash. Aidobëd utsi-utsiec Esus tantiaquid yampanëdash.

18

Codinto yacno Pabado tabadaid

¹ Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanëdash. ² Ambo isadaidbo Aquida cuëmëdquid nidaid Ponto caid yacnoshon tishaid Pabadon istuidpanëdash. Isadaidbotedi nidaid Itadia yacnoësh niddan, ancanquidën cac aton chido Pidisida cuëmëdquidbëd Codinto yacno choash

Aquida icpanēdash. ³ Nidaidēn capuquid yua bitsi shubumpi nacnenquid abipadquid Aquidabēd aton chido icsho isun aidobēd tabadquin Pabadon shubumpi nacnempanēdash. ⁴ Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibampanēdash.

⁵ Ambo tabadnubi Sidasbēd Timoteyo nidaid Masedonia yacnoēsh choambic shubumpi nacnenenquiocquin isadaidbo Esuquidistu tantiamenuen Pabadon chuibampanēdash. ⁶ Adsho, Aid tantiatipi, quequin isadaidbon Esuquidistu icsamboen chuisho tantiashtabi daēd dasiuidaid bēntsecquid chicshun ishcunec Pabado: —Esuquidistu mibitedi chiombi. Aid tantiesa yec unēsash Nuquin Papa yacno puduedenquio mibitedi iquendac. Adquid Nuquin Papan cuidquin nēsecatequid nendac. Nēbi padpiden mibi chienquio iquemi. Isadaidpembon tantiatiashtabi, quequin aido chuibanemi —quepanēdash Pabado isadaidbo tantiesa chjec.

⁷ Aden chiashic Nuquin Papan chiaid chuibante shubu yacnoēsh puduenanec aid dayuntsēqui shubu icquidēn Pabado puduedpanēdash. Aid shubu icbo Usto cuēmēdquid Nuquin Papa tantiaquid icpanēdash. ⁸ Uston shubunoshon Esuquidistu Pabadon chuibanac Quidispo cuēmēdquid Esuquidistu tantiaquid yampanēdash. Aidi Nuquin Papan chiaid chuibante shubun iccuededquido chuiquid dapa icpanēdash. Aidbēd aton shubun icquidtedi Esuquidistu tantiaquid yampanēdash. Adecbidi Codinto yacnocquid dadpen Esuquidistu tantiaquid yampanēdash. Adsho adquidtedi acten mentobampanēdash.

⁹⁻¹⁰ Adashic, yuecash inchēshēn Pabado usho Nuquin Papa: —Codinto yacnocquid dadpen Esuquidistu tantiaquid yandac. Aden ěmbi chiac dacuēdenquiocquin comapenen chuideneta. Mibi dayun uaquidquio nebi. Aden dayun uasho ěbi tantiesabon mibi natiametiapimbo iquendac —quepanēdash Pabado caic. ¹¹ Aden chiac Codinto caid yacno seta abentsēc matamiash ushē 6ted nidmec tabadquin Nuquin Papan chiaid Pabadon chuidonepanēdash.

¹² Adnubien nidaid Acaya caid yacnocquidon chushcaid chuisho tantiashtabi matses icsambocsho cuidte chuiquid Cadion cuēmēdquid icnubi isadaidbon Pabado bedshun abi chushcaid Cadion chuinen buampanēdash. ¹³ Ambo bēquin puduedmiash: —Ancanquidēn chiaid niacquin matsesēn tantiatemaid nēid dadan chiosh —quepanēdash Pabado chieshēnquido Cadion caic.

14 Adoaquien Pabado onquetsenubi Cadiomba onquedopanēdash: —Tantiata, isadaidbo. Mibi chuinu. Nēidēn icsamboen nabanaid mibitedishun ēbi chuisho tantiatsiambi. 15 Aden chienquio yec, Nēidi mibi onquiaidbēdta min mat-sesēn Nuquin Papa cain cuēnaid icsamboen chuiquid nec, mibi quepec. Adecbidi, Mimbi natemaidd chuiquidquio nēid dada nec, mibi queopec. Aden mimbi chuisho tantiashun, Ēbi chienda caimbi. Domanobo chuiquidēn naden nata quequin chiaid niaquesa nēid nec, quequin isembi. Aden ěm̄bi isac mibi chushquiaid mibi chuiquid yacno nidshun chuitanta. 16 Aden chuishumbic Cadionēn: —Aidtedi umanuc puduemeta —cac isadaidbo Pabado bēboedo Cadionēn nami-aidon puduemepanēdash. 17 Adoac puduenshumbic Nuquin Papan chiaid chuibante shubun iccuededquido chuiquid utsi Sostenes cuēmēdquid bedshun isadaidbon comapenen cuespanēdash. Adosho isun chiac Cadion, Icsamboen naic, quenquio yec otacquio tsadpanēdash.

18 Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanēdash. Abēdi Aquida aton chido chedobēd Codinto yacnoēsh nidec shubu dadpen icquid Senquedeya caid yacno chopanēdash. Ambo tabadquin, Nuquin Papan ēbi dayun uaid cuidquin Edusaden yacno choshon piucquid menembi, quequin ismenuequin aton manēdaidd Pabadon matasmepanēdash. 19 Ambo ushē abentsēc nidmec tabadash cano antabēdtoanec acte dapa potiash Epeso yacno choshon Aquida aton chido chedobēd, Nēmbobi tabadnu, quepanēdash. Adsho tantiashun aid daēdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibanpanēdash Pabadon. 20 Aden chuibansho tantiashun: —Adomboembidi chuibanuec ĵada ēbēd yuec tabadtsia? —iccuededquidon caquien: —Nēbi padenquio iquebi. 21 Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auēshquio puduanec nidequicano antabēdtopanēdash Pabado.

22 Canon nidequi shubu dadpen icquid Sesadeya caid yacno choash Edusaden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanēdash. 23 Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cada-sia caid yacno choash tabadquin chuibanashic auēshquio nidequi nidaidd Pidiquia caid yacno choash tabadquin Esuquidistu tantiec iccuededquid dadpen bēdamboen tantiamenuen chuibanopanēdash Pabadon.

²⁴ Adnubien isadaidbo Apodos cuëmédquid shubu dadpen icquid Adecandedia caid yacnoësh Epeso yacno chopanédash. Aidi dadpen tantiaquid yec Nuquin Papan chiampid tantiaquid nepanédash. ²⁵ Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanédash. ²⁶ Aidi Nuquin Papan chiaid chuibante shubu yacno nidshun dacuëdenquiocquin ambi tantiaid chuibampanédash. Aden chuisho tantiash, Èbi yacno isec cho, qeshun Aquidan aton shubu yacno buanshun Esuquidistu choaid ambi nadatiambocquin naidbèdtabi abi unēsash uincuenaid chuibampanédash Aquidabèdtan aton chidon Apodos tantimequin.

²⁷ Aden Esuquidistu bédamboen tantiash Epeso yacno yuec tabadquin Esuquidistu Apodosën chuibampanédash. Adec yuec tabadquin chuibanashic, Nidaid Acaya caid yacno nidnu, quepanédash. Adec nidnuesho tantiashun, naden dada uashun Apodos menepanédash Epeso yacnocquidon: Nèid dada uaid sananquid Apodos cuëmédquid Esuquidistu tantiaquid nec. Èmbi isaid neque. Yuedta, quequin dada uashun, Apodos Epeso yacnocquidon menepanédash ma nidaid Acaya caid yacnocquido Esuquidistu tantiaquido Apodosën menenu, qeshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bédamboen tantiamenuen chuibampanédash. ²⁸ Aden chuibanquimbic isadaidbo Esuquidistu tantiesabo icsho isun abèd onquequin, Esuquidistu Nuquin Papan Chomiaid nec, quequin Nuquin Papan chiampid Apodosën chuibampanédash.

19

Epeso yacno Pabado abèd icquido tabadaid

¹ Codinto yacno Apodos icnubi Pabado nidaid Pidiquia caid yacnoësh puduanec podquedën choec macuësh dapa dectatocuëtsenec shubu dadpen icquid Epeso caid yacno choapanédash. Ambo choshon Esuquidistu tantiaquido istuidshun: ² —¿Esuquidistu tantiaquido icshoda Nuquin Papan aton Mayan mibitedi menepanédash? —capanédash Pabadon.

Adoaquien: —Nuquin Papan Mayan iquec, quequin tantiamboccombi —quepanédash Epeso yacnocquido.

³ Adoaquien Pabado: —¿Atotsi canuen mibi acten mentobampanédash? —quepanédash.

Adoaquien: —Uan padon chiaid tantiaquid icsho acten mentondashi —quepanédash Epeso yacnocquido Pabado chiec.

⁴ Adoaquien: —Mibi icsaid ënta, queshun abimbo tantiaquidtedi acten mentobanquin, Ëbi tsibanec choquid Esus tantiaquid icta, quequin Uan padon chuipanëdash — quepanëdash Pabado Epeso yacnocquido chiec. ⁵ Aden chiac, Esuquidistu tantiaquid nebi, quequin Epeso yacnocquidon chuisho tantiashun padpiden acten mentomepanëdash. ⁶⁻⁷ Aden aidtedi acten mentoacsho mëdanten Pabaton mamishbanac aid doseted Nuquin Papan aton Mayan menepanëdash. Aden meniac abi onquiacmaidënquo onquec Nuquin Papa chiec cuëdëmpañdash Epeso yacnocquido.

⁸ Adashic Nuquin Papan chiaid chuibante shubun puduedshun Pabaton Nuquin Papabëd tabadaid chuibampanëdash. Cuembo tantiamenuquin ushë choaid 3ted nidmequin badiadquidën-badiadquidënquien dacuëdenquiocquin Nuquin Papan chiaid Pabaton chuibampanëdash. ⁹ Aden chuisho tantiash pamumëdabimboec tabadquin, Tantiatiapibi, quequin utsin-utsinquien chieshëmënquoquin Esuquidistu icsamboen chuipanëdash. Aden chiac Esuquidistu tantiaquidobëd Pabado, Nidnu, quianec Nuquin Papan chiaid chuibante shubu yacnoësh puduanec nidec Tidano cuëmëdquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash. ¹⁰ Seta daëd matamequin adomboembi chuibampanëdash Pabaton. Aden chuibansho tantiash nidaneshun chiac nidaid Asia caid yacnocquidon tantiapanëdash. Adoac isadaidbobëd isadaidpembo Esus tantiaquido yampanëdash. ¹¹ Epeso yacno Pabado tabadsho Nuquin Papan nadatiambocquid icmiacsho ¹² Pabaton dada cuëscashun dashcute cuëshë buanshun daicsaid mishbanac bëdampanëdash. Adembidi Pabaton dada cuëscabanaidën nënquid mishac bëdampanëdash. Adembidi pashuaidtsen pamishac bëdanoapanëdash. Adembidi mishac mayan icsa dapuduempanëdash.

¹³ Adnubien mayan icsa dapuduenuen Pabaton chiapaden tanquin isadaidbo utsibon: —Esus Pabaton chuiboedënquo dapuduen —capanëdash. ¹⁴ Pabado tanuequido isadaidbo chuiquid Esqueba cuëmëdquidën mado 7ted icpanëdash. ¹⁵ Aden chiaquien mayan icsa: —Esus iquec, quequin ëmbi tantiaid aidi nec. Pabado iquec, quequin ëmbi tantiaidbidi aidi nec. ¿Mibitedi tsutsi neque? Tantuanu. Chui ¹⁶ —queshun nebudquin dashcute ched-chedcapamboen mayan icsan cuesactaniaqui shubu nuntanuësh puduenanec cuempanëdash Esqueban mado. ¹⁷ Adec cuensho isquidon chiac Epeso yacnocquid isadaidbobëd isadaidpembo dacuëdcuededpanëdash. Adec

dacuëdquin, Dacuëdampambo iquec. Esuquidistu bēdambocquid nec, quequin tantiabededpanēdash. ¹⁸ Esuquidistu tantiesā icboedi Esuquidistu tantiaquid yanec dacuēdenquo yec Esuquidistu tantiaquido iccuededacno nidshun abi icsaid chuibampanēdash. ¹⁹ Adquid dadpēshun icsamēnuen ambi ompoquin naid ismenquiocboedombi, Nēbi adquid ictiapibi, quequin cuēte dētsiadotanquin ambi ompoquin tantiamiaid dada uatēdi tantianuēn bedash utsitsen icsabudnushe queshun abitedi tauipanēdash. Aden tauiboed menequin piucquid dadpēn bedtsiandac, quepanēdash. ²⁰ Aden abi icsaid dada uate tauisho isquidon chuibanac Esuquidistu tantiaquid dadpēn yampanēdash.

²¹ Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpēn icquid Doma caid yacnotsen nidtiadquio iquebi —quepanēdash Pabado. ²² Aden chias Asia caid yacno abi tabadquin Masedonia caid yacno abia Timoteyobēdta Edasto nidmepanēdash Pabado.

²³ Aid daēdi nidan Epeso yacno tabadquin Esuquidistu Pabado chuibanaquien tantiesābo nēishpanēdash. ²⁴ Adquid Demetedio cuēmēdquid Diana caidbimboecnuc nacnemequid icpanēdash. Aidēmbi ambi nacnemiaid menequin piucquid dadpēn bedbampanēdash. ²⁵ Aden Esuquidistu tantianu quesa icquin ambi Dianabimboecnuc nacnenta caidobēdta abipadquid Diana nacnemequid utsibo iccuededmeshun Demetediton nadopanēdash: —Nuqui tantiaid Dianabimboecnuc nacnēshun menequin piucquid dadpēn nuqui bedbanec. ²⁶ Aden nanubi nidaid utsi yacnoēsh Pabado cuēmēdquid nēmbō choshon utsi comapēnen chuibanac Epeso yacnocquid dadpembēdta nidaid Asia caid yacnocquid dadpēshun tantiec. Dianabimboecnuc nacnēnaid tibquesa iquec. Adquid matsēsēn tantiaid abimbo ictiapimbo iquec, quequin Pabado chiec. ²⁷ Aden chiac matsēsēn dadpēshun tantias Asia Dianabimboecnuc nacnēnquido icsambo iquec, quetsias ēbitedi caic. Adecbidi, Dianabimboecnuc nacnēnaidbēd abi tabadte shubu uashunaid icsambo iquec, queoapēc. Adecbidi Dianabimboecnuc nacnēnaid tibquesa icsho matsēsēn tantienquo ictiadquidi nec, queoapēc Pabado. Aden chiac nidaid Asia yacnocquidon dadpēshun Diana tantiaboedombi padenquo yampec. Aidēmbi tantienquo yanshun aidbimboecnuc nuqui nacnēnaid bedenquo iquēdac —quepanēdash Demetedio.

²⁸ Aden chiac ambi chomeboedtedi, Piucquid ēbi menequin ēmbi nacnēnaid matsēsēn padpidēn bedenquo ictias, quec

nëishash: —Epeso yacnocquidon tantiaid Diana bēdambo iquec —quec comapenec cuēdcuededpanēdash. ²⁹ Adec comapenec cuēdcuededsho tantiaish Epeso yacnocquid utsibo aidobēd cuēdcuededpanēdash. Adec cuēdcuededquin nidaid Masedonia caid yacnoēsh Pabadobēd choboed Cayobēdta Adistadico bedshun iccuededte shubu yacno cuēdcuededquidon buampānēdash. ³⁰ Aden aid daēd bedshun buansho isquidēn chiac Pabado, Iccuededte shubu yacno nidnu, qesho tantiaishun: —Padi. Ambo nidenda —capanēdash Esuquidistu tantiaquidon. ³¹ Adembidi, anocquido chuiquid utsin-utsinquien Pabado chuioapanēdash.

³² Adnubien cuēdcuededquidon Cayobēdta Adistadico bedshun buansho isash matses dadpen, ¿Atotsieshun aid daēdi bēo? quequin tantienquo yec tabadpanēdash. ³³ Adnubien, Nuqui tantiacpadomboen chuitan, quequin isadaidbon Adecandedo cuēmēdquid nēnantanquo tsicunepanēdash. Aden tsicunequien nidtoash: —Tantia. Chuinu —quequin ³⁴ daēdpactsēc chiec onqesho tantiaish onqueboedi ēnēdash tabadnubi: —Isadaidbo aid nec —qesho tantiaish: —Epeso yacnocquidon Diana cain ambi tantiaidbimboecnuc nacnenaid bēdambo iquec —quec baded-badedquiec cuēdcuededpanēdash.

³⁵ Adec cuēdcuededshobien Epeso yacnocquidon naden nata quequin chiaid dada uaquidēn ēnēdmenuequin nadopanēdash: —Epeso yacnocquidon tantiaata. Chuinu. Diana caidbimboecquid abucuēsh paēdaidbimboecnuc nacnenaid nuqui comapenen tantiaidbēdta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. ³⁶ Aden utsibon tantiec, quequin tantiaquin icsamboen nainda. ³⁷ Dada daēd mimbi nēmbobēboed Diana caidēn shubun puduedamboccosh. Adembidi ampiambo iccosh. Adecbidi, Diana caid chiec icsamboec onquenquioccosh. ³⁸ Adenquo icnuc Demetediobēd icquido abi chushquiaid chuinec Epeso yacnocquidon naden nata quequin chiaid tantiaquid yacno nidshun ³⁹ mimbi tantiacpaden chuita cuēdcuededenquiocquin. ⁴⁰ Comapenec cuēdcuededec qesho tantiaish ancanquid dapan Epeso yacnocquido bēdamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquo iqueque. Cuēdcuededquido chome, nuqui catsiaish. Aden chomiāc ¿atotsi nuqui chuipe? ⁴¹ Aidēn nuqui chomenushe quiash min shubuno nidaneta —capanēdash Epeso yacnocquidon naden nata quequin chiaid dada uaquidēn. Aden chiac Demetediobēd iccuededquido nidanepanēdash.

20

Masedonia yacnocquido isbidanec nidequi Quedesia yacnocquido isbidanec nidaid

¹ Natia cuëdcuededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. ² Auëshquio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado. ³ Ambo choash ushë abentsëc chotsëcnuc nidmec tabadash; —Nidaid Sidia caid yacno nidnu —quepondash. Adsho tantiashun: —Ambo nidacsho mibi cuesunenuquin isadaidbon cainec —cac nidaid Masedonia caid yacno Pabado nidoapondash. ⁴ Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic, Timoteyo cuëmëdquid, utsibic Tiquico cuëmëdquid, utsibic Tedopimo cuëmëdquid. Aidedi icpondash. ⁵ Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. ⁶ Aidedi nidani pan nami uainquioctequid pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

Eyutico unësascho uincuemiaid

⁷ Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiaash yuec onquepondash inchëshpotsembo yantsëcquie. ⁸ Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. ⁹ Pabado onquenubi nëbi caniaid, Eyutico cuëmëdquid, iste shëcuë yacno tsadec ushcas mash ushtotanec abucuësh paëdpondash. Adec paëdsho isash bud-budshun unësascho isbedednubien ¹⁰ Pabadotsen budquin dayumbudec: —Unësboedi abi tiboquianeque. Shubicuededenda —quepondash. ¹¹ Aden chias abuc quënë yacno padpidec dectatoashun abitedishun pebededpondash.

Aden piash tabadec Pabado utsiböd onquecuededpondash badiadbudtsëcquiec. Adec badiadbudbon Pabado böd icquido shubu nuntanuësh puduem-puduenubien ¹² paëdboed aton shubuno utsiboböd nidpondash bëdambo yec.

Todoas yacnoësh puduanec Mideto yacno chote

¹³ Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh aböd capuquid utsiboböd puduanec nidequicano antabödtoanec Ason yacno nidoapondabi. ¹⁴ Adec nidequi Ason yacno choshon istuidac Pabado ëbëdi cano antabödtoanquin potiash shubu dadpen icquid Mitidene caid yacno choapondash. ¹⁵ Auëshquio puduanec nidec badiadash acte nënantan nidaid nacnëdquid Quio caid datambidanec nidash badiadash acte nënantan nidaid nacnëdquid utsi Samos caid datambidanec shubu dadpen icquid Mideto caid yacno choapondash. ¹⁶ Ambo choash: —Edusaden yacno badedquio nidebi. Adec ambo nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unëshmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

Epeso yacnocquido tsusiobo Pabadon chuibanaid

¹⁷ Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. ¹⁸ Aden chomeshun naden aido chuipondash: —Chiembique. Tantiata. Ëbi ënden nidaid Asia caid yacno choash miböd yuec tabadquin nabanaid mibitedishun istenepondac. ¹⁹ Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon ëbi chuibeneta cacpaden ëbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. ²⁰ Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adembidi shubu utsin-utsinquec puduedcuenequin chuibanondambi. ²¹ Nuquin Papan chiaid abimbo tantiaquin mibi icsaid ënshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

²² “Aden chuibanshobi Nuquin Icbon Mayanën: Edusaden yacno nidta, quequin chuioaposhi. Aden aidën chuibocpadequi nidebi. ¿Atotsi ëbi capatsiash Edusaden yacnocquidon? quec dacuëdenquio yec nidebi. ²³ Shubu dadpen yacnoshon-yacnoshonquien Nuquin Papan Mayanën ëbi

naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. ²⁴ Aden Nuquin Papan Mayanën chuisho tantiashi, Ēbi cuesunepanundac, quenquio yec Edusaden yacno nidoaibi. Esuquidistun ěbi chuibeneta cacpaden naimbudquin utsi-utsiec yacno nidshun Esuquidistu abimbo tantiacquid Nuquin Papabĕd tabadte iquec, quequin chuibanembi.

²⁵ “Nĕshunquio Nuquin Papan chiaid ěmbi chuibanasho mibitedishun tantiabenondaidon nĕuĕshquio ěbi nidacsho mimbi isoainquio iquendac. ²⁶ Ēmbi nĕshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac. ²⁷ Tantienuquioctsiash, quenquiocquin Nuquin Papan tantiacpaden chuibanombi. ²⁸ Aden chuibanash nĕbi nidebi. Ēbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adembidi Esuquidistu tantiaquid utsibo bĕdamboen isban icsamboen nabanec tabadnushe qeshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unĕspanĕdash. ²⁹ Ēbi nidan abimbo chiacbimboen chuiquid Esuquidistu tantiaquido chuiquid icnuec choendac. ³⁰ Adembidi mibĕdi iccuededquin utsin-utsinquien Nuquin Papan chiaid abimbo chiacbimboen muaquin chiendac. Esuquidistu tantiaquid chuiquidquio icnuequin adoendac. ³¹ Adquid Esuquidistu tantiec iccuededquido cuĕshĕdmequid neque. Ista. Adquid iquendac, quequin mibĕdi tabadquin ĕnenquiocquin chuibanondambi. Adquid choec, quequin mibitedi chiec shubiondabi.

³² “Bĕdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bĕdambo icmeshun abĕdi tabadmendac. ³³ Mibĕd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. ³⁴ Ēmbibi shubumpi nacnenshun menequin piucquid bedshun con na bedondambi. Adembidi nacnenshun bedshun ĕbĕd capuquido menebanondambi. ³⁵ Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icho Esuquidistu nidaidĕn tabadec nadpanĕdash: ‘Utsin natiapimbocsho menequid Nuquin Papan bĕdambo iquebi camiaid nendac. Nabanenquio yec bedshumĕnquidquio icsho Nuquin Papan bĕdambo iquebi camenquio iquendac,’ –quequin Esuquidistun chiacpaden Epeso yacnocquido tsusiobo

chuipondash Pabadon.

³⁶ Aden chiashic Pabado Nuquin Papa chuinec utsiboböd danëshën sebudcuededash onquecuededpondash. ³⁷ Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. ³⁸ Ĕbi padpiden mimbi isoainquio iguendac, Pabado qesho tantiaash shubicuededpondash. Adec shubiquin dayumbudash unësquo yec Epeso yacnocquido tsusiobo Pabadoböd cano yacno nidanepondash.

21

Edusaden yacno Pabado nidoaid

¹ Epeso yacnocquido tsusiobo acte cuëman tabadnubi cano antabödtoanec Pabadoböd capuquido nidquimbi cuebi potiaash acte nënantan nidaid nactödquid Cos caid yacno choapondash. Badiadnuc auëshquio puduanec nidec acte nënantan nidaid nactödquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash. ² Ambo choashic nidaid Penisia caid yacno cano dapa utsin nidnuequid istuidash antabödtoanec Pabadoböd capuquido nidoapondash. ³ Adec nidquimbi acte nënantan nidaid nactödquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. ⁴ Aden buanbuanubi Esuquidistu tantiaquido yacno nidanec puduedash 7tedec ushec Pabadoböd capuquido tabadpondash. Ambo tabadnubi, Edusaden yacno Pabado cuesunenuequid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. ⁵ Aden chiaqui cano icbo nidnuesho isash padpidec cano antabödtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadoböd acte cuëmano choash Nuquin Papa chiec onquecuededpondash. ⁶ Adec Nuquin Papa chiec onqueshun, Nidec nid, cac Pabadoböd icquido cano antabödtoanubien Tido yacnoësh acte cuëmano choboedo aton shubuno nidaneoapondash.

⁷ Adec cano antabödtoanec auëshquio nidec shubu dadpen icquid Todemaida yacno choash Pabadoböd capuquido tabadtuidpondash. ⁸ Adec anocquidoböd tabadec badiadash cano antabödtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido niente meneta caid utsi 6tediböd Uedipe icpondash.

⁹ Aidën champibo 4tedi aton bënën bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

¹⁰ Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash. ¹¹ Adec choshon Pabadon tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomboen isadaidbon Edusaden yacno tabadquidon nëid tsiute icbo bedshun tataneshun mëtaneshun buanshun, Unës uata, quequin isadaidpembo menendac —quepondash Accabo Pabado chiec.

¹² Aden Accabon chuisho tantiash shubiquin Pabadobëd choboedon Uedipen shubun icquidobëdtan, Edusaden yacno nidenda, quequin Pabado chuioapondash. ¹³ Adoquien: —¿Atotsi canuen shubiquin ëbi icsambo icme? Edusaden yacno nidshun Nuquin Icho Esuquidistu chuibansho ëbi taneshun unës uatsiash, quequin tantiaquin abi Esuquidistu chuibanuna —quepondash Pabado. ¹⁴ Adoquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icho bunacpaderidpanuna —capondash.

¹⁵ Aden chiashic Sesadeya yacnoësh puduanec Edusaden yacno Pabadobëd capuquido nidoapondash. ¹⁶ Adec nidsho isash Sesadeya yacnocquid Esuquidistu tantiaquid utsiutsiec Pabadobëd nidquin Menason cuëmëdquidën shubu yacno buanac puduedpondash. Aid shubu icbo Chipide yacnoësh choash Edusaden yacno tabadquid Esuquidistu tantiabnquidbidi nepondash.

Pabadon Acobo isaid

¹⁷ Adec Edusaden yacno choacsho Esuquidistu tantiaquidon Pabadobëd capuquidtedi Pabadobëdtabi yuedpondash. ¹⁸ Aden yuedac tabadash badiadash Acobo isec nidoapondash. Acobobëd Esuquidistu tantiaquido tsusiobotedi icpondash. ¹⁹ Adec nidec ambo puduedshun, Mibi isec chobi, quequin, Ëmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

²⁰ Aden chuibanac Nuquin Papan naid bëdambo iquec, quiash Pabado caic nadpondash: —Nëmbö Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. ²¹ Adquidombo icquin, Min bacuëbon shui dëbid dëtemenda, quequin isadaidpembo Pabadon chiec, qesho

tantias, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. ²² Aden chiec tabadquin mibi nēmbo choaid tantias mibi cuesunete buntsias. Mibi cuesunete bumenquo icmenuequin ¿Atotsi nuqui napeba? ²³ Naden nac bēdambo ictsiashe. Tantia. Chuinu, Pabado. Nēmbo ēbēd icquido Nuquin Papauidi tantiec tabadnuequid daēd-daēdquiec iquec. ²⁴ Nuquin Papan ēbi bēdamboen dayun uadenesho ismenu, quiash nidaid Quedesia yacnoēsh, Ēbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacenuequid piucquid menembi,” quepondac. Nēbimbobi Edusaden yacno mibi choaoc. Nēid dadatedibēd Nuquin Papa tabadte shubu uashunaid yacno nidshun mimbi ēnden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiacpaden naquidquo Pabado nec, quequin tantiasias. ²⁵ Ēmbi isaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nēidtedictsēqui mimbi natequid nendac. Nēidic, Nuquin Papan uaidbimboecnuc nacenaid tantiaquidon pete sanaid penda; adembidi, min chidouidtsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaid penda.” Aden dada uabanquin isaidpembo chiombi –quepondash Acobo Pabado chiec.

²⁶ Aden chiaquien badiadash Nuquin Papa tabadte shubu uashunaid yacno dada 4tedbēd choash Pabado, Nēidted dadabēdtambi ēmbi Nuquin Papan chiaacted piucquid meniombi, quepondash Nuquin Papa tabadte shubu uashunaid yacnoquid chiec. Aden chianec nidoapondash.

Pabado bedaid

²⁷ Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoēsh choquidon isaidaidbon ispondash. Aden isash Pabado bedmete bunec, Isaidaidbo utsibo nēishmenu, quec: ²⁸ –Isaidaidbotedishun tantiaata. Nēidēmbi Nuquin Papa tabadte shubu uashunaidēn puduedtemaid isaidaidpembo yuedquin nēid shubu bēda icsa uameboed neque. Bednu. Uidēn uaic cho –quequin abimbo chiacbimboec onquecuededpondash. ²⁹ Ēpeso yacnoēsh choquid isaidaidpembo Tēdopimo Pabodobēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

³⁰ Aden chiac, Icsambocquid bednu, quianec titinquec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shëcuë bëtashpondash. ³¹ Aden Pabado buanec, Cuesunenu, quec cuëdcuededsho tantiashun chuitanac ³² abi chuiquidbëd sondado cho-chosho isun Pabado cuesbededquin isadaidbon ëmpondash.

³³ Adec choshon sondado chuiquidën bedtan cac Pabado bedshun shocosh bucun mëtanemepondash. Aden mëtanemiash: —¿Tsutsi nëid nepec? ¿Atotsi icsamboen naosh? —quepondash sondado chuiquid. ³⁴ Adoaquien iccuededquid utsi-utsitsëcquien chiec onquecuedednubi utsi-utsitsëcquien utsi uain chiec cuëdcuededpondash. Adec dadpen cuëdcuededsho: —Tantiatiapibi ye. Quënën nauedmenu. Buanec nid —quepondash sondado chuiquid sondado chiec. ³⁵ Aden Pabado buanec nidec nauedte shubun dectatonobi cuëdcuededquidon tsucuscuededtsëcquien Pabado bednuesho isun Pabado abuc cadoanquin sondadon buampondash. ³⁶ Aden cadoanquin buansho isash cuëdcuededquido: —Aidien cuesunetiad —quepondash sondado chuiquid chiec.

Ambi nabanaid iccuededquido Pabadon chiaid

³⁷ Adec abi buanec shubun puduedtsenubi Pabado: —¿Ada ëbi onquesho tantiatsia? —quepondash Quidieco matsesën onqueten Pabado sondado chuiquid chiec.

Adoaquien: —¿Quidieco matsesën onqueten onquequidta mibi ne? ³⁸ Chuiquid dapa icnuequin Equipito yacnocquid matses dadpen cuëte nibëdacno buanaccondaidien nechitec, queshun mibi bedombi. ³⁹ Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

⁴⁰ Adoaquien: —Ai, onqueta —capondash sondado chuiquidën.

Adoac abuc dectatoten nidtoash nidec, Otacquo tabad, quequin ismequin Pabadon mëdante uic-uiccapondash. Aden nasho isash isadaidbo otacquo tantiec tabadsho isash: —Ebedeyon, nuquin onqueten mibi chuinu —quec naded Pabado onquedopondash:

22

1 —Ëmbi naid mibitedi chiembique. Isadaidbo tsusiobobëdtan isadaidbo utsibon tantiata.

² Adec aton onqueten Pabado onquesho tantiash isadaidbo otacquo tantiec tabadpondash.

³ Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso

caid yacnoshon tishaid nebi. Aden ashunquio tishaqui Edu-
saden yacno choash canipondabi. Adec nēmbo Edusaden yac-
noēsh canidosho nuqui tantiamequid Camadiedën nuquin
tsusedpabon naden nata quequin chiaid tantiamepondashi.
Aidon naden nata quequin chiaid tantiaquin adomboem-
bidi nadeniombi mibitedishun nacpadembi. ⁴ Aden naban-
quin Esuquidistu tantiaquido Nuquin Papan chiaid niac-
quido nec, quequin dadabēdta aton chido chedo bedmeshun
mēyamequin quēnēn nauedmeshun unēs uamepondambi.
⁵ Ēmbi adobanquin naondaaid tsusio dapatedishun tantiec.
Adondash, quequin chuitiadquio icquin aidon chuitsiash.
Adembidi Damasco yacno nidshun Esuquidistu tantiaquid
anocquido bedmeshun Edusaden yacno bēmēnu, qesho tani-
tishun Edusaden yacnocquido tsusiobon, Ai, adotan, que-
quin dada uaid bedondambi Damasco yacnocquid tsusiobo
ismēnuen.

⁶ “Adash, ushē abuctoan Damasco caid anoentsēqui
choshobi abucuēsh shocosh tabote dapa bed-
bedquiabimboec chēnquequin dēcatepondashi. ⁷ Adec
chēnquequin dēcatiac nidaidën paēdshun nadec abucuēsh
onqesho tantiapondambi. ‘¿Atotsieshun ēbi mēyane, Saudo?
Ēbi chui. Tantiānu,’ capondashi.

⁸ “Adoquimbi: ‘¿Con Icbomboda mibi ne?’ capondac.

“Adoquien: ‘Nasaded yacno iccondaaid mimbi mēyanaid
Esus nebi,’ capondashi.

⁹ “Adnubic ēbēd icquidon shocosh bed-bedquiabimboec
chēnqesho isequi con Icbon chuisho tantienquio yec tabad-
pondash.

¹⁰ “Aden dēcatiac uequin ěmbentsēqui tantiec: ‘¿Atotsimbi
nape, Icho?’ quepondabi.

“Adoquien: ‘Nidtoash Damasco yacno nidtan. Anoshon
ēmbi nata quequin chiaid utsin mibi chiendac,’ capon-
dashi Nuquin Icbon. ¹¹ Adoquini nidtoquin shocosh bed-
bedquiabimboec chēnquequidën bēshuacsho isun ēbēd ic-
quidon mēdinanquin Damasco yacno buampondashi.

¹² “Adec Damasco yacno choash bēshuash ēbi tsadnubi Ana-
nias cuēmēdquid ēbi isec chopondash. Aidi isadaidbon naden
nata quequin chiaid naquidquio icsho isadaidbo utsibon
bēdamboen isaidquio icpondash. ¹³ Ēbi yacno choshon aidën:
‘Saudo, abuc is,’ cac cuedoquimbi Ananias ispondambi.

¹⁴ “Adsho isash Ananias: ‘Nuquin tsusedpabon Papa cain
cuēnaidën, Nuquin Papan ambi tantiacpaden nata quequin
chuiquin mibi tantiamendac. Adembidi ambi chomiaid, Icsa
Nibēdquid mibi ismendac. Aidën chuisho mimbi tantien-
dac. ¹⁵ Aden aid isquin tantiashun utsi-utsien dadpen mimbi

isaïdbëdta mimbi tantiaïd mimbi chuibenendac,' quequin¹⁶ chuishumbic Ananiasën: '¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaïd ma paucpanuna. mibi paucacbimboen utsibo ismenuen acten mentometa,' capondashi Ananiasën.

¹⁷“Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacimboec tsadpondabi. ¹⁸ Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquiocquid yec nëmbocquido mibi cuesunete buntsiashe. Edusaden yacnoësh badedquio nidtan, quequin Nuquin Ichon chuipondashi.

¹⁹ “Adoaquimbi: ‘Aïdon isnubi mibi tantiaquid dadpen bedmeshun quënën nauedmiondambi. Adembidi, aïdon isoanubi mibi tantiaquid utsi-utsien comapenen mëyamiondambi. ²⁰ Adembidi, mibi chuibanquid Esteban cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaïdbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec?’ quepondabi Nuquin Icho chiec.

²¹ “Adoaquini Nuquin Ichon: ‘Isadaïdpembo yacno mibi nidmembique. Nidtan,’ capondash —quepondash Pabado ambi nabanaid iccuededquido chiec.

Pabado cuestsenaïd

²² Pabadon ambi nabanaid chuibansho tantiec iccuededquido otacquo tabadboed, Isadaïdpembo, quec Pabado onquesho tantiashe: —Tantiatiapibi. Adec onquequid isadaïdbo utsibëd tabadenquo ictiadquidi nec. Aïd unës uata —quec cuëdcuededpondash iccuededquido.

²³ Adec cuëdcuededec aton dashcute bëntsecquid canchepamboec dachiquidshun nidaid putu bedtanquin abuc secapondash Pabadon chuiboed tantiatemaid nec, quequin ismequin. ²⁴ Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaïdbo nëïd cuesunete bumpeba? Ambi naid icsa chuimenuen comapenen paëmboenoc cuesta, quequin sondado chuiquidën chuipondash. ²⁵ Adoaquien cueste nidtsinacno Pabado buanshun cuestebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaidënshun tishaid icshe ëmbi naid chuimiabida ëbi cuese? —quepondash Pabado sondado chuiquid chiec.

²⁶ Adsho tantiash sondado chuiquid puduanec nidec abi chuiquid comandante caid yacno choash: —¿Atotsi natseno? Bëboed: “Domanobon nidaidënshun tishaid nebi,” quiosh — quepondash sondado chuiquid comandante chiec.

²⁷ Adoaquien Pabado yacno nidshun comandanten: —¿Domanobon nidaidënshun tishaidta mibi nepe? —capondash Pabado chuiquin.

Adoaquien: —Ai, domanobon nidaidënshun tishaidquio nebi —quepondash Pabado.

²⁸ Adoaquien: —Domanobon nidaidënshun tishaidpenquio ëbi icsho, ¿ada adquid ëbi icmetsia? quequin piucquid mensiondambi —quepondash comandante Pabado chiec.

Adoaquien: —Con tan tishaid yec domanobo nebi — quepondash Pabado comandante chiec.

²⁹ Aden Pabadon chuisho tantiash ambi naid chuimenuen cuestsemboedo nidanepondash. Aden chuisho tantiash Domanobobi Pabado shocosh bucun mëtanemechitombi, quequin tantiec comandante dacuëdpondash.

Isadaidbo tsusiobo iccuededacno Pabado buanaid

³⁰ Adshumbic, badiadshun ambi mëtanemeboed chicmeshun isadaidbo tsusiobo iccuededacno Pabado buamepondash. ¿Atotsi nasho isash isadaidbo nëid cuesunete bumpeque? Tantiabono, quequin comandanten Pabado buameshun isadaidbo dadpen iccuededacno puduedmeshun nënantanquio Pabado nidtomepondash.

23

¹ Aden nidtomialquien isadaidbo tsusiouidi comapenen isec: —Utsibo, ëmbi naid chuibanu. Tantiata. Nuquin Papan isnubi ambi naden nata quequin chiaid nabanquidquio icteniobi —quepondash Pabado.

² Aden chuisho tantiashun: —Muaquin chieque. Ëccues — Isadaidbo tsusio dapan Ananiasën cac Pabadon dayunquio icquidën Pabado ëccuespondash.

³ Aden ëccuesaquien Pabado: —Mibi icsaid nibëdadbimboec mibibi tsadsho Nuquin Papan mibi ëccuesmendac. Nuquin Papan naden nata quequin chiaid tantiembi, quequimbi ëbi ëccuesmequin Nuquin Papan chiaid ma mimbi niacpaboc — quepondash Pabado isadaidbo tsusio dapa caic.

⁴ Aden Pabadon chuisho tantiash aton dayunquiocquidquio: —¿Aden Nuquin Papan isadaidbo tsusio dapa icta caid chiash dacuëdenquioda ique? —quepondash.

⁵ Adoaquien: —Ëmbi chuiboed Nuquin Papan isadaidbo tsusio dapa icta caid nec, quequin tantiamboocombi. Aidi Nuquin Papan isadaidbo tsusio dapa icta caidquio icsho ëmbi chuibocpaden chienquio ictsenombi. Mimbi abimbo chioc.

Ēmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

⁶ Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ēbibi padiseyobon tishmiaid nebi. Adquid yec, Unēsash uincuentequid iquec, quequin tantiaquid nebi. Aden tantiaquid icsho, Īcsambocquid nec, quequin ěbi mimbi chiec —quepondash Pabado iccuededquido caic. ⁷ Aden Pabadon chiaquien saduseyobo, Uincuenta nibēdendac, quequin ěmbi tantiacpaden Pabadon tantienquo iquec, quec comapenec onquecuedednubi padiseyobo, Uincuenta iquendac, quequin ěmbi tantiacpaden Pabadon tantiec, quec comapenec onquecuededpondash. ⁸ Unēsash uincuentequid nibēdec, quec saduseyobo. Adecbidi, Nuquin Papan uaid mayan bēdabēd ambi uaid utsi mayan nibēdec, queoac saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bēda, ambi uaid utsi mayambidi iquec, queoac.

⁹ Aden ambi tantiacpaden chuibanec comapenec onquec saduseyobobēd padiseyobo natiambo cuēdcuededpondash. Adec onquec cuēdcuedednubi padiseyobo, Nēid dada bēdamboquid nec. ¿Mayanēn chioši, qeshodambi muc nec capadi? Adecbidi, ¿Nuquin Papan uaid mayan bēdan chioši, qeshodambi muc nec caopadi? Padenquo iquembi. Pabadon chuiboed abimbo iquec, quepondash padiseyobo saduseyobo caic. ¹⁰ Adec comapenec onquec natiambo chushcanansho tantiashun comandanten: —Podon shoyonquin canite dēchicnushe qeshun mēnchicshun shubu nuntan bēoata —cac sondadon Pabado mēnchicpondash.

¹¹ Aden mēnchicshun shubu nuntan sondadon yuedaquien Pabado ushash badiadash padpidec inchēshēn Pabado ush-nubi Nuquin Icho chopondash: —Mimbi Edusaden yacnoshon ěbi chuibanacpaden shubu dadpen icquid Doma caid yacnoshontsen mibi chuibamembique. Dacuēdenquo yec dayacquio icta —capondash Nuquin Icbon Pabado chuiquin.

Pabado cunesunenu quequin ompoquin cainaid

¹²⁻¹³ Adec Pabadobēd Nuquin Icho onquebombien badiadash isadaidbo 40ted Pabado cunesuniabi icquin buna mēmumembi, quequin abimbo chiembi, quepondash. ¹⁴ Aden nanu quiash isadaidbo tsusiobo yacno nidash: —Pabado cunesuniabi icquin buna mēmumembi, quequin muenquiocquin chuibanombi. ¹⁵ Ēbitedishun ompoquin Pabado cunesunenuquin cainubien mimbi comandante chuitanta caid naden chuimeta: Pabadon naid bēdamboen tantianuna. ¿Ada padpiden isadaidbo tsusiobo iccuededte shubuno bēmeoatsia?

quequin chuitan Pabado bêmeoatsiashe. Aden Pabado sondadon bësho Pabado cuesunenuna —quepondash Pabado cuesunenuequido isadaidbo tsusiobo caic.

¹⁶ Aden aidon chuishobien Pabadon piaquën tantiashun Pabado yacno nidshun chuioapondash aton piaquën.

¹⁷ Adoquien Pabadon sondado 100ted chuiquid cho, cata cac nidshun aton piaquën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta — Pabadon cac ¹⁸ buampondash.

Aden Pabadon piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

¹⁹ Aden chiaquien Pabadon piac mëdianquin udictsëc buanash comandante: —¿Atotsi ëbi chuinuec cho? —quepondash comandante.

²⁰ Adoquien Pabadon piac: —Badiadshun isadaidbon ambi namiaid mibi yacno chomec. Aden chomiac nëmbo choshon naden chiec: “¿Ada isadaidbo tsusiobo iccuededte shubuno Pabado mimbi bëoapatsia? Aidën naid chuibansho bëdamboen tantianuna,” quiosh cata, quequin chomiosi, quequin mibi chiendac isadaidbo tsusiobon chomiaid.

²¹ Isadaidbon muaquin chiendac. Con cu Pabado buamenuen mibi aden chiendac. Comandanten Pabado bëmetsiashe, quequin tantiaquin Pabado con cu cuesunenuequin caineque. Nidmenda. Con cu cuesunenuequid: “Pabado cuesuniabi icquin buna mëmunembi,” quiosh. Con cu cuesunenuen nëbimbobi podqued cuëmanshun ompodshon cainec —quepondash Pabadon piac comandante chiec.

²² Adoquien comandanten: —Isadaidbon chiaid mimbi chuiboed utsi chienquo yec nidec nid —capondash Pabadon piac chuiquin. ²³ Aden Pabadon piac nidmeshun sondado 100ted icquido chuiquid daëd chomiashe comandante nadpondash: —Ënden inchëshan Sesadeya yacno ma mibëdi mimbi namiaid sondado 200ted nidnu mitsana buanuequin nacentata cata. Adomboembidi, cabayo catsadquid 70ted icquido chuiquin nacentata, quequin chuioata. Adomboembidi shocosh sianten senuequin sananquid 200ted icquido chuiquin mitsana nacentata, quequin chuioata. ²⁴ Adembidi Pabadobëd icquido cobednadod Pediques yacno buanun cabayo nacentata —capondash comandanten sondado 100ted chuiquid daëd chuiquin.

²⁵ Aden chuishumbic naden comandanten dada uapondash Pediques cobednadod caid chuiquin:

26 “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. 27 Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiashun sondado dadpembëd choquin mënchiccombi. 28 Aden mënchicshumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. 29 Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabado chuisho tantiashun quënën nauedenguioctiadquidi nauedmepondash, quequin tantiashumbi quënën nauedmeoapombi. 30 Aden Pabado quënën nauedmeoashumbic, Podqued cuëmanshun Pabado cuesunenuquin isadaidbon cainec, qesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuquido mibi yacno nidmembi. Adoac ma ambibi Pabado naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobëdta nëid cobednadod Pediques menenuen buanta —capondash comandanten.

31 Aden comandanten dada uashun meniac aidën chiacpaden Pabado buanec sondado aid inchëshëmbi shubu dadpen icquid Antipatidis caid yacno chopondash. 32 Ambo choash badiadshun sondado cabayo catsadquidonuidquio Pabado buanec nidnubi sondado utsitedi aucbidi nida-neoapondash. 33 Adec Pabado buanec nidequi Sesadeya yacno choshon abi chuiquid comandanten Quëdaudio Disiasën dada uaidbëdta Pabado Pediques menepondash cabayo catsadquidon. 34 Aden meniaquien dada uaid isbanash: —¿Mitsicquid nidaidën icquid mibi ne? —capondash Pediquesën Pabado chuimenuen.

Adoquien Pabado: —Nidaid Sidisia caid yacnoshon tishaid nebi —quepondash.

35 Adoquien: —Mibi icsambocquid nec, quequin chuiquido isadaidbo choacsho mimbi nabanaid chuimembi —quepondash Pediques Pabado chiec. Aden chiec onqueshumbic ënden chuiquid dapa Edodes cuëmëdquidën, utsibo abi chushquiaid chuimiondaid shubuno Pediquesën buamiac ashunquio Pabado nauedsho isun: —Puduenanec cuenushe ista —capondash sondado chuiquin.

24

Pediquesën tantianubi Pabadon ambi naid chiaid

¹ Adashic, 5tedec ushash isadaidbo tsusio dapa Ananiasbëd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuëmëdquid bëquin. ² Aido chosho isun Pediquesën Pabado chomiacsho isun isadaidbo tsusiobon tantiacpaden chuinuequidën Tedtudon naden Pediques chuipondash: — Mibi chuinu. Tantia. Chuiquid bëdamboequid icquin mimbi bëdamboen nabanac isadaidbo bëdamboec tabadec. ³ Mimbi aden nabansho isun, Bëdamboequid mibi nec, quequin mibi chiembi. ⁴ Aden chuishun mibi chieshmenquiocnuequin isadaidbon chushcaboed badedquio chuinu. Tantiata.

⁵ “Nëid mimbi bëmeboed Pabado caidbëd ictiapimbo iquebi. Nëid Nasaded yacno iccondaid tantiaquido tsusio nec. Aidëmbi nidaidtedi yacno nidshun ambi tantiaid chuibanquin isadaidbo comapenen chushcamequin cuëdcuededmiac cuëshëd-cuëshëdposh. ⁶ Aidëmbi Nuquin Papa tabadte shubu uashunaidën puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. ⁷ Aden cuidnu quenubien comandante Disias cuëmëdquid choshon Pabado mënchicanquin buamposh. ⁸ Pabadon ambi naid chuisho mimbibi tantiashun, Isadaidbo tsusiobon abimbo chiosh. Icsambocquid nec, quequin mimbi chuioapatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

⁹ Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

¹⁰ Adsho tantiashun, Onqueta, quequin mëdante uiccaquin Pediquesën ismiac Pabado nadec onquepondash: —Chuiquid dapan tantiata. Ëmbitsen chuinu. Dadpen seta matamequin con matses isadaidbo abi chushquiaid tantiashun mimbi bëdamboen tantiacpaden namedenioc. Adquid mibi nec, quequin tantiaquin, Ëmbi naid chuibanec bëdambo iquebi, quec dacuëdenquio yec onquebique. Tantiata. ¹¹ Edusaden yacno choash ambobi 12tedec ushobi. Ëbi anoshon isboedon, Abimbo iquec, quequin nëmbo choshon mibi chuitsish. Edusaden yacno choash Nuquin Papa shubu uashunaidën puduedec Nuquin Papa tantianuec choapobi. ¹² Ambo puduedash utsibëd chushcananenuio yec tabadsho istuidash, Icsambocquid nec, queposh. Adembidi chuibanquin

utsibo nēishmequin chushcamenquio iccombi. Pabado icsambocquid nec, quequido Pabadon chiaid abimbo iquec, quetiadquidi nec. ¹³ Ĕmbi naid Tedtudon chuibamboed, Abimbo iquec, quetiapimbo iquec tsusiobo. ¹⁴ Nēiduidtsēqui abimbo iqueque. Chuinu. Tantia. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio nebi. ¹⁵ Adembidi, matses unēsacsho Nuquin Papan uincuemiabi tantiaquid abēdi tabadnubi abi tantiesa chian anēdēnquequid nēsecaindac, quequin tantiembi isadaidbo tsusiobon tantiacpadembi. ¹⁶ Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matsesedishun, Bēdamboen mimbi naoc, capashuni, quequin adomboembidi bēdamboen nabanec tabadec nebi.

¹⁷ “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, quesho tantiash piucquid menenuc choapobi. Adembidi, Nuquin Papan bēdamboen dayun uabenioshi, quequin piucquid menenuc choapobi. ¹⁸ Aden menenuc abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. ¹⁹ Ĕbi capusho istuidquido isadaidbo nidaid Asia caid yacnoēsh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nēshuntsen adomboembidi chuitiadquidi nec. ²⁰ Adembidi isadaidbo tsusiobon: ‘Padiseyobo yec bēdambocquid nec,’ quequin ēbi anoshon chiacpadembidi nēshuntsen adomboembidi chuioat-iadquidi nechitec. ²¹ Anoshon nēiduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ēbi mibi chiec caimbi –quepondash Pabado Pediques chiec.

²² Aden Pabadon chuisho tantiash Pediques tantiauidquid iquec: –Nēbi mimbi aidtedquio chuibansho tantiembi. Commandante Disias nēmbo choan mibi padpiden chuimembi –quepondash Pediques Pabado chiec. ²³ Aden chuishumbic naden Pediquesēn sondado chuipondash: –Shubuno Pabado buanshun puduednushe queshun ista. Abi menenuquid abi isnuequid chedo chosho isun yuedta –quepondash Pediques ambi Pabado ista caid chiec.

²⁴ Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiascho ambi tantiaid Esuquidistu

Pabadon chuibanac Pediquesën tantiauidpondash. ²⁵ Aden chuibanquin Pediques Pabadon nadopondash: Utsin abi utsibëd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuiopondash Pabadon. Adembidi, Esuquidistu tantienquo icsho chian anëdënquequid Nuquin Papan nësecanushe quequin Esuquidistu tantiata, quequin Pabadon chuiopondash. Aden Pabadon chuisho tantiash: —Padi. Ęmbi naid nibëdsho isun padpiden chuimenuen mibi bëmeoaimbique. Nëbi nidec nid —cac Pabado nidpondash. ²⁶ Adshumbic, adembidi abi yacno Pabado Pediquesën bëmeded-bëmededpondash. Nidtiadquo icquin piucquid Pabadon ëbi menetsiash, quequin tantiaquin Pabado bëmiash aidbëd Pediques onquepondash.

²⁷ Adashic, seta daëd matamiash Podsio Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ëbi cain chuibededpec, quequin Pediquesën Pabado shubun nauedshun niampondash.

25

Pabadon ambi naid Peston chuimiaid

¹ Pesto cobednadod yanash Sesadeya yacno choash 3tedec ushanec Edusaden yacno nidpondash. ² Adec Pesto Edusaden yacno choash tabadsho isadaidbo tsusiobo, Pabado chushcaquido: ³ —Ębitedi bëdambo icmenuequin Pabado Edusaden yacno ada bëmeoatsia? —quepondash Pesto chiec. Pabado bësho cuesunenuequidon cainshun cuesunepec, quequin tantiaquin isadaidbo tsusiobon aden Pesto chuipondash.

⁴ Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi. ⁵ Pabadon icsamboen naosh, quec utsi-utsiec ëbëdi nidshun anoshon Pabadon naid icsa ëbi chuita —quepondash isadaidbo tsusiobo caic.

⁶ Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash mates chushquiaid tantiec tsadte dapan tsadtoshon Peston Pabado bëmepondash isadaidbo tabadnubi. ⁷ Aden bëmiacsho isash Pabado dëcatec isadaidbo Edusaden yacnoësh choboedo Pabadon naid chiec abimbo chiacbimboec onquecuededpondash.

⁸ Aden isadaidbon chiaquien: —Ĕmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobĕd puduedambocobi. Adembidi, empedadod Doma yacno tabadquid, Sesad cuĕmĕdquidĕn chiaid niacamboccombi —quepondash Pabado.

⁹ Adoaquien: —¿Edusaden yacno buanac anoshon adom-boembidida isadaidbo tsusiobo chuiotsia? —quepondash Pesto Pabado chiec. ¿Edusaden yacno Pabado ada bĕmeoatsia? quequin isadaidbon chiacpaden nanuec Pesto adpondash.

¹⁰ Adoaquien Pabado: —Domanobo ancaquidĕn empedadod caidĕn, Sesad cuĕmĕdquidĕn, Mibi yacnocquido bĕdamboen tabadmeguid icta, caid icquin mimbimbo chushcanquid bĕdamboen tabadmeta. Isadaidbo icsamboen tantiaquin nainquioccombi. Abimbo Pabadon chiec, quequin mimi tantiec. ¹¹ Icsambocquidquio iquec Pabado unĕs uame, qesho tantiaash, Adoanenda, quenquioctsiabi. Isadaidbon abimbo chiacbimboen chuisho tantiaash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ĕmbi naid chuite bunebi, quequin dada uaindami —quepondash Pabado Pesto chiec.

¹² Aden Pabadon chuisho tantiaash Pesto udictsĕc nidash abipadquidbĕd onquiash choash: —Sesad ĕmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

¿Atotsimbi Pabado napatsia? quequin Peston Aquidipa caid

¹³ Adashic daĕdpactsĕc ushash ancanquid utsi Aquidipa cuĕmĕdquidbĕd aton chuchu Bedenise cuĕmĕdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash. ¹⁴ Adec isedec choash dadpen ushec tabadsho isash Pabado chiec Pesto nadpondash: —Pediquesĕn quĕnĕn nauedmiaid Pabado cuĕmĕdquid chuinu. Tantiata. Aidi abi iquec shubu nuntan. ¹⁵ Aid ambo icnubi Edusaden yacno nidobi. Ambo ĕbi choacsho isun, Pabado icsambocquid neque. Aidi unĕs uata, quequin isadaidbo tsusiobon chuiposhi.

¹⁶ “Adoaquien, Mibi abĕdi chushquiaid Pabadontsen chiambocnoc unĕs uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. ¹⁷ Aden chiac nĕmbo choshon abi chushquiaid aidon chuisho tantiec tsadnuen Pabado bĕmiombi. ¹⁸ Aden Pabado bĕmiacsho ĕmbi

tantiacpaden abi chushcaquidon Pabadon naid chienquiocposh. ¹⁹ Ĕmbi tantiaidpenquo Esuquidistu unēsash uincue-
naid Pabadon tantiaid icsambo iquec, quequin chuiposhi
isadaidbo tsusiobon. ²⁰ Aden ambi tantiaidquo bēdamboen
tantienquo yec nadpobi Pabado caic. Min matsesēn naden
nata quequin chiaid tantienquo iquembique. Edusaden
yacno buamiac mimbi naid anoshon chiac bēdambo ictsiash,
quequin chiombi. ²¹ Adoaquien: ‘Empedadod, Sesad yacno
nidshun Ĕmbi naid chuitiadquo iquebi,’ queposh Pabado.
Aden chiac quēnē yacnoshon aid puduedmetiapimbo iccobi.
Nēmbobi Pabado quēnēn tabadec —quepondash Pesto Pabado
chiec Aquidipa tantiamenuquin.

²² Adoaquien Aquidipa: —Ĕbi aidēn chuibansho tantiate
bunebi —quepondash.

Adoaquien Pesto: —Badiadshun aidēmbi chuisho mimbi
tantiendac —quepondash.

Aquidipa ambi naid Pabadon chiaid

²³ Aden Peston chiaquien badiadash bēdaidquo dasiuidash
Aquidipabēd aton chuchu choash iccuededte quēnēn
puduedash sondado chuiquido chuiquid utsibobēd aid
daēdi tabadpondash. Aido tabadsho isun Peston Pabado
bēmepondash. ²⁴ Bēmiac Pabado nēnantanquo nidtonobi
Pesto nadpondash: —Ancanquid Aquidipan mibēd
iccuededquidon Ĕmbi bēmeboed mibitedishun isec. Aidi
chuinu. Tantiata. Isadaidbon, Nēid dada icsambocquid
neque. Unēs uame, quequin chioishi. Ĕbi Edusaden
yacno choacsho isun adoposh. Adomboembidi nēshun
Sesadeya yacnoshontsen aidombidi chuioposhi. ²⁵ Aden
chuisho tantiashun nēid ambi naid chuimeopombi. Aden
Pabadon chiaidtsen tantiashun, Nēid unēs uatiapimbo
iquebi, quequin tantiapombi. Aden Ĕmbi tantianubi,
Empedadod yacno nidshun Ĕmbi naid chuite bunebi,
quequin Pabadon chuiposhi. Adoac Doma yacno aidi
buamenuna. ²⁶ Aden buamenuen ¿atotsimbi dada uaquin
empedadod chuipatsia? quequin tantienquicquin Pabado
ambi naid chuimeoaimbi ma aden chiac mibitedishun
tantiaoapanuna. Aden tantiashun, Naden dada uata, mimbi
cac dada uatsiambi. ²⁷ Ambī icsamboen naid nibēdnuc
Doma yacno buametiapimbo iquebi —quepondash Pesto
ancanquid Aquidipabēd iccuededquido chiec.

26

¹ Aden Peston chiaquien: —Mibibi onquequin mimbi naid
chui. Tantienu —quepondash Aquidipa Pabado caic.

² Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi. ³ Isadaidbon naden nata quequin chiaidbëdta abi onquiaid mimbi tantiec. Aden tantiaquid mibi icsho ëmbi nabanaid ëmbi chuibansho tantiata. Chuinu.

⁴ “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. ⁵ Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitadquidi nec. ⁶ Unësash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo. ⁷ Nuquin tsusedpa Acobo isadaidcaidën madobon tsyuecquidon, Unësacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. ⁸ Nuquin Papan nadatiambocquin uincuemete chiaid mimbi tantienquio icpe.

⁹ “Ënden ëmbitsen tantiauidquin shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, qeshun adobampondambi. ¹⁰ Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bëdambocquid icsho bedshun quënën nauedmepondambi. Unës uanu, qesho tantiash, Ai, unës uatiadquio iqueque. Adota, quepondabi. ¹¹ Nuquin Papan chiaid chuibante shubu utsi-utsiec yacno nidtednidtedondabi aido mëyamenuec. Esus, Nuquin Papan madopenquio nec, aido camenuen mëyamepondambi. Adembidi nidaid utsi yacnoshontsen adquid istuidshun mëyameopondambi.

¹² “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. ¹³ Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuinu. Ancanquid dapan tantiata. ¹⁴ Aidën dëcatiac ëbitedi nidaidën uebudcuededondabi. Adec uequimbi con matsesën onqueten ebedeyon onqueten abucuësh onquesho naden tantiondambi: Saudo, ¿atotsieshun ëbi tantiaquido mimbi mëyampe? Ëbitsen mëyantiadpambocquin mimbi aido mëyanec, quec onquequin chiondashi.

¹⁵ “Adoaquimbi: ‘¿Tsutsi mibi ne, Icbo?’ caondac.

“Adoaquien, Mimbi mëyanaid Esus nebi. ¹⁶ Ĕmbi namiaid mibi icmenuc chobi. Esus isombi, quequin ĵëbi chuibeneta caid nëbi mibi yanec? Ĕbi chuibenequin mimbi isaidbëdta ěmbi yuecshun ismetequid chuibeneta. ¹⁷ Aden ěbi chuisho mibi cuesunete bunquid isadaidbobëd Isadaidpembo icsho mibi mënchiquendambi. Adquid chuibanta, quequin mibi nidmembali. ¹⁸ Aden chuibanac utsin-utsinquien pashuacbim-boeboedëmbi tantiendac. Icsambocquid nebi, quequin tantienquiocboedi, Icsaobique. Ĕbi pauc, Papa, quependac adquid. Mayan icsan yua icboedi Nuquin Papan bacuë iquendac. Adquid yanash abi icsaid paucac Nuquin Papan bëdambo icmiaid ěbi tantiaquid utsibëd iquendac, quequin Esusën chuipondashi.

¹⁹ “Aid abucuësh onquesho tantiashun chieshenquiocquin chuibeniombi caimbi, mibi chuiquin Aquidipa. ²⁰ Damasco yacnoshomba chuibanondambi. Anoshomba chuiban-shumbic Edusaden yacnoshontsen chuibanooandambi. Anoshon chuibanashumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ěnquin Nuquin Papa abimbo tantiaquin ambi chiacpaden nabanta, quequin chiombi. ²¹ Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. ²² Padnuen ěbi dayun uaquid Nuquin Papa icquin isadaidbon cuesunenushe queshun cudasëmposhi. Adoac nëid ushënquio mibëdtabi mimbi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tantia. ²³ Nuquin Papan Chomiaid, Quidistu, mëyanac unësash uincuenaid yec ěbi tantiaquid ěbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash —quepondash Pabado iccuededquido chiec.

²⁴ Adec Pabado onquesho tantiash: —Min tantiate icsabudash mibi onquec. Mimbi tantiaid dadpen iquec tantienquio yec onquechitequien mibi nec —quepondash Pesto Pabado caic.

²⁵ Adoaquien Pabado: —Bëdamboen tantiec onquebi. Ĕmbi chiaid abimbo iquec, caimbi mibi ancaquid Pesto. ²⁶ Ancanquid Aquidipan ěmbi chuibanboed abimbo iquec quequin tantiec. Aden aidën tantiasho dacuëdenquiocquin aid chiombi. Ĕmbi chuibanboed ompoenquiocquin isquidon chuisho aidëmbi tantiapondash. ²⁷ Nuquin Papan ambi

naden nanun chiaid dada uamiampidon chiaid chuisho mimbi tantioc –capondash Pabadon Aquidipa chuiquin.

²⁸ Adoaquien Aquidipa: –¿Mimbi chuiboedtedtsëqui tantiashtabi Esuquidistu tantiaquid yampe? –quepondash Aquidipa Pabado chiec.

²⁹ Adoaquien Pabado: –Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënquio daëdpactsëc chiombi. Aidtedtsëqui chiac tantiatiapimboesho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna –quepondash Pabado.

³⁰ Aden Pabadon chuibanaquien ancanquid Aquidipa nidtopondash. Nidtocho isash Pestobëd Bedenise iccuededquid utsibo chedo nidtocuededpondash. ³¹ Adec nidtocuededash puduenash onquecuededec: –Chuibamboed icsamboen nainquioccosh. Adoenquiocsho unës uainquiociad. Adembidi ënden quënën nauedenquiocpatecnëdan –quepondash ancanquido.

³² Aden chiash: –Empedadod chuite bunebi Pabado quiambocsho quënën nauedacnoshon aidi mimbi nidmet-senosh –quepondash Aquidipa Pesto chiec.

27

Doma yacno Pabado buanaid

¹ Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash.

² Aden buanta cac Pabadobëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icho, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantiashtabi Pabadobëd antabëdtopondabi. Adec antabëdtocho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

³ Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno nid. Aidon mibi menetsiash, quequin Pabado bëdamboen tantiaquin sondado chuiquidën, Udion, chuipondash. ⁴ Adshumbic Sidon caid yacnoësh puduanec nidquin potesho cunquequidën bëquedtuiddac ushë choacmi cuenadtanquin acte nënantan

nidaid nacnëdquid Chipide caid datampondash. ⁵ Adembi nidaid Sidisia caid ëquë datanash nidaid Pampidia caid ëquëtsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. ⁶ Ambo choshombic sondado chuiquidën cano utsin nidnuequin nibënquin istuidpondash. Nidaid Equipito caid yacno shubu dadpen icquid Adecandedia caid yacnoësh choboedi nidaid Itadia caid yacno buanu caid istuidpondash. Aden aid istuidshun Pabadobëd icquido aid canontsen antabëdtomepondash. ⁷ Adec Mida yacnoësh puduanash nidquin potec dadpen ushacsho cunquequidën cano bëquedtuïdpondash. Aden bëquedac bëdiactsëc nidquimbi shubu dadpen icquid Nido caid ëquëbitsen datambidanec acte nënantan nidaid nacnëdquid Quideta caid yacno buanoapondash. Uquë cuëma utsiuc Sadmon caid icpondash. ⁸ Ushë choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictsëc shubu dadpen icquid Dasia caid iccondash.

⁹ Cunquequidën bëquedac yuenquio potiactanetsëcquien buampondash. Comapenec cunquequidën nuqui bëquedendac, quequin tantiaquin Pabadon nadopondash: ¹⁰ —Chuïnu. Tantiata. Nëuëshquio puduanquin potesho cunquequid dapan bëquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin. ¹¹ Aden Pabadon chiaqui sondado chuiquidën niacbidanquin cano icbobëdtan cano nidmequidën nidnu quequin chiaid tantiapondash. ¹² Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

Acte dapa potesho cunquequid dapanquio cano bëquedte

¹³ Nuqui iquenendac, quequin tantiaquin bëdiactsëc cunquesho isun abi bunacpaden nanuequin cano uidën uate shocosh yuëmbocquid indoash puduanquin Quideta cuëma anoentsëqui buampondash. ¹⁴ Adec nidequi udictsëc yanshobi ushë cho-choaid ëquëtsëcshun Quideta caid nidaid mananucuësh cunquequid dapa choquin bëquedtuïdquin ¹⁵ icbon cano nidmetiapimbocnobi cano buampondash. ¹⁶ Aden cunquequidën buanaqui acte nënantan nidaid nacnëdquid utsimpi Quëdauda caid ëquëbictsëc cuenadquimbi canompi cano dapan nëshun buanaid buanushe queshun anandopondash. ¹⁷ Aden canompi anandoshon cano dapa canchednushe queshun uidën

uaquin datanebanshumbic cano buante dashcute abi dectante cuestebēdtabi imbudshun dashcute chicacsho cunquequidēn cano comapenen buampondash. ¹⁸ Aden cano cunquequid dapan buanubi badiadnuc acte natiambo tēccoasquesho isun ambi ansandoshon bēboed acte nēsiapondash. ¹⁹ Adshumbic 3tedec ushun bucu dēnēshun cano dashcute indotetedi nēsiaoapondash. ²⁰ Aden nēsecanec nidquimbi inchēshēn ushēbēdta uispa abu chēshēn bētīnacsho isenquio iccondambi. Adembidi badiadēn ushē isenquio iccondambi. Dadpen ushquin aitedi isenquioccondambi. Aiteded isenquiocnobi acte comapenen tēccoascapondash. Ad icsho isash, Bēnudchitequien nuqui iquec, abitedimbo quecuededpondash.

²¹ Adequi nuqui iquec, queshun buna mēmumbededequi abitedi nidanepondabi. Adec canon nidnubi Pabado nidtoash nadpondash: —Chuinu. Tantiata. Quideta caid yacnoēsh puduanenda caombi. Adsho tantiaboshi tantienquio yec mibi puduampoc. Ēmbi chiacpaden nabanuc mimbi ansandoaidtedi abi ictsiandac. Adecbidi, Unēsebi, quenquio nuqui ictsiandac. ²² Padnuen acte tēccoasquenubi nuquitedi unēsenquio iqueque. Dacuēdenquio yec dayacquio icta. Canouidi canched-canchedendac. ²³ Nuquin Papan namiaidquio nebi. Adquid icsho inchēshēn ambi uaidēn mayan bēdan ambi chomiaidēn naden chioshi: ²⁴“Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibēd icquidtedi acte yacnoshon mēnchiquembique. Dacuēdenquio yec tabad,” caposhi Nuquin Papan uaid mayan bēdan. ²⁵ Aden aidēn chiac dayacquio icta. Nuquin Papa ambi chiacpaden nabanquid nec, quequin tantiembi. ²⁶ Adembidi, acte tēccoasquequidēn nuqui acte nēnantan nidaid nacrēdquid cuēmano buanshun cano cancheshunendac, quequin tantiombi —quepondash Pabado canon antabēdtoaido chiec.

Cano canched-canchedaid

²⁷ Adashic, Buenos Puedtos caid yacnoēsh ēnden nidboshi 14tedec ushec acte Adidia caid yacnoshon cunquequidēn buampondash. Aden acte tēccoasquequin buanubi inchēshpotsembo yanuc, Cuēma anoentsēquien nuqui choendac, quequin cano nidmequidon tantiapondash. ²⁸ Aden tantiaquin, ¿Tionda iqueque? Tanu, queshun yuēmbocquid shocosh bucu dēdectanshun pumbudquin tampondash. Aden tanshun, Aidtiompenquio iquec, quequin chuipondash. ²⁹ Nidaid cuēnote dapa cunquequidēn buanquin cano semenushe queshun cano uidēn uate dapa yuēmbocquid tsitsumi tsidectanshun acte nēnequin

uidën uash ma badiadbono quiash tabadpondash.
³⁰ Adec tabadnubi cano nidmequido cuenueshun
 dëbiate yacnoshontsen cano uidën uate yuëmbocquid
 dëdectanuequin abimbo chiacimboen canompi anandoaed
 nënetsempondash. Cano dapa mentoadtsiash, qeshun
 cuenequin adopondash. ³¹ Adec aido nidtsenubien Pabado:
 —Cuenuequido canompin nidnuc cano dapan nidquido
 nuqui mentoadendac —quepondash sondado chuiquid caic.
³² Aden Pabado chiaquien abi dectante bucutedi sënac
 canompi nëpaëdpondash cuenequido nidtiapimbo yec.

³³ Adashic, badiadte anoentsëc yanubi Pabado
 nadpondash: —Catodtseted ushec, Mentoadtsiabi, quequin
 tantiaded-tantiadedtsëcquin mimbi piamboccoc. ³⁴ Mibi
 mentoadenquio iqueque. Min manëdaid abentsëc paëdenquio
 iqueque. Penquiocboedi unëschitomane quenquiocquin
 peta —quepondash Pabado. ³⁵ Aden chuishumbic utsitedi
 ismequin pan bedshun Nuquin Papa chuishun pan cuëshun
 Pabado pepondash. ³⁶ Aden Pabado pesho isun, Nuquitsen
 penuna, qeshun abitedishun pebededpondash. ³⁷ Cano
 antabëdtoquido 276ted icpondash. ³⁸ Aidedshun peshumbic,
 Cuëmano nidec, quequin ambi sandoaid utsitedi tiedën
 caniquid ëshë acte nësiapondash, Cano yuëmbo iquec, qeshun.

³⁹ Adshumbic, badiadnuc ambi isacmaid nidaid
 istuidpondash. Acte cuidiantanquid cuëmambi masi
 icsho isun ambo cano nidmenueshun ⁴⁰ uidën uaid
 tebanac acte nëpaëdpondash. Adembidi, cano dëbiadiadmete
 bucutedi seccudoashun cano dëbiaten buanquin dashcute
 shoyontanquimbi cadoapondash, Cunquequidën acte daëd
 naccuëscananacno buampashuni, quequin. ⁴¹ Aden cano
 nidmenubi cano dëbiaten masi setuidec dëchiquidtiapimbo
 yec cano dapa dëtocquepondash. Adec dëchiadash
 acte tēccoasquequidën cano dapa canche-canchequin
 tauapondash.

⁴² Adsho isash sondado, Mëtaniaidtedi cuentsiashe.
 Cuesunenu, qesho ⁴³ tantiash Pabado cuesunenushe
 qeshun: —jChën! —capondash sondado chuiquidën.
 Aden chuishumbic, Acten tantanec mëquiadquido tantanec
 nidanenubi ⁴⁴ tantantiapimbocquido cano cuësh-
 cuëshëdaid bedbanash noadec tantanquido tsibanec
 nidta, quequin chuipondash sondado chuiquidën canon
 antabëdtoquido chuiquin. Aden ambi chiacpadquiec
 nidanec mentoadenquio yec abitedi nidaid yacno choash
 dectatocuededpondash abitedi.

Madta caid yacno Pabadobëd icquido choaid

¹ Adec nidaid yacno choash dectatoneshun, Nëid acte nënantan nidaid nacnëdquid Madta caid nec, quesho tantiabededpondash. ² Ambo tabadquidon abitedi bëdamboen yuedpondash. Iquen uampamboec ue sequenubi Madta caid yacno chosho isun cuëte dëtsiadoshon, Cuëec cho, quequin chuipondash. ³ Adnubic Pabadontsen cuëte tanunquiocquid bedtanquin tsindoquin masandopondash. Aden masandoaid nëdënquiacnoësh puduenquin nisin Pabado mëpepondash. ⁴ Aden mëpiash ëcchiquidenquo yec mëdiadsho isashien anocquido: —Nisin piaid cuesunianquid nepanui. Mentoadenquo yec actenuësh dectatoacsho nisin piac unëschitequien iquec. Abi icsaid cuidtequidien nechitec.

⁵ Adec onqueduednubien Pabadon comapenen uicac nisi cuëte dëtsiadoaidën nëpaëdpondash. Adnubien Pabado abi bëdambo icpondash. ⁶ Aden Pabadon uicac nisi paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquiocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

⁷ Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. ⁸ Adnubien Pudion papa chumbo yec pienec aton madon shubu nuntan uepondash. Adec Pudion papa uec quesho tantiaash Pabado aid isec nidshun ashunquiobi Nuquin Papa chuishumbic Pudion papa damishquin bëdamepondash Pabadon. ⁹ Pudion papa bëdanacsho isash Madta caid yacnocquido nënquidbëd daicsaid chedo chochopondash. Èbitsen bëdametsiash, quiash cho-chosho aidotsen bëdamepondash Pabadon. ¹⁰ Adosho isun canon choquido bëdamboen tabadmepondash anocquidon. Nidnuesho tantiaashun menëbampondash mitsana nibëdec quequin.

Doma yacno Pabado choash tabadaid

¹¹ Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quiash tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacenaid icpondash. Ambi papa

cain cuënaid abentsëc Castod icnuc utsi Podus icpondash. Adembidi aton cano cuëmpondash ichon. ¹² Aidën puduanec nidequi acte nënantan nidaid nactnëdquid utsi yacno choash shubu dadpen icquid Sidacusa caid yacno choash 3tedec ushquin tabadmepondash. ¹³ Ambo tabadash puduanquin aid acte nënantan nidaid nactnëdquid cuëma anoentsëqui potequi nidaid Itadia caid cuëmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidën buanac badiad utsin shubu dadpen icquid Puteyodi caid yacno chopondash. ¹⁴ Ambo choshon Pabadobëd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobëd tabadashic auëshquio puduanec podquedën nidequi shubu dadpenquio icquid Doma caid yacno chopondash Pabadobëd icquido. ¹⁵ Podqued Apio caidën choec, quequin chuituidac Esuquidistu tantiaquid Doma yacnocquid utsi-utsiec Pabado bëquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsëc chotsec quequin cuënaid yacnocquido Pabado bëquedoaic nidaneopondash. Aido cho-chosho isashien, Èbi dayacquio icmenuen nëidtedi mimbi chomioc, Papa, quec dayacquio iquebi, quiampondash Pabado. ¹⁶ Adec aido bëquedec choash auchidi nidec Pabadobëd Doma yacno choapondash. Doma yacno choacshobien Pabado quënën nauedenquiocquin shubun tabadmepondash sondado abentsëcshun abëd tabadquin isnubi.

Domayacnoshon Pabadon Esuquidistu chuibante

¹⁷ Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiacsho isun Pabadon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid nicambo iccombi. Adoenquiocshobi Edusaden yacnoshon nuquin matsesën bedshun domanobo chuiquid meniondashi. ¹⁸ Aden meniac domanobo chuiquidën, Mimbi naid chuiban, cac chuibanondambi. Aden chuibansho tantiash, Unës uainquioctiadquidi mimbi naic, quepondash domanobo chuiquid ëbi caic. ¹⁹ Aden domanobo chuiquidën tantianubi nuquin matses tsusiobon, Unës uatiad, quequin chiac, Empedadod, Sesad yacno nidshun ëmbi naid chuite bunebi, quequin chuipondambi, Con matses icsambo iquec, quenquiocquin. ²⁰ Èmbi chuiboed mibi chuinuequin mibitedi chomiombi. Unësash uincuenta nec, quequin tantiaquin

nuquin matsesën cainacpaden cainquid icsho mêtaniaid nebi —quepondash Pabado isadaidbo tsusiobo chiec.

²¹ Adoaquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoësh choquido, Pabado icsambocquid nec, quequin chienquioccosh. ²² Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

²³ Aden Pabadon tantiaid tantianuec, Nëidted ushash padpidec choaindabi, quianec nidanepondash tsusiobo. Adec nidaniash ambi chiactedec ushash Pabado tabadacno choapondash isadaidbo tsusiobobëd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quiash abided cuidadec Esuquidistu unëspanëdash. Aid tantiaquid yec Nuquin Papabëd tabadendac, quequin Pabadon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbëdtabi Nuquin Papan naden nanun chiaid ambi utsibo dada uamiampid chuibampondash Pabadon. Ambi dada uamiampidën chiaid Nuquin Papan madombo Esuquidistu nec, quequin badiadnubi chuiquin tauashun inchëshbudtsëqui chuiquin ëmpondash Pabadon. ²⁴ Aden chuibanac utsi-utsiec, Abimbo iquec, quenubi utsi-utsiec, Tantiatiapibi, quepondash. ²⁵ Aden abentsëc tantiacbimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuiampic:

²⁶ “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantien-
quo iquendac;

Adembidi Ëmbi nadatiambocquin nabanaid isted-
istedquimbi abimbo isenquo iquendac.

²⁷ Bëdamboen tantiaboedobi nëbi min matses pa-
mumëdacbimboec tabadec; pashuacbimboen tantiec
tabadoaic; ushacbimboebidi tabadoaic.

Adec tabadenquiocquin ëmbi nabansho mimbi istsiac. Adem-
bidi ëmbi chiaid mimbi tantiatsiac. Aden tantiashun
mibi icsaid mimbi ëntsiac.

Adquiduidi ëmbi bëdambo icmiaid nendac.”

²⁸ Adesa mibi icnuc isadaidpembo Esuquidistu chuimembi.
Aden aidi chuisho aidon tantiendac —quepondash Pabado

²⁹ Nuquin Papan dada uamiampicpaden chuiquin isadaidbo
Doma yacnocquido tantiamenuec. Aden chuisho tantiash
isadaidbo nidanepondash.

³⁰ Adembidi seta daëd matamec tabadquin Pabadon Esuquidistu chuibampondash. Aton shubun tabadquin abi isedec choquidtedi Pabadon yuedpondash. ³¹ Utsi, Chën, quenquiocnobi dacuëdenquiocquin, Nuquin Papabëd tabadte iquec, quequin huibampondash. Adembidi Esuquidistu tantiamenuen chuibampondash Pabadon.

Padi. Esuquidistun, Ębi chuibeneta, caidon naid chuibanquin aitedi dada uaombi, Teyopido.

DOMA YACNOCQUIDON ISTE

Tauamboen chiaid

¹ Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi. ² Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. ³ Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. ⁴ Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. ⁵ Aidën: —Pabadon chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. ⁶ Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. ⁷ Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

Doma yacnocquido iste Pabado bunaid

⁸ Tanta. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. ⁹ Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc. ¹⁰ Nadembidi Nuquin Papa chianembi. —Doma yacnocquido istantiadquio iquebi. Mimbi nidmiac nëbi nidtsiabi, Papa —quequin chianembi. ¹¹ Aden mibi istantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiami-acpadomboen chieshtoenquio icquin Esus tantiaquionona —quequin mibi chuibantsiambi. ¹² —“Chieshtoenquio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

13 Tantia, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —qeshobi Nuquin Papan nac nidenquo iccobi. —Ëmbi Esusën naid chuibanac matses utsibon dadpeshun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidtiadquo iquebi. 14 Esuquidistun chiacpadomboen ambi naid matses abitedi chuibantiadquo iquebi. —Dadpen tantiaquidobëdtabi tantienguio icquidotsen chuibenenu. Adembidi dada uaquidobëdtabi dada uainquo icquidotsen chuibenenu —quiash nebi. 15 Aden chuibenequi shubu dadpen icquid Doma yacno nidshun mibitsen Esusën naid chuibantiadquo iquebi.

16 Esusën naid chuibenec bëdambo iquebi naden tantiash. —Nuquin Papan tantiacpadec matses cuidmenquo icnuec Esus abided cuidadec unësac caondash. Aid tantiasho Nuquin Papan matses cuidenquo iquec. Abia chiaidon isadaidbon Esus tantiasho cuidenquo icquin isadaidpembo matses utsibontsen Esus tantiasho Nuquin Papan cuidenquo iquendac —quiash Esusën naid chuibenec bëdambo iquebi. 17 Esusën naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bëdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquid Nuquin Papan bëdamboen isec,” quequin dada uamepampic.

Matses utsibo icsamboec tabadaid

18 —Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpeshun Nuquin Papan cuidte tantiatiapimbo iquec. 19 Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquo matses icpec. —Adquidshenda Nuquin Papa nepc —matses camenuen Nuquin Papan abitedi uapampic. 20 Nidaid uaquinc cuëte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nëid uaquidien nadquo icchitec. Nibëdantiapimbo icquidien nechitec. Abipadquid utsi nibëdnuc comapenen tantiaquin nabanquidquo yec abitedishun Ichoen nechitec —quetiadquidi adenquo matses iquec. Adquid Nuquin Papan cuidendac.

²¹ **Ambi uaid isash:** —Nëid uaquid bēdambo iquec. Aidēmbien ēbi nashunchitec —quetiadquidi pamumēdac bimboecquin Nuquin Papa tantiatiapimbo matses iquec. ²² —Dadpen bēdamboen tantiembi —quequimbi tantienquo matsesēn iquec. ²³ Aden unēstiapimbo icquid Nuquin Papambo tantiatiapimbo icquimbi unēsquid-uidquo tantiaquin aidbimboecnuc nacenashun papa quequin chianec. Utsibon matsesbimboecnuc nacenashun: —Ēbi bēdamboen ista, papa —quequin ambi nacenaid chiec. Utsibombic aben icquid nidaidēn capuquidbimboecnuc nacenashun adembidi chiec. Utsibombic uicchun podochoquidbimboecnuc nacenashun adembidi chiec. Utsibombic aben icquid tacbidēn siuidquidbimboecnuc nacenashun adembidi ambi nacenaid chiec. Ēnden adquo matses yampicpadomboembidi nēbi adomboembidi matsesēn naic.

²⁴ **Adsho isash Nuquin Papa:** —Ma bēdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnēdambic nēbi abi bunacpadece icsamboec tabadec utsin chido chudteuidi bunquiech dada. Adecbidi aton bēnēpenquo chudmeteuidi bunquiech chido. ²⁵ —Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bēdamboshē iquec —quequin ēnenquo icquin chuitiadquidi aidon padenquo icpec.

²⁶ **Adsho isash:** —Ma abi bunacpadece icsamboec tabadpanu —quiampampic Nuquin Papa. Adnēdambic nēbi icsabudquiech dada bunenquo yequi chido daēdi dachudnanec. ²⁷ Adecbidi chido bunenquo yequi dada daēdi chichudnante natia bunquiopec. Aden ambi chiaid niac-niaquec icsamboec tabadsho Nuquin Papan cuidendac.

²⁸ **Adec abi tantiate bunenquo icsho isash:** —Ma bēdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnēdambic nēbi pabiate shēcuē nibēdac bimboecquin Nuquin Papan chiaid niac-niaquec icsamboec tabadpec bēdambo ictiadquidobi. ²⁹ Nadquido icsamboec tabadquido nec. Nēidic aton chidopenquo chudquido. Nēidic aton bēnēpenquo chudmequido. Nēidic icsamboshē icquido. Nēidic aton na dadpen bedteuidi bunquido. Nēidic chieshquido. Nēidic matses utsibobimboec icte bunec chieshēmēnquido. Nēidic cuesunianquido. Nēidic chieshēmēnquido. Nēidic muaquido. Nēidic icsa uate bunquido. Nēidic utsibo icsaiduidi chuiquido. ³⁰ Nēidic ambenquiobi chuishunquin chieshēnquin muauaquido. Nēidic Nuquin Papa chieshēnquido. Nēidic

mamēnshumēnquido. Nēidic utsibo nashunenquio icquin aton nauidi naquido. Nēidic: —Ēbiuidtsēqui bēdambo iquebi —quequido. Nēidic: —¿Icsaquin atotsimbi utsi nape? —quec icsate bunquido. Nēidic anibēdtan amēn chiaid niacniacquido. ³¹ Nēidic piushbimboecquin Nuquin Papan chiaid tantienquio icquido. Nēidic aton matses tantienquio icquido. Nēidic nēishash baded nēish bēdanenquio icquido. Nēidic utsibo bēdamboen istiapimbo icquido. Adquidtedi Nuquin Papan chiaid niacniacqueic icsamboec tabadquid nendac. ³² —Abi icsaid ėntiapimbo icquido Nuquin Papan cuidquin chian anēdēnquiacno nēsecaindac —quequin tantiequi ėnēdenquio yec icsaded-icsadedqueic. Utsibotsen icsasho isash cuishonquec. —Bēdambo iquec. Ēbipadquidquio nec —quepec.

2

Matsesēn naid Nuquin Papan abimbo chuite

¹ Aden icsamboec tabadaid ėmbi chuisho tantiasht: —Adquid icsamboshē iquec —¿quecta ique? —Aden naic aid icsaic —queboedi mibitsen adecbidi icsapec. —Icsaquidpenquio nebi —quec mibi muaic. ² Nuquin Papambien matsesēn naidtedi tantiaquid icquin: —Nēido icsambo iqueque. Icsano nidmenu —quequin abimbo chiendac. ³ —Matses utsibo icsambo iquec —queboedombi mimbitsen Nuquin Papan chiaid niacniacpec. Adash: —Nuquin Papan nuquī cuidenquio iquec —¿quecta ique? Mibitsen Nuquin Papan cuidendac. ⁴ Ambi uaido matses abitedi icsambo icsho isash unēsquio icquin matses bēdamboen iste bunquin icsaidobi Nuquin Papan baded cuidenquio iquec. —“Icsaboedi nēbi Nuquin Papan chiacpadec bēdamboec tabadtiadquio iquebi,” quequin ma matsesēn ėbi tantianu —queshun Nuquin Papan matses baded cuidenquio iquec. Abi icsaid ėnenquio icsho isun cuidendac. ¿Adsho tantiashta mibi nadpe? —Mua. Nuquin Papan ėbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

⁵ —Nuquin Papan chiaid niacboedēmbi ėnta —caqui: —Padi. Ēmbi naiduidi naic bēdambo iquebi —quequin ėnenquio icquin Nuquin Papan chiaid niacniacbudec icsamboecuidi mibi tabadec. Aden mimbi Nuquin Papa cuidmendac. Nuquin Papan matsesēn naidtedi chuite ushēmbi mimbi icsamboen naidtedi chuishun Nuquin Papan mibi cuidendac. ⁶ Matsesēn naidtedi tantiaquin matses cuidendac. Bēdambo icquido abēdi tabadmegin icsaido icsano nidmendac Nuquin Papan. ⁷ Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte

bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc. ⁸ Icsaquidoen Nuquin Papan chiaid chiaqui tantiante bunenquio icquin aton nauidi naic icsamboecuidi tabadsho Nuquin Papan comapenen cuidendac. ⁹ Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. ¹⁰ Abi tantiec bēdamboec tabadquido unēsacsho abi yacno tabadmeshun: — Nēid bēdamboec tabadquid niondash —quequin utsibo tantiamequin Nuquin Papan bēdambo icmendac. Ambia Nuquin Papan chiaid tantiondaido Isadaidbo abi tantiaquid icsho abēdi tabadmequimbi matses utsibotsen abi tantiaquid icsho Nuquin Papan abēdi tabadmendac. ¹¹ Icsamboec tabadquido icsano nidmequin bēdamboec tabadquido abēdi tabadmendac. —Isadaidbouditsēqui bēdamboen isembi —quenquio icquin adoendac.

¹² Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidēn chiaid niac-niaquec icsamboec tabadsho adembidi cuidendac. ¹³ Ambi: —Naden nata —quequin chiaid tantiashumbic adomboen naisa bēdamboen istiapimbo icquin ambi chiacpadec tabadquid Nuquin Papan bēdamboen istsiash. ¹⁴ ¿Ada Nuquin Papan chiaid tantiacmaidon matses utsibon bēdamboec tabadte tantienquio iccuededpec? Ma bēdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bēdamboen naic Nuquin Papan chiaid tantiashumbimboen. ¹⁵ Adec bēdamboec tabadec: —Bēdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. ¹⁶ — Adec matses abitedi bēdamboec tabadte tantiequi adquiec tabadenquio iquec —qeshun Nuquin Papan chiacpadēn Esuquidistun matses cuidendac. Matsesēn otacquo tantiaidbēdta matsesēn ompoquin naidtedi ambembi tantiashun Esusēn matses cuidendac. Esus chuibanquin aden aidēn cuidte chiombi.

Isadaidbon Nuquin Papan chiaid niac-niacaid

¹⁷ Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidēn tsyuecquid icsho Nuquin Papan ēbi bēdamboen isec. Utsibon

Nuquin Papa tantienquo icnubi Nuquin Papambo con matsesbēdtambi bēdamboen tantiemi. Bēdambo iquebi —mibi quepec. Adboedi mibi icsaic. ¹⁸ Nuquin matses tsusibon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec ut-sibo bēdamboec tabadsho isash: —Aido bēdamboec tabadec —queboedi mibi bēdamboec tabadenquo icpec. ¹⁹ Adecbidi: —Nuquin Papan chiaid tantiacmaido Nuquin Papan chiaidquo chuibanquid nebi. Paposhquiabimboecnuc tantiamequidquo nebi —mibi quepec. Adboedi aidēn chiaid niaquec mibi icsaic. ²⁰ —Chuisho tantiabi icquido nēbi tantiabentsēcquidobēdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquo chuibanquid nebi —mibi quepec. ²¹ Adec: —Nuquin Papan chiaid niac-niaquenda —queboedēmbi aidēn chiaid mimbi niac-niaquec. —Ampenda —queboedēmbi mimbitsen ampepec. ²² —Utsin chido chudenda —queboedēmbi utsin chido mimbitsen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquo yec nēid nacnenquid icsambo iquec —queboedēmbi aidēn nacnenaid tantiate shubun puduedshun mimbi ampepec. ²³ —Nuquin Papan ambi chiaid con tsusedpa Moises dada uamepampid bedshun con matses isadaidbonuidtsēqui Nuquin Papa tantiec —queboedēmbi ambi chiaid niac-niaquec mibi icsamboec tabadec. ²⁴ Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bēdamboen tantienquo iquec.

Nuquin Papa tantiaquidquo icte chiaid

²⁵ —Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuēbo shui dēbid dēteshun secaic. Adonēdaid ambi chiaid niac-niaquenquo yec bēdamboec tabadsho Nuquin Papan bēdamboen istsiash. Isadaidbo utsibon ambi chiaid niac-niacsho Nuquin Papan bēdamboen istiapimbo iquec ambi con matses cacmaidobimboecnuc. ²⁶ Nuquin Papan con matses cainquo icpampido matses utsiboen ambi chiacpadec bēdamboec tabadsho Nuquin Papan bēdamboen istsiash ambi: —Con matses nec —caidobimboecnuc. ²⁷ Adec matses utsibo Nuquin Papan chiacpadec bēdamboec tabadsho isash isadaidbo nadec chiadpec. —Matses utsibo bēdamboec tabadnubi Nuquin Papan Moises dada uamepampid isbanisbanshumbi isadaidbon Nuquin Papan chiaid niac-niacpec.

Isadaidbo matses dadpen icsambo iquec —cadpec. ²⁸ ¿Shui dëbid dëteshun secaquido isadaidbotedi Nuquin Papa tantiaquidomboda nedic? Padenquio. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquio. ²⁹ ¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquio. Nuquin Papa tantiaquidquien aton Mayanën tantiamiacpadec bëdamboec tabadec. Adquid: —Mibi bëdambo iquec. Con matses mibi canu —capec Nuquin Papan matsesën adoenuio icnubi.

3

Nuquin Papan isadaidbo tantiec, quequin chiaid

¹ Aden: —Abi tantiec bëdamboec tabadquid Nuquin Papan con matses catsiash —quequin ëmbi chuisho tantiash: —¿Isadaidbo yecta icsambo icpec? —¿quecta ique? —Padenquio iquec —caimbi. —¿Ada aido ambi con matses caido Nuquin Papan nashunac? —¿quecta ique? ² Ai, aido nashunquiac. —Ëmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. ³ Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquio icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquio icpatsiash? ⁴ Padenquio. Ma ambi chiacpadomboen naquidquio Nuquin Papa neyoc. Muesambo nec. Matses abitedimbo muaquidquio icnuc Nuquin Papan abimbo chuiquidquio nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquio nec.

‘Nëid bëdambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin

Nuquin Papan: ‘Mibi icsaoc,’ quequin ëbi chuiboed chiombi,” quequin dada uapampic.

⁵ Ëbi adsho bëdamboen tantiata. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquio Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bëdambo icte tantiameshobi Nuquin Papan ëbi cuidac icsambo ictsash —quequin icsamboen tantienda.

⁶ Matsesën naid chiec Nuquin Papa muatiapimbo iquec. Abimbo chuibanendac. Icsaïdo chiec: —Mibi bëdambo iquec.

Mibi cuidenquo iquembi —quetiapimbo Nuquin Papa iquec. Muesambo nec. ⁷ Nadembidi icsamboen tantienda. —Ëbi muaquidquo icnubi: “Adquidpenquo Nuquin Papa nec. Bëdamboshë iquec. Muesambo nec,” quetsiash con matses. Adec muaquimbi Nuquin Papa muainquo icte con matses tantiametsiambi. Aden ëmbi abi tantiameshobi Nuquin Papan ëbi cuidac icsambo ictsash —quequin icsamboen tantienda. ⁸ Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquo. —Pabado chedo: “‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ëbi muauaquido Nuquin Papan cuidchitoshon.

Matses abitedi icsaquido nec, quiaid

⁹ Tanta, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquo. Nuquin Papan chiaid niaquesamboen nibëdec. Matses utsibo con matses isadaidbobëd abembi bëdamboec tabadtiapimbo iquec. Abitedimbo icsamboec tabadquido nec. Aden mibi chiombi. ¹⁰ Aden chuiquin Nuquin Papan dada uamepampic naden.

“Nuquin Papan chiaid niaquesambo nibëdec.

Abitedimbo icsaquido nec.

¹¹ Nuquin Papa tantiaquin ambi chiacpadomboenuidi naquidquo nibëdec.

Nuquin Papa tantiate bunquidquo nibëdec.

¹² Bënudshun podqued tantienquo yacbimboen Nuquin Papa tantienquo icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibëdec.

Abitedimbo icsapec.

¹³ Nadquo iquec. Nëid icsamboec chuishumënquido. Unësaid ënden chococacno shëdec: ‘Pisenac,’ quequin tantiacbimboen adquido onquesho tantiash: ‘Icsambo icquido nec,’ quequin matsesën tantiec.

Nëidic muaquido.

Nëidic nisin pequin icsa uacbimboen icsa uate bunec icsamboec onquequido.

¹⁴ Nëidic nëishash chieshëmëdec: ‘Unëschitoshon,’ quequin icsamboenuidi chuiquido.

¹⁵ Nëidic intac mëyamec badedquo cuesunianquido.

¹⁶ Nëidic abëd icquido natiamec chieshëmënquido.

17 Adquidtedi cuesnante bunec bēdamboec tabadtiapimbo iquec.

18 ‘Nuquin Papan cuidnushe,’ quenquo icquid Nuquin Papa tantiesabo nec,”
quequin dada uamepampic.

19 Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiashun: —Icsaquidpenquo nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibēdtabi isadaidbotsen chiac: —Abimbo chiec —quiash dacuēdec ēcbedanenquo tabadendac matses abitedi. 20 Aden ambi chiaid niaquesambo nibēdnuc: —Ambi chiaid niaquesa icsho Nuquin Papan nuqui bēdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

Nuquin Papa matses bēdamboen ismete chiaid

21 Aden ambi chiatedi natiapimbo yec matses icsasho isun Nuquin Papan abi matses bēdamboen ismete chuiquin isadaidbo tsusedpa Moisesbēdta tsusedpabo utsibo dada uamepampic ēndenquimbo. Aden ambi dada uamepampic-padomboen nēbi Nuquin Papan abi matses bēdamboen ismequid matsesmepac caondash. 22 Adoac Nuquin Papa abi tantiaquido bēdamboen ismenuc Esuquidistu abided ciudadec unēspac caondash. Nēbi aidquo tantiasho Nuquin Papan matses bēdamboen isec. Isadaidbobēdtambi matses utsibontsen Esus tantiasho adoendac. 23 Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibēdec. 24 Adquid bēdamboen istiapimbo icquin matses bēdamboen iste bunquin aton Mado Esuquidistu abided unēs uamequin Nuquin Papan cuidpac caondash. Nēbi abided cuidadaid Esus tantiasho nuqui bēdamboen isec icsaisabimboecnuc. 25 —Icsaido cuidquid icquimbi nuqui cuidenquo icnuen Nuquin Papan nac —nuqui camenuen Nuquin Papan nuqui icsaid bedshumequin Esusded unēs uamequin cuidpac caondash. Esus tishabi icnuc Nuquin Papan abi tantiaquido cuidenquo icpampic: —Yuecshun con Madoded cuidendambi —quequin tantiaquin. 26 Nēbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bēdamboen isquin cuidenquo iquendac.

27 Ĕmbi aden chuisho tantiash: —Ambi chiacpadom-boenuidi nasho Nuquin Papan bēdamboen isebe —quequin mimbi abimbo chūtiapimbo iquec. Matsesēn Nuquin Papan chiacpadomboenuidi natiapimbo icsho bēdamboen istiapimbo icboedi nēbi Esus tantiasho Nuquin Papan nuqui bēdamboen isec. 28 Aden matsesēn ambembi naquin Nuquin Papa bēdamboen ismetiapimbo iquec. Padnuen utsin: —Matsesash ēbi icsaid bedshunec abided cuidadaid tantiasho Nuquin Papan ēbi bēdamboen isec —quequin Esus tantiasho Nuquin Papan bēdamboen isec. 29 ¿Isadaidboudida Nuquin Papan bēdamboen ispatsiash? Padenquo. Matses utsibo isadaidpembobi Nuquin Papan bēdamboen istsiash. 30 Matses abitedi uaquid icquin ambi chiacpadomboen isadaidbon Esus tantiasho Nuquin Papan bēdamboen isec. Adembidi matses utsibon Esus tantiasho Nuquin Papan bēdamboen isec. 31 Adoaido: —Nuquin Papan chiaid niac-niaquec icsamboec tabadnuna —¿quecta icpec? Padenquo. Esus tantiaquido icquin Nuquin Papan chiacpadomboen natiadquo nuqui yanec.

4

Nuquin Papan Abadauan bēdamboen isaid

1 Tantia. Aden Nuquin Papan bēdamboen iste chuiquin isadaidbo tsusedpa Abadauan caid ĕnden icpampidtsen mibi chuinu. ¿Atotsieshun Nuquin Papan Abadauan bēdamboen isbempampic? 2 Bēdamboecuidi tabadsho Nuquin Papan bēdamboen isaid yec Abadauan: —Bēdamboecuidi tabadquin Nuquin Papa bēdamboen ismembi —quetsempampic. Abadauan bēdamboecuidi tabadambo. Adsho: —Bēdamboecuidi tabadsho Abadauan bēdamboen isembi —quenquo icpampic Nuquin Papa. 3 Nuquin Papan tantiamiac naden Abadauanēn nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bēdamboen isendambi,’ qeshun Nuquin Papan bēdamboen isbempampic icsaisabimboecnuc,” quequin chuipampic. 4 Matsesien adenquo iquec. —Ambi chiacpadomboen nasho ichon yua bēdamboen isquid —nuqui quepec. 5 Nuquin Papambien nadotsiash. Matses icsaboedi: —Bēdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bēdamboen isbentsiash icsaisabimboecnuc. 6 Adembidi Nuquin Papan tantiamiac ambi bēdamboen iste chuiquin con tsusedpa Dabidēn dada uapampic naden.

7 “ ‘Ambi chiaid niac-niacboedēmbi: Bēdambo icquid icquin Nuquin Papan ambi chiacpadomboen naindac,

quequin abi tantiasho Nuquin Papan ëbi bēdamboen isec ëbi
icsaid bēpiscudacimboen.

Icsaisabimboecnuc ëbi bēdamboen isquin ëbi cuidenquo
iquendac,' quia sh matses bēdambo yec cuishonquec.

8 'Abi tantiaquid icsho isash ëbi icsaid bēpiscudash:

Ëmbi chiaid mimbi niac-niacoque. Mibi cuidnu, Nuquin
Papan ëbi cainquo iquendac,' quia sh matses bēdambo
iquec,"

quequin Dabidën chuipampic ëndenquimbo.

9 ¿Shui dēbid dēteshun secaido isadaidboudida Nuquin
Papan bēdamboen ispec? Padenquo. Matses utsibotsen
bēdamboen istsiash. Tantia. Ëmbi chuiboedbidi chuioanu.
Abi tantiaquid icsho Nuquin Papan Abadauan bēdamboen
isbempampic ambi chiaid niac-niacacmaidbimboecnuc.

10 ¿Ambi chiacpadomboen shui dēbid dēteshun secacshoda
Nuquin Papan Abadauan bēdamboen isbempampic?
Padenquo. Shui dēbid dēteshun secabi icsho Nuquin
Papan Abadauan bēdamboen isbempampic.

11 Bēdamboen
isbeshumbic: —Abadauan, ëmbi chiacpadomboen nabenta.
"Nuquin Papan bēdamboen isaido nebi. Aid bēshunchitomane,"
queshun min matsestedi shui dēbid dēteshun secabanta —
capampic Nuquin Papan. Adoac Abadauanën nabempampic.
Aden shui dēbid dētiacmaid icquin Abadauanën Nuquin
Papa tantiacpadomboen nēbi shui dēbid dētiacmaidon
Esus tantiasho Nuquin Papan bēdamboen isendac ambi
chiaid niac-niacacmaidbimboecnuc.

12 Abadauanën
tsyuecquido isadaidbo Abadauambimboecquido Nuquin
Papa tantiaquido abi iquec. —Shui dēbid dētemenēdaid
icsho Nuquin Papan bēdamboen isebe —quenquo icquin
Nuquin Papabēdta Esus tantiasho isadaidbo Nuquin Papan
bēdamboen isaido abi iquec.

Nuquin Papan Abadauan chiaid

13 Ëndenquimboshē Nuquin Papan Abadauan naden
chuipampic. —Abadauan, mibi nibēdanan yuecshun min
tsyuecquid abentsēcshun utsibo bēdambo icmendac. Nidaid
utsi-utsiec yacno tabadquido adoendac —quepampic Nuquin
Papa. —Min tsyuecquid abentsēqui tantiasho matses
bēdamboen isendambi —quequin otacquo tantiaquin Nuquin
Papan adopampic. ¿Ambi chiacpadomboenuidi Abadauanën
nashoda Nuquin Papan aden chuipampic? Padenquo.
Nuquin Papan chiac: —Ai, abimbo caic —queshoen Abadauan
bēdamboen isbeshun Nuquin Papan adopampic. 14 ¿Nēbi: —
Moisesën chiaid niaquesa icsho Nuquin Papan bēdamboen
isebe —quec muaquidoda Nuquin Papan bēdamboen ispadic?
Padenquo. Adec muaquidobi bēdamboen isquin ambi

Abadauan chiaid niactsiash. Adotiapimbo icquin ambi chiapadomboen Abadauanën tsyuecquid tantiaquidoen bēdamboen isec. ¹⁵ —Moisesën chiaid niaquesambo nebi —queboedombi aidën chiaid niac-niacsho isun Nuquin Papan cuidendac. Ambi chiaid niaquesambo nibēdec. Nuquin Papan: —Bēdamboec tabadta —quequin chiaid nibēdnuc ambi aden chiaid matsesën niactiapimbo ictsash. Ambi: —Bēdamboec tabadta —quequin chiaid abi iquec. Aid niaquesambo nibēdec.

¹⁶ Nuquin Papan naden Abadauan chuipampic. — Abadauan, ěmbi chuisho tantiash: “Mimbi abimbo caic,” qesho mibi bēdamboen isquin min tsyuecquido bēdambo icmendambi —quequin chuipampic. Nēbi ambi chuipampicpadomboen naquin Esus tantiaquido Nuquin Papan bēdamboen isec. Nuquin Papan ambi chiaid dada uamepampidën Moisesën tsyuecquido isadaidbon Esus tantiasho Nuquin Papan bēdamboen isec. Abadauanën Nuquin Papa tantiacpadomboen matses utsibontsen Esus tantiasho adembidi bēdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. ¹⁷ Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unēsān yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoaquien: —Abimbo mimbi caic —quequin Nuquin Papa Abadauanën tantiapampic. — Comapenen tantiaquin unēsaid uincuemequidquio icquin ambi chiapadomboen ěbi bacuē tishmendac —quequin Abadauanën Nuquin Papa tantiapampic. Nēbi ambi Nuquin Papa tantiacpadomboen Esus tantiaquido: —Nuquin papabimboecquid Abadauan nec —quepec.

¹⁸ Nuquin Papan: —Min tsyuecquido dadpenquio iquendac —cac: —¿Mitsipadoac aidtedi con tsyuecquido icpec? Ma con bacuēbo nibēdpayoc. Tsusiombo icquin bacuē tishmetiapimbo iquebi —queuidboedi Abadauan nadpampic. — Ai, abimbo mimbi caic —quepampic aton mado nibēdnubi. Adshun tsusioctšēcquio icquimbi aton mado tishmepampic. Nēbi aton tsyuecquido dadpenquio iquec Nuquin Papan chiampicpadequi. ¹⁹ —Con seta dadpenquio 100tedi icnuc tsusiobudtsēcshun ěmbimbo bacuē tishmetiapimbo iquebi. Con chido ěndenquio machobudtsēccondaid icquin bacuē usundotiapictšēcquio iquec —quequin tantiequi: —Nuquin Papan abimboen caosh —quepampic. ²⁰⁻²¹ —Nuquin Papa mue nec —quenquio yec: —Nadatiambo icquid icquin ambi chi-

acpadomboen Nuquin Papan naic —queshun Nuquin Papa tantiatsëcboedëmbi aid tantiaquiopampic. Adshun: —Mibi bëdamboshë iquec, Papa —quequin Nuquin Papa chuipampic. ²² Adsho tantiashun Nuquin Papan bëdamboen isbempampic icsaisabimboecnuc.

²³ Aden Nuquin Papan ambi Abadauan bëdamboen isaid isadaidbo tsusedpa dada uamepampic. ¿Abadauanën naiduidi tantiamenuenda aden dada uamepampic? ²⁴ Padenquio. Nuquitsen Nuquin Papan ambi bëdamboen iste tantiamenuen aden dada uamepampic. Nuquin Icbo Esusbëdta abi uincuemquid Nuquin Papa tantiasho nuquitsen bëdamboen isec. ²⁵ Nuquin Papan tantiacpadec nuqui cuidmenquio icnuec nuqui icsaid bedshunec abided ciudadec Esus unëspanëdash. Aden Nuquin Papa abi tantiaquido bëdamboen ismenuec unësash uincuempanëdash Esus.

5

Esus tantiaquido Nuquin Papan bëdamboen isaid

¹ Aden Esus tantiasho Nuquin Papan bëdamboen isaido yec abi cuidte dacuëdënenquio yec abëdi nuqui bëdamboec tantiananec. ² Ëmbi chuibocpaden abi tantiaquido nuqui cuidmenquio icnuec abided unësquin Esusën Nuquin Papa nuqui bëdamboen ismepec. Adoac nuqui nadpec. —Nuqui bëdamboen isquin unësacsho nuqui abipadquid icsaisa icmequin Nuquin Papan abëdi nuqui tabadmendac —quec nuqui cuishonquec. ³ Nadectsen nuqui cuishonquec. —Esus tantiaquid icsho utsibon chieshënaqui Esus tantiatsëcboedi chieshtoenquio icquin Esus tantiaquidquio yanebi —quectsen nuqui cuishonquec. ⁴ Aden chieshtoenquio icquin Esus tantiasho Nuquin Papan nuqui bëdambo capec. Adoac: —Esus tantiaquid icsho Nuquin Papan ëbi bëdambo icmec. Unësacsho abi yacno ëbi tabadmendac ambi chiacpadomboen —quepec nuqui. ⁵ Adec: —Abi yacno ëbi tabadmendac —quequin Esus tantiaquid ¿ada Nuquin Papan cacumepec? Padenquio. Aton Mayan nuquibëd icmiac paposhquiabimboen nuqui naden tantiec. —Nuquin Papan ëbi bëdamboen tantiaquin abi yacno ëbi puduedmendac —quequin nuqui tantiec.

⁶ Aden matses tantiaquiec Nuquin Papan tantiacpadec Esus nadpanëdash. Matses abitedi abembi bëdamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquio icnuec abided ciudadec Esus unëspanëdash. ⁷ ¿Ada adquid matses icpadic? Padenquio. ¿Cuesanquidën matses bëdambo icquid caic: —Cuesnu —quesho tantiashunda dadpeshun: —Aid cuesenda. Èbiquien cuesta —capatsiash? Padenquio. Bëdamboshë icquid cuesmenquio

icnuen: —Nëid cuesenda. Ëbiquien cuesta —cachitembien ictsiash abentsëcshun. Icsambo icquid icshoen aden chienquio ictsiash. ⁸Padnuen matses abitedi icsamboecuidi tabadnuc nuqui cuidmenquio icnuec Esuquidistu abided cuidadec unëspanëdash. —Nuquin Papan ëbi tantiaquiec —matses camenuen Nuquin Papan aden Esus namepanëdash.

⁹ Nëbi abided cuidadaidquio Esus tantiasho Nuquin Papan nuqui bëdamboen isec icsaisabimboecnuc. Aden bëdamboen isquin Nuquin Papan nuqui cuidtiapimbo iquendac. ¹⁰ Matsesën abi chieshënsho isun aido cuidte bunenquio icquin Nuquin Papan aton Madoded cuidpanëdash. Aden aton Madoded cuidash nëish bëdanshun Nuquin Papan aton Mado tantiaquid bëdamboen isec. Nëbi Nuquin Papan uincuemënëdaid icquin Esusën nuqui bëdamboen tabadmec. ¹¹ Adembidi aidën tantiamiacpadomboen nuqui: —Ëbi cuidenquio icnuen aton Madoded cuidquid bëdamboshë iquiec —quequin Nuquin Papa tantiec nuqui cuishonquiec.

Adanën naidbëdta Esusën naid chiaid

¹² Nuqui bëdamboen ismequid Esus tishabi icnuc abia matses uaidën Adanëmba Nuquin Papan chiaid niacniaquiec icsasho cuidquin aidba Nuquin Papan unësquid icmepampic. Adembidi Adanën tsyuecquido matses abitedi Adan icsacpadecebidi icsate tantiaquimbi Nuquin Papan unësquidoidquio matses icmepampic. ¹³ Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Ëmbi Moises chuimiaid mimbi niac-niaquiec —Nuquin Papa quetiapimbo icnubi matses icsapampic. ¹⁴ Nuquin Papan chuiboedquiobi niaquiec Adamba icsasho Nuquin Papan cuidac unësec taëpampic. Adan unësembic aidën nacpadomboen nabi icsa utsi naiqui matses abitedi icsasho adembidi unësquidoidquio Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidën chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquio Esuquidistu nec.

¹⁵ Matses abentsëcshun Adanëmba Nuquin Papan chiaid niacsho cuidquin aidba unësquid icmeshun aton tsyuecquido matses unësquidoidquio Nuquin Papan icmepampic. Adecebidi Nuquin Papa matses bëdamboen ismequid abentsëc iquiec. Esusuidtsëqui abi tantiaquidotedi cuidmenquio icnuec abided cuidadec unëspac caondash. Nëbi aid tantiasho Nuquin Papan nuqui bëdamboen isec. ¹⁶ Adanën nacbimboen Nuquin Papa matses bëdamboen ismequidën

nambo. Adan abentsëqui icsaquin Nuquin Papa cuidmiac abi unësacpadquiec matses abitedi unësquidombo yanac. Nuquin Papa bëdamboen ismequidëmbien matses icsaid bedshunec abided cuidadquin Nuquin Papa abi tantiaquidotedi bëdamboen ismec icsaisabimboecnuc. ¹⁷ Ambi chuiboediniacquin Adanën Nuquin Papa cuidmiash unësquid yanacpadec matses unësquidouidquio iquec. Esuquidistunuidtsëqui nac Nuquin Papan matses bëdamboen isendac. Nëbi aid tantiasho Nuquin Papan nuqui bëdamboen isquin bëdamboec tabadquid icmendac. Adec bëdamboec tabadec unësash Esusbëdtan Nuquin Papan namiacno bëdamboshë yacnombo nuqui tabadendac.

¹⁸ Adec matses abentsëqui icsasho aidbëdta aton tsyuecquido matses abitedimbo cuidquin Nuquin Papan unësquidouidquio icmepampic. Padnuen Nuquin Papan chiacpadec abentsëqui abided cuidadaidën Nuquin Papa abi tantiaquido bëdamboen ismequin Nuquin Papa yacno tabadmendac. ¹⁹ Nuquin Papan chiaid niac-niaquec Adan icsaic taëambic aton tsyuecquido abitedimbo icsaquidouidquio yanac. Padnuen Nuquin Papan chiaid niaquesambo icquin Esusën Nuquin Papa nuqui bëdamboen ismec. ²⁰ ¿Matses bëdamboen isnuenda Nuquin Papan ambi: —Bëdamboec tabadta —quequin chiaid Moises dada uamepampic? Padenquio. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bëdamboen isec. ²¹ Taëc matses icsasho cuidac unësquidouidquio yanac. Adsho isun matses bëdamboen isnuen Nuquin Papan ambi chiaid niaquesambo Esused cuidac. Nëbi Nuquin Icho Esuquidistu tantiasho Nuquin Papan nuqui bëdamboen isec icsaisabimboecnuc. Nuqui unësacsho abëdi tabadmendac padpidec unëstiapimbo icnuc.

6

Esus tantiaquid bëdamboec tabadquid, quiaid

¹ Nuquin Papan bëdamboen iste ëmbi chuisho tantiashun naden tantienda. —Icsaido cuidmenquio icnuec abided Esus ciudadec unësapanëdash. Aid tantiasho Nuquin Papan bëdamboen isquin nuqui cuidtiapimbo iqueque. Aden bëdamboen isaqui icsaquionona —quequin tantienda. ² Esus tantiaquido adesambo nec. Esus tantiec icsateuidi nuqui bunenquio yanec. ³ ¿Tantienquioda ique? Naden chuiquin mimbi acten mentomiac. —Ëbi cuidmenquio icnuec abided ciudadec unësaid Esus tantiaquid nebique. Ambi chiacpadec

tabadtiadquio iquebique. Utsibo ismenu —quequin mimbi acten mentomiac. Adec Esus unësaid tantiequi icsaboedobi icsate bunenquio nuqui yanec. ⁴ Aden Esus abided ciudadec unësaid tantiasho Nuquin Papan utsiac bimboecnuc nuqui icmec. Esus unësacsho comapenen tantiaquin Nuquin Papan uincuemepac caondash. Adembidi comapenen tantiaquin Nuquin Papan utsiac bimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bëdamboec tabadcuenec.

⁵ Adec abided ciudadec unësaid tantiec icsate bunenquio yanquid yec Esus uincuemiabimboen comapenen tantiaquin Nuquin Papan utsiac bimboecnuc icmiaidtsen nuqui nec. ⁶⁻⁷ Esus tantiabi yec icsaquido icboedi matses icsaid bedshunec Esus unësaid tantiec nuqui icsate bunenquio yanec. Mëtaniaid abibi mënchiquidtiapimbo yac bimboec matses abembi icsaic ënëdtiapimbo iquec. Adboedi Esus tantiec nuqui icsate bunenquio yanec.

⁸ Adec Esus unësaid tantiec icsainquio yanec nuqui nadpec. —Nuquin Papan uincuemiaidën Esusën nuqui bëdamboen tabadmec. Unësacsho Nuquin Papa yacno abëdi nuqui tabadmendac —nuqui quepec. ⁹ Nuquin Papan uincuemiab Esus padpidec unëstiapimbo iquendac. Aton dada unësquid icboedi unëstiapimbo icquid yanac. ¹⁰ Matses icsaido cuidmenquio icnuec abided abentsequi ciudadec Esus unësac caondash padpidec unësenquio yec. Adsho uincuemiab Nuquin Papan chiacpadomboen nabanec aïdbëd tëshnanenquio yec tabadec.

¹¹ Ëbi adsho tantiash nadta. —Ëbi cuidmenquio icnuec abided ciudadec unësacsho uincuemiaid Esus ëbëdi iquec. Aid tantiec icsainquio yanebi. Ambi nacpadec tabadtiadquio iquebi —queta. ¹² Icsamboec tabadenquio icnuna. Nuqui icsate bunaid nainquio icnuna. ¹³ —Icsaquionona —quesho tantiash: —Padi —quenuna. Unësac bimboen Nuquin Papa tantienquio ictenedëmbi uincuenac bimboen Nuquin Papa nuqui tantiabenondaque. Ambi chiacpadece bëdamboequien tabadtiad. ¹⁴ —Nuquin Papan ambi: “Bëdamboec tabadta,” quequin chiaid Moises dada uamiactedi naquin ëmbimbo Nuquin Papa bëdamboen ismembi —quenquio icquin Esus tantiasho Nuquin Papan nuqui bëdamboen isec. Ambi bëdamboen isaido yec nuqui icsate bunenquio nuqui yaneque. Bëdamboec tabadnuna.

¿Tsuntsin yuabo Esus tantiaquido icpec? quequin chiaid

¹⁵ —Aden Nuquin Papan nuqui bëdamboen isec —quequin ëmbi chuisho tantiashun naden icsamboen tantienda. —Nëbi abided cuidadaid Esus tantiasho ëbi bëdamboen isec.

Ēbi cuidtiapimbo iqueque. Ambi chiaid niac-niaquec ic-sabudquionona —quequin tantienda. Esus tantiaquid ade-sambo nec. ¹⁶ ¿Tantienquioda ique? Ichon chiacpadomboen yuan naquid. Icsamequidēn tantiacpadomboen icsamboen naquid aton yua nendac. Aidēn yua icquin icsaid ėntiapimbo yec unēsash icsano nidendac. Nuquin Papan yuain ambi chiacpadec bēdamboec tabadcuenendac. ¹⁷ Mibi adec tabadsho isun: —Esus chuibanac icsaid ėntiapimbo icboedi Esus tantiabēnash Doma yacnocquido bēdamboec tabadcuenac. Aden namec mibi bēdambo iquec, Papa —quequin Nuquin Papa chiombi. ¹⁸ Satanasēn yua icquin mimbimbo mibi icsaid ėntiapimbo icsho Nuquin Papan nac ambi chiacpadquiec mibi bēdamboec tabadcuenac.

¹⁹ —Matses icquin: “Nuquin Papan chiaid tantiadenquo iquec,” canushe —quequin bēdamboen tantiamenuen mimbi tantiaid yuan naid mibi chiombi. Satanasēn yua yec icsateuidi bunquiec mibi icsaded-icsadedondac. Adec icsamboshē iccondaiddi nēbi Nuquin Papan chiacpadequien bēdamboec tabadtiad. ²⁰ Satanasēn yua yec icsaquiec Nuquin Papan chiacpadec bēdamboec tabadtiapimbo mibi iccondac. ²¹ ¿Ada bēdamboec tabadonda? Ma mibi chieshēmēnquiec tabadteneyoc. —Ēbi chieshēmēnquiec tabadondaiddi tantiashun: “Mibi icsambo iquec,” ėbi canushe —queshun mimbi naondaiddi ma mimbi chienquo iccondac. Icsaid ėnabi yec unēsash icsano mibi nidtsenac. Adecbidi icsaid ėnenquo icquido unēsash icsano nidendac. ²² Nēbi nuqui Esus tantiasho Nuquin Papan aton yuabo nuqui icmiac. Adoac icsaid ėntiapimbo icboedi nēbi nuqui bēdamboec tabadcuenec. Adquid unēsacsho Nuquin Papan abēdi tabadmendac. ²³ Icsaido cuidquin Nuquin Papan icsano nidmendac. Abided cuidadec unēsaid Esuquidistu Nuquin Icho tantiasho Nuquin Papan nuqui bēdamboen isquin unēsacsho abēdi tabadmendac.

7

Bēdamboec tabadte chuinuen chido bēnēchoquid Pabadon chiaid

¹ Con utsibobimboecquido mibi neque. Tantia. Padpiden mibi chuinu. Naden chiaid mimbi tantianēdac. —Nuquin Papan dada uamiac Moisesēn chiampicpadomboen matsesēn naquid. Unēsun aidēn chiaid natiapimbo iquec —quequin mimbi tantianēdac. ² Nuquin Papan chiacpadomboen inaidēn aton bēnē nianesa. Dada utsi chudmesa chidon. Bēnē unēsambien niante dada utsin bedadquid. ³ Bēnē

unēsabi icnubi aton bēnē nianquin dada utsi bedanec cue-nacsho: —Icsambo iquec. Nuquin Papan cuidtequid nec —cabededtsiash. Bēnē unēsambien dada utsin bedadquid chido. Aden bedacsho Nuquin Papan: —Mibi cuidnu —cainquo ictsiash.

⁴ Adecbidi ambi chiaid niac-niacsho Nuquin Papan cuidt-senaido nuqui iccondac. Adondaiddi abided cuidadec unēsaid Esus tantiasho Nuquin Papan: —Mibi cuidnu —nuqui cainquo iquendac. Aden Nuquin Papan uincuemēnēdaidēn Esusēn aton yua nuqui icmequin bēdamboec tabadquid icmenuen nuqui icsaid bedshumpanēdash. ⁵ Esus tantiabi yec nuqui bunacpadecuidi nuqui icsapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unēsacsho icsano nidmequin Nuquin Papan nuqui cuidt-senēdash. ⁶ Esus tantiabi yec nuqui nadondac. —Moisesēn chiacpadec bēdamboec tabadsho Nuquin Papan nuqui bēdamboen istsiash. Ambi chiaid niac-niacsho nuqui cuidendac —quiondaiddi nēbi Esus tantiec nuqui adenquo iquec. Nēbi Nuquin Papan Mayanēn tantiamiacpadec nuqui bēdamboec tabadec.

Icsaquid nebi, quequin Pabaddon chiaid

⁷ —Nuquin Papan ambi chiaid Moises dada uamepampid icsambo iquec —¿quectabi ique? Icsapenquo iquec. Nuquin Papan ambi chiaid Moises dada uamiaid isun: —Nuquin Papan chiaid niac-niaquec icsachitobi —quequin nuqui tantiec. “Utsin na isash: ‘Con na adquid nibēdec,’ quec chieshēmēnenda,” quequin Nuquin Papan Moises dada uamiaid isun: —Adec icsachitobi —quequin tantiabenondambi. Nuquin Papan ambi chiaid Moises dada uamiabi icnuc: —Nuquin Papan chiaid niac-niacchitombi —quequin tantienquiemi ictsenchitondac. ⁸ Utsin na isash: —Adquid con na nibēdec —quiash chieshēmēntsēchoedi Nuquin Papan: —Adenda —quequin chiaid tantiashi icsaquid yec utsin na comapenec bunquiec chieshēmēnquiondabi. Nuquin Papan chiaid nibēdnuc: —Adec icsachitobi —quequin tantienquo ictsenondambi. ⁹ Nuquin Papan chiaid tantiabi yec Nuquin Papan cuidte dacuēdēnenquo yec: —Bēdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaquec icsachitobi. ¹⁰ Adquid Nuquin Papan cuidendac —nuqui quianondac. —Ma bēdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bēdamboec tabadenquo iccobi. Icsachitobi. Adquid Nuquin Papan cuidendac

—nuqui quianondac. ¹¹ —Ambi chiacpadomboenuidi nashobini Nuquin Papan bēdamboen isec —quec muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. ¹² Aden nuqui abimbo tantiamequid Nuquin Papan chiaid bēdambo iquec. Icsaisambo icquin Nuquin Papan bēdamboen chuipampic.

¹³ ¿Nuquin Papan chiaid isbanashta matses Nuquin Papan cuidtequido yanactic? Padenquio. Matses Nuquin Papan cuidtequido yanambic Nuquin Papan ambi chiaid dada uamepampic. —Nēid isash: “Icsamboequini tabadchitec,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchitec. Nuquin Papan nuqui bēdamboen istiapimboen icchitec. Èbien cuidchitec —nuqui quianondac. ¹⁴ Nuquin Papan Mayanēn tantiamiacpadomboen con tsusedpan Nuquin Papan chiaid dada uapampic. Adembidi aton Mayanēn namiac Nuquin Papan chiacpadec nuqui bēdamboec tabadtsiac. Aidēn namiabi mētaniaid abibi mēnchiquidtiapimbo yacimboen icsaquido icquin Nuquin Papan chiacpadomboen natiapimbo nuqui iquec. ¹⁵ —Nuquin Papan chiacpadomboen nanu —queboedombi natiapimbo nuqui iquec. Adecbidi: —Utsibo icsacpadec icsainquio iquendabi —queboedobi nuqui adec icsachitec. Adash: —¿Atotsieshumbimbi adopoba? —quepec nuqui. ¹⁶ —Nuquin Papan chiaid bēdamboen icchitec. Aidēn chiaid niacte bunenquio iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. ¹⁷ Bēdamboecuidi tabadtiadquidini icsaquid yec ēbemi icsadenechitec. ¹⁸ —Bēdamboec tabadnu —queboedi icsaquid yec ēbemi bēdamboec tabadtiapimbo iquebi. Icsaquidini nec. ¹⁹ —Bēdambo icte bunebi —queboedi ēbemi bēdamboec tabadtiapimbo iquebi. —Icsate bunenquio iquebi —queboedi ēbenquiobi icsaded-icsadedebi. ²⁰ Icsate bunenquio icboedi icsaquid yec ēbemi bēdamboec tabadtiapimbo iquebi.

²¹ —Adquid nebi. Nuquin Papan chiacpadec bēdamboec tabadtiadquidi badedquio icsaded-icsadedebi —quequin tantiembi. ²² —Nuquin Papan chiaid bēdambo iqueque. Ambi chiacpadec ēbemi bēdamboec tabadnu —queboedi ²³ icsaquid yec ēbemi bēdamboec tabadtiapimbo iquebi. Mētaniaid abembi mēnchiquidtiapimbo yacimboen ēmbi naid ėntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. ²⁴⁻²⁵ Adquid yec shubitiadquio icchitebi. Icsaquid yec:

—¿Mitsipadequini bēdamboec tabadpeba? —queboedi: —
 Abi tantiasho Esuquidistumbini bēdamboen tabadmec —
 quianondabi. Adshun Nuquin Papa naden chiembi. —Ēbi
 bēdamboen tabadmequid Esus mimbi ěbi tantiamiac. Mibi
 bēdambo iquec, Papa —quequin Nuquin Papa chiembi.

8

Nuquin Papan Mayanēn namiaid

¹ Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquio iquendac Nuquin Papan. ² Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniac aidēn tantiamiacpadec nuqui bēdamboec tabadanendac. ³ —Moisesēn chiapadec bēdamboec tabadec unēsash Nuquin Papa yacno tabadebi —queboedi icsaquido yec abembi bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided ciudadec unēsapanēdash. ⁴ —Abided cuidadaid con Mado Esus tantiasho bēdamboen isquin con Mayan matses menendambi. Adoac aidēn tantiamiac ěmbi Moises chuimiampicpadec bēdamboec tabadendac. Matses abi icsate bunacpadec icsainquio yec bēdamboec tabadendac —queshun Nuquin Papan Esused cuidpac caondash.

⁵ Adec Nuquin Papan Mayanēn tantiamiaid Esus tantiaquid Nuquin Papan tantiacpadec bēdamboec tabadte bunec. Padnuen icsaquid: —Ēbi bunaid nanu —quequin ambibi tantiacpadec icsaic. ⁶ Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanēn tantiamiacpadec tabadquid Nuquin Papan cuidte dacuēdēnenquio yec bēdambo yec unēsash Nuquin Papa yacno tabadendac. ⁷ —Icsate bunquidēn ěbi chieshēnec. Ambi naiduidtsēqui naquin ěmbi chiapadomboen natiapimbo iquec —queshun Nuquin Papan cuidendac. ⁸ Adquido chuiquin: —Mibi bēdambo iquec —catiapimbo Nuquin Papa iquec.

⁹ Esus tantiaquidien adesa nec. Esus tantiasho Nuquin Papan aton Mayan nuqui meniac aidēn tantiamiacpadec nuqui bēdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusēn Mayambidi nec. ¹⁰ Abided cuidadaid Esus tantiasho bēdamboen isquin Nuquin Papan aton Mayan meniaid yec abēd tabadtequido nuqui nec. Icsaquido yec matses abitedi

unësquidombo icnubi Esus tantiaquid unësacsho Nuquin Papan abëdi tabadmendac. ¹¹ Esus uincuemequidën Nuquin Papan ambi aton Mayan meniaido unësacsho nuqui uincuemequin nuquin dada utsi uaindac. Aton Mayan nuquibëd tabadsho isun nuqui adoendac.

¹² ¿Ëbi adsho tantiashta Esus tantiaquid abi bunacpadequi icsapac? Padenquo. Bëdamboec tabadte bunec. ¹³ Utsiboen abi bunacpadec icsamboecuidi tabadec unësacsho cuidquin Nuquin Papan icsano nidmendac. Nuquin Papan Mayanën tantiamiacpadec tabadquin nuqui icsaid nuqui ënec. Adash unësash Nuquin Papa yacno nuqui tabadendac.

¹⁴ Aden aton Mayanën bëdamboec tabadmiaido Nuquin Papan: —Con mado nec. Con champi nec —capendac. ¹⁵ ¿Icbo icsambo icquidën yua dacuëdmiacbimboenda Nuquin Papan Mayanën nuqui dacuëdmec? Padenquo. Nuqui bëdambo icmec. Aidën tantiamiacpadomboen Nuquin Papauidtsëqui papa nuqui capec. ¹⁶ Aden Nuquin Papan Mayanën: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. ¹⁷ —Con mado nec. Con champi nec —queshun nëbi Nuquin Papan nuqui bëdamboen isquin unësacsho abëdi tabadmequin nuqui bëdamboshë icmendac. Utsibon chieshënac chieshtoenquo yec unësacsho Nuquin Papan abëdi tabadmequin Esus bëdamboshë icmiac. Adembidi Esus tantiaquid icsho utsibon chieshënaqui chieshtoenquo icquin Esus tantiequi unësacsho Nuquin Papan abëdi tabadmequin nuqui bëdamboshë icmendac. Nuquin Papa yacnombo Esuquidistun natedi nuquin na nendac.

Nuquin Papan bëdamboshë icmete chiaid

¹⁸ Adec Nuquin Papa yacno nuqui bëdamboshë icte tantiaquin nuqui nidaidën natiac tabadaiduidi ma nuqui tantiatiapimbo iqueyoc. ¹⁹ Aden Nuquin Papan nuqui bëdamboshë icmete tantiec ambi uaid utsitedi nidaidën icquidtedi aben icquidtedi: —Nëbimbobi bëdambo icmepashuni —quededquededec tabadec. ²⁰ Abia matses uaid Adan icsasho cuidquin ambi uaid nidaidën icquidtedi Nuquin Papan unësquiduidquo icmepampic aidon: —Padi —catiapimbo icnuc. ²¹ —Yuecshun ëmbi Esus tantiaquido uincuemequin aton dada utsi uacpadën ëmbi uaido utsi nidaidën icquidtedi chodquete icboedi utsi uain bëdamboshë icmendambi —quequin tantiaquimbi unësquiduidquo icmepampic. Aden Nuquin Papan chiaid tantiaquin ambi uaidon nidaidën icquidtedishun aton dada abi bëdambo icmete tantiaquin

cainec tabadec. ²² Unëstiapimbo icte bunec unësquid yec: — ¿Tedectsicshun Nuquin Papan nuqui utsi uapeba? Nëbimbobi Nuquin Papan utsi uapashuni —queded-quededec Nuquin Papan uaidtedi. Bacuë tishquid bacuë paëmbo icnuc: — Badedquio tishmepashuni —quiacbimboec adpec. ²³ Nuquin Papan meniaidën aton Mayanën tantiamiacpaden nuquitsen naden chiec. —Con dada utsi uaquin unëstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unëstiapimbo icquid icmendac —queded-quededquin nuquin dada utsi uate tantiaquin nuqui cainec. ²⁴⁻²⁵ —Esus tantiaquido unësacsho Nuquin Papan nuquin dada utsi uaindac —quequin tantiaquin nuqui Esus tantiabenondac. Nuquin dada utsi uabi icnubi: — Nëbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquio iquendac.

²⁶ —Aden aton dada utsi uate tantiaquin yuen cainec chieshtonoshe —qeshun Nuquin Papan Mayanën nuquibëd icquin bëdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquio icsho isun Nuquin Papan Mayanën abi chiec. Unësquio icnuc onquenquio icquin chiec: —Mimbi tantiacpadomboen aid matses bëdambo icmeta, Papa —quequin Nuquin Papan Mayanën nuqui comapenen chuided-chuidedec. ²⁷ Aden Nuquin Papan: —Ma Esus tantiaquido bëdambo icnu —quequin tantiaidbidi aton Mayanën onquenquio icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

Nuquin Papan nuqui bëdambo icmiaid

²⁸ Aden tantiashun nuqui naden tantiec. Ambi tantiamiacpadomboen abi tantiaquido bëdambo icmete bunquin Nuquin Papan bëdamboen nashunec. Unësquio yec tabadsho aden naic. Natiambo icsho adembidi naic. Cuishonquesho adembidi naic. ²⁹ Ëndenquimboshë nidaid uabi yequi Nuquin Papa nadpampic. —Ëmbi tantiactedi ëbëdta con Mado tantiaquid icmequin Esuspadquio icnuc bëdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquio icnuc bëdambo icmenuen Nuquin Papan naic. ³⁰ Ëndenquimboshë nidaid uabi yec: —Yuecshun naindami —abi quiampicpadomboen Nuquin Papan nuqui Esus tantiamiac. Adoac nuqui cuidmenquio icnuec abided cuidadaid Esus tantiasho Nuquin Papan nuqui bëdamboen isec isaisabimboecnuc. Nuqui

bëdamboen isquin nuqui bëdamboen tabadmec. Unësacsho nuqui unëstiapimbo icquid icmeshun abëdi tabadmendac.

³¹ ¿Embi aden chiaidtedi tantiashta Esus tantiaquido dacuëdpec? —Nuqui cudasquin Nuquin Papan nuqui bëdambo icmendac. Èbi chieshënquidën: “Cuid,” cac Nuquin Papan ëbi cuidenquio ictsiash —quec nuqui dacuëdenquio iquec. ³² Nuquin Papan nuqui tantiaquiec. Aton Madombo cudasenquio icquimbi nuqui cuidenquio icnuen aton Madoded cuidquin unës uamepanëdash. Adshumbic Esus tantiasho ënenquio icquin bëdamboen isquin nëbi bëdambo icmequin unësacsho abëdi tabadmequin nuqui bëdamboshë icmendac. ³³ ¿Nuquin Papan nuqui bëdamboen isquidëmbida nuqui cuidpec? Padenquio. ¿Utsibo nuqui caic: —Icsambo iquec —qeshobida Nuquin Papan nuqui cuidpec? Padenquio. ³⁴ ¿Esusëmbida nuqui cuidpec? Abi tantiaquido cuidmenquio icnuec abided ciudadec Esus unësac caondash. Unësacsho Nuquin Papan uincuemiac Nuquin Papa yacnoshon aidëmbi abi tantiaquido chianec. —Èbi tantiaquido bëdamboen isquin cuidenda, Papa —quequin Nuquin Papa chianec tabadec. ¿Adquidënquiobida nuqui icsano nidmequin cuidpec? Padenquio. ³⁵ Nuqui bëdamboen isquin ënenquio icquin Esusën nuqui tantiaquiec. ¿Shubisho isunda Esusën nuqui tantienquio icpec? Padenquio. ¿Dacuëdshoda Esusën nuqui tantienquio icpec? Padenquio. Adembidi nuqui tantiaquiec. Utsibon chieshënsho bëdamboen isquinc pete natia bunsho bëdamboen isquinc nuquin dashcute nibëdsho bëdamboen isquinc nuqui Esusën caindac. —Èbi acshunendac —quesho bëdamboen isquinc chieshëmënquidon: —Cuesunenu —casha bëdamboen isquinc nuqui caindac Esusën ënenquio icquin. ³⁶ Aden utsibon Esus tantiaquido chieshënte chuiquin Nuquin Papan dada uamepampic naden.

“Mibi tantiasho ëbi: ‘Cuesunenu,’ caded-cadedec uimanëmënquidon.

Aben icquidbimboecnuc: ‘Cuesunenu,’ caded-cadedebi, Papa,”

quequin Nuquin Papan chiaid dada uapampic Esus tishabi icnuc.

³⁷ Aden utsibon nuqui chieshënsho Esuquidistun nuqui bëdamboen tantiaquiec. Shubisho abi nuqui tantiamec. Adoac Esus tantiatsec shubiquimbi chieshtoenquio icquin nuqui Esus tantiaquiec yanendac. ³⁸⁻³⁹ Nuquin Papantsen ënenquio icquin nuqui tantiaquiec. Nuquin Icho Esus tantiasho Nuquin Papan nuqui bëdamboen isec. Unësacsho nuqui bëdamboen tantiatsiash. Unësabi icsho nuqui bëdamboen

isec. ¿Nuquin Papan abi yacnoshon uaid mayan bēdan: —Aid tantienda —cashoda nuqui Nuquin Papan tantienquo yampatsiash? Padenquo. Adembidi nuqui tantiaquiotsiash. ¿Podobitsi icsabon icbo Satanasēn: —Aid tantienda —cacta Nuquin Papan nuqui chieshēmpatsiash? Padenquo. Adembidi nuqui tantiaquiotsiash. Nēbi nuqui bēdamboen tantiec. Yuecshun adembidi nuqui bēdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiash. Abuc nidacsho Nuquin Papan nuqui bēdamboen tantiatsiash. Nidaid uquēducquo nidacsho adembidi nuqui bēdamboen tantiatsiash. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bēdamboen tantiatsiash ēnenquo icquin.

9

Pabadon aton matses isadaidbo chiaid

¹⁻² Aden con matses isadaidbo tantiaquid Nuquin Papa nec. —Aden abi tantiaquidi con matsesēn bēdamboen tantienquo iquec —quiash shubitiadquo iquebi. Muainquo iquebi. Esus tantiaquid icsho Nuquin Papan Mayanēn tantiamiaid icquin abimbo chiembique. Tantiata. ³ Con matses isadaidbo tantiec unēsquo yec tsadebi. Nuquin Papan: —Min matses abitedi cuidenquo icnuen mibiuidtsēqui Esusbēd tabadmenquo icquin icsano nidmequin cuidnu —capatecnēdani. Adoac: —Ai, con matses cuidenquo icnuen ēbided cuid —quetsenondabi. ⁴ Con matses tsusedpa Acobo caid Nuquin Papan Isadaid caidēn tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibēdi tabadebique. Mibi ismenu —quequin con matses tabadacno abu ushu bēchamauanquiequid chomequin ismepampic. Adashic nadpampic. —Ēmbi chiacpadec bēdamboec tabadsho mibi bēdamboen isquin bēdambo icmendambi. Mibi nianenquo iquendambi —queshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquo ictequid chuiquin: —Mibi bēdambo icmendambi —quequin Nuquin Papan con matses chuipampic ēndenquimboshē. ⁵ Abadauan chuiquinc Isac chuiquinc Acobo chuiquinc capampic. Ambi chiacpadomben Isadaidbon chidon tishac Esuquidistu matsesac caondash. Nuquin Papapadquidquibi yec abitedishun Icho yec matsesac caondashe. Esus chuiquin: —Nuquin Papa padquibi yec mibi bēdamboshē iquec —canuna ēnenquo icquin.

⁶ Ĕmbi chiacpaden Esus tantienquo icsho Nuquin Papan con matses dadpen bēdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquo icquin con matses bēdamboen istiapimbo iquec —¿quetabi ique? Padenquo. Nuquin Papan abimbo chuipampic. Isadaidbo dadpenshun Nuquin Papa bēdamboen tantienquo iquec. Ambi tantiactedishun abi tantiasho ambi chiacpadomboen Nuquin Papan bēdamboen isec. ⁷ Ĕndenquimboshē con tsusedpa Abadauanēn mēdaidtedi adembidi Nuquin Papan bēdamboen isambo. Abadauanēn mado abentsēqui Isac caic: —Aidēn tsyuecquido ěmbi mibi cuēnacpadomboen con matses caindambi —quequin Nuquin Papan chuipampic. ⁸ ¿Abadauanēn bacuēbotedishun tsyuecquidotedida Nuquin Papan con matses caido nepec? Padenquo. Ambi chiacpadomboen Isaquēn tsyuecquido Nuquin Papan con matses caido nec. ⁹ Naden Nuquin Papan Isac tishite chuipampic. “Ĕmbi tantiacpadēn choashun ěmbi namiac Sadan min chidon dada bacuē tishendac,” quepampic Nuquin Papa Abadauan chiec.

¹⁰ Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquēn bacuē abi ushēmbi daēd tishite chuipampic. Adnubien con tsusedpa Isaquēn aton chido Debeca caid bedshun chudquin dada bacuē daēd usundomepampic Nuquin Papan chiacpadomboen. ¹¹⁻¹² Aid dada bacuē daēd tishabi icshobi Nuquin Papan ani naden chuipampic. “Ĕmbi tantiacpadquid min madon utsimpi bēyucquidbimboecquid nendac,” quepampic. Aid daēd tishabi bēdamboec tabadtiapimbo icnubi: —Tishacsho ěmbi tantiacpadembi tsyuec tishsaidēmpi abentsēqui bēdamboen isendambi —quequin tantiec adpampic Nuquin Papa. ¹³ Adembidi Isaquēn mado chuiquin Nuquin Papan ambi chiaid dada uamepampic. “‘Acobouidtsēqui tantiaquioquin aton buchimpi Esau bēdiactsēc tantiatsendambi,’ quepampic Nuquin Papa,” quequin dada uamepampic.

¹⁴ ¿Ĕmbi aden chuisho tantiashtabi: —Nuquin Papa icsambo iquec —quetabi mibi ique? Ma Nuquin Papa icsapenquo icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bēdamboen isec. ¹⁵ Aden Nuquin Papan con tsusedpa Moises chuipampic. “Embi tantiactedi matses bēdamboen isendambi. Aidedi cuidenquo iquendambi,”

quequin chuipampic. ¹⁶ ¿—Ĕmbembi nasho Nuquin Papan bēdamboen istiashtabi —quec matses bunacpadenda Nuquin Papan matses bēdamboen ispec? Padenquo. Ambi

tantiactedishun abi tantiasho Nuquin Papan bēdamboen isendac. ¹⁷ Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuiampic. “Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquio nec, ma ëbi canu,’ quequin mibi chuiquid dapa icmiondambi. Mibi icsasho pacuënēdabimboecnuc mibi icmambi,” quequin Nuquin Papan padaon chiaid Moisesën dada uapampic. ¹⁸ Aden ambi tantiacpadomboen utsi-utsien icsaido pacuënēdabimboecnuc icmequin abi tantiamenquio iquec. Adembidi utsi-utsien bēdamboen isquin abi tantiamec.

¹⁹ ¿Ëbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesën nainquio icpadic? —¿quecta ique? ²⁰ ¿Matses icquinda mimbi Nuquin Papa chushcapatia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique? ²¹ ¿Ada abi nacnenquid matsun chushcapadic? Padenquio. Matsu nacnenquidën ambi tantiacpadomboen nacnenendac. —Nëid nidaid tēshē tēchu bēdambo icquid acte uetequid nacnenu. Nëid nidaid tēshē matsumpi icsactsēcquid opa acmete nacnenu —quequin matsu nacnenquid. Aden ambi tantiacpadomboen nidaid tēshun nacnenquid.

²² Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquio nebi. Adquid icquin icsaido cuidquid nebique. Ismenu —queboedëmbi ambi cuidtequido baded cuidenquio iquec. Ambi ëndenquimboshë tantiacpadomboen aido icsano nidmendac. ²³ —Ma ëmbi bēdamboen isaidon naden tantianu. “Icsaisambo icquin matses bēdamboen iste bunquin Nuquin Papan icsaido badedi cuidenquio iquec,” quequin ma tantianu —queshun icsaido badedi cuidenquio iquec. Ambi ëndenquimboshë tantiacpadomboen ambi bēdamboen isaido abëdi tabadmendac.

²⁴ Aden ambi tantiacpadomboen Esus tantiasho Nuquin Papan nuqui bēdamboen isec. Isadaidbon abi tantiasho bēdamboen isquinc isadaidpembo matses utsibon abi tantiasho bēdamboen isquinc nuqui caindac. ²⁵ Ambi matses utsibotsen aden bēdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi.

Adembidi ëmbi bēdamboen tantiacmaidobi matses utsibo bēdamboen isbenendambi,”

quequin Nuquin Papan chiaid dada uashun ²⁶ nadentsen dada uapampic.

“Matses utsibo ambi con matses cacmaidobi ambi tantiacpadën aido abentse-abentsen Nuquin Papan bëdamboen isendac.

Bëdamboen isquin: ‘Con mado nec. Con champi nec,’ caindac,” quequin Nuquin Papan matses utsibo bëdamboen iste chuiquin dada uapampic.

²⁷ Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasën naden dada uapampic. “Masitedi dadpenquo caidnëdaido isadaidbo daëdpectsëcshun abi tantiasho bëdamboen isquin aitedtsëqui Nuquin Papan cuidenquo iquendac.

²⁸ Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasën dada uapampic. ²⁹ Nuquin Papan chiaid padpiden dada uquin isadaidbo cuidte Isayasën chuipampic naden.

“Shubu dadpen icquid Sodoma caid yacnocquidobëdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibëdquieic iquendac.

Adembidi con matses Nuquin Papan uesquin cuidtsempanëdash.

Abitedishun Icbo icquin con matses nibëdquiecnuc cuidtsempanëdash. Dadpen cuidquin daëdpectsëc cuidabi icpanëdash,”

quequin dada uapampic Isayasën.

Isadaidbo bëdamboen istiapimbo icte chiaid

³⁰ Aden Isadaidbo dadpenshun abi tantienquo icsho Nuquin Papan bëdamboen istiapimbo iquec. Padnuen matses utsibo: —Mabi Nuquin Papan bëdamboen isnu. Ambi chiacpadec bëdamboec tabadnu —quesabobi: —Ëbi cuidmenquo icnuec abided ciudadec unësaid Esus bëdamboshë iquec —quesho Nuquin Papan bëdamboen isec icsaisabimboecnuc. ³¹ Isadaidboen: —Moisesën chiampiduidi ëmbembi nasho Nuquin Papan bëdamboen isebe —queboedombi nainquo icsho Nuquin Papan bëdamboen istiapimbo iquec. ³² ¿Atotsieshun Nuquin Papan isadaidbo bëdamboen istiapimbo icpec? —Ambi chiacpadomboenuidi ëmbembi naquin Nuquin Papa bëdamboen ismembi —queboedombi adotiapimbo icquin Nuquin Papa bëdamboen ismequidquo Esus chieshë nec. Adsho Nuquin Papan bëdamboen istiapimbo iquec. ³³ Esus tishabi icnuc isadaidbon

Esus chieshēnte chuiquin Nuquin Papan con tsusedpa naden dada uamepampic.

“Buintad bēdambo icquid istuidash: ‘Nēidquio shubu uanun nitsinemi,’ quiac bimboen

Edusaden yacno ēbi bēdamboen ismequidquio isadaidbobēd tabadmendambi.

Adec tabadsho anocquidon chieshēnendac.

Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudac bimboec

ēbi bēdamboen ismequid tantienquio yec unēsash icsano nidendac.

Aid tantiaquido: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi,”

quequin Nuquin Papan ambi chiaid dada uamepampic.

10

¹ Con matses isadaidbo tantiac unēsquio icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bēdamboen ista, Papa —quequin Nuquin Papa chianiombi. ² Esus tantiabi ēmbi chuidenecpadomboen chiec: —Nuquin Papan chiacpadomboenuidi naquin Nuquin Papa bēdamboen ismembī —quetsēchoedombi con matsesēn Nuquin Papa bēdamboen ismete tantienquio iquec. ³ —Abided cuidadaid Esus tantiasho Nuquin Papan bēdamboen isebe —quetiadquidi icsamboen tantiec. —Nuquin Papan: “Bēdamboec tabadta,” quequin chiaid Moisesēn dada uactedi naquin Nuquin Papa bēdamboen ismembī —quequin icsamboen tantiaquin Nuquin Papan tantiacpadomboen nainquio icquin Esus tantienquio iquec. ⁴ Esusuidtsēqui Nuquin Papan: —Bēdamboec tabadta —quequin chiaid Moisesēn dada uactedi naquidquio nec. Adec icsaisa yec matses icsaid bedshunuec abided ciudadec unēsac caondash. Nēbi Esus tantiasho Nuquin Papan matses bēdamboen isec icsaisabimboecnuc.

⁵ Nuquin Papan chiaid dada uaquin Moisesēn chuipampic naden. “Ambi chiacpadomboenuidi naquid Nuquin Papan bēdamboen isquin abēdi tabadmetsiash,” quequin Nuquin Papan chiaid Moisesēn dada uapampic. ⁶ Aden ambi chiacpadomboenuidi natiadquidombi natiapimbo icsho Nuquin Papan matses bēdamboen istiapimbo icpanēdash. Nēbi abided cuidadaid Esus tantiasho nuqui bēdamboen isec. Adoac Esus tantiaquido nadenquio iquec. —Nuquin Papa yacno nidshun ḡtsuntsin Nuquin Papa nuqui bēdamboen ismepatsiashba? —quenquio nuqui iquec. —Esusquio Nuquin Papa bēdamboen

ismequidquio nec —quequin nuqui tantiec. ⁷ Aden tantiec: —¿Tsuntsin Nuquin Papa bēdamboen ismequidquio uincuemepatsiashba? —quenquio nuqui iquec. —Abided cuidadec unēsacsho Esus uincuemiac caondash —quequintsen nuqui tantiec. ⁸ Aid tantiasho Nuquin Papan nuqui bēdamboen isec. Ambi bēdamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiemi,’ qesho Nuquin Papan mases bēdamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bēdamboen isec. Aden nuqui bēdamboen ismequid Esus chuibenequid nebi. ⁹ —Nuquin Papan uincuemiaid Esus abitedishun Icho neque. Con Icho Esus canu —quequin chuisho Nuquin Papan nuqui bēdamboen isquin cuidenquio iquendac. ¹⁰ —Ēbi cuidmenquio icnuec abided cuidadaid Esus tantiemi —quequin otacquo tantiaquidēn: —Esus tantiaquid nebi —quequin utsibo abimbo chuisho bēdamboen isquin Nuquin Papan cuidenquio iquendac.

¹¹ Ambi chiaid Nuquin Papan dada uamiacpaden:

“Aid tantiec: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi.”

¹² Isadaidbo yec mases utsibo yec quequido Esus tantiaquidtedi adoendac. Aden abitedishun Icho icquin abi tantiaquidtedi Esusēn bēdambo icmendac. ¹³ Aden Esusēn nate chuiquin con tsusedpan Nuquin Papan chiaid dada uapampic. “‘Abitedishun Icbombo icsho mibi tantiaquid nebique. Ēbi bēdamboen ista, Icho,’ qesho bēdamboen isquin cuidenquio iquendac,” quequin dada uapampic.

¹⁴ ¿Mitsipaden masesēn Esus tantiabempec? ¿Esusēn naid chiabi yacta masesēn tantiapec? Padenquio. Esusēn naidquio chuibanaquien tantiendac. ¿Esusēn naid chuisho tantiash: —Mua —quequidta Esus tantiaquid nepadic? Padenquio. —Abimbo caic —qeshun: —Min Mado Esus tantiembique. Ēbi bēdamboen ista, Papa —quequidien Esus tantiaquid nec. ¹⁵ ¿Mitsipadoaidēn Esusēn naid chuibampec? ¿—Chuita —cacmaidēnda chuibampec? Padenquio. Nuquin Papan: —Con Mado chuibeneta —caidien Esusēn naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan mases bēdamboen iste chuibanquid chosho isash: ‘Bēdambo iquec,’ quec mases cuishonquendac,” quequin dada uamepampic.

Isadaidbo dadpenshun Esus tantienquio yaid

¹⁶ Adquidēn Esusēn naid chuibanac isadaidbo dadpenshun Esus tantienquio iquec. Daēdpactsēcshun tantiec. Abi tishabi

icnuc aden abi tantiesabo Esusën chuite Nuquin Papan con tsusedpa Isayas caid dada uamepampic naden. “Mimbi chiaidquio ëmbi chuibansho ¿tsuntsin tantiapec, Papa? Daëdpactsëcshun: ‘Abimbo mimbi chiec. Mibi tantiacquin mimbi chiacpadomboen naimbi,’ ëbi caindac, Papa,” quequin Esusën aton Papa chuite Isayasën dada uapampic. ¹⁷ Aden Esusën naid chuibansho tantiashun: —Abimbo caic — qeshun utsibon Esus tantiec.

¹⁸ ¿Esusën naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidën naid chuibanquidën chuibanendac.” Aden chuibansho ma con matsesën tantiaboc. ¹⁹ Aden Nuquin Papan chiaid chuisho tantiash: —Tantiadenquio yec onquec —¿quepecta icnëdash con matses? Padenquio. Tantiashi abi bëdamboen tantiante bunenquio icsho isun matses utsibo bëdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidbouidi ëmbi bëdamboen iste mimbi danubi ëmbi con matses cacmaidobi matses utsibo bëdamboen isbenendambi.

Ëmbi matses utsibo bëdamboen iso isash: ‘¿Atotsieshun Nuquin Papan matses utsibo bëdamboen ispec?

Icsambo iquec,’ quec mibi chushquendac.

Matses utsibobi ëbi tantiabi icquido ëbi tantiamendambi.

Aido bëdamboen isquin mibi nëishëmendambi,”

quequin Nuquin Papan Moises dada uamepampic.

²⁰ Adembidi dacuëdenquio icquin Isayasën Nuquin Papan matses utsibo bëdamboen iste dada uapampic.

“ ‘Nuquin Papa tantiatiadquio iquebi,’ quenquio icquidombi ëbi tantiabenosh.

‘¿Mitsipadembimbi Nuquin Papa bëdamboen ismepeba?’ quesabobi ëmbi bëdamboen iste tantiamiombi,”

quequin Isayasën Nuquin Papan chiaid dada uapampic.

²¹ Isadaidbotsen chuiquin Nuquin Papan chiaidquiobidi Isayasën naden dada uapampic. “ ‘Mibi tantiac unësquio iqueque. Ëbi bëdamboen tantiata,’ cadeniaqui: ‘Padi, mibi tantiatiapimbo iquebi,’ quequin ënenquio icquin ëmbi chiaid mimbi niac-niacpec,” quequin Nuquin Papan chiaid Isayasën dada uapampic.

11

Ambi chiacledi isadaidbo Nuquin Papan bëdamboen isaid

¹ ¿Ambi chiaid niac-niacsho isadaidbotedida Nuquin Papan chieshëmpec? —Con matses catiapimbo iquebi —¿quecta iquec? Padenquio. Isadaidbombo nebi. Ëndenquimboshë con

tsusedpa Abadauan campidën baban tishmiaid Benaminën tsyuecquidon tsyuecquid yec isadaidbombo nebi. Adquid icsho Nuquin Papan chieshënenquo iquebi. ² Ëndenquimboshë nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshënenquo iquec. ¿Ediasën chiampid tantienquioda ique? Aton matses isadaidbo nëishënsun Nuquin Papa naden chuipampic. ³ “Mimbi con matses caidotedi icsamboshë icquec, Papa. Mimbi chiaid chuibanquidobi cuesun secac. Papa quequin mibi menequin ismete cuënote nacnenaid uesquin chic-chicpac, Papa. Icsamboshë iquec. Èbiuidtsëqui bëdambo iquec. Mimbi chiaid chuibansho tantiasun ëbi cuesunetiadquo iquec, Papa,” quequin Ediasën Nuquin Papa chuipampic. ⁴ Adoac ¿mitsipadomboen Nuquin Papan chuipampic? “Èbi tantiaquido abi iquec. Èmbi namiacpadomboen isadaidbo dadpenshun 7000tedishun ëbi tantiec. Èbi tantiesabon papa quequin nacnenaid Bad caid tantienquo icquin ëbi tantiec,” quequin Nuquin Papan Edias chuipampic. ⁵ Adembidi nëbi con matses isadaidbon ambi tantiactedishun Esus tantiasho Nuquin Papan bëdamboen isec. ⁶ ¿Ambembida con matsesën Nuquin Papa bëdamboen ismepec? Padenquo. —Èmbi chiacpadomboenuidi nasho matses bëdamboen isembi —¿quecta icpec Nuquin Papa? Padenquo. Aden naquid nibëdsho bëdamboen istiapimbo icboedëmbi ambi tantiactedishun icsaboedon Esus tantiasho Nuquin Papan bëdamboen isendac.

⁷ Isadaidbon ambi tantiactedishun Esus tantiasho Nuquin Papan bëdamboen isec. Isadaidbo utsiboen bëdamboen istiapimbo iquec. Aido: —Nuquin Papa bëdamboen ismete bunquin ambi chiacpadomboenuidi ëmbimbo nanu —queboedombi nainquo icsho Nuquin Papan bëdamboen istiapimbo iquec. Abi bëdamboen ismequidquo Esus chieshënshe Nuquin Papan pacuënëdabimboecnuc isadaidbo icmepanëdash. ⁸ Aden ambi isadaidbo pacuënëdabimboecnuc icmete chuiquin Nuquin Papan dada uamepampic naden.

“Nuquin Papan pacuënëdabimboecnuc icmiac Nuquin Papan chiaid chiaqui tantiatiapimbo iquec,”

quequin dada uamepampic. ⁹ Adembidi ambi isadaidbo pacuënëdabimboecnuc icmete chuiquin Nuquin Papan con tsusedpa Dabid naden dada uamepampic ëndenquimboshë.

“ ‘Èbi bunaiduidi naic ëbibi bëdambo iquebi,’ quequidëmbi Nuquin Papa bëdamboen tantienquo iquec.

Adsho Nuquin Papan cuidpashun.

Cuidadnushi abimbo chiaid danec: ‘Èmbembi naic bëdambo iquebi,’ quendac.

Adec abi tantienquo yec icsasho Nuquin Papan cuidpashun.
 10 Pacuënédacimboecnuc icmequin Nuquin Papan abimbo
 tantiamenquo icpashun.

Natiamequin shubimepashun,”
 quequin Nuquin Papan chiaid Dabidën dada uapampic.

Nuquin Papan matses utsibo bédamboen isbenaid

11 ¿Aden pacuënédacimboecnuc icmiac Esus tantiatiapimbo
 icsho isadaidbo padpiden bédamboen tantiametiapimboda
 Nuquin Papa icpec? Ambi tantiacpadomboen bédamboen tantiamendac.
 Nēbi isadaidbo dadpen bédamboen istiapimbo icquimbi matses
 bédamboen iste bunquin Nuquin Papan matses utsibo Esus tantiamequin
 bédamboen isbenec. —Ĕmbi adosho isash isadaidbotsen ma nadnu.
 “Nuquin Papa bédamboen ismete bunquiebique. Ĕmbitsen Esus tantianu,”
 ma quenu —queshun Nuquin Papan aden matses utsibo ambi bédamboen
 iste tantiamiac. 12 Ambi chomiaid Esus tantienquo icsho isadaidbo
 dadpen bédamboen istiapimbo icquimbi matses utsibon Esus tantiasho
 ambi con matses caido isadaidbo-bimboecnuc Nuquin Papan bédamboen
 isbenec. Ambi tantiacpadën ambi tantiamiacpadomboen isadaidbo
 dadpen-shun Esus tantiabensho Nuquin Papan bédamboen isendac.
 Adshumbic matses utsibobēdta isadaidbo Nuquin Papan bédamboshē
 icmendac.

13 Tantia, matses utsibo. Mibitsen chuinu. Nuquin Papan
 icmiacpadomboen matses utsibo Esusën naid chuibenequidquo nebi.
 Ĕmbi chuibeneboed con matses isadaidbo chuibanombi naden. —Esusën
 naid Ĕmbi chuibeniac matses utsibon Esus tantiabensho. Adsho
 Nuquin Papan aido bédamboen isbensho —quequin con matses chiombi.
 14 —Aden Nuquin Papan matses utsibo bédamboen isaid Ĕmbi chuisho
 tantiasho Nuquin Papa bédamboen ismete bunquin Esus tantiasish.
 Adsho Nuquin Papan bédamboen istiasish —queshun con matses aden
 chiombi. 15 Aden isadaidbon Esus chieshënsho isun Nuquin Papan
 matses utsibo Esus tantiamequin bédamboen isbenac. Ambi tantiacpadëmbi
 isadaidbontsen Esus tantiasho Nuquin Papan bédamboen isbenendac.
 Isadaidbontsen Esus tantiabedensho isumbic Nuquin Papan matses
 unēsaidotedi uincuemendac. 16 Con tsusedpa Abadauan abi tantiaquidquo
 icsho Nuquin Papan bédamboen isquin: —Con matses mibi caimbi.
 Adembidi min tsyuecquidotsen Ĕmbi chiacdedi con matses caindambi
 —quequin ambi chiacpadomboen isadaidbotedi Nuquin Papan con matses
 caindac. Ambi nitsinaid cuēte caniacsho: —Tapunuidtsēqui con na nec.
 Dada con napenquo nec —¿capenda icbon iquec?

Padenquio. —Abichobi con na nec —caquid. Adembidi Nuquin Papan isadaidbotedi con matses caic. Caniec taëquid cuëte tapumbimboecquid abia con matses caid Abadauan nec. Cuëte cuidibimboecquido Nuquin Papan con matses caidobidi Abadauanën tsyuecquido isadaidbo nec.

¹⁷ Aden ambi con matses caidombi ambi chomiaid chieshënsho cuëte cuidi utsi pobinun pateshuniac bimboen Nuquin Papan isadaidbo dadpen bédamboen istiapimbo iquec. Matses utsibo Esus tantiamequin cuëte dada utsi pobiac bimboen aton matses icmequin ëbipadquid isadaidbo ambia Esus tantiaquidobëdta Nuquin Papan mibi bédamboen isec. ¹⁸ Adoac icsamboec onquenda. —Isadaidbo dadpen bédamboen isenquio icquin Nuquin Papan ëbien bédamboen isec. Isadaidbo icsambo iquec. Èbien bédambo iquec —quequin icsamboen chienda. Aden icsamboen chuitiadquio icquimbi nëid chiaidtsen tantiata. Cuëte tapunabi icnuc dada yec podo yec quec cuëte ictiapimbo ictsandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibëdtsempampic. Isadaidbo nibëdnuc isadaidbon chidon Esus tishenquio ictsempanëdash. Èmbi aden chiac isadaidbo chiec icsamboec onquenda.

¹⁹ ¿Èbi adsho tantiashta mibi nadpe? —Ambi con matses caido chieshëmënsho isun cuëte cuidi pateshuniac bimboen nëbi isadaidbo dadpen Nuquin Papan bédamboen isenquio iquec. Èbipadquid matses utsiboen bédamboen isbenac —¿quecta ique? ²⁰ Abimbo mimbi caic. ¿Atotsieshun Nuquin Papan isadaidbo bédamboen istiapimbo icpec? Ambi chomiaid Esus tantienquio icsho Nuquin Papan aido bédamboen istiapimbo iquec. Padnuen Esus tantiasho mibi bédamboen isec. Adoac: —Èbi bédambo icnubi isadaidbo icsambo iquec —quenda. —Esus tantienquio icsho isadaidbo cuidacpadomboen ëbitsen Nuquin Papan cuidpanundac —quequin Nuquin Papa Esusbëdta tantiaquiota. ²¹ Ambi con matses caidon Esus tantienquio icsho Nuquin Papan bédamboen istiapimbo iqueque. Adembidi matses utsibon Esus tantienquio icsho Nuquin Papan mibi bédamboen istiapimbo iqueque. Esus tantiaquiota.

²² Aden Esus tantiasht nadec onqueta. —Esus tantiasho bédamboen isquid yec Esus tantienquio icsho isun cuidquid Nuquin Papa nec —cata. Esus tantienquio icsho cuëte cuidi pateshuniac bimboen cuidquin isadaidbo bédamboen isenquio iqueque. —Esus tantienquio yansho adembidi ëbitsen cuidpanundac —queshun chieshtoenquio icquin Esus tantiana. ²³ —Padi, aid tantiatiapimbo iquebi —queboedombi isadaidbon Esus tantiabensho abëdi tabadmenuen Nuquin

Papan bēdamboen isendac. Ambi cuēte cuidi pateshuneboedi abibidi pobioacimboen padpiden bēdamboen isendac. ²⁴ Min matses abitedi Nuquin Papa tantiesabo icnēdash. Nēbien cuēte icsan cuidi pateshuniaiā pobiacimboen Esus tantiamequin Nuquin Papan mibi bēdamboen isec. Adoac Esusbēdta Nuquin Papa mimbi bēdiactšēc tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ēnden dada uapampic. Ambi tantiacpadēn ambi cuēte bēda cuidi peteshuniaid abibidi pobioacimboembi Esus tantiamequin Nuquin Papan con matses isadaidbo bēdamboen isendac. Adoac cuēshēd-uidboedombi Nuquin Papabēdta Esus bēdamboen tantiaquindac.

Ambi chiacpadēn Nuquin Papan isadaidbotsen bēdamboen isoaid

²⁵ Tantia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuēnēdabimboecnuc icmiac con matses dadpen Esus tantiate bunenquo iquec. Daēdpactšēcshun Esus tantiec. Nuquin Papan tantiatedishun matses utsibo dadpenshumba Esus tantiambic ²⁶ paposhquiacimboen con matses isadaidbo dadpenshun Esus tantindac. Aden tantiasho Nuquin Papan con matses bēdamboen isendac. Aden ambi isadaidbo bēdamboen iste chuiquin Nuquin Papan naden dada uamepampic.

“Icsambo icquidobi cuidmenquo icnuec Nuquin Papa yacnuēsh choquid isadaidbon chidon tishaid iquendac.

Aidēmbi isadaidbo Nuquin Papa tantiaquid padpiden icmendac.

²⁷ ‘Aden ēmbi chiacpadomboen ēmbi chomiaid tantiasho abi icsaid bēpiscudquin isadaidbo bēdamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

²⁸ Nēbi Esus chieshēnsho isadaidbo bēdamboen istiapimbo icquin Nuquin Papan matses utsibo mibi Esus tantiamiac. Ambi nēbi bēdamboen istiapimbo yaido isadaidbo unēsquo icnuc Nuquin Papan tantiaquiec. —Ēmbi aton tsusedpabo chiampicpaden aido con matses caimbi —qeshun adoec. ²⁹ Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. ³⁰ Min matsesēn isadaidpembon Nuquin Papa tantienquo yacimboen nēbi isadaidbon Nuquin Papa tantiamequid Esus tantienquo iquec. Aden Esus tantiatiapimbo icsho isun Nuquin Papan Esus tantiamequin

matses utsibo bēdamboen isbenac. ³¹ Con matsesēmbien abided cuidadaid Esus chieshēnquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan aidotsen bēdamboen isendac. ³² Aden matses abitedishun ambi chiaid niac-niacsho isun: —Abitedimbo icsaquiec —quequin matses bēdamboen istiapimbo icboedēmbi nēbi Esus tantiasho Nuquin Papan bēdamboen isendac isadaidbo yec matses utsibo abitedi yec quenuc.

³³ Aden Nuquin Papan bēdamboen iste chuisho tantiasho nadnuna. Nuquin Papa bēdamboshē iquec. Abipadquid utsi nibēdec. Matsesēn naidtedi tantiaquidquio nec. Abitedimbo tantiaquid icquin ambi natiapimbo ictequid nibēdnuc bēdamboen naquidquio nec. ¿Ada adquid icsho Nuquin Papan naidtedi matsesēn tantiapadic? Padenquio. Ambi naidtedi matsesēn tantienquio iquec. ³⁴ “¿Nuquin Papan otacquio tantiaidtedida matsesēn tantiapadic? Padenquio. ‘¿Mimbi tantienquio iquec. Ēmbi chiacpadomboen nata,’ quequinda matsesēn Nuquin Papa chuipadic? Padenquio. Ambi tantiacpadomboembien Nuquin Papan naindac.” ³⁵ “¿Ada matsesēn Nuquin Papa menepadic? Padenquio. ‘Nē. Con na bedquin mitsana ēbi cuidquin mene, Papa’ ¿quequinda Nuquin Papa chuipadic? Padenquio. Matsesēn: ‘Con na nec,’ caidtedi Nuquin Papan na nendac.” ³⁶ Abitedimbo uaquidquio yec abitedishun Icbombo Nuquin Papa nec. — Uesadec nibēdanushe —quequin abitedimbo isquidquio nec. Aton na abitedi nec. Adec abitedishun Icbombo icsho: — Nuquin Papa bēdamboshē iquec —canuna ēnenquio icquin.

12

Esus con Icho cain ambi chiacpadomboen naid

¹ Con utsibobimboecquido mibi neque. Tantia. Mibi chuinu. Nuqui cuidmenquio icnuec abided cuidadaid Esus tantiasho Nuquin Papan nuqui bēdamboen isequē. Nuquin Papa bēdamboen tantiatiadquio icquin nadonona. —Ēbi bunaid nainquio yec mibi bēdambo icmenuc mimbi chiacpadec bēdamboec tabadtiaquio iquebique. Min yuambo ēbi icme, Papa —quequin Nuquin Papa chuinuna. ² Esus tantiesabon nacpadomboen nainquio icquin Nuquin Papan Mayanēn pausunacpadomboen Esus tantiaquin nuqui icsate bunaid ēnuna. Aden nuqui icsate bunaid ēnquin Nuquin Papa bunacpadec bēdamboec tabadquin nuqui tantiendac. Aden naic nuqui bēdambo iquendac.

³ Tantia. Nuquin Papan tantiamiacpadomboen mibi chuinu. Nadenda. —Ēbiuidtsēqui bēdambo iquebi. Utsibo abitedi icsambo iquec —quenda. Nuquin Papan Mayanēn tantiamiacpadec mibibi datantiadec: —Adquid nebi —quequin abimbo chuita. ⁴ Nuquin Papan Mayanēn tantiamiacpadomboen naquid Esus tantiaquidēn. Adquid yec ¿ada Esus tantiaquido abitedi chuiquid dapa yampatsiash? Padenquio. ¿Mitsipadquio min dada icpec? ¿Abichobida bedantequid icpec? Padenquio. Mēdanteuidtsēquien bedantequid iquec. ¿Abichobida istequid icpec? Padenquio. Ēshēuidtsēquien istequid iquec. ¿Abichobida shēdtequid icpec? Padenquio. Dēbiateuidtsēquien shēdtequid iquec. ⁵ Min dada yac bimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bēdamboec tantiananquin nashunanquido yanec. ⁶ —Ma utsibo nashunu —queshun Nuquin Papan Mayanēn namiaid nec Esus tantiaquido. ¿Atotsi naquid Nuquin Papan Mayanēn mibi icmiac? Nuquin Papan ambi tantiaidquio oncamiaid iquendac. Adquid icquin Nuquin Papan Mayanēn tantiamiaiduidi chuibanta. ⁷ Utsibic: —Utsibo nashunquid icta —caid iquendac. Adquid icquin bēdamboen nashumbanta. Utsibic Nuquin Papan: —Ēmbi chiaid bēdamboen tantiaishun chuibanta —caid iquendac. Adquid icquin Nuquin Papan chiaid tantiatsēcquido bēdamboen tantiameta. ⁸ Utsibic: —Chieshtoenquio icquin Esus tantiec bēdamboec tabadnuna —quequin bēdamboec tabadquin ismequid iquendac. Adquid Nuquin Papan icmiaid icquin Esus tantiaquido bēdamboec tabadte tantiameta. Utsibic aton na nibēdquido aton na menequid Nuquin Papan icmiaid iquendac. Adquid icquin cudasenquio icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusēn namiacpadomboen Esus tantiaquido bēdamboen nameta chieshenquio icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctsēc yec qesho bēdamboen nashunquid iquendac. Adquid icquin Esusēn chiacpadomboen chieshtoenquio icquin nashumbanta.

Esus tantiaquidon nadoquid, quiaid

⁹ —Mibi tantiac unēsquio iquec —quequin utsibo chuiquin abimbo chuinuna. Muainquio icquin utsibo tantiaquionona. Chieshēmēnenquio yec bēdamboec tabadnuna. Utsibon: —Icsanuna —caqui: —Padi —quiash icsainquio yec bēdamboec tabadnuna. ¹⁰ —Ēbēdtan Esus tantiaquido con

utsibobimboecquido nec —quiash bēdamboec tantiananuna. —Nēid con buchibimboecquid bēdambo iquec. Aidēn chuisho bēdamboen tantianuna —canuna nuquibēdtan Esus tantiaquido chuiquin. ¹¹ Nuquin Papan chiacpadomboen naic chieshtoenda. Nuquin Papan Mayanēn tantiamiacpadece Esus tantiec chieshtoenquoio yec bēdamboec tabadnuna. ¹² —Unēsacsho abi yacno Nuquin Papan ēbi tabadmendac —quec cuishonquenuna. Esus tantiaquido icsho utsibon chieshēnaqui chieshtoenquoio icquin Esus tantianuna. ¿Atotsi natiamante utsi icpec? Adquid tantiec shubiquimbi chieshtoenquoio icquin Esus tantianuna. Baded-badedquien Nuquin Papa chian-chianuna. ¹³ Nuquibēdtan Esus tantiaquido aton na nibēdsho isun nuquin nabi menenuna. Isedanquido bēdamboen isnuna. Pemequinc nuquin shubun ushmequinc canuna. ¹⁴ Esus tantiaquido yec nuqui chieshēnquidobēdi chieshēnanenquoio icnuna. Chieshēnanenquoio icquin Nuquin Papa naden chuinuna. —Ēbi chieshēnquido bēdamboen tantiameta. Chiesh bēdameta, Papa —quequin Nuquin Papa chuinuna. ¹⁵ Utsi bēdambo yec cuishonquesho isash aidbēdi cuishonquenuna. Utsi unēsquoio icnuc shubisho isash aidbēdi shubinuna. ¹⁶ Cuesnanenquoio yec chieshēmēnenquoio yec bēdamboec tabadnuna. — Con nauidtsēqui naimbi —quenquoio icquin utsibobēdtan bēdamboen nanuna. —Ēbiuidtsēqui bēdambo iquebi. Ēmbi tantiacpadoomboenuidi naimbi. Utsibon chiaid natiapimbo iquebi —quenquoio yec bēdamboec tabadnuna. —Chuiquid dapabēduidtsēqui onquequid nebi —quenquoio yec matses abitedibēd onquec bēdamboec tabadnuna.

¹⁷ Chieshēnaqui cuidnanenda. —Ma utsibo: “Bēdamboec tabadquido nec,” quenu —quiash bēdamboecuidi tabadnuna. ¹⁸ Uimanēmēnquido icsasho isun aid chuiquin: — Bēdamboequien tabadtiad —canuna. Adquidobēd chieshēnanenda. ¹⁹ Ēmbi tantiaido mibi neque. Tantia. Chuinu. Nuqui chieshēnquidobēdi cuidnanenquoio icnuna Nuquin Papan naden chiaid tantiash. “Matses cuidnanac icsambo iquec. Ēbentsēcquiobini icsaido cuidquid nec,” quequin Nuquin Papan chiaid dada uapampic. ²⁰ Nuqui chieshēnquidobēdi cuidnanenquoio icquin bēdamboen isnuna. “Pete bunsho pemequinc acte bunsho acmequinc canuna. Nuqui chieshēnquido: ‘Bēdambo icquidi chieshēnec icsachitobi,’ quiash ma nēish bēdanu,” quiash ²¹ adec cuidnanenquoio icquin nuqui chieshēnquido bēdamboen isnuna.

Chuiquid dapan chiacpadomboen Esus tantiaquidën naquid

¹ Aton matses chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibëdtsiash. Nuquin Papan chuiquid dapa icmiaidien aido nec —qeshun aidon chiacpadomboen naquid Esus tantiaquidën. ² Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. ³ Bëdamboec tabadquidon chuiquid dapan cuidte dacuëdëntiapimbo iquec. Adquido cuidenquio icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bëdamboec tabadta. Adsho isun: —Mibi bëdamboec tabadec —catsiash chuiquid dapabon. ⁴ —Ma matses bëdamboec tabadnu —quequin Nuquin Papan chuiquid dapa icmiaidën mibi bëdamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ëbi cuidpanundac —quiash icsaquid dacuëdendac. ⁵ Ëbi adsho tantiashun chuiquid dapabon chiacpadomboen nanuna. —Cuidnushe —qeshun adonona. —Pabiate cuembo icquin Nuquin Papan chiacpadomboen natiadquio iquebi —qeshun adonona.

⁶ Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën. ⁷ Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquio icquin.

Utsibo tantiaquionona, quiaid

⁸ —Ëmbi nashumbocpadomboen ëbi cuidquin nashunenquio iquec —camenda. Abi nashunquidobëd cuidnanquid Esus tantiaquid. Esus tantiaquidbidi bëdamboec tantiananquid. Adec bëdamboec tantiananquin Nuquin Papan Moises chiampicpadomboen nuqui bëdamboen natsiac. ⁹ “Ambi naiduidtsëqui nainquio yec abibi datantiadac bimboec ma matses bëdamboec isnanu,” quequin Nuquin Papan Moises naden dada uamepampic. “Min chidopenquio chudenda. Adembidi min bënëpenquio chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadac bimboen utsibotsen tantiaquionona. ¹⁰ Utsibo bëdamboen isquin aido

icsa uatiapimbo nuqui ictsiac. Aden utsibo bēdamboen tantiasho Nuquin Papan: —Aden naic ěmbi Moises chiacpadec bēdamboec tabadec —caindac.

¹¹ —Nĕbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushacbimboen nainquio ichoedi nĕbi ushash isucunacimboec dayacquio yec chieshtoenquio icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: ¹² —Nĕbien Esus chochitec —quedonetsĕcquiec bēdamboec tabadnuna. —Satanasĕn yuanushe —qeshun Esus tantiaquin nuqui icsaid ĕnshun bēdamboen nanuna. ¹³ Icsainquio yec: —Bēdambo iquebique. Ma isnu —quiash bēdamboec tabadnuna. Tantiadenuen actequid paĕmbo icquid aquenquio icquinc utsin chido chudenquio icquinc utsin bĕnĕ chudmenquio icquinc chido utsi mĕismenquio icquinc canuna. Adecbidi utsin na isash: —Con na adquid nibĕdec —quiash chieshĕmĕnec tabadenquio icnuna. Adembidi utsin mibi bunaid nasho isash: —Aden ĕbi namenquio icpec —quec chieshĕmĕnenquio icnuna. Icsainquio yec bēdamboec tabadnuna. ¹⁴ —Icsate bunchitebi. ¿Mitsipaden naiquini icsape? —quenquio yec Esus tantiaquiec abi tabadacpadquiec bēdamboec tabadnuna. Nuqui icsate bunaid ĕnquionona.

14

Esus tantiaquido utsibo bēdamboen isaid

¹ Nuquibĕdtan Esus tantiatsĕcquidon nuqui nacpadomboen nainquio icsho bēdamboen isnuna. Ambi chiaidquio chuiquin Esus tantiaquidon natetedi Nuquin Papan uesquin chiabi iquec. —Naden nac bēdambo iquec. Naden nac icsambo iquec —quequin uesquin chiabi iquec. Aden Nuquin Papan chiacmaid chiec nuquibĕdtan Esus tantiatsĕcquido: —Ĕmbi natemaid nec —qeshobi: —Icsamboen chiec —cainquio icnuna. ² Esus tantiaquidquio: —Pete abitedi pambidbĕdta pesho Nuquin Papan nĕishĕnenquio iquec —quenubien Esus tantiatsĕcquid: —Padi. Pambid pesho isun Nuquin Papan nĕishĕnushe. Esus tantiaquidĕn nitsinaid pequid. Pambid isuidquid —quepec. ³ Pambid pequidobĕdtan pambid isuidquidombi Esus tantiasho Nuquin Papan aid daĕdi bēdamboen isec. Padnuen pambidbĕdta pete utsi abitedi pequidĕn pambid isuidquid mamĕnshunac icsambo ictsiash. Adembidi pambid isuidquidĕn: —Pambid pequid icsambo iquec —cac icsambo ictsiash. ⁴ ¿Icbonpenquioda: —Yua icsambo iquec —capadic? Icbombien adoquid. Adembidi: —Mibi

bëdambo iquec —caquid icbon. Nuquibëdtan Esus tantiaquid Nuquin Icbon yua icsho: —Ëmbi nacpadomboen nainquo yec mibi icsambo iquec —cainquo icnuna. —Nëid icsambo iquec. Nëid bëdambo iquec —quequin Nuquin Icho Esusën ambentsëqui abi tantiaquido chiendac. Aidën namiacpadomboen abi tantiaquidon bëdamboen naindac.

⁵ Esus tantiaquido utsi-utsiec: —Aid badiadquidënuidtsëqui Esus tantiec cuëdënac bëdambo ictsiash —quenubien utsibo: —Badiadquidën badiadquidënquiec Nuquin Papa Esusbëdta tantiec cuëdënebi —quecuededpec. Adquid daëd icsho Nuquin Papan nëishënenquo iquec. Esus tantiaquid ambi tantiacpadënquiobi cuëdënac bëdambo ictsiash. ⁶ Aden Esus tantiaquin nac bëdambo ictsiash. Adembidi Esus tantiaquin: —Mimbi pete uaid bëdambo iqueque. Aid penu, Papa —quequin pambid pequido iquendac. Utsibombic adembidi Nuquin Icho tantiaquin: —Mimbi pete uaid bëdambo iqueque. Aid penu —queshun utsi pequimbi pambid isuidquid iquendac.

⁷ ¿Esus tantiaquid ambi naid-uidi naquidta nedic? Padenquo. ¿Ambi tantiacpadën unësquidta nedic? Padenquo. ⁸ Nuquin Icho Esusën chiacpadomboen natiadquo yec nuqui tabadec. Ambi tantiacpadën nuqui unësendac. Unësabi yec tabadec Esusën yuambo icboedi unësash adecbidi aton yuambo nuqui iquendac. ⁹ Adec Nuquin Icho icnuec abided ciudadec unësash Esus uincuempanëdash. Unësabi yec nuqui tabadnuc Nuquin Icbombo icboedi nuqui unësan adecbidi Nuquin Icbombo iquendac.

¹⁰ —Adquid Nuquin Icho iquec —quesho ¿tantiashunda nuquibëdtan Esus tantiaquid mamënsuntiad? Padenquo. ¿Nuquin Papan chiacmaid chiec: —Ëmbi nacpadomboenuidi nainquo yec icsambo iquec —quequina chushcatiad? Padenquo. Nuquin Icho Esusbëdtan Nuquin Papanuidtsëqui matsesën naidtedi chiendac. —Nëid bëdambo iquec. Utsi icsambo iquec —quequin chiendac matses abitedishun tantianubi. ¹¹ Adote chuiquin Nuquin Papan ambi chiaid naden dada uamepampic.

“Tantia. Abimbo caimbique.

Naden matses abitedishun ëbi chiendac.

‘Abitedishun Icbombo mibi nec.

Bëdamboshë icquidquo mibi nec.

Abitedishun naid tantiaquid icquin mimbiuidtsëqui: Nëid icsambo iquec. Nëidien bëdambo iquec, quequin abimbo chiendac,’ quequin matses abitedishun ëbi chiendac,” quequin Nuquin Papan dada uamepampic. ¹² Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

Utsibo icsamenquoio icnuna, quiaid

¹³ Ēbi adsho tantiashun Nuquin Papan: —Adoenda — quequin chiacmaid nuqui tantiaid chienquoio icnuna. — Ēmbimbo natemaid naic aido icsambo iquec —nuquibēdtan Esus tantiaquido cainquoio icnuna. Adenquoio icquin nadonona. —Ēmbi ambi natemaid nasho isash chieshtoshon Esus tantienquoio yanushe. Ambi natemaid naquin ismenquoio iquembi —queshun Esus tantiaquidtedi bēdamboen isnuna. ¹⁴ Nuquin Icho Esuquidistu tantiaquidquoio icquin ěmbien naden tantiec. —Nēbi Nuquin Papan: “Petemaid nec,” caid nibēdec —quequin tantiembi. Ēbi adnubi utsibo: —Petemaidquoio nec. Aid pec icsamane. Aid petiapimbo iquebi —queshumbi adquid pec: —Icsachitobi —quetsiash. ¹⁵ Adsho tantiashun aido bēdamboen tantiaquin ambi petemaid nuqui pemenuoio ictsiaic. Ambi petemaid pemequin mimbi aido tantienquoio iquec. —Ēmbi petemaid piash icsachitobi —quequin Esus tantienquoio yanushe. Ambi petemaid pemenda. —Nēid petemaid nec —quequido aidotsen tantiaquin cuidmenquoio icnuec abided cuidadec Esus unēsaque. Aido tantiata. ¹⁶ —Nuquin Papan chiaid niaquenquoio icquin Esus tantiaquido utsibon: “Aden naic icsatsiash,” caid naimbi. Ēmbi tantiacpadomboen naimbi —queshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ēmbi natemaid naique —camenda. ¹⁷ Ķ— Nadquid petemaid nec. Nadquid actemaid nec —quequin petebēdta acteuidi tantiecta Nuquin Papan chiacpadec Esus tantiaquido bēdamboec tabadpatsiash? Padenquoio. Aton Mayan nuquibēdi tabadmiaic chieshēmēnenquoio yec cuishonquec Esus tantiaquido bēdamboec tabadendac. ¹⁸ Adec Esuquidistun chiacpadec tabadsho isun Nuquin Papan: —Bēdambo iquec —caindac. Matsesēntsen: —Aido bēdambo iquec —caindac.

¹⁹ Ēmbi chiacpadec chieshēmēnenquoio yec bēdamboec isnanuna. —Esus tantiec chieshtoenquoio yec bēdamboec tabadnuna —quec chuinanuna. ²⁰ —Nuquin Papan bēdamboen isaidon Nuquin Papa Esusbēdta tantienquoio yanushe —queshun utsibon petemaid pequin aido chieshtomenda. Nuquin Papan: —Matsesēn petemaid nec —caid nēbi nibēdnubi Esus tantiatsēcquidēn petemaid pequin aid chieshtomec mibi icsatsiaic. ²¹ —Ēbēdtan Esus tantiaquido icsamemane —queshun ambi petemaid pambid penquoio icquinc ambi actemaid acte paēmbo icquid aquenquoio icquinc ambi natemaid utsi nainquoio icquinc cac bēdambo

ictsiash. ²² Nuquin Papan: –Matsesën natemaïd nec –cacmaïd tantiaquin: –Ëmbimbo petequïd nec. Ëmbimbo actequïd nec. Ëmbimbo natequïd nec. Aden nasho Nuquin Papan ëbi cuïdenquïo iquec –quequin mimbi tantiaïd caic: –Natemaïd nec –quequïdo naden chienda. –Ëmbi nacpadomboen nainquïo yec mibi icsambo iquec –cainda. Adembidi aidon: –Ëmbi natemaïd nec –caboed naquin ismenda. Chieshtonoshe. ²³ Adquïd ambi: –Aïd pesho Nuquin Papan nëishëncitembini ictsiash –caboed piash –Icsachitobi –quetsiash. Adsho Nuquin Papantsen: –Ai, adec icsaic –catsiash. –Aden naic icsachitequini ictsiac –nuqui caïdtedi naic nuqui icsatsiac.

15

Nuqui bunaiduidi nainquïo icnuna, quiaïd

¹ Esus tantiaquïdënquïo Esus tantiatsëcquïd chieshënenquïo icquïd. –Natemaïd nec –quequin Nuquin Papan chiabi icnubi Esus tantiatsëcquïd: –Esus tantiaquin ëmbimbo natemaïd nec –quesho tantiashun ambi natemaïd naquin ismequin chieshtomenda. Aïd tantiaquin ambi natemaïd nainquïo icquin nuqui bunaiduidi nainquïo icnuna. ² –Esus tantiatsëcboedëmbi ma Esus bëdamboen tantiabenquïono –quequin nuquibëdtan Esus tantiatsëcquïdën natemaïd nainquïo icnuna. –Aden naic mibi bëdambo iquec –camenuen ambi natemaïd nainquïo icnuna. ³ Esuquïdistun ambi naiduidi nainquïo icquin Nuquin Papan chiacpadomboenuïdi naic abi chieshënquïdo yacnobi chopanëdash. Esus tishabi icnuc Esusën chuite chuiquin Nuquin Papan con tsusedpa naden dada uamepampic. “Mibi chieshënacpadomboen chieshënquin ëbi icsamboen chuishunec, Papa,” quequin Esusën abi chuite Nuquin Papan dada uamepampic. ⁴ Aden con matses isadaïdbobëdta matses utsibo abitedi bëdamboen tantiamenuen Nuquin Papan ambi chiaïd dada uamedenepampic. –Nëïd isbanisbanquin ëbëdta Esus ënenquïo icquin tantiec ma matses bëdamboec tabadnu. Adec bëdamboec tabadec: “Unësash Esusbëdi Nuquin Papa yacno tabadendabi,” ma matses quenu –queshun ambi chiaïd dada uamepampic. ⁵ Aden matses chieshtoenquïo icnuc bëdamboen tabadmequïd Nuquin Papa mibi chianembi. –Chieshtoenquïo icquin Esus tantiaquïd icmequin dayacquïo yacbimboecnuc matses bëdamboen tabadmequïd mibi nec, Papa. Adquïd icquin Doma yacnocquïdon Esus tantiasho bëdamboec isnanquïd icmeta, Papa. ⁶ Mimbi adoac: “Nuquin Papa chuinuna,” cac aidon abitedishun: “Ai, adonona,” quesahun mibi naden

chuitsiash, Papa. “Con Icbo Esuquidistun Papa mibi nec. Mibi bēdambohē iquec,” quequin mibi chuitsiash, Papa —quequin Nuquin Papa mibi chianembi.

Nuquin Papan matses utsibo Esus tantiamiaid

⁷ Tantia. Padpiden mibi chuinu. —Nuquin Papa bēdambohē iquec —nuqui camenuen Esuquidistun nuqui bēdamboen isequē. Bēdamboec isananuna. Isadaidbohē yec isadaidpēmbohē yec quec bēdamboec isananuna. ⁸ Esuquidistu matses abitedi bēdambohē icmenuēc matsesbēd tabadpanēdash. Esus chote chuiquin Nuquin Papan dada uamepampicpadec isadaidbohēdi tabadquin Esusēn aido nashumpanēdash. —Nuquin Papan abimbohē chuipampic —quequin tantiamenuen adopanēdash. ⁹ —“Icsaboedombi Esus tantiasohē Nuquin Papan bēdamboen isquin cuidenquio iquec. Nuquin Papa bēdambohē iquec,” ma isadaidpēmbohē matses utsibohē quenu —quecbidi Esus matsespanēdash. Aidēn abi chuite chuiquin Nuquin Papan naden dada uamepampic.

“Isadaidpēmbohē matses utsibohēdtan mibi naden chiendambi. ‘Nuquin Papa bēdambohē iquec,’ caindambi mibi.

Adecbidi mibi bēdamboen tantiec cuēdēnendabi,”

quequin Esusēn abi chuite Nuquin Papan dada uamepampic.

¹⁰ Nadembidi isadaidpēmbohē matses utsibohē abi tantiabente chuiquin Nuquin Papan con tsusedpa dada uamepampic.

“Matses utsibohē isadaidpēmbohē mibi chuinu.

Nuquin Papan con matses caidbohēdi cuishonqueta.

‘Nuquin Papa bēdambohē iquec,’ quec cuishonqueta,”

quequin Nuquin Papan chiaid dada uapampic. ¹¹ Nuquin Papan chiaidbidi con tsusedpan padpiden naden dada uapampic.

“Isadaidpēmbohē matses utsi abitedi mibi chuinu.

‘Nuquin Papa bēdambohē iquec,’ cata.

‘Nuquin Papa bēdambohē iquec,’ quec cuēdēncuededec tabadta,”

quequin dada uapampic. ¹² Adembidi isadaidpēmbohē matses utsibohē Nuquin Papabēdta Esus tantiabente chuiquin Nuquin Papan con tsusedpa Isayas naden dada uamepampic.

“Dabidēn papa Isai caid ēnden unēsampidēn tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bēdamboen namendac.

Aid caic: ‘Nēidēn nuqui cuidmenquio iquendac,’ quependac isadaidpēmbohē matses utsibohē,”

quequin dada uapampic.

¹³ Aden chiampid mibi nec. Nuquin Papa Esusbēdta tantiaquido icshohē mibi Nuquin Papa chianembi. —Mibēdi matses tabadmequidquio mibi neque. Mibi tantiamequin Doma

yacnocquido cuishoncameta, Papa. Adembidi dacuëdenquo icnuc bēdambo icmeta. Aden min Mayan aidobēdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

Matses utsibo Esus chuibanquid nebi, quiaid

¹⁴ Con utsibo mibi caimbique. Tantia. Mibi chuinu. —Nuquin Papan Mayanēn tantiamiacpadec bēdamboec isnanec bēdamboec tabadtiadquo icquidien nec. Aidēn tantiamiacpadomboen Nuquin Papan chiaid bēdamboen tantiec: “Nuquin Papan chiacpadec bēdamboec tabadnuna,” quec chuinanquidien nec —quequin mibi tantiombi. ¹⁵ Aden tantiash: —Nēishēnushe —quenquo icquin: —Bēdamboec tabadta —quequin chuiquin nēid dada uaimbi. Nuquin Papan: —Esus chuibeneta —caid icquin mimbi ēnden tantiaidbidi Esusēn naidquo bēdamboen mibi tantiamenuen dada uaimbi. ¹⁶ Nuquin Papan icmiacpadquid Esusēn naid chuibenequidquo nebi. Adquid icquin isadaidpembo matses utsibo Esus tantiaquido Nuquin Papan bēdamboen iste chuibeniombi. Adoac matses utsibon Esus tantiabensho isun aton Mayanēn bēdamboen tabadmesho: —Bēdambo iquec —caindac Nuquin Papan.

¹⁷ Aden: —Esuquidistu bēdamboshē iquec —quequin matses utsibo dadpen Esusēn naid chuibeniombi. ¹⁸⁻¹⁹ Esuquidistun ēbi namiaiduidtsēqui mibi chiecnendabi. Aidēmbi namiac matses utsibo Esusbēdtan Nuquin Papan naid chuibenequimbi Nuquin Papan Mayanēn tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquo yanosh. Shubu dadpen icquid Edusaden yacnuēsh ēnapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. ²⁰ Esusēn naid chiacmanouidquo Esusēn naid chuibenetiadquo iquebi. Utsibon Esusēn naid chuibanacno nidiapimbo iquebi. Esusēn naid chuisho tantiacmaido Esus chuite bunquiebi. ²¹ Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidēn naid chuisho tantiacmaidon tantiabenen dac.

Adshun paposhquiacbimboen bēdamboen tantiendac,” quequin dada uamepampic. ²² —Aden Esusēn naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusēn naid tantiash —quiash mibi yacno nidabi iccobi. Nēbi mibi yacno nidiadquo iquebi.

Mibi yacno nidtiadquo iquebi, quiaid

²³ —Nēbi Ididico yacno Esusēn naid uesquin chuibeniac — quiash mibi yacnotsen nidtiadquo iquebi. Ēndenquimbo taēc mibi yacno nidte bunondaiddi seta dadpen matamiashic adi nēbi mibi iste bunquiebi. ²⁴ Nidaid utsi Espania caid yacno nidquimbi mibi isbidanendambi. Doma yacno nidash mibēdi cuishonquendabi. Ambo yuec-yuecpamboec tabadash: — Nidnu —quesho: —Ai, nidec nid. Mibi podqued ismequid mibēdi nidendac —ēbi caindac mimbi. Aden tantiec mibi yacno isbidantiadquo iquebi. ²⁵ Nēbini Edusaden yacnoba nidendac. Anocquido Ēsus tantiaquido utsibon meniaid menenuc nidendabi. ²⁶ —Edusaden yacnocquido Esus tantiaquido utsi-utsiec aton piucquid nibēdeque. Nuquin nabi ma buanshunu. Menenuna —queshun Esus tantiaquido icquin Acaya yacnocquidobēdtambi Masedonia yacnocquidon: —Con na buanshun meneta —caposhi. ²⁷ Aden ambi tantiacpaden nasho: —Bēdambo iquec —caombi. Edusaden yacnoshon Esusēn chiac isadaidbomba Esus tantiapānēdash. Adshumbic aidon chuibeniac matses utsibontsen Esus tantiapānēdash. Aden abi nashunquin chuiquido Edusaden yacnocquido caic: —“Piucquid nibēdec,” quiaic caoshe. Menenuna —quesho: —Bēdambo iquec —caombi. ²⁸ Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibēdquido menebanash nidaid utsi Espania yacno nidquin mibi isbidanendambi. ²⁹ Mibēdi tabadquin ěmbi Esus tantiamequin chuisho Esusēn nuqui bēdambo icmendac.

³⁰ Ěmbi tantiaidombo mibi neque. Tantia. Chuinu. Nuquin Icho Esuquidistun aton Mayambēdtan tantiamiacpadec nuqui bēdamboec tantiananec. Ěbi tantiaquin Nuquin Papa chianeta. —Ěnenquio icquin Esus tantiamequin mimbi chiacpadomboen Pabado name, Papa. ³¹ Udeya yacno nidsho Esus chieshēnquidon Pabado cuesnushe. Bedmenda, Papa. Piucquid buanacsho Edusaden yacnocquido Esus tantiaquido bēdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquio icnushe. Bēdamboen bedmeta, Papa —quequin Nuquin Papa chianeta. ³² Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bēdamboec tabadendac Esus tantiamenanec. ³³ Aden mibi tantiaquin: —Nuqui dacuēdenquio icnuc bēdambo icmequid Nuquin Papa mibēd icpashun —caimbi.

Mibi unēsquio iquec, quequin chiaid

¹ Nuquibēdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bēdamboen ista. Shubu dadpen icquid Senquedeya caid yacnoshon utsibo bēdamboen nashunquidquio nioshe. ² Pebe bēdamboen ista. Utsibobēdta ēbitsen bēdamboen nashunoshe. —Nuquibēdtan Esus tantiaquid nec —queshun bēdamboen isquin aidēn: —Ēbi nashunta —cacpadomboen aid nashunta.

³ Aquida caidbēdta aton chido Pidisida caid chuiquin: —Mibi caic: “Unēsquio iquec,” quiosh Pabado —cata. Aidon ēbēdtan Esusēn naid chuibeniondashe. ⁴ Aden Esusēn naid chuibenesho: —Cueschitomane. Aden chienda —Esus chieshēnquidon caqui aidon adembidi ēbēdtan Esusēn naid chuibeniondash. Adsho isun: —Mimbi bēdamboen naoc —caondambi. Adembidi aidon chiondaidon isadaidpembon chiondash. ⁵ Aquidan shubuno Esus tantiec cuēdēnec chochoquidotsen chuita. —Mibi caic: “Unēsquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenondaid ēmbi tantiaidquio Epeneto caidtsen adembidi chuita. ⁶ Nēidtedi chuiquin: —“Mibi unēsquio iquec,” quiosh Pabado —cabanta. Nēidic Madia caid mibi nashunquidquio. ⁷ Nēidic con matses isadaidbo Andedonico caid. Nēidic con matses Unias caid. Aidon ēbēdtambi Esusēn naid chuibenesho chieshēmēnquidon bedshun quēnēn naue-dondash. Aidombien ambia Esus tantiabempac caondash ēmbi padabi icnubi. Adsho aidoba Esusēn: —Ēbi chuibeneta —cac chieshtoenquio icquin Esus chuibenequido nec.

⁸ Nēidteditsen chuiquin: —“Mibi unēsquio iquec,” quiosh —cata. Nēidic Esus tantiaquid utsi Ampidias caid ēmbi tantiaidquio. ⁹ Nēidic Esusēn naid chuiquid utsi Udbano caid. Nēidic ēmbi tantiaidquio utsi Estaquis caid. ¹⁰ Nēidic Apedes caidtsen. Utsibon chieshēnaqui chieshtoenquio icquin Esus tantiaquidquio nec. Nēidic Adistobudo caidēn shubun icquidotedi. Aidtedi: —Mibi caic: “Unēsquio iquec,” quiosh Pabado —cabanta. ¹¹ Nēidotsen adembidi chuita. Nēidic con matses utsi Edodion caid. Nēidic Nadsiso caidēn shubun icquido Esus tantiaquidtedi. ¹² Nēidic chido Tidipena chedo Tidiposa caidbēdi. Aido Esus tantiec dayacquio icquin ambi chiacpadomboen nabanquido nec. Nēidic chido utsi Pedsida caid con chu icbobimboecquidquio. Aidtsen Esus tantiec dayacquio icquin ambi chiacpadomboen naquidquio nec. ¹³ Nēidic Dupo caid Nuquin Papan Esus tantiamiaidquio. Nēidic aton tita con tabimboecquidquio. ¹⁴ Nēidic Asinquidito caid. Nēidic Pedeconte caid. Nēidic Edmes caid. Nēidic Patēdobas caid. Nēidic Edmas caid. Nēidic abēd icquido Esus tantiaquido. ¹⁵ Nēidic Pidodoco caid aton chido Udiabēdi.

Nëidic Nedeyo caid aton chuchubëdi. Nëidic Odimpas caid. Nëidic abëd icquido Esus tantiaquido. Aidedi chuiquin: — Mibi caic: “Unësquio iquec,” quiosh Pabado —cabanta.

¹⁶ Esus tantiaquido yec bëdamboec isnanta. —Mibi tantiemi —cananta. Nëmbo icquido Esus tantiaquidtedi mibi caic: —Unësquio iquec —quiosh. ¹⁷ Ęmbi tantiaido mibi neque. Tanta. Mibi chuinu. ¿Ada mibëdtan Esus tantiaquido chieshëmequin cuëshëdmequido icpec? ¿Ada Nuquin Papan chiaid mimbi tantiaid chienquoio yec mibi icsamenuec muaquido icpec? Adquidobëd onquec tabadenda. ¹⁸ Nuquin Icho Esuquidistun chiapadomboen nainquoio icquin ambi petequid-uidtsëqui aidon chieque. Aidon: —Mibi bëdambo iqueque. Ęmbi chiaid tantiata —quequin ambi chiapadomboen namequin Esus tantiatsëcquid icsamec. ¹⁹ —Doma yacnocquido abi tantiec Esusën chiapadec bëdamboec tabadosh —quequin mimbi naid chuibenesho dadpeshun tantiac caosh. Adsho tantiash bëdambo iquebi. Adebidi Nuquin Papan chiaid tantiec bëdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbëdi icsainquoio icta. ²⁰ Nuqui bëdamboen tabadmequid Nuquin Papa nec. Aidëmbi matses icsamequidquoio Satanas chedo comapenen cuidendac. Nëbi Satanasën mibi icsametiadquoio icsho tantiashun: —Satanas yuamenquoio icnuen Nuquin Icho Esusën abibi tantiamequiopashun —mibi caimbi.

²¹ Nëmbo icquidtedishun mibi tantiec. Mibi caic: — Unësquio iquec —quiosh Timoteyo ëbëdtan Esusën naid chuibenequidquoio. Adembidi con matsesën chiosh. Dusio caid yec Ason caid yec Sosipated caid yec quec adosh.

²² Pabadon —Naden na —cac nëid dada uaquidquoio Tesio caid nebi. Esus tantiaquid icquin ëmbitsen mibi tantiemi. Padi. Aidedtsëqui ëmbimbo tantiaquin chuishun Pabadon chiaidbidi dada uaoaimbi.

²³ Nëidteditsen mibi caic: —Unësquio iquec —quiosh. Nëidic Cayo caid. Aidën shubun ushobi. Adnuc Esus tantiaquido iccuedednuec aton shubun pudued-puduedosh. Nëidic Edasto caid. Aid nëmbocquidon bedtequid bedbeneshun dayun uaquid nec. Nëidic nuquin utsibimboecquid Cuadto caid. Aideddishun mibi aden tantiosh. ²⁴ Doma yacnocquido mibi tantiaquin: —Nuquin Icho Esuquidistun bëdamboen isquin mibi bëdamboen tabadmepashun —caimbi.

²⁵ —Nuquin Papa bëdambo iquec —canuna. Esuquidistu chuibanquin ëmbi: —Aid tantiasho Nuquin Papan mibi bëdambo icmendac —quequin chiapadomboen Esus tantiamequin Nuquin Papan mibi bëdamboen tabadmetiadquoio

iquec. Ĕndenquimboshĕ Esus tishabi icnuc matsesĕn Esus chote bĕdamboen tantiambo icpampic. ²⁶ Adnubien Nuquin Papan unĕsesambo icquin con tsusedpabo utsi-utsien Ĕsus chote chuiquin dada uamepampic. Nĕbi: —Esusĕn naid chuisho tantiaquin ma nidaid utsi-utsiec yacno tabadquidon Esusĕn chiacpadomboen nanu —queshun Nuquin Papan Esusĕn naid chuibenequido icmiac. ²⁷ Aden namec Nuquin Papa bĕdambo iquec. Abipadquid utsi nibĕdec. Ambi natiapimbo ictequid nibĕdec. Abitedimbo tantiaquid nec. Nuqui cuidmenquio icnuec abided cuidadaid Esuquidistu tantiaho Nuquin Papan nuqui bĕdamboen iseque. —Nuquin Papa bĕdambo iquec —canuna ĕnenquio icquin. Padi. Aidedi chuiquin dada uaombi.

CODINTO YACNOCQUIDON ISTE 1

Pabadon Codinto yacnocquidon iste dada uaid

¹ Pabado nebi. Nuquin Papa bunacpadomboen Esuquidistun ëbi chuibenequid ic̄ta cac nebi.

Esuquidistu tantiaquidbidi, Sostenes, nuqui con utsi caid ëbëd iquec. ² Aidbëd icquimbi Esuquidistu tantiec ic̄cuededquido mibitedi chuiquin dada uaimbi. Matses icsaquid ic̄sho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo ic̄menu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

³ Matses icsaquid ic̄sho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

Mibi tantiaquin Nuquin Papa chuided-chuidedaid

⁴ Mibi tantiaquin Nuquin Papa naden chuided-chuidedembi. Matses icsaquid ic̄sho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdambocquidbimboecnuc mimbi isec, quec bëdambo iquebi, Papa, quequin chuided-chuidedembi. ⁵ Aden Nuquin Papan bëdamboen isaido ic̄quin ambi bëdamboen tantiamiaidobidi mibitedi nec. Matses icsaquid ic̄sho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanac.

⁶ Esuquidistu tantiesabo ic̄condaidi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. ⁷ Adquido yec Esuquidistu choate caimbudec Nuquin Papan abi bëdamboec tabadaid tantiamiabi ic̄coshi quetiapimbo mibitedi iquec.

⁸ Aden abi bëdamboec tabadaid tantiamequin Nuquin Papan mibitedi chieshenquio ic̄mec ma Esuquidistupadquid ic̄nu quequin mimbi caimbudacpadquio ic̄panuna aid padpidec choanuc. ⁹ Adquid mibitedi ic̄mequin ambi Esuquidistubëd ic̄quido ic̄ta caido ambi cuëmbanaido Nuquin Papan mibitedi ic̄miac. Adoshon mibi badedquio Esuquidistupadquid yanenquiocsho isun chieshebi, quesa Nuquin Papa ic̄quin abi mibitedi bëdambocquid ic̄mebanec.

Esuquidistu tantiaquid cuëshēdacimboec chushcananquido

¹⁰ Adembidi chuinu. Tantiata. Esuquidistu tantiaquid nebi quec Nuquin Papan bēdambo icmiaid ēnacimboec tabadenda. Adec tabadec Esuquidistu tantiaquid

utsitedi tantiananec ma cuëshēdacimboec chushcananesa yampanuna.

¹¹ Esuquidistu tantiaquido Codinto yacnocquido chushcananec quec. Chido, Quēdoen shubunoēsh choquido nēambo ēbi isec choshon aden chiec.

¹² Mibi onquiaid chuinu. Tantia. Pabadon tantiamiaid nebi, quec chushquiabimboec utsi-utsiec tabadnubien; Apodosēn tantiamiaid nebi, quec chushquiabimboec utsi-utsiec tabadnubien; Petedon tantiamiaid nebi, quec chushquiabimboec utsi-utsiec tabadnubien; Esuquidistun tantiamiaid nebi, quec chushquiabimboec utsi-utsiec tabadec.

¹³ ¿Esuquidistu tantiaquido cuëshēdmenuenda ēbipadquidon chuibandiondash? Padenquo. Naden chuinu. Tantia.

¿Matses icsaquid icsho cuidnushe quiash ēbida ciudadec unēspanēda? Padenquo. Adembidi ¿Esuquidistu tantiaquid

nebi quequin ēbi mimbi chuishodambi mibitedi acten mentobandionda? Padenquo.

¹⁴ Esuquidistu tantiaquid icsho Quidispobēdta Cayo aid daēdtsēqui naondambi quec tantiec tsadebi.

¹⁵ Utsi padenquo iccondambi ma Pabadon ēbi acten mentondacsho aid tantiaquid nebi, quetiapimbo ma mibitedi icpanuna.

¹⁶ Ai, Estepanasēn shubun icquido-bidi acten mentondambi. ¿Utsidambi acten mentoponda? Padenquo iccondambi.

¹⁷ Ēbi tantiaquido acten mentoban, Esuquidistun cainquo yaqui Matses icsaid bedshunec

abided ciudadec Esuquidistu cuesten dectanac unēspanēdash quequin chuibeneta, Nuquin Papan cac aden chuibenec

nebi. Ēmbibi tantiaid chienquiocquin ma matses icsaquid icsho cuidnushe quiash abided ciudadec Esuquidistu cuesten

dectanac unēspanēdash quequin ma utsibontsen tantiapanu qeshun chuibenec nebi.

Esuquidistu abitedi tantiaquidquo nadatiambocquin nabanquidquibidi

¹⁸ Nuquin Papabēd icquido icmenuec matses icsaquid icsho cuidnushe quiash abided ciudadec Esuquidistu unēspanēdash

quequin chiac, ¿Adpecta iquec? quequin tantiesa yec Nuquin Papa yacno puduedtiapimbo iquec. Adec adquido on-

quenubi nuquien Nuquin Papa yacno puduedtequido yec Nuquin Papan nadatiambocquin nac matses icsaquid icsho

cuidnushe quiash abided ciudadec Esuquidistu unēspanēdash quequin tantiec.

¹⁹ Abi yacno puduedtemaido chuiquin Nuquin Papan dada uamiampid nad iquec:

“Comapenen tantiaquidon ambibi dadpen tantiaidtedi
ëmendambi.

Adquidon tantiatiapimbo yacpadembi natiamequin naba-
nendambi,”

quequin Nuquin Papan dada uamiampid aidëmbi nëbi naid
nec.

²⁰ Esuquidistu tantiesa ambibi tantiaidtedi naimëdan ¿mitsimbo adquido tabadpec? ¿Nidaid abubëd aidën icquidtedimbo mitsipadquidquo icpec? quequin isbanquin, Nadquio icpec, quequin comapenen adquidën tantiec. Aden tantiashic ambi tantiaid Nuquin Papan ëmiac ¿mitsimbo adquido tabadpec? ¿Midaquidën bëdamboen tantieque? Adquidën tantiaid tantianu, quec onquecuededquid ¿mitsimbo tabadpec Nuquin Papan aidon tantiaid ëmiac? Adquidon dadpen tantiaquimbi matses icsaquid icsho cuidnushe quiash abided cuidadec Esuquidistu unëspanëdash, quequin utsin-utsinquien tantiauidec. ¿Adsho isun Nuquin Papan abi yacnoda puduedmepadac? Padenquo iquec. ²¹ Nuquin Papan nadatiambocquin nac matses icsaquid cuidnushe quiash abided cuidadec Esuquidistu unëspanëdash quequin chuisho ambibi dadpen tantiaquidon tantiauidec. Ëmbi tantiaidpenquo tantiatiapibi quequin tantiatiapimbo iquec. Adquido tantiatiapimbo icnubi ëbi yacpadquidon Esuquidistu chuibanac abi tantiaquid utsibo yanec. Nuquin Papa yacno puduedtequidtedi adquido nendac. ²² Adquidon aden tantianubi Nuquin Papan nadatiambocquin nabantequid iste bunquin isadaidbon tantiauidec. Quidieco matsesëmbien, Ëbi ënden tantiec papuduedaid daëd uanu queboedëmbi Nuquin Papan chiaid tantiauidoaic. ²³ Adec tabadnubi matses icsaquid icsho cuidnushe quiash abided cuidadec Esuquidistu cuesten dectanac unëspanëdash, quequin ëbi yacpadquidon chuibanoaic. Adoquien, Nuquin Papan chomiaid nec, quequin isadaidbon cuesten dectanenquioctsenëdash, quequin tantienquo yec tabadec. Isadaidpembo, Esuquidistu mimbi chuiboed ëmbi tantiacpadpenquo iquec. Adoac mimbi Esus chuibanaid ëmbi ënden tantiaidbëdta daëd uatiapimbo iquebi quec tabadec. ²⁴ Adquidon tantiauidnubi isadaidbo utsi-utsiec adecbidi isadaidpembo utsi-utsiec Nuquin Papan cuëmbanaido icquin naden tantiec: Nuquin Papan tantiampicpadquiequi matses icsaquid icsho cuidnushe quiash abided cuidadec Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec. ²⁵ Abitedi tantiaquidquo icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nada-

tiambocquin nainquiocquin bēdiactsēc natsēcnubi adomboen tantiaquin matsesēn dēniactiapimbo iquec.

²⁶ Utsibo, ¿mitsipadquidquio mibi icponda? Nadquid mibi icpondaque. Chuinu. Tantia. Daēdpactsēc tantiatsēcquido mibi icpondac. Namequidpenquio mibi icpondac. Chuiquid dapan bacuēpenquio mibi dadpen icpondac. Adquid icsho Nuquin Papan mibitedi tantiaquin, Con bacuē caid nec, quequin mibi cuēmbanondash. ²⁷ Ai, daēdpactsēc tantiatsēcquido Esuquidistu tantiaquido icsho Nuquin Papan cuēmbanaido mibitedi nec. Adquid ambi cuēmbanaido icnubi dadpen tantiaquid iquequi Esuquidistu tantiesa icsho Nuquin Papan cuēmbantemaid nebi quequin tantiec natiaic ma shubiquiopanuna. ²⁸ Adembidi utsibon tantiauidtsaido Nuquin Papan cuēmbanaido neoaic. Adecbidi, ¿Ada matses utsi iqueque? Isnu quenquiocquin matsesēn tantiambo yaid Nuquin Papan cuēmbantequid icnuc ²⁹ ěmbi comapenen tantiaquin nabansho Nuquin Papan cuēnoshi quequin matsesēn chuitiapimbo iquec. ³⁰ Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bēdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided cuidadec unēsaid isun Nuquin Papan cuidtiapimbo nuqui iquec. Icsaisa icsho Nuquin Papan aid bēdamboen isquin adomboembidi nuquitsen isoaic. Adecbidi, aidi abi yacno bēyucanec puduedash tsadacpadec adecbidi nuquitsen tabadoaindac. ³¹ Aden nuqui tantiaquin Nuquin Papan dada uamiampicpaden, Ębibi bēdambo ictiapimbocquid icsho mimbi bēdambo icmiaid nebi, Icho, quequin ěmbi naid chienquiocquin Esusēn naidquio chuibanuna nuquitedi.

2

¹ Adembidi chuinu. Tantia. Mibi yacno nidshun dadpen tantiembi quenquiocquin daēdpactsēqui cuembo chuibanondambi. ² Esuquidistubēdta abi cuesten dectanaid chuinu quequin aiduidi mibitedi chuibanondambi. ³ Codinto yacnocquido dacuēdampambo iquec quequin uēdēequimbi mibi chuibanondambi. ⁴ Ęmbibi dadpen tantiacpadomboen chuibanenquioccombi. Nuquin Papan Mayanēn tantiamiacpadomboen ěmbi chuibanubi aidēmbi nadatiambocquin mibitedi tantiamiondash ⁵ ma Pabadon tantiamiacpadomboen tantiamioshi, quetiapimbo mibitedi icpanuna.

Nuquin Papan Mayanēn tantiamiaid

⁶ Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabenec papuduedquidon bëdamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. ⁷ Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bëdambo icmequid con mado nendac, quequin Nuquin Papan tantiapampic. ⁸ Esuquidistu nuqui bëdambo icmetequid Nuquin Papan chomiacsho adquid nec quequin chuiquid dapabon tantienquiocpanëdash. Aidon, Nuquin Papan Chomiaid Esuquidistu nec, quequin abimbo tantiaquin cuesten dectanenquo ictsenëdash. ⁹ Aidpadquid chuiquin Nuquin Papan ëndenquimboshë dada uamiampid nad iquec:

“Nuquin Papan abi tantiaquido ambi cuëmbanaido abi yacno tabadmenun nacnenaïd bëda tantiesan istiapimbo iquec.

Adecbidi Nuquin Papa yacno nadquo ictsiash, quetiapimbo matses iquec.”

¹⁰ Adnubien Nuquin Papan Mayanën Nuquin Papan abi yacnoshon bëdamboec tabadte nacnenaïd iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaïd nuqui tantiamiaoic. ¹¹ Matsesën ambi tantiacpaden chiabi yac utsin tantienquo iquec. Adembidi Nuquin Papan ambi tantiacpaden chiambocon matsesën tantiatiapimbo iquec. Abipadquid aton Mayanënuïdquo tantiec. ¹² Con mayan ëbipadquidquo menenu quetiapimbo matses iquec. Nuquin Papambien abipadquid aton Mayan nuqui menec ma aidënquo abi yacno bëdamboec tabadaïd nuqui tantiamapanuna. ¹³ Aden aidënquo tantiamiac adomboembidi ëbi yacpadquidon chuibanoaic. Ëmbibi tantiacpadpenquiocquin Nuquin Papan Mayanën tantiamiacpadomboen chuibanembi. Adomboembidi ëbi yacpadquidon chuibanoaic. Aden Nuquin Papan chiaïd chuibanac Nuquin Papan aton Mayan meniaïdon tantiaquiec. ¹⁴ Nuquin Papan abipadquid meniacmaïdon aidën chiaïd tantiatiapimbo iquec. Aden Nuquin Papan Mayanën chiaïd tantiatiapimbo icquin Nuquin Papan matses bëdambo icmenu queshun Esuquidistu chomiac matses icsaquad icsho cuidnushe quiaish abided cuidadec cuesten

dectanac unēspaneḏash quequin aidon tantiatiapimbo icoaic. Ĕmbi tantiacpadomboen Nuquin Papan chienquoio iquec, quendac Nuquin Papan abipadquid meniacmaido. ¹⁵ Nuquin Papan Mayanēn tantiamiaidombien naden utsibo tabadaid tantiec. Matses bēdamboec tabadsho isun, Nuquin Papan Mayanēn tantiamiacpadec tabadquidquoio nec, quequin nuqui tantiec. Adembidi utsi icsamboec tabadsho isun, Nuquin Papan Mayanēn tantiamiacmaid nec, quequin nuqui tantiec. Nuquin Papan Mayanēn Nuquin Papan chiaid tantiamiacmaidon nuqui naic tabadaid isash Nuquin Papan chiacpadquiec tabadquid nec quetiapimbo iquec adquid. Adebidi Nuquin Papan chiacpadpenquoio yec tabadquid nec quetiapimbo Nuquin Papan Mayanēn tantiamiacmaido iquec. ¹⁶ Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquoio nec.

¿Adquid Nuquin Papa icsho abi chuiquin

ismequid mitsicquid icpec? Adquid nibēdec.”

Nuquin Papan tantiacpadomboen aton Mayanēn tantiamiaido icquin Esuquidistun tantiacpadomboen nuqui tantianec.

3

¿Esuquidistu tantiaquid utsi icsambo iquec, quecta ique?

¹ Adembidi chuinu. Adembi tantiata. Mibi yacno tabadquin Nuquin Papan chiaid tantiabenabicquid mibitedi icsho daēdpactsēc chuibanondambi. Codinto yacnocquido bacuē uidēnabi yacimboecquido nec queshun Nuquin Papan chiaid daēdpactsēc mibitedi chuibanondambi.

² ¿Nēbi tishaidēnda pambid pepec? Padenquoio. Mibitedi adquidbimboecsho tantienquoio icnushe queshun Nuquin Papan chiaid daēdpactsēc chuibanondambi. Ĕnden iccondacpadquibi mibitedi adquibidi icoapec.

³ Esuquidistu tantiesa yec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanēn tantiamiacmaidpadquid yec nēishec chushcananec mibi. ⁴ Pabadon tantiamiaid nebi, quec utsi-utsiec chushquenubien; Apodosēn tantiamiaid nebi, quec chushqueoaic utsi. Adec chushquec Nuquin Papan Mayanēn tantiamiabi yacimboecquido mibitedi nec.

⁵ ¿Mitsipadosho mimbi ēbi isponda? Adembidi, ¿Mitsipadosho mimbi Apodos isoaponda? ¿Ĕmbembidambi mibi chuibanponda? ¿Ambembida Apodosēntsen chuibanpanēdash? Padenquoio. Tantia. Chuinu. Nuquin Papan chiacpadomboen Esuquidistu chuibenecquid ēbi daēdi nebi. ¿Pabadon chuibanubi

Nuquin Papan Esuquidistu tantiamiondashi quequinda mibitedishun tantiape? Ai, ěmbi adobanubi Nuquin Papan Esuquidistu mibitedi tantiamiondash. ⁶ Tiedĕn caniquid ěshĕ siabi yac dĕyuctiapimbo yacbimboecquid icquin Codinto yacnocquido Nuquin Papan chiaid dadpen tantiatiapimbo iquec, qeshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodostsen mibi yacno chopanĕdash. Adec choshon tiedĕn caniquid dĕyuctsash tanunquiocnoc canitiapimbo yacbimboecquido Codinto yacnocquido icnushe qeshun Apodosĕn chuibanoapanĕdash. ⁷ Tied nitsinshun taneshcain tiedĕn caniquid canimesa icbo nec. Adquiobidi Nuquin Papan chiaid chuibanquid matses tantiamesa nec. Nuquin Papambien tantiamec. ⁸ Tied icbon con tied nitsinec cho cac nashunec. Aden nabanquin nainacsho icbon abi nitsinshunquid cuidec. Adem-bidi con tied taneshcaic cho cac nashunoaic. Adem-bidi abi neshcashunquid cuidoaic. ⁹ Nuquin Papan chiacpaden Esuquidistu chuibenequid Apodos nendac. Adem-bidi Nuquin Papan chiaid chuibenequidtedi nec. Adquid ěbipadquid icnubi Nuquin Papan tiedbimboecquid mibitedi nec. Nuquin Papan shububimboecquidbidi mibitedi nec.

¹⁰ Nuquin Papa tabadte shubu uashunun buintad teshun abia tabĕcacbimboen Esuquidistuba chuibanondambi ma matsesĕn tantianueshun. Buintad tabĕcacbimboen Esuquidistu ěmbi chuibanan utsibon adomboembidi aidbidi chuibeneoaic. Bĕdamboen chuibenenuequin ĵNuquin Papan tantiacpadoamboendambi chuibanegue? Tantanu, qeshun Nuquin Papan chiaid isted-istedtiad ambi chuibeneta caidon. ¹¹ Shubu uashunquidĕn shubu uidĕn uatequid nitsinan shubu uashunquid utsibo adomboen tabĕcoanu quesa nec. Adquiecbidi Nuquin Papa tabadte uashunu qeshun buintad tabĕcacbimboen Esuquidistu ěmbi chuibanan adquid nec, quequin utsi chuibantiapimbo utsibon iquec. ¹² Buintad tabĕcaid tabadacbimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. ¹³ Adashien yuecash Esuquidistu choanuc ĵĔbi chuibanquidĕn ěmbi chiacpadoamboenda naoshe? Nĕdĕncadoquin tanu, quependac. ¹⁴ Aden nĕdĕncaquin tanac Nuquin Papan chiaid bĕdamboen chuiquidon chuibanac Esuquidistu tantiaquidombo yec buintad taudacmaid nidacbimboec abi nidendac. Adsho isun abi bĕdamboen chuibanquido Nuquin Papan menetequid nendac. ¹⁵ Adomboembidi utsibon abipenquio icnuc chuibanac Esuquidistu tantiatiapimbocquido taudaid bescashun secacbimboen secatequid nendac. Adnubi abipenquio

icnuc chuibanquido tauidtsenac bimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

¹⁶ Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? ¹⁷ Ai, Nuquin Papa tabadtequidbidi mibitedi nec. Adquid icsho mibi ic-sabudmenuequido Nuquin Papan ënenquiocquin comapenen cuidendac. Abi tabadtequid Nuquin Papan cuëmbanaido ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

¹⁸ Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuec Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. ¹⁹ Esuquidistu tantiesan tantiacpadquiec tsadquidën ëbi yacno tabadte tantiatiapimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo unësendac.” ²⁰ Adecbidi: “Adquidën tantiaidbidi ënëdtequid nec,” quequin Nuquin Papan tantiec. ²¹ Ad icnuc, Pabado tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. ²² Aidën bacuëbo icquin mibitedishun con utsi ëbi caic. Adembidi Apodosten mimbi adoaic. Adembidi Petedotsen mimbi con utsi caoic. Nidaid abubëdta uashumbic aidënquiocquidtedimbo uabanquid yec aidtedishun icbo Nuquin Papa nec. Adecbidi aton bacuë mibitedi icnuc aidtedimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aidtedi mitsanabidi nec. ²³ Mibitedishun icbo Esuquidistu nec. Esuquidistun icbo, Edoen, aton Papa nec.

4

Esuquidistu chuishunquido

¹ Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiaata. Ënden Abia Yampidën Nuquin Papan Esuquidistu chuibeneta, quenquiocpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin

mibitedishun tantiata. ² Nuquin Papan, Esuquidistu chuibeneta, cacpadomboen niaquenquiocquin ëbipadquidon chuibenetiad. ³ Nuquin Icbon, Ëbi chuibeneta, caid ëbi icnuc ¿Pabadon bëdamboenda chuipec? quequin tantianuna, ¿mimbi cactabi dacuëdpe? Padenquo. Adembidi, Nuquin Papan chiacpadomboen chiombi, quetiapimbo iquebi. ⁴ Ambi chiacpaden niaquenquio iccombi, quetiapimboenobi abitedi isquidquo abitedi tantiaquidquo Nuquin Icbo icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho isun chiendac. ⁵ Icsamboen natsiash, quec tsadenda. Nuquin Icbo choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanashun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bëdamboec tabadaid chuibanquin chuioaindac, Bëdamboen mimbi naoc, quequin.

⁶ Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantiabanec, Pabadopadquid utsi nibëdec, quesa ma icpanuna. Adecbidi, Apodospadquid utsi nibëdec, quesa ma utsibotsen icpanuna. Nuquin Icbopadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. ⁷ ¿Mitsicquidën adquid mibi icmebam-pashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiash, ëmbi tantiacpaden naombi, quepe mibi?

⁸ Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nëbi mibitedishun tantiauidpec. ¿Adpecta Nuquin Papan bëdambo icmiaido tabadpadic? Nuquin Papa yacno ënden puduedacimboec yash chuiquid dapa nebi, quiacimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibëd ëbi yacpadquido ëbi chedo ënden chuiquid dapa yacpadquido icmiondac, Cuishon, quetsiabi. ⁹ Adecbidi, Bëdambo iquebi, quec mibi tabadnubi naden tantiec tsadebique. Tantia. Chuinu. Ëmbi chuibeneta caido unëseque. Is, Nuquin Papa quiacimboecnuc ambi abi yacnoshon uaido mayan bëdabobëdta matsestedishun isbededacimboecquid nebi, quequin ëmbibi tantiec tsadebi aden isbededec aidö tabadenquiocnobi. ¹⁰ Esuquidistu chuibenequidon chuibanasho tantiauidash, Pabiate icsachitashien nec, quequin mamënshumbededashic Codinto yacnocquidon ambibi tantiaquin chuibanasho tantiaquidquo nec,

quepec Esus tantiesabo. Adecbidi, utsibo dacuëdampambo iquec, quiash uëdëequin Esuquidistu chuibenequidon Nuquin Papan chiaid chuibanubi cuesambo yacbimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. ¹¹ Esuquidistu chuibenequid yequi pistsëc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsëcquid dasiuidquid nebi. Adquiecbidi Esuquidistu chuibenequid utsibo iquec. Utsin mëyanded-mëyandedaid nebi. Quenenash iquenquo icquin capucuenequin Esuquidistu chuibenec nebi. ¹² Con pete bednuequin shubumpi nacnenquidquo iquec chonoadsho isquin utsibon mamënshunaid nebi. Aden mamënshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bëdamboen ista, Papa, quequin aido chiembi. Utsin mëyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. ¹³ Adembidi, utsin ëbi mua uaquin chiaqui cuidnanenquiocquin bëdamboen chiembi. Adembidi ëmbi Esuquidistu chuibeniqui icsactsëcquid nec, quequin ambi secanu caidbimboecnuc ëbi ispec. ¹⁴ Adecbidi, Bëdambo iquebi, quec mibitedi tabadnubi mëyamboc tsadebi. Adec ëbi tabadaid ëmbi chiac Codinto yacnocquido unësquo yampec, quenquiocquin ëbi tabadaid mibitedi tantiamenuen dada uaombi. Pabadon chiaid abimbo iqueque. Bëdamboec tabadnuna mibi camenuen dada uaombi, con bacuëbo. Mibi tantiac unësquo iquec. ¹⁵ Mibi chuibanquid utsi dadpen nëbi icnubi Esuquidistu ëmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ëbia yanshun Esuquidistu chuibanac mibitedi Esuquidistu tantiaquido yampondac. Ëmbi chuibanacpaden chiaid tantiaquido con bacuëbo ëmbi caidtedi nec. Adquid mibitedi icnuc papa nebique. ¹⁶ Ëmbi nacpadomboen naic tabadta quequin mibitedi chiembi. ¹⁷ Mibi ëmbi nacpadquiec tabadte tantiamenuequin Timoteyo mibi yacno nidmembi. Aidi ëmbi chuibanac Esuquidistu tantiaquid icpondash. Adquid iccondacsho ëmbi con mado caid aidi nec. Aidi Esuquidistu tantiaquidquo icquin utsi-utsiec yacnoshon ëmbi chuibeniacpadomboen chuibanoaquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aibidi nec.

¹⁸ Mibi utsi-utsiec Pabado choainquo iquec quequin abimbo tantiacbimboen chuibanec. ¹⁹ Aden adquidon

chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindami. ²⁰ Nuquin Papa tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. ²¹ ¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

5

Esuquidistu tantiaquid ambi chudtemaid chudquid cacumeta caid

¹ Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. ² Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsho isash unësquio icquimbi aidi cacumepatecnëdan. ³ Mibëd ictiapimbo yequi mibëd yacbimboecquin dada uaquin icsaquid cacumeti-adquidi mibi nenëdac quequin chuibanombi. ⁴ Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin ⁵ icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

⁶ Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisac bimboec mibitedi adquiobidi ictsiac. ⁷ Ënden mibitedi Esuquidistu tantiesabo yec icsaquin ismec maisaccondacpadec maismane queshun icsaquid nidmeta. Ëbi cuidmenquiocnoec abided ciudadec Esuquidistu unëspanëdash, quiash aid icsaisa yacpadquiec tabadta. ⁸ Aden ambi naid tantiec icsaondacpadpenquio yec ma tabadpanuna. Aidquio tantiembi, quec abimbo tantiadonec ma tabadtenepanuna.

⁹ Ambi chudtemaid chudquidbëd iccuededenda, quequin ënden dada uaondambi. ¹⁰ Esuquidistu tantiesabëd iccuededenda, quenquiocquin Esuquidistu tantiaquid adquid icsho isash iccuededenda, quequin dada uaondambi caimbi. Ambi chudtemaid chudquid Esuquidistu tantiesada dpen iquec.

Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacne-
 naid tantiaquid Esuquidistu tantiesa dadpen iquec. ¿Adquido
 ismane quiash mitsimbo mibi tabadpe? Nuquin Papa yacno
 adquid nibëdec. Nuquin Papa yacno nidash icsaquid isen-
 quio yec mibi tabadendac. ¹¹ Esuquidistu tantiaquid nebi,
 quequid icsadenesho isash adquidbëd iccuededenda caimbi.
 Esuquidistu tantiaquid nebi, qeshun ambi chudtemaid
 chudquin ënesabëd iccuededenda. Adecbidi, muaquin bed-
 banquidbëd iccuededenda. Adecbidi, Esuquidistu tantiaquid
 nebi, qeshun matsesën Nuquin Papan uaidbimboecnuc nac-
 nenaïd tantiaquin ënesabëd iccuededenda. Adecbidi, Es-
 uquidistu tantiaquid nebi, qeshun ambi tantiacpadpen-
 quiocquidën chuïsho mamënshumënquin ënesabëd iccuede-
 denda. Adecbidi, Esuquidistu tantiaquid nebi, qeshun
 cuesanquin ampequin ënesabëd iccuededenda. Adecbidi,
 Esuquidistu tantiaquid nebi, quiash ëmbi chuïbocpadquid
 icsaquidbëd iccuededenda. Adembidi aidobëdtan penda.

¹² ¿Esuquidistu tantiesa abi icsaid chuiquin cacumeta, que-
 quindambi chuipe? Padenquio. Esuquidistu tantiaquid
 mibëd icquid icsadenequin ënenquiocsho isun Nuquin Papan
 chiaïd comapenen tantiaquin mibi icsaid ënta, quequin chui.
¹³ Nuquin Papambien Esuquidistu tantiesa icsaid chuiquin
 cuidendac. Mimbi Esuquidistu tantiaquid icsadenequid
 cacumeta.

6

*Ëbi chushcananaid tantiashun mimbi tantiacpaden chui
 caïd*

¹ Esuquidistu tantiaquid daëd nëishash chushcananec,
 queoaic. Adquid chuïnu. Tantia. Nëishash chushcananash
 Esuquidistu tantiesa yacno nidshun, Ëbi chushquiaïd chuïsho
 tantiashun ¿midapaden mimbi chieque? Ëbi chui, quequin
 mimbi chuïpec. ¿Atotsi quiash Esuquidistu tantiaquid
 yacno nidtiadquidi Esuquidistu tantiesa yacno nidshun
 mimbi adquid chui, cape? ² Yuecshun, ¿Midapaden mimbi
 Esuquidistu tantiesan naïd chieque? Tantiïnu. Chui, abi
 tantiaquido Nuquin Papan caquïen ¿nuqui chiacpaden aïdo
 Nuquin Papan cuidendac, quequin tantienquïoda mimbi
 icpe? Yuecshun tantiesan naïd chiïmbi, qeshun ¿Atotsïeshun
 Esuquidistu tantiaquidbëd chushcananash tantiesa yacno
 nidshun mimbi chuïbampe? ³ Yuecshun, ¿Ëmbi uaido
 mayanën naïd midapaden mimbi chieque? Tantiïnu. Chui,
 Nuquin Papan caquïen ¿nuqui chiacpaden aïdo cuidendac,
 quequin tantienquïoda mimbi icpe? ⁴ Adquidon naïd

ëmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nëishash chushcanansho tantiashun, Esuquidistu tantiesa yacno nidshun, Ëbi chushquiaid chiacsho mimbi tantiacpaden ëbi chui, mimbi capec? ⁵ ¿Esuquidistu tantiaquid utsibo nibëdpecta ictic? ¿Esuquidistu tantiaquidën icsamboen chuinushe queshunda Esuquidistu tantiesa yacno nidshun, Ëbi chushquiaid chiacsho mimbi tantiacpaden chui, mimbi capec? ¿Bëdamboec tabadaid Esuquidistu tantiaquid utsibon comapenen tantienquioctsiash, quequinda mimbi tantiape? ⁶ Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibëd chushcananaid mimbi chieque. Adenda.

⁷ Ëbi chushcananaid ëbi daëdshun chiacsho tantiashun mimbi tantiacpaden chui. Tantanu, quequid mibëd icnuc Nuquin Papan bëdambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nëishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nëishash chushcanampe? ⁸ Cuidnante bunec mibi adpec. Naden natiad. Ëbëd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

⁹ ¿Icsadenequin ënesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec icsate bunquid yec Esus tantiaquid nebi quec mibibi mua uadenda. Ambi chudtemaid chudquin ënesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacnenaid tantiaquin ënesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bënëpen chudmequin ënesa, adecbidi dada daëd chichudnanquin ënesa, adecbidi chido daëd dachudnanquin ënesa Nuquin Papa yacno yuedtemaido nendac. ¹⁰ Adembidi, ampequin ënesa Nuquin Papa yacno yuedtemaid nendac. Adembidi, muaquin utsin na bedquin ënesa, adembidi, ambi tantiacpadpenquiocquidën chuisho mamënshunquin ënesa, adembidi, cuesunianquin ampequin ënesa. Adquido Nuquin Papan ambi abucshun nacnenaidën tabadtemaido nendac. ¹¹ Ënden mibi adquo iccondaiddi nëbi utsi-utsiec padenquo icsho isash Nuquin Papa mibi cuidenquo yec mibi icsaid bëpiscudac. Adembidi, Nuquin Papan mibitedi bëdambo icmebanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mib-

itedi isoaic.

Ëmbi chudtemaid chudmane queshun adquid isuidteneta quiaid

12 Ëmbi natemaid naden nata caid nibëdec queshun naic bëdambocquid ictiapimbo iquebi, quiash padenquio yec tsadebi. Aden nabanquin ëntiapimbo icmane quiash padenquio iquec tsadebi. ¹³ Matsesën chebudaid pucu yacno budash dada bëdambo icmianquid nec. Yuecash matsesën dada chodquetequid nendac. Padnuen, ëbi tabadte ma icpanuëshun Nuquin Papan matses uapampic. Abi tantiaquid abi tabadte iquec. Adecbidi adquidbëd Nuquin Papa iquec. Ad icnuc mimbi chudtemaid chudquid icta, quenquio Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anëdënquequid nësecatequid nendac. ¹⁴ Nadatiambocquin Esuquidistu Nuquin Icbo Nuquin Papan uincuemepanëdash. Aidëmbi nuquitsen abi tantiaquid icsho uincuemendac. ¹⁵ ¿Abi tantiaquid icquin, Esuquidistubëd daëdash tabadquid nebi, quequin tantienquioda mimbi icpe? Ai, aidbëdi daëdtequid nuqui nec. ¿Adquidbëd daëdashabi icsaquidbëd daëdoape? Padenquio iquebi. ¹⁶ ¿Dadpen chudmequid chudash daëdacbimboecquid nec, quequin mibitedishun tantienquioda icpe? Aid daëdi dada abentsëc yacbimboecquid nec, quequin Nuquin Papan dada uamiampid nec. ¹⁷ Nuquin Icbobëd daëdaïdien Icbon tantiacpadquieç tabadquid nec.

¹⁸ Ëmbi inacmaid chudmane queshun chido utsi isuidteneta. Padenquio yec icsaquidbëd daëdquid mibi iquendac. Ambi chudtemaid chudquid aton namibëd ëquëducuësh daëdaïd nec. Nami umanucuësh icsaïd namibëd daëdtiapimbo iquec. ¹⁹ Nuquin Papan Mayan tabadtequid Esuquidistu tantiaquido nec. ¿Nuquin Papan ëbëd tabadmiaïd abipadquid nec, quequin tantienquioda mibitedishun icpe? Èbibi nuquin icbo nec, quetiapimbo matses iquec. Adecbidi, Con icbo nibëdec. Ëmbi tantiacpaden naimbi, quetiapimbo mibi iquec. ²⁰ Nuquin Icbo cuesten dectanac matses icsaquid icsho cuidnushe quiash abided cuidadec unësquid Nuquin Papan icmiac abi tantiaquid yec aidën na mibitedi nec. Adoaidi ambi chiapaden ismec bëdamboec tabadteneta.

7

Dada chidobëdi daëdaïd

¹ Nēbi mimbi dada uaboed isombi. Aid isun ěmbi tantiacpaden chiembique. Tantiata. Chido inquit dadatedida ictiad quequin mimbi tantiapec. Padnuen, Chido bedenquo iquembi, qesho chido ĩnta cainda caimbi mibi. ² Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsĕc inquit dada ictiad. Adecbidi dada abentsĕcshun inaid chido ictiad. ³ Con chido ěmbi inaid nec, quequin aiduidi chudquid icta. Adecbidi con bĕnĕ ěbi inquit nec, quequin aiduidi chudmequid chido nec. ⁴ Chidon dada daĕdash aton bĕnĕn dadabidi nec. Adecbidi dadan dada chidon dadabidi nec. ⁵ Aid daĕdi daĕdabi yac bimboec, Padi, quenda. Adboedi, Nuquin Papa chuinuec nĕidtedi ushquin padenquo nuqui iquec, qeshun ěnta. Aidtedec ushquin padenquiocshon, Ęmbi yuen ěntiapimbocsho isun Satanasĕn icsamenushe qeshun padpiden nata. ⁶ Ęnta quenquo iquebi. Nĕidtedi ushquin padenquo iquembi quiash mibi daĕdi aidtedecuidi ushec ěnĕdta caimbi. ⁷ Padnuen, chido inesa ěbi yacpadec dadatedi icpashun. Dada utsi-utsiec Nuquin Papan icmiacpaden chido inquit icnubi utsi-utsiec chido inesa iquec.

⁸ Chido inesa ěbi tabadacpadec dada utsitedi tabadec bĕdambo ictsias. Adecbidi dadan inaidpen bĕdambo ictsias chido. Dada bĕnua adecbidi bĕdambo ictsias. ⁹ Adquid icquin isuidtiapimbo yec comapenec chudte bunquin chido ĩnta. Adecbidi chido bĕnua dada isuidtiapimbo iquec dadan inaid icta.

¹⁰ Daĕdash niamĕnenda. Ęmbibi chienquiocquin Nuquin Icbon aden chuinedacpadembi chiembique. Tantia. ¹¹ Min bĕnĕ nianash utsin inaid iquenda. Dadan inaid icnu quec mimbi niamboedĕn inaid icoata. Adembidi chido inquit min chido bunenquiocquin abi icsaid dada uashun ismequin nidmenda.

¹² Nēbi Nuquin Icbon naden chuiban cainquiocnobi ěmbia Esuquidistu tantiaquid icquin Esuquidistu tantiaquid utsibo ěmbi chuibocpadembi mibitedi chuioaimbique. Tantia. Dada aton chidobĕdi Esuquidistu tantiesa icboedi aton bĕnĕ Esuquidistu tantiaquid yanuc aton chido padenquo yec, Con bĕnĕ nianu, quenquo ictsias. Adquid icsho isash. Con chido icsambocquid nec, quenquo yec abĕdi tabadquid bĕnĕ. ¹³ Adecbidi chido utsi aton bĕnĕbĕd Esuquidistu tantiesa icboedi aton chido Esuquidistu tantiaquid yantsias. Aden Esuquidistu tantias, Con bĕnĕ icsambocquid nec, quenquo yec bĕnĕ nianec nidesa chido. ¹⁴ Esuquidistu tantiabi yec daĕdacpadec aton chido Esuquidistu tantiaquid yanash aidbĕd abentsĕc yac bimboec tabadec bĕnĕ. Adec

bëdamboec tabadsho isun Nuquin Papan chido bëdamboen tabadmequin bënëtsen bëdambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, utsibo quenushe quiash bënëbëd abentsëc yac bimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yac bimboec tabadsho isun, Bëdambocquidën bacuëbo nec, quequin utsibon ispec.

¹⁵ Utsimbic ambi bedboedën aton chidon Esuquidistu tantiasho isun aton chido nidta catsiash. Adoaquien, Mibëd tabadte bunebique. Èbi nidmenda, quetsiash chido bënë caic. Adoaqui, Nidec nid, cac cacuidenquio yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoaquien, Mibi unësquio iquéc, quetsiash bënë. ¹⁶ Adnubien dadan nidta caid aton chido Esuquidistu tantiaquid yec bëdambocquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bëdambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

¹⁷ Mibi Esuquidistu tantiaquid yanash Nuquin Papan tantiacpadec tabadnu quiash adequi tabadta. Adomboembidi Esuquidistu tantiec iccuededquid utsibo chuibanombi. ¹⁸ Esuquidistu tantiesa shui dëbid dëteshunaid yec Esuquidistu tantiaquid yanash èbi shui dëbid dëteshunacmaid bimboecnuc nacnemenü quenquio yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemenu quenda. ¹⁹ Shui dëbid dëteshunaidta nec, quenquio yec Nuquin Papa tsadec. Adecbidi, Shui dëbid dëteshunacmaidta nec, quenquio yec Nuquin Papa tsadec. Adquid nec quenquio yec, Èmbi chiapadomboen nadenequidta nec, quec Nuquin Papa tantiec tsadec. ²⁰⁻²¹ Adec Nuquin Papa tantiec tsadnuc yua Esuquidistu tantiaquid yanash yuapen icnu quenquio yec tabad. Adecbidi, utsin yuapenquio yec utsin yua icnu quenquio yec tabadoa. ²² Yua Esuquidistu tantiesa icboedi Esuquidistu tantiaquid yansho isun, Yua nec, cainquio icquin Nuquin Icbon cuënendac. Adembidi, utsin yuapenquio Esuquidistu tantiesa icboedi Esuquidistu tantiaquid yanash Nuquin Icbon namiaidquio nendac. ²³ Matses icsaquid icsho cuidnushe quiash abided cuidadec unësquid Esuquidistu Nuquin Papan icmiac aid tantiaquid iquéc, Con icbo

nec, quiaſh utſin yuaid iquenda. ²⁴ Adembidi chuinu. Tantiata. Nuquin Papan mibi cuënuſ matses yec Eſuquidiſtu tantiaquid yanash, Èbëd tabadquid con Iſbo nec, quec matses yec bëdamboec tabadta.

²⁵ Chido inesa bëdta dadan inacmaid chuita quequin mimbi dada uaid iſun aidotsen chiemi. Aido tantiaquin naden chuita Nuquin Iſbon cainquio yaqui Nuquin Iſbon ëbi chuibeneta caid icquin naden mibitedi chiembique. Tantiata. ²⁶ Natiateguid icnuſ Eſuquidiſtu tantiaquid chido inesa yec adequi tabad. Adecbidi, dadan inacmaid yec adequi tabadta chido. ²⁷ Chido inquid yec chido inesa icnu quenda. Adecbidi, chido inesa yec chido inu quenda. ²⁸ Chido inesa iſboedi chido inquid yanash Nuquin Papan chiaid niaqueſa nec. Adecbidi, dadan inacmaid iſboedi dadan inaid yanash Nuquin Papan chiaid niaqueſa chido nec. Natiaic cameſtequid icnuſ, ¿Mitsipadentsimbi con chidobëdta con bacuëbo bëdambo icmepeba? quec chido inquid tabadec. Chido inesa in aden tantienquio yec tabadec. Natiaic cameſtequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiemi ma natiamianquieſc quenquio yec ma mibi tabadnueſhun.

²⁹ Èmbi chuiboed mibi bëdamboen tantiamembique. Tantiata. Nidaidën yueſc tabadnu, quetiapimbo nuqui iqueſc. Nuquin Papa chieſhënte uſhë chonoc abi tantiaquid dadpen mëyanſho iſaſh Eſuquidiſtu chote anoentsëqui yaneque. Abi yacno utſibo puduedtiapimbo icnuſhe queſhun min chido icnubi Nuquin Papa bunacpadomboen nabanec tabadta. ³⁰ Adecbidi, unëſquio yec ſhubiquimbi Nuquin Papa bunacpadomboen nabanec tabadta. Adecbidi, bëdambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquio yec Nuquin Papa bunacpadomboen nabanec tabadta. ³¹ Yueſcſhun ëmbi nidaidënſhun bedaid Nuquin Papan ëmendac, quequin tantiaquin ambi chiacpadomboen nabanec tabadta.

³² Natiateguid nibëdpashun, queſhumbic natiamiantequid iquendac, quequin tantiemi. Aden tantiaquin chido inesa icſta caombi. Chido inesa Eſuquidiſtu tantiaquid icquin Nuquin Papan tantiacpadenuidi nanu queſhun aden nabanec tabadpec. ³³ Chido inquidien, Nuquin Papan tantiacpadenuidi nanu quiaſh, ¿mitsipadentsimbi con chidobëdta con bacuëbo bëdambo iquebi camepeba? quec tabadec. ³⁴ Adquid Nuquin Papan tantiacpadenuidi nanu quetiapimbo iqueſc. Dadan inacmaidien Eſuquidiſtu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacſho con bënën bëdamboen iſtiſiaſhi,

quec tabadec. ³⁵ Aden mibi chuibanquimbi chido inesa chido bednu quesho, Chën, caisa nebi. Nuquin Papan chiacpadomboen nabamboedëmbi utsi uain tantianushe queshun ëmbi tantiaid chuibanec nebi. Nuquin Papan tantiacpadomboen bëdamboen tabadmenuequin aden tantiaquin chuibanec nebi.

³⁶ Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi, dadan inacmaid macho budsho isash, Bacuë tishtiapimbo yantsiash, quiash, Con champi inec cho, quiash icsatiapimbo adquid icoaic. ³⁷ Adecbidi, min champi inu queboedi, Bedenquio iquembi, quesho tantiashun menenda. Aden bedmenquio yec mibi bëdambo icpec. ³⁸ Con champi bedec cho, queshun bedmiash, Bëdambo iquebi, quenubi, Con champi dadan inacmaid iquec quec bëdamboshë utsi icpec.

³⁹ Dadan inaid icquin min bënë nianenda. Min bënë unësan utsin inaid icnu quiash adta. Esuquidistu tantiesan inaid iquenda. ⁴⁰ Bënuu utsin inacmaid icnu quiash bëdamboshë iquec aid. Ëmbi tantiacpaden ëmbi chuiboed Nuquin Papan Mayanën tantiamiacpaden chiaid nec.

8

Nuquin Papan uaidbimboecnuc nacnenaïd tantiaquin pambid dasanaïd

¹ Nëbi Nuquin Papan uaidbimboecnuc nacnenaïd tantiaquin pambid dasanaïd chuïnun naden chiembique. Tantiata. ¿Matsesën nacnenaïdta nuqui tantiaïd ictic? Padenquio. Aden tantiaquin ëmbi tantiacpadpenquio icquid utsibo nec quequin mamënsyumpec. Aden tantiaquin mamënsyunquin utsi tantienquio iquec. Utsien, Naden nabanquindambi utsibo bëdamboen tabadmepeba, quequin tantiaquidquio nec. ² Ëmbibi tantiembi quequid tantiabenabictscëquid nec. ³ Nuquin Papa tantiaquidien Nuquin Papan tantiaïdquio nendac.

⁴ Aden chuïshun ¿Nuquin Papan uaidbimboecnuc matsesën nacnenaïd tantiaquin pambid dasanaïdtambi pepe? quequin mimbi chuïquin dada uaboed isun chuïnu. Tantiata. Nuquin Papan uaidbimboecnuc matsesën nacnenaïd nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibëdqüec. ⁵ Nidaïdën samëdqüid papa cain utsin cuënaïd dadpen iquec. Adembidi abuc samëdqüid Papa cain utsin cuënaïd dadpen iquec. ⁶ Papa cain nuquin cuënaïdien Abia Yampidquio nec. Adquid utsi

Nuquin Papa cainquo nuqui iquec. Aidi abitedimbo uabampampidquo nec. Aidquo tantiec nuqui tabadec. Adembidi Nuquin Içbo cain cuënaidquo Esuquidistu nec. Aidëmbi aton Papabëdtan abitedimbo uabampampid nec. Aidi cuesten dectanac abided ciudadac nuqui cuidtiadquid icnubi Nuquin Papan cuëmbanaido yec ambi tantiaido nuqui nec.

⁷ Adembidi aid abentsëqui nuqui tantiaidquo icnubi Nuquin Papan uaidbimboecnuc matsesën nacnenaids utsibon tantiaid iquec. Aden nacnenaids tantiaquin pambid dasanaids aidon pepec. Aden peboedëmbi Esuquidistu tantiaquid yanshun nacnenaids tantiaquin pambid dasanaids ëmbi pesho isun, Icsaosh, Nuquin Papan canushe, qeshun adquid petiapimbo yanebi. ⁸ Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesën nacnenaids tantiaquin pambid dasanaids penquiocsho isash, Aid bëdambocquid nec, quenquo Nuquin Papa iquec. Adecbidi, nacnenaids tantiaquidën dasanaids pesho isash, Aid bëdambocquid nec, quenquo icoaic Nuquin Papa.

⁹ Padnuen Nuquin Papan uaidbimboecnuc matsesën nacnenaids tantiaquin pambid dasanaids ëmbi bedshun pesho isash, Esuquidistu comapenen tantiaquidën tantiaids nacnenaids nec, Esuquidistu tantiabënbicstsëccquid quenushe qeshun padenquo iquembi. ¹⁰ Aid pesho isash, Nacnenaids papa cain cuënaids nepec, qeshun, Aid tantiaquin ëmbitsen pambid dasanaids penu, quetsiash Esuquidistu tantiabënbicstsëccquid. ¹¹ Padnuen ëmbi piaid Nuquin Papa tantiamianesa nec quequin mimbi tantiec. Aden tantiaquin nacnenaids tantiaquin pambid dasanaids mimbi pec. Aden tantiaquin mimbi penubi Esuquidistu tantiabënbicstsëccquidën Nuquin Papa tantiamiantequid nacnenaids tantiaquin pambid dasanaids nec, quequin pec. Esuquidistu comapenen tantiaquid mibi icquimbi nacnenaids tantiaquidën dasanaids ëbi icsainquo ictequid nec quequin pequin Esuquidistu tantiabënbicstsëccquido mimbi icsameyoc. Mimbi icsamiaido tantiec Esuquidistu unëspanëdash. ¹² Ad icnuc Esuquidistu tantiabënbicstsëccquid mimbi icsamequin Nuquin Içbon chiacpadomboen niacquid mibi neyoc. ¹³ Padnuen Esuquidistu tantiaquid utsibon icsamboen tantiaquin penushe qeshun padpiden penquo iquembi ma icsainquo icpanu qeshun.

9

Esuquidistu tantiaquidon natequid

¹ Esuquidistu chuibeneta cacmaid Pabado nec quequidot-sen chuinu. Tantia. ¿Matsesën nata caidtabi nedi? Padenquo. Esuquidistun ëbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuibanac mibitedi abi tantiaquido yanenquioda ictionda? ² Ai, ëmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ëmbi chuibanacmaid icnubi, Ëmbi chuibanaido mibitedi nec, quequin tantiembi. Ëmbi chuibanac Esuquidistu tantiaquid mibitedi yanshun, Esuquidistun ëbi chuibeneta caidquo nebi, quequin Pabado chiaid abimbo iquec, quequin bëdamboen tantiaquidquo mibi nepec tantesa uainquiocquin.

³ Aden ëmbi Esuquidistu chuibanac abi tantiaquid mibitedi icquimbi utsin-utsinquien ëbi icsamboen chiec. Naden ëbi chieque. Tantia. Pabado Bednabebëdtan chuibansho pemenuioctiad, quequin chiec. Aden chiec onquequid ëmbibi tantiaquin naden aido chiembique. Tantia. ⁴ ¿Esuquidistu chuibanec bundoenquiodabi icpe? ⁵ Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic? ⁶ Adembidi, ¿Mibi pemembique. Penuequin nabanenda, capenda Esuquidistu chuibenequid utsibo mimbi ique? Bednabebëdta ëbi chiec, ¿Penun daëdshun shubumpi nacentiad, quepecta mibi ique?

⁷ Ad yenquo utsibo iqueque. Tantia. Chuinu. ¿Sondado icquinda aton na buanshun pepec? Padenquo. Abi nashunquidombien pemeshun acmec. ¿Icbo abi nashunquid aton tiedën caniquid pemesada nepadic? Padenquo. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. ⁸ ¿Aden chuiquin ëmbibi tantiaidtambi chuipo? Padenquo. Nuquin Papan Moises dada uamiampid ëmbi chiaid nec. ⁹ Nad iqueque. Tantia. Chuinu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chiaidquo nec. ¿Bacanuidi ma penu quequin Nuquin Papan chiaidta nepadic? Padenquo. ¹⁰ Matsesbëdtambi ma penu quequin Nuquin Papan chiaidquo nec. Adembidi ambi piaid tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec.

¹¹ Adembidi, ¿Nuquin Papan chiaid mibi paquiacquid yec pete bec cho quenquotiadquidtabi nedi? ¹² Mibi chuibanquid utsibo menebanquimbi ëbia mibi chuiquidquio icsho menetiadquidi menianenquio mibi icpoc. Aden ëbi menenquio yaqui ëmbi chiaid tantienquio icnushe quiash, Bec cho, quetiapimbo iquebi mibi caic. Aden chuibanec bundoquiec capuecuenec nebi. ¹³ Nuquin Papa tabadte shubu uashunaid yacnoshon nashunquidën ashunquio peshun aquec. Adembidi ashunquio nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? ¹⁴ Adomboembidi Esuquidistu chuibancho abi tantiaquidon yuedec, quequin Nuquin Papan chiaid nec.

¹⁵ Ëbi yuedtiadquidi nec, quequin tantiequi ¿adabi pemenu yuedpec? quesa nebi. Adembidi, Ëmbi dada uaid buamiacsho isun ëbi yuedtsiash, quequin dada uainquio iccombi. Bunquiec unësbudec mibi caic, Bec cho, quenquio iquendabi. ¹⁶ Ëbibi Esuquidistu chuibenenu quenquiocobi. Ambi ëbi chuibeneta cac Esuquidistu chuibenec nebi. Abi chiesa yanash unësquio ictsiabi. ¹⁷ Ëmbibi, Esuquidistu chuibenu, quiash, Bec cho, quetsiandabi. Esuquidistun ëbi chuibeneta caid yec ambi namiaidquio nebi. ¹⁸ Esuquidistu chuidenesho isash, ¿atotsi Pabadon bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

¹⁹ Bec cho, quesa yec utsin yuacmaid nebi. Adquid yequi utsibo chuinec nidanec shubu utsin puduedcuenequin aidon namiaidbimboecquin aidbëd tabadquin chuibanec nebi. Adec tabadquin ëmbi chiac ma aidotsen Esuquidistu tantiaquido yampanuna. ²⁰ Adecbidi, isadaidbo Esuquidistu chuibanec aidobëd tabadquin mimbi natemaid ëmbi natemaidpenquio nec, quenquiocquin ambi natemaid nainquio iquembi. Adquiec tabadquin ëmbi chuibanac ma isadaidbotsen Esuquidistu tantiaquido yampanuna. ²¹ Adecbidi, isadaidpembo chuibanec aido tabadacpadec abëdi tabadquin Esuquidistun chiacpadec niaquenquio yec tabadec nebi. Ëmbi adoac isadaidpembotsen ma Esuquidistu tantiaquido yampanuna. ²² Adecbidi, Esuquidistu tantiabenabictsëcquido chuibanec ëmbi tantiabenabi iccondacpaden bëyuc tauain chiaidquio tantiamenuen chuibanec nebi. Ëmbi adoac ma aidotsen Esuquidistu tantiabenquidquio yampanuna. Adequi tabadquin Esuquidistu chuibanec nebi. Ëmbi adoac utsibo ma

Esuquidistu tantiaquidquio yampanuna. ²³ Adec tabadequi ma ěmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

²⁴ Titinguecuededquido icnuc bĕyuc abia titinguec choquid iquendac. Adquid icsho isun, Mibi badedquio titinguioc, quequin tingueta quequidĕn titinguec abia choquid menendac. Adembidi, Nuquin Papan menete bĕda iquec. Aid bednu, qeshun Icbon chiacpadomboen nabanta, caimbi mibi. ²⁵ Badedquio titinguenuequid bedte bunaid chodquetequid icnuc, Aid bednu, qeshun abi bĕdiactsĕc titincamete pete icsa actequid icsabĕdta isuidec titinguenuequid iquec. Nuquien chodquetemaid bednuequin icsaid isuidec. ²⁶ Utsien, Bednu, quenquio yec titinguec. Adembidi, Bednu, quenquio yec utsibĕd mĕdanten senanu quequin nibĕdacnoshombi mĕdanten seded-sededec. Aden tantiaquin naisa nebi. ²⁷ Utsibon ma tantianu qeshun Esuquidistu chuibeniasch unĕsacsho Nuquin Papan menete bĕda bedtiapimbo icmane quiasch icsaid mĕmunec tsadebi.

10

Isadaidbon chieshampicpadec tabadenda quiaid

¹⁻² Abi yacno abi tantiesa chosho puduedmenquio icchitoshe quiasch Nuquin Papan chiaid chieshĕnenquio yec bĕdamboec tabad, quequin tantiamenuen, Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mĕnchicaidobĕd Moises puduanec Nuquin Papan bĕyucamiaid abu ushu tĕdion nidanequin tsusedpabon Acte Piu potepampic. ³ Adec nidaniash yuecash aidtedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. ⁴ Adembidi acte bundoacsho isun cuĕnote cuesquin acte chomiaid acash, Ĕbi bĕdambo icmequin Nuquin Papan ambi yuecshun chometequid Quidistubĕdtan nadatiambocquin naid nec, quequin tsusedpabon utsin-utsinquien tantiabempampic. ⁵ Aden tantiabenubien abĕd icquid utsibon padenquio icpampic. Aden tantiesa Nuquin Papan nidaid Canan caid menenu caid yacno niduidequi unĕsbudnepampic adquidtedi.

⁶ Tsusedpabo chieshampicpadquid icnushe qeshun Nuquin Papan aido chuiquin dada uamepampic. ⁷ Ad icnuc tsusedpabon Nuquin Papan uaidbimboecnuc nacenashun papa cain tantiampicpaden tantienda. Naden Nuquin Papan aido chuipampic. Bacabimboecnuc ambibi nacenaid tantiaquin peshun acash baidacuededpampicpaden tantiaquin nainda. ⁸ Adembidi, tsusedpa utsibon ambi

chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. ⁹ Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unësbudnepampic. ¹⁰ Adecbidi, Equipito yacnoshon mënchicaido abi mënchicquid chieshec nadpampic. Equipito yacno iquec bëdambo iccondaidi nëmbo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bëdabo Nuquin Papan budmiaidën aitedi cuesunepampic.

¹¹ Abi tsibanquido tantiamenuquin tsusedpabo tabadnëdaid icsa Nuquin Papan chuiquin dada uamepampid ëmbi chuiboed nec. ¹² Tsusedpabo Nuquin Papa chieshë nec icsapampicpadec icsamane quequin mibi tabadte tantiaata. ¹³ Ènden tsusedpabo chieshëmete icpampid abi iquec. Adaid natiatequid icnuc chieshënushe queshun Nuquin Papan mibi tantiaquin uidën uac mibi icsainquio yec chieshtoenquio yec dayacquio iquendac.

Nuquin Icho Esuquidistu unësaid tantiaquin acshumbic mayan icsa tantiaquin mimbi actiapimbo iquec quiaid

¹⁴ Nuquin Papan chiaid niacmane quiash, Nuquin Papan uaidbimboecnuc matsesën nacnenaïd tantianu, quenda. Dacuëdec cuenacbimboec aid nanacno nidenda. ¹⁵ Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquio yec Esuquidistu chuibansho tantiec iccuededteneta. ¹⁶ ¿Iccuededquin sicaïd acnun Nuquin Papa chiec onqueshun acted-actedquin matses icsaquid icsho cuidnushe quiash abided cuidadec Esuquidistun intac chididiquiaïd tantien icquinda nuqui acti? ¿Adembidi, pete cuësh-cuëshun Nuquin Papa chiec onqueshun aton dada mëyanaid tantien icquinda nuqui pedi? ¹⁷ Esuquidistubëd abentsëc yacbimboecquido nebi, quequin tantiaquin pete cuësh-cuëshun meniac abentsëcshun piacbimboen abi tantiec iccuededquidon pebededec.

¹⁸ Aden nuqui pebededacbimboen isadaïdbo icsaïd cuidnuen nidaidën capuquidded cuesuniaïd pambid tauiquin Nuquin Papan shëdtequid pambid bedshun cuesunequidbëdtan nidaidën capuquid icbon pepanëdash. ¹⁹ Aden ëmbi chiac ¿atotsi Pabado ëbi tantiamete bumpec, quepecta mibi ique? Mibi naden tantiamembique. Tantia. ¿Nuquin Papan uaidbimboecnuc matsesën nacnenaïd tibopecta iquec? Padenquio. ²⁰ Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacnenaïd yacnoshon

pambid dasanec. Aden aid pambid penu, queshun mayan icsabëd yachimboecquid nebi, quequin pec. Adquidbëdtan penda. ²¹ Nuquin Icho Esuquidistu unësaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaid tantiaquin pete peshun mayan icsa tantiaquin pambid petiapimbo iquec. ²² ¿Aid tantiaquin acshun pequin Nuquin Papa nëishmenquioda mimbi icti? Ai, abitedi tantiaquidquio icquin abitedi isquidquio icquin Nuquin Papan mibi cuidendac.

Ëmbi natemaid naden nata caid nibëdec, quiash nanueboedi Esuquidistu tantiaquid utsi icsamemane quiash nainquiocte chiaid

²³ Nëid mishtemaid nec. Nëid petemaid nec. Nëid actemaid nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquio yec tsadebi. Matsesën ambi nacnenaid tantiaquin pambid dasanaid ëmbi tantiacmaid nec, quiash pambid dasanaid petiadquio iquequi Esuquidistu tantiabenabictsëcquidën, Nëid nacnenaid nuquin papa caid nec, quequin penushe quiash penquio yec tsadebi. ²⁴ Utsi tantienquiocquin nacnenaid pambid dasanaid piash bëdambo iquebi, quenda. Naden natiad. Matsesën nacnenaid pambid dasanaid ëmbi pesho isun utsibon icsamboen tantiatsiash, quequin penda.

²⁵ Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaid pambid dasanaid bedaidta nec? quenquiocquin bedta. ²⁶ Abu nidaidbëdta uashun aidënquio icquidtedi Nuquin Papan uampidquio nec. Aidtedimbo aton na nec. Nacnenaid yacnoshon pambid sambededaid aton na nec. Aidën bacuëbo iquec aid pambid pequido mibi nec. ²⁷ Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaid tantiaquin pambid dasanaid bedaidta nec, quenda. ²⁸ Adnubien mibi puduedacno isedquid utsi Esuquidistu tantiabenabictsëcquid tsadquin, Matsesën nacnenaid papa cain cuënaid tantiaquin dasanaid nëid pambid nec, cac aid pambid penda. ²⁹ Ëmbi papa cain cuënaid nec, quequin utsin tantianushe queshun aid pambid penda. Matsesën nacnenaid con pa nec, quequin cuënaid tantiesa icquin ¿atotsieshumbimbi matsesën nacnenaid tantiaquin pambid dasanaid penquio iqueque? Chuinu. Tantia. ³⁰ Nuquin Papa ëmbi tantiaidquio icnuc penun aidi chuisho isash ¿atotsieshun matsesën nacnenaid papa cain tantiaquin pepec utsibo quepec? ³¹ Edoen utsibo tantiamenuen bëdamboen nabanec tabadteneta. ³² Aden naic, Esuquidistu tantiaquid

isadaidbo isadaidpembobēda Esuquidistu bēdamboen tantiabemequiono, quec bēdamboec tabadta. ³³ Naden naic ēbibi bēdambo iquebi, quenda. Naden ēmbi nabanuc ēbēdi utsi bēdambo ictsiaish, quequin tantiata ma Nuquin Papa yacno puduedtequid utsibo yanu qeshun.

11

¹ Ambia tantiaquidēn Esuquidistun icmiacpadquiec tabadec nebi. Adecbidi ēmbi chuiquin ismiacpadquiec tabadteneta mibitedi.

Nuquin Papa tantiaquin iccuededquin naid

² Mimbia tantianēdaidquio mibi nec, quequin mimbi chidaid tantiaquin nabanec nebi, quequin mimbi dada uashun bēmiaid isash bēdambo iquebi. Adembidi, Esuquidistu tantiabēdaidon chuibanaid mimbi chiacpadomboen tabadec, quequin mimbi dada uaid bēmiaidon chuibanasho tantiash bēdambo iquebi.

³ Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. ⁴ Adquid Nuquin Papa nec, quequin, Aid chuinu, qeshun aton mauete chicquid dadan. Aid chuinen mauet tabadquin, Ēbi chuiquidpenquio Esuquidistu nec, quiacbimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec.

⁵ Chidoen, Ēbi chuiquid Esus nec, quequin ismec mapucudash tsadec. Adec mapucudenquio yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquio ictiad. ⁶ Ēbi chuiquid nibēdec, quiacbimboec tabadsho matasmetiad. Matasmiash ma mapucudpanu chido.

⁷ Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ēbi chuiquid Abia Yampid nec, quequin ismenuet aid chiech onquec mauete mauesa dada nec. ⁸⁻⁹ Dadaba Nuquin Papan uapampic. Dadabēd icquid uanuna qeshun dadan shictodo chicshun chido uashun, Mibēd nashunanquid nec, quequin dada menepampic.

¹⁰ Adquid icmiac dada ēbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquio yec Icbon chiacpadquiec tabadec. ¹¹ Nēid chido nec. Nēid utsi dada nec, quenubi nashunanquid abi daēdi nec. ¹² Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi

nec. ¹³ ¿Nuquin Papa chuinuec ëbi chuiquid nibëdeque. Matasadnu quiash chido bëdamboda icpadic? ¹⁴ Chido isadacpadec isadnu quec icsambo dada ictsias. ¹⁵ Chido isadacpadec dada icsho isash, Chido nec, quetsias. Dada isadacpadec chido isadenuio iquec. ¹⁶ Ëmbi chuiboed tantiash, Icsamboen chiosh, quetsias. Adquid naden chuinu. Tantia. ¿Ëmbentsëquidambi aden chie? Padenquio. Ëbipadquiocquin chuibenquidon adomboembidi chuibanec. Adembidi Esuquidistu tantiec iccuededquid utsibon tantiabedec.

Nuquin Icbo unësash uincuenaid tantiaded-tantiadedta quiaid

¹⁷ Adecbidi, Mimbi naidtedi bëdambo iquec, quetiapimbo iquebi. Adquid chuinu. Tantiata. Esuquidistu tantiabenuid utsibo icmenu, quenquio yec mibi iccuededec. ¹⁸ Abentsëc yacbimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. ¹⁹ Nëidtedi ëmbi bëdamboen isaïdo nec. Utsitedi ëmbi icsamboen isaïdo nec, quiash cuëshëdabimboec mibi tabadcuededec. ¿Adec tabadshoda Nuquin Papan mibi bëdamboen ispec? Padenquio. ²⁰ Adec tabadquin Esuquidistu unëste tantienquiocquin utsin-utsinquien peshun acted-actedec. ²¹ Utsibo cainenquiocquin abia choquidon nua pebedec. Adoac utsibo choash bunec tabadnubi abia choquido paëmbocquid nua acash tantienquio yec tabadec. ²² ¿Min nuntan pete nibëdpecta iquec? Mitsana iquec. Adec mitsana min shubuno icnuc ¿Esuquidistu unëste tantiec utsibobëd iccuedednu, quenquiocquina mibia choshon pebedede? ¿Natiastianquiec pete nibëdchitec pete nibëdquid camenuenda mimbia pebedede? Aden pebededquido ¿atotsimbi chuipe? ¿Bëdamboen mimbi nabanec quepectabi ique? Padenquio. Aden naquin Esuquidistu unësaid tantienquiocquin mimbi pec.

²³ Nuquin Icbon chiapadomboen mibitedi chuibanondambique. Tantiata. Chuinu. Nëid inchëshëmbi ëbi chieshënuïdo ëbëd icquidën ëbi bedmendac, quequin Esuquidistun abi unëste tantiaquin nadopanëdash. Pete bedshun ²⁴ Nuquin Papa chuishun cuësh-cuëshun naden abëd icquido chuipanëdash: “Pete cuëshaid bedash matses icsaquid icsho cuidnushe quiash ëbided cuidadec unëste tantiaquin pebededta,” quepanëdash Esuquidistu. ²⁵ Aden chuishumbic aid pebededsho isun pete utsi pebededquin nainshun adembidi dëshote bedshun sananquin naden Esuquidistun chuipanëdash: “Esuquidistu unësqin ëbi chian anëdënquiacno nësecatequid icsho mënchictequid Esuquidistu iquec, quequin tantiaquin sicaïd acbededta. Sicaïd acquin

ëbi mënchictequid iquec quequin tantiaquin acban.”²⁶ Aden Esuquidistun ismenëdacadomboen pete cuëshëmpi pebededshumbic sicaid acbededta. Nuquin Icho unësaid tantiadedtantiadedquin aid padpidec choabicnuc adobanta.²⁷ Abi unëste tantienquiocquin pete cuëshun peshun acquin Esuquidistun chiaid niacquid nec.²⁸ ¿Pete cuëshëmpi penun Esuquidistubëd tabadacpadquiectabi tabadpe? quequin mibi utsibëd tabadte tantiata.²⁹ Esuquidistu unësaid tantienquiocquin peshun acquid Nuquin Papan cuidendac.³⁰ Aden adquidon peshun acac utsi-utsiec padishec; utsi-utiec daicsambo yanec; utsi dadpen ënden unësaid.³¹ ¿Adabi Nuquin Papan chiaid niaquenquo yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unësaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquo iquendac.³² Adesa icsho Nuquin Papan natiaic camiaid mibi iquendac. Abi tantiesabëdta chian anëdënquequid nësecadenquo mibi icmenuen Nuquin Papan mibi natiaic camec ma ëmbi chiacpadomboen nabamenuquin.³³ Adembidi Esuquidistu unësaid tantianuec iccuededquin utsibo choabi iquec quequin aido cainta.³⁴ Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unësaid tantianuequin naden nata quequin chiombi. Mibi yacno nidash puduedshun ëmbi chuiboed daëd uain chiendambi.

12

Nuquin Papan Mayanën tantiamiaid

¹ Nuquin Papan Mayanën tantiametequid chuinu. Tantiata.² Ënden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesën ismec, Nëid papa cain cuënaid nec, qesho tantiaquido mibitedi iccondac.³ Adquid iccondaidi Esuquidistu tantiaquid mibi yanacsho naden chiembique. Tantia. Nuquin Papan Mayanën tantiamiaido: Esus Nuquin Icbopenquo, Nuquin Papan Chomi-acmaid nec, quetiapimbo adquido iquec. Adecbidi, Nuquin Papan Mayanën tantiamiacmaido: Esuquidistu con Icho nec, quetiapimbo icoaic.

⁴ Nuquin Papan Mayanën, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsëcquiobi tantiamianquid Nuquin Papan Mayan nec.⁵ Adecbidi, utsi nashunquido Esuquidistu tantiaquido icnubi utsi nashunquidon

Ichbo abentsëcquiobi Esuquidistu nec. ⁶ Adecbidi, nadatiambocquin nabanquid utsi-utsiec icnubi Nadatiambocquin namianequid abentsëcquiobi Nuquin Papa iquec.

⁷ Esuquidistu tantiaquid utsibëd tantiananquin namenu, quequin aton Mayan Nuquin Papan nuqui menec. ⁸ Nuquin Papan Mayanën tantiamiac ambia comapenen tantiaquidquio icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. ⁹ Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bëdamequid utsi-utsiec iquec. ¹⁰ Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuiampid tantiaquin chuibanquid utsi-utsiec iquec. Nuquin Papan Mayanën tantiamiac matses bëdamboec tabadsho isash, Nuquin Papan Mayanën tantiamiaid nec, quequin tantiaquidquio utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. ¹¹ Aden Nuquin Papan Mayanën tantiamiac nabanquido nuquitedi nec. Ambi tantiacpaden abentseabentsen Nuquin Papan Mayanën aden tantiamec.

Dada abentsëc yacpadquiec Esuquidistu tantiaquidtedi iquec

¹² Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. ¹³ Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meni-aido nuqui nec.

¹⁴ Matsesën dada abentsëqui icnubi uidënaid dadpen iquec. ¹⁵ ¿Mëdantepadquidpenquio yec matsesën dada uidënacmaidta taë icpec? Padenquio. Dada uidënaid taë iquec. ¹⁶ Adecbidi, ¿ëshëpadquidpenquio yec matsesën dada dëccuësquiacmaidta dëbiate icpec? Padenquio. Dëbiate dëccuësquequid iquec. ¹⁷ Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? ¹⁸ Nuquin Papan tantiampicpadquiequi matsesën dada uidënaid nec.

19 Dëccuësquequid abentsëc icnuc dada nec quetiapimbo iquec. ²⁰ Uidënaid dadpembëd dëccuësquequid dadpen icnuc matsesën nami abentsëqui iquec.

²¹ Matsesën dada ad icnuc, ¿Mëdante bëdambo icnubi ëshë padenquio iquec, quepecta mibi ique? Padenquio. ²² ¿Isadesa uidënaid uquëducquid nibëdnuc matsesën dada bëdamboda icpatsiash? ²³ Uidënaid uquëducquid ismenquiocquin ompoaidquio utsi nec. ²⁴ Nami isaidquio ompodesa nec. Nuquin Papan tantiampicpadquiequi ompoaid nibëdnuc matses cuëdenquio yec unësec. ²⁵ Ad icnuc, Icsambo icmi-aneque. Tësnu, quetiapimbo icbo iquec. Ompoaid ompodesa aibëdi iquec bëdambo yec nashunanquid aitedi nec. ²⁶ Abentsëc paëmbo iquec matsesën dada bëdambo iquenquio iquec. Adquidtedi bëdambo iquec matsesën dada abichobi paëpenquio iquec. Adecbidi, Esuquidistu tantiaquido abentsëc yachimboec iquec abentsëc icsacsho isash abitedi unësqiuo iquec. Abentsëc, Bëdambo iquebi, quenuc aibëd abitedi bëdambo iquec.

²⁷ Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yachimboecquid nuqui nec. Abi tabadtequid iquec. ²⁸ Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid icscho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bëdamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yachimboec nuqui tabadec. ²⁹ ¿Esuquidistu tantiaquidtedida ambi ëbi chuibeneta caid icpadic? Padenquio. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquio. ¿Esuquidistu tantiaquidtedida, Nadec tabad, quequin ismequid icpadic? Padenquio. ³⁰ Adecbidi, ¿Esuquidistu tantiaquidtedida bëdamequid icpadic? Padenquio. ¿Esuquidistu tantiaquidtedida abi onquiacmaidën onquequid icpadic? Padenquio. ¿Utsi onquiacmaidën onquesho tantiaquidën tantienquiocsho isun aidon onqueten onquequin chuibanquidtedida icpadic? Padenquio. ³¹ Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

Utsi tantiaquidquio

Ëmbi chuiboedtedi Esuquidistu tantiaquido Nuquin Papan Mayanën tantiamete bēdambo iquec. Padnuen ambi tantiamequin bēdamboshē icmetequid iqueque. Aid tanti-
 auidquidba chuiboshombic aid tantiaquidquio chuinu. Tanti-
 tiata.

13

¹ Matses utsi-utsiequid onquiacpadquiec anquiadquid, adecbidi Nuquin Papan abi yacnoshon uaid, mayan bēda onquiacpadquiec onquequid icquimbi utsi tantiesa icquin chuibansho abipenquio chuisho utsibon tantiendac. ² Utsibic, Nuquin Papan Mayanën tantiamiac chuibanquid adembidi Nuquin Papan chienquio icampid Nuquin Papan Mayanën tantiamiac tantiaquid aidi niosh. Aidēmbidi Nuquin Papa nadatiambocquin naquidquio nec, quequin tantiaquin, Mananuc macuësh dapa icboedi acte nantan nēnitsinoa, Papa, cacpadomboen nēnitsinoac nidquid isquid icquimbi utsi tantiesa icsho, Bēdamboquid mibi nec, Nuquin Papan catiapimbo iquec. ³ Utsibic, aton na nibēdsho menequidquio niosh. Adembidi, Esuquidistu tantiesa nebi cata, cac padenquiocsho mēyanaid niosh. Adquid icquimbi utsi tantiesa icsho, Bēdamboen mimbi naoc, Nuquin Papan catiapimbo iquec. ⁴ Padnuen Nuquin Papan Mayanën bēdamboshē ictequid tantiamiaid nadquio iqueque. Chuinu. Tanti. Utsi tantiaquidquio utsi tantiamequionec chushcanesa nec. Utsi tantiaquidquio nashundenequid nec. Utsi tantiaquidquio utsin na isash adquidquio con na bēpashun quesa nec. Utsi tantiaquidquio dēniacanquidquio yec dēniacanquidquio nebi abibi quesa nec. Utsi tantiaquidquio ēbentsēqui tantiaquidquio nebi quiacimboen nabanesa nec. ⁵ Utsi tantiaquidquio utsi icsamboen tantiaquin nabanesa nec. Utsi tantiaquidquio, Ëmbentsēqui tantiacpadomboenuidi utsitedishun nabantiad, quesa nec. Utsi tantiaquidquio badedquio nēishesa nec. Utsi tantiaquidquio abi icsamboen nasho cuidesa nec. ⁶ Utsi tantiaquidquio utsi icsambocsho isash, Unēsquio iquebi, quec tsadquid nec. Adecbidi, utsi bēdamboesho isash, Bēdambo iquebi quec tsadquid neoaic. ⁷ Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibēdsho isash ampiash badedquio quenquio yec ¿mitsimboembi nampoba? quec onquequid nec. Utsi tantiaquidēnquio utsi icsadenesho isun, Tantiamic Nuquin Papan chiacpadomboen natsiash, quequin chuibanendac. Aden chuishun bēdamboen nasho isnuen cainquid nec. Mēyanaqui chieshenquio yec dayacquio yec tabadtenequid utsi tantiaquidquio nec.

⁸ Utsi bēdamboen tantiaid ēnēdtiapimboctequid nec. Nuquin Papan chiaid chuibantsaidien ēnēdendac. Adecbidi, matses onquiaidtedi ēnēdendac. Adecbidi Nuquin Papan ambi uaidtedi ėmiac matsesēn isquin tantiaid ēnēdoaic. ⁹ Nabanaidtedi tantiabenabictsēcquidquio nuqui nec. Adecbidi Nuquin Papan chiampidtedi tantiabenabictsēcquidquio nuqui neoaic. ¹⁰ Nidaidēn tabadquin aidtedi tantiabenabictsēcquidquio nuqui icboedi Nuquin Papa yacno puduedash abitedi tantiaquidquio nuqui iquendac. ¹¹ Bacuē yec bacuēmpi onquiacpadec onquepadenebi. Adembidi, bacuēmpin tantiabenabi yacpaden tantiapadenembi. Adquid icquin caniaidēn tantiacpadpenquiocquin tantiapadenembi. Adquid icboedi caniaish bacuēmpin tantiacpadpenquiocquin tantiabenondambi. ¹² Nēbi isnanten bēisadquin Nuquin Papabimboecquid nuqui isec. Yuecshun abi yacno puduedshun aidquiobi Edoen Nuquin Papa nuqui bēistuidendac. Nēbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bēisquin nuqui tantiabenendac aid.

¹³ Nidaid ēnēdnuc nēidtedi ēnēdtemaid iqueque. Chuinu. Tantia. Ambi chiacpaden nabanquidquio Nuquin Papa nec, quequin tantiaid ēnēdtemaid nec. Adecbidi Nuquin Papa yacnoēsh abipadquid bēdambocquidquio iquendabi, quequin cainquin tantiaid ēnēdtemaidquio nendac. Adecbidi, utsi tantiaid ēnēdtemaidquio neoaindac. Aidtedi ēnēdtemaid icnuc nidaidēn tabadquin, Utsi tantiembi, quequin ismiac utsi dadpen Esuquidistu tantiaquid yanash mibēdi Nuquin Papa yacno tabadendac. Adquid bēdamboshēcquid nec.

14

Mimbi chiaid chuibanquid ēbi icme, Papa, quaid

¹ Utsi tantiaquid icta. Nuquin Papan Mayanēn adquid icmioshi, quequin ambi tantiamete utsi bunquiebique. Adec bunsho mimbi chiaid comapenen bēdamboen chuibanquid ēbi icme, Papa, quequin chuiban. ² Aden tantiamiac tantiamenu qeshun tantianuequidēn onqueten chuiban. Aton onqueten onquenquiocsho aidon tantienquio iquec. Padnuen onquiaidtedimbo Nuquin Papan tantieque. Aden nidaidēn icquid onquiacmaidēnquio Nuquin Papan Mayanēn tantiamiacpadec onquequin Nuquin Papa chiec onqueta. ³ Ma Esuquidistu utsibon tantiabenu, qeshun Nuquin Papan chiaid chuibanec. Adembidi matses ma bēdamboec tabadnu qeshun chuibanec. ⁴ Nuquin Papan Mayanēn tantiamiac nidaidēn icquid onquiacmaidēn

onquequin onquequiduidtsëqui tantiabenquid yanec. Padnuen Nuquin Papan chiaid Nuquin Papan Mayanën tantiamiac Esuquidistu tantiaquido ma Nuquin Papan chiaid tantiabenu queshun chuibanec. ⁵ Nuquin Papan Mayanën tantiamiac nidaidën icquid onquiacmaidën Esuquidistu tantiaquidtedi onquepashun. Aden chuishumbic adec onquenuiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidën icquid onquiacmaidën chuibanac tantianuequidën tantienquio iquendac. Aden tantienquiocsho isun abi daëdi onquiaid tantiaquin chuibanquid nibëdnuc nidaidën icquid onquiacmaidën chuibanenda caimbi.

⁶ Adembidi chuinu. Utsibon tantia. ¿Mibi yacno choash puduedshun nidaidën icquid onquiacpadec onquenuiocquin ëmbi chuibansho tantienquio yec, Bëdambo iquebi, quecta mibi tabadpe? Padenquio. Nuquin Papan chiaid dada uamiampid min onqueten ëmbi chuibansho mimbi tantiabampec. Min onqueten chuibanenquio yec ëbibi onquiacbimboecsho mimbi tantienquio ictsandac. ⁷ Shoncatempi abibi shoncadiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuëdëmesan tentencate cuëdëmesho tantias, Adomboen cuëdëmenquio iccosh, quec. ⁸ Adembidi, utsibo yacno ma cuesnanu queshun chomenuequin sondadon tantiabocpadpenquiocnoc shoncac choenquio iquec. ⁹ Adecbidi, utsi onquiacmaidën onquequin chuisho ¿mitsipaden tantiapatsiash? Utsibon tantienquio iquec. Aden chuibanec nibëdacno onquiacbimboec onquepec. ¹⁰ Onquete utsi-utsiec dadpen iquec. Aton onqueten onquequin chuibansho matsesën tantiec. ¹¹ Utsin onqueten chiac tantiatiapimbo yec, Onquequin chuibanquid con matsespenquio nec, quequin tantiec. ¹² Ad icnuc, Nuquin Papan Mayanën ëbi tantiampec, queshun, Esuquidistu tantiaquido ma tantiabenquido yampanu queshun mimbi chiaid chuibanquidquio ëbi icme, Papa, quequin Nuquin Papa chuita.

¹³ Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquio ëmbi chuiboed chuioaquid icme, Papa, ma tantiapanu, quequin Nuquin Papa chuita. ¹⁴ Nuquin Papa chiec ëbi onquiacmaidën onquesho utsibon tantienquio iquendac. ¹⁵ Aden abi onquiacmaidën onquequin utsibon tantienquio icsho ¿mitsipadentsimbi tantiampe? Naden naimbi. Iccuededquido onquiacmaidën onquequin Nuquin

Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidën Nuquin Papan naid chiec cuëdënashic tantiamenuc iccuededquidon onqueten cuëdënoanuna. Adem-bidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenquo iquebi. Adecbidi abi onquiacmaidën cuëdënenquo iquebi. ¹⁶ Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantiash, Mibi bëdambo iquec, Papa, quequin chiendac. ¹⁷ Abi onquiacmaidën onquequin Nuquin Papan naboed chuibanac Esuquidistu tantiadonequidquo mibëd iccuededquido yantiapimbo iquec.

¹⁸ Èbibi utsin-utsinquiec onqueten onquequidquo icnubi mibitedi adesa nec. Padnueni adec onquec bëdambo iquec, Papa, quequin chuided-chuidedembi. ¹⁹ Padnuen chuinec Esuquidistu tantiaquido iccuededacno puduedash ma tantianu quiash aton onquete daëdpactsëc tantiash anquiadquid icquin aitedictsëqui chiendambi aido onquiacmaidën onquenquiocquimbi.

²⁰ Adembidi chuinu. Utsibon tantia. Bacuëbo tantiaben-abictsëcquid yacpadquiec icsaid tantiesa icta. Ènden caniaidën tantiabenshun ismiacpaden bëdamboec tabadquin ismeta. ²¹ Nuquin Papan chiampid nad iqueque. Tantia: “Èmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin èmbi chiacpadomboen nate bunenquo icoaposh,” quequin Nuquin Papan dada uamiampid nec.

²² Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. ²³ Padnuen Esuquidistu tantiaquido iccuededacno Esuquidistu tantiesa puduedshun abi onquiacmaidën abitedi onquecuededsho tantiash, Aidon tantiate ic-sabudpash, quepec. ²⁴ Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantiash, Icsaobi. ²⁵ Nëbi èbi bëdambo icmequid Esuquidistu tantiate bunebi, qeshun abi icsaid ambi chienquiocboed Nuquin Papa chiashic, Nëmbo iccuededquidobëd

mibi iquec, Papa, quequin chuibampec Esuquidistu tanti-
aquid yanshun.

Abentsēcshun-abentsēcshunquien chuiban, quequin chiaid

²⁶ Adembidi chuinu. Adembi tantiata. Esuquidistu tantiaquid iccuededec cuēdēnu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidēnquo onquequin chuinu, utsi quenubien; mibi onquiacmaidēn chuisho tantiombique. Min onqueten chuinu, utsi quetsiash. ²⁷ Aided, Chuinu, qesho ¿mitsicquid chuita nuqui cape? qeshun naden chiac bēdambo ictsiash. Chuinu. Tantia. Mibi onquiacmaidēn onquequin chuinuequid daēd icnuc bēdambo ictsiash. Abentsēc chotsēcnic adebidi bēdambo ictsiash. Aided icquin abentsēcshun-abentsēcshunquien onquequin chuiban, cata. Aden abentsēcshun onquequin chuisho abi onquiaid tantiaquidēn iccuededquidon onqueten chuibanta, cata. ²⁸ Padnuen abi onquiaid tantiaquin chuibanuequid nibēdnuc, Tsadquin Nuquin Papauidi otacquiocquin chuita, cata.

²⁹ Adebidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daēd icnuc bēdambo ictsiash. Abentsēc chotsēcnic adebidi bēdambo ictsiash. Aided icquin abentsēcshun chuibanubi, ¿Nuquin Papan Mayanēn tantiamiacpadomboenda chuibanegue? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon. ³⁰ Abentsēcshun chuibanubi Nuquin Papan Mayanēn tantiamiac utsi: Ēmbitsen chuibanu, qesho tantiashun ma aidēn chuibanu quish ambia chuibanquid ēnēd. ³¹ Adquidēn iccuededquidtedi tantiamenuquin abentsēcshun-abentsēcshunquien chuibanta. Aden chuibanusho tantiash ma chieshenquo yec bēdambo icpanu. ³² Nuquin Papan Mayanēn tantiamiaid utsibēd bēdamboec tabadquid nec. ³³ Nuquin Papan tantiamiacpadequi utsi onquenubi onquenuquo utsibo tabadec. Onquenu, utsi quenuc, Ai, onqueta, qeshun onquenuiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adebidi tabadquido nec.

³⁴ Esuquidistu tantiaquido iccuededacno otacquo tabadquid chido. Chuibanacnoēsh onquenu, quenda chido. Nuquin Papan chiacpadec ēbi chuiquid dada nec, quec chido. ³⁵ Anoshon chiaid tantienquo yec tsadquin cainec shubuno nidash, Tantienuquo iccombique. Nuqui tantiaboed ēbi chui, qesho tantiashun chiec aton bēnēn. Tantienuiocquin

cainenquoio iquec chido icsambo iquec. ³⁶ ¿Mimbía Nuquin Papan chiaid chuibanquidoda ne? Padenquoio. ¿Chuibanac Esuquidistu tantiaquido mibitedictsëquida yanondac? Padenquoio. ³⁷ Nuquin Papan chiaid chuibanquidquoio nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec. ³⁸ Aden mimbi tantianubi, Pabadon dada uaosh, quenquoio utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

³⁹ Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi onquiacmaidën onquequin chuinuesho, Ai, cata. ⁴⁰ Adecbidi, Nuquin Papan Mayanën tantiamiac chuibanuequid dadpen icnuc utsibo bëdamboen tantiamenuequin abentsëcshun-abentsëcshunquien chuibanta.

15

Esuquidistu uincuenaid

¹ Adembidi chiembique. Tantia. Matses icsaquid icsho cuidnushe quiash abided cuidadec Esuquidistu unësaid ëmbi chuibansho tantiash, Ai, abimbo iquec. Aid tantiembi, mibi quiampondac. Aden tantiadonec chieshenquoio yec mibitedi tabadec. ² Aden, Aid tantiabenu, qesho Nuquin Papan mibitedi bëdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bëdambo icmebanacmaid nec. Adecbidi, ambi yuednu cacmaidquoio adquid nec.

³ Utsin ëbi tantiamiacpaden mibi chuibanondambi. Adembidi chuinu. Tantia. Nuquin Papan chiacpadomboen matses icsaquid icsho cuidnushe quiash abided cuidadec Esuquidistu unëspanëdash. ⁴ Unësaçsho shëcuë nacnenaidën nauedshun bëtashacsho daëdec ushtanquin ambi chiampicpaden Nuquin Papan uincuen uapanëdash. ⁵ Aden uincueniac choquin, Uincuenobi, quequin Petedo Esuquidistun ismepanëdash. Adshumbic adembidi abëd 12ted icquido ismeoapanëdash. ⁶ Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanëdash. Aid uincuenacsho isquido dadpen abi tabadnubi utsi-utsiec padenquoio iquec. ⁷ Aden aidtedi ismeshumbic aton utsi Santiacotsen Esuquidistun ismeoapanëdash. Adshumbic, ambi ëbi chuibeneta caidtedi

ismeoapanēdash. ⁸ Aden aido ismequin nainshun yuecshun ēbitsen ismeoapondashi. Icsactsēcquiocquid nec, quenquiocquin ismebenondashi tsyuecquio. ⁹ Abi tantiaquid mēyanquin cunesunemequidquo icboedi abi tantiaquid yanacsho Esuquidistun, Ēbi chuibeneta, cainquioctiadquidēmbi adquid icta caid nebi. ¹⁰ Esuquidistu tantiaquid yansho isun ēbi chieshaid cuidenquo yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. ¿Ēmbentsēquidambi chuibenedio? Aton Mayan Nuquin Papan meniac aidbēd icquin chuibeniombi. ¹¹ Adembidi, ēbi yacpadquidon Esuquidistu chuibanac utsitsen abi tantiaquido yampondash.

Matses unēsash uincuenaid

¹² Adec Esuquidistu unēsash uincuenondash, quequin chuinubi ¿mitsipaden tantiec uincuenta nibēdec quec utsiutsiec onquepec? ¹³ Uincuenta nibēdnuc Esuquidistu uincuenenquo ictsempanēdash. ¹⁴ Esuquidistu uincuentequid icmiambocnoc abi chuibanquid muambo ictsandac. Esuquidistu tantiaquid nebi, quiaidbidi muambo ictsandac. ¹⁵ Nuquin Papan naid chuibanquidtedi muaquidquo icoatsandac. Aden tantienquiocquin ēbi yacpadquidon chuibanendac. Unēsash uincuentequid nibēdnuc ēbitedishun Nuquin Papan Esuquidistu uincuen uapanēdash quequin chiaid abipenquo ictsandac. Unēsash uincuenta nibēdnuc Nuquin Papan uincuemiaid nibēdtsandac. ¹⁶ Unēsash uincuenta nibēdnuc Esuquidistu uincuentiapimbo ictsempanēdash. ¹⁷ Aid uincuenambo icnuc matses icsaquid icsho cuidnushe quiash abided cuidadquid Esuquidistu nec, cainquo mimbi ictsandac. Matses icsaquid icsho cuidnushe quiash cuidadquid nibēdtsandac. ¹⁸ Aid uincuenambocnoc abia tantiaquido tsusedpabo Nuquin Papa yacno puduedtiapimbo ictsempanēdash. ¹⁹ Nidaidēnuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaiqui ambi tantiaid choenquo ictsandac.

²⁰ Ēmbi chuiboedtedi adtiapimbo iquec. Esuquidistu Nuquin Papan uincuen uapanēdash, quequin chiaid abimbo iquendac caimbi. Nuquin Papan ambi abia uincuemiaid abi yacno puduedmequin ambi uincuemetequid dadpen iquendac, quequin chiaid abimbo iquec. ²¹ Unēstequid bēyuc dada yanampicpadec matsesdedi adecbidi iquec. Adecbidi, unēsash uincuentequid Esuquidistu yanacpadec abi tantiaquidtedi adquiobidi iquendac. ²² Bēyuc dada Adan caidēn tsyuecquidtedi adecbidi unēstequido nec.

Esuquidistun bēdambo icmiaid uincuentequido neoaic.
²³ Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. ²⁴ Aden bedoanquin abi tantiaquidtedi bēyucanec choquin Nuquin Papa Edoen caid ismequin, Nēidtedi min shubu abentsēquēn tabadquido nec, quequin chiendac abi chieshēnquidtedi chēn quetiapimbocnoc. Aido ambi nebudacbimboecquido iquendac. ²⁵ Abi chieshēnquido utsitedibēd chuiquid icquin abi chieshēntiapimbocquid aido Esuquidistun icmebanendac. ²⁶ Adoshombic ēnquimbi unēstequid nibēdquidquo Esuquidistun icmeoaindac. ²⁷ Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquo aton Papa iquec. ²⁸ Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsēcquiobi nendac.

²⁹ Unēsash uincuentequid nibēdnuc, ¿atotsieshun, Ēnden unēsaid uincuenendac, quequin tantiembi quequin utsibon acten ambibi mentomepec? ³⁰ Adecbidi unēsash uincuentequid nibēdnuc ēbi unēs uate utsibo comapenec buncuededsho isun ¿atotsieshun, Uincuentequid iquec, quequin ēbi yacpadquidon chuibampec? ³¹ Unēsash uincuentequid iquec, quequin tantiembi. Aden tantiaquin Esuquidistu, Nuquin Icho, ēmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unēsmane quenquiocquin Esuquidistu unēsash uincuenta iquec, quequin chuibenec nebi. Aden badiadquidēn-badiadquidēnquien chuibanubi ēbi unēs uate utsibo bunec. ³² Uincuentequid nibēdnuc, ¿atotsi quenuequini Epeso yacnoshon, Uincuenta iquec, quequin chuibansho mēyanaqui chieshenquo yec dayacquio tsadpe? quetsiabi. Adecbidi uincuenta nibēdnuc: “Unēsash nibēdquieci quebi, quequin nua peshun aguembi,” quetsiabi. ³³ Aden tantienquo iquembi. Adembidi tantienda. “Uincuenta nibēdec quequidbēd capuenda aidēn tantiacpadec icmane quiash.” ³⁴ Adquidpadquid icquin mimbi ic-samboen tantiaid ēnquin Nuquin Papan chiaidquo tantiaata. Esuquidistu tantiec mibēd iccuededquid utsi-utsiec, Nuquin Papa nadatiambocquin uincuemianquidquo nec, quequin tantiesa nec. ¿Adquid mibēdi icnuc Nuquin Papan bēdambo icmiaido mibitedida icpe? Padenquo.

Uincuemequin dada chuca meniaid

³⁵ ¿Mitsipadec unēsaid uincuempec? utsi quepec. Adecbidi, ¿mitsipadquid uincuentequidēn dada icpec? utsi queoapec.

³⁶ Adquidën icsamboen tantieque. Chuinu. Tantia. Mimbi tiedën chococaid tauibëd ëshë chococatequid napi dëyuctequidpadpenquo iquec. ³⁷ Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. ³⁸ Nuquin Papan tantiampicpadec aton dada yanec. ³⁹ Abipadquidpenquo ambi uaidtedi iquec. Abipadquidquo matsestedi iquec. Abipadquidquo nidaidën capuquidtedi iquec. Abipadquidquo podochoquidtedi icoaic. Abipadquidquo acten icquidtedi icoaic. ⁴⁰ Abuc tabëcaid icnubi nidaidën icquid iquec. Abuc tabëcaid abipadquid chënqesho isec nidaidën icquid tabadec. ⁴¹ Badiadën ushë comapenquiec chënquenubi inchëshën ushë daebudquo chënquec. Aid daëdi nua isadnubi uispa pistsëc isadoaic. Uispa utsi-utsiec iquec. Abi bedquec chënquetequid utsi-utsiecbidi iquec.

⁴² Aidtedi ënëndac. Adecbidi tishac matses unësacsho chococac nami chodquec. Adec nami chodquian Nuquin Papan tantiacpadec uincuentequidën dada chuca chodquesa nendac. ⁴³ Tishac icsaquid matses iquec. Adsho uincuemquin ambi icsaisa icmiaid nendac. Nidaidënshun tishac chonoadec uimabudquid matses nec. Yuecash unësacsho uincuemiac uimabudenquiocquin nabanendac. ⁴⁴ Nidaidënshun tishac daicsambo yanash unësacsho uincuemquin dada chuca icmetequid nendac. Nidaidënshun tishac matsesën tantiacpadquid icboedi Nuquin Papan uincuemiac aidën tantiacpadquid iquendac.

Nidaidënshun tishac matsesën tantiacpadquid icboedi abuc buanac anocquidën tantiacpadquid iquendac. ⁴⁵ Adembidi Nuquin Papan chuiquin dada uamiampid nad iquec: “Bëyuc matses Adan caid nacenashun Nuquin Papan bushcac taëc tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. ⁴⁶ Nuquin Papan matsesën tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. ⁴⁷ Bëyuc matses uanu, qeshun nidaid putu bedshun nacenaid nepampic. Bëyuc matses Adan caidën tsyuecquid Nuquin Papan abi yacnoshon budmiaid nepanëdash. ⁴⁸ Nidaid putu bedshun bëyuc matses nacenashun nidaidën tabadquid icmepampic. Adquiecbidi abipadquid matsestedi yanec. Nuquin Papan abi yacnoshon Chomiaid tantiaquidtedi aton Mayan menec. Aden meniac abipadquid aido iquendac. ⁴⁹ Adecbidi bëyuc matses isadacbimboecquid nidaidën tabadquidtedi nec. Nuquin Papan abucshun chomiaid isadacbimboecquid abëd icquido

iquendac.

⁵⁰ Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaid ictiapimbo iquec.

⁵¹ Nuquin Papan chienquiocpampid chuinu. Tantia. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac. ⁵² Ambi namiaidën abucshun shoncanubi ëshë badedquio bëbedquiacbimboecnuc badedquio unësesambo Nuquin Papan abi tantiaquido icmendac. ⁵³ Chodquetequid icboedi chodquesa yanendac. Unëstequid icboedi unësesa yanendac. ⁵⁴ “Adquid icmiac unëstequid nibëdquiendac.

⁵⁵ Ad icnuc ¿mitsishunquio unëstequid istuidpec? Adembidi, ¿mitsishunquio unësmetequid istuidpec?”

⁵⁶ Icsaquid unëstequid nec. Nuquin Papan nadomboen nata quequin chiaid niacquid icash unëstequid matses yanac.

⁵⁷ Adquid nuqui icsho isun Nuquin Papan Nuquin Icho Esuquidistu chomeshun nuqui cuidenquiocquin aidi icsaisa cuidquin nuqui bëdambo icmebanec. Adoac abi yacnoësh icsaisa unësesambo nuqui iquendac. Aden Nuquin Papan naindac, quequin, Bëdambocquid mibi nec, Papa, quequin nuqui chuided-chuidedendac.

⁵⁸ Adembidi chuinu. Tantiata. Adenuidi tantiaquin utsi uaquin utsin chuisho tantienguio yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ëbi icmendac, quequin tantiaquin.

16

Utsibo menenun piucquid bedbanaid

¹ Nuquin Papan bëdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuedetta. Nidaid Cadasia caid yacnocquido Esuquidistu tantiaquido ëmbi chuibanacpadomboen mimbitsen nabanta. Naden Cadasia yacnocquido chiombi. ² Abentsëcshun-abentsëcshunquien mimbi bedaid musucbudcuenshun dominco ushën mimbi musucacted dayun uata. Aton na daëdpactsëc icquidën daëdpactsëc dayun uanubi mitsana dadpen icquidën dadpen dayun uata. Aden musucbudcuenshun mimbi dayun uaid icnuc ëbi choacsho isash, ¿Tedsimbi menepeba? quenquio mibitedi iquendac. ³ Ëbi choshombic utsibo bëdamboen tantiaquin piucquid dayun uaidtedi mimbi menenun buantan caido isun, Ëmbi isaïdo neque. Yuedta, quequin dada uashun aido menembi ma buanueshun. Aden ëmbi meniac buanquin

utsibo ismetuidpec. ⁴ Adecbidi ambo nidtiadquo iquebi, ëbi quenuc mimbi menenun buantan caido ëbëdi nidendac.

Utsi-utsien chuibanaid

⁵ Nidaid Masedonia caid yacno Esuquidistu tantiec iccuededquid utsi-utsiec yacno isedbëquimbi mibi isbëtsenembi. ⁶ Aden isedbëequi mibi isedash tabadebi. Iquenoanquid chonobi mibëd tabadtsiabi. ¿Aid ënëdan nidnu, quesho, adabi utsi yacno mimbi nidmepatsia? ⁷ Nëbi mibëdi yuec tabadti-apimbo iquebi, quiash mibi yacno nidenquo iquebi. Yuecash mibëdi yuec tabadnuec mibi yacno nidebi. Nuquin Papa bunuc adendabi. ⁸ Nëbi padenquo iquebi. Epeso yacnocquidobëd iquebi. Nuquin Papan abipadquid aton Mayan matses meniaid ushë tantiate choan nëuëshquo nidebi. ⁹ Nëmbo Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibansho tantiauidash utsibo ëbi chieshënquido nëmbo iquec.

¹⁰ Mibi yacno ëbi nidenquo icnubi Timoteyo mibi yacno nideque. Aid bëdamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. ¹¹ Nuquin Papan namiaidquiobidi Timoteyo icsho, Èbëd icquidta nec, quenquiocquin yuedta. Yuedac tabadash, Nidnu, quesho, Ai, nidec nid. Mibi nidsho isash unësquo iquebi, quequin nidme ma ëbi yacno choanu. Utsibobëd Timoteyo choaic quequin cainec tsadebi.

¹² Nëbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobëdtan istanta, quequin Apodos comapenen chiombi. Adoac, Nëbi Codinto yacno nidte bunenquo iquebi, quiosh aid. Yuecash Codinto yacno nidec bëdambo ictsiash, quiash yuecash aidi mibi yacno nidendac.

¹³ Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiatequid icnuc chieshtoenquo yec dayacquio yec tabadteneta. ¹⁴ Adec tabadquin utsi bëdamboen tantiaquin nabanta.

¹⁵ Adembidi chuinu. Tantia. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, queshun adobanec. ¹⁶ Aidon namiaido icta. Adembidi, comapenen nashumbanquidtedishun namiaido icta. ¹⁷ Codinto yacno Esuquidistu tantiec iccuededquidtedi ëbëdi ictiapimbocnobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi. ¹⁸ Mibitedi

chuiبانquin aidon unēsquiocquidi bēdambo icmioshi. Mibi yacno padpidec nidash puduedshun chuiبانquin adembidi mibitedi bēdambo icmendac aidon. Aido mibi yacno choacsho isun, Pabado chuiبانquin mimbi bēdambo icmiacpaden nabanec tabadta, quequin chuiبان.

Esuquidistu tantiaquidon mibitedi tantiaquin chuibanaid

¹⁹ Codinto yacnocquid mibitedi tantiec tabadebi, quequin dada uaqin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido Pidisdabēdtan chui cac chuiōaimbi. Adembidi, aidon shubun Esuquidistu tantiec iccuededquidote-dishun chui cac adembidi chuiōaimbi. ²⁰ Aden utsibon chiaid chuishumbic, Esuquidistu tantiaquid utsibotedibēd bēdamboec tabadta, caimbi.

²¹ Ēmbi chuiبانac ēmbi chiaid utsin dada uashumboed nec. Nēshun bedanquin dēnainquin dada uaimbique. Tantia.

²² Nuquin Icbo tantiesa nēbimbobi ma Nuquin Papan comapenen cuidquin ma nēsiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

²³ Ēbi icsaquid icsho cuidenquiocquin Nuquin Icbo Esuquidistuded Nuquin Papan cuidpanēdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

²⁴ Esuquidistun shubun icquido nuquibi icsho ēmbi bēdamboen isaido mibitedi nec.

Padi aiteded dada uaombique. Isec onquecuededta.

CODINTO YACNOCQUIDON ISTE 2

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ęmbi dada uaid mibitedishun isbanshun utsibo meneta ma isnueshun.

² Matses icsaquid icsho cuidnushe quiash abided ciudadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

Bědambo icmianquidquio Nuquin Papa

³ Nuquin Papa nad iqueque. Tantia. Chuinu. Ębi uněsquio icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. ⁴ Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. ⁵ Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. ⁶ Adembidi ěbipadquidobědtan Esuquidistu chuibansho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta. ⁷ Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ębi měyanacpaden mibi měnyansho isun Nuquin Papan bědambo icmiaid mibi iquendac.

⁸ Nidaid Asia caid yacnoshon ěbi natiameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi. ⁹ Uněs uatiad, utsibo qesho tantias, Ębibi měnchiquidtiapimbocquimbi matses uněsacsho uincuemequiděn ěbi měnchictsiash, quequin tantiec tsadobi. ¹⁰ Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. ¹¹ Ębi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, qesho

tantiashun mimbi Pabado mēnchiccoc. Mibi bēdamboquid nec, Papa, quequin ma dadpeshun ambi naid chuipanuna.

Nēbi mibi yacno nidenquo iquebi, quiaid

¹² Bēdamboec tabadquin ismequid nebi, quequin tantiec bēdambo iquebi. Adaid chuinu. Tantia. Nuquin Papan ēbi tantiamiacpaden ismec utsibobēd bēdamboec tabadobi. Adquiecbidi mibēdi tabadobi. Matsesēn tantiamiacpadpenquo yec tabadobi. ¹³ Ma tantiamenueshun abimbo chuiquin mibi dada uashunec nebi. Ēmbi dada uaid bedshun isec, Pabado bēdamboec tabadec, quequin ēnenquiocquin tantiapashun mibitedishun. ¹⁴ Ēbēd Pabado bēdamboec tabadosh, quequin tantiec bēdambo iquebi, quec utsi-utsiec. Adecbidi, Codinto yacnocquido utsi-utsiec bēdamboec tabadosh, quequin utsibon chuisho tantiash bēdambo iquebi. Esuquidistu choanuc adquiequi Codinto yacnocquido tabadpashun, quec tsadebi.

¹⁵ Aden ēbi bēdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bēdambo iquebi, quepashun, caimbi mibi. ¹⁶ Mibi isbidanec nidaid Masedonia caid yacno nidashic padpiden mibi isbētsenec choaibi. Aden isbētsenembi, qesho tantiashun nidaid Udeya caid yacno mimbi ēbi nidmetsiac, quequin mibi chiombi. ¹⁷ ¿Uquēducshun, Nidenquo iquebi, quequin muaquindambi chuidio? Adenquiocquin chiombi.

¹⁸ Ambi chiacpadomboen nabanquidquo Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi. ¹⁹ Ambi chiacpadomboen nabanquidquo Nuquin Papan Madombo, ēmbi chuibeniaid, Esuquidistu nec. Aidi Sidasēn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquo adquidbidi nec. ²⁰ Con Madon naden naindac, quequin Nuquin Papan chiacpadomboen Esuquidistun ēnden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ēbipadquidon chuibanec. Aden chuibanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. ²¹ Nuquin Papan tantiamiac: Esuquidistu tantiaquid nebi, quiaish, Tantisia nebi, quetiapimbo nuqui iquec. Adquid icmiac aton Madombo chuibanquid nuqui nendac. ²² Adembidi aton bacuē icmiaid nuqui nec. Adembidi aton Mayan Nuquin Papan meniaid nuqui nec.

Ēbēd tabadquid aido nendac, quequin tantiamenuen Nuquin Papan aton Mayan meniac ma aidēmbi nuqui bēdambo icmepanueshun.

²³ Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquio iccobi. ²⁴ Ēmbi Esuquidistu chuibanac abi tantiaquid dadpen iquec. Aidon ichopenquio nebi. Aidon ichopenquiobidi Esuquidistu chuibanquid utsibo nec. Esuquidistu tantiec bēdambo iquebi ma quenu, quequin chuibenequidquio nebi. Esuquidistu tantiaquid nebi, abimbo quequin aid tantesa uainquio mimbi iquendac.

2

¹ Aden tantiaquin comapenen chuiquin unēsquio icmenushe quec mibi yacno nidenquio iquebi caombi. ² Mibi unēsquio ēmbi icmiac ġtsuntsin ēbi bēdambo icmepatsiash? ġĒmbi icsambo icmeboedēnda ēbi bēdambo icmepadic? Padenquio. ³ Aden tantiaquin mimbi iste dada uaombi ma ēbi bēdambo icmequid unēsquio icmetiapimbo iquebi, qeshun. Bēdambo iquebi, quequin ēbi tantiec adquiobidi mibi icoatsiac, quequin tantiombi. ⁴ Unēsquio yec shubiquimbi mibi dada uashun, Meneta, caondambi. Unēsquio icmenu, quenquiocquin mibi comapenen tantiaquin dada uaondambi.

Abi icsaboed bēpiscudnueshun yued quiaid

⁵ Anocquidēn ēbi unēsquio icmedenequimbi adembidi comapenquiec unēsquio mibi icmeoaosh. Aidi mibi chiondambi. ⁶ Aidi mibi dadpenshun cacumiac abi icsaid ēnosh quec. ⁷ Adoacsho abi icsaid bēpiscudshun aidi yuedoquin bēdambo icme. Yuedenquio yac natiamianquiec unēstiadquio yantsiash. ⁸ Nuquibi iccuedednuna, quequin aid tantiaquin yued caimbi. ⁹ ġĒmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. ¹⁰ Aden ēmbi dada uacpaden mimbi cacumiac abi icsaid ēnsho isun abi icsaid nibēdacimboec bēpiscudshun yued. Adsho tantiashun adomboembidi naimbi. Aidbēdi abentsēc yacbimboecquido yanosh, qesho tantiash abi icsaid bēpiscudebi Esuquidistun tantianubi. ¹¹ Nuqui chieshēnquidēn Satanasēn aidi icsamenushe qeshun abi icsaid ēmboed yuedta. Yuedenda, Satanasēn quequin tantiamiac onquesho tantienda.

Nuquin Papan con Mayan meniaid adquid ēbēdi tabadtequid nec, quiaid

¹² Esuquidistu chuibanuec shubu dadpen icquid Todoas caid yacno ëbi chonoc, Tantianu, quec cho-choquid dadpen icpondash. ¹³ Adquid dadpen icnubi ëmbi con utsi caid, Tito, mibi yacnoësh choabi icnuc ambo yuec tabadtiapimbo iccobi. Adash, Bëquednu, quianec nidaid Masedonia caid yacno nidoapobi.

¹⁴ Bëdambocquid mibi nec, Papa. Mimbi Esuquidistu tantiaquid ëbi yacpadquido icmeshun mimbi, Esuquidistu chuibeneta, caid ëbitedi nec. Ëmbi chuibanaid noadte bëdabimboecquid nec. Noadte bëda pushudec noadsho uano-uanoec tabadquidon shëdec. Adembidi, Esuquidistu ëbi yacpadquidon chuibenesho uano-uanoec tabadquidon tantiec. ¹⁵⁻¹⁶ Esuquidistu chuibanac noadte bëdan danoshquiaid shëdabimboen utsibon tantiec. Adembidi, Esuquidistun ëbi chuibeneta caido Icho isacimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ënëdenquio yec abëd icquido aitedi iquendac. Aden nuqui isquin Esuquidistu tantiesa icsho Nuquin Papan nësiatequid iquendac. ¿Tsutsi Esuquidistupadquidquio icpec? Adquid nibëdec. Adesa icsho ambi, Ëbi chuibeneta, caidquio nebi. Adquid icquin chuibenenubi ¹⁷ piucquid bedte bunquin utsin-utsinquien Esuquidistu chuibanec. Adesa ëbipadquido iquec. Piucquid bednuequin ëbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

3

¹ ¿Pabado bëdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bëdamboec tabadquin Esuquidistu Pabaton chuibanosh, quequin dada uata, ëmbi cac mimbi dada uaidtambi buampe? Padenquio. ² Mibëdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chëshëten pinchuquën tansiabimboecnuc paucudtiapimboecnoc Nuquin Icbon tantiamiohi. Adembidi icsamboec tabadboedi nëbi bëdamboec tabadsho isun Pabaton Esuquidistu chuibanaido Codinto yacnocquido nec, quequin adomboembidi tantiabededec utsibon. ³ ¿Abi tantiaquid icsho isun bëdamboec tabadmenuequin ambi cuënote bedshun dada uampicpadquidta mibi meniondash? Padenquio. Esuquidistu tantiasho isun unëstiapimbocquid aton Mayan abipadquidquio mibitedi meniondash.

4 Nuquin Papan tantiacpadomboen Esuquidistun, Ēbi chuibeneta, cac chuibanac Esuquidistu tantiaquid mibitedi yanacsho tantiec ěmbi chuibanaido aidtedi nec, quequin tantiembi. 5 Ęmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiembi. 6 Ęmbibi Esuquidistu chuitiapimbo icsho Nuquin Papan Mayanĕn tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi natiapimbo yec aibdĕdi matses tabadiapimbo iquec. Aton Mayan meniaidbĕd tabadtequid nec.

Abi tantiaquido bĕdambo icmetequid aton Mayan

7 Nuquin Papan nadomboen nata quequin chiaid cuĕnoten dada uacpaden nainquio yec matses abi yacno tabadiapimbo iquec, quequin dada uampid meniac abi chĕnquiacpadec Moisesĕn bĕtantiante comapenec bĕchomauanquiec chĕnqueboedi macuĕsh budec bĕdiambo chĕnquesho isadaidbon bĕistiapimbo icpampic. 8 Nĕbi Esuquidistu tantiaquid bĕdambo icmequid aton Mayan abipadquid meniaid ĕnĕdenquiocquidquio nec. 9 Ęmbi nadomboen nata quequin chiaid niacquid ĕbĕdi tabadiapimbo iquec, quequin dada uaid Nuquin Papan meniac buanshun Moisesĕn aton matses ĕnĕdenquiocnoc tabadmetiapimbo icambien matses icsaid bedshunash icsaisa abided cuidadec unĕsash uincuenquidĕn abi tantiaquido ĕnĕdtiapimbocnoc tabadmendac. 10 Nĕbi Esuquidistu unĕsaid tantiaquid ĕnĕdtiapimbocquid nec, quequin chiac ambi dada uaid meniampid ĕnĕdacbimboecquid nendac. 11 Ai, nadomboen nata quequin chiaid Moisesĕn bedshun meniaid ĕnĕdtequid icnubi bĕdambo icmiantequid Nuquin Papan chomiaid icsaisa ĕnĕdtiapimbo iquec.

12 Aden tantiaquin, Esuquidistu nuqui tantiaid icsaisa yec ĕnĕdtiapimbocquid nec, quequin chuibenequid nebi. 13 Moises Nuquin Papabĕd onquec bĕchomauanquiecboedi auĕshquio nidec ushma-ushmactsĕcquio yanash matses ismenquiocnuec bĕpucudpampic. Adesa icquin ompoenquiocquin utsibon ma tantianu, quequin Esuquidistu chuibenequido nuqui nec. 14 Nuquin Papan dada uaid Moisesĕn bĕaid tantiante bunesa abĕd icquido icpampic. Adquiobidi pamumĕdacbimboec isadaidbo abi tabadec. Nuquin Papan cuĕnoten dada uacpadquid isec onquec nĕbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido

nendac. ¹⁵ Nadomboen nata quequin dada uaid Moises menepampid isec onquec pamumēdabimboecquid isadaidbo utsi-utsiec iquec. ¹⁶ Esuquidistu tantiaquid icsho Nuquin Papan Mayanēn paucquin tantiamiaid nendac. ¹⁷ Nuquin Icbo icsaisa icquin ĕnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. ¹⁸ Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquiobi icsaisa icquin abipadquid nuqui meniac aton Mayanēn adquid nuqui icmebanec.

4

Nuquin Papan nadatiambocquin nadenequin Esuquidistu chuibenemiaid

¹ Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. ² Icsash ompodquid icboedi nēbi muesa icquin Nuquin Papan chiaid utsi uainquio yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec. ³ Esuquidistu chuibansho utsin-utsinquien bēdamboen tantiatiapimbo iquec. Adquid Nuquin Papabēd tabadtiapimbocquid nec. ⁴ Nuquin Papapadquid Esuquidistu tantiaquid icnushe queshun icsamianuequidēn Satanasēn pamunacimboen utsi-utsien tantiamenquio iquec. ⁵ Ēmbibi naid chiesa nebi. Matsesēn Icbo Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. ⁶ Abitedi uanuna, queshun, “Inchēshquio icboedi uēshēmbonyanquiota,” capampic Nuquin Papan. Adomboembidi Nuquin Papan chiaid pamumēdabimboen tantienquiocboedi Nuquin Papan paucquin tantiamiac Esuquidistu Nuquin Papapadquid nec, quequin nuqui tantiec.

⁷ Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. ⁸ Aden chuibansho mēyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? quesho Nuquin Papan dayacquio icmedenebi. ⁹ Ēbi chieshēnquid dadpen icnubi ēbi bēdambo icmequid aidi iquec. Comapenen cuestanec, Unēsec, queshun nianaqui abi Esuquidistu chuibenembi. ¹⁰ Esuquidistu mēyanquin unēs uacpaden mēyanquin unēs uatsen-unēs uatsenshobi dayacquio icmedenioshi. Adoacsho uincuenaidēn dayacquio icmedeniaid nec, quequin utsibon isbededebi. ¹¹ Adembi Esuquidistu chuibansho unēs uatsiashi, quequin chuibenec

nebi. Aid chuibansho unēs uatsenaqui abipadquid unēsesa yanebi, quec bēdamboec tabadebi. ¹² Aden tantiaquin aid chuibanac abi tantiaquid yanash aibdēdi tabadec unēsesa mibitedi yanendac. ¹³ Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. ¹⁴ Aden tantiaquin Nuquin Papan Esuquidistu uincuemiacpaden aibdēdi tabadmenuen mibitedibēdtabi ēbēd icquidtedi uincuemendac, quequin chiombi. ¹⁵ Aid tantiaquid ma mibi icpanueshun chuibansho mēyanaid nebi. Mēyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bēdambo iquec, Papa, quequin ma Nuquin Papa utsibon chuipanuna.

¹⁶ Aden tantiec dayactiapibi quenquio iquebi. Tsusio budquimbi badiadquidēn-badiadquidēnquien Esuquidistu tantidonequidquio yanebi. ¹⁷ Natiamiantequid ēnēdendac. Natiamiaid yashic Nuquin Papa yacno tabadec bēdamboshē iquendabi. Esuquidistupadquid icsaisa yec unēsesa yanash ēnēdtiapimbo iquendabi. ¹⁸ Aden tantiec, Ēbi natiamiaid iquec, quiashic, Nuquin Papabēd tabadendabi, quequin comapenen tantiec tsadebi. Ēmbi isaidtedi ēnēdendac. Nuquin Papa yacnocquid ėmbi isacmaidtedibēd ēnēdtemaid iquendabi.

5

Nuquin Papabēd tabadte iquendac quiaid

¹ Con nami shēnibudash unēsash nibēdnuc Nuquin Papabēd tabadec nami chuca uaid iquendabi. Nami chuca uaid ēnēdtemaid matsesēn nacnenacmaid nec, quequin tantiembi. ² U abucquio nidabi yec uēshquequid nebi. Adquiocsho nami chuca uaid ēnden meniondac, Cuishon, quetsiabi. ³ Aden meniac ēbibimboec isadsho isendac, quec tsadebi. ⁴ Nami chodquequid icnuc uēshquec nuqui tabadec. Nami chuca uaid chodquesa menepashuni mabi unēsesa icpanu quec nuqui tabadec. ⁵ Con Mado Esuquidistu tantiaquid ēbēd abuc tabadmenuen ēbipadquid unēsesa icmenu, quequin Nuquin Papan aton Mayan menetequid nuqui nec.

⁶ Aton Mayan meniaid iquec nami chodquetequid abi iquequi chieshenquio yec dayacquio yec nuqui tabadec. Adec tabadash abuc Nuquin Icbobēd tabadendabi, quequin nuqui tantiec. ⁷ Aton Mayan meniac nuqui isacmaid Esuquidistu cainec nuqui tabadec. Ēmbi isaid ėmbi caintemaid nec. ⁸ Aden aid cainsho nami chodquesa badedquio menepashuni. Aden meniac Nuquin Icbobēd iquendabi, quequin nuqui tantiec.

⁹ Aden tantiec nidaidën tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiemi. ¹⁰ Adembidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiemi. Utsi-utsien, Mimbi bëdamboen nabanoc, quequin chuibanendac abitedishun naid cuidquin.

Ma utsibotsen abi tantiaquid icpanu quequin chuibanaid

¹¹ Aden ambi tantiacpaden nabansho, Bëdamboen mimbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bëdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. ¹² Aden tantiaquin, Mibi bëdambo iquec, ëbi camenuen mibi dada uashunenuo iquemi. Ëbi chienquiocquin, Bëdamboec tabadquin ismiachimboecquidën ëbi icsamboen chuisho aido chuita, quequin mibi dada uashunemi. ¹³ Aido, Pabaton tantiate icsabudosh quec. Adembidi, Nuquin Papan chiacpadomboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu queshun aid chuibenec nebi utsibon chuibenenuocnobi. ¹⁴ Chian anëdënquequid icsambocquid nësianushe quiash matses icsaid bedshunash abided cuidadec icsaisa Esuquidistu unëspanëdash, quequin ma utsibon tantiapanueshun chuibenec nebi. ¹⁵ Ma ëmbi naid chiac ëbi tantiaquido ma ëbëdi icpanu, quiash unësash uincuempanëdash Esuquidistu.

¹⁶ Adec unësash Esuquidistu uincuempanëdash, quequin matses unësash uincuenta iquec, quequin abi tantiaquidon tantiec. Ënden, matsesquio Esus nec, quiondaidi nëbi, Nuquin Papan Chomiaid yec matses tantiec unësash uincuempanëdash, quequin tantiemi. ¹⁷ Abi tantiaquid ambi tantiamiaid nec. Ënden matsesën tantiacpadquiec icboedi Esuquidistun tantiacpadquiec bëdamboec tabadec abi tantiaquidquio. ¹⁸⁻¹⁹ Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unëspanëdash, quequin tantiaquin ma aidquio utsibon tantiapanu queshun ambi naid nuqui chuibenec. ²⁰ Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ëbi icsaid bedshunash Esuquidistuded cuidadpanëdash, quequin abëd icnuequin aid tantiaquiota. ²¹ Ambı cuidtiadquid nuqui icnubi Esuquidistu

icsaisaded Nuquin Papan cuidpanēdash ma Esuquidistu ambi cuidaidpadquid tantiaquidtedi icsaisa yampanueshun.

6

¹ Matses bēdambo icmenu, quequin Nuquin Papan chiaid bēpiscudmane queshun ambi tantiamiacpaden nabanec tabadta. ² Nuquin Papan chiampid chuinu. Tantia.

“Mibi bēdambo icmete ushē chonoc cuēnsho tantiombi. Tantiaso icboedi nēid ushēnquo mibi tantiamiombi.”

Aden Nuquin Papan chiampicpadomboen bēdamboen tantia. Nēbi Nuquin Papan bēdambo mibi icmenu cac, Ai, cata. Nēid ushēnquo ambi aton bacuē icmete ushē nendac.

Pabado natiamiaid

³ Icsamboec tabadquimbi Pabadon Esuquidistu chuibansho, Tantiatiapibi, utsibo quetiapimbo noc bēdamboec tabadec nebi. ⁴ Nuquin Papan chuimiaid yec nadec tabadebi: Chieshenquo yec dayacquiocquin ambi chiaid chuibenec bēdamboec tabadec nebi. Natiamiaid yec adequi tabadebi. ⁵ Utsin cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquo yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunquiec bēdamboec tabadebi. ⁶ Icsainquo yec bēdamboec tabadebi. Nuquin Papan chiaid tantesa uainquo yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, queshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi. ⁷ Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ěmpanueshun. ⁸ Ēbi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. Ēbi icsamboen chuinubi adequi bēdamboec tabadebi. Ēbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. ⁹ Ēbi isquidēmbi, Ēmbi isacmaid Pabado nec, caqui ěmbi chuibansho tantiaboedo nec caimbi. Ēbi unēs uate bunubi abi chuibanec capucuenebi. Mēyanaqui unēsabi yec nidebi. ¹⁰ Unēsquo icmiaqui Esuquidistu tantiec bēdambo iquebi. Con na nibēdsho isun adembidi Esuquidistu chuibanec nebi ma

Esuquidistu tantiec utsibo bēdambo icpanueshun. Con na nibēdsho isash Nuquin Papan bacuē yec aton natedi con na nec, quequin tantiec tsadebi.

¹¹ Chuitiapibi, quenquiocquin ēbi natiaboedtedi mibi chuibanombi. Mibi comapenen tantiaquin ēmbi nabanaid mibi chuibanombi. ¹² Mibi tantiaquioquin chuibanquid ēbi icnubi ēbi tantiaquin chienquio mimbi iquec. ¹³ Pabadon con bacuēbo caido nebi, quequin mimbi naid mimbi tantiaidbēdta ompoenquiocquin ēbi chuiban, caimbi mibi.

Esuquidistu tantiesabēdtambi icsain nainda quiaid

¹⁴ Esuquidistu tantiesabēdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, quesa aton papa. ¿Nuquin Papan bēdambo icmiaidēnda ambi chiaid niacquidbēdtan nabampadic? ¿Nuquin Papan Mayanēn tantiamiaidēnda Icbo chieshēnquidbēdtambi chieshēmpadic? ¹⁵ ¿Esuquidistu Satanaspadquidta nedic? Padenquio. ¿Esuquidistu tantiaquid abi tantiesapadquidta nedic? Padenquio. ¹⁶ ¿Nuquin Papan ambi uaidbimboecnuc matsesēn nacnenaid tantiaquidta aton Mayan Nuquin Papan meniaid icpadic? Padenquio. Abi tantiaquid aton Mayan menec. Nuquin Papan dada uamiampid dada uanu. Ista.

“Ēbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

¹⁷ Con matses icquin ēbi tantiesan ēmbi chiaid niacacpadom-boen nainda.

Adecbidi aid icsacpadec tabadenda.

Adecbidi icsainquio yec tabad.

Adquid ēbēd iquec cho caindambi.

¹⁸ Adquidon papa iquendabi;

Adquid ēmbi con madobēd con champi caid iquendac, quec Nuquin Papa.” Abi tantiaquido nadatiambocquidēn aden chiec.

7

¹ Naden nanuna, quequin Nuquin Papan chiac nuqui naid icsatedibēdtabi nuqui tantiaid icsatedi ēnu, quequin Nuquin Papan chiacpadomboen nabanec tabadtenenuna.

Unēsquio icboedi mimbi naid tantiash bēdamboshē iquebi quiaid

² Adembidi, ēbēdtabi ēbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi

muaquin utsin na bedesa nebi. ³ Pabado tantienquoio yec icsaobi mibi camenuen nēid chuiquin dada uainquoio iccombi. Mibitedi tantiec tsadebi, quequin padpiden chiembi. Abimbo caimbi. Unēsequi mibi bēshuntiapimbo iquendabi. ⁴ Mimbi chi-acpadpenquoiochoedēmbi naosh, quequin choquidēn chioshi. Aden chuisho tantiashun, Nuquin Papan chiacpaden nabanquidquoio nec, quequin mibi chiec nebi. Unēsquoio icboedi mimbi naid tantiash bēdamboshē iquebi. Utsin natiamiaid icshobi bēdambo iquebi, mimbi ēbi camioc.

⁵ Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedēmbi tantesa uatsiash, quec quenenenquoio iccobi. ⁶ Unēsquoio icsho ēbi tantiaquin Nuquin Papan Tito padpiden chomiosh ēbi bēdambo icmeoanuen. ⁷ Choashun mimbi aid tantiaquin nabanaid Titon chioshi. Adembidi, ēbi iste mibi bunaid chioshi. Mimbi dada uaid isash unēsquoio icquin, Codinto yacnocquidon mimbi chiacpaden nabanosh, quequin Titon chioshi. Aden chiac bēdamboshē yanobi ad yenquoio icboedi.

⁸ Mimbi dada uaid isash Codinto yacnocquido unēsquoio iccosh, qesho tantiash, Icsambo icchitobi, quenquoio iquebi. Aden dada uaic icsambo iccobi, quetiapimbo yequi mibi unēsquoio yacpadequi unēsquoio iccobi. Yuec mibi ad yenquoio iccoc. ⁹ Adecbidi nēbi bēdambo iquebi. Ēmbi mibi unēsquoio icmiac mibi icsaid ēnquin Nuquin Papan chiacpaden nabanec, quec utsibo. Aden chuisho tantiaquin mibi unēsquoio icmequin mibi icsabudmiambo iccombi. Unēsquoio icmiaqui mibi bēdambo yanoc. ¹⁰ Unēsquoio icmiac, Nuquin Papan chiaid niaccombi, quiash unēsquoio icquin mibi icsaid mimbi ēnac. Adsho isun Nuquin Papan ēnēdtiapimbo cnoc aidbēd mibi icmendac. Aden unēsquoio icmiaqui, Bēdambo iquebi, mibi quendac. Adecbidi mibi icsacpadecc icsainquoio mibi icpendac. Padnuen Nuquin Papan chiacpaden niacquin ēnesa abi natiamiaiduidi tantiec Nuquin Papa yacno puduedtiapimbo iquendac. ¹¹ Padnuen mibi unēsquoio icmiac nēbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chui poc. Nuquin Papan cuidnushe quequin mibi icsaid mimbi ēnoc. Adembidi, Ēbi padpiden bēdamboen is, quequin Nuquin Papa mimbi chioc. Icsashun chienquoiochoedēmbi nēbi cuembo bēdamboen chuinu, quequin mimbi chuibanoc. Aden mibi icsaid ēnacsho isun mibitedi icsaquin ēntiapimbo icquidēn nacpaden naisa nec, quequin tantiembi. ¹² Icsaquid ambi icsa uanaidbēdtabi chuinen mibitedi dada uainquoio iccombi. Abentsēc icsash abitedi unēsquoio iquec. Adquiecbidi ēbi unēsquoio icmete

bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin ¹³ ěmbi tantiacpaden naquin mimbi bēdambo iquebi camiaid nebi.

Adembidi Tito yuedquin mimbi bēdambo iquebi camiaid-bidi niosh. Ěbi yuedenquioctsiash queboedi niosh. Yuedoshi, Tito qesho tantiaash bēdamboshē iquebi. ¹⁴ Mibi nidmembali, Tito, qeshun, Ěbi yuedquin nashunacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ěmbi chuibocpadomboen mimbi nashunac. Aden tantiaash, Abimbo chiombi, quepobi. Ěmbi mibi muainquiocquin chuibanacpadec adquiobidi mibi nabanec tabadaid abimbo iccosh. Adomboembidi Titon mibi isbanosh. ¹⁵ Ěbitedi chushcatsiash, quequin mibitedishun Tito yuedpanēdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito. ¹⁶ Adoaidi ambia tantiaquid icquin ěmbi chiac mibitedishun nabanendac, quequin tantiembi. Aden tantiec bēdambo yec tsadebi.

8

Aton na nibēdquid icsho aton na dadpen icquid menequid

¹ Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuinu. Tanta. ² Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuquin aton na daēdpactsēc musucshun dayun uaosh. ³ Ěmbi, Meneta, cainquiocnobi aton na bedtequid naimbudtsēcquien menenuquin bedbanosh. ⁴ Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. ⁵ Mitsana daēdpactsēc icnuc utsibo mimbi meneti-apimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. ⁶ Adomboen menenun bedbamposh. Adosho isun Tito nadombi. Mimbi ěnden nidaid Udeya caid yacnocquidon natiaid chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiacteda bedbanoshe? Isnu, qeshun istanta, quequin Tito chiombi. ⁷ Naden naquid Codinto yacnocquido nec, quequin mibi tantiembi. Nuquin Papan Mayanēn tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin ěmbi chiacpadomboen badedquio comapenen

naquidquio mibi nec. Adembidi ëbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

⁸ Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. ⁹ Nuquin Icbo Esuquidistu abuc tabadec abitedishun Icbo icboedi nuquitsen abuc abëdi tabadmenuec matsesash nidaidën tabadnuc aton na nibëdpadenec. Aidën matses tantiaquin nabanacpaden utsibo tantiaquin nabanta.

¹⁰ Ëmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaqin mimbi tauapondac. ¹¹ ¿Aden nanuna, qeshun mimbi chiacted ënquinda bedshun dayun uao? Padenquiocquin adota. ¹² Mitsana daëdpactsëc icnuc daëdpactsëc musucshun menesho isash, Dadpen meneta, quenquio Nuquin Papa iquec.

¹³ Aton na nibëdquid icsho, Natiacquin meneta, quenquio iquebi. Aton na nibëdquid icsho aton na dadpen icquidën menec. ¹⁴ Mitsana dadpen icquid mimbi musucshun meniac aton na nibëdquid bëdambo iquebi, quepec. Aden meniac mibëdi aton na nibëdquid bëdambo iquendac. ¹⁵ Nuquin Papan dada uamiampid nad iquec. Chuinu. Tantia. Petequidëmpi Nuquin Papan mana caid meniaid chuiquin: "Shubun tabadquid dadpenshun aided-aidtedquien bedbanshun peshun napi uaid nibëdosh. Adecbidi, aton shubun daëdpactsëc tabadquidon aided bedbanshun peshun napi uaid nibëdosh." Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

Tito Codinto yacno nidte

¹⁶ Nëbi Tito mibi chuinu. Tantia. Ëbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. ¹⁷ ¿Codinto yacno tsutsi nidpatsiash? quequin ëmbi chiac, Ëbibi nidebi, quiosh Tito. ¹⁸ Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdambocquid nec. ¹⁹ Nidaid Masedonia caid yacnocquidon, Esuquidistu tantiec iccuededquidon ëmbi dayun uaid Pabadobëdtan buanec nid caidbidi Titobëd nidquid nec. ²⁰ Aid daëd ëbëdi nidsho isash, Nuqui na

buanquin ampetsiash, quetiapimbo utsibo iquec. ²¹ Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma queneshun aidobëdtambi buanshunembi.

²² Tsyuec nidebi, quequin utsibobëdta Tido mibi yacno nidmembi. Ëmbi nata cac bëdamboen nabanquid aitedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. ²³ Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëuëshquio puduanec Codinto yacno nidta caboedi Titobëd nidec. ²⁴ Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Ëmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapanuna.

9

¹ Ënden Esuquidistu tantiaquid utsibo tantiaquin nashunta quequin ëmbi chiac, ² Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menenuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queoa-posh. ³ Aden aidon chuisho tantiashun nuqui con utsi caido mibi yacno nidmembi mimbi chiondacpaden bedbanambo icnushe qeshun. ⁴ Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo chiacbimboen chuichitombi, quec natiaic bëpiutsiabi. Adquiecbidi mibi icoaic. ⁵ Adquio icnushe qeshun utsiboba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiated bedbanquin dayun uambochoedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unëshquio icquin menetsiash. Aden tantiaquin menenda.

Nuquin Papan na dadpen bedmiaidën aton na nibëdquid menequid

⁶ Nuquin Papan chiaid chuinu. Adembi tantiata. Tied icbon daëdpactsëc nitsinac caniaash ëshëacsho aidtedtsëcbidi bedpec; dadpen ambi nitsinac caniaash ëshëacsho dadpen bedpec. ⁷ Adquiobidi aton na icquid iqueque. Tantia. Chuinu. Nëidted menenuequin ambi chiacted menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiacted meniaash, Bëdambo iquebi, quetiapimbocquin menec. ⁸ Mitsana menete bunquin mimbi chiacted menesho isun Nuquin Papan uesadmenquiocquin mimbi bedmec ma utsi-utsien menebampanueshun. ⁹ Nuquin Papan dada uamiampid adomboembidi chiaid nad iquec:

“Nuquin Papan dadpen bedmiosi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

¹⁰ Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adqueiebidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaid musucshun utsi meneoapec. ¹¹ Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

¹² Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac. ¹³ Meniacsho isash, Esuquidistu tantiaquid nebi, quequin abimbo chuiquidquio aid nec, quequin mimbi meniaidbëdtambi utsibon mibi chuibanendac. ¹⁴ Adquidquio nec, quequin utsibon mibi chiec. Mimbi tantiamiacpadomboen nabanquidquio Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac. ¹⁵ Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuec ëbi icsaid bedshunash abided cuidadec unësash uincuepanëdash. Aidpadquid utsi nibëdec, Papa, quequin nuqui chiec.

10

Ëmbi dada uacpaden mibi yacno choshon adomboembidi

nabanembi quiaid

¹ Comapenec chushquenquiocquin matses bēdamboen tabadmenuequin chuibanquid Esuquidistu icpanēdash. Mibi yacno choshon Esuquidistupadquid icnuequin ēbi chieshēnquid bēdamboen tabadmenuequin chuibanendambi. Ēbi chieshēnquido nadec onquequin ēbi naden chiec, quec. Nuquibēd tabadquin dacuēdadbimboecquin comapenen Pabadon chushcainguio iquec. Utsi yacno nidshun dada uaqin comapenen chushcaic, quiosh. Mibi chiec adosh. ² Adsho tantiash mibi yacno choash tabadquin chushcante bunenquio icquimbi, Ambibi tantiacpaden nabanquid Pabado nec, quequido bēdamboen chuibanembi. ³ Esuquidistu tantiaquid yanshun icsaquidēn tantiacpaden nabanesa nebi. ⁴ Mibi yacno choshon matsesēn tantiacpadpenquiocquin Nuquin Papan tantiamiacpaden ēbi chieshēnquido Satanasēn icsamboen tantiamiaido Nuquin Papan chiaid chuibanendambi. ⁵ Satanasēn tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibēdec, qeshun ěmbibi tantiacpaden naic bēdambo iquec, quequin tantiamiaido nec. Aden tantiaquid icsho isun ambi icsamboen tantiec pamumēdadbimboe yaid ěmenu quequin Nuquin Papan chiaid ěmbi chuibanubi abi pamumēdadbimboe yaid padpidec pausudtiapimboen paucbanshun ambi tantiacpaden Nuquin Papan pausunendac ma ambi chiacpadomboen namenuquin. ⁶ Aden chuibanshun Nuquin Papan chiacpadomboen utsin-utsinquien abi icsaid ěnabicsho isun comapenen cuidendambi.

⁷ Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsēcquio isadtsec, quepec aido. Aden chuiquid, Esuquidistu tantiaquid nebi, ēbi qesho tantiash, Muec nec, quetiapimbo iquec. ⁸ Abi tantiaquid ēbi yansho, Esuquidistun, Ēbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ēbi chieshēnquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ěmbi chiacpaden naimbi mibi yacno choshon caimbi. ⁹ Adquid nebi, quequin, Dacuēdampambocquid Pabado nec camenuen dada uainquio iquembi. ¹⁰ Mibi aden dacuēdmenu, quenquio icnubi ěmbi dada uaondaid bedshun isun naden utsin ēbi chiosh quec. Chuiquidēn comapenen chushquequin chiac-

padomboen Pabadon dada uaic. Nēmbo choshon ambi dada uaquin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimbo cnoc chuibanondash, quequin aidon ëbi chiec. ¹¹ Aden ëbi chiec onquequidën bēdamboen tantiata. Chuinu. Ēmbi dada uacpaden mibi yacno choshon adomboembidi nabanembi caimbi.

¹² ¿Esuquidistun, Ēbi chuibeneta, caid nebi, quepecta ëbi chieshēnquido iquec? ¿Adenda Esuquidistun, Ēbi chuibeneta, caidēnquio utsi icsamboen chuipec? ¿Esuquidistun, Ēbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Ēbi chuibeneta, caid nebi, quec muaid chuiquin abipadquid utsibēdtambi icsamboen nabanash, Nuqui bēdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon.

¹³ Ēbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi.

¹⁴ Codinto yacno nidshun anouidi tabadquin Esuquidistu chuiban, Nuquin Papan cac mibēd tabadquin chuibanondambi. ¹⁵ Adembidi, Utsi yacno nid, Nuquin Papan cac nidshun utsibon chuibanondash.

Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquio iquebi. Mibēdi tabadquin ëmbi chuibanac aid tantiaquid mibitedi yanondac. Adsho isash Esusquidistu tantiadonequidquio yampashun, quec mibi tantiec tsadebi. ¹⁶ Esuquidistu ëmbi chuiban-chuibanac aid tantiadonequiec mibitedi tabadsho isash Esuquidistu utsin chuibanacmanombo chuibananoaic nidendabi caombi.

¹⁷ Aden Esuquidistu chuibanac, Ēbibi bēdambo ictiapimbocquid mimbi bēdambo icmiaid nebi, Papa, quequin ma Nuquin Papa Esuquidistu tantiaquidtedishun chuipanuna. ¹⁸ Bēdamboen nabanombi, abibi quesho Nuquin Papan bēdamboen istiapimbo iquec. Ambi, Bēdamboen mimbi naoc, caiduidi ambi bēdamboen isaidquio nec.

11

Pabado muesa icnubi muaquido

¹ Nēbi ëmbi dada uaid isash, tantiesa onquiacbimboen mamēmenuequin Pabadon chiec, quenquiocpashun caimbi mibi. Aden tantiatsiash, quequin abi dada uaimbi. Nēid bedash ëmbi abia dada uaondaaid isec mibi onquiacpadec nēbi nēid mimbi iste dada uaid isec onqueta. ² Nuquin Papan

tantiamiacpadec mibitedi cudasquidquo nebi. Adec cud-
 asquin aton champi utsin, Bednu, cashunac utsin, Bednu,
 cac Bedadenda, quequin amën aton champi chiacbimboen,
 Esuquidistun bednu caid yec icsamenuequidën, Bednu, cac,
 Bedadenda, caimbi. Esuquidistu ëmbi chuibanaido mib-
 itedi bedec choeque. ³ Ëmbi chuibanac Esuquidistu tan-
 tiauidquimbi nisi bëdambo isadacbimboecquidën muaquin
 chiac Eban Nuquin Papan chiaid tantesa uampicpaden
 mimbi Esuquidistu tantesa uatsiac, quec tsadebi. ⁴ Adec
 ëbi tsadnubi Codinto yacno choshon utsin Esuquidistu ëmbi
 chuiboed utsi uain chuisho badedquo tantiec aidon. Adem-
 bidi, Mayan utsi iquec, qesho tantias, Ëbi mene, quec
 mibi. Adembidi, Mibi bëdambo icmequid Esus utsi iqueque.
 Aid tantiata, quequin ëmbi chiaid utsi uain chuisho, Abimbo
 iquec, quequin tantiec mimbi. Aden utsibon ëmbi chuiboed
 utsi uain chuisho tantiec, qesho tantias Esuquidistu tan-
 tesa uatsiash, quec tsadebi. ⁵ Esuquidistun ëbi chuibeneta
 cac Nuquin Papan tantiamiacpaden chuibenec nebi. Aden
 chuibenenubi mibi, Bëdamboenshë utsibon chuibanacpaden
 Pabadon chuibanenquo iquec, qesho tantias, Icsamboen
 chiombi, quetiapimbo iquebi. ⁶ Utsibon bëdamboenshë chi-
 acpadec Pabado onquenquo iquec, mibi quenuc Esuquidis-
 tun, Ëbi chuibeneta, quequin ambia tantiaquidën tantiamiac-
 padomboen mibitedi chuibanombi bëdamboen tantiaquin.

⁷ ¿Codinto yacnocquido ma Esuquidistun bëdambo
 icmepanueshun chuibanequi, Bec cho, quenquo yectabi
 icsape? ⁸ Mibi Esuquidistu chuibanu quiash Esuquidistu
 tantiec iccuededquid utsibon na ampiacbimboec tabadobi.
 Aidon aton na meniaqui aido nashunenquo yec mibi
 yacno nidash tabadquin mibi nashunquin Esuquidistu
 chuibanondambi. ⁹ Adec mibi yacno tabadquin Esuquidistu
 chuibanec bunec tsadec, Bec cho, quenquo iccondabi.
 Nidaid Masedonia caid yacnoësh choquidëmbini meniondash.
 Aden ënden, Bec cho, mibi cainquo iccondacpadec nëbi
 adquiecbidi tsadebi. ¹⁰ Esuquidistun chuimaidquo nebi.
 Adquid icquin adquid nebi quequin chiembi mibëdi nidaid
 Acaya caid yacnocquid utsitedi, Padi. Aden chienda,
 quetiapimboenoc. ¹¹ ¿Atotsi quiashini, Bec cho, quenquo
 icpe? ¿Mibi tantienquiocquindambi mibi, Bec cho, cainquo
 icpe? Mibi tantiec tsadebi. Codinto yacnocquido Pabadon
 tantiaid nec, quequin Nuquin Papan tantiec. ¹² Aden mibi
 tantiaquin, Bec cho, cainquiocquin Esuquidistu chuibenec
 nebi mimbi bëdamboenshë chuibanquid caid: Pabado
 nabanec tabadacpadec tabadebi, quetiapimbo icnubi.

¹³ Aido Esuquidistun ëbi chuibeneta caid nebi quec

muaic. Adec muaquin mibi yuaic. Aidon abi tabadaid icsa ompoec. ¹⁴ Aido tantiamequin ismequid Satanas nec. Nuquin Papan abi yacnoshon uaid mayan bēda aibdēdi tabadquido icsaisa yacpadquid nebi, quequin abipenquiocnoc chuiquin ismequin tantiamiac ¹⁵ adquiecbidi ambi namiaidtedi bēdamboequidbimboec capucuededec. Cuidte ushē chonoc aido icsaid Nuquin Papan comapenen cuidquin chiendac.

Pabadon abi mēyanaid chuibanaid

¹⁶ Adembidi chuinu. Tantia. ¿Mamēmenuequin tantiesa onquiachimboendambi ēbi icaid chuibandio? ¿Utsin aden chuibanenquiocquin ēbi icaid chuibanuna, ¹⁷ Chuita, Nuquin Icbon cainquiocnobi. ¹⁸ Abi icaid utsin-utsinquien chuibanec, quequin tantiaquin adomboembidi ēbi icaid chuibanuna. ¹⁹ Bēdamboen tantiaquidquio nebi, qeshun mamēmenuequin ambembi chiacimboen chuisho tantiec mimbi. ²⁰ Ambembi chiacimboec, Yuanu, qesho tantias icsamboen tantiaquidbimboec mibi yuadte bumpec. Ambembi chiacimboec, Bec cho, qesho icsamboen tantiaquidēmbimboen menebanec mimbi. Muaquin chuiquin mitsana bedshunaqui cacuidenquio yec tabadec mibi. Aden mitsana ambembi isash, Mibi chuiquid nebi, qesho tantias, ¿Tsuntsin mibi adquid icmiosh? quenquiocquin aidēn chiapaden nabanec mimbi. Aton yuabimboecnuc mibi mēyanaiqui, Min yuapenquio nebi, quenquio iquec mibi. ²¹ Nuquin Papan yua icta cac, Padi, quetsias, quequin aden mibi chuitiadquidēmbi chienquio iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsias, quequin tantiaquin ēbi icaid chuibanu. Tantia. ²² ¿Mimbi bēdamboen chuiquid nec caid, Isadaidbo nebi, quepecta iquec? Adembidi, Ēbi isadaidbo nebi, caimbi. ¿Abadauanēn tsyuecquid nebi, quepecta aido iquec? Adembidi, Ēbi Abadauanēn tsyuecquid nebi, caimbi. ²³ ¿Esuquidistu chuibanquid nebi, quepecta aido iquec? Ēbibi Esuquidistun ēbi chuibeneta caidquio nebi. Esuquidistu chuibanquid ēbi yacpadquid utsi nibēdec. ¿Mibi mamēnshumenuequindambi aden chuipadi? Padenquio. ¿Ēbi yacpadquid utsida iqueque? Tantiata. Chuibanu. Utsi bēdiactsēc chonoadnuc comapenec chonoadobi. Adecbidi quēnēn nauedaaid utsi icnubi quēnēn nauedteniaid nebi. Adecbidi utsi bēdiactsēc cuesaid icnuc yuen cuesto-cuestoaaid nebi. Mēyanac unēstsenobi, utsi quenubi aden mēyanac unēstsen-unēstsemboedi nebi. ²⁴ Isadaidbon

cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquo cacuestonioshi. ²⁵ Adembidi cuesten cuesoshi. Yuecshun padpiden. Yuecshun padpiden. Adembidi cuënoten sesioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi. ²⁶ Adecbidi quenenenquo yec capucuenequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquo yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquo yec capucueniobi. ²⁷ Con na bednuec chonoadec uëshquiobi. Padpiden-padpidemboen ushenquo icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquo yaqui adembidi chuibudombi. ²⁸ Ëmbi chuiboed Esuquidistu tantiabenabicquido icpec, quequin capucuenequin chuibeniombi. Utsi yacno nidshun, Ëmbi chuiboedo bëpiscudnushe queshun mibitedi chuiquin dada uaombi. ²⁹ Esuquidistu tantiaquid chieshec dayactiapimbo icpec. Adquiobidi iccobi, quequin tantiec tsadebi. Esuquidistu tantiaquid icsaosh, quesho tantias unësquo yec, Nëbimbobi icsamianquid comapenen cuidta, Papa, quec tsadebi.

³⁰ Aidted ëbi icaid icnuc chieshenquo yec ëbi dayacquio yaid chuibanombi. Nëbi ëbi cuenondaïd chuïnu. Tantiã. ³¹ Abia Yampidën, Nuquin Icbo Esuquidistun Papan nabanaïd ënenquiocquin chuitequidquïo iquec. Aidën nabanaïd chuïbanec muesa Pabado nec, quequin ëbi cuenondaïd Nuquin Papan tantiec. ³² Ëbi cuenondaïd nad icpondashe. Chuïnu. Tantiãta. Damasco yacnocquido ancanquidën Adetas cuëmëdqidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondado ëctabëdmepondash. ³³ Adec daquënë uaid shëcuë cuëmanquo sondado tabadnubi bednushe queshun abuc daquënë uaid iste shëcuëshun tsitsan dapa antsadunshun daquënë uaid cachoc budmepondashi. Budmiac ancanquidën bedadtiapimbo yec cuempondabi.

12

Nuquin Papan Pabado ismiaid

¹ Ēbi icaid chuibanquin ěmbi dada uaid isbanash, Esuquidistun ěbi chuibeneta caidquio Pabado nec, quequin Codinto yacnocquidon tantiatsiash, quequin adobamboedtedi chuibanquin dada uaombi. Ēbi icaid chuibanquin ěmbi dada uaid isash, Abi natiamiaid dadpen icpec, quetsiash, quenquiocquin dada uaombi. Adembidi Nuquin Papan ěbentsĕqui ismiondaid chuinu. Tantia. Nad iccondashe. ² Ĕndenquimbo seta 14ted matamequin Nuquin Papan bĕdamboshĕ yacno indopondashi. Intacchobi abuc indopondashi, quetiapimbo iquebi. Tantienguio iquembi. Adecbidi ěmbi tantiateuidi indoac, quetiapimbo icoaibi. Tsaudi, tantienguio iquembi. Nuquin Papambien tantiec. ³ Abuc bĕdamboshĕ yacno indopondashi, quequin abimbo chiembi. ⁴ Abucshun utsi chuitemaidquio tantiapondambi. Ĕmbi tantiondaid chuitiapimbo icpebi. ¿Mitsipadentsimbi ěmbi abucshun tantiaboed con onqueten chuipatsiaba? ⁵ Bĕdambocquid icsho Nuquin Papan abi yacno indondashi, quetiapimbo iquebi. Natiamiantequid dadpen icnuc ambo abuc nidabi yec bĕdambocquid nebi, quetiapimbo iquebi. ⁶ Abuc nidshun ěmbi isondaaid chuibanquin dada uaid isash, Bĕdambocquid Pabado nec, quequin tantianushe queshun padenguio iquembi. Ĕbi bĕdamboec tabadsho isash, Pabado bĕdamboec tabadec, quesho tantiash bĕdambo ictsiabi. Adecbidi chuibansho tantiash, Abimbo chuiquidquio Pabado nec, quesho tantiash adecbidi bĕdambo ictsiabi.

Satanasĕn natiamiaid

⁷ Bĕdambocquid yansho Nuquin Papan abuc indoshon ismiondashi, quequin Pabadon chuinushe queshun Satanasĕn chomiaidĕn ěbi natiameded-natiamededsho isash, Chĕn, quenquio Nuquin Papa iquec. Satanasĕn chomiaidĕn natiamiac pinchuquĕn siadaid namin nidaĕdaid chictiapimbo yachimboec con dada bĕdanenguio iquec. ⁸ Adec con dada bĕdantiapimbo icnubi, Ĕbi natiamequid cueme, Icho, quequin chiondambi. Adshumbic, padpiden. Adshumbic padpiden adomboembidi chuided-chuidedondambi. ⁹ Adoaquien, Padi. Bĕdambocquid icmenuequin naid nec. Mibi dayacquio icmequid con Mayan mibĕdi iquec, quequin Nuquin Icbon chiondashi. Adoaqui, Bĕdanambo icsho Nuquin Icbon ěbi dayacquio icmec quequin tantiec bĕdambo iquebi, quec tsadebi. ¹⁰ Aden tantiec con dada icsambo icnubi Esuquidistu chuibenec capuebi. Ĕbi icsamboen chuiquin mamĕnshunaqui adecbidi Esuquidistu chuibenec capuebi. Utsin natiamiaqui

adquiecbidi Esuquidistu chuibenec capuebi. Utsin mëyanaqui adquiecbidi Esuquidistu chuibenec capuebi. Adquid icnuc natiapimbo icsho isun Nuquin Papan ëbi dayacquio icmiac tsadiapimbocquin chuibenec capuebi.

Esuquidistu tantiabemenuen chuibanombi quiaid

11 Ëbi yacpadquid utsi nibëdec, quequin chienquioc-tiadquidi niobi. Esuquidistu chuibanquid utsibon chiaid tantiatequidquio iquec, queshun mibëd icquidon ëbi icsamboen chiosh quesho tantiashun Pabado Esuquidistu chuibenequid nec, quenquio utsibo iccosh, quesho tantiashun ëbi icaid chuibanquin dada uaombi. Bëdamboen tantiacbimboen chuibanquid dadpen iquec. Aidon icsactsëcquio isadtsec, quequin ëbi chiec onquenubi Esuquidistu chuibenequidquio nebi. 12 Natiamiaqui chieshenquiocquin Esuquidistu ëmbi chuibancho mibitedishun tantiapondac. Adembidi nadatiambocquin ëmbi nabansho mibitedishun isbededpondac. Adosho isun Esuquidistun ëbi chuibeneta caidquio Pabado nec, quequin chuitiadquidëmbi padenquio mimbi icpondac. 13 ¿Esuquidistu tantiec iccuededquido utsi tantiaquin nashunquimbi mibi padenquiodambi ictio? Utsibon meniaid niondabi. Mibëdi tabadec bunec, Bec cho, quenquio iccondabi. ¿Bec cho, queshoda ëbi bëdamboen mimbi tantiatsemponda? 14 Ënden mibëdi tabadondabi. Yuecash padpidec mibëdi tabadoapondabi. Nëbi padpidec mibi yacno nidendabi. Mibëdi tabadec adecbidi, Bec cho, quenquio iquendabi. Mitsana bunesa nebi. Esuquidistu tantiaquidquio ma icpanu quequin mibëdi tabadquin chuibanendambi. Aton bacuëbo tantiaquin amën anibëdtan ambia tantiaquid icquin tied uaic adembidi shubu uaic bacuëmpibon nabantiapimbo icnubi. 15 Adquiobidi mibitedi tantiec Esuquidistubëd icquido yampec quec chonoadec tsusiobudquimbi chuibenendambi. ¿Ëmbi mibitedi comapenen tantiasho isunda mimbi ëbi tantienquio yampe? 16 Bec, cho, quenquio yec mibëdi tabadondabi. Adsho isash, ¿Piuquid bedenquio icpecta Pabado tabadash? Muaquin chuiquin bedpash icnui, quec mibi. 17 ¿Mitsipadentsimbi bedpa? ¿Ëmbi mibi yacno nidmiaidonda muaquin chuiquin mitsana bedpash? Padenquio. 18 Titobëdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquio icboc. Aidbëdi abentsëc yacximboen tantiaquidquio nebi. Aduidequi tabadquid ëbi daëdi nebi. 19 ¿Pabado ampesa nec mibi camenuendambi dada uaquin chuibampo? Padenquio. Esuquidistu tantiaquid icquin mibi aid tantiabemenuen chuibanombi.

Ēmbi chuibanaid abimbo iquec, quequin Nuquin Papan tantiec. ²⁰ Mibi yacno choash ëbëdi abentsëc yacbimboen tantienquo icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibëdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquo chuisho tantiamane qeshun adembidi dada uaimbi. Bëdambo icquid ëbi icnubi utsi padenquo iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuëdcuededsho tantiamane qeshun adembidi dada uaimbi. ²¹ Ai, mibi yacno choashun adquid icsho isun, Ēmbi Esuquidistu chuibanaido nec, quequin Nuquin Papa chuitiapimbo yec natiaic bëpiuacimboec tsadmane qeshun dada uaimbi. Icsadenequidën abi icsaid ënabi icsho isash aido unësacimboecquid nec, quiash unësquo icmane qeshun dada uaimbi. Aidon naid utsin istemaidquo nec. Ambibi ambi chudtemaid chudted-chudtedec icsambo yequi, Bëdambocquid nebi, quec muacuededec.

13

Icsaid ënesa chuiquin cuidendambi quiaid

¹ Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshundaëdshunquien chuisho tantiendambi. Abentsëcshun: Icsaquid iquec, quequin chuisho tantiatiapimbo iquendabi. ² Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiosho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi. ³ Esuquidistun tantiamiacpaden Pabadon dada uaid nec, quequin ¿mitsipadentsimbi tantiape? quequid comapenec onquequin chuibanembique. Tantiacquiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. ⁴ Aidi matsesash nadatiapenquo icquidbimboecsho isun cuesten dectampanëdash. Adoacsho Nuquin Papan uincuemiac unësesa yanquiopanëdash. Aid tantiaquidquo icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

⁵ Esuquidistu tantiaquid nebi, queshun ¿mitsipadentsimbi aid tantiape? Adecbidi, ¿Ambi chiacpadectabi tabadpe? queshun tantiabono, quequin Nuquin Papan chiaid isbanta. Aden isbanshun, Ambi chiacpaden niac-niaccombi, queshun Esuquidistu ëbëd ictiapimbo iquec, quequin tantiata. Aid mibëd icnuc ambi chiaid niac-niaquenquo mimbi iquendac. ⁶ Adecbidi, Pabado Esuquidistun ëbi chuibeneta caidta neque. Isnu, quequidën ëbi nabanec tabadsho isun, Pabadon abimbo chiosh, capashuni mimbi. ⁷ Aden tantiaquin Codinto yacnocquido bëdamboen tabadmeta, Papa, quequin chuided-chuidedembi. ¿Mibi bëdamboec tabadsho isash, Pabadon chuibanaiado nec, quequin mibi isquidon chuitsiash, quequindambi Nuquin Papa chuided-chuidedpadi? Padenquo. Esuquidistun ëbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquo Codinto yacnocquido nec, quequin ut-sibon chuisho tantiatiadquo iquebi. ⁸ Nuquin Papan chiaid abimbo iquec, quequin ambi chiaidquo chuibanquidquobidi nebi. Ambi chiaid utsi uain chiesa nebi. ⁹ Mibi bëdamboec tabadsho isash bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. ¹⁰ Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibëdsho isun comapenen chienquo icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi. ¹¹ Nëbi ënquin dada uaimbi. Icsaisa icnu quec Nuquin Papan chiacpadec bëdamboec tabadta. Ëmbi dada uain chiaid isquin adobanta. Abentsëc yacbimboen tantiaquin nabanec tabadteneta. Adec tabadsho isash tantianquidquo utsibëd bëdamboec tabadquidquo Nuquin Papa mibëdi iquendac. Aidënquo mibi adquidquibidi icmendac. ¹² Ëbi isec cho cananta. ¹³ Mibi tantiec tabadebi, quec nëmbo tabadquido Nuquin Papan bëdambo icmebanaido. ¹⁴ Nuquin Icho Esuquidistun bëdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ëbëd iquec, quequin tantiaquiota.

Padi. Aidedi dada uaimbi.

CADASIA YACNOCQUIDON ISTE

Pabadon tauamboen chiaid

¹ Pabado nebi. Esus chuibenequidquo nebi. Matsesën: — Adquid icta —¿caidtabi nedi? Padenquo. Esuquidistun: — Ëbi chuibeneta —caidquo nebi. Aid uincuemenëdaid Nuquin Papantsen: —Con mado Esus chuibeneta —caidquo nebi. ² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: — Unësquo iquec —quiosh. ³ Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴ Matses bëdambo icmequid Esus nec. —Ëbi tantiesabo tabadacbimboec icsamboec tabadboedëmbi ëbi tantiasho bëdamboec tabadquid icmendambi — quiash Nuquin Papan chiacpadec abi tantiaquido cuidmenquo icnuec abided ciudadec Esus unëspac caondash. ⁵ Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶ —Esus tantienquo yanosh —quequin mimbi naid chuisho tantiash shubitiadquo iccobi. ¿Ëbi chonobida badedquo Esus tantienquo yano? Nuquin Papan tantiamiac abided ciudadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷ ¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiashun: — Abimboen cachitec —queshun mimbi Esus tantienquo yampac. ⁸ —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiashun aidtsen: —Nuquin Papan cuidpashun —catsiambi. Utsibontsen muaquin chuisho tantiash aidtsen: —Cuidpashun —quiobi. ⁹ Tantia. Adembidi mibi chuinu. Ëmbi chuibanac mimbi Esus tantiabenondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. ¹⁰ —¿Matsesën: “Mibi

bëdambo iquec,” mabi canu —quequindambi aden chuibampadi? Padenquio. Nuquin Papan chiacpadomboen mambi natiadquio yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

Esusën chiaidquio chiec nebi, quiaid

¹¹ Tantia, con utsibo. Mibitedi chuinu. —Esus tantiasho Nuquin Papan matses bëdamboen isbentsiash —quequin ëmbi chuiboed amben chiaidpenquio nec. ¹² Matsesën chiabi Esuquidistun tantiamiac ambi chiaidquio chuibanombi.

¹³ Tantia. Aden Esusën ëbi tantiamiondaid mibi chuinu. Con matses isadaidbon chiacpadomboenuidi natiadquio icquin Nuquin Papa tantiesabo danquin Esus tantiaquido comapenen chieshënquin cuesun secatiadquio icpadenebi. Ëmbi adodened ëmbi chuisho mimbi tantiondac. ¹⁴ Nuquin Papa tantiatiadquio icquin con matsesën chiaid abitedimbo natiadquio ictenebi. Èbëdta tishaidon caniabon bëdiactsëc natiadquio icnubi con tsusedpabon chiaiduidi natiadquio ictenebi. Adquid icquin Esus tantiaquido comapenen chieshëndenembi. ¹⁵ Adshobini Nuquin Papan aton Mado Esus tantiamiondash. Èbi tishabi icnubi ëbi caic: —Con Mado Esus tantiameshun bëdamboen isquin ¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusën chiaid ëbi chui —quequin matses chiambo iccondambi. ¹⁷ Shubu dadpen icquid Edusaden caid yacnocquido Esusbëd icnëdaido ambia Esus chuibanëdaido chuitanambo iccondambi. Utsibo chienquio yec nidaid utsi Adabia caid yacno matses nibëdacno badedquio nidtanondabi. Adashic yuec-yuecpambo ictanec auëshquio choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsëc chotsecnuc matametane Edusaden yacno Petedo isec nidtanondabi. Adec nidash 15tedec ushec aïdbëd tabadondabi. ¹⁹ Ambobi Nuquin Icho Esusën utsi Acobo caid isondambi. Esusbëd icnëdaid utsi isambo iccondambi. Aid daëdtsëqui isondambi. Utsibo padambo. ²⁰ Abimbo chuiquin nëid dada uaic nebi. Ëmbi aden chuibansho tantiash: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auëshquio nidshun nidaid utsi Sidisia caid yacno istanondambi. ²² Nidaid utsi Udeya caid yacno Esusbëd icnëdaido yacno

yuec tabadambo iccondabi. Adsho anocquidon Esus tantiaquidon isabi iccondashi. ²³ Ęmbi naid chuishouidi tantiapac caondash. —Nuquipadquid Esus tantiaquido cuesun secatiadquio icnĕdaidĕmbi Esus tantiabenshun Esusquio chuibeniosh —quequin ĕmbi naid chuishouidi tantiapac caondash. ²⁴ Aden ĕmbi naid chuisho tantiash: —Nuquin Papan nac Pabado bĕdambo iquec. Adomboen Pabado tantiamec Nuquin Papa bĕdamboshĕ iquec —quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Ębĕdi Bednabe caid nidpondash. Titotsen buanondambi. ² Adec Nuquin Papan tantiamiacpadec ambo nidshun Esus tantiaquido chuiquid dapabo caidouditsĕqui cho-chomeshun ĕmbi naboed chuibanondambi. —Ęmbi chiabi yac aidon: “Muequi neque. Pabadon chuisho tantienda,” canushe —qeshun naden chiondambi. —Nuquin matsespenquio isadaidpembo matses utsibo Esusquio chuibeniombi. “Esusuidi tantiasho Nuquin Papan nuqui bĕdamboen istsiash,” quequin chuibeniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ęmbi adoac: —Ai, adembidi tantiemi —quepondash aido. ³ Ębĕd icquid Tito caid isadaidpembo icshobi: —Shui dĕbid dĕteshune —cainquio iccondash chuiquid dapabon abi utsibon: —Adotiad —canubi. ⁴ Adec: —Shui dĕbidien dĕteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsĕqui tantiasho Nuquin Papan nuqui bĕdamboen isec,” quequin con tsusedpan chiaid niacsho tantianu —quiash ĕbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesĕn chiampidtedi nasho Nuquin Papan bĕdamboen istsiash —quepondash. ⁵ Adec aido: —Nuquin tsusedpan chiampicpadomboenuidien nametiad —quesho: —Padi. Mimbi icsamboen chiec —quequin aidĕn chiacpadomboen nainquio iccondambi. —Ma matses utsibon: “Esusĕnuidtsĕqui Nuquin Papa ĕbi bĕdamboen ismec,” quequin ma Esusquio tantianu —qeshun nainquio iccondambi.

⁶ Aden Esus tantiaquido chuiquid dapa caidon Esus tantiaquidĕn natequid utsi chienquio iccondashi. —Esus tantiabenassho isun nuquin tsusedpan chiacpadomboentsen nameta —quequin chienquio iccondashi. ¿Esusbĕd icnĕdaidĕn: —Moisesĕn chiaidtsen nameta —cactambi nametsemponda?

Padenquio ictsenondambi. ¿Atotsi Nuquin Papan aido capec? —Esusbød iccondaidquio neque. Bèdamboen isnu —¿capenda iquec? Padenquio. ⁷ Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusèn naid chuibeniac. Nuquin Papan chiacpadomboembidi Petedon nuquin matses isadaidbo Esusèn naid chuibeniosh. Petedon nacpadomboen mimbi bèdamboen nac —capondashi. ⁸ —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac ⁹ —queshun bèdamboen ispondashi. —Adembidi nanuna. Mimbi isadaidpembo Esusèn naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquio mibi nec —queshun chuiquid dapabon Bednabebèdta mèdimbampondashi. Nèidic Petedo. Nèidic Acobo. Nèidic Uan. Aidtedishun chuiquid dapabo icquin adondashi. ¹⁰ Nadentsen chuipondashi. —Aton na nibèdquido bèdamboen isnuna —capondashi. Adsho tantiaish: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash èbi iccondacno shubu dadpen icquid Antioquiya caid yacno Petedo chopondash. Auèshquio icsashobimbi bëisquiquin chushcapondac. ¹² Abèdtan Esus tantiaquido matses utsibon codocaid pec bèdamboec tabadboedi aton pete isuidanec aidobèd cuèshèdec Petedo icsapondash. Ambo choash Esus tantiaquido con matsesèmpenquio codocaid pec bèdamboec tabadondash. Adnubien Acobon: —Ambo istan —cac con matses Moisesèn chiampid tantiaquido cho-chopondash. Aido cho-chosho isash: —Moisesèn chiampid niacquin matses utsin codocaid pesho chushcanushe —quec dacuèdquin isadaidpembon pete meniaid isuidampondash Petedon. Adec abèdtan Esus tantiaquido matses utsibobèd cuèshèdec icsapondash. ¹³ Adsho isash anocquido isadaidbotsen abèdtan Esus tantiaquido matses utsibobèd tabadenquio yec cuèshèdpondash. Adsho isash èbèd icquid Bednabetsen adecbidi cuèshèdec icsapondash. ¹⁴ Adec ic-saquin Esusèn chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bèdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aibdèdi mibi bèdamboec tabadoc. Aidon piaid pec bèdamboec tabadboedi nèbi aibdèd mibi cuèshèdoc. Adsho isash mimbi nianaïdo: “Petedon matses isadaidbo tabadacbimboec tabadshouïdien Nuquin Pa-

pan nuqui bēdamboen ischitotsiash,” quepec icsamboen chiec. Aden mimbi icsamboen tantiameque. Tantia. ¿Atotsiequin mimbi naoque? —capondambi Petedo chushcain.

Nuquin Papan bēdamboen iste chiaid

¹⁵ Naden con matses Petedo chiondambi. —“Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. ¹⁶ Adquid icquin: “Moisesēn chiaiduidi naquin Nuquin Papa bēdamboen ismembi,” quedenedi nēbi nuqui utsien chiec. “‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

¹⁷ Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” queshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio.

¹⁸ “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bēdamboen ismembi,” queshun abi bēdamboen ismequidquio Esus tantienquio yequini icsambo icchitotsiac. ¹⁹ Con tsusedpa Moisesēn chiactedi natiadquio ictenebi. Adquid bēdamboen iste danquin abitedi natiadquio icquimbi abitedi nainquio iccondambi. Adshun: “Moisesēn chiactedi ambembi matsesēn natiapimbo iquec,” queshun ēmbimbo naid ēnondambi. Nēbini Esus tantiec Nuquin Papan chiacpadec tabadec. ²⁰ “Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquio yanondabi. Nēbi ēmbi tantiaidquio nainquio yec Esuquidistubēdi cuēshēdenquio yec bēdamboec tabadebi. “Ēbi tantiec ēbi cuidmenquio icnuec abided cuidadec unēsac caondash,” quequin tantiashoeni Esusēmbi bēdamboec tabadquid icmec. ²¹ “Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo

iquebi. Moisesën dada uapampid ambi chiaid niaquesa icsho Nuquin Papan bēdamboen istsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquio icnuec ēbided cuidadec unēsnu,” queboedi Esus padenquio ictsempañēdash —capondambi Peto chuiquin.

3

Nuquin Papan aton Mayan tabadmiaid

¹ Tantia. —Cadasia yacnocquido piushbimboecquin tantienquio yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienquio yano? —“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquio iquec —quequin mibi chuibanondambi. ¿Esus tantiatiapimboda ique? ² Mimbi tantiaid ēbi chui. Tiantianu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquio. Ēmbi chiondaid Esusquio mimbi tantiabensho isashien mibēd tabadanondash. ³ ¿Pabiate shēcuē choquidida mibi nendac? Tantia. ¿Atotsieshun tantienquio ique? Mibēdi tabadquin Nuquin Papan Mayanēn mibi bēdamboec tabadquid icmec. ¿Nēbi Esus tantienquio yanecta mibi bēdamboec tabadpatsia? Mibembi bēdamboec tabadtiapimboen mibi iquec. ⁴ ¿Aden Nuquin Papan aton Mayan mibēdi tabadmiaid icquimbida Esus tantienquio yano? ⁵ Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesën chiampid nashoda Nuquin Papan aton Mayan mibēdi tabadmec? Padenquio. Ēmbi chiondaidquio Esusquio tantiasho Nuquin Papan aton Mayan mibēdi tabadmec.

Nuquin Papa tantiaquidquio Abadauan chiaid

⁶ ¿Tsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —queshun Nuquin Papan bēdamboen isbempampic. ⁷ Adec Abadauan: —Nuquin Papan abimbo caic —quequin tantiapampicpadomboen nēbi matsesën Esus tantiasho Nuquin Papan bēdamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuipampic ēndenquimbo. “Abadauan, mibi unēsnu yuecquimbo ictaneshun min tsyuecquid abentsēc

tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquio icsho ambi Abadauan bēdamboen isampicpadomboen nēbi aton Mado Esus tantiasho Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. —Moisesēn chiampicpadomboenuidi nasho Nuquin Papan bēdamboen istsiashi —quequidēmbi abitedimbo nainquio icsho Nuquin Papan cuidendac. Aden ēnden Nuquin Papan chiaid dada uapampic. “Ambi chiactedi nainquio icsho Nuquin Papan cuidendac,” quepampic. ¹¹ —Ambembi Moisesēn chiampicpadomboenuidi nasho matses bēdamboen isendambi —¿quecta icpanēdash Nuquin Papa? Padenquio. Ambi chiaid niacquidoidquio icsho bēdamboen istiapimbo icquin Nuquin Papan naden chuiquin dada uamepampic. “‘Nuquin Papa ambi chiacpadomboen naquidquio nec,’ quequin abi tantiec tabadquidien Nuquin Papan bēdamboen isec,” quequin dada uamepampic. ¹² ¿Ēmbembi Moisesēn chiactedimbo nanuequidta Nuquin Papambo tantiec tabadpec? Padenquio. “Moisesēn chiactedi naquid Nuquin Papabēd tabadendac,” quequin chiampicpaden ambembi matsesēn natiapimbo iquec. Natiapimbo icsho Nuquin Papan bēdamboen istiapimbo iquec.

¹³ Aden Nuquin Papan matses abitedimbo bēdamboen istiapimbo icnuc Esuquidistu: —Ēbided cuidshun ēbi tantiaquido ma con Pan cuidenquio icnu —quiash abided ciudadec unēspac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic. ¹⁴ Adec matses utsi-utsien abi tantiaquido cuidmenquio icnuec abided ciudadec Esus unēspac caondash. Ēndenquimbo con tsusedpa Abadauan chiec: —Yuecshun bēdambo icmendambi —quequin Nuquin Papan chuipampicpadomboen abi tantiaquido bēdambo icmequin aidobēdi aton Mayan tabadmenuec Esus unēspac caondash.

Abadauamba chuishun Moisesetsen Nuquin Papan chiaid

¹⁵ Tantia, con utsibo. Mibitedi chuinu. Min matsesēn nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —queshun abi cuēmēdquidtsen dada uaquid. Aid dada uaid dada uaquidbēdtambi utsintsen utsi uatiapimbo icquid: —Chuiquidēn cuidnushe —queshun. Adembidi ambi chiaid

utsi uatiapimbo icquid icquin ¹⁶ Nuquin Papan: — Nadomboen naindambi —quequin Abadauan chuipampic. —Mibi nibēdanan yuecquimbo ictaneshun min tsyuecquid abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquo icpampic. ¹⁷ ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquido ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuipampic. ¹⁸ ¿—Ēmbi chiaid ěmbi Moises dada uamiacpadomboen nashouidi mibi bēdamboen isembi —queshunda Nuquin Papan Abadauan bēdamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ěndenquimboshē chiampicpadomboen nēbi matses bēdambo icmequin Esus tantiaquido Nuquin Papan bēdamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiuampampic. Adoac Moisesēn aton matses Nuquin Papan chiaid chuibampampic. ²⁰ Nuquin Papanquo Abadauan chuipampic. Abadauan caic: —Chuitan —cainquo icquin Nuquin Papanquo Abadauan chuipampic.

Matses abi icsaid tantiamete chiaid

²¹ Aden Nuquin Papan Abadauamba chuishumbic Moisesen chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquinda Nuquin Papan Moises chuipampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —queshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden

nata —quequin chiaid Moises dada uamepampic. ²² —Ëmbi chiaid isun: “Nuquin Papan chiaid matses abitedishunquien niac-niacchitec. Mëtaniac abembi mënchiquidtiapimbo yacbimboec abembi bëdambo ictiapimboen icchitec,” quequin ma matsesën tantianu —queshun Nuquin Papan Moises dada uamepampic. Adec matses abitedi icsamboec tabadsho bëdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsëqui Nuquin Papan bëdamboen isec.

²³ Esus choabi icnuc nadquio matses icpanëdash. Moisesën chiapadomboenuidi natiadquidi abembi bëdamboec tabadtiapimbo icpanëdash. Mëtaniac mënchiquidtiapimbo yacbimboec aidën chiapadec bëdamboec tabadtiapimbo icpanëdash. Nuquin Papan Esus tantiamiabi icnuc adquio matses icpanëdash. ²⁴ Aden: —Ambi chiaid niaquec icsamboec tabadsho Nuquin Papan ëbi bëdamboen istiapimbo iquec. ¿Nuquin Papa bëdamboen ismequidta nibëdpeba? —nuqui camenuen ambi chiaid Moises dada uamepampic. Aden nuqui ic-said tantiameshun Esustsen tantiamiac: —Esus tantiasho Nuquin Papan nuqui bëdamboen isec icsaisabimboecnuc —nuqui quendac. ²⁵ Aden tantiec: —Isadaidbo tsusedpan chiatedi nashouidi Nuquin Papan matses bëdamboen istisash —quenquio nuqui iquec. —Esus tantiasho Nuquin Papan nuqui bëdamboen isquin bëdamboen tabadmec —quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi nec. Con champi mibi nec —nuqui capec. ²⁷ Adec: —Esus tantiaquid nebi —quesho acten mentoaid yec Esuspadquio ictiadquio nuqui iquec. ²⁸ Aden Esus tantiasho Nuquin Papan nuqui bëdamboen isec. Isadaidbo yec isadaidpembo yec matses yuaido yec matses yuapenquio yec dada yec chido yec quequin Esus tantiasho nuqui bëdamboen isec. —Matses utsibo bëdamboen istiapimbo iquebi —quenquio icquin matses utsibombi aton Mado Esus tantiasho Nuquin Papan bëdamboen isec. ²⁹ Adembidi abi tantiasho ambi Abadauan bëdamboen isampicpadomboen Esus tantiasho Nuquin Papan nuqui bëdamboen isquin bëdambo icmec ambi Abadauan chiampicpadomboen. Adec Abadauanën tsyuecquidobimboecquido nuqui nec.

4

Yuabimboecquid isadaidbo yaid

¹ Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. —Ëbi unësan

con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac –quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec. ² Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquio yanendac. ³ Adquio yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquio icpanëdash. – Tsusedpabon chiacpadomboen Nuquin Papan: “Naden nata,” quequin chiaiduidi nanu –quiashi abembi bëdamboec tabadtiapimbo icpanëdash. ⁴ Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: –Naden nata –quequin chiaid naquidquio Esus nepanëdash. ⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquio icnuec abided cuidadec Esus unëzac caondash. Nëbi Esus tantiasho: –Con mado mibi nec. Con champi mibi nec –quequin Nuquin Papan nuqui bëdamboen isec.

⁶ Adec: –Con bacuëbo nec –quesun Nuquin Papan nuquibëdi Esusën Mayan tabadmec. Adoac bacuën amë: –Ëbi, papa –cachimboen Nuquin Papa nuqui chianec. ⁷ Esus tantiabi Moisesën dada uapampiduidi namenuequido yuabimboecquido icboedi nëbi Esus tantiasho Nuquin Papan: –Con bacuëbo nec –nuqui capec. Aden nuqui bëdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸ Tantia. Nëbi matses utsibo mibi chuiouanu. Ënden Nuquin Papambo tantiesa icquin matses uaquidpenquiobi utsi mimbi tantiapanëdac. Papa quequin mimbi tantianëdaidën yuabo yec mëtaniacimboecquido mibi icpanëdac. ⁹ Nëbi Nuquin Papa mimbi tantiabenondac. ¿Mimbembida adonda? Padenquio. Aidëmbi mibi tantiamepanëdash. Aidën tantiamiaidombo icquin ¿atotsiequin aid tantienquio yanoai? ¿Moisesën dada uapampiduidi namenuequido tanshoda Nuquin Papan mibi bëdamboen ispec? Padenquio. Adquid mëtaniacimboecquid nec. ¿Mëtaniacimboecquid icoatiadquioda ique? ¹⁰ Aden Nuquin Papa tantienquio icquin mimbi icsamboen chiec. –Aid badiadën adenda. Aid inchëshën ushën adenda. Aid setambi adenuidtsëqui nanuna. Nuquin Papan cuidnushe –quequin mimbi icsamboen

chiec. Mimbi chiacpadomboen naquid Nuquin Papan bēdamboen iste danquin mimbi icsamboen chiec. ¹¹ Mibi caic: —Adosh —quesho tantiash shubitiadquio iquebi. —¿Ĕmbi chiondaidonda Esus tantienquio yampash? —quequin tantiac mibi unēsquio iquec.

¹² Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesēn chiampiduidi nanu —quenquio yacbimboec yanondabi. —Ĕmbembi Moisesēn chiampid naquin Nuquin Papa bēdamboen ismembi —quedenedi ěnēdondabi. Nēbi Esusuidi tantiaquid nebi. Adem-bidi Esusuidi tantiata.

Ĕbi adsho tantiash chieshenda. Tauamboen ěmbi Esus chuisho mimbi ěbi chieshēnenquio iccondac. ¹³ Mibi yacno tauamboec choshon daicsabudtsēcshumbi mibi Esusēn naid chuibanondambi. ¹⁴ Istiapicpambo yec daicsabudacshobi mimbi ěbi cacumenquio iccondac. Ĕbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choacbimboecnuc mibi cuishonquiondac. Nuquin Icho Esuquidistu choacbimboecnubidi mibi adondac. ¹⁵ —Min ěshē chicshun ěbi mene —ěmbi cac mimbi ěbi menetsenondac. Aden ěbi mimbi tantiaquiondac. Adondaiddi ¿atotsi quiash chieshcueno? ¹⁶ ¿Nēid abimbo chuiquindambi mibi chieshēmpē? Padenquio iquembi. ¿Aden chuisho mimbidabi chieshēmpē?

¹⁷ Ista. Esus chienquio icquidon ambi chiacpadomboen mibi nametiadquio iqueque. ¿Mibi tantiaquioquin bēdamboen namenuenda mibi chuipec? Padenquio. Ĕbi chieshēmenuembien ambi chiacpadomboen mibi nametiadquio icchitec. Mibi abibi tantiamenuen naic. ¹⁸ Ĕmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ěmbi chiaidquio tantiabenondac. Ĕbēd icquimbi Esus bēdamboen tantiaboedombi ěbi nidtsēcnubi mimbi badedi utsi tantiac. ¹⁹ Aden mimbi naid tantiac mibi unēsquio iquec. Anin bacuē tantiacbimboen mibi tantiaquiembi. —Esusbimboec icpashun. Aid tantiec ambi chiacpadec bēdamboec tabadpashun —quequin mibi tantiembi. ²⁰ Mibēd icquin bēisquioquin mibi chuitsiambi. Mibēd iquenquio icquimbi mibi bēisquioquin chiacbimboen dada uaquin mibi naden chiembi. —¿Atotsieshun Esus tantienquio yanoao? —caimbi.

Abadauanēn mado daēd chiaid

²¹ ¿—Moisesēn chiacpadomboenuidi naquin Nuquin Papa bēdamboen ismembi —quequido icquinda mimbi Moisesēn chiampid bēdamboen tantieque? Tantia. Mibi chuinu.

²² Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquio aton chidon tishaid abentsëcbidi icpampic. ²³ Abadauanën chudac badedquio bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquio icmiac aton mado tishpampic. ²⁴⁻²⁵ Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquio-bidi Edusaden yacnocquido iquec. Esus tantienquio yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidënsnun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶ Edusaden caid utsi iquec. Nuquin Papa tabadacnombo Edusaden caopec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquio iquendac. ²⁷ Nuquin Papan ambi chiaid dada uamepampicpadec Esus tantiaquido dadpenquio iquendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”
quequin ambi chiaid Nuquin Papan dada uamepampic.

²⁸ Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuiampic. Abadauan chiacpadomboen aton Mado Esus tantiaasho Nuquin Papan: —Con mado nec. Con champi nec —nuqui caindac. ²⁹ Ënden Nuquin Papan naidopenquio icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshëndac. ³⁰ Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuiampic? “Tantia, Abadauan. Mibi

chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquoio caidmequin bëdamboen tabadmembî. Yuaidën madoembi padenquoio iquendac,” quequin Nuquin Papan Abadauan chiaid dada uapampic Moisesën. ³¹ Sada caidën mado Isac caidpadquid yuapenquoio nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquoio tantiaquid yec: —Ëmbembi Moisesën chiactedi naquin Nuquin Papa bëdamboen ismembî —quenquoio icnuna.

5

Esus tantiasho Nuquin Papan bëdamboen iste chiaid

¹ Aden: —Esusënuidtsëqui Nuquin Papa ëbi bëdamboen ismec —matses camenuc abided cuidadec Esus unëspac caondashe. Aidquoio tantiata. Muaquidën: —Moisesën chiampicpaden nasho Nuquin Papan nuqui bëdamboen istciashe. Aidën chiapaden nanuna —quequin chuisho tantienda. Aden muaquin chiapaden naic isadaidbo tsusedpan yuabimboec mibi yantsiaque.

² Mimbi isondaïd Pabado nebique. Tantia. Mibitedi chuinu. Moisesën chiactedi naquid Nuquin Papan bëdamboen iste danquin Esus tantienquoio yanec muaquidën chiapadec shui dëbid dëteshuniadacsho isun Esusën Nuquin Papa mibi bëdamboen ismetiapimbo ictciashe. Adenda. ³ Aden Moisesën chiaid abentsëc natsëcshun aidën chiaid utsitedi nainquoio icsho Nuquin Papan mibi bëdamboen istiapimbo ictciashe. Moisesën dada uapampiduidi namenuequido tanenda. ⁴ Aïdo Esus tantiesabo nec. Aden abi bëdamboec ismianquid Esus tantienquoio icsho Nuquin Papan aïdo bëdamboen istiapimbo iquec. ⁵ Esus tantiaquidoen Nuquin Papan Mayanën tantiamiapaden naden tantiec. —Esus tantiashouidi ambi chiaid niac-niacacmaidbimboecnuc bëdamboen isquin Nuquin Papan: “Mibi bëdambo iquec,” nuqui caindac —quequin nuqui tantiec. ⁶ Shui dëbid dëteshuniaidën Esus tantiasho Nuquin Papan bëdamboen isec. Adembidi shui dëbid dëtiacmaidontsen Esus tantiasho Nuquin Papan bëdamboen isoaic. Aden Esus tantiabênash: —Ambi chiapadomboen Nuquin Papan matses tantiaquid ëbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

⁷ —Bednu —quequin nadancacbimboen aiduidtsëqui tantiaquin mimbi Esusquoio tantiondac. ¿Tsuntsin muaquin chiac Esus tantienquoio mimbi yanoape? ¿Atotsiequin abimbo

chiaid niacpe? ⁸ ¿Nuquin Papan nacta Esus tantienquo yano? Padenquo. Ma aidëmbi mibi Esus tantiametiadquo yoc. ⁹ Muaquido tantienda. Nadquo aid iquec. Tosho bedquid abentsëcshun bedmebanac abitedi toshoquecuededec. Adembidi muaquid abentsëcshun chiac matses dadpen-shun abimbo tantienquo yantsiashe. Muaid tantienda. ¹⁰ — Nuquin Icho Esusën tantiamiac ëmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiacpaden shui dëbid dëteshuniaviduidtsëqui Nuquin Papan bëdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ëmbi chuisho adembidi chuiquidon chieshënenquo ictsenoshi. Esus chienquo icsho ëbi chieshënenquo ictsenosh. Abi tantiaquid cuidmenquo icnuec abided ciudadec unësaid Esusuidi chuisho mabi chieshëmpaboc. ¹² Mibi muaquin chuiquido Moisesën dada uapampiduidi namenuequido caic: —Auëshquo cuemepashun —caimbi.

Esus tantiaquido bëdamboec tabadte chiaid

¹³ —Ëbi cuidmenquo icnuec abided ciudadec unësaid Esusquo tantiasho Nuquin Papan ëbi bëdamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ëbi icsate bunaid nanu —quenda. Nëbi Esus tantiaquin mibi icsate bunaid ënquin mëmunta. Esus tantiaquido yec tantiananquiec nashunanta. ¹⁴ Adomboen Nuquin Papan Moises naden chuimiapadomboen mimbi natsiac. “Mibibi min dada datantiadachimboen utsibotsen bëdamboen tantiaquiota,” quequin Nuquin Papan ambi chiaid Moises dada uamepampic. ¹⁵ —Opa penantiadpambo yacbimboec nëishnanash chushcananosh —quiosh mibi caic. Aden naic mibi icsacuededeqe. Esus tantienquo mimbi yanegue. Bëdamboec tabadta.

Nuquin Papan Mayanën bëdamboen tabadmete

¹⁶ Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mimbi nainquo ictsiac. ¹⁷ Nuqui icsate bunaid naiqui Nuquin Papan Mayanën tantiamiacpadec bëdamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate bunaid ënquin nuqui mëmuntsiac. ¹⁸ Nuquin Papan Mayanën tantiamiacpadomboen tantiec: — Esusënuidtsëqui Nuquin Papa ëbi bëdamboen ismec —queshun: —Moisesën chiactedimbo naquin ëmbimbo Nuquin Papa bëdamboen ismembu —quequin tantienquo nuqui iquec.

19 Nadquio icsateuiddi bunquid matses iqueque. Tantia. Chuinu. Nēidic aton chidopenquio chudquido. Nēidic aton bēnēpenquio chudmequido. Nēidic dada daēd chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamete bunquido. 20 Nēidic Nuquin Papan chiaid niacniacquin ambi matsesbimboecnuc nacenaidi papa caquido. Nēidic nēnēchoquido. Nēidic dauē icsa bedash icsa uanquido. Nēidic chieshēmēnquido. Nēidic chieshēmēnec chushcananquido. Nēidic cudasquido. Nēidic nēishēmēnquido. Nēidic ambi naiduidi naquido. Nēidic abitedi cuēsh-cuēshēdmianquido. Nēidic: —Utsin chiaid tantiatiapimbo iquebi. Ēmbentsēqui bēdamboen chiembi —quequido. 21 Nēidic utsin na natiambo bunec chieshēmēnquido. Nēidic tantiadenuen paēmbo icquid acquido. Inchēshēn ushenquio icquin adoquido. Adquidtedishun icsamboen naic. Adec abi icsaid ėntiapimbo yec unēsash Nuquin Papa yacno tabadtiapimbo iquec. Aden mibi chuibanondambi ėnden.

22 Padnuen Nuquin Papan Mayanēn namiaid yec nadquiec tabadquid. Nuquin Papabēdta matses tantiaquiec tabadquid. Esus tantiec cuishonquec tabadquid. —Nuquin Papan ėbi bēdamboen isec —quec bēdambo yec dacuēdenquio yec tabadquid. Utsibon chieshēnaqui chieshēmēnenquio yec tabadquid. Nēishēmēnenquio yec tabadquid. Bēdamboen isquin utsibo nashunec tabadquid. Muainquio yec tabadquid Nuquin Papan namiaid. 23 —Con nauidi naimbi. Ēbiuidtsēqui bēdambo iquec —quenquio icquin utsibo bēdamboen tantiec tabadquid. Abi icsate bunaid ėnquin mēmumec tabadquid. Adquio yec Nuquin Papan Mayanēn namiaido Esus tantiaquido bēdamboec tabadtsiash. ¿Adec bēdamboec tabadsho isunda: —Adec tabadenda —quequin Nuquin Papan Moises dada uamepampic? Padenquio. —Icsamboec tabadenda —quequin icsamboec tabadquid chuipampic. Nuquin Papan Mayanēn tantiamiacpadec tabadquin aden chuipampid nuqui niaquenquio iquec. 24 Adoenquio icquin cuesten dectanac abided cuidadec unēsaid Esus tantiaquin nuqui icsate bunaid ėnquin nuqui mēmumtsiac. 25 Aden icsamboen nainquio yec bēdambo icnuna. Nuquin Papan Mayanēn Esus tantiamiaid icquin aidēn tantiamiacpadomboen nanuna.

26 —Ēbiuidtsēqui bēdambo iquec —quenda. Adenquio yec nuqui chuiquid dēniacte bunenquio yec bēdamboec tabadnuna. —Ēbi bunacpaden ėbi namianenquien icchitec. Utsien namechitec —quec chieshēmēnec tabadenda. Nēishnanenquio yec bēdamboec tabadnuna.

6

Esus tantiaquido bēdamboec isnante chiaid

¹ ¿Nuquin Papan Mayanēn tantiamiacpadomboen bēdamboen tantiaquidta icpec? Adquidēn abēdtan Esus tantiaquidēn icsamboen nasho isun: —Padi. Esus tantiaquid adesambo neque. Bēdamboec tabadta —caquid yendac. —Nēishhec ēbitsen icsamane —queshun nēishenquio icquin aden chuiquid yendac. Abibi datantiadec: —Icsaquid nebi. Esus bēdamboen tantienquio yec adecbidi icsatsiabi —quequin tantiec: —Bēdamboec tabadta —quequid yendac. ² Adec bēdamboec isanec: —Bēdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

³ Utsien: —Utsibēd onquetiapimbo iquebi. Ēbiuidtsēqui bēdambo iquebi —quec abibi muauadquid icsambo iquec. ⁴ Adenquio yec mibibi datantiadta. —¿Nuquin Papan chiacpadectabi bēdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bēdambo ic̄ta. —Utsitedi icsambo icnubi ēbiuidtsēqui bēdambo iquebi —quenda. ⁵ ¿Mimbi utsibon naid chuiban-shoda Nuquin Papan: —Mibi bēdambo iquec —capatsiash? Padenquio. Mimbi bēdamboen naid isun: —Mibi bēdambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷ Piacbo sequidbimboec matses iquec. Tantienquio icquidēn icbompin uestsaidi siac canienquio ic̄tsiash. Padnuen tantiaquidēn ēshē bēdaidquio siac bēdamboec canitsiash. Tantienquio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unēsash Nuquin Papa yacno nidendac. Ēbi adsho tantiash: —Icsaido Nuquin Papan cuidenquio ic̄tsiash —quec muaic tabadenda. Ambi chiacpadomboen mibi cuidendac. ⁸ Ambi chiaid niac-niaquec abi ic̄sate bunaiduidi naquid cuidendac. Nuquin Papan Mayanēn tantiamiacpadomboen naquidien bēdamboec tabadec unēsash Nuquin Papa yacno tabadendac. ⁹ Ēmbi aden chuisho tantiash bēdamboec tabadta. Bēdamboec tabadec chieshtoenquio ic̄sho isun ambi tantiacpadēn Nuquin Papan abēdi nuqui tabadmendac. ¹⁰ Adec bēdamboec tabadquin utsibo bēdamboen isquin nashununa. Aden utsibo bēdiactsēc tantiec Esus tantiaquido yec tantiananquieq nashunanquionona. —Shubu abentsēquēn

tabadquidobimboec Esus tantiaquido iquec —queshun adonona.

Pabaddon ênquimbi chiaid

¹¹ Is. Nua-nua icnuc dada uaqin ëmbimbo ênquimbi dada uanu. ¹² Muaquin chuiquidon mibi con tsusedpan chiacpadomboenuidi nametiadquo iqueque. Aidon chuisho tantienda. Con matses isadaidbo: —Mibi bëdambo iquec —camenuen mibi adometiadquo iqueque. —Esusuidi chuisho con matsesën chieshënquin cuidnushe. Moisesën chiacpadomboen namenu —quequin mibi shui dëbid dëteshunemetiadquo icchitec. Aido muasho tantienda. ¹³ Aden mibi: —Adota —caquidombi Moisesën chiactedi nainquien icchitec. Adquid yec: —Is. Bëdambo iquebique. Ëmbi chiacpadomboen nëidon naosh —quenuembien mibi shui dëbid dëteshunemetiadquo icchitec. Aidon chiacpadomboen nainda. ¹⁴ Ëbien adtiapimbo iquec. Esus tantiesabimboec: —Ëbibi bëdambo iquebi —quetiapimbo iquebi. Esusuidtsëqui bëdambo iquec. Abi tantiaquid cuidmenquo icnuec abided ciudadec unëspac caondash cuesten dectanac. —Aidquo tantiec bëdambo iquebi —caimbi. Aden Esus tantiec: —Ëmbimbo Moisesën chiactedi naquin Nuquin Papa bëdamboen ismembu —quec ênëdondabi. Adecbidi Esus tantiec ëbi bunaid ênash icsate bunenquo iquebi. ¹⁵ —Moisesën chiactedi naquiduidi Nuquin Papan bëdamboen istsiash —quetiapimbo iquebi. Shui dëbid dëteshuniaidëmbi Esus tantienquo icsho Nuquin Papan cuidtsiash. Adembidi shui dëbid dëtiacmaidën Esus tantienquo icshobidi cuidtsiash. Nuquin Papan Mayanën chuca uaidien Esus tantiaquid Nuquin Papan bëdamboen isquin bëdamboen tabadmec. ¹⁶ Ëmbi aden chuisho tantiaash: —Ai, abimbo mimbi caique. Adonona —quesho: —Aido Nuquin Papan bëdamboen isquin bëdambo icmepashun —caimbi. Adquido Nuquin Papan: —Con matsesquo nec —caindac.

¹⁷ —Abimbo chienquien icchitec —ëbi cainda. Esusën chaidquo chiombi. Aidquo tantiaquin ambi chiacpadomboen nabanta. Ëmbi Esusën chiacpadomboen nasho isun chieshënquin cuesaniondashi. Cuesonaid bish abi iquec. ¹⁸ Tanta, con utsibo. Mibi Nuquin Papa chianembi naden. —Mimbi nabocpadomboen con Ícho Esuquidistubëdtan Cadasia yacnocquido bëdamboen ista, Papa —quequin Nuquin Papa chianembi. Padi. Aidtedi chuiquin dada uaombi.

EPESO YACNOCQUIDON ISTE

¹ Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Adquidquio icquin mibitedi Nuquin Papan bēdamboquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuedeta.

² Aden Nuquin Papan bēdamboquid icmenu caidombo icquin ma Nuquin Papan Nuquin Icho Esuquidistubēdtan ēnenquiocquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

Nuquin Papan abēd abuc bēdamboec tabadacpadquiocnoc icmiaid

³ Edoen, Nuquin Papa, Nuquin Icho Esuquidistun Papa bēdamboquid nec. Esuquidistu adquidquibidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboquid nec, Papa, quequin chiec nuquitedi onquedenec. ⁴ Nidaid abubēdta uabicquin aidēnquiocquidtedi uabicquin, Nēidtedquio Esuquidistu tantiaquido icsho ēmbi cuēmbanaido iquendac, quequin Nuquin Papan tantiapampic. Ambi tantiapampic-paden ma nuqui icsaisa icmepanuna. Aden nuqui tantiaquin ⁵ abi bunacpadomboen Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec. ⁶ Esuquidistu tantiaquid nuqui icsho abēd icquid nuqui icmēnēn Nuquin Papan abi yacpadquidquio icmēbanec. Adoac, Bēdamboquid mibi nec, Papa, quequin Nuquin Papa nuqui chuidenec. ⁷ Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuēsten dectanquin unēs uapanēdash. Adosho isash, Nēbi Esuquidistu tantiaquid ēmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa. ⁸ Naden nanuna, quequin ambi tantiapampicpadomboen aton bacuē icmēbanac abēd icquido nuqui nec. ⁹ Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi matses tantiamenquio icpampid nēbi ambi cuēmbanaido Nuquin Papan tantiamēbanec. ¹⁰ Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiapampicpadquibidi adquidquio icmenu caidquio Esuquidistu iquendac.

¹¹ Esuquidistu tantiaquid icsho isun ambi tantiampic-padomboen, Con bacuë icmiaido nec, quequin Nuquin Papan cuëmbanaido ¹² abia tantiaquido nuqui bëdamboec tabadsho isash, Nuquin Papa bëdambo iquec, quequin chiec ma utsibo cuëdëmpanuna. ¹³ Mibi icsaid bedshunash abided cuidadec Esuquidistu unës panëdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. ¹⁴ Aidëmbi mibi bëdambo icmiac Nuquin Papabëd tabadendac. Mibitedi bëdamboec tabadsho isash Nuquin Papa bëdambo iquec, quequin chiec ma utsibo cuëdëmpanuna.

Nuquin Papa chiec onquianiaid

¹⁵ ¿Bëdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abëd icte bunanec iccuededec, quequin chuisho tantiapombi. ¹⁶ Aden tantiashun mibitedi bëpiscudenquiocquin badiadquidën-badiadquidënquien naden Nuquin Papa chian-chianembi. ¹⁷ Esuquidistun Papa, icsaisambo, tantiaquidquo mibi cadoque. Mibi bëdamboen tantiaquid yacpadquiocnoc min bacuëbo Epeso yacnocquido min mayan icmeban, Papa. Adquido min Mayanën icmiac mibi tantiadonequidombo ma icpanuna. ¹⁸ Adecbidi, Abuc ëbëdi mibi iquendac, quequin mimbi chiacpaden tantiamequin pausunac mibëd icnuequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bëdamboec tabadendabi, quequin Epeso yacnocquidon ma tantiapanuna, Papa. ¹⁹ Aden tantiamiac Nuquin Papan nadatiambocquin nabanquin Esus unësacsho uincuemenëdacpaden ëbi uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bëdamboecquid icmebanec, quequin ma Epeso yacnocquidon tantiaquiopanuna, Papa. ²⁰ Esuquidistu unës uacsho uincuemeshun mibi yacno aidi indoshon min dayunquio mimbi tsadumpanëdac, quequin tantiec Nuquin Papan nadatiambocquin naidquio nec, quequin adomboembidi ëbi indoapec, quequin tantiacpadomboen ma Epeso yacnocquidon tantiapanuna, Papa. ²¹ Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquio tsadunquin utsibo mimbi ismepanëdac, Adquid

nebi, chuiquid utsi quetiapimbocon. Nuquin Papan nadatiambocquin nac ënenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna. ²² Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. ²³ Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yacpadquio ictequid yec abentsëc yacbimboec abëdi nuqui tabadendac.

2

Nuquin Papan Esuquidistubëd icmiaido

¹ Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. ² Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënuquid dapan Satanasën yuaido mibi iccondac. Aidën Nuquin Papan chiaid niacacpadomboen mibitedishun niacbededpondac. ³ Adquiduidquio yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. ⁴ Adec cuidnu queboedëmbi nuqui tantiec unësquiocquin Nuquin Papan comapenen nuquitedi tantiamepondash. ⁵ Ambi cuidnu caido icsaquido yec abëd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abëd icquido Nuquin Papan nuquitedi icmiac. ⁶ Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoacbimboecquido icsho Nuquin Papan nuqui bëdamboen isec. Adecbidi abuc Esuquidistubëd icquid nendabi, quequin tantiec nuqui tabadec. ⁷ Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec. Ma adquid icsho isash utsibo, Nuquin Papan naid nec, ma quepanuna. ⁸ Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiemi, quetiapimbo nuqui icnubi, Mibi tantiamiombique. Ëbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abëd icquido nuqui nec. ⁹ Icsaquido

icquin bēdamboen naic nuqui icsaid cuidadiapimbo nuqui iquec. Bēdamboen naic cuidadpebi, quiash abi icsaquid yequi, Bēdambocquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanēdash. ¹⁰ Nuquin Papan uaido nuqui nec. Aidēmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

Esuquidistubēd abentsēc yac bimboecquido

¹¹ Nuquin Papan, Cuidnu, quenquiocquin comapenen tantiamiaidquio mibitedi icquin mibi ēnden tabadaid tantiata. Shui dēbid dētemesa isadaidpembo nec, quequin isadaidbon shui dēbid dētemequidon mibi cuēnondash. Nuquin Papan mattsiquio nebi, quequin shui dēbid dētemequidquio isadaidbo nec. ¹² Adquidquio isadaidbo icnuc, Nuquin Papan chomaid choec, quequin tantiesa mibitedi icpondac. Adquido yec Nuquin Papan mattses nebi, isadaidbo quiacpadec adtiapimbo mibitedi iccondac. Adecbidi, Ēbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abēdi ēnēdenquio yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. ¹³ Adec aid tantiesa yec icsaquid yec, Nuquin Papa yacno puduednu, quetiapimbochoedi, Mattses icsaid bedshunash abided ciudadec Esuquidistu unēsplanēdash, quequin tantiaquid icsho aidēnquio abi yacno yuedendac. Nēbi aid tantiaquid yec abi tantiaquid utsibobēd abēdi tabadac bimboecsho Nuquin Papan nuqui bēdamboen isec.

¹⁴ Isadaidpembo isash isadaidbo, Ēbēd icquidpenquio nec, quequin tantiec datamēncuenepondash. Adecbidi isadaidbo isash adquiecbidi isadaidpembo datamēncuenepondash. Adquido icboedi ēbi icsaid bedshunash Esuquidistu unēsplanēdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamēncuenenquio yec mattses abentsēc yac bimboecquido yanac. ¹⁵ Esuquidistu mattsesash nidaidēn tabadquin isadaidbo icquin isadaidbon, Naden nata, quequin chiacpadomboen utsitedishun natiapimboconobi Esuquidistun uesquin nabampanēdash icsainquiocquin. Adec tabadquin naimbudsho icsaquid bimboecnuc unēs uapanēdash. Aden unēs mesho isec Nuquin Papa, Padi. Chēn, quenquio icpanēdash. Ēbi yacno isadaidbo isadaidpembobēdtabi con madon yuedendac, quiash chēn quenquio icpanēdash. Datamēncueneboedi aid Esuquidistu tantiaquid yanash datamēnenquio yanac.

16 Naden nata, quequin chiaidtedi nuqui natiapimbo noc nuqui icsaid bedshunash Esuquidistu unëspanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic. 17 Matsestedi bëdamboen iste Nuquin Papa bunec quequin ambi chuibeniacpadec abided matses icsaid bedshunash unësquin isadaidbo isadaidpembobëdta Nuquin Papan bëdamboen isaïdo icmepanëdash. 18 Adoac nëid isadaidbo nec. Nëidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedenec.

19 Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaïdobëd tabadtequid mibitedi iquec. 20 Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tania. Esuquidistu abia yampid abi yacno yuedanquidquio yec abia nitsinaïd cüeste nidquidbimboecquid nec. Nuquin Papan chiaïd chuïbampampidobëd Esuquidistun ëbi chuïbeneta caïdo shubu nitsinaïdbimboecquid neoaic. 21 Aidted abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec. 22 Mibi Epeso yacnocquido Esuquidistu tantiaquid utsibobëd Nuquin Papan Mayan meniaïd yec Nuquin Papa tabadtebidi mibi nendac.

3

Isadaidpembo Esuquidistu chuïbenequid Pabado

1 Isadaidpembobëdi ma Nuquin Papa tabadte icnu quequin Esuquidistu chuïbenesho quënën naüdaïd icquin aidën chiacpadomboen mibi chuïbanquidquio nebi. 2 Isadaidpembo yacno nidshun Esuquidistu chuïbeneta Nuquin Papan cac nebi. Esuquidistu chuïbenequid Pabado nec, quequin mimbi tantiec. 3 Ëbi yacno yuedanquid Esuquidistu iquec, quequin Nuquin Papan tantiamiacpaden ënden dada uäquin mibi chiondambi. 4 Ëmbi dada uaondaïd bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. 5 Ëndenquio Nuquin Papan Esuquidistu nidmimbi, quequin chienquiocpampidëmbi nëbi ambi, Esuquidistu matses tantiameta, caïd aton Mayan nec. Adoac Nuquin Papan, Esuquidistu chuïbeneta, caïdtedi ambi naden

nanuna, quequin chienquiocpampidëmbi aton Mayanën tantiamiac. ⁶ Ambi nëbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papa yacno ënëdenquio yec tabadtequido nendac.

⁷ Nuquin Papan, Cuidnu, quenquiocquin nadatiambocquin ëbi ismiaid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi. ⁸ Esuquidistu tantiabicquid utsi bëdiactsëc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaidquio tantiamequiopondashi. Adembidi ambi, Esuquidistu chuibeneta, caidquio nebi. Adquid icquimbi Esuquidistun matses bëdamboen tabadmenu, quequin tantiaid dadpen icnuc aitedi uesquin chuitiapimbo iquebi. Aitedi matsesën bëdamboen tantiatiapimbo icoapec. ⁹ Èbëdtambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquiochoedi nëbi matses tantiamenuen Esuquidistu chuibeneta caidquio nebi. ¹⁰ Aden ëbipadquidon Esuquidistu chuibeniac icsaquid icchoedi Esuquidistu tantiaquid dadpen yanac. Adsho isun aitedi Nuquin Papan Esuquidistubëd abentsëc yacbimboecquid abipadquid ambi tantiampicpadomboen icmebanec. Aden icmebansho isun abi yacno tabadquin namequidon tantienquiochoedëmbi nëbi tantiendac. Nuquin Papan, Yuecshun naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. ¹¹ Matses bëdambo icmetequid Esuquidistu iquendac, quequin ambi tantiampicpadomboen Nuquin Papan Esuquidistu Nuquin Icho icmepanëdash. ¹² Aton mado Esuquidistu ëbi icsaid bedshunash unësash uincuenash Nuquin Papan dayunquio iquec, quequin tantiec dacuëdenquio yec Nuquin Papa chiec nuqui onquec. ¹³ Adecbidi, Esuquidistu chuibenesho bedshun Pabado quënën nauedac, quequin tantiec chieshenquiocquin Esuquidistu tantiata, Epeso yacnocquido mibi caimbi. Èmbi chuibanac Esuquidistu tantiaquid yansho Nuquin Papan abëdi tabadmenuequin Nuquin Papan ambi, Bëdamboequid icmenu, caid mibitedi neque. Chieshenda. Adembidi Pabadon chiac ëbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

Epeso yacnocquido tantiec Nuquin Papa chiec Pabado onquaid

14-15 Nuquin Papan isadaidpembo Esuquidistu chuibeneta cac, chuibenesho quënën nauedaid icquin ëmbi chiac Esuquidistu tantiaquid isadaidbobëd isadaidpembo Nuquin Papan matses yanash aton shubun icquido nec. Nuquin Papan cuëmbanaido nec, quequin tantiec danëshën sebudash aid naden chiec onquebi. ¹⁶ Mibi icsaisa icquin mimbi tantiacpaden Epeso yacnocquido nua pausun, Papa, ma nati-amiantequid icnuc Esuquidistu tantiesa yanenquiopanuna. ¹⁷ Aden pausunac ma aido Esuquidistu tantiadonequidombo icpanuna. Aido mimbi tantiamiac ënëdenquio yec utsibëd tantiananec tabadquid ma Epeso yacnocquido icpanuna. ¹⁸ Aden pausunac, Ëbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanëdash, quequin ma Epeso yacnocquidon tantiapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa. ¹⁹ Aden tantiaquidquio yec Esuquidistu unësnëdash, quequin tantiec papuduedash Esuquidistun matses tantiacpadquidquio Nuquin Papan ma mibitedi icmëbampanuna.

²⁰ Nadquid Nuquin Papan ëbi icmetsiash, quequin nuqui tantiatiapimboconobi nadatiambocquin nabanquin ambi tantiacpadomboen abi yacpadquidquio nuqui icmëbanendac. ²¹ Adoac ma abi tantiaquidon ënenquiocquin Nuquin Papan Esuquidistubëdtan naid chuibampanuna. Ma aidon tsyuecquidontsen adembidi chuioapanuna. Ma nuquin tsyuecquidon tsyuecquidontsen adembidi chuioapanuna. Ambi uaid utsitedi naimëdec, quenubi ma adomboembidi Nuquin Papan Esuquidistubëdtan naid matsesën chuibanoapanuna. Ai, ma ënenquiocquin adopanuna.

4

Abentsëc yacbimboecquido Esuquidistu tantiaquido

¹ Nuquin Papan isadaidpembo Esuquidistu chuibeneta cac chuibenesho bedshun quënën nauedaid icquin naden mibi chiembique. Tantia. Esuquidistu tantiaquido aton shubun icquido yec icbo bëdamboec tabadacpadquieci tabadteneta. ² Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. ³ Nuquin Papan Mayanën abi utsibëd bëdamboec tabadaid tantiamiacpadquieci Esuquidistu tantiaquid utsibobëd bëdamboec tabadteneta. ⁴ Esuquidistu

tantiaquidtedi abentsëc yac bimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aibdëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec. ⁵ Abentsëcquiobi mibitedishun con Icbo caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yac bimboecquid nec. ⁶ Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aibdidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

⁷ Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. ⁸ Èndenquio chiampicpadembi nëbi pausumbanec. Naden ènden chiampid neque. Tantia. Chuinu.

“Nuquin Papan abucquio indoac, Èbi tantiaquidtedi ëbëdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin ambi tantiacpadomboen pausumbanac,”

quequin ènden chiampid nec. ⁹ “Abucquio indoac,” quequin ¿mitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ëbided cuidadnu, quianacsho nidaidëns hun chidon tishpanëdash. ¹⁰ Aid nidaidëns hun tishacsho unës uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpanueshun abipadquidquio aton Mayan aido menebanec. ¹¹ Aden aid menebanac aidënsquio Esuquidistu tantiaquido utsi-utsien nadquid icmeganec: Esuquidistu chuibenequid utsi-utsien icmeganquimbi, Nuquin Papan naden nanuna, quequin chiaid chuibanquid utsi-utsien icmeganoaic. Adquid icmeganquin utsi-utsien Esuquidistu chuibenequidon, Esuquidistu chuibanta, caidbidi aido icmeganquin utsi-utsien abëd iccuededquido isbanquin chuiquin tantiamequid icmeganoaic. ¹² Bëdamboec tabadtenequido ëbi tantiaquidtedi icmeta, cac aidën tantiacpadomboen adquido icmeganac ¹³ ma shubu dapan icquid dadpen yanec abentsëc yac bimboec abi tantiadonequido icpanuna. Aden Nuquin Papan

mado tantiadonec ambi uesquin pausunaidquio yec abipadquidquio iquec icsaisa iquendac.

¹⁴ Ambi pausunaidquio icquin abimbo chiacbimboen utsibon chuisho tantiabenabicquidën badedquio tantiacpaden tantienquio nuqui iquendac. ¹⁵ Tantaranec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yacbimboecquid nuqui yanendac. ¹⁶ Eëbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yacbimboecquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantiananquiec abi tantiaquidtedi Esuquidistupadquidquio abëdi abentsëc yacbimboecquid yanendac.

Esuquidistun nua pausunacpadquieci tabadteniaidi

¹⁷ Esuquidistubëd abentsëc yacbimboecquid abi tantiacquidtedi iquendac, quiash, aidpadquid icnu, quec ënden icsamboec tabadnëdacadquieci tabadenda caimbi mibi. Esuquidistun ëbi chuibeneta caidquio icquin dada uaquin mibitedi aden chiembi. Esuquidistu tantiesan ambibi tantiacpadomboenuidi tantieci. Adecbidi ambibi tantiacpadomboen nabanec. ¹⁸ Pashuacbimboen tantienquio iquec. Nuquin Papabëd tabadte iquec, utsibo qesho tantiesha yec, Tantiatiapibi, quepec aido. ¹⁹ Icsaquid nebi, quequin badedquio chienquio aidon iquec. Adquid icsamianquidën yuaid yec, Icsanu, quiacpadec tabadec. Adec icsasho utsin istemaidec. ²⁰ Adpenquio Esuquidistun tantiamequin pausunaid iquec. ²¹ Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiashun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash. ²² Adoac mimbi tantianëdacadec tabadoainda. Mibi ënden icsamboec tabadacadquieci mibi icsaded-icsadedondac. Icsaquid yequi, Bëdambocquid nebi, quec mibi muadenepondac. ²³ Mibi icsate bunaid ënta. ²⁴ Adsho isun ma Esuquidistun tantiacpadomboen tantianpanu qeshun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacadquieci bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. ²⁵ Adquid icnuec Esuquidistun shubun icquido nebi, quec muainquio yec Esuquidistu tantiaquid utsibobëd abimbo chuinanquidombo icta. ²⁶ Nëishëc icsainda. Nëishash abi ushëmbi bëdanta. ²⁷ Satanasën yuanushe quiash badedquio bëdanta.

28 Ampequid icboedi Esuquidistu tantiaquid yanshun amp-
enda. Adquid icboedi chonoadquin mitsana bedshun utsin
na nibëdsho isun menequid icta.

29 Icsaquid onquiacbimboec onquenda. Utsi tantiaquin
bëdamboequid icmenuequin chiec onqueta ma Nuquin Papan
aidtsen bëdambo icmepanu quiash. 30 Esuquidistu tanti-
aquid mibi icsho isun Nuquin Papan, Con bacuëbo yec ëbëdi
tabadendac, quequin ambi tantiametequid aton Mayan mibi
meniac. Aidi mibi icsaisa icmenuequidën mibi icsasho isec
unësquio yampec. Aid unësquio icmenda. 31 Utsi icsamboen
chuinu, quequin tantiaid ënta. Adecbidi comapenec nëishash
bëdanta. Utsi cuestiadquio yec nëishboedi adecbidi bëdanta.
Nëishash chushqueboedi adecbidi bëdanta. Utsi icsamboen
tantiaquin chuiboedi adecbidi bëdanta. Utsi icsamboen tanti-
aid adembidi ënoata. 32 Adembidi bëdambo icmenuequin utsi
bëdamboen tantiaquin nabanta. Adecbidi utsin chieshënquin
mibi icsamboen nasho isash chieshnanec cuidnanenda. Es-
uquidistu mibi icsaid bedshunash abided cuidadec unëso
isash Nuquin Papa mibi icsaid bëpiscudacpadquiec utsi icsaid
bëpiscudoata.

5

1 Nuquin Papan bacuëbo yec 2 tantiananec tabadteneta.
Nuquin Papan chiampicpadquiec Esuquidistu nuqui
tantiaquin nuqui icsaid bedshunash abided cuidadec
unëspanëdash. Adquidquio icsho isun Nuquin Papan
bëdamboen isaidquio Esuquidistu icpanëdash.

3 Esuquidistu tantiaquid yec, Mimbi inacmaid isec chudnu,
quesambo icta, dada. Adecbidi, Èbi inesa chudmenu, que-
sambo icta, chido. Opabimboec iquenda. Adecbidi, utsin
na isash, Bednu, quesambo icoata. Esuquidistu tanti-
aquid nebi, quequin adoenda. 4 Adecbidi, Esuquidistu tanti-
aquid yec tsienbëdta shui icsamboen chiec onqueboedi
adec mibi onquiaid ënta. Adecbidi, utsi icsamboen on-
caisambo icta. Adecbidi, bëdamboec onquequid utsi uain
chuiquin mamënshunesambo icta. 5 Chudtemaid chudnu, que-
quinuidi chudquid yec opabimboecuidi tabadquid Nuquin
Papa yacno Esuquidistun shubun icquid ictiapimbo iquec.
Adecbidi, Bednu, quequinuidi bedquid yec Nuquin Papa
yacno Esuquidistun shubun icquid ictiapimbo iquec. Aden
nabanquid Nuquin Papabëd Esuquidistu con icbo nec, que-
tiapimbo icoaic. 6 Ambembi chiec onquiaid tantiesa icta.
Adquid Nuquin Papan chiacpadomboen naisa nec. Adquid
Nuquin Papan comapenen cuidendac. 7 Adquidbëd icsainda.

8 Ēnden Esuquidistu tantiesa icquin inchēshquiocnoc isachimboen tantienquo icboedi nēbi Esuquidistu tantiaquid mibitedi yansho ambi tantiamebaniaido icquin badiadnuc isucunacimboen tantiaquiota. Aden tantiec Nuquin Papan bacuēbo yec Nuquin Papan tantiamiacpadquiec bēdamboec tabadteneta. 9 Esuquidistun ambi tantiacpadomboen pausunac abi yacpadquiec nuqui bēdamboec tabadtenendac. Adembidi aid yacpadomboen abimbo chuidenequid icta. 10 ¿Nadec tabadshodabi Nuquin Papan bēdamboen istisiashe? Tanu, quequin adomboen nabanec tabadteneta. 11 Utsibēd icsainda. Utsi icsadenenubi mibi bēdamboec tabadtenesho isun abi icsaid utsin ēmpec. 12 Icsaquidēn ompoquin naid chuitemaid nec. 13 Adquidēn Esuquidistu tantiaquid bēdamboec tabadtenesho isun, Icsambocquid nebi, qeshun Esuquidistu tantiabempec. 14 Bēdamboec tabadquin ismedeniac icsambochoedēmbi bēdamboen tantiabentsiash. Esuquidistu tantiaquido chuiquin dada uaid nad iqueque. Tantia. Chuinu.

“Unēsacimboen tantienquoicboedi isucunshun tantiabenacimboec bēdamboec tabadta.

Adquid icsho Esuquidistun mibi nua pausunendac.”

15 Adec bēdamboec tabadnuec Esuquidistun tantiamiacmaid tabadacpadec tabadenquo yec Esuquidistun tantiamiacpadquiec tabadteneta. 16 Icsaquid dadpen iqueque. Aidpadquid iquenda. Esuquidistun pausunaid mibitedi bēdamboec tabadtenesho isec ma Esuquidistu tantiesa icboedi abi tantiaquid yampanuna. 17 Mimbi icsamboen tantiacpaden nabanenda. ¿Atotsi mimbi ēbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. 18 Icsachitomane quequin nua paēmbocquid aquenda. Aden aquec icsaindac. Icsate bunenquiocquin Nuquin Papan Mayanēn tantiamiacpadomboen nua pausunaid icquin bēdamboen nabanta.

19 Adec icsate bunenquiocquin Esuquidistu tantiaquid ut-sibobēdtan Nuquin Papan chiaid chuiquinc, chuiquid dapa Dabidēn dada uampid sadmo caid utsi-utsien chuiquinc, cuēdēnte utsi chuiquinc cain chiec cuēdēnteneta. Adec cuēdēnquin Nuquin Icbon naid chuideneta. 20 Esuquidistu tantiaquid icsho Edoenēn Nuquin Papan bēdambo icmiaidtedi yec aidēn naid chiec onquedeneta.

Utsi tantiaquin nashunta quiaid

21 Esuquidistu con icbo nec, quequin ambi chiaid niacmane qeshun utsi tantiaquin nashunta.

²² Adembidi Esuquidistun chiacpadomboen dadan inaidën min bënën chiacpadomboen nabanta. ²³ Adembidi abi tantiaquidtedi chuiquidquio Esuquidistu nec. Abi yacno indoshon ënëdenquio yec icsainquiocnoc tabadmendac. Adembidi aton chido chuiquidbidi aton bënë nec. ²⁴ Esuquidistun chiacpadomboen abi tantiaquidon nabanacpadomboen aton bënën chiaid naquidquio aton chido neoaic.

²⁵ Esuquidistu abuc tabadboedi abi abuc bëdamboec tabadtequid tantienquio yec unës uanushe quenquio yec matses tantiec nidaidëshun tishaid yec matses icsaid bedshunash abided cuidadec unëspanëdash. Abuc ëbëdi abentsëc yac bimboecnuc tabadmenu, quec unëspanëdash. ²⁶ Adecbidi, Ëbi tantiaquido icsaisa icmenu, quiaash abided cuidadec unëspanëdash. ²⁷ Adecbidi, icsaid nibëdquid bëdaidquio abi tantiaquido icmeshun Nuquin Papa yacno yuedshun, Ëmbi yuedboed min shubun ictequid nendac, quequin ismembi, quec Esus unëspanëdash. ²⁸ Adomboembidi chido inquidën abibi tantiadacpadomboen ma con chido tantiaquin, Bëdambocquid icmenu, quequin nashundeniash ma aidbëdi bëdambocquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aidbëdi abentsëc yac bimboecquid neoaic. ²⁹ Abibi chieshëmëdesa dada nec. Bunquioquin peshun aquec. Adembidi iquenquin cuëte cuëc. Esuquidistun abi tantiaquido abëd icquido icsho aid tantiaquin nabanac bimboen ³⁰ dadan abëd icquid aton chido icsho aidi tantiaquin nashunquid. Dadaba uashun aidën shictodobi chicshun chido uapampic. Adoshon dadan nami aton canitebëdta chido uashun daëd uac abentsëc yac bimboec aid daëdi yanac. ³¹ Nuquin Papan ënden dada uampid nad iqueque. Tanti. Chuinu. “Aidbëd icnu, qeshun bedash aton papa aton titabëdta nianac bimboec daëdash aton chidobëdi abentsëc yac bimboec tabadtenec.” ³² Adec dada aton chidobëd daëdash abentsëc yac bimboecnuc ambi icmiampicpadec Esuquidistu tantiaquido aton shubun icquido abentsëc yac bimboec tabadendac, quequin chiec. ³³ Nëbi adomboembidi chido inquid ambi inaidbëdta chuioaimbique. Tantiata. Mibibi tantiadacpadomboen min chido bëdamboen tantiata dadan. Con bënë ëbi chuiquid nec, quequin aidën chiaid tantiata chidon.

6

Bacuëbobëdta bacuëchoquid tantiamequin chuibanaid

¹ Bacuëbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. ² Nuquin Papan, Naden nata, quequin ambi chiaid cuënoten dada uaid Moises meniampid abentsëc nad iqueque. Tantia. Chuinu: “Ëbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: ³ “Amën anibëdtan chiacpadomboen naquid Nuquin Papan bëdambo iquebi camiaidquo iquendac. Adecbidi nidaidën yuec tabadnuequin adobanta,” quepampic.

⁴ Amën anibëdtan con bacuëbo chieshmemane queshun bëdamboen chuiquin tantiamequin isme. Adembidi, aido pemeshun acme. Adembidi, Ëmbi chiacpadomboen ma nabampanueshun Nuquin Icbon chiaid tantiamenu, quequin adobanta.

Utsin yuaido yuaquidobidi tantiamequin chuibanaid

⁵ Yuan mimbi Esuquidistun chiacpadomboen nabanacpadomboembidi mibi yuaquidën chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidën chiacpadomboen nabanta. ⁶ Min icbon chuishun isnuc ambi chiacpadomboen bëdamboen mimbi nabanacpadomboembidi min icbon isenquiocnoc nabanoata. Esuquidistu con Icbo nec, quequin aidën chiacpadomboen nanuna, quequin nidaidënshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. ⁷ Min Icbo Esuquidistun aton Papan chiacpadomboen chieshenquiocquin nacpadomboen nidaidënshun min icbon chiacpadomboen chieshenquiocquin nabanta. ⁸ Bëdamboen nabanquido yuacmaidbëdta yuabo Nuquin Papan bëdamboen cuidquin menendac, quequin tantiaquin bëdamboen nabanta.

⁹ Yuaquidon min yuabo chieshënenquiocquin bëdamboen chuibanta. Mibi cuesnu, quenquiocquin ancata. Min Icbo abucquo tabadquid min yuabon Icbobidi nec. Aidën abitedi isec: Nëidic yua icsho daëdpactsëc pausunembi. Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰ Nuquin Icbo nadatiambocquin nabanquid iquec, quiash aidënquo nua pausunaid icta. ¹¹ Satanacacumetequid dasiuiu, quiash, Nuquin Papa mibi nua pausunuesho, Ai,

cata Satanasën mua uaquin bedchitoshe queshun. ¹² Matses isadacpadpenquo nami intacböd isadesa Satanasböd icquido nec. Aidedi Nuquin Papan abi tabadaid tädion tabadmec. Aido icsamianquido nec. Matses yuanuequid Satanas nec. Nuquin Papan uaid tantiash bädambo mibi iquendac, quequin muaquin aidon chiec. ¹³ Aden muaquin chuiquid aidedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushë chonoc Satanas mibi icsamenuec choacsho bëcuniacimboen cacumec abi mibi nidtoash Esuquidistu tantiaquid yec nidendac. ¹⁴ Aid cacumec abi nidquid icnuec Nuquin Papan abimbo chiaidquio nacnëshädacimboec tabadteneta. Adembidi, Nuquin Papan abi bädamboec tabadtequid shictoncacimboec tabadteneoata. Adec tabadec abi nidtoash mibi nidendac. ¹⁵ Adecbidi, Esuquidistu tantiaquid ëböd icquid iquendac, quequin Nuquin Papan tantiamequin pausunaidën tapucudacimboen adomboembidi chuibenequin Satanas cacumec nidacimboec abi mibi nidendac. ¹⁶ Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquo dëcatemënquiash abi mibi nidendac. Aden Nuquin Papan tantiamequin pausunaidënquo dëcatemënquiash Satanasën abi tantiamenuequin pian sedo-sedoacimboen pausuntemaid yec abi mibi nidendac. ¹⁷ Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiacimboec tantiec tabadteneta. Aden pausunac tabadquin Satanas, Esuquidistu mibi bedec choenquo iquendac, qesho cacumiash abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiaidquio icquin mimbi chuisho tantiash Satanas cuenendac. ¹⁸ Adecbidi, Nuquin Papan chiaid aton Mayanën tantiamiaid icquin utsibo tantiaquin baded-badedquiec Nuquin Papa chiec onqueta. Satanasën icsamenueshe quiash Esuquidistu tantiaquid utsibo Nuquin Papa chiec onquedeneta.

¹⁹ Ëbitsen tantiaquin Nuquin Papa chuioata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquio nec, quequin Pabado chuime, Papa, quequin ëbitsen chuioa. ²⁰ Esuquidistun chuibeneta caid icquin abi chuibenesho mëtaneshun quënën nauedaid nebi. Adoaid ëbi icnuc mimbi tantiacpaden chuibanquid Pabado icme, Papa, quequin chuioata.

Ēnquin chiaid

²¹ Nēbi ēbēd icquid chiembique. Tantia. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimiaidquio aidi nec.

²² Mibi yacno puduedshun ěmbi naidtedi ěbi tabadaidbēdta mibi chuibanendac. Ēbi mimbi chuisho tantiash, Bēdambo iquebi, quependac Epeso yacnocquido, quequin Tiquico mibi yacno nidmembi.

²³ Mibēd icquido Esuquidistu tantiaquid utsibobēd ma bēdamboec tabadpanuna caimbi mibitedi. Esuquidistun Nuquin Papabēdtan abi tantiamiantequidbēdta utsi tantiatequid pausunaid ma icpanuna caimbi mibitedi.

²⁴ Ēnenquiocquin Nuquin Icbo tantiaquidtedi ma abipadquid icpanuna.

PIDIPOS YACNOCQUIDON ISTE

Pabadon tauamboen chiaid

¹ Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. ² —Con Icbo Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

Pabadon Nuquin Papa chianiaid

³ Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. ⁴ Aden mibi tantiaquin Nuquin Papa chiec bëdambo yec cuishonquebi. ⁵ Ënden ëmbi chuibanac Esus tantiabemquin mimbi ëbi piucquid meniondac. —Esusën naid ma Pabadon matses utsibotsen chuibanu —qeshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. ⁶ Nuquin Papan tantiamiac mimbi Esus tantiabemondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmeneu Nuquin Papan adembidi mibi bëdamboen tabadmendac. Adembidi mibi tantiec cuishonquebi. ⁷ —Ëbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondambi. Aden chiac puduemenquo icquin abi quënën tsadunebi. Adquid icsho chieshënenquo icquin mimbi ëbi bëdamboen tantiec. Nuquin Papan ëbi icmiacpadquid chieshtoenquo icquid icquin mimbi ëbi adoec. Adsho mibitsen tantiembi. ⁸ Esusën matses tantiacpadomboen mibi tantiac unësquo iquec. Mibi istiadquo iquebi. Ëbi adsho tantiaash Nuquin Papatsen: —Abimbo caic —quendac. ⁹ Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequo, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. ¹⁰ Aden tantiamiac: “Nadec tabadec bëdambo ictsiabi. Adec tabadenquo yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenquo icquin Esus tantiec bëdamboec tabadendac.

Adsho abi chote ushën Esusën: “Icsambo icquid mihi nec,” catiapimbo iquendac. ¹¹ Adec con Icho Esus tantiec bēdamboec tabadsho isun: “Bēdamboen tabadmec Nuquin Papa bēdambo iquēc,” quetsiash utsibo, Papa —quequin Nuquin Papa chianembi mihi tantiaquin.

Utsibon Esus chuibeniaid

¹² Quēnēn nauedac ěmbi Esus chuibenetiapimbo icnubi utsibon chuibeniac utsin-utsinquien Esus tantiabenac caosh. ¹³ Nēshun shubu dadpen icquid Doma yacnoshon: —Quēnēn nauedaid cuenushe —quequin ěbi isquido sondadon: —Esusēn naid chuibancho Pabado quēnēn nauedac —quequin tantiec. Aidon chiac nēmbi icquido utsitedishun adembidi tantiec. ¹⁴ Quēnēn nauedaqui dacuēdenquo iquebi. ěbi adquo icnuc: —Pabado nacpadomboen dacuēdenquo icquin Esusēn naid chuibanembi —quepac caosh Esus tantiacquido dadpen. Adshun dacuēdboedombi dacuēdenquo yanquin Nuquin Papan chiaidquo chuibeniac caosh.

¹⁵⁻¹⁶ Aidon ěbi bēdamboen tantiaquin Esusēn naid chuibenec. —Pabado tantiembi. Esusēn naid chuibenesho bedshun quēnēn nauedac aidēn natiapimbo icnuc ěmbiquien nanu —quequin ěbi bēdamboen tantiaquin Esusēn naid chuibeniac caosh. Utsibombien ěbi chieshēnquimbi Esusēn naid chuibeniac caosh. —Quēnēn tsadunac ma Pabado mēyadbudchitono. ¹⁷ Aidēn chuibantiapimbo icnuc ěmbiquien nanu. Aden ěmbentsēqui chuibanac dadpenshun tantiashun: “Mihi bēdambo iquēc,” ěbi catsiash —quequin Esusquo tantienquo icquimbi Esusēn naid chuibenec. ¹⁸ —ěbi chieshēnec —¿quiashtabi nēishpe? Padenquo. —ěbi chieshēnquidon ěbi bēdamboen tantiaquidobēdtambi Esusēn naid chuibanac matses utsibo utsi-utsiec Esus tantiaquido yanec —quiash bēdambo yec cuishonquebi. Adecbidi cuishonquebi: ¹⁹ —Pidipos yacnocquidon Nuquin Papa ěbi chianiac caosh —quiash. —Mēyadsho Pabado chieshtomenda, Papa. Abi quēnēn nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquo iquendabi. Adembidi aidēn nac quēnēn tsadenquo iquendabi. ²⁰ ěmbi naondacpadomboen dacuēdenquo icquin Esusēn naid chuibantiadquo iquebi. Chieshtotiapimbo iquebi. —Ma utsibon: “Esuquidistu bēdambo iquēc,” canu —quiash aduidequi iquebi unēsabi yec. Utsin: —Cuesunchitono —caqui adecbidi chieshtoenquo ictsiabi.

²¹ Unēsabi Esuquidistu tantiec bēdambo iquebi. Unēsash Esusbēd tabadequic bēdamboshē ictsiabi. ²² ¿Mitsipadtebi

bumpaba? ¿Unëstedabi bumpaba? ¿Unësenquo yec tsadtedabi bumpa? Unësabi icquin ëmbi Esusën naid chuibanac utsibon Esus tantiabentsiash. ²³ Nuquin Papa yacno nidash Esus isec bëdamboshë ictsiabi. Esus iste bunquiebi. ²⁴ Aden tantiequi: —Unësabi yec Pidipos yacnocquido Esus tantiacquido Esus bëdamboen tantiamec ano nidtsiabi —quequin tantiec unëstiapimbo icoaibi. ²⁵ Unësabi yec mibi yacno nidoatsiabi. Aden tantiec: —Nuquin Papan nëbi ëbi unës uamenquo iquec —queoaibi. Mibëd tabadquin Esusën naid bëdamboen chuibantsiambi. Adoac bëdiactsëc Esus tantiatsëcboedombi Esus tantiaquieci mibi bëdambo ictsiac. ²⁶ Èbi choacsho isash: —Pabado padpidec chomequid Esus bëdamboshë iquec —mibi quetsiac. Adec mibi cuishonquetsiac.

Chieshtoenda, quequin Pabodon chiaid

²⁷ Èbi ano nidtiapimbo icnuc Esusën chiacpadec chieshtoenquo yec bëdamboec tabadta. Quënën ëbi nauedboedën puduemiatic mibi yacno nidshun mibi bëdamboec tabadsho isash: —Pidipos yacnocquidon ëmbi chiacpaden naic —quetsiandabi. Nëbi mibi yacno nidtiapimbo iquebi. Adnuc mibi istanquidon: —Chieshtoenquo icquin Esus tantiec cuëshëdenquo yec Pidipos yacnocquido bëdamboec tabadosh. ²⁸ Esus chieshënquidon: “Esusën naid chienda. Cueschitomane,” caqui dacuëdenquo icquin Esusën naid adembi chuibanosh —quequin mimbi naid chuisho tantiash bëdambo ictsiabi. Adec cuesambo yec nuqui: —Nuquin Papan icmiacpadec dacuëdenquo iquebi. Èbi dacuëdenquo icmequidën ambi chiacpadomboen ëbi chieshënquido unësacsho icsambo icquido cuidacno nidmendac. Ambi chiacpadec Esus tantiaquid yec unësashini Nuquin Papa yacno tabadendac —quequin nuqui tantiatsiac. ²⁹ —Con Mado Esus tantiasho utsibon chieshëntsiandac —quequin Nuquin Papan tantiacpadomboen utsibon mibi chieshënendac. ³⁰ Èbi nacpadomboen mibi chieshënoaic. Mimbi isnuc ëbi chieshënondash. Adembidi ëbi chieshënoaic nëbi. Nëid dada uaid isquin: —Pabado padpiden chieshënoac —quequin mimbi tantiendac.

2

Utsi tantiec tabadta, quiaid

¹ Tanta, con utsibo. Mibitedi chuinu. ¿Mitsipadquo Esus tantiaquido icpec? Esuquidistu tantiaquieci dayacquio yacbimboec iquec. Adecbidi Esusën tantiaido yec bëdambo icquido nec. Adecbidi Nuquin Papan aton Mayan abëd icmequin bëdamboec tabadquid icmiaidobidi nendac. Adoaido matses tantiaquidombo nec. ² —Adquidbidi nebi —quec adquiecbidi bëdamboec tantianancuedeta. Èbi

cuishoncamenuec adta. Abitedi: —Esusën chiacpadomboen nanuna —quecuededec chieshënanenquio yec bëdamboec tabadta. ³ Nadec onquec tabadenda. —Ëbiuidtsëqui bëdamboshë iquec. Con nauidtsëqui nanu. Con nauidtsëqui bednu —quec mibiuidtsëqui tantiadec tabadenda. —

Ëbi bëdapabi icnuc utsibo bëdamboshë iquec. Aido nashuntiadquo iquebi —quec bëdamboec tabadta. ⁴ Mimbi tantiacpadomboenuidi nainquio icquin utsin tantiacpadomboentsen nata. Mitsanauidi tantienquio icquin utsibo nashuntetsen tantiata.

⁵ Esuquidistun nacpadomboen naic mibi bëdamboshë ictsiac. Aidën chieshtoenquio icquin Nuquin Papan chiacpadomboenuidi napanëdash.

⁶ Aton Papa Nuquin Papapadquidquo yec Esus abitedishun Icbombo neapanëdash.

Aton Papabëd yec bëdamboshë icboedi: —Padi icnuna. Nuquibi namec bëdambo iquebi —quenquio yec Nuquin Papan chiacpadomboen naic auëshquio chopanëdash.

⁷ Adec aton Papan yuabimboecquid yanash ambi chiacpadecc mattsespanëdash chidon tishac.

⁸ Adashic mattses yec aton Papan chiacpadequi abided cuidadec unëspac caondash.

Mattses icsamboshë icquido cuidacimboen cuesten dectanquin icsaisambobi Esus unës uapac caondash.

⁹ Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abëdi Esus tabadmepanëdash.

Aden abitedishun Icbombo icmeoapanëdash.

¹⁰⁻¹¹ —“Nuquin Icbombo Esuquidistu bëdamboshë iquec,” ma abitedi quenu —qeshun aden Nuquin Papan abitedishun Icbombo Esus icmeoapanëdash.

—Ëmbi ëbi yacnoshon uaido mayan bëdabo yec nidaidën tabadquido mattses yec unëscasho uincuemiaido yec quequido: “Nuquin Icbo Esuquidistu bëdamboshë iquec. Abi abitedishun Icbo icmeoaquid Nuquin Papatsen bëdamboshë iquec,” ma quenu —qeshun adopanëdash.

Utsibo Esus tantiamete chiaid

¹² Mibi tantiaquiembique. Tantia, con utsibo. Mibitedi chuinu. Esusën nacpadomboen mimbitsen bëdamboen nata. Ëbi mibëd icnuc mimbi nadeniondacpadomboen ëbi nibëdnuc adembidi bëdamboen nata. —Nuquin Papa dacuëdampambo icquidën chiaid niacmane —quiash ambi chiacpadomboen naic aibëdi tabadnush bëdamboec tabadta. ¹³ —Ma bëdamboec

tabadnu —quequin Nuquin Papan ambi chiacpader tabadte bumequin nuqui bēdamboen tabadmeque. Bēdamboec tabadta.

¹⁴ Adec bēdamboec tabadec chushcananenda. Adecbidi: —Bēdamboen nanuna —cac chieshec tabadenda. ¹⁵ —Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bēdamboec tabad. Matses dadpenquo icsamboshē icnubi adequi bēdamboec tabad. Adec bēdamboec tabadquin icsambo icquido mimbi Esus bēdamboen tantiametsiac pashposhquiabimboecnuc. ¹⁶ Mimbi adoac utsin: —Esus tantiasho Nuquin Papan ēbi bēdamboen isec. Nēbi bēdambo yanec unēsashini aīdbēd tabadendac —quequin tantiatiasho. Aden mimbi chuibanaido Esus tantiaquido yansho isash cuishtonquetsiabi. Esuquidistu nidaidēn padpidec chote ushēn bēdambo ictsiabi. —Ēmbi chuibanondaido Pidipos yacnocquido ambi Esus tantiamiaidobēd choeque. Is —quec bēdambo ictsiabi. ¹⁷ —“Bēdambo mibi iquec,” Nuquin Papan mabi canu —qeshun Esus tantiaquin mimbi bēdamboen nac. Utsibo nashunquin Esusēn naid chieshtoenquo icquin mimbi chuibanac. Mimbi adoaid chuisho tantiashun: —Mibi unēs uanu —caquini bēdambo ictsiac. —Aido bēdambo iquec —qeshun mibi tantiec bēdambo yec cuishtonquetsiabi. ¹⁸ Ēbi unēs uaid chuisho tantiasho adecbidi bēdambo icta. —Esus tantiec chieshtotiapimbo icsho Pabado unēs uac —quiash bēdambo icta.

Pabadon Timoteyo chiaid

¹⁹ Con madobimboecquid ēbēd icquid Timoteyo mibi yacno nidmetsiambi. —¿Midapadquec Pidipos yacnocquido tabadmeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bēdambo ictsiabi. ²⁰ Timoteyopadquid utsi nibēdec. Aid abentsēcshumbi ēmbi nacpadomboen mibi tantiaquec. ²¹ Utsibombien aton nauidsēqui tantiaquin Esuquidistun chiacpadomboen natiapimbo iquec. ²² —Timoteyon bēdamboen naondash —quequin mimbi tantiec. Mimbi tantianubi ēbēdtan Esusēn naid chuibanondash con mado icbobimboecquin. Aid bēdambo iquec. ²³ Adquid icsho mibi yacno: —Istan —catiadquio iquebi. Ēbi quēnēn nauedquido ēbi caic: —Unēs uanu —qesho tantiabono. Tantiashun: —Ēbi quēnēn nauedquidon chiaid Pidipos yacnocquido chuitan, Timoteyo —catsiandambi. ²⁴ Ēbitsen nēbi mibi yacno nidtiadquio iquebi. Ēbi caic Nuquin Icbo: —Ma nidnu —quenuc anobi nidtsiabi.

Epapadodito chiaid

²⁵ Epapadodito con buchibimboecquid mimbi: —Pabado nashuntan —cac Pidipos yacnuësh chonëdaid nëmbo iquec. Utsibon chieshënubi dacuëdenquoio icquin ëbëdtan Esusën naid chuibanondash. Adondaïdi nëbi: —Mibi iccondacno tabadec nid, buchi —caombi. ²⁶ Aid mibi tantiec unësquoio yec tsadposh. —Ëbi unëstsemboed con matses chuinuec Pidipos yacno nidaccosh —quiash mibi ismete bunquiec shubianti-adtsëcquoio tsadposh. Adsho isun: —Min shubuno nidec nid —caombi. ²⁷ Adec unëstsenquiondash. Adshobien Nuquin Papan bëdamboen isquin bëdamepondash. Ëbitsen bëdambo icmenuen Nuquin Papan adopondash. Epapadodito unësquoio icnuc ëbi shubiec tsadsho isash: —Aid unësan unësquoio icnuc Pabado mëyadnushe —qeshun Nuquin Papan Epapadodito bëdamepondash. ²⁸ Adoacsho mibi yacno aid badedquoio nidmetiadquoio iquebi. Aidbëd iquec mibi bëdambo ictsiac. Mibi yacno nidsho isash ëbitsen bëdambo ictsiabi. ²⁹ Epapadodito nidacsho bëdamboen ista cuishonquequin. —Nuquin Icbon mibi bëdamiac. Aid bëdambo iquec. Mibitsen bëdambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bëdamboen ista. ³⁰ Esuquidistun chi-acpadomboen naic ëbëdi tabadec Epapadodito chondash. Chieshëmënquido dadpen icnubi ëbi nashunec tabadec daic-sabudash unëstsenondash. Chotiapimbo icquin mimbi: —Pabado nashuntan —cac choash nibëdantsenondashe. Mibi yacno nidacsho bëdamboen ista.

3

Esusuidtsëqui tantiasho Nuquin Papan bëdamboen isaid

¹ Nuquin Icho Esus tantiec cuishonquenuna. Aduidequiac bëdambo ictsiash. Tantia, con utsibo. —Tantienquoio yanushe —quequin ëmbi chiondaïd dada uaqin padpïden mibi chuioanu. ² Muaquidon chuisho tantienda. Aidon: —Shui dëbid dëteshun secaïdoudi Nuquin Papan bëdamboen istsiash —quequin chuisho tantienda. Aden chiec icsa uanquidombo neque. Uimanëmënquidoen nechitec. ³ —Shui dëbid dëteshun secaïd nec —¿qeshunda Nuquin Papan nuqui bëdamboen ispec? Padenquoio. Aidon Esus tantienquoio icsho bëdamboen isenquoio icquin aton Mado Esus tantiaquidoen Nuquin Papan bëdamboen isec. Aton Mayanën tantiamiac: —Nuquin Icho Esuquidistu bëdamboshë iquec. Abided ciudadec unësaid tantiasho Nuquin Papan nuqui bëdamboen isec. Ëmbembi naquin Nuquin Papa bëdamboen ismetiapimbo

iquebi —quequin nuqui tantiec. ⁴ Matsesën tsusedpan chiaididi tantiasho Nuquin Papan bēdamboen iste icnuc nadtsiabi. —Tsusedpan chiaid utsibon daēdpactsēc nanuc ěmbimbo naquin dadpenquo nabanombi. Aden ěmbimbo dadpenquo nasho Nuquin Papan ěbi bēdamboen isec. Adembidi isadaidbombo icsho ěbi bēdamboen isoaic —quetsiabi. Něbi adtiapimbo iquebi. ⁵ Isadaidbo nebi. Isadaidbon chidon tishacsho sietetedec ushun Moisesën chiampicpadomboen shui dēbid dēteshunenēdaidquo nebi. Con matses tsusedpa Benamin yampid icnuc Ebedeyombo nebi. Isadaidbo caimbidi Ebedeyo capec. Adquid yec aiděn onqueten onquequid nebi. Moisesën chiampid namequidquo padiseyobo caid niondabi. ⁶ Adquid icquin icsambo icquido danquin Esus tantiaquido cuesun secatiadquo iccondabi. Nuquin Papan chiacpadomboen natiadquo iquequi adondabi. Moisesën chiampiduidi nate bunquiondabi.

⁷ Adquid icquin Esus tantiabi: —Ěmbimbo naic bēdamboshě iquebi —quequin icsamboen tantiapondambi. Adondaidi Esus tantiabenash: —Ěmbimbo naiquini icsambo iccoc. ⁸ Něbi con Icbombo Esuquidistu tantiec bēdambo iquebi —quequin tantiabenondambi. Aiduidtsěqui tantiatiadquo icquin icsa secacimboen ěmbimbo naid ěnondambi. ⁹ Esus tantiate bunquiebi. Adquid yec: —Moisesën chiampicpadomboen ěmbimbo naiquini bēdambo iquec —quetiapimbo yanashic nadondabi. —Nuquin Papambien aton Mado Esuquidistu tantiasho bēdamboen isquin ěbi bēdamboen tabadmec —quequin tantiabenondambi. ¹⁰ Aden tantiabenshun Esusuidtsěqui comapenen tantiatiadquo iquebi. —Comapenen tantiaquin Nuquin Papan uincuemaiad icquin Esusěn bēdamboen tabadmetsiashi —quec Esus tantiate bunquiebi. —Nuquin Papan chiacpadomboenuidi nasho měyanac Esus uněsac caondash. Adembidi Nuquin Papan namiacpadomboen nasho měyanac chieshtotiapimbo ictsiabi. ¹¹ Uněsambo icsho Esusěn bēdamboen tabadmetsiashi. Uněsacsho Nuquin Papan uincuemetsiashi —quec adec Esus tantiate bunquiebi.

Nuquin Papan chiacpadomboenuidi nate bunaid

¹² Tantia, con utsibo. Mibitedi chuinu. —Nuquin Papan chiaid niaquesambo nebi —¿quectabi ique? Padenquo. Adquo ictiadquidi adquo yenquieni icchitec. —Bēdamboshě icmenuen Esuquidistun yuapondashi —quequin tantiec bēdamboshě icte bunquiebi. ¹³ Adec bēdambo yanabi yec: —Ěmbi naboed naic bēdamboshě iquebi —quenquo icquin Esusquo tantiaquin ambi chiacpadomboen natiadquo

iquebi. ¹⁴ —Bednu —quequin bedteuidtsëqui tantiec titinquiacbimboen Esusquio tantiaquiec ambi chiacpadquiec bëdambo ictiadquio iquebi. —Adec tabadec unësacsho Nuquin Papan abi yacno ëbi tabadmec —quec bëdambo icte bunquiebi.

¹⁵ Nuquin Papan chiacpadomboen natiadquio icquin ëmbi chuibocpadomboen mimbi tantiatsiac. Ütsien: —Padi. Pabodon chiaid abitedi nainquio icquin abentse-abentsen naindambi —quesho Nuquin Papan ambi tantiaid bëdamboen tantiametsiash. ¹⁶ Nëbi nuqui icbocpadquiec tantiananquiec bëdamboec tabadnuna.

¹⁷ Ëbi yacpadquiec bëdamboec tabadta. Ëmbi chiacpadomboen utsibon nasho isun adomboembidi bëdamboen nata. ¹⁸ Ëmbi chuideniondacadomboen mibi padpiden chiemi shubiquimbi. Mibi yacno utsi-utsiec icsamboec tabadpec. —Abided ciudadec cuesten dectamëdaid Esus tantiaquid nebi —quetsëcboedi icsamboec tabadec. Adquido Esus tantiaquidpenquio nec. ¹⁹ Peteuidtsëqui tantiec icsambo yequi: —Bëdambo iquebi —quec tabadec. Nuquin Papa tantienquio icquin nidaidën icquiduidtsëqui tantiec. Unësash Nuquin Papa yacno nidtiapimbo yec icsambo icquido cuidacno nidendac. ²⁰ Padnuen Nuquin Papan bëdamboen isaïdo yec aïdbëd tabadtequido nuqui nec. Abi yacno buanuec abucuësh Nuquin Icho Esuquidistu chosho isnuec nuqui tabadec. ²¹ Choshon aïdëmbi nuquin dada chuca uaindac aton dada chuca uacpadomboen. Adoac unëstiapimbo icquiduidquio nuqui iquendac. Abitedishun Icbombo icquin ambi chiacpadomboen abitedi namequidquio icquin aden nuquin dada chuca uaindac.

4

Esus tantiec cuishonquiaid

¹ Ëmbi aden chuïsho tantiash Nuquin Icbon chiaid ni-aquenquio yec bëdamboec tabadta. Mibi tantiaquin mibi istiadquio iquebi. Mibi caic: —Ëmbi chuïbanondaido Esus tantiabënash bëdambo ictiadquio iccondash —quec bëdambo iquebique. Adquiec chieshtoenquio icquin Esus tantiec bëdamboec tabadta.

² Tantia. Nëbi chïdo daëd Ebodia caïd Sintique caïdbëdtatsen chuïnu. Amicananenda. Esus tantiaquido yec: —Ai, Nuquin Icho Esusën tantiacpadomboembien natiad —quec tabadta.

³ Tantia, buchi. Ëbëdtan Esus chuïbanondaid icsho mibitsen chuïnu. Aïd chïdo daëd chuïquin: —Bëdamboec isnanta —cata. Utsibon chieshënubi ëbëdtan aïd daëdshun Esusën naïd chuïbeniondashe. Adembidi Quedemente caïdëntsen ëbëdtan chuïbanondash. Adembidi utsibontsen. Adquidotedi Nuquin

Papan: —Esusbēdta ēbi tantiaquido mibi neque. Ēbēd tabadec cho —caindac.

⁴ —Nuquin Icho Esus tantiaquiec bēdambo yec cuishonquenuna —caimbi. Esus tantiaquiec cuishonquenuna. ⁵ —Ma utsibo: “Esus tantiaquido chieshēmēnenquo yec bēdambo iquiec,” ma quenu —quiash bēdamboec tabadnuna. Nēbi Nuquin Icho Esus choeque.

⁶ Adecbidi chishpiquec tabadenda. —¿Atotsimbi napeba? ¿Atotsimbi pepeba? ¿Nēbida con matses unēspeba? —quequin uesquin tantienda. Padenquo icquin nuqui dacuēdquin tantiaidtedi Nuquin Papa chuinuna. —Ēbi nashunquin utsibotsen nashunta, Papa. Aden nashunec mibi bēdambo iquiec, Papa —quequin Nuquin Papa chuinuna. ⁷ Aden nuqui chiac aidēmbi nuqui bēdambo icmec dacuēdenquo icnuc. Adoac bēdambo icnuc utsibo: —¿Mitsipadec dacuēdenquo yampash? —quetsiash. Nuquitsen: —¿Mitsipadequini bēdambo yampo? —quetsiac. Adec: —Nuquin Papan ēbi nashunquidquo nec —quequin Nuquin Papa chianequin Esus tantiaquiec nuqui dacuēdenquo yec bēdamboec tabadtsiac.

Bēdamboshē iquiec, caiduidi tantiata, quiaid

⁸ Tanta, con utsibo. Nēidtsen chuinu. ¿Atotsi abimbo chiaid icpec? Adquid tantiata. ¿Atotsi bēdambo icpec? ¿Tsutsi bēdamboec tabadquid icpec? Adquidtsen tantiata. Aden: —Bēdambo iquiec —caidtedi tantiata. ⁹ Adembidi ēmbi chuisho mimbi tantiondac. Aden ēmbi chiondaid tantiaquin ēmbi naondacpadomboen nata. Adsho isash mibi dacuēdenquo icmequid Nuquin Papa mibēd iquendac.

Pidipos yacnocquidon bēmiaid

¹⁰ Nēbi mimbi bēmiaid bedash bēdambo iquebi. Ēnden mimbi aden menianiondashumbic yuectaneshun nēbi ēbi tantiaquin mimbi meneoaid bēacsho bedombi. —Nuquin Ichon tantiacpadomboen padpiden Pidipos yacnocquidon ēbi ma menenuequin piucquid bēmiac —quiash bēdambo iquebi. ¿Ēbi tantienquioda mimbi ictionda? Ēbi tantiaquin ēnden bēmetiadquidi tsundan bētiambo icnuc mibi nepanēdac. ¹¹ —Con na nibēdeque. Beccho —¿quectabi ique? Padenquo. Adtiapimbo iquebi. Con na icnuc bēdambo ictsiabi. Con na nibēdnubi adecbidi bēdambo ictsiabi. ¹² Con na dadpen icnuc bēdambo ictsiabi. Con na nibēdnubi adecbidi bēdambo ictsiabi. Con piucquid dadpen icnuc bēdambo ictsiabi. Con piucquid nibēdnubi adecbidi bēdambo ictsiabi. Peten cubudash adecbidi bēdambo ictsiabi. Buna natiambo icnubi adecbidi

bëdambo ictsiabi. ¹³ ¿Ëbenquiodabi adti? Padenquio. Esusën namiaquini adquo iquec. Aidëmbi namiac ambi chiacpadomboen naimbi. ¹⁴ Adnuc: —“Mëyadec,” quiosh —queshun mimbi ëbi ma menenuequin bëmiaid bëdambo iquec.

¹⁵ Min nidaid Masedonia caid yacnuësh nidsho Esus tantiaquido shubu utsinquidon uanocquidon menenquio iccondashi. Adnubi tauamboen menequin mimbiuidtsëqui ëbi meniondac. Esus tantiabentsëcshun mimbi adondac. ¹⁶ Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibëdec,” quiosh —queshun mimbi piucquid bëmiaccondac. Yuetaneshun adembidi. Adshumbic padpiden. ¹⁷ —Mimbi bëmiaid bëdambo iqueque. Utsi beccho —¿quequindambi aden chuipe? Padenquio. —Pidipos yacnocquido Esus tantiaquido bëdambo iquec —Nuquin Papa camete bunquin: —Mimbi bëmiaid bëdambo iccosh —caimbi. ¹⁸ Utsi-utsien bedshumbeneshun mimbi bëmiaid Epapadoditon bëacsho bedondambi. Mimbi bëmiaidbëd daëdash ëbi bunaid dëniaquec con na dadpenquio yanac. —Mibi bëdambo iquec —Nuquin Papa camenuen mimbi bëmenëdac. Adsho isash Nuquin Papa: —Adquido bëdambo iquec —quependac. ¹⁹ Abitedishunquio Icho Nuquin Papa nec. Comapenen tantiaquin Esuquidistu tantiaquido bëdamboen isquin nashunquidquio nec. ¿Ada mitsana nibëdnuc mëyadac bimboec tabadpe? Adec mëyadsho isun Nuquin Papan mitsana icmendac. Unësqquo icsho aidëmbi mibi bëdambo icmendac. Adecbidi: —Chieshtotiadquio icchitebi —quesho Nuquin Papan nac mibi chieshtoenquio iquendac. —Aid nibëdnuc unësebi —mimbi caid Nuquin Papan icmendac. ²⁰ Ëbi adsho tantiaashun: —Bëdamboshë mibi iquec, Papa —quequin Nuquin Papa chuinuna ënenquio icquin.

Pabadon ënquimbi chiaid

²¹ Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. ²² Adembidi nëmbo Doma yacnoshon Esus tantiaquido abitedishun mibi tantiec. Chuiquid dapa Sesad caidën shubun icquido Esus tantiaquido icquin adembidi mibi tantiec. ²³ Mibi tantiaquin: —Con Icho Esuquidistubëdtan Pidipos yacnocquido bëdamboen isquin bëdambo icmeta, Papa —quequin Nuquin Papa chianembi. Padi. Aidedi chuiquin dada uaombi.

CODOSAS YACNOCQUIDON ISTE

¹ Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. ² Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

Nuquin Papa chuidoniaid

³⁻⁴ Nuquin Papa, Nuquin Icbo Esuquidistun Papa chiecnadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuïsho tantiash bëdambo iquebi, Papa, quequin mibitedi tantiec Nuquin Papa chiecnadenebi. ⁵ Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. ⁶ Èbi icsaid cuidtiadtsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembidi ismebanoaic. Adoac nidaid utsin-utsinquiec tabadquidon Esuquidistu tantiashun adomboembidi ismebanoaic. ⁷ Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. ⁸ Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioishi.

⁹ Aden Epapadasën chiac mibi tantiec baded-badedquiec Nuquin Papa chiec onquian-onquianebi. Mimbi tantiac-padomboen min Mayanën pausunacsho Codosas yacnocquido bēdamboen tantieme, Papa, quequin chian-chianembi. ¹⁰ Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bēdamboec tabadec. Adec Codosas yacnocquido tabadsho isash, Bēdambo iquebi, ma Esuquidistu quepanuna. Adec bēdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa. ¹¹ Adembidi mimbi dayacquio icmenu caid Codosas yacnocquido iquec natiateguid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bēdambo iquebi, Papa, quec, Cuishon, quec aido mibi chiec onquedenendac, Papa. ¹² Mimbi bēdamboquid icmebanac icsaquid nibēdacno mibi tantiaquid utsibobēd mibēdi tabadendabi, Papa, quequin tantiec, Bēdambo iquebi, quec ma Codosas yacnocquido mibi chiec onquepanuna, Papa.

¹³ Ęnden adquidpenquio yec Satanasën yuaido yec, Nuquin Papa tantianu, quesa nuqui iccondac. Aidën yuaido icsho Nuquin Papan nuqui mēnchicpondash. Aden nuqui mēnchicquin abi cudasaidquio aton Madombo Esuquidistu icsaisapadquid nuqui icmenuequin aidi Nuquin Papan nuqui tantiamepondash. ¹⁴ Abipadquid icmenuec matses icsaid bedshunash abided cuidadec unēspaniedash. Adoacsho Esuquidistu tantiaquid icsho cuidenquio yec mibi icsaid bēpiscudendabi, quequin Nuquin Papan tantiampicpadquiequi bēpiscudendac.

Abia yampidquio iquec abitedishun icbombo Esuquidistu nec quiaid

¹⁵ Nuquin Papa isadesa icnubi abipadquidquibidi matsesash Esuquidistu nuqui isendac. Abitedi uabi yec Esuquidistu aton Papabēdtsēqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. ¹⁶ Nidaid abubēdtabi uashun aidēnquiocquidtedi uanu quequin ambi uaido nec. Matsesën isaidtedi matsesën isacmaidtedibēd Esuquidistun uampidquio nec. Mayantedi ambi uampidquibidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. ¹⁷ Esuquidistu abia yampidquio iquec. Aidēmbi, Ęmbi uabanaido namebanu, quequin ambi chiacpadomboen namebanec. ¹⁸ Nidaid utsi-utsiec yacnocquido abi tantiec iccuededquidtedi chuiquidquio Esuquidistu nec. Abitedi chuiquid icnu, quec Nuquin Pa-

pan Madombo Abia Yampid matsesash unëspanëdash. Adsho Nuquin Papan abia uincuemeshun abi tantiaquidtedi chuiquid abentsëcquiobi abipadquid icmepanëdash. ¹⁹ Utsi abipadquid ictiapimbo iquec. Aidën nabanacpaden natiapimbo utsi iquec. Ëbipadquidquo con mado nec, quiash, Bëdambo iquebi, quec Nuquin Papa tsadec. ²⁰ Aton Papan padquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ëbided ciudadec unëspebi, abi quiampicpaden matsesën cuesten dectanac unëspanëdash. Adoacsho isun ambi bëdamboen istiapimbochoedi Esuquidistu tantiaquid yansho isun aitedi Nuquin Papan bëdamboen isec.

²¹ Ënden Nuquin Papan matsespenquo mibitedi iccondac. Icsamboen tantiec icsaquid yec Nuquin Papa chieshënquido mibitedi iccondac. ²² Adquid icboedi, Ëbi yacno yuednu queshun Esuquidistu tantiaquidotedi cuidenquo yec abi icsaid bëpiscudquin Esuquidistu icsaisapadquiocnoc aido isembi, quec Nuquin Papa tsadec. ²³ Ënenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ënenquiocquin tantiata. Adomboen chuibenesho utsinutsinquen tantiapondash. Esuquidistun, Aden chuibeneta, caid nebi.

Esuquidistu tantiadoneta, quequin Pabadon chuibanaid

²⁴ Ëbi tantiaquid Nuquin Papan bëdamboen isendac. Aden isac, Ëbëd icquido iquendac, quequin Esuquidistun ambia chuibansho matsesën mëyampanëdash. Adomboembidi Esuquidistu chuibansho mëyamposhi. Adoacqui, Cuishon, quebi. Ënden abi tantiaquid yanacsho isun, Ëbi chuibeneta, quequin chuishumbic, Ëbi chuibansho mibi mëyante dadpen iquendac, quequin Esuquidistun chuiopondashi. Aden aidën chiondacpaden mëyanaid nebi. Ma abi tantiaquid dadpen yanu quequin chuibenembi ambi tantiactedi mëyante yanuc. ²⁵ Ai, Nuquin Papan, Esuquidistu ambi naidbëdta chuibeneta, caidquo nebi. Abi chuiquidquo nebi. ²⁶ Nuquin Papan ambi tantiampicpaden chienquiocboed nëbi aid tantiamiac Esuquidistu tantiaquido yanec. ²⁷ Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ëbi yacno ëbëdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

28 Aden ëbëdtan ëbipadquidon Esuquidistu chuibeniac Esuquidistu tantiaquid yansho isash, Esuquidistu tantiec bëdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu qeshun. 29 Badiadquidën-badiadquidënquien aton Mayanën nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

2

1 Aden dayacquiocquin Nuquin Papa chuiquin mibitedi tantiemi. Adembidi chuibanquin Daudiseya yacnocquido tantiemi. Adembidi utsi-utsiec yacno iccuededquido ëbi isacmaidobi Nuquin Papa chuiquin tantiemi. 2-3 Esuquidistu tantiadonequido ma yampanueshun dayacquiocquin chuibenec nebi. Abentsëc yacnimboec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantiash, Abimbo chuiquid nec, quequin ma bëdamboen tantiapanuna. Adembidi, abimbo chiacnimboen chuisho tantiashun, Icsamboen chiec, quequin ma tantiaquiopanuna. Nuquin Papan tantiamenquiocboed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. 4 Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. 5 Mibëd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ënëdenquio yec iccuededquin aiduidtsëqui tantiadonec, quequin mibi yacnoësh choquidon chuisho tantiash bëdambo iquebi.

Esuquidistu tantiaquid iquec utsin chiacpaden naic abuc nidendabi, quequin tantienda.

6 Adecbidi Esuquidistu tantiaquid yec abëd icquido iquec, Aidi con Icbo nec, quec ambi chiacpadquiec tabadteneta. 7 Adec tabadquin cuëte tapun uquëducquiocquidën cuëte uidënash canidoacnimboen Esuquidistu tantiaquid icquin tantiadonequiota. Aden Esuquidistu chuiquin ëbipadquidon mibitedi chuipondash. Aid tantiadonequid icquin, Mibi tantiaquiec bëdambo iquebi, quequin baded-badedquien Esuquidistu chuidoneta. 8 Adembidi aid tantiadonequid icquin aid tantiesan ëndenquio ambembi chiec onquiampicpaden nëbi icquidën adomboembidi chuisho Nuquin Papan chiacpadomboen chiesa nec, quequin tantiaquiota.

⁹ Matsesash Nuquin Papapadquidquiobidi Esuquidistu icpanēdash. ¹⁰ Esuquidistubēd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibēd icquid Esuquidistu nec. ¹¹ Aidēn, Ēbēd icquid nec, quequin mimbi tantiaid icsa cuēte cuidi pateshuniac bimboen mibi ěmebanec. Chēshten tiac bimboen nainquiocquin bēdamboen tantiamequin aton Mayanēn mibi icsaid ěmendac. ¹² Adembidi Esuquidistu unēsacsho chococac bimboecnuc abi tantiaquid paucnu quiac bimboen acten mibitedi mentobanondash. Adembidi Nuquin Papan Esuquidistu uincuenēdac bimboecnuc icsaisa icmenu, quequin acten mentotanquin mibitedi cadobampondash.

¹³ Ēnden Nuquin Papan matsespenquo icquin mimbi tantiaid icsa icnuc unēsac bimboec icquin Nuquin Papan ěnden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobēd icquido nec, quec Nuquin Papa nuqui icsaidtedi bēpiscudac. ¹⁴ Ēnden, Matses icsaid bēpiscudnu, quenquiocquin, ěmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanēdash. Adquid icshobi icsaquid bimboecnuc matsesēn unēs uaquin cuesten dectanac matses icsaidtedi bedshunash abibi ciudadec unēs panēdash. Aid unēs isun, Matses icsaid cuidosh, quequin abi tantiaquidquo icsaid ambi naden nata quequin dada uamiaid ucac bimboen tantiec bēpiscudtenec Nuquin Papa. ¹⁵ Esuquidistuidi Nuquin Papan naden nata quequin chiaid niaquesa yec matses icsaid bedshunash abided ciudadec unēsash uincuenquin Nuquin Papan chiaid niacquido mayan icsabo dēniacquec Esuquidistu abitedi chuiquid yampanēdash. Aden dēniacshun, Nēidtedi ěbi tantiaquido chuiquid ictiapimbo iquec, quequin bedshun mētaneshun buanac bimboen Nuquin Papa Esuquidistun ismepanēdash.

¹⁶ Aden chuiquid utsitedi dēniacquid Esuquidistu nec, quequin tantiash, Nadquid peshun nadquid utsi acsho Nuquin Papan ěbi bēdamboen isec, quenda. Adembidi, Nēid ushēmbi abi tantiec iccuededsho isun Nuquin Papan ěbi bēdamboen isec, quenda. Adembidi, ushē chuca choaid usudsho isec cuēdēnsho Nuquin Papan ěbi bēdamboen isendac, quequin tantienda. Esuquidistuidi tantiaquidquo icsho Nuquin Papan ěbi bēdamboen isec, quequin tantiata. ¹⁷ Matses icsaquid yec ambi naidēnquo abembi bēdantiapimbo iquec, quequin tantiamenuequin Nuquin Papan ambi, Naden nata, quequin chiaid Moises menepampic. Ēmbi bēdamboen isaidquo

matses bēdambo icmequid choendac, quequin tantiaquin ambi naden nata quequin chiaidba Moises menepampic. ¹⁸ Esuquidistun bēdambo icmiaid nebi, queshun utsi icsamboen chiec onquesho tantienda. Ambibi chiec onquesho tantiashun Esuquidistu tantesa uaindac. Adquidbēd Esuquidistu ictiapimbo iquendac. Adquidēn, Mibi chuiquidpenquo nebi, queshumbic ambia tantiaquidbimboecquin ambi tantiaid Nuquin Papan uaid mayan bēda mibi tantiamenuequin chuibansho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tanta, quequin ambembi chiec onquesho tantienda. ¹⁹ Adquidēn Esuquidistu abi tantiaquidon icbombo nec, quequin tantienquo iquēc. Adecbidi Nuquin Papan tantiacpadquiec Esuquidistu tantiaquid dadpen yanash aton utsibobēd tantiananec nashunanec aton icbopadquid yanec, quequin tantiesa adquid nendac.

²⁰ Tantanu. Ēbi chui. ¿Atotsi quiash Esuquidistu tantiaquid yanash ēbi icsaid cuidnuec Esuquidistuded unēsash uincuenachimboec bēdamboec tabadebi, queshumbic, ²¹ Nēid bedtemaid nec. Aid bedsho mayanēn mibi cuidendac, quequin utsi chuisho mimbi tantiape? Adembidi ¿atotsieshun mimbi tantiaid icsa unēsacsho chococabi yacbimboen, Nēid petemaid nec. Aid pesho mibi cuidendac, quesho mimbi tantiape? Aden Esuquidistu tantienquo icquidēmbimboen, Nēid mishtemaid nec. Aid misho mibi cuidendac, quesho mimbi tantiapec. ²² Nadquid petemaid nec. Nadquid mishtemaid nec, quequin matsesēn ambibi chuiquin tantiamete nec. Ambi petemaidbēdi ambi mishtemaid ēnēdendac. ²³ Matsesēn bēdamboen tantiacbimboen chiaid aitedi nec. Nēid ēmbi tantiaid nec, queshun aid bēdamboen ismenuen naden nanuna, quequin matsesēn chiec. Aden ambibi tantiashun, Naden nata, quequin mibi chuitiapimbo iquebi, queshumbic namenuequin comapenen adquidēn chuibanec. Adecbidi, Damēyamēdsho ēmbi tantiaidēn ēbi bēdamboen istisash, quequin ambibi tantiash damēyamēdec. Adec damēyamēdashic abi bunaiduidi tantiaquin ambi inacmaid dadan isuidtiapimbo iquēc. Adecbidi abi inesa chidon isuidtiapimbo iquēc.

3

Bēdamboec tabadaid chiaid

¹ Esuquidistu tantiaquid yec abia uincuemēdāc abuc nidash Nuquin Papa yacno icsate bunquid nibēdacno tabadacpadquiec tabadteneta. Adec tabadec, Nuquin Papan dayunquo Esuquidistu tsadec bēdambo iquēc,

quequin abëd icte bunquin Esuquidistu tantiadonec tabadta.
² Abuc abëdi ëbi icnuc aton na con na iquendac, quequin tantiaquin nidaidëshun bednu, quequinuidi tantienda.
³ Esuquidistu unësaid tantiaquin aidbëdtabi mibi icsaid chococashunac bimboec icsatiapimbo yec nidaidën tabadta. Adecbidi Esuquidistu uincuenash abuc Nuquin Papa yacno nidash, Ëbi tantiaquidtedi bëdaidquio iquec. Aido ëbi cudasaidquio nec, quequin aidën dayun uaid nuqui nec.
⁴ Aidën padpidec choshon abi yacno buanac abipadquidquio bëdaidquio nuqui iquendac.

⁵ Adec abi yacnoësh abëdi bëdaidquio iquendabi, quequin mibi icsaidtedi cuesun secac bimboen ëmbanta. Ëmbi inaçmaid chudnu, quenquiocquin ënta dadan. Adembidi, Ëbi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daëdpactsëc icquidëmba ma bednu, quenquiocquin, Ëmbia bednu, quequin tantiaid ënta. Aden ënshun, aton na daëdpactsëc icquidëmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaid bimboecnuc matsesën ambibi nacnenaid tantiac bimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec. ⁶ Abi bunaid icsabëdta ambi tantiaid icsa ënesa icsho matsesën naid chuibante ushë choan adquidtedi Nuquin Papan comapenen cuidendac. ⁷ Adquid ichoedi ⁸ nëbi adenquiocquin ënash bëdamboec tabadteneta. Adecbidi comapenec nëishboedi adenda. Adecbidi, cuesantiaidquio yec nëishboedi adenda. Adembidi, utsi icsambo icmeboedëmbi adoenda. Adecbidi, utsi icsamboen chuiboedi adoenda. Adecbidi, tsienbëdta shui chedo chiec icsamboen tantiec onqueboedi adenda. ⁹ Adecbidi, mua uanamboedi ënëdta. Adquid ichoedëmbi icsactsëcquid niac bimboen mibi icsaid ënta. ¹⁰ Min tantiate chuca uac bimboecnuc abi tantiadonequidquio icnuequin mibi tantiamequid tantiaded-tantiadedta. ¹¹ Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nëid isadaidbo nec. Nëidic isadaidpembo nec, quequin tantiesa mibi iquendac. Adecbidi, nëid shui dëbid dëtemequid nec. Nëid shui dëbid dëtemesa nec, quequin tantiesa mibi neoaic. Adecbidi, Nëid chotac nec. Nëidic mayu nec, quequin tantiesa mibi neoaic. Adecbidi, Nëid yua nec. Nëidic yuaquid nec, quequin tantiesa mibi neoaic. Adquid Esuquidistu tantiaquid icnuc abëd icquid aton matses nec. Abi tantiaquidtedi chuiquid dapa abentsëcquiobi Esuquidistu nec.

¹² Aden Nuquin Papan cuënaido yec ambi bédambocquid icmebanaidobi abi cudasaido yec ambi tantiamiaid nebi, quiash bédambocquid isadacimboec nadec tabadteneta. Ut-sibo natiamiaid icsho isun bédambo icmenuequin nashumbanta. Adecbidi, Mimbiana bedan bedembi, quequid icta. Adecbidi, Mibia nashunu, quequid icta. Utsi icsaid ëmenuec comapenec chushquenuiocquin bédamboen chuiban. Tantesa uasho isun ismeded-ismededta. ¹³ Mimbi nacpadomboen utsibon natiapimboesho isun, Padi, quenuiocquin abi tantiameban. Adecbidi utsin mibi icsamboen nasho isash cuidnanenquo yec bëpiscudta. Nuquin Papa ëbi icsaid cuidenquo yec bëpiscudosh, quec adta. ¹⁴ Adec tabadtenec tantiananta. Adec tantiananec Esuquidistubëd abentsëc yacimboec icsaisa mibitedi yanendac.

¹⁵ Adec Esuquidistubëd abentsëc yachimboecnuc icmiaid nebi, quequin tantiec bédamboec tabadtenenu, quec mibitedi tabadteneta. Adec tabadtenequin, Mibi bédambo iquec, Papa, quequin chuideneta. ¹⁶ Nuquin Papan Esuquidistu tantiadonemiaido icta. Adquido yec abi tantiaquid utsibobëd Esuquidistu chuinanec, Bédamboec tabadta, quec adquiecbidi tabadec ismenanta. Aden naic chuiquid dapa Dabidën dada uampid sadmo caidbëdta cuëdënte utsi Nuquin Papan mibi bédambo icmiaidbëdtabi ambi naid utsi chiec cuëdëncuededta. ¹⁷ Adec tabadquin Esuquidistu tantiaquid nebi, quequin Esuquidistun chiapadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bédambo iquebi, Papa, quequin Nuquin Papa chuideneta.

Aton shubun icquidbëd tabadaid

¹⁸ Bédamboec tabadnu, queshun nadota. Chidon min bënën chiapadomboen nabanta. Esuquidistu tantiaquid icquin adobanta.

¹⁹ Chido inquidën, Con bënëbëd tabadec bédambo iquebi, camenuen yuacimboecquin aid chuiquin min chido namenda. Mibibi tantiadquinuidi min chido namenda.

²⁰ Bacuëbon, Esuquidistu tantiaquid icquin papan chiapadomboen cacuidenquiocquin nabanta. Adembidi, titan chiapadomboen nabanoata. Adosho isashien, Cuishon. Bédambo iquebi, quependac Nuquin Papa.

²¹ Anibëdtan min bacuëbo namenuc comapenen cuëdquin chieshmenda.

²² Yuan mibi yuaquidën chiapadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bédamboen isendac. Nuquin Icbo, Esuquidistu tantiaquid nebi, queshun adobanta. ²³ Con Icbo Esuquidistu

nashunu, quiacbimboen mibi yuaquidën chiacpadomboen chieshenquiocquin bëdamboen nabanta. ²⁴ Con Icho Esuquidistun abi yacno ëbi nidacsho isun ëmbi bëdamboen nabanaid cuidquin ambi ismiambo yaid menendabi, quequin tantiaquin adobanta. Nidaidënshun abi nashunquid mibi neque. Adobanta. ²⁵ Min icbon chiacpadomboen nata. Abi chieshënquid icbon cuidendac. Adembidi Nuquin Papan Esuquidistu tantiaquid nebi, quesho abi chieshënesa menequin bëdamboen cuidendac. Abi chieshënquid menenquiocquin comapenen cuidendac. Adenuidi tantiaquin cuidendac.

4

¹ Yuanquidën, mimbi yuaido ambi nabanacpaden bëdamboen menebanta. Abuc con Icbombo iquec, quequin tantiaquin mimbi yuaido bëdamboen menebanta.

Chuibanaid utsi

² Esuquidistu tantiaquid utsibo natiateguidbëd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta. ³ Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Èbi chuibeneta, cac aid chuibenesho bedshun mëtaniaid nebi. ⁴ Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. ⁵ Esuquidistu tantiesan ëbi tabadaid istenec, quequin tantiec bëdamboec tabadteneta. Adec tabadquin Esuquidistu tantiesatsen tantiamenuequin Esuquidistu chuideneta. ⁶ ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbëd sa batambo iquec daëdacimboecnuc Esuquidistu mimbi tantiaid utsibo chuïta ma aidon tantiapanu queshun.

Abëd icquid chuibanaid

⁷ Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquio icsho ëmbi con utsi caid nec. Aidi Nuquin Icho nashunquid neoaic. ⁸ Èbëd icquid utsibo naic tabadaid mibitedi tantiamenuequin aidi mibi yacno nidmimbi. Adoac mibi yacno nidash puduedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësquiocboedi cuishon queta. ⁹ Onesimobëd Tiquico mibi yacno nidec. Onesimo nuqui con utsi caidbidi nec.

Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

¹⁰ Nëbi mibi yacno nidesa chuinu. Tantiata. Adistadico ëbëd icnuec abembi quënën nauedadondaid nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. ¹¹ Esus cashumbic Ustus caidën, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsëqui isadaidbo nec. Aidon ëbëdtambi Esuquidistu chuibanquin ëbi bëdambo icmequido neoaic.

¹² Epapadas mibi yacnoshon tishaid Esuquidistu chuibanquidquio nec. Aidëmbidi, Codosas yacnocquido con ut-sibo tantiec tsadebi, quequin chiacpadomboen dada uaimbi. Icsamenuequid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidën-badiadquidënquiec Nuquin Papa chiec onquec Epapadas. ¹³ Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquio yec Esuquidistu tantiadonequidombo

ma icpanu quiash mibitedi chiec onquedenec. ¹⁴ Adembidi Ducasën dauëchoquidën Demasbëdtan, Codosas yacnocquido tantiec tabadebi, quequin chiacpadomboen dada uaimbi.

¹⁵ Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuëmëdquidën shubun Esuquidistu tantiec iccuededquido chuioata. ¹⁶ Adembidi, nëid ëmbi dada uaid isec onquequin mibëd iccuededquido tantiameshun Daudiseya yacno iccuededquido tsusiobo menequin, Nëid Pabado dada uaid isec onquequin mibëd iccuededquido tantiaméoa, quequin chui. Adembidi ëmbi Daudiseya yacnocquido tantiaquin dada uaid bedshunshun isec onqueshun mibëd iccuededquido tantiaméoaata.

¹⁷ Adembidi Adquipo naden chuita. Nuquin Icbon Esuquidistun chiacpadomboen naimbudta, quequin chuita.

¹⁸ Mibitedi tantiaquin ëmbi nëid dada uaombique. Èbi tantiec nidtiapimbo yec Pabado quënën tsadeque. Aid puduemeta, Papa, quequin Nuquin Papa chiec onquedeneta. Nuquin Papan ma mibitedi bëdamboen ispanu, quec tsadebi.

Padi. Aitedi dada uaombi.

TESADONICA YACNOCQUIDON ISTE

1

Pabadon tauamboen chiaid

¹ Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icbo Esus tantiaquido mibi chuiquin dada uaic nebi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

Tesadonica yacnocquidon Esus tantiaid

² Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. ³ “Aidon Esus tantiaquin ambi chiapadomboen mat-ses tantiaquin nashumbanosh. ‘Abi yacno abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. ⁴ Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. ⁵ Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —queshun mimbi Esus tantiabonodac. Adembidi Esus tantiamenuc Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ěmbi chuisho tantiondac. ⁶ Aden Nuquin Papan Esus tantiamiaido yec ēbi Nuquin Icbo yacpadec chieshtoenquo icsho isash mibitsen chieshtoenquo iccondac. Ēmbi Nuquin Papan chiaid chuibanac Nuquin Papan Mayanēn namiacpadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi. ⁷ Adec mibi bēdamboec tabadaid chuisho tantiaash min nidaidēn icquido Masedonia yacnocquido Esus tantiaquido mibi yacpadquieci tabadtiaquido icpac caosh. Adembidi tantiaash nēid nidaid Acaya caid yacno tabadquidotsen adtiaquido icpac caosh. ⁸ ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid

chuisho tantiashun: —Tantiash —queshun nēmbō icquido mimbi naid chienquio iccombi. ⁹ Mimbi naid naden chuisho tantiombi. —Pabado chedon Esus chuibansho tantiash: “Nuquin Papapadquid utsi nibēdec,” quesahun Nuquin Papabēdta Esus tantiabenac caosh. Adshun ambi papa quequin nacnenaid aidon tantienquio yanac caosh. Aden Nuquin Papan chiacpadomboen natiadquio yanac caosh —quequin chioshi. ¹⁰ Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquio iquec. “Ēbi cuidmenquio icnuec abided cuidadec unēsacsho Nuquin Papan uincuemiaid Esus choec,” quesahun aid istiadquio iquec —quequin mimbi naid chioshi.

2

Pabadon bēdamboen chuibanondaid

¹ Mibi yacnoshon tauamboen ěmbi chuibanac Esus tantiaquid yanshun mimbitsen utsibo Esus chuibanondac. ² Shubu dadpen icquid Pidipos caid yacnoshon quēnēn nauedac ěbi mēyadec tsadboedi puduemeshun nidmiac mibi yacno nidshun Esusēn naid mibi chuibanondambi. Utsibo dadpenshun chieshēnubi Nuquin Papan namiacpadomboen cuesambo icquin mibi Esus chuibanondambi. ³ ¿Ēmbi naidquio namenuendambi adodionda? Padenquio. ¿Ēbi tantiamenuendambi chuibandionda? Mambi padenquio iccondac. ¿Ambembi chiaidtambi mibi chuibandionda? ⁴ Mambi mibi abimbo chuibampondac. Matsesēn naidtedi tantiaquidēnquio Nuquin Papan: —Aidēn abimbo chuibantsiashe. Con Mado Esusēn naid chuibenequid icmenu —caidquio nebi. Adquid yec matses: —Mibi bēdambo iquec —cameteuidi bunenquio iquebi. Nuquin Papa: —Mibi bēdambo iquec —camenuembimbi ambi chiacpadomboen naic. ⁵ Ēmbi tantiacpadomboen mibi namenuec: —Mibi bēdambo iquec —quenquio iccondabi. Min piucquid bednuen muaquin chiamo iccondambi. Nuquin Papan isnubi abimbo chiondambi. ⁶ ¿—Pabado bēdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusēn naid tantiamenuembimbi bēdamboen chuibanondac.

⁷ —Ēbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin ¿ancabudquindambi mibi chuibandionda? Mambi padenquio iccondac. Anin bacuē nēishmenquio icquin bēdamboen namiacbimboembimbi nēishmenquio icquin mibi chuibanondac. ⁸ Mibi tantiaquioquin chieshtoenquio icquin Esusēn naid chuibanec yuec mibēd tabadondabi. Aden naic tabadec

bëdambo iccondabi. ⁹ ¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnendeniondambi. Mibi caic: —Ëbi menianiac aton piucquid naimëdnushe —quiash con piucquid bednuec chonoatdeniondabi. Mimbi isnubi adondabi.

¹⁰ Mibëd yec Nuquin Papan chiaid niaquenquo yec bëdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanëdashi. ¹¹ Amën aton mado: —Naden na —quequin nëishmenquo icquin chiacbimboen mibi abentse-abentsen bëdamboen chuibanquin ¹² mibi bëdambo icmepondambi. —Nuquin Papan: “Icsatiapimbo icquid icmequin ëbëdi tabadmendambi,” quequin Esus tantiamiaido mibi nec. Adquid Nuquin Papan chiacpadec bëdamboec tabadquid neque. Ambi chiaid niaquenquo yec bëdamboec tabadnuna —mibitedi cadeniondambi.

¹³ Aden Nuquin Papan chiaidquo chuibanac: —¿Ambembida chuidiosh? Nuquin Papan chiaidquo ma Pabadon chuiboc —mibi quianondac. Aden Nuquin Papan chiaidquo tantiash Esus tantiaquido yanash aidquiobidi chuisho tantiash mibi bëdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bëdamboen tabadmequid yec mibi bëdamboshë iquec, Papa —quequin Nuquin Papa chianembi. ¹⁴ Nidaid Udeya caid yacnocquido yacpadquiec chieshtoenquo icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquo icquin chieshënac chieshtoenquo iccondash. Adomboembidi aid matses mibi yacno tabadquin chieshënac mibi chieshtoenquo iccondac. ¹⁵ Isadaidbombidi Nuquin Papan chiaid chuibanquido cunesun secapampic. Adembidi Nuquin Icho Esus unës uapac caondash. Adomboembidi chieshënquin mibi yacnoshon cuemepondashi. Aden Nuquin Papa chieshënquinc matses abitedi chieshënquinc caquin ¹⁶ isadaidbon matses utsi isadaidpembo ëbi chuimetiapimbo icpondash. —Esus tantiasho Nuquin Papan bëdamboen isquin mibi cuidenquo iquendac —quequin ëmbi chuisho: —Padi. Aid chienda. Cueschitomane —capondashi. Aden ambi chiaid ënenquo icquin niac-niacsho Nuquin Papan aido cuidquiendac.

Pabado istante bunaid

¹⁷ ¿Mibi yacnoshon aden chieshëmënquidon cuemiac mibi tantienquiodambi ictionda? Mibi unësquo icnuc mibi instantiadquo iccondabi. ¹⁸ Adec: —Padpiden istanu —quesho Satanasën nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasën

nacbidi padenquoio iccondabi. Nēbi adecbidi mibi istantiadquoio iquebi. ¹⁹ Nuquin Icho Esuquidistu choan aaidbēd tabadquin ¿tsutsimbi ispatsia? ¿Tsutsi isashini cuishonquepat-sia? ¿Tsutsi isumbimbi: —Is. Ēmbi chuibanac Esus tantiabenondaido neque —capatsia? Mibibimbi caic. ²⁰ — Esus tantiec bēdamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bēdamboen naondac. Mimbi chuibanac ēbi tantiabenondash —ēbi caindac Nuquin Icbon.

3

Istan, quequin Timoteyo chiaid

¹ Aden mibi tantiec: —“¿Mitsipadec tabadpec?” quequinuidtsēqui tantiec tsadiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ēbēd icquid utsi Sidbano chuiquin: —Timoteyo nidan nuquiuidtsēqui icnuna —caondambi. ² Ēmbi: —Nid —caondaid Timoteyo Esus tantiaquid yec nuquin utsi nec. Ēbēdtan Esus chuibenequidquoio nec. Adquid icsho nadopondambi. —Tesadonica yacno nidshun Esus bēdamboen chuibantan. Adembidi: “Esus tantiec chieshtoenquoio yec nadquiec tabadquid nendac,” quequin bēdamboec tabadquin ismetan, Timoteyo. ³ Aton matsesēn comapenen chieshēnac chieshtoshon Esus tantienquoio yanushe. Chuitan —caondambi. Aden chieshēnte mibi chiondambi. —Nuquin Papan tantiacpadomboen Esus tantiaquid chieshēnendac —quequin mibi chiondambi. ⁴ Aden mibēd icquin chuideniondambi. Adsho ēmbi chiacpadomboen nuqui chieshēnondash. ⁵ —“Ēbi nidan chieshēnac ¿adecbidida Tesadonica yacnocquido chieshtoenquoio icpatsishba?” quequinuidtsēqui tantiec tsadiapimbo iquebique. Istan —caondambi Timoteyo chuiquin. —“Icsamequin tanu,” quequidēn Satanasēn namiac chieshtoshon Esus tantienquoio yanushe. Istan. ¿Ada ēmbi Esus chuibanondaido bēdamboec tabadeque? —caondambi Timoteyo chuiquin.

Timoteyon chuituidaid

⁶ Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquoio yamposh —quequin chuiposh Timoteyon. Adashic: —“Pabado chedo bēdambo iccondash. Aido padpiden istiadquoio iquebi,” quiosh Tesadonica yacnocquido —queposh Timoteyo. Adembidi mibi istantiadquoio iquebi. ⁷ Timoteyon chuiboed tantiash bēdambo yanobi. Nēmbon icquidon chieshēnac shubiantiadtsēcquoio iccobi. Adboedi mibi caic: —Chieshtoenquoio icquin Esus tantiosh —quesho

tantiash bēdambo yanobi. ⁸ Mimbi aden naid tantiash dayacquio yacbimboec iquebi. ⁹ Aden tantiashun Nuquin Papa chianembi naden. —“Tesadonica yacnocquido bēdambo iccosh,” qesho tantiash cuishonquebi, Papa. Mimbiuidtsēqui namiac chieshtoenquo iquec. Aden namec mibi bēdamboshē iquec, Papa. ¹⁰ Aido istiadquo iquebi. Mimbi chiaid bēdiactsēc tantiasho aidobēd tabadquin bēdamboen chuibantsiambique. Ēbi ano nidmeta, Papa — quequin Nuquin Papa chianembi.

¹¹ —Nuquin Icho Esusbēdtan Nuquin Papan nēbimbobi ambo nidmepashuni —caimbi. ¹² Adec mibēd ictiadquo icquin Nuquin Papa mibi chianembi. —Ēmbi aido tantiacquiacpadomboen utsibobēd tantianameta, Papa. Bēdiactsēc tantianantsēchoedobi comapenec tantianamequiota, Papa. Adembidi utsibotsen bēdamboen ismeta. ¹³ Aden bēdamboec tabadquid icmeta, Papa. Mimbi adoac chieshtoenquo yec bēdamboec tabadtsiash. Adsho mimbi mibi yacnoshon uaido mayan bēdabobēd nidaidēn padpidec choshon con Icho Esusēn: “Tesadonica yacnocquido icsambo iquec,” catiapimbo ictsish. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

4

Chidobēd bēdamboec tabadte chiaid

¹ Tantia, con utsibo. Chiaid utsitsen mibi chuinu. —“Bēdambo mibi iquec,” Nuquin Papa camenuc bēdamboec tabadta —quequin ěmbi chiondacpadquiec tabadta. Nuquin Icho Esus tantiaquiec adta. —Bēdamboec tabadosh —qesho tantiashun: —Adquiequi tabadta —caimbi mibi. ² Nuquin Icho Esusēn namiac aidēn chiaidquo mibi chuibanondambique. Aid tantiaquiec bēdamboec tabadta. ³ Nuquin Papan tantiamiacpadquiec tabadquidēn nadoquid yendac. Utsin chido chudenquo icquin aton chidouidtsēqui chudquid yendac. Adembidi chidon dada utsi chudmenquo icquin aton bēnēuidtsēqui chudmequid yendac. ⁴ Adec Nuquin Papan chiaid niaquenquo yec abi bunaid mēmunc dada ambi inaidquo aton chidouidtsēqui chudec aidbēd bēdamboec tabadsho: —Bēdambo iquec —catsiash Nuquin Papan. ⁵ Nuquin Papa tantiesabimboec tabadenda. Esus tantiesambien comapenec tsien bunquin aton chidopenquo chudendac. Adembidi Nuquin Papa tantiesa icquin chidon utsin shui bunquin aton bēnēpenquo chudmendac. Adec tabadenda. ⁶ Bēnē nidan aton chido abentsēqui uequid istuidshun chudenda. Adoquid Nuquin Papan cuidendac

ëmbi chiondacadomboen. ⁷ —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquio. —Ma bēdamboec tabadnu —quequimbien Esus tantiaquido nuqui icmiaque. Bēdamboec tabadnuna. ⁸ Aden chuiquin aton Mayan nuqui menequidēn Nuquin Papan chiaid chiec nebi. Aden ëmbi chuiboed niacquin Nuquin Papan chiaidquio mimbi niactsiac.

Adecbidi tantiananquiota, quequin chiaid

⁹ —Bēdamboec tantiananta —quequin padpiden chienquio iquembi. Nuquin Papan tantiamiac Esus tantiaquido yec mibi tantiananec. ¹⁰ Min nidaid Masedonia caidēn tabadquido Esus tantiaquido utsibotedi mimbi tantiec. Mibi yacpadquiecbidi tantiananquioquin utsibotsen tantiaquiota. ¹¹ Ëmbi chiondacadquiech chieshēmēnenquio yec bēdamboec tabadta. Utsi icsaiduidi chienquio yec bēdamboec tabad. Chieshenquio yec dayacquio yec chonoada. ¹² Adash bunenquio mibi ictsiac. —Con na nacnenambo iccombique. Mitsana beccho —mibi quenquio ictsiac. Mibi adquio icsho isash Esus tantiesabo: —Esus tantiaquido bēdamboec tabadec —quetsiash.

Esusēn abi yacno abi tantiaquido buante chiaid

¹³ Tantia, con utsibo. —“Esusēn abi tantiaquido uincuemendac,” quequin chuisho mimbi tantiabi icnushe —queshun mibi bēdamboen chuinu. Esus tantiesabo: —Ëmbi tantiaidquio padpidec isadenquio iquec —quec yuecquio shubi-acimboec shubienda. —Ëbipadquid Esus tantiaquid Nuquin Papa yacno istuidendambi —quec ma yuecquio shubianenquio icnueshun Esusēn uincuemete mibi chuinu. ¹⁴ —Unēs uaqui Esus uincuenacpadececbidi nuquitsen uincuenendac. Esus tantiaquido unēsacsho uincuemeshun Nuquin Papan abi yacno aton Mado Esus buamendac —quequin nuqui tantiec. ¹⁵ Tantia. Nuquin Icho Esusēn chiaidquio mibi chuinu. Nuquin Icho Esus nidaidēn padpidec chonoc aid istuidec Esus tantiaquido unēsabi icquido abia nidenquio iquendac. ¹⁶ Padenquio icnubien Nuquin Papa yacnuēsh choec Nuquin Icho Esusba nua cuēdtuidendac. Adnubien Nuquin Papan abi yacnoshon uaido mayan bēdabo chuiquid dapatsen nua cuēdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusēn abi tantiaquido unēsaidotedi abia aton dada chuca uaquin uincuemendac. ¹⁷ Adoaquien aidobēdi Esus tantiaquido unēsabi icquido tsidadash aidotedi abuctoendac Nuquin Papabēd tabadec nidec. Abitedi abuctoquimbi abi bēquedec Esus chosho istuidendac. Adash Esusbēd Nuquin Papa yacno nidash anobi

nuqui quenenendac. ¹⁸ Ëbi adsho tantiashun nadota. Aton matses unësaid tantiec shubiquido bëdambo icmenuen ëmbi chuiboed chuita.

5

Esus chote chiaid

¹ Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Adem-bidi: —Nëidted seta matamiash choec —quequin dada uati-apimbo iquebi. Tantienuio iquemi. Naden mibi chiondambi. ² —“Nëid inchëshëmbi ampequid choec,” quequin tantiatiapimbo yacximboec: “Aid ushën Nuquin Icho choec,” quequin tantiatiapimbo icnuc Esus choaindac —quequin mibi chiondambi. ³ Esus tantienuio yequi matses dadpen: —Cuesnanenuio yec nuqui bëdamboec tabadec —queshobien ambi: —Ëbi cuidendac —cacmaidënuio padpidec choshon cuidquiendac. ¿Mitsipadquio chido bacuë usunquid icpec? —Aid ushënuio tishembi —quequin tantiatiapimbo yequi badedquio nëncuenec. Adecbidi ambi: —Choec —cacmaid Esus badedquio chosho abi tantiesabon cuenëntiapimbo iquendac. ⁴ ¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bëdamboec nuqui tabadnubi Esus chonoc nuqui dacuëdenquio iquendac. ⁵ ¿Pacuënedacximboecquidoda nuqui nedi? Padenquio. Pabiate paposhquiacximboecnuc Esus bëdamboen tantiamaido yec bëdamboec tabadquido ma nuqui neyoc. Adecbidi bëdamboec tabadnuna. ⁶ Ushquin pabiaten tantienuio yacximboen utsibon Nuquin Icho Esus tantienuio iquec. Adec tabadenquio icnuna. —Esus tantienuio icmane —queshun nuqui icsate bunaid nainquio icquin mëmununa. Nuquin Icho chosho istiadquio yec bëdamboec tabadnuna. ⁷ Esus tantiesaboen inchëshën ushquin tantienuio yacximboec iquec. Adquiecbidi tantiadenuen acte paëmbo icquid acquido nec. ⁸ Adquidpenquio yec Esus tantiaquido yec bëdamboec tabadnuna. Nuqui icsate bunaid nainquio icquin mëmununa. Sondado: —Shocosh tsasimbo icquid shictonquenu. Sicsenushe —quiacximboec icnuna. Satanasën Esus tantiamenuio icnushe. Esus tantiaquiquin matsesten tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacximboecbidi icnuna. Satanasën icsamboen tantiamequin chieshtomenushe. —Esus tantiasho cuidenuio icquin Nuquin Papan abi yacno ëbi tabadmendac —quequin bëdamboen tantianuna. ⁹ ¿Cuidnuenda Nuquin Papan nuqui Esus tantiamediac? Padenquio. Abëdi tabadmenuen Nuquin

Icho Esuquidistu nuqui tantiamiac. ¹⁰ Aidi abi tanti-
aquid cuidmenquo icnuec abided cuidadec unēsac caon-
dash. Aidēn padpidec choshon abi tantiaquidotedi buanshun
abēdi tabadmendac. Unēsaid uincuemiaidobēda unēsabi ic-
quidotedi adoendac. ¹¹ Ēbi adsho tantiashun mimbi naboc-
padomboembidi Esus tantiec bēdambo icnuec ěmbi chuiboed
chuianquiota. Adecbidi bēdamboec tabadec: —Adequi tabad-
nuna —cānanta.

Bēdamboec tabadte Pabadon chiaid

¹² Esus mibi chuibanquido bēdamboen ista. —Nuquin Icbon
chiacpadomboen chieshtoenquo icquin nuqui chuiquidēn
nuqui bēdamboen chuibanec —quequin aido bēdamboen tanti-
ata. Mibi nashunquidombo neque. Aidon: —Nuquin Pa-
pan chiaid niaquenquo yec bēdamboec tabadnuna —quequin
chuisho bēdamboen tantiaata. ¹³ —Nuquin Papan chiaid
bēdamboen tantiaquidombo nec —quequin bēdamboen ista.
Adec chieshēmēnenquo yec bēdamboec tabadta. ¹⁴ Mibēd
icquido naden chuiban. Chieshquid icsho: —Mibitsen
chonoadta —cata. Dacuēdsho: —Dacuēdenda —cata. Esus
bēdiactsēc tantiatsēcsho bēdamboen chuiquin Esus tantiamē-
quiota. Dada padishquo icsho nashunta. Aden nēishenquo
icquin abitedi bēdamboen ista. ¹⁵ Utsin chieshēnac cuidnanen-
quo yec bēdamboec tabadta. Mibēdtan Esus tantiaquidobēd
bēdamboec isnanquin utsibotsen bēdamboen ista.

¹⁶ Aden Esus tantiec ēnēdenquo yec cuishonquianeta.
¹⁷ Adembidi Nuquin Papa chianequin: —Ēmbi chiacpadom-
boen ěbi nashunquin utsibotsen nashunta, Papa, —quequin
chianeta. ¹⁸ ĴMimbi chiacpadomboen Nuquin Papan nasho
isunuidida mimbi: —Nuquin Papa bēdambo iquec —cape?
Nadoac bēdambo ictsiash. Bēdamboec tabadquin: —Mibi
bēdamboshē iquec, Papa, —cac bēdambo ictsiash. Daicsabud-
shumbic adembidi nac bēdambo ictsiash. Paēmbo icnubi
adembidi. Mitsana icnuc adembidi. Mitsana nibēdnubi adem-
bidi. Utsibon chieshēnaqui adembidi: —Mibi bēdamboshē
iquec, Papa —cac bēdambo ictsiash. Aden Nuquin Papan: —
Ma Esus tantiaquidon adono —quequin tantiacpaden mimbi
natsiac. ¹⁹ Nuquin Papan Mayanēn Nuquin Papan chiaid
tantiamiac pamumēdacobimboec tabadenda. ²⁰ Aden Nuquin
Papan Mayanēn tantiamiac utsibontsen chuisho: —Mue nec
—badedquo cainda. Chuishoba tantiaata. —Nuquin Papan
chiaidquo chuinu —quesho mamēnshunenda. ²¹ Adenquo
icquin: —ĴNuquin Papan chiaidquibida chuibaneque? Tan-
tiabono —cata. Aden tantiashun Nuquin Papan chiaidquo
isbanta. Aden isbanquin abimbo chuisho tantiashun: —
Ai, Nuquin Papan chiaidquo chiec —queshun aidēn chuisho

bëdamboen tantiata. ²² Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquoio chiec —queshun aidën chuisho tantienda. Aidën chiacpadomboen nainda.

²³ Mibi Nuquin Papa chianembi. —Matses bëdambo icmequid icquin mimbi chiacpadomboen aido name, Papa. Mimbi chiaidquoio bëdamboen tantiamequin bëdamboen tabadme, Papa. Mimbi adoac bëdamboec tabadnuc choashun con Icbo Esusën: “Aido bëdambo iquec,” catsiash, Papa —quequin Nuquin Papa chianembi mibi. ²⁴ Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquoio iquendac. ²⁵ Nuquin Papa ëbi chianeta. —Abëd icquidobëdta Pabado bëdamboen nameta, Papa —quequin Nuquin Papa chianeta. ²⁶ Ambocquido Esus tantiaquidotedi chuiquin: —Pabado chedon nuqui tantiaquiec —quequin chuiban. ²⁷ Nuquin Icbon tantiacpaden chuiquin dada uaombique. Ëmbi dada uaboed nëid isquin ambocquido Esus tantiaquidotedi chuiban. ²⁸ —Nuquin Icbo Esuquidistun bëdamboen ispashun —quequin mibi tantiembi. Padi. Aidedi dada uaombi.

TESADONICA YACNOCQUIDON ISTE 2

Pabadon tauamboen chiaid

¹⁻² Pabado nebi. Tesadonica yacnocquido Nuquin Pabädta Nuquin Icbo Esus tantiaquido mibi chuiioaquin dada uaimbi. —Nuquin Papan Esuquidistubëdtan bëdamboen isquin bëdambo icmepashun —caimbi mibi. Èbëd icquin Sidbanobëdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbëdtan matses cuidte chiaid

³ —Esus tantiaquidën: “Aden naic mibi bëdamboshë iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bëdiactsëc tantiatsëcboedombi nëbi Esus tantiabededosh,” quiosh, Papa. “Adechbidi bëdiactsëc tantianamboedi nëbi comapenec tantiananosh,” quiosh. Aden aido bëdambo icmec mibi bëdamboshë iquec, Papa —quequin chianembi mibi. ⁴ Mimbi aden bëdamboen naid Esus tantiaquido utsibo chuibeniombi. —Dadpeshun chieshënaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵ Adec chieshtoenquo icquid icquin nuqui naden tantiec. —Èbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bëdambo icquido Nuquin Papan bëdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ëmbi namiacnombo chomeshun ëbëdi tabadmendambi —nuqui caindac. ⁶ Nuqui chieshënquidon naidtsen tantiaquid icquin Nuquin Papan aido cuidendac. ⁷ Aden nuqui chieshënquido cuidquin aidon nuqui natiamiaid nuqui bëpiscudmendac. Abi yacnuësh mayan bëdabo ambi comapenen tantiaquin namiaidobëd choshon Nuquin Icbo Esusën adoendac. ⁸ —Icsaisambo yec matses cuidquid nebi —quequin tantiamenuec bëchamauanquiec choshon Nuquin Papa tantiesabo cuidendac. —“Nuquin Icbo Esus tantiasho Nuquin Papan mibi bëdamboen istsiash,” quequin chuisho tantiatiapimbo iquebi —quequin abi tantienquo icsho Esusën cuidendac. ⁹ Cacumiacbimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icbo yec bëdamboshë isadsho isec tabadtiapimbo iquendac. ¹⁰ Aden ambi icsaido cuidte ushëmbi Esus chosho

abi tantiaquido: —Ëbi cuidmenquio icnuec abided cuidadaid Nuquin Icho bēdambohē iquec —quequin aton Icho isec tabadendac. Ëmbi Esus chuibanac aid tantiabenondaido icquin mimbitsen Esus chosho isendac.

¹¹ —Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaino Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquio iquebi,” qesho ambi chiacpadomboen name, Papa. Comapenen tantiaquidquio mibi neque. Adota, Papa. ¹² Aden mimbi con Icho Esuquidistubēdtan bēdambo icmiac Esus tantiec bēdamboec tabadtsiash, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icho Esuquidistubēd Nuquin Papa bēdambohē iquec,” quependac utsibo, Papa —quequin Nuquin Papa chianembi mibi tantiaquin.

2

Icsamboshē icquidba chote chiaid

¹ Tanta, con utsibo. Mibitedi chuinu. —Abi yacno tabadmenuen buanuec Nuquin Papa yacnuēsh Nuquin Icho Esus ėnden choac —qesho tantiash ² dacuēdtanenda. Mibi yacnoshon ¿tsuntsin adec muaquin chuiposh? Aidon: —Tanta. Nuquin Papan Mayanēn tantiamiacpadomboen chuinu. Nuquin Icho Esus ėnden choac —quec muapash. Ambembi chiaidien chuichitash. —Naden Pabadon chiaid iquec —quequin ėmbi dada uaidbimboecquid isquimbien chuichitash. ³ Adec muaid tantiash: —Abimboen cachitosh —quenda. ¿Nuquin Icbobada chopadic? Padenquio. Utsibain choendac. —Nuquin Papa caidēn chiaid tantiatiapimbo iquebi —quec matses icsamboec tabadnubien Nuquin Papa chieshēnquidquio icsamboshē icquidba choash matses dadpenquio chuiquid dapa iquendac. Aid Nuquin Papan cuidtequidquio nendac. Aidba choabi icnuc Esus choenquio iquendac. Icsamboshē icquidbain choendac. ⁴ Aid chuiquid dapa yanashic Nuquin Papa dēniacte bunquiec Nuquin Papa tabadte shubu uashunaidēn puduedshun: —“Comapenen tantiaquin ėbi nashunquidquio nec,” quequin mimbi Nuquin Papa caid nibēdeque. Ëbiuidtsēqui tantiata —caindac matses abitedi chuiquin.

⁵ Aden mibi chuideniondambi. ¿Tantienquioda ique?

⁶ Nuquin Papan tantiacpadēnquio chomenuen uidēnuac icsamboshē icquid nēbi choenquio iquec. Nuquin Papan tantiacpadēnquio choendac. Ëmbi chiondacadquid abi chomenquio icquid mimbi tantiec. ⁷ Nēbi isadenquio

icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquio icquid nidabi icnubi icsamboshë icquid chuiquid dapa yantiapimbo iquendac. Abi chomenquio icquid nidmiambien ⁸ icsamboshë icquid matses chuiquid dapa iquendac. Adnubien Nuquin Icho Esusën: —Ëbien matsesën Icbombo nec —quequin matses abitedi tantiamenuc choshon icsamboshë icquid: —Unësta —caquinuidtsëqui unës uashunendac.

⁹ Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiami-acpadomboen comapenen tantiaquin dadpenquio nabanquin ismendac. —Comapenen tantiaquidquio nebique. Istac —quequin ambembi chiaid tantiamenuen aden nadatiambo icquin nabanquin ismendac. ¹⁰ Adec icsauidequi tabadquid yec comapenec muasho tantiash: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdabimboen tantiatiapimbo icquin ambembi chiaiduidtsëqui tantiendac. ¹¹ Aden ambi chiaid niac-niacuidequi icsho Nuquin Papan: —Abi bunaidquio ambembi chiaidquio chuisho ma tantiapanuna —quequin namiac: —Mue nec —quequin tantienquio iquendac. Utsi muasho tantiash badedi: —Abimbo chiec —quetsiash tantienquio yec. ¹² Aden ambi chiaidquio tantiatiapimbo icquin aid niac-niaquec icsateuidi bunsho Nuquin Papan cuidquiendac.

Nuquin Papan tantiamiaid

¹³ Nuquin Icbon mibi tantiaquiec. Ëndenquimboshë matses uabi Nuquin Papa nuqui caic: —Ëbi yacno tabadmenuen Esus tantiamequin aido bëdambo icmendambi —quepampic. Adshumbic aidën chiacpadomboen aton Mayanën namiac Nuquin Papan chiaidquio tantiash Esus tantiec mibi bëdamboec tabadcuenondac. —Adquiobidi iccosh —quesho tantiashun Nuquin Papa chianembi naden. —Aden aido bëdamboen namequid yec mibi bëdamboshë iquec, Papa —quequin chianembi mibi tantiaquin. ¹⁴ Nuquin Papan chiaidquio ëmbi chuibanac mimbi Esus tantiabenondac. Abi yacnoshon Nuquin Icho Esuquidistupadquio bëdamboshë icmenuen aden Nuquin Papan mibi Esus tantiamiac. ¹⁵ Ëbi adsho tantiashun ëmbi chiondacadomboen chieshtoenquio icquin Esus tantiata. Ëmbi mibi bëisquin chiondaidbëdta ëmbi dada uaquin abimbo chiondaid bëpiscudenda.

¹⁶ Nuquin Icho Esuquidistubëdtan Nuquin Papan nuqui tantiaquin bëdamboen isec. Adembidi: —Nuquin Papa

yacno Esusbëd iquendabi —quequin tantiamequin dayacquo yacbimboecnuc nuqui icmec. ¹⁷ Adquid icsho chianembi naden. —Tesadonica yacnocquido chieshtomenquo icquin Esus tantiamequin bëdamboec tabadquid icme, Papa. Adem-bidi bëdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

3

Nuquin Papa ëbi chianeta, quiaid

¹ Tantia, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo matses dadpenquo Esusën naid bëdamboen chuibame, Papa. Mimbi bëdamboen chuimiac ëmbi Esus tantibenondacpadomboen utsibon dadpenshun Esus tantiabentsiash, Papa. ² Aden Esus chuibansho isun Esus tantiesabo chieshëmëncquidon: “Pabado cueschitono,” casho cuesmenda, Papa —quequin Nuquin Papa ëbi chianeta. ³ Nuquin Icho bëdambo iquec. Muesambo icquin ambi chiacpadomboen nuqui bëdamboen dayun uaindac. —Ëbi tantienquo yanushe —qeshun nuqui chieshtomenquo icquin Satanas nuqui yuametiapimbo iquendac. ⁴ —Aden Nuquin Icbon bëdambo icmiac ëmbi chiacpadomboen naboedi adem-bidi Tesadonica yacnocquidon naindac —quequin tantiombi. ⁵ Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquiec,” quequin Tesadonica yacnocquido tantiameta, Papa. Esusën chieshtoenquo icquin nacpadomboembidi aido chieshtoenquo icquid icmeta, Papa —quequin Nuquin Papa chianembi.

Esus tantiaquido uspuenquo icquid

⁶ Tantia, con utsibo. Nuquin Icho Esuquidistun: —Ëbi chuibeneta —caidquo icquin mibi chuinu. Esus tantiaquido utsi-utsiec ëmbi mibi chiondaid niac-niaquec chieshuidequi icsho isash aidbëd chieshec tabadenda. ⁷ —“Ëbëd iquec Pabado dayacquo iccondacpadquiec chieshenquo yequien tabadtad,” quiosh —quiosh mibi caic. Abimbo mimbi cac. Mibëd yec dayacquo iccondabi. Chieshenquo yec chonoad-teniondabi. ⁸ Mimbi pete meniac ¿con piucquid mibi menen-quiodambi ictionda? Bedquin mambi mibi menianepondac. —Ëbi meniac aton na naimëdnushe —quiash con piucquid bed-nuec chonoadteniondabi. ⁹ —Esus tantiaquidon abi chuibanquid menenquo icquid —¿quectabi ique? Padenquo. Esusën naid chuibanquid ambi chuibanaidon meniaquien bëdambo ictsiash. —Chieshenquo icquin ëmbi nacnensho isun ma

adembidi Tesadonica yacnocquidontsen nanu —quiashini chonoadteniondac. ¹⁰ Mibëd tabadquin naden chiondambi. —Aton na nacnenenquoio yec chieshuidequi icsho pemenuquo icquid —quequin chiondambi.

¹¹ Mibi caic: —Utsi-utsiec chieshuidequi tabadosh. Utsi icsaiduidquoio chiec tabadosh —quetuidosh. ¹² Uspun tantia. Nuquin Icbo Esuquidistun chiaid mibi chuinu. Chieshuidequi tabadenda. Mitsanabi penuec chonoadta. ¹³ Nuquin Papan chiapadomboen naic chieshtoenda. Chieshtoenuquoio icquin bëdamboen-uidi nata. ¹⁴ Nëid dada uaquin ëmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abëduidi iquenda. ¹⁵ Aid chieshënenquoio yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bëdamboequien tabadiad —quequin chuïta.

Pabadon ënquin chiaid

¹⁶ Mibi tantiaquin Nuquin Papa chianembi naden. —Bëdambo icmianquidquoio icquin Con Icbonquoio ma aido dacuëdenquoio icquid icmepanuna, Papa. Aidobëd ma Esus tëshëdenquoio icpanuna, Papa —quequin Nuquin Papa chianembi. ¹⁷ —Ista. Ëmbimbo dada uaid nëid neque —quequin ëmbi nëidtedpactsëc dada uaid isun: —Pabadon chiaidquoio nec —quequin mimbi tantiendac. ¹⁸ —Nuquin Icbo Esuquidistun bëdamboen ispashun —caimbi mibi. Padi. Aidtedi dada uaombi.

TIMOTEYON ISTE 1

Tauamboen chiaid

¹ Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bëdamboen isquidën Nuquin Papan: —Con Mado Esus chuibeneta —caidquio nebi. ² Ëmbi chiondac Esus tantiabenash con mado icbobimboecquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icho Esuquidistubëdtan con mado bëdamboen isquin bëdambo icmepashun —quiobi.

Chiaid utsi chienda, quequin chiaid

³ Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nactusuaquin Nuquin Papan chiaid chienda —cata. ⁴ Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmëdpampic. Aidën tsyuecquidoudtsëqui bëdambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bëdamboen tantiamepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bëdamboen chiec,” quec mibëdi chushcananeque. Nuquin Papan chiaidquien chuitiad —cata. Nuquin Papan chiaid bëdamboen chienquio icquido aden chuita. ⁵ Adshumbic aidobidi naden chuita. —“Matses ma bëdamboec tantiananu,” quequin Nuquin Papan chiaidquio chuita. Adoac bëdamboen tantiashun Esus tantiec bëdamboec tabadec matses bëdamboec tantianantsiash —cata, mado. ⁶ Mimbi aden chiacpadomboen nainquio icquidoen Nuquin Papan chiaid bëdamboen tantienquio yec abembi onquec. ⁷ Adquidon: —Nuquin Papan ambi chiaid Moises dada uamepampid bëdamboen tantiembi. Moisesën chiampicpadomboen namenuec aid chuibanquid icte bunebi —queboedombi Nuquin Papan chiaid bëdamboen tantienquio icquin icsamboen chiec.

⁸ —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bëdambo iqueyoc. —Nëid tantiashun ma

abi icsaid ënu —queshun aid abimbo chiac bëdambo ictsiash. ⁹ ¿Bëdambo icquid chuiquinda Nuquin Papan Moises dada uamepampic? Padenquo. Icsambo icquido chuiquinbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamënshunquido. Nëidic anibi cunesunquido. Nëidic amëbi cunesunquido. Nëidic cunesunianquido. ¹⁰ Nëidic aton chidopenquo chudquido. Nëidic aton bënëpenquo chudmequido chido. Nëidic aton chido bunenquo yec dada daëd chichudnanquido. Nëidic matses utsi bedshun yuaquido. Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. ¹¹ Adembidi Esus chuibenequidon: —Adquid icsambo iquec —quequin chiec. Bëdamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiemi.

Nuquin Icbon Pabado bëdamboen isbenaid

¹² Tanta, mado. Mibi chuinu. Nuquin Icho Esuquidistun: —Pabadon ëbi bëdamboen chuibantsiash —quequin tantiashun: —Ëbi chuibenequid icta, Pabado —queshun ëbi bëdamboen namec. Adoaid icquin: —Ëbi namequid yec mibi bëdamboshë iquec, Icho —quequin Nuquin Icho Esus chianembi. ¹³ Ënden adenquo iccondabi. Nuquin Papan Madopenquo danquin Esus icsamboen chuishunondambi. Abi tantiaquido chieshënquin cunesun secate bunondabi. —Aton Mado Esus tantiasho Nuquin Papan ëbi bëdamboen istsiash —quenquo icquin adopondambi. Adshobini: —Pabadon abimbo tantiabi iquec —queshun Nuquin Icbon cuidenquo icpanëdash. ¹⁴ Adec icsambo icquid icsho Nuquin Icbon tantiamiac: —Abi tantiasho ëbi bëdamboen isbentsiash —quequin Esusquo tantiabenondambi. Esus tantiaquin matsesten tantiaquiemi.

¹⁵ Tanta, mado. Naden chiaid bëdambo iqueque. —Icsambo ichoedën abi tantiasho cuidmenquo icnuec Esus matsesac caondash —quequin chiaid bëdambo iquec. Ëbibilic icsamboshë icpondabi. Utsibon Nuquin Papan chiaid bëdiactsëc niac-niacnubi ëmbimbo comapenen niac-niaccondambi. ¹⁶ Adec ëbi yec icsambo icsho Nuquin Icho Esusën baded cuidenquo icquin abibi tantiamequin bëdamboen isbempondashi. —Pabado bëdamboen isaid chiac utsibo: “Pabado icsambo ichoedi Nuquin Papan bëdamboen isbenac. Adembidi Esus tantiasho Nuquin Papan ëbitsen bëdamboen isendac,” quequin ëbi tantiendac. Adquid unësacsho ëbi yacno tabadmendambi

—qeshun abi tantiaequin Esusën bēdamboen isbempon-dashi. ¹⁷ Aden tantiaquin nadoembi. —Nuquin Papa ambiuidtsēqui abitedi namequid yec abitedishun Icbombo nec. Unēstiapimbo icquid nec. Isadenquo icquid nec. Adquid abentsēcquiobi icnuc abipadquid utsi nibēdec. Adquid icsho abitedishun: “Mibi bēdamboshē iquec, Papa,” capashun ēnenquo icquin —caimbi.

Matsesën mibi chiondacpadombota, quiaid

¹⁸ Mibi con mado icbobimboecquid neque. Ēmbi chiacpadomboen Nuquin Papan chiaidquo chuibanta, mado. Ēnden mibi Esus chuibanquid yanabi icnuc Nuquin Papan oncamiac nuquibēdtan Esus tantiaquidēn mimbi chuibante chuipondash. —Esus bēdamboen chuibanquin Timoteyon Esus tantiaquido bēdamboen namendac —quequin mimbi chuibante chuipondash. Aidēn chiacpadomboen chieshtoenquo icquin Nuquin Papan chiaidquo chuibanta. ¹⁹ Aden Nuquin Papan chiaid niaquenquo icquin Esus tantiaquiec bēdamboec tabadta. Utsiboen adenquo iquec. Icsamboec tabadquin Nuquin Papan chiaidquo niac-niacquin Esus tantienquo yanosh. ²⁰ Adecandedo caidbēdtan Imeneyo caidēn aden Esus tantienquo yanosh. Aid daēdshun Nuquin Papa muauaquin icsamboen chuisho nadopombi. —Adquid Satanasën natiambo icmepashun —qeshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —qeshun adopombi.

2

Nuquin Papa bēdamboen chianete chiaid

¹ Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēdta mibi bēdamboen tantiaequin bēdamboen ista, Papa. Matses nashunquidquo yec mibi bēdamboshē iquec, Papa —quequin Nuquin Papa chianenuna. ² Adembidi Nuquin Papa chuiquin: —Chuiquid dapambo pedesidente caidte-dibēdta chuiquid dapa utsibotedi bēdamboen tantiameta, Papa. Adoac aidon bēdamboen namiac cuesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. ³ —Con matses Esus tantiameta, Papa —quequin nuqui aden chianesho tantiash: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abēd tabadmequid. ⁴ Matses abitedimbo cuidenquo icnuen matses

bëdamboen iste bunquid yec: —Ma ëmbi chiaid tantiashun abided cuidadec unësaid ma tantiapanu —quec Nuquin Papa.
⁵ Nuquin Papan chiaidquio tantiashun nuqui naden tantiec. —Nuquin Papa matses uaquid abentsëqui icnuc abipadquid utsi nibëdquiec. Abëd icboedi matsesun: “Nuquin Papan padquid icquin aid tantiamequid nebi,” quequin aton Madon matses chuipanëdash. Adecbidi aton Papa matses bëdamboen ismequid yampanëdash Esus. Aid abentsëqui Nuquin Papa bëdamboen ismequid nec. ⁶ Abi tantiaquid cuidmenquio icnuec abided cuidadec unëspac caondash —quequin chiaidquio nuqui tantiec. Nëbien Nuquin Papan tantiac padomboen matsesën aden chiaidquio chuiben-chuibenec.
⁷ Adomboembidi Esus chuibenequidquio nebi. —Matses ut-sibo isadaidpembo ëbi chuibeneta —Esusën caondaaid nebi. Adoaid icquin: —Ma Esus tantianu —quequin Nuquin Papan chiaidquio chuibenec nebi. Abimbo caimbi. Adquid nebi.

Esus tantiec cuëdënacnoshon nate chiaid

⁸ Tantia. Dadatedi chuinu. Cuëdënacno puduedshun Nuquin Papa chuinuec bëdamboequien tabadtiad. Nëish bëdanash chieshënanenquio icquimbien Nuquin Papa chuitiad. ⁹ Chidobotsen chuinu. Esus tantiec Esus tantiaquido cuëdënacno nidnuec: —Mabi isnu —quequin tantienquio yec bëdamboec dasiuidta. Bëdamboec tabadquid dasiuidac bimboec dasiuidta. Chido chishpidabimboec dasiuidenda. —Mabi isnu —quenquio yec Esusquio tantianuec Esus tantiaquido cuëdënacno puduedta. ¹⁰ —Mabi isnu —quequin tantienquio yec: —Nuquin Papa tantiaquidquio nebi —quec utsibo nashumbanec bëdamboec tabadta.

¹¹ Esus tantiaquido cuëdënacnoshon dadan Nuquin Papan chiaid chuiban sho tantiaquid chidon. —Aidën chiacpadomboen natiapimbo iquebi —quequin tantienquio yec bëdamboen tantiec otacquio tabadquid chido. ¹² Esus tantiaquido cuëdënacno puduedshun dada chuiban esa chidon. Adembidi dada ancaisa chidon. —Otaquien tabadquid chido —caimbi. ¹³ Dada Adan caidba Nuquin Papan matses uapampic. Adshumbic aton chido Eba caidtsen. ¹⁴ Aden dadabëdta chido nacnenacsho isumbien Satanasën: —Icsamequin tanu —queshun muauac icsaquin chidomba Nuquin Papan chiaid niacpampic. Adan padabi. Aden tantiaquin: —Dadan chido chuibanquid —caimbi. ¹⁵ Adec abia icsasho isun Nuquin Papan cuidac paëmbo icnuc bacuë tishquid chido abitedi nec. Nëbi Esus tantiaquid yanash ambi tishaido bëdamboen namequid nendac. Esusën chiacpadomboen natiadquio icquin matses tantiaquid nendac. Nuquin Papan chiaid niaquenquio icquid nendac.

Aton bënëuidtsëqui chudmequid yendac Esus tantiaquid chidon. Adquid Nuquin Papan bēdamboen isquin abēdi tabadmendac.

3

Esus chuibanquid chiaid

¹ Tantia. Utsitsen mibi chuinu. —Esus chuibanquid ictheadquid iquebi —quesho: —Bēdamboen nate mibi bunec —cata. ² —Nuquin Papan chiaid chuibanquid nadquien ictiad —quequin anocquido chuita. —Bēdamboec tabadquid nec —utsibon caidquio Nuquin Papan chiaid chuibanquid nendac. Adquid chido abentsēc inquid nendac. Abi bunaid ēnshun mēmūnquidquio nendac. —Bēdamboen tantiaquidquio nec —utsibon caidquio nendac. Isedanquido bēdamboen isquid Nuquin Papan chiaid chuibanquidēn. Nuquin Papan chiaid bēdamboen tantiamequin chuibanquid nendac. ³ Tantiadenuen acte paēmbo icquid aquenquio icquid nendac. Badedquio nēishenquio icquid nendac. Uimanēmēnenquio icquid nendac. Chushcananteuidi bunenquio icquid Nuquin Papan chiaid chuibanquid. Piucquid bedteuidi bunenquio icquid nendac. ⁴ Aidēn chiacpadomboen aton chidon aton bacuēbobēdtan naquid. Chieshenquio icquin aton papan chiacpadomboen naquid aton bacuēbon. ⁵ ¿Ambi chiacpadomboen aton chidobēdta aton bacuēbo bēdamboen namenquio icquinda Esus tantiaquido bēdamboen namepatsiashe? Padenquio ictsiash. ⁶ Ēnden Esus tantiabenondaid chuiquin: —Ēbi chuibanquid icta. Ēbi bēdamboen chuiquin ēbi bēdamboen nameta —Esus tantiaquidon cac bēdambo ictsiash. Nēbimbo Esus tantiabenquid aden chienda. Chuibanquid icmiac adquidēn Nuquin Papan chiaid badedquio niactsiashe. Satanasbimboec: —Ēbiuidtsëqui bēdamboshē iquebi —quetsiashe. Adquid: —Ēbi chuibanquid icta —cainda. ⁷ Ēnden Esus tantiabenondaid mibi chuibanquid icmenun Esus tantiesabon: —Bēdambo icquid nec —casha tantiaata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamēnshuntsiashe. Adquid Satanasēn badedi yuatsiashe. —Icsambo icquid nec —caid: —Ēbi chuibanquid icta —cainda.

Esus tantiaquido nashunquid chiaid

⁸ Tantia. Esus tantiaquido nashunquidtsen chuinu. —Nuqui chuibanquidēn chiacpadomboen ēbitedi nashunquid

icta —quequin nadquid chuita. Utsibon: —Bëdambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidën. Piucquid bunquin ampenquio icquid nendac. ⁹ Nuquin Papan chiaid bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictsias. ¹⁰ Esus tantiaquido nashunquid icmenuen: —¿Bëdambo icquidida nëid nec? —quequin chuimiac utsibo: —Ai, bëdambo icquid nec —abitedi qesho tantiashun: —Esus tantiaquido nashunquid icta —cac bëdambo ictsias. ¹¹ Adquidën chido: —Bëdambo icquid nec —utsibon caidquio nendac. Utsi icsaiduidi chienquio yec bëdamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bëdamboec tabadquid. Adquidquio Esus tantiaquido nashunquidën chido bëdambo ictsias. ¹² Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon. ¹³ Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

¹⁴ Tantia. Utsi mibi chuinu. Mibi yacno nëbi nidtiadquio iquebi. —Nidenquio icmane —qeshun nëid dada uaic nebi. ¹⁵ Ebi mibi yacno badedquio nidabi icnuc: —“Esus tantiaquidon nadoquid,” quequin Pabadon chiacpadomboen nanuna —cata. ¿Tsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu abentsëquën tabadquidobimboec nuqui iquec. Adquid icquin Nuquin Papan chiaidquio tantiaquin nuqui Esus chuibenec. ¹⁶ Eëdenquio abi bëdamboen ismequid ambi tantiamiabi icnëdaidi nëbi Nuquin Papan tantiamiaid Esus bëdamboshë iquec.

Aid Nuquin Papan matsesmepanëdash.

Nuquin Papan Mayanën: “Nuquin Papapadquidquio ic-saisambo Esus nec,” quequin tantiamec.

Matsesën unës uaqui uincuenaid yec Nuquin Papan abi yac-noshon uaido mayan bëdabon isaidquio Esus nec.

Abi chuibenequidën nidaid utsi-utsiec yacno nidshun chuibeniac utsin-utsinquien Esus tantiabenc caosh.

Aidquiobi Nuquin Papan abuc nidmeshun abëdi tabadmeoapanëdash.

4

Utsibon icsamboen chiaid

¹ Tantia, mado. Nuquin Papan Mayanën tantiamiaid mibi chuinu. —Esus chote nēbi icnuc abi tantiaquidon utsin-utsinquien Esus tantienquio yanendac. Satanasën yuabo podobitsi icsabon muaquin pausunac matsesën chuisho tantishun Esus tantienquio yanendac —quequin Nuquin Papan Mayanën abimbo tantiamioshi. ² Aden muaquidon: —Abimbo caimbi —quequin bēdambo icquid damianquien aden muaquin chiendac. —Nuquin Papan cuidnushe —quequin tantienquio iquendac. ³ Adquidon naden chiendac. —Dadan chido bedenda. Chidon dada bedmenda. Padenquio yec tabadta —quequin icsamboen chiendac. Adembidi: —Aidquio petemaid neque. Penda —quequin pete abentse-abentsen chiendac aid pete bēdambo icnubi. ¿Atotsi quequin Nuquin Papan pete uapampic? —Ēmbi chiaidquio bēdamboen tantishun Esus tantiaquidon: “Nuquin Papan pete uaid bēdambo iquec,” quequin ma penu —quequin Nuquin Papan pete uampic. ⁴⁻⁵ Aidën pete uaidtedi bēdamboshē iquec. —Ēmbi pete uaid bēdambo iqueque. Ma penu —qeshun Nuquin Papan pete icmiaid ma petequid neyoc. —Mimbi pete uaid bēdambo iquec, Papa —qeshun pete isuidenquio icquin penuna.

Esus chuibanquid icquin bēdamboen nata, quiaid

⁶ Esus tantiaquido ěmbi chuibocpadomboen chuibanquin mimbi bēdamboen natsiac, mado. Bacuētsēcsho min matsesën Nuquin Papan chiaidquio mibi chuibanēdash. Aidën chiaid tantiaquid icquin Esusën chiacpadomboen nate bunquin ěmbi chiacpadomboen mimbi chuibantsiac. ⁷ Con tsusedpabon ambembi chiampidbēdta nēbi matsesën adem-bidi ambembi chiaid tantienda. Nuquin Papan chiaidquio niactiapimbo yec bēdambo icte bunquiota. ⁸ Aton dada uidënquio icmenuec tinguetanequid nuquin matses nec. Esus tantiaquido bēdambo icnuec ¿mitsipadquio icpec? Nuquin Papa tantiaquieci ambi chiaid niaquenquio yec bēdamboeci tabadquid nec. Adquid unēsash Nuquin Papa yacno nidash bēdamboshē icquid iquendac. ⁹ Ēbi adsho tantish: —Abimboen caic —queta. ¹⁰ Adec: —Abi yacno abēdi tabadendabi —quequin Nuquin Papan chiacpadomboen ěnenquio icquin nanuna. —Esus tantiaquid unēsacsho cuidenquio icquin unēstiapimbo icquidën Nuquin Papan abēdi tabadmendac —quec chieshtoenquio yec bēdamboeci tabadnuna.

¹¹ Ēmbi chuiboed chuibanta, mado. —Nuquin Papan chiacpadomboen nanuna —quequin chuibanta. ¹² Mibi nēbi caniaid neque. Bēdamboeci tabadta, mado. Ēnden caniaidën:

—Nëbi caniaid icquin Nuquin Papan chiaid mimbi tantienquo iquec —canushe. Bëdamboec tabadta. —Esus tantiaquido utsibotsen ma ëbi yacpadec bëdamboec tabadnu —quiash adta. Bëdamboen chuibanquinc matses tantiaquinc Esus tantiaquinc Nuquin Papan chiaid niaquenquo icquinc caic bëdamboec tabadta.

¹³ Èbi ano nidabi icnuc Nuquin Papan chiaid adenuidi chuibanta. —Nuquin Papan chiapadec bëdamboec tabadnuna —quequin Nuquin Papan chiaid isbanquin matses chuibanta. Aden bëdamboen tantiameta. ¹⁴ Ènden mibi mamishquin chiondaid ¿ada tantie? Ènden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bëdamboen chuibanquid Timoteyo iquendac —quequin chuipondash. Chieshtoenquo yec adquid icta, mado. ¹⁵ Èmbi dada uaquin chuiboedtedi isbanshun ënenquo icquin ëmbi chiapadomboen bëdamboen nabanta, mado. —Èmbi adosho isun ma ëmbi chuibanaidon: “Nuquin Papan chiaid chuibanquidquo yanosh,” ma ëbi canu —qeshun bëdamboen chuibanta, mado. ¹⁶ —Nuquin Papan chiaid niacmane —quec mibibi bëdamboec tantiadta, mado. —¿Adabi bëdamboec tabadpeba? ¿Adambi Nuquin Papan chiaidquo muainquo icquin chuibampoba? —quec mibibi tantiadta. Bëdamboec tabadquin Nuquin Papan chiaidquo ënenquo icquin chuibanta. Aden Nuquin Papan chiapadomboen naic aidbëd mibi tabadendac. Mimbi chuibanaidobidi adoaindac.

5

Esus chuibanquidën bëdamboen chuite

¹ Nuquin Papan chiaid chuibanquid icquin dada ënden caniaid chushcainda, mado. —Esus tantiaquidën nadoquid yendac —quequin bëdamboen chui: —Con pabimboecquid nec —quequin. Nëbi caniquid: —Con utsibimboecquid nec —quequin adembidi bëdamboen chuiban, mado. ² —Con tabimboecquid nec —qeshun macho bëdamboen chuiban. Chido machobudabi icquidtedi chibibimboecnuc isquin: —Nëid chudtiadquo icchitebi —quenquo icquin Nuquin Papan chiaidquo chuibanta, mado.

Chido niantembo chiaid

³ Tanta, mado. Esus tantiaquidon abëdtan Esus tantiaquid icsho niantenashunte chuinu. Niantenaton matses nibëdquid: —¿Tsuntsimbini nashumpatsiashba? —quequid Esus tantiaquidon nashunquid. ⁴ ¿Ada nianten tishaido icpec? Aidëmbi ani nashuntsiash. ¿Ada aton baba icpec? Aidëmbi aton chichi

nashuntsiash. Aidëmbidi aton shanuachotsen nashuntsiash. —Ëbi nashundened neque. Nëid nashunu —queshun nashuntsiash. Aden ambi chiapadomboen nasho isash: —Bëdamboen naic —quetsiash Nuquin Papa. ⁵ Padnuc aton matses nibëdquidënquo nianten Nuquin Papa chianequid: —Nuquin Papan ëbi nashuntsiash —queshun. —Mimbi ëbi tantiaqueque. Ëbi nashunta, Papa —quequin Nuquin Papa chianequid niante icsho abëdtan Esus tantiaquidon nashunquid. ⁶ Niante utsimbien ambi tantiaiduidi naic. Petebëdta acteuidi tantiaquin abi bunaiduidi naic. Adquidën unësacimboecquin Nuquin Papa tantienquo iquec. Adquid Esus tantiaquidon nashunenquo icquid. ⁷ Ëmbi aden niante nashunte chuiboed Esus tantiaquido utsibotsen chuita, mado. —Aton matses nibëdquid niante nashunenquo icsho: “Esus tantiaquido icsambo iquec,” utsibon canushe —queshun chuita. ⁸ Aton shubun icquidotsen Esus tantiaquidon nashunquid. Abëd icquido menenquo yec pemenquo yec quec nashumënenquo icquid icsamboshë iquec. Esus tantiesabo icsambo icnubi: —Esus tantiaquid nebi —queboedi Nuquin Papan chiaid niacniaquec aton matses nashunenquo icquid icsamboshë iquec.

⁹ —Nëidtedi chido Esus tantiaquido nashunquidombo iquec —quequin abi cuëmëdquid abi cuëmëdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquo 60ted matamec machobudaidquo. Aton bënëuidtsëqui chudmedenedquo. ¹⁰ —Matses nashunquid nec —utsibon caid. Bacuë bëdamboen caniuaened machon. Isedanquido bëdamboen isquid. Esus tantiaquido nashundenedquid. Matses daicsabudacsho nashunquid. Adec bëdamboec tabadquid: —Esus tantiaquido nashunquid icta —cata.

¹¹⁻¹² Utsi niante machobudabi icquid: —Adquid icta —cainda. —Esusuidtsëqui tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon: —Icsambo icquid nec —catsiashe. ¹³ Adquid shubu utsin shubu utsinquien isedben-isedbenec uspumbo yanash onqueteuidtsëqui buntsiash. Utsibo icsaiduidi chuibenequidquo ictsiash. ¹⁴ —Adquid niante machobudabi icquid dadan bedac bëdambo ictsiash —caimbi. Adoac bacuë tishoatsiash. Adshun codocaquinc sicaquinc daëdcaquinc catsiash. Adec bëdamboec tabadsho: —Icsambo icquid nec —Esus tantiesabon catiapimbo ictsiash. ¹⁵ Adquid niante machobudabi icquidën utsin-utsinquien Esus tantienquo yanshun Satanasën tantiamiapadomboen nac caosh. ¹⁶ Niantebëd icquid utsi ¿ada Esus tantiaquid chido icpec? Aidëmbi niante nashunac bëdambo ictsiash. —Ëmbi nëid

nashumbanuc niante utsi aton matses nibëdquidquio Esus tantiaquido utsibon nashuntsiash –queshun abëd icquidën nashunac bëdambo ictsiash.

Esus tantiaquido chuibanquid chiaid

¹⁷ Tantia, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. –Ma penu –queshun menequid. ¹⁸ Adembidi chuiquin Nuquin Papan ambi chiaid dada uamepampic. “ ‘Penushe,’ queshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ queshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “ ‘Naic cho. Mibi bëdamboen cuidquin menenu,’ cac chonoadsho abi chonoa uaquidën menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

¹⁹ Padnuc Esus chuibanquid caic: –Nuquin Papan chiaid niac-niacsho isombi –quequin matses abentsëcshun chuisho: –Abimboen cachitec –cainda. Daëdshun chuisho: –Abimboen cachitec –cata. Adembidi abentsë chotsecquin chuisho tantiata. ²⁰ Esus chuibanquidën Nuquin Papan chiaid niacacsho: –Mibi icsaoc. Padi icnuna –cata. Esus tantiaquido dadpenshun tantianubi adota. –Aden chuisho tantiash dacuëdec: “Ëbitsen adembidi chushcapanundac,” queshun ma utsibon Nuquin Papan chiaid niaquenquio icnu –queshun chushcata. ²¹ Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui isequë. Ëmbi chuibocpadomboen nata. Min matsesën mimbi tantiaidënquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. –Con matses ëmbi tantiaidquio neque. Chushcainquio iquëmbi –cainda.

²² Nuquin Papan chiaid chuibanquid icmenuen nuqui naondacpadomboen badedquio mamishenda. Ambi naid yuen isquioshon ambi chiaid yuen tantiaquioshon: –Bëdambo icquid nec –quequioshon nata. –Esus chuibanquid icta –mimbi badedquio caboedën Nuquin Papan chiaid badedquio niacsho isash: –Ambi: “Adquid icta,” caidbëd Timoteyo icsamboshë iquëc –utsibo quenushe. –Ëbëdtan chuibanquid icta –badedquio cainda. ²³ –Daicsabudteniacosh. “Pucu paëmbo yan-yanebi,” quiosh –quiosh mibi caic, mado. Acteuidi acashien mibi niaque.

Actequid utsi paëmbo icquid pistsëc ac ma pucu bëdanuequin.
 24 Tantia. Mibi padpiden chuinu. —Ëbëdtan namembi —
 canuen matsesën naid bëdamboen tantiata. Utsi aton matses
 ismec icsasho: —Icsambo icquid nec —badedi catsiash aton
 matsesën. Utsibic ismenquoio yec icsasho: —Icsambo icquid
 nec —quequin badedquoio tantienquoio icquin yuecshun
 istuidshumbi adotsiash. 25 Utsien ismequin bëdamboen
 nasho: —Bëdambo icquid nec —badedi catsiash aton
 matsesën. Utsimbic ismenquoio icquin bëdamboen nabansho:
 —Bëdambo icquid nec —quequin badedquoio tantienquoio
 icquin yuecshun istuidshun adembidi tantiatsiash. Ëbi
 adsho tantiashun: —Nuquin Papan chiaid chuibanquid
 icta —badedquoio cainda.

6

Matses yuaido chiaid

1 Matses yuabo Esus tantiaquido icsho naden chuita. —
 Min icbo Esus tantiesa icsho bëdamboen isquin ambi chi-
 acpadomboen nashunta. “Pabadon chiaid icsambo iquec.
 Ambi Nuquin Papa caidtsen icsambo iquec,” quequin icsam-
 boen chuinushe. Min icbon chiacpadomboen nata —quequin
 yuabo chuita. 2 Utsibi chuiquin: —Min icbo Esus tantiaquid-
 bidi icsho: “Ëbipadquidi nec. Ambi chiacpadomboen nati-
 apimbo iquebi,” cainda. “Ëbipadquid icsho aid tantiaquin con
 icbon chiacpadomboen nanu,” quequin min icbo bëdamboen
 nashunta —quequin yuabo chuita. Ëmbi chuiboedtedi Esus
 tantiaquido chuiban. —Adota —quequin chuibanta, mado.

Piucquid bunquin utsibon ambembi chiaid

3 Mimbi: —Nuquin Papan chiaid niaquenquoio yec
 bëdamboec tabadnuna —quequin Nuquin Icbon chiaidquoio
 chuisho: —Aden chuisho tantiatiapimbo iquebi —quequin
 ambembi chiaid chuiquid icsambo iquec. Adquidën chuisho
 tantienda, mado. 4 Aden icsamboen tantiaquidën: —
 Ëmbi chiaiduidtsëqui bëdambo iquec —quequin icsamboen
 chuibanendac. —Mimbi icsamboen chuinuc ëmbimbo
 bëdamboen chiec —quec chushcanantiadquoio iquendac.
 Abembi onqueteuidi bunendac. Adquid yuec onquesho
 tantiash: —Utsi onquetiapimbo icnuc abentsëqui onquebudec
 —quec utsibo nëishendac. Adquidbëd chushcananec
 muauananec icsamboec tantiashunanendac. 5 Pabiate
 shëcuë nibëdacbimboen Nuquin Papan chiaidquoio bëdamboen
 tantienquoio yec chushcananendac. Nuquin Papan
 chiaid chuibanquidën piucquid dadpen bedte danec
 chuibanquidbidi ictiadquoio iquendac.

⁶ Nuquien Nuquin Papa tantiaquieci bēdamboec tabadec nuquin na dadpen bedte bunenquio yec bēdambo ictsiac. ⁷ Tishac chucactšēcnuc nuquin na nibēdpanēdash. Adembidi unēsquin nuquin na nuqui buantiapimbo iquēc. ⁸ Nuquin pete dashcutebēd icnuc utsi bunenquio yec bēdambo nuqui ictsiac. ⁹ Piuçquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen mēmunenquio icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unēsash icsambo icquido cuidacno nidendac. ¹⁰ Adec piuçquid natiambo bunquido aid bednuec baded-badedquieci icsadenendac. Adquido: —Esus tantiembi —queboedobi padenquio yanash: —Esus tantienquio yanchitombi —quēc natiaic tabadendac.

Bēdamboec tabad, quiaid

¹¹ Mibi Nuquin Papa tantiaquidquio neque. Piuçquid bedteuidi bunenquio yec bēdamboec tabadte bunquiota, mado. Nuquin Papan chiaid niaquenquio yec chieshtoenquio icquin Esus tantiata. Matsesēsen tantieci nēishēmēnenquio yec bēdamboec tabadta. ¹² Utsibon chieshēnaqui chieshtoenquio icquin Esus tantiaquieci bēdambo icta. Unēsash Nuquin Papabēd tabadnuec adta. —Con Mado Esus tantiaquieci unēsacsho ēbēdi tabadmendambi —queshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiembi —quequin matšes dadpen mimbi tantiamiondaque. Adembidi aid tantiaquieci bēdamboec tabadta. ¹³ Abitedi uampidēn Nuquin Papan nuqui iseque. —Adquid nebi —quequin ancanquid dapa Ponsio Pidato chieci dacuēdenquio icnēdaidēn Nuquin Içbo Esuquidistuntsen nuqui iseque. ¹⁴ Esus tantiaquin chieshtoenquio icquin aidēn naidquio chuibanta. Nuquin Içbo Esuquidistu choabi icnuc ēmbi chuibodē niaquenquio yec bēdamboec tabadta. —Esus tantiaquido icsambo iquēc —utsibo quetiapimbo icnuc adta. ¹⁵ Nuquin Papan tantiacpadēnquio aid ushēmbi Esuquidistu nidaidēn padpidec choendac. ¿Esus chomequid mitsipadquio icpec? Içsaisambo yec bēdamboshē icquid nec. Aid abentsēcquibi abitedishun Içbombo nec. Aidēmbi chuiquid utsibo abitedi namendac. Aidquio chuiquid utsin dēniactiapimbo iquendac. ¹⁶ Aid abentsēqui unēstiapimbo icquid nec. Bēchamauanquieci cho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēqui abitedishun Içbo yec mibi bēdamboshē iquēc, Papa —quequin Nuquin Papa chianenuna ēnenquio icquin.

Aton na dadpen dayun uaquido chiaid

¹⁷ Aton na dadpen dayun uaquido naden chuita, mado. — “Con na dadpenquioshë icnuc ëbiuidtsëqui bëdambo iquebi,” quenda. Nibëdantiapimbo icquid danquin mimbi dayun uaiduidtsëqui tantienda. Nuquin Papambo tantiaquiota. Aidëmbi matses bëdambo icmenuen aton na bedmec —cata. ¹⁸ Adquidobidi chuiquin: —Bëdamboec tabadquin utsibo nashumbanquiota. Adembidi cudasenquio icquin mitsana utsibo menianeta. ¹⁹ “Mimbi bëdamboen naoque. Ëbëdi tabadmequin mibi bëdambo icmendambi,” Nuquin Papa camenuen adota. Adash unësacsho Nuquin Papan abëdi mibi tabadmendac padpidec unëstiapimbo icnuc —quequin aton na dadpen dayun uaquido chuita.

Pabadon ënquin chiaid

²⁰ Ëmbi chuiboedquiobidi adembidi bëdamboen chuibanta, mado. Nuquin Papan chiaid chienquio yec abembi onquesho tantienda. —Bëdamboen tantiaquin abimbo caimbi —quequidobi muasho tantienda. Adquidobëd chushcana-nenda. ²¹ Aden icsamboen çuisho tantiashun: —Abimbo caic —quequin utsin-utsinquien Esus tantienquio yanondashe. Adquido tantienda. Chieshtoenquio icquin Esusquio chuibanta. —Nuquin Papan con mado bëdamboen ispashun —quequin mibi tantiembi. Padi. Aidtedi chuiquin dada uaombi.

TIMOTEYON ISTE 2

Tauamboen Timoteyo chiaid

¹ Pabado nebi. Nuquin Papan tantiacpadomboen Esuquidistun: —Ëbi chuibeneta —caidquio nebi. —Ambi chiampicpadomboen aton Mado Esuquidistu tantiaquid unësacsho Nuquin Papan abëdi tabadmendac —quequin Esus chuibenequidquio nebi. ² Con mado icbobimboecquid mibi neque. Mibi chuiquin nëid dada uanu, Timoteyo. —Nuquin Papan aton Mado Nuquin Icho Esuquidistubëdtan bëdamboen isquin bëdambo icmepashun —quequin mibi tantiembi.

Chieshtoenquio icquin Esus chuiban, quiaid

³ Con tsusedpabon nacpadomboen Nuquin Papauidi tantiaquin ambi chiacpadomboen natiadquio iquebi. Adquid icquin Nuquin Papa mibi chianembi. —Mibi tantiaquid Timoteyo bëdambo iquec, Papa. Adquio icmec mibi bëdamboshë iquec. Adquiouidi icmeta, Papa —quequin Nuquin Papa chianembi. ⁴ —Ëbi nidnu —qesho tantiaquid mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. ⁵ Naden mibi tantiembi. —Aton chichi Doida caidën ani Eunisebëdtan aid daëdshumba Esus tantiabənquiacpadomboen Timoteyontsen nëbi Esus tantiaquiec —quequin mibi tantiembi. ⁶ Adquid icsho mimbi tantiondaid padpiden mibi chuinu. —Min Mayan nëidbëd tabadmecquin cuesambo icmecquin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibëd tabadmiac. Adoaid icquin dacuëdenquio icquin Esus chuibanta, mado. ⁷ ¿Nuquin Papan aton Mayan nuquibëd icmiacta nuqui natia dacuëdpe? Padenquio. Comapenen tantiaquid yec nuquibëd icquin nuqui cuesambo icmec. Adembidi Nuquin Papan Mayanën tantiamiac nuqui matses bëdamboen tantiec. Adembidi nuqui icsate bunaid namenquio icquin mëmunquidquio icnuc nuqui bëdambo icmec.

⁸ —Adoaid nebi —qeshun dacuëdenquio icquin Nuquin Icho Esus chuibanta. Adembidi dacuëdenquio icquin: —Pabado tantiaquiembi —cata. —Quënën nauedtsaid Pabado tantiatipi —quenda. Utsibon cuestiadquio icquin chieshënaqui Nuquin Papan namiacpadec chieshtoenquio icquin Esus chuibanuna. ⁹ Nuquin Papan: —Bëdamboec tabadquid icmecquin con Mado Esus tantiamembi —caido icquin adonona. ¿Nuqui bëdamboecuidi tabadshoda Nuquin Papan nuqui bëdamboen isbempondash? Padenquio. Ëndenquimboshë nidaibëdta matses uabi Nuquin Papan:

—Ĕmbi chiaid niac-niaquec icsambo icboedĕmbi con Mado Esus tantiasho cuidenquo iquendambi —quequin ambi chuipampicpadomboen nuqui Esus tantiamiac. ¹⁰ Aden ambi chuipampid tantiamiabi icshumbic nĕbi Esuquidistu matsesmeshun matses tantiamiac. Adoac: —Abi tantiaquid unĕsacsho icsaido cuidacno nidmenquo icquin unĕstiapimbo icquid icmequin Nuquin Papa yacno abĕdi Esuquidistun tabadmendac —quequin nuqui tantiec. ¹¹ Aden tantiaquin Esus chuibenequidquo nebi. —Ĕbi chuibeneta —Esusĕn caondaaid yec Nuquin Papabĕdta Esus tantiamequidquo nebi. ¹² Aden chuibeneshobini chieshĕnquin quĕnĕn nauedondash. Adoqui chieshtotiapimbo icquin Esus tantiambi. —Ĕmbi tantiaidquo comapenen tantiaquin nabanquidquo Esus nec. Adquid icquin: “Ĕbi tantienquo yanushe,” queshun abi tantiamequin ĕbi chieshtomenquo iquendac. Nidaidĕn choabi icquin Esusĕn ĕbi chieshtoenquo icquid icmendac —quec dacuĕdenquo iquebi. ¹³ Tanta, mado. Mibi chuinu. Ĕmbi abimbo chiondaaidquo chuiban: —Nuquin Papan chiaidquo nec —queshun. Esuquidistu tantiaquinc matses tantiaquinc caquin adenuidi chuibanta, mado. ¹⁴ Nuquin Papan Mayan nuquibĕd iqueque. Aidĕn namiac ĕmbi chiondacpadomboen Nuquin Papan chiaidquo chuiquin Esus chuibanta, mado.

Onesipodo chiaid

¹⁵ Ĕmbi: —Cho —cac choenquo icboed mimbi tantiac, mado. Nidaid utsi Asia caid yacnocquido dadpen adec choenquo iccosh. Edemoquenes caid choenquo iccosh. Adecbidi Piquedo caid chedo. ¹⁶ Onesipodo caidĕn nĕbi bĕdamboen isposhi. Ĕbi quĕnĕn nauedacsho dacuĕdenquo icquin isuanquin bĕdambo icmioshi. Adsho isun: —Aton shubun icquidobĕdta aid bĕdamboen ista, Papa —quequin Nuquin Papa chianembi. ¹⁷ Aidĕmbi nĕmbo shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibĕbenequin istuidpondashi. ¹⁸ Mimbi isnubi Ĕpeso yacnoshon aidĕmbidi baded-badedquien nashundenondashi. Adsho tantiashun: —Nidaidĕn padpidec choshon Nuquin Icbon Onesipodo bĕdamboen ispashun —caimbi.

2

Chieshtoenquo icquin chuiban, quiaid

¹ Chieshtoenquo icquin Esus chuibanta, mado. — Esuquidistun ĕbi bĕdamboen isec. Aidĕn bĕdambo icmiac dayacquo icquin naimbi —queshun chieshtoenquo icquin Esus chuibanta. ² Matses dadpenshun tantianuc ĕmbi chuibansho mimbi tantiondac. Ĕmbi aden chiondaid

utsibotsen chuiban. Adshun mimbi chuiboedo abentse-abentsen chuita. —Nëidën chieshtoenquo icquin Esus chuibantsiash —qeshun: —Mimbitsen chuiban —cata, mado. ³ Sondado bëdambo icquidën nacbimboen chieshtoenquo icquin bëdamboen nabanuna. Matsesën chieshënubi Esuquidistun chiacpadomboenuidi nanuna chieshtoenquo icquin. ⁴ Sondadon: —Mibi bëdambo iquec —camenuen aton chuiquid dapan chiacpadomboenuidi naquid. Ambi tantiaid nainquo icquinc utsibon chiacpadomboen nainquo icquinc caquin aton chuiquid dapan chiacpadomboenuidi naquidquo sondado nec. Adomboembidi Nuquin Icbon chiacpadomboenuidi nanuna, mado. ⁵ Ma nuquin matses titinquequidquo. ¿Mitsipadquo icpec? Aton uidën tanec aton matsesën chiaction abia titinquec chosho: —Bëdamboec titinquiosh —qeshun mauete menequid. Ambi chiaction titinquiabi icsho mauete menenquo icquid. Adembidi: —Mimbi bëdamboen naoc —Nuquin Icho camenuen ambi chiacpadomboen chieshtoenquo icquin nabanuna, mado. ⁶ Ma nuquin matses tied uaquidquo. ¿Mitsipadquo icpec? Choadquidënquo dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ënenquo icquin. Adoac utsibon Esus tantiabentsiash. ⁷ Aden ëmbi chuiboed tantiata. Adsho Nuquin Icbon mibi bëdamboen tantiametsiash.

Esuquidistu tantiata, quiaid

⁸ Utsibon chieshënubi Esus tantiata, mado. Aidi matsesash isadaidbo tsusedpa Dabidën tsyuecquid nepanëdash. Nuquin Papan uincuemenëdaidquo yec abi iquec. Aidquo tantiaquiota. Aid chuibenequidquo nebi. ⁹ Aden chuisho chieshënquin bedshun icsambo icquid uidën uacbimboen shocosh nacenaidën mëtaniac mëyadebi. ¿Ëbi aden uidën uacbimboenda Nuquin Papan chiaid uidën uapadic? Padenquo. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. ¹⁰ Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquo icquin abëdi tabadmendac —quec chieshtoenquo iccobi quënën naue-dondaid yequi. ¹¹ Naden abimbo chiaidquo tantiash chieshtoenquo iccobi.

—Abi bunaid ënshun Nuquin Icbon chiacpadomboen naquid chieshëmënuquidën unës uacsho Nuquin Icbon abi yacno abëdi tabadmendac.

12 Utsibon chieshënaqui chieshtoenquoio icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tantiac-maido neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

13 Aden abi tantiesabon ambi chiaid niac-niacsho isun Nuquin Icho Esusën ambi chiacpadomboen naquidquoio icquin icsaido cuidendac.

Adembidi ambi chiacpadomboen abi tantiaquido bëdambo icmendac

—quequin chiaid tantiashun ambi chiacpadomboen naquin Esusën naid chuibanuna chieshtoenquoio icquin.

Nuquin Papan chiaid isbanta, quiaid

14 Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquoio chienquoio yec ambembi chiaid chiec mibi chushcanan-queque. Adenda. Adec chushcanansho tantiash mat-ses icsambo yaneque. Padi —cata, mado. 15 —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ëmbi naid ma Nuquin Papan isnu —qeshun adota. Ambi chiaid bëdamboen isbanshun chieshtoenquoio icquin Nuquin Papan chiaidquoio chuibanta, mado. 16 Ambembi chiaid chuiquidobëd onquec tabadenda. Adec onquequido icsambo icboedi buëdanquiec Nuquin Papan chiaid niac-niaquec icsamboshë yaneque. 17 Tosho bedacbimboec adquidën chiaid tantiaquido dadpen yaneque. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. 18 Aidon Nuquin Papan chiaidquoio chienquoio icquin muaquin chiec. —Esus tantiaquido unësabi icquido nëbimbobi uincuenacimboec icpec. Unësacsho aton dada chuca uaquin uincuenenquoio iquen-dac —quequin muaquin chuisho tantiashun utsibon Nuquin Icbon chiaid tantienquoio yanac. 19 Aidon Esus tantiabien ic-chitash. Nuquin Papan Esus tantiamiac ënenquoio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi dada uamepampicpadomboen: “ ‘Ëbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icho Esus nec —qeshun ambi icsamboen naid ënendac.

20 Esus tantiaquido nadquoio iquec. Shubu dapan tsitsan tabëcaid tabadacimboecquid nec. Tsitsan abentse-abentsec icsactsëcquoio icnubi utsi-utsiec bëdambo iquec. Icsactsëcquidën icsa secanun sandoquid yendac. Bëdambo icquidën di nandoquid yendac. Adecbidi Nuquin Papan

shubun tabadtequido iquec. Utsi-utsiec Nuquin Papan chiaid natiadquio yec Esus tantiaquidquio icnubi utsi-utsiec abi icsaid ěnabi: —Esus tantianu —quetsěcquid iquec. ²¹ Esus tantiaquidquio ictiadquio yec: —Muaid chuisho tantiatiapimbo icquin něbi Nuquin Icbon chiacpadomboen natiadquio iquebi —quiash Nuquin Icbon yuambo yantsiash. Adsho Nuquin Icbon bědamboen nametsiash.

²² Caniabon měmunenquio icquin abi bunacpadomboen naquid tanenda, mado. Adenquio yec bědamboec tabadte bunquiota. Nuquin Papan chiaid niacte bunenquio yec: —Nuquin Icbo Esus nec —quequidobědtan chieshtoenquio icquin Esus tantiata. Matsesten tantiec bědamboec isanec bědamboec tabadta. ²³ Mibi yacnoshon ambembi chuiquidon: —Mimbi icsamboen tantiec —canuen: —ĵMitsipaden mimbi tantiape? —cac chienda. Adquiděn chuisho tantiash matses chushcananondashe. Aiděn chiac chienda. ²⁴ Nuquin Papan chiaid chuibanquid chushcananenquio icquid nendac. Chieshěměnenquio icquin aton matses bědamboen isquid nendac. Adembidi něishěnenquio icquin Nuquin Papan chiaid tantiamequid nendac. Utsibon chieshěnaqui chieshěnanenquio icquid nendac. ²⁵ Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi něishenquio icquin Nuquin Papan chiaidquio chuibanendac. —Nuquin Papan ambi chiaidquio tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. ²⁶ —Aden Nuquin Papan ambi chiaidquio tantiamiac Esus tantienquio icboeděmbi Esus tantiabenshun abi yuaquiděn Satanasěn namiaid ěnendac. Aden Nuquin Papan chiacpadomboen naindac —queshun chieshtoenquio icquin Nuquin Papan chiaidquio chuibanendac abi chuibanquiděn.

3

Icsambo icquido iquendac, quiaid

¹ Tanta, mado. Mibi chuinu. Esus padpidec choabi icnuc matses dadpenquioshě icsamboshě iquendac. ² Nadquido iquendac. Něidic utsi tantiatiapimbo yec abiuidtsěqui datantiadquido. Něidic piucquid bedte comapenec bunquidombo. Něidic: —Is. Ěmbimbo naiduidi bědambo iqueque —quequido. Něidic utsibo chieshěnec icsamboec onquequido. Něidic aměn chiaid niac-niacquido. Něidic anin chiaid niac-niacquido. Něidic aton na nashunaqui nashuměnenquio icquido. Něidic Nuquin Papan chiaid niac-niacquidombo. ³ Něidic aton matses tantiesabo. Něidic chiesh bědanesabo. Něidic muauanquido. Něidic abi icsate bunaid ěnenquio icquido. Něidic

cuesanquido. Nēidic bēdambo icquid chieshēnquido. ⁴ Nēidic bēdambo icquid damianquiashic cuesunianquido. Nēidic bēdamboen tantienquio yec badedi icsa uanquido. Nēidic: — Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. ⁵ Nēidic: —Nuquin Papa tantiaquid nebi —quec muaquin aidēn chiai aid niac-niacquido. Adquidtedi icsambo icquido nec. — Adquidbēduidi onquec tabadenda —caimbi.

⁶ Adquidon mibi yacnoshon shubu utsin shubu utsinquien isben-isbenac caosh. Adash chidoidquio icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquio tantiac caosh. Nuquin Papan chiaid niacash adecbidi icsate bunquieic tabadac caosh aid chidobo. ⁷ Aden icsambo icquidēn ambembi chuidenesho tantianeshun Nuquin Papan chiaidquio tantiatiapimbo icpac caosh aid chidobo. ⁸⁻⁹ Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquio chuisho tantiashun aidon: —Mue nec. Ēmbimbo comapenen tantiaquin ismenu —queboedombi bēdiactsēc tantiaquin nacenuidpampic. Adsho isun: —Abimbo cainquio iccosh. Muachitosh —capampic matsesēn. Adembidi chido chiec muaquidon icsate bunquin ambi chiaid chuitiapimbo icsho Nuquin Papan bēdamboen istiapimbo iquec. Adembidi aidon muaquin chuisho tantiashun matses dadpenhun: —Muequi nec —capendac.

Nuquin Papan chiaid isbanec bēdamboec tabadte

¹⁰ Ēbien muaquidpenquio nec. Ēmbi naid ma mimbi tantieyoc. —Ma Esus tantianu —quequin Esusēn naid chuibanec bēdamboec tabadondabi. Esus tantiaquidquio icquin matses tantiaquin Esusēn naid chuibeniondambi. Chieshēnaqui chieshtoenquio icquin adembi chuibeniondambi. ¹¹ Ēmbi aden chuibansho isun chieshēnondashi. Shubu dadpen icquid Antioquiya caid yacnoshon ēbi: —Cuesnu —casho Nuquin Icbon nac padenquio icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquio bedshun cuēnoten se-sequin unēs uatsempondash. Adsho Nuquin Icbon nac unēsenquio iccondabi. ¹² Ēbipadquido Esus tantiaquidotedi bēdamboec tabadtiadquio icsho adembidi utsibon comapenen chieshēnendac.

13 Padnuen chieshēmēnquidobēd bēdambo icquid damianquiec muaquido bēdiactsēc icsambo icboedi muauananquiec buēdanquiec icsamboshē yanendac.

14 Mibi adquidpenquo nec, mado. —Ēmbi isonaidon bēdambo icquidon abimbo chuibanondashi —quec Nuquin Papan chiaid niaquenquo yec bēdamboec tabadta, mado.

15 Ēnden bacuēmpi icquin Nuquin Papan chiaidquo min masesēn chuibancho mīmbi tantianēdac. Adshun: —Aton Mado Esus tantiaquid unēsacsho abēdi Nuquin Papan tabadmen-dac —quequin mimbi tantiabenēdac. Aden Nuquin Papan bēdamboen iste tantiametembo Nuquin Papan chiaid nendac. 16 Nuquin Papan chiaid aton Mayanēn tantiamiac masesēn dada uapampic. Aidēn chiaid abitedimbo bēdamboshē iquec. Aid isec onquequin: —Nuquin Papan chiapadec bēdamboec tabadnuna. Esus tantiaquido yec icsainquien ictiad —quequin abi chuibanquidēn chuibanec. Adembidi: —Esus tantiaquido adesa. Padi. Bēdamboembien natiad —quequin chuibanec. 17 Nuquin Papan: —Ēmbi chiaidquo tantishun Esus tantiaquinc matses nashunquinc caic Esus tantiaquido ma bēdamboec tabadnu —quequin ambi chiaidquo dada uamepampic.

4

Nuquin Papan chiaid chuisho tantienquo yaid

1 Nuquin Papabēdtan Esuquidistun mibi isequē. Bēdamboen nata. Esusēn nidaidēn padpidec choshon abitedishun Icbombo icquin unēsaido uincuemiaido unēsabi icquidobēdta chiendac. —Nēid ēbi tantiaquid ēbēdi tabadmēmbi. Nēid ēbi tantiesa cuidēmbi —quequin chiendac. 2 Aidēn chiapadomboen naquin Nuquin Papan chiaidquo chuibanta, mado. Matsesēn tantiatiadquo icnuc adota. Tantiatiapimbo icnubi adēmbi chuibanta. Esus tantiaquido icsasho isun: —Esus tantiaquido adesambo neque. Bēdamboembien natiad —quequin nēishēmēnenquo icquin chuita, mado. Utsibo bēdamboec tabadsho: —Mibi bēdamboec tabadoc. Aduidequi tabadta —quequin chieshtoenquo icquin chuita. Bēdiactsēc tantiatsēcquido: —Esus tantiaquidon nadoquid —quequin chuibanta, mado. 3 —Yuecshun Nuquin Papan chiaidquo matses dadpenshun tantiatiapimbo iquendac —queshun nata, mado. Aden tantiatiapimbo icquidēn Nuquin Papan chiaidpenquo chuisho tantish: —Mimbi ēbi bunaidquo chuisho tantianu. Ēbi chiec cho —quequin muaquid utsi-utsien abi yacno puduedmendac. 4 Pamumēdacbimboecquin Nuquin Papan chiaid tantienquo icquin tsusedpabon ambēmbi chiampiduidi tantiendac.

⁵ Aidën nacpadomboen nainda, mado. Nuquin Papan chiaidquio bēdamboen tantiaquid yec bēdamboec tabadta. Adsho utsibon chieshēnaqui chieshtoenquio icquin Esusquio tantiata, mado. Adembidi Nuquin Papan bēdamboen iste Esus tantiesabo chuibanta. —Esus chuibanquidën nadoquid —caidtedi nabanta, mado.

⁶ —Ēbi unēs uan ěmbi nacpadomboen: “Adota,” mibi caquid nibēdtsiash —queshun mibi aden chiec nebi. Nēbi Nuquin Papan tantiacpadën chieshēmēnquidon ěbi unēs uaic. ⁷ Utsibon chieshēnubi ěnenquio icquin Esusën naid chuibeniombi. —Ēbi bunaid bednu —quec comapenec titinguiacimboen dayacquio icquin Nuquin Papan chiaidtedi naombi. Chieshtoenquio icquin Esus tantiaquidquio nebi. Adshobini nēbi unēs uaic. ⁸ Unēs uacshobini matsēsën naid abitedimbo tantiaquidën Nuquin Icbon: —Ēbi tantiaquin ěmbi chiacpadomboenuidi naic mibi bēdambo iccoque. Nuquin Papa yacno ěbēdi tabadmēquin mibi bēdamboshē icmēdambī —caindac. Abi chote ushēn choshon aden Nuquin Icbon ěbi chiēndac. Adembidi abi chosho iste bunquidotedi abi tantiaquido Nuquin Icbon abēdi tabadmēdac.

Timoteyo: Cho, caid

⁹ Nēbimbobi ěbi isec cho, mado. ¹⁰ Utsibo nidanebon ěbentsēqui tsadebique. Demas caid aton na bedteuidi bunec ěbi nianec shubu dadpen icquid Tesadonica caid yacno nidosh. Quedesente caidic nidaid utsi Cadasia caid yacno nidosh. Titobic nidaid utsi Damasia caid yacno nidosh. Aidtedi nidanebon ¹¹ Ducas abentsēqui ěbēd iquec. Madcos bedbētsenec cho, mado. Ēbēdtan aiděmbi nēshunquio Esus chuibantsiashe. ¹² Tiquico caid Epeso yacno mibi yacno nidmiombi. ¹³ Shubu dadpen icquid Todoas caid yacno Cadpo cuēmēdquidën shubun con na niamēdaccondashe. Con dashcute ěmbi dada uaidbēdta bedbētsenec cho, mado. —Abitedi buantiapimbo iquebi —queshun nēish yua bitsi nacnēnaid dada uaiduidtsēqui bēta.

¹⁴ Shocosh nacnenquidën Adecandedo caidën comapēnen chieshēnondashi. Aid Nuquin Papan cuidēndac, mado. ¹⁵ Nuquin Papan chiaid ěmbi chuisho tantiatiapimbo icquin icsamboen chuishunondashibique. Choquin aid isēnda: —Ēbitsen icsamboen chuishunushe —queshun. ¹⁶ Ēnden tauamboen bedshun: —Quēnēn nauednu —cac cuidte chuiquid dapa ěmbentsēqui chuibampondambi. —¿Mitsipadosho isun ěbi bedo? Icsamboen nambo iccombi —capondambi. —Ēbēd icboedon dadpenshun: “Bēdambo icquid nec,” quequin

ëmbi naid chuibanac ëbi quënën nauedquidon ëbi nidmet-siash –qeshun ëbëd icboedo: –Chiec cho –caqui choen-quo iccondash. Aden ëbi cacuidondaïdo tantiaquin: –Nuquin Papan aido cuidenquo icpashun –caimbi. ¹⁷Nuquin Icbombini nianenquo iccondash. –Isadaïdpembo matses utsibo ma ëmbi naid chuibenenu –quequin cuesambo icme-pondashi. Adondaïd icshobini chieshëmënquidon: –Cuesnu –cabededpondash. Nuquin Icbon nac aid matsesën unës uain-quo icpondashi. ¹⁸Padpiden chieshëmënquidon ëbi caic: –Ma mëyanac chieshtoshon Esus tantienquo yanu –casha Nuquin Icbon nac chieshtoenquo ictsiabi. –Nuquin Icbombidi abi yacno ambi matses dadpen namiacno abëdi ëbi tabadmen-dac –qeshun: –“Nuquin Icho bëdamboshë iquec,” canuna ënenquo icquin –caimbi.

¹⁹Mibi yacnocquido: –Mibi caic: “Unësquo iquec,” quiosh Pabado –quequin chuiban, mado. Nëidic Aquida caïd. Nëidic aton chido Pidisida caïd. Nëidic Onesipodo caïd chedo. Aidtedi aden chuiban. ²⁰Mimbi isondaïd Edasto caïd shubu dadpen icquid Codinto yacno tëshëdondash ëbi chonoc. Utsibic Tëdopimo caïd aton dada icsabudacsho shubu dadpen icquid Mideto caïd yacno nianondambi. ²¹Ue tsasi iquenuanquid taënushe. Baded cho, mado. Doma yacnocquido nëmbo icquidon: –“Timoteyo unësquo iquec,” quequin dada ua –caposhi. Nëidic Eyobudo caïd. Nëidic Pudente caïd. Nëidic Dino caïd. Nëidic Quëdaudia caïd. Nëidic Esus tantiaquido nëmbo icquido utsibotedi. Aidtedi adosh. ²²–Nuquin Icho Esusën abëd icquin con mado bëdamboen ispashun –quequin mibi tantiembi. Padi. Aidtedi chuiquin dada uaombi, mado.

TITON ISTE

¹ Pabado nebi. Nuquin Papan chiacpaden chuibenecquid nebi. Adembidi Esuquidistun, Ēbi chuibeneta, caidbidi nebi. Aden chuibanac Nuquin Papan cuēnaido Esuquidistu tantiadonequidquo ma icpanuna. Adquid iquec ma bēdamboec tabadpanuna. ² Muesa Nuquin Papa nec. Adquid icquin, Ēmbi ėnden chiampicpadomboen ėnenquiocquin Esuquidistu tantiaquido ėbēdi tabadendac, quequin ma aidon tantia-panueshun adomboen chiaid chuiquidquo Esuquidistun icmiondashi. ³ Ambi tantiaampicpadēn ambi chuipampid Esuquidistu tantiamenuequin aidēn chuibeneta caid nebi.

⁴ Ēmbi chuibanac Esuquidistu tantiaquid mibi yampondac, Tito. Adquid yanshun Esuquidistubēd icquid nebi, quequin ėmbi tantiacpaden mimbi tantiec. Aden tantiaquid con mado-bimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ėbi icsaid cuidenquo yec Nuquin Papa bēpiscudac, quequin ma ėnenquiocquin mimbi tantia-panuna. Adecbidi Nuquin Papabēd tabadendabi, quequin tantia-panuna, Tito.

Quideta yacno nidshun Titon natequid

⁵ Ēmbi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnoquidon ėmpanuna. Adembidi, shubu dadpen icquid uano-uanoecquid yacno nidshun ėmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquiduidquo chuita, Tito. ⁶ Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquo ictiad, Tito. Bēdamboec tabadquid ictiad. Adecbidi chido abentsēc inquid ictiad. Aton bacuēbotedi Esuquidistu tantiaquidobidi ictiad. Adquidēn bacuēbo icquin bēdamboec tabadquin aton papan chiaidbēdta aton titan chiaid chieshenquiocquin nabantiad. ⁷ Aidi ut-sibēd bēdamboec tabadquin, Nuquibi nanuna, qeshun ut-sibēd onquenquiocquin ambibi tantiacpadomboenuidi nabanesa ictiad. Adecbidi badedquo nēishesa ictiad. Adecbidi paēmboecquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. ⁸ Adecbidi Esuquidistu tantiaquid utsibo yuedquid ictiad. Adecbidi ut-sibobēd bēdamboec tabadte bunquid ictiad. Adecbidi utsi

bēdamboec tabadsho tantiash, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, queshun naisa ictiad. Adecbidi, Naden naic bēdamboequid yantsiabi, queshun adomboen naquidquio ictiad. Adecbidi abimbo chuiquidquio ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bēdamboen tabadmequin chuiquidquio icta, quequin chuita, Tito. ⁹ Aden utsibo isbanquin bēdamboen tabadmenuequin chuiquid icta, cashun nēid aido chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantiash ma utsibo bēdamboec tabadpanuna. Adembidi Nuquin Papan chiaid chuca uaquidēn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuioata, Tito.

¹⁰ Quidetabo nad iqueque. Chuinu. Tantia. Abi chuiquidēn chiacpaden naisa Quidetabo dadpen iquec. Abimbo chiosh, camenuequin abimbo chiacbimboec aido onquec. Dadpenshun isadaidbon nacpadomboen nanuequin, Shui dēbid dētemeta, quequin Quidetabon chiec. ¹¹ Adquidon shubu utsin-utsinquieq puduedshun ambi tantiaid icsa chuibanac utsin-utsinquien tantiash cuēshēdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bēdamboen chuibanquin ambi muaquin chiaid ēmeta, Tito. ¹² Quidetabon matses ēnden icnēdaid abentsēcshun naden aton matses chuipanēdash. “Quidetabo muaic chuinanquidombo nec. Aben icquid yuatemaiddimboec uimanēmēnquido nec. Chonoadenquiocquin nua peshun nua actenequido neoaic,” quequin Quidetabo ēnden icnēdaidēn chuipanēdash. ¹³ Abimbo chuiquidēnquio aden chuipanēdash. Aden chuipanēdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. ¹⁴ Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuisho tantiesa ma icpanuna. Aden mimbi chuibanac abimbo chuiquidēn chiacbimboen niacquidon chuisho ma tantiesa icpanuna. ¹⁵ Nuquin Papan Esuquidistu tantiamiaidēn icbon chiaid bēdamboen isoaic. Adomboembidi ambi uabanaid isec. Adash abitedi bēdambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nēid mishtemaid nec. Nēid utsi petemaid nec. Nēid utsi

actemaïd nec, quequin chuibanquidën chiaïd tantiec. Aden tantiec aton tantiate icsabudec, Icsaobi, quequin tantienquio iquec. ¹⁶ Nuquin Papa tantiembi, queshumbic Nuquin Papan chiacpadomboen niacquin tantiesa nebi, quiachimboec tabadsho utsibon adquid isec. Nuquin Papan chiaïd niacquid adquid nec. Nuquin Papan icsamboen isaidquio adquid neoaic. Naid bêda natiapimbo icquid neoaic, Tito.

2

Esuquidistu tantiec iccuededquido tantiametequid

¹ Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantiamé. ² Mimbi paëmbocquid nua aquenquio icteniacpadomboen Esuquidistu tantiaquid tsusiobo chuibanquin tantiamé. Adembidi, Mibi bêdamboec nec, utsibo camenu, quec bêdamboec tabadtenequin tsusiobo ismequin tantiaméoa. Adembidi, Naden naic icsatsiabi, queshun mimbi nainquio yacpadomboen mimbi bêdamboen tantiaid aido chuibanquin tantiaméoa. Adembidi, Naden naic bêdamboecquid yantsiabi, queshun adomboembidi naquid nebi, quequin tsusiobo chuibanquin tantiaméoa. Adembidi mimbia Esuquidistu tantiadoniacpadomboen pausunaid icquin ma adquiobidi tsusiobotsen yampanueshun tantiaméquin chuibanta. Adembidi, Esuquidistu tantiec utsibobêd tantiananec mibi tabadteniacpadomboen chuibanquin tantiamé. Adecbidi, natiatequid iquendac, quequin Esuquidistu tantesa uainquiocquin abi choate mimbi caimbudacpadomboen chuiquin tantiaméoata, Tito.

³ Adembidi, Esuquidistu tantiaquid ênden machoaido tantiamenuequin chuiban. Nuquin Papan bêdamboecquid icmaïd nebi, quec bêdamboec mibi tabadteniacpadomboen tantiaméquin chuioa. Adembidi, utsi icsamboen chuiquid iquenda, quequin chuibanquin tantiaméoa. Adembidi, mimbi paëmbocquid nua aquenquio yacpadomboen chuiquin tantiaméoa. Mimbi bêdamboen nabanaid nêbi machocuenaido ismequin tantiamé, quequin ênden machoaido chui, Tito. ⁴ Aden chiac ênden machoaidon aton bënë aton bacuëbo chedobêd abi tabadaïd tantiamenuequin nêbi machocuenaido bêdamboen ismepec. ⁵ Adembidi aidën bêdamboen tantiaquin, Naden naic icsatsiabi, queshun nainquio iquec. Naden naic bêdambo ictsiabi, quequin naquid, quequin ênden machoaidon nêbi machocuenaido chuibanquin tantiaméoapec. Adembidi, Mibi inesa chudmenquio yec tabadta, quequin ênden machoaidon nêbi machocuenaido chuiquin tantiaméoapec. Adembidi, aton shubun tabadquin ambi nabanacpadomboen ismequin aidon nêbi machocuenaido

tantiam eoapēc. Adembidi, utsibo bēdamboen tantiaquin ambi nashunacpadomboen ismequin ēnden machoaidon nēbi machocuenaido tantiam eoaic. Adembidi, aton bēnēn chiacpadomboen nabanquin nēbi machocuenaido ismequin tantiam eoaic. Aden ēnden machoaidon abi ismiacpadomboen nēbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

⁶ Adembidi, caniabo chuibanquin tantiam e, Tito. Naden naic icsatsiabi, quequin nainquio iquemi, quequin mimbi bēdamboen tantiacpadomboen caniabo tantiam equin chiuoia. Adembidi, Naden naic bēdambo mibi icpec, quequin mimbi bēdamboen tantiacpadomboen aido tantiam equin chiuoia. ⁷ Bēdamboec tabadaid tantiam equin ismenu, quec mibibi bēdamboec tabadteneta. Mibibi icsainquiocquin ismequin tantiam e. Adembidi mamēnenquiocquin bēdamboen chuiquin tantiam e. ⁸ Adec mibibi bēdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chieshēnquid mibi icsamboen chuitiapimbo yec tabadendac.

⁹ Adembidi yuabo chuiquin, Bēdambo iquebi, min icbo camenuequin ambi chiaidtedi chieshenquiocquin nabanta, quequin tantiam eta, Tito. ¹⁰ Adembidi, min icbon na amp-enquiocquin bēdamboen dayun uaqin nashunquin min icbo ismeta, quequin yuabo tantiam e. Aden Esuquidistu tanquin nabansho isun min icbo: Con yua Esuquidistu tantiaquid yec bēdamboshē yanac. Con yua bēdambo icmequidēn chiaid tantianu, quendac icbo.

¹¹ Nuquin Papan matses abēd icmenuequin matses icsaid bedshuntequid Esuquidistu icmenuequin chomepanēdash. ¹² Aden chomiāc nidaidēn tabadquin utsibo tantiaquin Nuquin Papan chiacpadomboen naquin ismiac adomboembidi naic bēdamboec tabadquid. Nuquin Papan bēdamboen tantiam iac bēdamboen tantiasho, Aidēn bēdambo icmiaid icquin naden naic bēdambo icpec, quequin naquid. Adembidi, Naden naic icsatsiabi, quequin nainquio icquin Nuquin Papan tantiam iacpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantiam e, Tito. ¹³ Nuquin Papapadquid con Icbo Esuquidistu choaic, quequin caimbudec bēdamboec tabadebi, quequin chuiquin tantiam eoā. ¹⁴ Nuqui cainaid: Ēmbi con utsibo caid ēbipadquid iquendac, quiash nuqui icsaid bedshunash abided cuidadec unēsapanēdash. Adacsho aid tantiaquidquio yec bēdamboec tabadquid nec, quequin chuiquin tantiam e, Tito. ¹⁵ Ēmbi chuiboedtedi chuibanquin

tantiamē. Mimbīa tantiaquid icquin, Ēmbī chiacpadomboen nabanec tabadteneta, quequin Quidetabo chuiōata. Mimbī chiacpadomboen nainquiōcsho isun cuembo chuiōata. Adecbīdī, utsibon mībī icsamboen chuitiapimboen bēdamboec tabadteneta.

3

Utsi tantiaquin nabantequid

¹ Esuquidistu tantiaquidtedi bēpiscudmenquiocnuequin naden chuibanta, Tito. Min tsusiobon bēdamboen chiaid naquimbi adembīdī mībī chuiquid utsibon bēdamboen chiaid chieshenquiocquin naban. Adembīdī, utsibo tantiaquin nashunta, quequin Quideta yacnoquido chui. ² Adembīdī, Utsi muaquin chienda, quequin chuiōata. Adecbīdī, Utsibobēd tantiananec bēdamboec tabad, quequin chuiōa. Adembīdī, Mimbī naiduidi tantienquiocquin nabanta, quequin chuiōa.

³ Ēnden Esuquidistu tantiesa nuqui iccondac. Adquid icquin Nuquin Papan chiacpadomboen nainquio nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembīdī, utsin bēdamboen isaid icsho isash nuqui nēishpondac. Adecbīdī utsibobēd nēishash nuqui chushcanampondac. ⁴ Adquid nuqui icnuc matses tantiec abēd icquid icmenuec nuqui icsaid bedshunash abided ciudadec Esuquidistu chopanēdash. ⁵⁻⁶ Adec choash ciudadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiamequioquin nuqui ēmec. ⁷ Adec aton Mayan nuquibēd icsho isun, Bēdambocquid nec. Aidtedi ēbēdī tabadendac, quequin Nuquin Papan tantiec. ⁸ Ēmbī chuita, quequin chiaidtedi abimbo iquec, Tito. Aden tantiaquin Quideta yacnoquido chuiban Esuquidistu tantiaquid icquin ma adomboen nabanec bēdamboec tabadpanuna. Ēmbī chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

⁹ Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembīdī, aton tsusedpabon naden nata quequin chuinēdaid chuiquin chushcanu qesho adembīdī adenda, cata. Aden chiaid Nuquin Papa yacno mībī puduedmetemaid nec, quequin chuita. ¹⁰ Adec onquequin Esuquidistu tantiaquido cuēshēdmenuequin chuibanquid icsho bēdamboen

tantiamenuquin chuiban. Aden chiaqui niacbidanquin adomboembidi aidën chuiasho tantiashun aidi comapenen chuibanquin tantiameoa. Aden chiaqui padpiden niacbidanquin adomboembidi chuiasho tantiashun cacumeta, Tito. ¹¹ Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

Utsibo chuiquin chiaid

¹² Nëbi utsibo chuinu. Tantia. Adtemas Tiquico chedo ëbëdi iquec. Abentsëqui Quideta yacno nidmembali. Aid mibi yacno choambien mimbi tantiamedonequin chuibanquin naimbudnu quiash Nicopodis yacno nidoata, Tito. Ue dapa sequenuc Nicopodis yacno tabadnu, quianec nidendabi. ¹³ Matses icsasho cuidte chuiquid, Senas mibi isbidanec Apodosbëd udi nidec. Aid daëdi mibi yacno chosho yued. Nidnu, qesho aton na nibëdsho isun menequin bëdamboen nidme. ¹⁴ Peshun acnu, quequin Esuquidistu tantiaquidën chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquiobidi yanendac.

¹⁵ Mibi tantiec tabadebi, quequin Tito chuita, ëbëd icquidon cacpadomboen dada uaimbi. Adembidi mibëd icquido Esuquidistu tantiaquido tantiec ëbëd icquido tabadoaic.

Esuquidistun, Bëdambo iquebi, camiaido ma mibitedi icpanuna. Padi. Aided chiombi, Tito.

PIDEMONËN ISTE

¹ Pabado nebi. Esuquidistun ëbi chuibeneta cac chuiban-sho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. ² Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiacbimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuioata, Pidemon. ³ Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

Nuquin Papa chiec onquiaid

⁴⁻⁵ Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantiash, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon. ⁶ Aden mibi tantiaquin Pidemon ambi tantiaid Esuquidistu chuibanquid icme. Aden aidën chuiban-sho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

⁷ Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantiash bëdambo iquebi, Pidemon.

Onesimo tantiaquin chuidoniaid

⁸ Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi. ⁹ Tantiananquid nuquibi icquin aden chienquio iquembi. Tsusio budobi. Adquid icquin Esuquidistu chuibancho padpiden quënën nauedoshi. ¹⁰ Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho

ada ëbi bēdamboen tantiaquin mimbi nashunondacpaden aidi bēdamboen tantiaquin nashunoatsia? Pidemon. ¹¹ Ënden min yua icquin mimbi chiacpadomboen mibi nashunenquo iccondaidēmbi nēbi Esuquidistu tantiaquid yanshumbini nēshunquo bēdamboen nashunec. Mibi yacno nidshun adomboembidi Onesimon mibi nashunoaindac.

¹² Aidi mibi yacno nidmeoaimbi. Con dayunquo icquid nidmenu, quiash aid tantiec unēsquo tsadebi, Pidemon. ¹³ Esuquidistu chuibansho quēnēn nauedshun tataniac caputiapimbocsho mimbi ëbi nashuntiapimbo iquec. Adec mibi nashumēntiapimbocnobi Onesimombini nashunosh, qeshun nidmetiapimbocquimbi mibi yacno nidmembi. ¹⁴ Onesimo ëbēdi tabadmenuequin chuita, mibi catiapimbo iquebi. Minbibi aden chiac bēdambo ictsiash. ¹⁵ Yuecash cuēshēdenquo yec Pidemombēd Onesimo tabadoaindac, quequin Nuquin Papan tantiondacadquiec mibi yacnoēsh cuenēdaid mibi yacno nidash Onesimo tabadtsiash. ¹⁶ Onesimo min yua iccondaid Esuquidistu tantiaquid yansho mimbi con utsi caid aidi nendac. Ëbēd icquin natiapimbocsho aidēn nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bēdamboen mibi nashunendac.

¹⁷ Pabado ëbēd isedanquid nec, qeshun mimbi ëbi yuedondacpaden Onesimo yuedta, Pidemon. ¹⁸ Con na ut-sibēdtabi con na bedtequid Onesimon bedaccondash, quequin mimbi chiacdedi mibi meneoaimbi. ¹⁹ Aidtedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daēd uaquin ëbi nashunquin cuidtiadquidi mibi nec, Pidemon. ²⁰ ¿Aden ëbi nashunuequinda mimbi Onesimo ëbibimboecsho bēdamboen tantiaquin nashumpatsia? Aden mimbi aid nashunuc bēdambo ictsiabi. ²¹ Ëmbi chiacdedi daēd uaquin mimbi natsiac, quequin tantiec tsadebi, Pidemon.

²² Nēidtsen chuinu. Tantia. Ëmbi tantienquiocnoc Pabado chonoshe qeshun abi ushondaaid nacnenueshun nacnenta, Pidemon. Mibi ëbi tantiec Nuquin Papa chiec onquiacpadomboen badedquo Nuquin Papan mibēd icmepashuni.

Utsibo chuinu quiaid

²³ Esuquidistu tantiaquid utsibo ëbēdi iquec. Aidon chiaid chuinu. Tantia. Epapadas, abembi ëbēd icnuec quēnēn nauedadondaidēn: Mibēd icquidotedi tantiec tsadebi, quequin Pidemon chuita, cac adomboen dada uaimbi, Pidemon. ²⁴ Madcos yec Adistadico yec Demas yec Ducas yec quec ëbēd icquido iquec. Aidombidi: Mibēd icquido tantiec

tabadebi, quequin Pidemon chuita, cac dada uaoaimbi. Aidedishun ëmbi Esuquidistu chuibanacpadomboen chuibanoaquido nec.

²⁵ Nuquin Icbo Esuquidistun mibitedi bëdambocquid icmebanacpadquiec ma tabadoapanuna, Pidemon.

Padi. Aided dada uaombique. Isec onqueta.

EBEDEYON ISADAIDBON ISTE

Abi yacnoshon ambi uaidon Icbombo Esuquidistu nendac

¹ Ëndenquimboshë Nuquin Papan ëmbi chiacpadomboen chuibanta cac adomboembidi abëd icquido tsusedpabon chuibanoapampic. Abentsëc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bëda budmiac aidën chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic.

² Nëbi tsyuecquio Nuquin Papan chiacpadomboen abipadquiocquidëmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubëdta uashun aidënquiocquidtedi aton Papabëdtan uabanampidquio aton Madombo nec. ³ Aidi, aton Papa bëdaidquio yampidpadquidquibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubëd aidënquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash

abided cuidadec unësash, Ëmbi bëdambocquid icmebanaido matses nendac, quequin tantiashic abuc nidoash Nuquin Papabëd tabadoapanëdash aidquio. ⁴ Ad icnuc ambi abi yacnoshon uaido abipadquid nibëdec. Aidon con Icbombo caidquio nec. ⁵ ¿Ambi abi yacnoshon uaid mayan bëda isec:

“Con mado mibi nec.

Ëbi min papa nendac, quepecta Nuquin Papa iquec? Padenquio.

Adecbidi:

¿Nëidën Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

⁶ Abëd Abiambo Yampidi nidaidën tabadash choasho isun Nuquin Papan ismequin:

“Nëid con Madombo Abentsëqui nec. Aidquio tantiec con Icho nec, quec cuishon quec, ambi naid chiec cuëdën, cac aden ambi abi yacnoshon uaido mayan bëdabo chuibanec cuëdëncuededendac.”

⁷ Ambi abi yacnoshon uaido mayan bëdabo naden Nuquin Papan chiec:

“Ëmbi chiacpadequi cunquequid yanec.

Adecbidi, ëmbi chiacpadequi cuëte nëdënnquedote iquendac.”

⁸ Padnuen ambi uacmaid abipadquid aton Madombo utsi uatiapimbo iquec. Adquidquio icscho Nuquin Papan naden chiec:

“Ēnenquiocquin ěbĕdtan Chuiquid Abentsĕcquio mibi iquendac. Adecbidi namequid bĕdaidquio mibi iquendac.

⁹ Ēbipadquid iquec bĕdamboec tabadquin nabante bunquidquio mibi nec. Adquid yec icsamboec tabadquin nabante bunesambobidi mibi nec.

Adquid yec ěbi yacpadquidquio Icbo Abentsĕcquiobi mibi nec. Mibĕd icquido adquid nibĕdec.

Mibi abentsĕqui adquidquio iquec. Adquid iquec, Bĕdambo iquebi, quec mibi cuishon quendac.”

¹⁰ Adembidi Nuquin Papan naden aton Mado chuioaic, “Tauamboen nidaid abubĕdta uashun aidĕnquiocquidtedi mimbi uabampampic.

Aidtedishun icbombo mibi nec.

¹¹⁻¹² Aidtedi ěnĕdendac.

Mibien nibĕdantiapimbo yec abi tabadendac.

Aidtedi dashcute shĕnibudaid niacbimboen chuca uaindac.

Mibien Abiambo Yampid yec abi ěnĕdesa mibi iquendac.

¹³ Nĕbi cainec ěbĕdquio tabadec cho.

Mibi chieshĕnquidtedi nibĕdquio icmenun nabono. Chiata,” quequin Nuquin Papan chiampic. ¿Ambi abi yacnoshon uaido mayan bĕda aden chuipampidta nepadic? Padenquio. Esuquidistu aden chuipampic. ¹⁴ Ambi abi yacnoshon uaido mayan bĕdabo Nuquin Papan, Ēbĕd tabadtequidombo nashunta, caido nec.

2

Ambi chiaid tantiesa icchitomane, queshun tantiadonequiota caid

¹ Adec abitedishun Icbombo aton Mado icnuc ambi chiaid chieshĕnchitomane queshun tantiadonequiec tabadnuna. ² Ēndenquimboshĕ ambi, Naden nata,

quequin chiaid ambi abi yacnoshon uaido mayan bĕdabo chuimiapadomboenuidi naisa icscho isun Nuquin Papan cuidpampic. ¿Aden ěndenquimboshĕ ambi chiaid chieshĕnquid

ambi cuidpampicpaden ³ nĕbi icquidtsen ambi chiaid chieshĕnsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded

cuidpanĕdash. Adoac, Ēbi yacno Yuedanquid nebi, quequin aton Madonquio Esusĕmba chiambic adomboembidi abi tantiaquidontsen chuioapondashi. Aden Esusĕn

chiaid tantiaquidon chuibanubien, ⁴ Ēmbi chiaidquio chuibanoapec, quequin ismenuequin aton Mayanĕn

Nuquin Papabéd icquidën tantiamebanacpadomboen nadatiambocquin utsi-utsien bédamebanquinc, mayan icsa dapuduedmequinc, unësaid uincuemequinc caquin adquidën-adquidënquien nabededpanëdash.

Matses icnu quiash Esuquidistu matsespanëdash

⁵ Adembidi chuinu. Tantiata. Abi yacno Esuquidistu tanti-aquido choash tabadsho isun, Nëido ëbi yacnoshon ëmbi uaido mayan bédabo mibi chuiquid nec, quenquio Nuquin Papa iquendac. ⁶ Ëndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Ëbi chui, Papa. ¿Atotsieshun matses mimbi uaid pistsëcquio icsho mimbi comapenen tantiatequid aido icpec? Papa.

Adembidi, ¿Atotsieshun Adanën tsyuecquido mimbi nashumpe? Papa.

⁷ Nëbi chuitan mimbi cac mibi yacnoshon uaid mayan bédan adomboembidi chuioac matsesën nabanec.

Yuecquiocshon mibipadquid matses mimbi icmendac.

⁸ Adquid icmeshun mimbi uaidtedishun icbombobidi aid mimbi icmendac,”

quequin abimbo chiampid nec. Nëbi abitedishun icbo matses mimbi icmiambo iquec. ⁹ Utsien Nuquin Papapadquidquio yequi matsesun Nuquin Papan tantiamiacpaden ambi abi yacnoshon uaido mayan bédabon chiac nabamboedi nëbi aton Papabéd tsadec abitedishun Icbombo yanac. Aidi Nuquin Papan chiacpadomboen nanuec nidaidëshun tishac matsesash matses tantiec matses icsaid bedshunash abided cuidadec unësash abitedishun Icbombo yampanëdash.

¹⁰ Nuquin Papa abitedi uaquidquio icnuc ambi tantiacpadec iquec. Adquid icquin ambi, Matses icsaisa icmeshun con bacuë icmembali, quequin tantiacpaden ëbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanëdash. Aidi matses yec natiamianquiequi icsaisa yec unësash uincuenash bëyucanec abi yacno dectatonepanëdash ma Nuquin Papan, Matses con bacuë icmembali, quequin tantiaido ëbi tsibanec dectatonepanu quiash. ¹¹ Matses bédambo icmequid Esuquidistun Papa ambi bédambo icmebantequidon Papabidi nendac. Aton Papa Abentsëqui icnuc Esuquidistu Nuquin Papa yacno choash, Con utsibo nec, quependac ¹² aton Papa chiec:

“Mibi chuiquin con utsibo tantiamenu, Papa.

Aidobéd tabadquimbi mibi chuinu. Tantia, Papa, quependac.”

¹³ Adembidi chuioaic:

“Mibi tantiaquin mimbi chiampicpadomboen nabanash choaobi, Papa.

Ëbi tsibantequid mimbi bēdaidquio icmiaidquio bēc choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuipampic.

¹⁴ Matses namibēd intacchoquid yec unēstequid icsho mēnchicquid icnu quiash Esuquidistu matsesash unēstequid yampanēdash. Ma matses mayan icsan dacuēdmequin dēcatemēntiapimbo yampanu quiash matsesash unēstequid yampanēdash ¹⁵ ma mayan icsan ambi dacuēdmiaido ambi yuaido icboedi matses ěmbi mēnchictequid ma icpanuna.

¹⁶ Ěmbi uaido mayan bēdabo unēstequid icsho mēnchicnu, quenquio yec matsesash Esuquidistu unēspanēdash. Abadauanēn tsyuecquido mēnchicnu, quiash matsespanēdash.

¹⁷ Aden ambi chiapaden nanuec matsespadquid yampanēdash. Adec matsesash matses nēnacpadquiec nēmpañēdash. Abi bundoacpadquiec bundopanēdash. Abi natiacpadquiec natiatequid icpanēdash. Mayan icsan icsamenuequin tanaidbidi icpanēdash. Matses yanash icsaisa yec matses icsaid bedshunash abided cuidadec unēspanēdash matses Nuquin Papan bēdamboen istequid icmenuc. Adecbidi, Matses icsaisa yanabi yec chuibanec Nuquin Papabēd onquetiapimbo iquec, quec matses chuibanec Nuquin Papabēd aidi onquec. ¹⁸ Matsesacsho mayan icsan: Nuquin Papan chiaid niacmenu, quequin tanac niaquesa Esus icpanēdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ěbi dayacquio icmec cho, cac badedquio choquin chieshesa nuqui icmendac.

3

Abi yacno yuedanquidquio icquin Moises dēniacquid Esuquidistu

¹ Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ěbi chuibeneta, cashumbic adembidi ambi matses chuibanec ěbēd onquequid dapa icoata caid Esuquidistu nec, quequin aidquio tantiaquionona.

² Nuquin Papan chiapadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesēn chuided-chuidedampicpaden Esuquidistun adomboembidi chuibanpanēdash. ³ Aidi

Abiambo Yampid yec, Ěbi tantiaquido con shubun icquido nendac, Esuquidistu quiacpadec adecbidi adtiapimbo Moises

icoapampic. ⁴ Nēidted con shubun ëbēdi tabadendac, quequid shubu icbo nec. Aden Nuquin Papan chiapadomboen aton shubun icquido bēdamboequid icmequid Esuquidistu nec. ⁵ Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin min matses chuita, cacpadomboen chuiquid Moises icpampic. ⁶ Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanēdash. Aidēn shubun icquid nebi, qeshun chieshenquiocquin cainquidquio aton shubun icquidquio nuqui nendac.

Chieshenda

⁷ Aton shubun tabadnuequid naden Nuquin Papan Mayanēn ambi chiaid mibi bēdamboen tantiamenuen chieque. Tantiata:

“Nēbimbobi Nuquin Papan chiaid chieshēnenquio yec tabadta.

⁸ Equipito yacnoēsh cuēte nibēdacno capuquin tsusedpabon, ¿Nuquibēdida Nuquin Papa iqueque? Tantiabono, qeshun ambi chiaid chieshēmpampicpaden chieshēnenda.

⁹ Cuēte nibēdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan ëbi cuidpeba?

Isbono, quiapadquiec tsusedpabo icsamboec tabadpampic.

¹⁰ Adec tabadsho isash nēishpondabi.

Ëmbi chiaid chieshēnec ambibi tantiacpadequi icsadenepampic.

¹¹ Adquid icsho isun chushcain: Ëmbi abitedi uabanquin nainash

ëbi tabadacno aitedi puduedmenquio iquembi, quequin chiapadomboen naindambi. Abimbo caimbi,”

quequin Nuquin Papan isadaidbo chiampid nec.

¹² Abiambo Yampid Nuquin Papa abi iquec, quequin tantiash cuēshēdchitomane qeshun tantiadonequiota.

¹³ Nuquin Papan chiapadquiec tabadnuna, quec badiadquidēn-badiadquidēnquiec chuinanec onqueta ma adoac icsamianquidēn chiac Nuquin Papan chiaid chieshēnenquiocpanuna.

¹⁴ Esusbēd icquid nebi, quiondacpaden tantiadenequin caimbudec aton matses yec Esus yacno nidanetequidquio mibi nendac. ¹⁵ Nuquin Papan chiampid utsitsen chuinu. Tantia:

“Nēbimbobi Nuquin Papan chiaid tantesa uampicpaden tantesa uainda.”

16 ¿Tsuntsin Nuquin Papan chiaid tantiashun chieshëmpampic? ¿Equipito yacnoshon bëyucanquin Moisesën buanaido Nuquin Papan chiaid tantiash chieshquido yanenquioda icpampic? 17 ¿Tsutsibidi seta 40ted matamec chiesho isash Nuquin Papa aidtedbidi seta matamec nëishted-nëishtedpampic? Adoac ¿Cuëte nibëdacnoësh icsaquidtedi unësbudnenquioda icpampic? 18 ¿Abitedi uabanquin nainash ëbi tabadacno puduedmenquio iquembi, quequin tsutsi Nuquin Papan chuipampic? ¿Ambi chiaid chieshënquid Nuquin Papan chienquioda icpampic? 19 Ai, tsusedpabon Nuquin Papan chiaid tantiash, Bëdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshënsho Nuquin Papan abi yacno puduedmetiapimbo icpampic.

4

Ëbi yacno puduedash ëbëd tabadtequid quiaid

1 Ëbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuioaique. Abi yacno abëdi ictiapimbo icchitomane quequin Esuquidistu tantiadonequionona. 2 Ëbi yacno puduedash tabadtequid iquendac, quequin ëndenquimboshë Nuquin Papan nuquin tsusedpabo chiampicpadomboen nëbi nuqui chuioaic. Aden ëndenquimbo chuisho tantiash, Nuquin Papan chiaid abimbo iquec, quiash tantienquio yanash, Aid cainu, quetiapimbo tsusedpabo utsi-utsiec yampampic. 3 Ambi chiaid tantiaquidomboen nëbi aibëdi tabadec. “Ënden yampidon tantienquiocsho isash, Abitedi uabanquin nainash ëbi tabadacno chotiapimbo aido iquendac,” quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash tabadpampic. 4 Abi tabadaid chuiquin Nuquin Papan naden dada uamiampique. Tantia: “Seistedec ushquin abitedi uabanash badiad utsin ënash tabadpobi.” 5 Ashumbic nadentsen dada uamiampic: “Ëbi ënash tabadacno ëmbi chiaid chieshënquido chotiapimbo iquendac,” quequin chuipampic.

6 Aden chuimiatic ëndenquimboshë ambi chiaid tantiesa icquin niac-niacquec Nuquin Papabëd tabadtiapimbo icpampid icnubi ambi chiapadomboen naquin caimpamidobëd nëbi nidaid utsi-utsiec icquido Nuquin Papabëd tabadtequid nendac. 7 Ambi tantiacpadën Nuquin Papan chuimiapaden Dabid padon: “Icsachitomane queshun Nuquin Papan chiaid tantiaquiota,”

quequin dada uapampic. ⁸ Chuiquid dapa Dabid tishambocnoc Equipito yacnoësh nidaid Canan yacno abi chuiquid dapa Osuebëd isadaidbo cho-chopampic. Capuec ënëdash nidaid Canan yacno cho-choash isadaidbo ënëdenquio yec tabadte icnuc, Ëbi yacno ënëdenquio yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquio ictsenampic. ⁹ Aden Dabid pado chuimiaid tantiash abi tantiadonequidombo Nuquin Papabëd tabadquido nendac. ¹⁰ Aden uabanquin nainash Nuquin Papa tabadacpadec ambi bëdambo icmenuequin tantiatedi nabanquin nainash aidbëdi tabadendac. ¹¹ Nuquin Papabëd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

¹² Nuquin Papan chiaid ambia chuipampidquio abi iquec. Nadatiambocquin tantiamete ambi chiaid nec. Shocosh siante abiuc daëdi cuënumbocquidën siaid uquëduc sënquin nami icsaid isendac. Adomboembidi Nuquin Papan chiaid chiac papuduedquin matsesën tantiaidtedi uquëduc sënaid isachimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa nëid icnubi mimbi tantiaid utsi bëdambo iquec. Adecbidi, mibi bunaid icsa nëid icnubi mibi bunaid utsi bëdambo iquec, quequin tantiamebanshun mimbi tantiaid icsa mibi bunaid icsabëdtabi ënta, quequin Nuquin Papan chiaidënquio mibi tantiamendac. ¹³ Abitedi isquidquio Nuquin Papa nec. Adquid icquin matses ompodtiapimbocnoc isendac. Adembidi, Ëmbi chiacpadomboenda matsesën nabanoshe. Tantuanu, qeshun, abi yacno tabadnuequin cainquido bëisquioquin ambi nabanaidtedi chuimendac.

Matses chuibanec Nuquin Papabëd onquequid dapa Esuquidistu

¹⁴ Adec Nuquin Papa abitedi isquidquio icnubi icsambocquid icquin ambembi matsesën aid chuitiapimbocsho isun abi tantiaquido chuibanec Nuquin Papabëd onquequid dapa ënden abi yacno dectatonëdaid Esuquidistu nec. Aidi Nuquin Papan Madombo nec, quequin tantiesa yanchitomanes qeshun aidquio tantiaquionona. ¹⁵ Matses chuibanec Nuquin Papabëd onquequid dapa matses yequi natiamiacmaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac niaquenquio Esuquidistun icpanëdash. ¹⁶ Adquid nuqui chuibanec Nuquin Papabëd onquequid dapa iquec, quequin

tantiec dacuëdenquo yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquo icmendac.

5

¹ Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnu, qeshun nidaidën capuquid yua cunesunedequin taudenepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cunesuneshun taudenepampic. ² Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin ³ nidaidën capuquid yua utsi-utsien cunesunedenepampic.

⁴ Aidi, Con matses chuibanec Nuquin Papabëd onquequid dapa icnu, quenquo icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic. ⁵ Adembidi Nuquin Papan, Matses chuibanec ëbëd onquequid dapa icta, caid Esuquidistu iquec. Ëbibi adquid icnu, quenquo Esuquidistu icpanëdash. Aton Papambien:

“Mibi con Madombo neque.

Con shubun icquido mimbi icmiaido chuibanec ëbëd onquequid dapa icta,”

capampic aton Papan Esuquidistu chuiquin. Adembidi Esuquidistu chuioaquin aton Papanquo:

“Matsesash icsaisa yec min utsibo icsaid bedshunash cuidadec unëssh uincuenash matses chuibanec ëbëd onquequid dapa icta,”

capampic. ⁶ Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac.

Adquid yec ënëdenquioctequidquo mibi nendac.”

⁷ Adec, Con Pan chiampicpadquid icnu, quiash matsesasho unës uaqin mëyante nendabi, quequin tantiec shubiec nadpanëdash. Matses icsaid bedshunash cuidadquid

ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiacpadomboen natiadquio iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquio icmepanëdash. ⁸ Nuquin Papan Madombo iquequi matsesacsho mëyanac Nuquin Papan chiacpadomboen tantiabempanëdash. ⁹ Aden tantiabenash matses icsaid bedshunash abided cuidadash Nuquin Papa yacno Yuedanquid yanquioipanëdash. ¹⁰ Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuipampic.

Nuquin Papan chiaid ënden tantiaboedi tantiesa yanenda

¹¹ Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidedi chuitiadquiocquin mibi eme uacsho ¿mitsipadomboentsimbi chuibanquin mibi tantiamepe? ¹² Mibia utsin tantiamiaid icquin ënden tantiabempatecnëdan mibitedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatipimbo mimbi ipec. ¹³ Shuma chishquid bacuëmpi, Bëdamboen nata, quequin chiaid tantiesa nec. ¹⁴ Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabenquidquio yanshun adomboen nabanenec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

6

¹ Aden Esus chuiquin abia tantiamiaid bëdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tantia. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquio icta. ² Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquio icta. Adembidi, Abi tantiesa cuidtequid iquendac, quequin tantiec bëdamboec tabadteneta. ³ Aidedi mimbi tantioc. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. ⁴ Aden Esuquidistu tantiasho isun aton Mayan Nuquin Papan meniaid icboedi

⁵ Nuquin Papan chiacpadomboen nadatiambocquin nabamboed, ⁶ Esus matsesquio yec icsamboquid nepanēdash, quiash, Esus cuesten dectan, quequidbimboecquid icsho Nuquin Papan aid isendac. Aidēn oncain Esus mamēnshunec. Aden Esus tantienquio yanacsho bēdamboen tantiamenuen chuiquin, Icsaobique. Ēbi icsaid ēnu, cametiapimbo Nuquin Papan iquendac.

⁷ Baded-badedquiec ue sequequin nidaid pachi uaidēn tiedēn caniquid caniacsho taneshcaquidēn petequid nendac. Adecbidi Esuquidistu chuibanac abi tantiaquiosho Icbon yuedaido iquendac. ⁸ Echobēd cana shēta chedo ēshē idash dadpen yanushe qeshun nēdēncatequid nendac. Adecbidi icsamboen chiaid tantiaquid uquē nēsiatequid nendac.

⁹ Aden mibi chuiquimbi, Nuquin Papan nēsiatemaid mibi nec, quequin tantiembi. Esuquidistu tantiaquid yec abi tantiaquid utsibobēd tantiananec bēdamboec tabadquin ismequid nec, quequin mibi chuiquin utsibon chioishi. ¹⁰ Adoac abi tantiaquid utsibo tantiaquin mimbi nashundeniaid Nuquin Papan bēpiscudenquiocquin tantiec. ¹¹ Adecbidi utsibobēd tantiananec mibi bēdamboec tabadpashun. Adec tabadash abi yacno puduedsho, Bēdamboen mimbi nabanoc, Nuquin Papan mibi caindac. ¹² Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unēsash Nuquin Papa yacno puduedampicpadec Esuquidistu tantiaquioquin ēnenquiocquin caimbudequi ma Nuquin Papa yacno puduedpanuna.

Naden nanu quec Nuquin Papa muatiapimbo iquec

¹³ Ēndenquimboshē Abadauan bēdamboec tabadsho isun ambia tantiaquidquio abi yampidquibidi icquin, Ēmbibi tianciapadomboen nanuna. Abimbo caimbi, quequin Nuquin Papan naden chuipampic: ¹⁴ “Mimbi tishmiaidēn tsyuecquido dadpen iquendac, qeshun ēmbi chiacpadomboen nabanquin mibi, Bēdambo iquebi, camembi,” quequin Nuquin Papan Abadauan chuipampic. ¹⁵ Aden chuisho tantiashun caimbudquin tishtiapimbocquidēmbi Abadauanēn chidon aton mado tishpampic.

¹⁶ Abimbo caimbi, quequin abitedi tantiaquidēnquio Nuquin Papan chiac utsi, Muenec, quetiapimbo iquendac. ¹⁷ Adembidi, Ēbi yacno tabadte iquendac, quequin ēnden yampidēn Nuquin Papan chiaid chuca uatiapimbo iquebi, quequin Esuquidistu tantiaquido tantiamenuen abimbo caimbi, quequin chuipanēdash. ¹⁸ Adec Nuquin Papa muatiapimbo icquin ambi chiacpadomboen naquidquio Nuquin Papa nec. Adembidi, Ēbi yacno tabadte iquec,

quequin chiaid chuca uatiapimbo iquec. Adquid Nuquin Papa icnuc abi yacno ëbi puduedmequid Esus iquec, quequin caimbudquid nuqui nendac. ¹⁹ Aden caimbudquin, Ënden Nuquin Papa yacno puduedshun ëbi yuedquid iquec, quequin nuqui tantiec. ²⁰ Nuqui caintequid Esuquidistu ënden Nuquin Papa yacno bëyucanec abi tantiaquido chuibanec Nuquin Papabëd onquenuc puduedash Medquisedecpadquid yampanëdash.

7

Medquisedec matses chuibanec Nuquin Papabëd onquequid dapa

¹ Medquisedec nad icpampic, Saden yacnocquido chuiquid dapa nepampic. Ambi Saden cain cuënaidi yuecshun Edusaden cain cuënoapampic. Aidbidi Nuquin Papan, Matses chuibanec ëbëd onquequid dapa icta, caid nepampic. Adquid icquin aton mado bedboedo tsibanshun cuesunish Abadauan chosho bëquedshun, Nuquin Papan bëdamboen isaidquid mibi nec, quequin Medquisedequën Abadauan chuipampic. ² Adsho tantiash, Nuquin Papan con mado bedmiaid nebi, quequin ambi cuesuneboedën na ambi bedboed musuctanquin abi chuibanec Nuquin Papa chiec onquequid dapa Medquisedec Abadauanën menepampic. Bëdamboen tabadmeguid icsho Medquisedec cuëmpampic. Adembidi, Saden yacnocquido chuiquid dapa icquin bëdamboen tabadmeguid icsho Medquisedec cuëmpampic. ³ Aidi aton papabëd aton tita nibëdquid nec. Nëid ushën tishaid nebi, quetiapimbo aid iquec. Abi unëste ushë adquiobidi iquec. Nuquin Papan Madombo aben icquidpadquid Medquisedec nec. Matses chuibanec Nuquin Papabëd onquequid dapa yanash adquiduidquid iquec. Utsi yantiapimbo iquec.

⁴ Aidi ëbi chuibanec Nuquin Papabëd onquequid dapa nec, quequin ismequin ambi bedaid aton na musuctanquin Abadauanën Medquisedec menepampic. ⁵ Yuecquiocshon Nuquin Papan: Min matses chuibanec ëbëd onquequid dapa icta, caid mibi icquin min utsibon aton na musucaid bedshunta, quequin Debi chuipampic. Adoac adquid Debi icash unësan aton tsyuecquid abentse-abentsec icpampic. Debi Abadauanën tsyuecquid yec aton utsibonquid aton na musucaid bedquid icpampic. ⁶ Medquisedequëmbien tsyuecquidpenquid icquimbi Debin tsusedpa Abadauanën na musucaid bedshun, Nuquin Papan bëdamboen isaidquid mibi nec, quequin Abadauan chuipampic. ⁷ Bëdambo mibi icmenu, quequin Nuquin Papan chiaid ambia chuiquid Medquisedec icpampic. ⁸ Yuecshun ambia chuibanec

Nuquin Papabëd onquequid dapapadquiocquin aton matsesën na musucaid bedquid Debi unëspampic. Adecbidi aton tsyuecquido unëspampic. Padnuen Abadauanën na musucaid bedquid Medquisedec unësesa yampampic. ⁹ Adquid icsho Debin buchisio Abadauan caidën, Con tsyuecquid dadpen iquendac, quequin tantiaquin, Con na musucshun menenu, qeshun Medquisedec menepampic. ¹⁰ Aton tsyuecquid tishambocnobi Debin buchisio Abadauan caidën Medquisedec bëquetuidshun menepampic.

Medquisedec yampidpadquid Esuquidistu

¹¹ Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bëdambocquid icmian Medquisedecpadquid choenquoio ictsempampic. ¹² Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabëd onquequid dapa yampanëdash. Debipadquidën Nuquin Papan nadomboen nata cain ëndenquimbo chiaid nadenepampic. Nëbi Nuquin Papan chiaid utsi naquid Medquisedecpadquid Esuquidistu nec. ¹³ Aidpadquid icquin Nuquin Papa nidaidën tabadte shubu uashunaidën puduedshun nambocpanëdash. ¹⁴ Aton tita Uda cuëmëdquidën tsyuecquid icnuc matsesash Udan tsyuecquid Nuquin Icho Esuquidistu nec. Adquid icquin Debipadquidën nadeniampicpaden natiapimbo Esuquidistu icpanëdash. Adembidi ambi tantiaiduidi chiec Moises, Udan tsyuecquid Debipadquid nec, quenquoio icpampic. ¹⁵ Medquisedecpadquid matses chuibanec Nuquin Papabëd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. ¹⁶ Aton matses chuibanec Nuquin Papabëd onquequid Debi unësan Debin tsyuecquid aton matses chuibanec Nuquin Papabëd onquequid icpampic. Adquidpenquoio Esuquidistu yampanëdash. Matsesash icsaisa yec unësash uincuempanëdash. Adec uincuenquid yec unëstiapimbo iquec matses chuibanec Nuquin Papabëd onquequid dapa yanquiopanëdash. ¹⁷ Aid chuiquin Nuquin Papan nadopampic:

“Ënenquiocquin matses chuibanec Nuquin Papabëd onquequid dapa
Medquisedecpadquid mibi nendac,”
quequin chuipampic.

¹⁸ Aden chiambien matses chuibanec Nuquin Papabëd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiacpadomboen nadenequin aton matses icsaisa icmetiapimbo icpampic. ¹⁹ Adoaid Nuquin Papa

yacno puduedtemaid matses icpampic. Nēbien bēyucanec puduedash Nuquin Papa yacno abi tantiaquido chuibanec Nuquin Papabēd onquec tabadec, quequin abi yacno yuedte caimbudec nidaidēn Nuquin Papabēd tabadacimboec nuqui tabadec.

²⁰ Abimbo caimbi. ¿Matses chuibanec Nuquin Papabēd onquenu quec puduedquid ēnēdenquiocnoc mibi icmendambi, Mado, quenquioda Nuquin Papa icpampic? Ai, aden chuipampic. Aden Debi chienquiocquin aton madouidtsēqui chuipampic. Debi unēsan aton tsyuecquid aton matses chuibanec Nuquin Papabēd onquequid dapa icpampic. ²¹ Nēbi Nuquin Papan aton Madombo caic:

“Icho icquin matses chuibanec ēbi chiec puduedoata, mado, quequin abimbo chiemi.

Aden chuiquin chuca uainquio iquemi.

Ēndenquio yampid yec ēbi yacno utsi puduedmenush ēbi chiec puduedash ēnēdenquio yec tabadquid mibi nec, quequin abimbo chiemi,”

quequin chiampicpadec aton Madombo adquid yanquiopanēdash. ²² Adquid yec matses icsaid bedshunash abided cuidadash abi tantiaquido yuedec bēyucanquid Esuquidistu nec. Debibēd aton tsyuecquid adecbidi adquid ictiapimbo iquec.

²³ Debi adecbidi aton tsyuecquido unēstequidquio iquec yuen chuibanec Nuquin Papabēd onquequid dapa ictiapimbo iquec. ²⁴ Esusien abi yacno chuibanec bēyucanec puduedash ēnēdenquio yec Nuquin Papabēd onquequid dapa nendac. Adquid utsi nibēdendac. ²⁵ Adec Nuquin Papa yacno ēnēdenquio yec tabadquin abi tantiaquido chuibanec aton Papabēd onquedenenuc abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

²⁶ Adec aidi abi yacno yuedanquid, icsa nibēdquid, icsa uatiapimbocquid, icsa nibēdquieci yacno tabadquid yec abi tantiaquido chuibanec Nuquin Papabēd onquequid dapa yampanēdash. ²⁷ Debipadquidpenquio yec, Matses icsaquid neque. Nuquin Papan chiampicpaden baded-badedquien nidaidēn capuquid yua cuesunenu, quenquio icpanēdash Esuquidistu. Matses icsaid bedshunash abided unēspanēdash padpidec unēsenquio icnush. ²⁸ Debibēdi abipadquid icsaquid icsho, Min matses chuibanec Nuquin Papabēd onquequid dapa aid icmeta, Nuquin Papan cac Moisesēn Debi adquid icmepampic. Nēbi Medquisedecpadquidien Bēdamboquid icpampid ēbēd onquec ēbi yacno Puduedquid Abentsēcquio mibi iquendac. Abimbo caimbi, quequin Nuquin Papan chiampidquio Esuquidistu nendac.

8

Matses chuibanec Nuquin Papabëd onquec abi yacno puduedquid

¹⁻² Adec Esuquidistu abi tantiaquido chuibanec Nuquin Papabëd onquequid dapa Nuquin Papa tabadacnombobi puduedoash aton Papa Abiambo Yampidbëdquio onquec tabadec. Debipadquidoen aton matses chuibanec nidaidënsnun Nuquin Papa tabadte shubu uashunaidën puduedash auëshquio Nuquin Papabëd onquepanëdash.

³ Con matsesbëdi icsaposh icmanendac, qeshun aid shubun puduednu qeshun umanucshun nidaidën capuquid yua aidon cunesepampic. Adembidi Nuquin Papa tantiaquin menenuequin aton matsesën bë-bëaid bedshun nadenepampic. Esusien Nuquin Papa yacno puduedoanush, Èbi icsaid ëbibi cuidadnu, quenquio yec matses icsaid bedshunash abided cuidadpanëdash. ⁴ Aidi unësabi yec nidaidën tabadnuc Moisesën chiacpadec Debipadquid matses chuibanec Nuquin Papa chiec onquequid icpanëdash. Adquid icnuc nidaidënuësh matses chuibanec Nuquin Papabëd onquequid dapa ictiapimbo Esuquidistu icpanëdash.

⁵ Nidaidën tabadquin Nuquin Papa tabadte shubu uashunaidën puduedshun Debipadquidën nashumpampic. Èndenquimbo Nuquin Papan shubu naden icchitec, quequin abi tabadte shubu uanu, qesho tantiashun: “Macuësh yacnoshon chuibocpadomboen shubu uame,” Nuquin Papan cac Moisesën chuoapampic. Aden chiac Nuquin Papa tabadte shubu uashumpampic. ⁶ Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabëd onquec puduedpanëdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabëd onquec abi yacnombo yuedanquid ictiapimbo icpampic. Esuquidistuen Nuquin Papabëd abia yampid bëyucanec abi yacnombo nidoash abi tantiaquido chuibanec Nuquin Papabëd onquequid yec yuedanquidquio nec.

⁷ Èndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempañdash. ⁸ Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ëmbi chiaid utsi iquendac.

Aid isadaidbo chiendambi. Aidbidi Udan tsyuecquido chien-dambi.

⁹ Aidën tsusedpabo Equipito yacnoshon bëyucamequin
ëmbi chiacpadpenquiocnoc chiaid utsi iquendac.

Ëmbi abia naden nata cain chiaid Isadaidbon chieshënsho
utsibon natiacquin mëyansho isun isadaidbo
mënchicamboccondambi.

¹⁰ Ënden chiaid adquio icnuc:

Nëbi ëbëd tabadmetequid chiaid nendac, quequin isadaidbo
chiembi.

Ëmbi nadomboen nata cain chiaid isadaidbo pausunendambi
tantiate bunquionoc.

Aden tantiamiash aton Papa iquendabi.

Adecbidi adquidquio con matses iquendac.

¹¹ Adoaid Nuquin Papa tantiaquid icta, quesa iquendac.

Abitedi ëbi tantiaquidquio iquendac.

Nëidtedishun ëbi tantiendac:

Nëidic, bacuëbo; nëidic, caniabo; nëidic, tsusiobo aidtedshun.

¹² Aido icsaidtedi padpiden tantienquio yec bëpiscudendabi,"
quequin Nuquin Papan chiaid utsi nendac. ¹³ Chiaid utsi nec,
quequin ënden abia nadomboen nata cain chiaid ënëdendac.

9

Nuquin Papa tabadte shubu uashunaidën puduedshun naid

¹ Nuquin Papan ambi, Ëbi ismequin nadomboen nata
cain chiaid dadpen dada uameshun isadaidbo menepampic.
Nuquin Papan naden ëbi tabadte shubu uashun cacpadom-
boen abi nidaidën tabadte shubu uashumpampic. ² Nuquin
Papa tabadte shubu uashunaid nitsinaid anquënë uaid daëd
icpampic. Baded-badedquiec puduedte anquënë uaidën
tabote dectantebëd pan sante cuate nacnenaid icpampic.
Icsaisa anquënë uaid nec caid niosh. ³ Aid nuntambidi bit-
sipambocquid daëdcashun dectanëdaid shëcuë anquënë uaid
dayun uequid Isaisa Bëdaidquio cain chianiaidquio niosh.
⁴ Aid nuntan bëdambo noadquid sandoshon tauite shocosh
icpampic. Ambobidi cuate dabitacaid shocosh icpampic.
Aid cuesten sauedaid mana caid isadaidbon piampid dayun
uaid icpampic. Aid sauedaid utsi Adonën cuate tiaid dëyucaid
icoapampic. Aid sauedaid utsi cuënote pada uashun Nuquin
Papan nadomboen nata quequin dada uaid icpampic. ⁵ Aid
sauedte matincash tabadquid ambi abi yacnoshon uaid
mayan bëdambocquidbimboecnuc nacnenaid daëd icpampic.
Aid daëd Nuquin Papa icsaisambo bëchomauanquiec nac-
nacquo ismiantequid icpampic. Nidaidën capuquid cuesu-
niaidën intac daseccaid isun Nuquin Papan matses cuiden-
quioctsiash, quequin aidën podon dëcatequin dectanaid di-
adpampic. Aid Icsaisa Bëdaidquio anquënë uaid sanaidtedi
chiombi.

⁶ Aden shubu uashun aidën icquidtedi nambanash icsaisa anquënë uaidën baded-badedquiec puduedquidon Nuquin Papan Moises chiacpadomboen uesquin nabampampic. ⁷ Padnuen Isaisa Bëdaidquio anquënë uaidën setan-setanquiec matses chuibanec Nuquin Papabëd onquequid dapa puduedpampic. Baded-badedquiec puduedtemaid aid nec. Ëmbi con matsesbëdtan Nuquin Papan chiaid niacposh icmanendac, quequin nidaidën capuquid yua cuesuneshun intac bedshun buanec nuntan bitsipamboconoc daëdcashun dectanëdaid shëcuë anquënë uaid dayun uequid Icsaisa Bëdaidquio caidën puduedquid abentsëqui nepanëdash. Unësaidën intac buanenquio yec puduedtemaid aid anquënë uaid nec. ⁸ Adec aid anquënë uaidën puduedquid isadaidbo abentsëqui icnubi Nuquin Papa yacno aton matses puduedte nibëdec, quequin Nuquin Papan Mayanën tantiamete nendac. ⁹ Adembidi, baded-badedquien nidaidën capuquid yua cuesunedenec, Ëbibi bëdambocquid nec, quetiapimbo icpampic. Adembidi aton matses icsaisa icmetiapimbo icoapampic. ¹⁰ Adecbidi, Nëidic petequid nec. Nëidic actequid nec. Nëid nanush mëpamëdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanën nuqui tantiamec.

Esuquidistu abided unësec intac chiuidaid

¹¹ Ambi chiaid utsi tantiamenuec ambi uacmaid yec abipadquid Esuquidistu Nuquin Papabëd tabadboedi nidaidën budash matsesash icsaisa yec matses icsaid bedshunash abided cuidadec unësash Nuquin Papa yacno matses chuibanec aton Papabëd onquequin chuiquid dapa iquec abi yacno Yuedanquid yampanëdash. ¹² Nidaidën capuquid yua cuesuneshun intac bedshun buanec Nuquin Papa yacno puduedenquio Esuquidistu icpanëdash. Aidi abia yampidi icsaisa matses icsaid bedshunash abided cuidadec unësacsho cudan siac aton intac chiuidash Nuquin Papa yacnombo puduedoapanëdash. ¹³ Aidi matses icsaid bedshunash abided cuidadabicnuc nidaidënshun natemaid nasho matses cuëshëdmepanëdash. Adoac utsibëd ictiapimbocsho isun nidaidën capuquid yua cuesuneshun aidën intacbëdta sisapuc daëd uashun daseccac icsaisa icmiabi yequi aton shubun puduedoapanëdash. ¹⁴ Abia abëd yampid unësesa aton Mayambëd iquec Esuquidistu icsaisambo yec, Matses icsaid bedshunash ëbided cidadebi, Papa, quianec unësacsho siac aton intac chiuidacsho isun uincuemiaidën nuqui pauquec ma Nuquin Papan chiacpadomboen nate bunquidquio nuqui icpanueshun. ¹⁵ Adoaidi Nuquin Papan chiaid utsi chuiquin tantiamequid

Esuquidistu icpanēdash. Ĕnden matses yampid icsaidbēdtabi nēbi matses icsaid bedshunash abided cuidadec unēsapanēdash ēbi tantiaquido ēbēdi tabadmenu quiash.

¹⁶ Adnubien abi unēste tantiec, Ĕbi unēsan Ĕmbi chiacpadomboen con na abitedi menebanta, matses quepec. Aden chuiquid unēso isun ambi chiacpadomboen menebanec. ¹⁷ Aden chuiquid unēsabi icnuc ambi chiacpadomboen utsibon menetiapimbo iquec. Icbon na abi iquec. Aid unēsan aidēn na icboedi utsin na yanec. ¹⁸ Adembidi ambi nadomboen nata cain chiaid Moises menequin, Ĕmbi chiaidtedi nadenesho isun Ĕmbi chiacnombo mibi buanembi, quequin Nuquin Papan chuipampic. Aden menequin chiac Moisesēn nadopampic. ¹⁹ Nuquin Papan chuibocpaden chuishun nidaidēn capuquid yua cuesuneshun intac bedshun actebēdta daēd uain cacushun cuēte shubi madquēnaid podo mēsequiabicquid bedshun sedquid piu uaid potaneshun daēd uaboed nēnanshun Nuquin Papan chiaid dada uaidbēdta matses daseccabampampic: ²⁰ “Nēid Nuquin Papan chuibocpaden mimbi natequidquo nec,” quequin ismequin Moisesēmba abitedi daseccabampampic. ²¹ Adoshombic Nuquin Papa tabadte shubu uashunaidbēdta aidēn tabēcaidtedi daseccabampampic. ²² Cuesuniaidēn intac daseccatequid nec. Shubu chedo cuesuniaidēn intaquēn daseccabicquid mishtemaid nec. Adecbidi cuesuniaidēn intac chiuidenquiocnoc matses icsaid Nuquin Papa bēpiscudenquio iquendac.

²³ Nuquin Papa yacnombo puduednush icsaisa unēsendac, quequin ismenuen matses chuibanec Nuquin Papabēd onquec nidaidēn capuquid yua cuesuneshun intac bedshun buanec Nuquin Papa nidaidēn tabadte shubu uashunaidēn puduedpampic. ²⁴ Esuquidistu matses icsaid bedshunash abided cuidadec unēsash nidaidēnshun Nuquin Papa tabadtebimboecnuc shubu uashunaid yacno puduedenquio icpanēdash. Abi tabadacnombo abi tantiaquido chuibanec aton Papabēd onquec puduedash abi tabadec. ²⁵ Ambo puduedash, Matses icsaid bedshunash ēbided padpidec cuidadnu, quenquio yec tabadec. Nidaidēnshun setan-setanquien Nuquin Papa tabadte shubu uashunaidēn puduedquin aton intacpenquio bedshun daseccadenec. ²⁶ Matses icsaid bedshunash abided cuidadec unēsambo yec Nuquin Papa yacno puduedoash padpidec nidaid yacno choash unēsash abuc Esuquidistu puduedoatsiandac. Adenquio iquec matsesash abi unēste ushēnquiobi matses icsaid bedshunash abided cuidadpanēdash nēid nidaid

naimëdbudte anoentsëqui icnuc. ²⁷ Nidaidën icquid unëste ushë abentsëc iquec. Unësacsho ambi naid Nuquin Papan chuitequid ushë choendac. ²⁸ Adecbidi matses icsaid bedshunash abided cuidadec Esus unëste ushë abentsëc icpanëdash. Matses icsaid bedshunash cuidadoanu, quenquio yec aidquio padpidemboec choendac. Abi cainquido abi yacno puduedmenuec choaindac.

10

Abided cuidadec unëste abentsëquënquiobi

¹ Setan-setanquien nidaidën capuquid yua cuesuneshun intac bedshun buanec puduedsho isun matses icsaid bedshunash abided unësash abi tantiaquido chuinuec bëyucanec Nuquin Papa yacnoësh yuedanquidquio choec, quequin nuquin tsusedpabon tantiabempampic. Nidaidën capuquid yua cuesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash. ² Aidënquio daseccaquin matses icsaisa icmiac nidaidën capuquid yua padpiden cuesunenquio ictsempampic. Adecbidi, Icsambocquid nebi, quenquio matses ictsiandac. ³ Aton matses isaisa icmetiapimbocquin setan-setanquien nidaidën capuquid yuaded cuesunepanëdash. ⁴ Adshun yuan intac bedshun daseccaidën matses icsaisa icmetiapimbo iquec.

⁵ Adoquien Esuquidistu nidaidënshun tishac caniaash onquec:

“Nidaidën capuquid yua cuesunenubi ëmbi chiacpadomboen matsesën natiapimbo iquec qeshun yua cuesunete bunenquio mibi iquec, Papa.

Matsesën tishtequid mimbi icmiaidquio nebi, Papa.

⁶ Adecbidi nidaidën capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

⁷ Adsho isun mimbi chuiquin dada uamiampicpadomboen naimbi, Papa.”

⁸ Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinuc ⁹ mimbi ënden nadomboen nata cain chiaid naimbi, Papa, quiash matses icsaid bedshunash abided cuidadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. ¹⁰ Aden Nuquin Papa bunacpadomboen nash unëstiapimbo yanshun abi unëste ushënquio abi tantiaquid paucpanëdash.

¹¹ Aden matses icsaid paucpec, quetiapimbocnoc badiadquiën-badiadquidënquien nidaidën capuquid yua

cuesuneshun intac bedshun daseccaquin icbo icsaidbēdta utsibo icsaid pauctiapimbo iquendac. ¹² Esuquidistuen abided unēsash abi tantiaquido icsaid pauctequid abentsēquiobi iquec aton Papabēdi enēdtiapimbo yec abitedishun icbombo iquec. ¹³ Ambobi tabadquimbi abi chieshēnquido ambi chiacpadomboen naquidquio icmete ushē cainec. ¹⁴ Abided unēste ushēnquio abi tantiaquid ambi icsaisa icmiaid abēd cuēshēdesambo yampanēdash.

¹⁵ Adembidi Nuquin Papan Mayanēn Nuquin Papan chiaid utsi naden chiec:

¹⁶ “Nēbi ēbēd tabadmenun chiaid utsi nendac, quequin chien-dambi.

Aidi aton pabiaten puduedmendambi paucudenquiocnoc.

Adembidi ěmbi chiacpadomboen nate bunquidquio icmen-dambi, quec Icho.”

¹⁷ Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquio yec bēpiscudendabi, queoaic Icho,”

quequin chuipanēdash aton Mayanēn. ¹⁸ Adec abi icsaid bēpiscudash nidaidēn capuquid yua cuesuneta quenquio Nuquin Papa iquec.

Nuquin Papa yacno puduedte cainta

¹⁹ Adoaidi Esuquidistu unēsacsho isun cudan siac aton intac chiuidan, Ambi paucaid nebi, quec dacuēdenquio yec Nuquin Papan shubu icsaisa caid yacnombo puduedte ushē nuqui cainendac. ²⁰ Matsesash abided cuidadec unēsash Nuquin Papa yacno puduedoash tabadquid Esuquidistu nec. ²¹ Ambo nidash Nuquin Papabēd onquequin aton shubun icquido nuqui Esuquidistun chuibanubi, ²² Ambi paucaid ambi dapanacimboecquidbidi nebi, quequin tantiaquin abi yacno choacimboen nidaidēnshun Nuquin Papa chiec onquec tabadnuna. ²³ Nuquin Papa ambi chiacpadomboen naquidquio nec, quequin abi tantiaquid yec abi yacno puduedebi, quequin caimbudnuna. ²⁴ Aden tantiaquin abi tantiaquid utsibobēd tantiananec bēdamboec tabadquin nashununa. ²⁵ Aden nabanec abi tantiaquid utsibobēd iccuededtiapimbo iquebi, utsi-utsiec quiacpadeccadenquio icnuna. Adec iccuededec, Nuquin Papan chiacpadquiec bēdamboec tabadnuna, quec chuinanta. Niacquid dadpen icsho isash, Matsesēn naid chuibanquin cuidte ushē badedquio choec, quiash baded-badedquiec chuinanta bēdamboec tabadte bunec.

²⁶ Ēbi icsaid bedshunash abided cuidadec Esuquidistu unēsapanēdash, quequin tantiash icsaded-icsadedquid iquec,

Adquidquio Esus nec, quetiapimbo iquec. ²⁷ Aid cuidte ushë chonoc nëishun comapenen chushcaindac Nuquin Papan abi chieshënquido nibëdamequin. ²⁸ Nadomboen nata cain Moisesën chiaid niacsho isun daëdshun chiac niacquid unësmiampic. ²⁹ Nuquin Papan abia naden nata cain chiaid niactenequid adomboen cuidnushe quiash ëbi icsaid bedshunash abided cuidadec Esuquidistu unëspanëdash, queboedi, Ëmbi tantiaboed Nuquin Papan Madopenquio matesquio ëbipadquid icsacsho cuesuniac, quequin chieshënsho ¿comapenen Nuquin Papan cuidenquioda icpadic? Adquid Nuquin Papan Mayanën bëdamboequid icmenu quequin chiaid chieshënquid nec. ³⁰ Nuquin Papan: “Ëmbimbo ëmbi chiaid chieshënquid cuidendambi,” quequin chiaid nec, quequin nuqui tantiec. Adembidi: “Abi tantiaquid icboedëmbi tantienquio yansho cuidquidquio Nuquin Icho iquendac. ³¹ Abi cuidantequid dacuëdampambo iquec,” quequin Nuquin Papan chiaid nec.

³² Esuquidistu tantiaquid yanash mibi bëdamboec tabadondacpaden tantiamec chuinandeneta. Esuquidistu tantiabnacchuca icsho chieshëmënquidon mëyanaqui, Esuquidistu tantiaquid nebi, quec dayacquio yec bëdamboec mibi tabadteniondac. ³³ Dadpen tabadnubi, ëmbi tantiaid Esus nec, qesho mibi utsibon mamënshunondash. Adembidi aidon natiambocquin mëyanac. Adomboembidi Esuquidistu tantiaquid utsi mëyansho isun, Aidbëd icquid nebi, quequin ismequin mimbi nashundenepondac. ³⁴ Esuquidistu tantiaquid utsi quënën nauedaid icsho isash abëdi tabadacbimboec natiambanquiec unësquio yec mibi tabadpondac. Adecbidi mibi chieshënquidën mitsana bedacsho isash Nuquin Papan ëbi menetequid ampetiapimbo iquec, quequin tantiec, Bëdambo iquebi, quec mibi tabadpondac.

³⁵ Adoaidi Nuquin Papan bacuë yec bëdambo iquebi, quiash dacuëdenquio yec bëdamboen nabanec mibi ënden dayacquio iccondacpadquiec adquiecbidi tabadteneta. Adquid Nuquin Papa yacno puduedquid nendac. ³⁶ Utsin mëyanaqui Nuquin Papan chiaid chieshenquiocquin tantiadeneta. Adec tabadquin Nuquin Papa bunacpadomboen nabanash abi yacno tabadendac. ³⁷ Nuquin Papan chiaid nadquio iquec:

“Chiata. Nëbien mimbi cainaid mibi mënchictequid choendac.

³⁸ Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. ³⁹ Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

11

Nad iquendac, quequin tantiaquin cainquid

¹ Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenac bimboen ëmbi tantiaid nec, quec tabadquidquo nebi. ² Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

³ Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi nëbi isaidtedi nibëdnuc ¿mitsipadomboentsi aidtedi icmëbampampiba? quenquo nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

⁴ Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bëdamboen isaidquo icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cuesuniambien Abedën Nuquin Papa tantiaquin naid chianetequidquo abi iquec.

⁵ Adnubien adecbidi abi tantiaquidquo Enoc icsho isun Nuquin Papan buanac unësesa icpampic. Bëdambocquid nec, quequin Nuquin Papan buanacsho nibënquin Enoc istuidambocpampic. ⁶ Abi tantiesa icsho isashien, Eëmbi bëdamboen isaidquo nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquo nec.

⁷ Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, queshun, Eëbëd icquid unës uanushe queshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nactempampic. Abi tantiaquin aden nasho Nuquin Papan bëdamboen isaidquo aidquo icpampic.

⁸ Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. ⁹ Adembidi Nuquin Papa tantiec abi

capuacmanombo choash, Con nidaid iquendac, quiash yuedacmaidbimboec quenenenquo yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. ¹⁰ Nuquin Papa yacno ambi tantiampicpadomboen shubu uaidën tabadendabi, quequin cainec quenenenquo yec nidaidën Abadauan tabadtenepampic.

¹¹ Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiapadomboen Abadauanën chidon machobudquioshon aton mado tishpampic. ¹² Adoac Abadauan tsusiobudaidënquo tsyuecquid dadpen uispatedi yampampic. Masitedbidi yanoapampic.

¹³ Aden Nuquin Papan aid nidaid ëbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc queneshash tabadenquo yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. ¹⁴ Nuquin Papa tantiaquid yec Nuquin Papabëd tabadendabi, quiash nidaidën quenenenquo yec aidtedi tabadpampic. ¹⁵ Ëbi tishondacnombo tantiec unësqiuo iquebique. Ambo nidoaibi, quiash nidtsempampic. ¹⁶ Adenquo yec, Nuquin Papa yacno tabadendabi, qesho tantiash, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

¹⁷⁻¹⁸ Mimbi tishmiaidën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiasho isun, Ëmbi chiaid tantiaquidquioda Abadauan neque. Isnu, qeshun, Min mado abentsëc Isac caid cuesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. ¹⁹ Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiaid, obeca bënëded seshun tauipampic aton mado uincuen uaidbimboecquid icnuc.

²⁰ Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau

Nuquin Papan ambi chiacpadomboen nanun bēdambo icmete chiaid chuoapampic.

²¹ Adnubien adembidi Nuquin Papa tantiaquin tsusio budash unēsbudquimbi aton cueste bedash shuebudshun, Nuquin Papa bēdambo iquec, quequin Nuquin Papan ambi chiacpadomboen nanun bēdambo icmete chiaid aton baba Osen bacuē daēd Acobon chuoapampic.

²² Adnubien adembidi Osen Equipito yacno tabadec unēsnnun, Nuquin Papan nidaid menenun nabono, quequin chiaid tantiequi unēsebique. Mibitedi: Aid nidaid yacno nidnu, qeshun con canite buanta, quequin chuoapampic Osen.

²³ Adnubien adembidi Nuquin Papan bēdambo icmiaid con mado nec, quequin tantiaquin aton mado Moises tishun aton titan aton papabēdtambi ompopampic. Equipito yacnocquid ancanquidēn: Isadaidbon chidon dada bacuē tisho cuesuneta, quequin chiaid niacquin dacuēdenquiocquin aton mado adopampic.

²⁴ Adnubien adembidi Nuquin Papa tantiec Moises caniacsho, Ancanquidēn champin mado mibi nec, caqui chieshēnec, Aidēn madopenquo nebi, queoapampic. ²⁵ Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icsho aidobēdtabi ancanquidēn mēyanaid iquendabi, quianec Moises cuēshēdpampic. ²⁶ Yuecshun Nuquin Papa yacno yuedac bēdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesēn cainpampic. ²⁷ Adembidi tantiaquin, Equipito yacnoēsh ēbi nidsho isash nēishun ancanquidēn con matses nidmenquo icpec, quenquo yec Nuquin Papa isacbimboec Moises tabadtenepampic. ²⁸ Yuecash Equipito yacno choashun adembidi tantiaquin, Bēyuec tishaid unēsmetequad ēmbi ēbi yacnoshon uaid mayan bēda ēmbi budmiaid min shubu datamenuen ēmbi chiacpadomboen nabanta, Nuquin Papan cac ambi chiacpadomboen naquidquo Moisesba icpampic. Ambi chiacpadomboen nabanquin nidaidēn capuquid yua cuesuneshun shēcuē cuēmano abiuc daēdi abucbēdta intaquēn ēcnoshcashun nami shuishun pan bidisquesabēdta pepampic. Adoacsho isun Nuquin Papan budmiaidēn datampampic.

²⁹ Adnubien adembidi Nuquin Papa tantiec Equipito yacnoēsh puduanec nidquin Acte Piu potec nidquid podqued nibēdboedi tanunquiocquidēn uesadmiaidēn isadaidbon potepampic. Aden isadaidbon potenubi abēdtambi potenuc abi chieshēnquido Equipito yacnocquido acte chomiaidēn mentoadbudnepampic.

³⁰ Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenad-tanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

³¹ Adnubien adembidi Nuquin Papa tantiaquin Edico yacnocquido cuesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cuesunenquiopec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cuesunianenquiocpampic Nuquin Papa tantienquio yec chiesho Daban matses utsibo cuesunequimbi.

³² Adecbidi Nuquin Papa tantiaquid dadpen icpampic. Nëdic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpeshun Nuquin Papan chiacpadomboen naindac, quequin cainquido icpampic. Abitedi chuitiapimbo iquebi. ³³ Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cuesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquio icpampic. Adquid icsho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimbo noc Nuquin Papan quiuëccac deonën penquiocpampic. ³⁴ Utsin-utsinquien adembidi Nuquin Papa tantiaquid icsho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquiocpiapimbochoedi dayacquiocquid icpampic. Adembidi Nuquin Papa tantiaquin matses utsibon sondado cuesnanuequid choacsho cuemepampic. ³⁵ Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombededtsëcquien cuesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. ³⁶ Utsi-utsien shocosh bucun mëtaneshun quënë n nauedacsho isun mamënsnunquimbi cueshcanten cuesaqui Nuquin Papabëd tabadte tantiec dacuëdenquio yec tsadpampic. ³⁷ Adembidi utsitsen cuënoten seshunepampic. Adembidi utsitsen sënten nacsënsnunepampic. Adembidi utsitsen nidaidën capuquid bitsi nacenaid dasiuidpampic.

Aton na nibēdnubi mēyanaqui Nuquin Papa tantiaquidquio yec aidtedi tabadpampic. ³⁸ Nuquin Papa chieshēnquid ēbēd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shēcuē uaidēn utsi tabadpampic.

³⁹ Aidtedishun, Ēbi yacno mibi chuibanec ēbēd onquequid bēyucanec yuedanquid iquendac, quequin Nuquin Papan chi-aid tantiaquin cainec aidtedi unēsbudnepampic. ⁴⁰ Aidtedi icnubi abi icsaid bedshunash abided cuidadec unēsash uin-cuenash abi yacno nidoash Yuedanquid Abentsēcquiobi Esuquidistu yanabi icpampic adboedēmbi ma nuqui nēbi icquidobēdta yuedpanuna.

12

Aton bacuē Nuquin Papan dayacmenuequin namiaid

¹ Aden Nuquin Papa tantiec chieshesa dadpen icpampic, quequin dada uashō isun ēbi chieshtometequid utsi ēbi icsaidbēdtabi nainquiocquin ēnuna. Adembidi dayacquiocquin Nuquin Papan chiacpadomboen nabanec tabadnuna.

² Esuquidistu, abitedishun icbombo abia yampidquio ēbi chuibanec Nuquin Papabēd onquec bēyucanec abi yacno puduedash yuedanquid nec, quequin tantiaquin aid isacimboen adonona. Aidi, Ēbi yacno matses yuednu, quiash aton Papabēd tabadteneboedi matsesash icsambocquidimbocnuc cuستن dectanac chieshenquio yec unēsacsho uin-cuen uaid yanash aton Papabēdi Icbombo iquec. Aidquio tantiec isacimboec nidaidēn nuquibi tabadnuna. ³ Abi chieshēnquidēn natiacquin mēyanaqui chieshenquiocquid Esuquidistu icpanēdash, quequin aid tantiec ma chieshtoenquio icpanuna.

⁴ Ēbi icsaid padpiden nainquio icnu, queshumbi natiatequid icnuc mimbi ēnambo iccoc. ⁵ ¿Con bacuē cain Nuquin Papan mibi dayacquio icmenuequin chiaid bēpiscudecta icco? Nad iqueque. Tantia:

“Abuido, min Icbon dayacquio icmenuequin chiaid cacuidenda.

Adecbidi ambi natiamianquiopec camiaid icash chieshenda.

⁶ Ambi matiamianquiopec camiaid dayacquio icmenuequin nametequid con bacuēbo nec,”

quequin Nuquin Papan chiampid nec.

⁷ Natiatequid mibi dayacquio icmetequid nendac. ¿Ēbi cudasaidquio con mado dayacquio icmenuequin namebanesa nebi, quecta aton papa icpadic? Padenquio. Ambi: Con

bacuë nec, caid natiatequid icnuc, Dayacquio icmenu, quequin ancaquin chono uaic. ⁸ Natiatequid icnuc ambi dayacquio icmenu quequin namiaidpenquio yec, ambi, Con bacuë nec, caidpenquio mibi nec. ⁹ Ęnden dayacquio icmenu quequin mibi ancaquidën mibi tishmequidën chiacpadomboen natiatequid icnuc naquidquio mibi icpondac. Nëbi Nuquin Papan dayacquio icmenu quequin chiacpadomboen natiatequid icnuc naquidquio icnuna abëdi tabadnuen. ¹⁰ Abi tishmequidën ambibi tantiacpaden dayacquio icmenu quequin aton bacuë yuen nametiapimbo iquec unësendac. Padnuen Nuquin Papan abipadquid icsaisa icmenu quequin natiaquionoc nuqui namendac. ¹¹ Adoac nuqui natiaquieci tabadec. Adoaidi yuecash nuqui bëdamboec tabadendac. Adecbidi natiatequid icnuc dacuëdënesa nuqui yanec. Adecbidi Nuquin Papabëd icquid nebi, quequin tantiaquidquio yec natiatequid dacuëdënesa nuqui yanec.

¹² Aden tantiec dayacquio ictiapimbochoedi: Abipadquid iquendabi, quiash dayacquio yec tabadta. ¹³ Adenuidi naic tabadquin utsibo isme ma dayacquio ictiapimbocquin ni-quec cuëshëdte bumboedi bëdambo yampanuna.

¹⁴ Aden naic tabadec utsibobëd bëdamboec tabadnu, quiash adec tabadta. Adecbidi Nuquin Papa icsaisa yacpadquieci nuquibi icnuna, quiash aid tantiec tabadec isnanec chuinanec adquid yanta. Adoesa Icbobëd tabadtiaimbocquid nendac. ¹⁵ Nuquin Papan bëdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bëdamboec tabad, quequin chuiban. ¹⁶ ¿Ada aton chidopenquio chudquid icpec? Adecbidi, ¿Ada adembidi aton bënëpenquio chudmequid icpec? quequin isnuequin adquid istuidshun Nuquin Papan chiaid chuiquin bëdamboen tabadmeta. Adembidi, Esaupadquid icnushe queshun ¿ada Nuquin Papan bëdamboen tantiaid chieshënquin isuidquid icpec? queshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unësnun tsusio icquin con pan bëdamboen tantiaid chuisho mimbi tantiata, quequin aton papan bëdambo icmenu quequin chiaid chieshquin Esaun tantienquiocpampic. ¹⁷ Yuecshun, Aton utsi Acobo aton papan chuibanosh, quesho tantiash shubiquin, Mimbi bëdamboen tantiaid ëbitsen chui, papa, cac chuitiapimbocquidëmbi, Ęnden nibëdquiocnoc uesquin min utsi chiombi, quequin Esau chuipampic aton papan.

¹⁸ Adembidi, Nuquin Papan nadatiambocquin uabanaid tsusedpabon isampicpadomboen mimbi isabicoc. Macuësh

Sinai caid yacno choshon aidon isbenampid nëid iquec: natiā nēdēnquedote; utsibic, inchēshac bimboec isadquid; utsibic, cunquequid dapabimboec isadquid; ¹⁹ utsibic, shocosh shoncaten shoncac bimboec onquenuc pabiate paēmboeshē icpampic. Adec onquesho tantiashun, Papa, mibi onquesho tantiac dacuēdampambo iqueque. Mibi chuitequid Moises icme, capampic. ²⁰ Adec macuēsh yacno mbo icquin: “Ēmbi nadatiambocquin uabanaid ismenubi macuēsh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. ²¹ Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queoapampic Moisesen uēdēquec.

²² Mibien dacuēdenquo yec Macuēsh Sion cashumbic Edusaden Chuca Bēdambocquid caid Nuquin Papa ēnēdesambo tabadacno choac bimboec mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ēmbi nashunaidtedi, Esus tantiaquid chotequid iquec, quiash bēdambo iquebi, quec cuēdēdonec tabadendac. ²³ Abi tantiaquidtedi Nuquin Papan bacuē icbo yacpadquiec aton shubu abentsēquēnuēshi Icbobēd onquec ēnden mibi taēpoc. Aidi mimbi naid cuidquid ambi chiacpadomboen nadenequid mibi unēsesa icsaisabidi icmequid Nuquin Papa nec. Aidbēd ēnden tabadac bimboec abēdi onquec mibi taēpoc. ²⁴ Abēd icquin Nuquin Papan ambi ēnden chiaid ēmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ēnden mibi onquepoc. Mibi icsaid bedshunash abided ciudadec unēsō isun cudan siac intac chiuidnēdaid tantiec aidbēdi mibi onquepoc. Abedēn nidaidēn capuquid yua cunesuniampicpadquidēn intac chiuidec unēsaid tantiec Icbobēd mibi onquetiapimbo iquec.

²⁵ Nuquin Papan chiaid niacchitomane quequin isquiota. Macuēsh Sinai yacno choquid Nuquin Papan ēnden chiaid chuiquid tantiate bunesa cuidpampic. ¿Adembidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? ²⁶ Ēnden Macuēsh Sinai yacno Nuquin Papan chiacnoshonquo nidaid ishcampampic. Nēbien: “Padpidemboen nidaidbēdta abu ēnēdmenuen ishconoaindami,” quec Nuquin Papa. ²⁷ Aden chuiquin ambi uaidtedi ēnēdmenuen padpidemboen ishconoaindac abi yacno choaidtedi icsaisa icmiaido yec ēnēdtiapimbo iccuedednuc.

²⁸ Adoaidi Nuquin Papabëd abi tantiaquido ambi bëdambo icmiaido yec abëd tabadte ëntiapimbo noc Nuquin Papan nadatiambocquin nabanaid tantiec cuëdëndonec tabadta. ²⁹ Nadatiambocquid Icsaisabidi icquin aidëmbi, Esuquidistu tantiaata, quequin nëbi chiaid tantiesa chian anëdënquequid nësecaindac.

13

Nadomboen nata cain chiaid

¹ Esuquidistu tantiaquid yec aid tantiaquidtedi con utsibo nec, quiash tantiananec nashunanta. ² Adembidi Nuquin Papa yacnoësh choquid abi tantiaquido nashuntequid ambi uaido mayan bëdabo chosho yuedampicpaden mimbi isacmaidquio Esus tantiaquid chosho yuedta. ³ Adembidi quënën nauedaid iquec utsi iste buntsiabi, qeshun quënën nauedaid istan-istanta. Adecbidi buntsiabi, qeshun menetan-menetanta. Adembidi utsin mëyanaid tantiec shubioata.

⁴ Adec tabadec con chidopenquio chudnu qesa iquec chido utsi isuidquid icta. Adesa icsho Nuquin Papan mibi cuidendac. ⁵ Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bëdambo iquebi, quec tabadta. Adec tabadquid Nuquin Papan ënden dada uamiampid naden chiec:

“Mibëdi iquebi.

Nianenquiocquin mibi dayun uanuna.”

⁶ Adsho tantiash:

“Con Icbombo ëbëdi iquendac.

Aidëmbi ëbi cudasquin dëcatiac chieshëmënuquid
dacuëdënenquio iquembi,”

nuqui quendac. ⁷ Adembidi nidaidën icquid mibi chuiquid dapabo Nuquin Papan chiaid mibi tantiamenuequin chuiquido bëshunenda. Aido Esus tantesa uainquio yec bëdamboec tabadpanëdash. Aido tanec bëdamboec tabadoata. ⁸ Con Icbombo Esuquidistu nec. Abia Yampidquio yec nëbi adquibidi iquec. Aidi ënëdtiapimbo yec abi tabadec.

⁹ Adquid Esus icnuc Nuquin Papa chieshënquidën chuisho tantiesa icta. Aidën naden chiec, Nëid petequid icnubi nëid utsi petemaid nec, quequin chiec. Mimbi piaidën mibi bëdambo icmetiapimbo iquec. Padnuen matses icsaid bedshunash abided cuidadquidën, Nuquin Papan madonquio paucaid iquebi, quequin tantiaquidquio icsho isun Icbobëd tabadmequin ambi bëdambo icmiaidquio nendac. ¹⁰ Matses icsaid bedshunash abided cuidadash uincuenash abi tantiaquidbëd ënëdenquio yec tabadquid Esuquidistu nec. Adec tabadquid Esuquidistu icnubi, Matses icsapash,

qeshun nidaidën capuquid yua cunesuneshun nibëdquiocnoc tauiaidënquo matses Nuquin Papabëd tabadmetiapimbo iquec. Adembidi aidënquo nuqui icsaisa icmetiapimbo iquec.

¹¹ Isadaidbo icsapash, qeshun nidaidën capuquid yua cunesuneshun aidën intac bedshun, Nëid intac Icsaisa Bëdaidquo anquënë uaid nuntan buanshun daseccacsho isun abi yacno puduedacbimboecsho Nuquin Papan isadaidbo isec, qeshun nuntan buanshun daseccapampic. Adnubien matses nibëdacno nami buanshun uesquin tauipampic.

¹² Adembidi matses tabadenquo yacno Esus buanshun dectanac unësacsho siac aton intac chididiepanëdash nuqui icsaisa icmenuec.

¹³ Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaqui chieshenquo yec tabadta. ¹⁴ Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquo nuqui nendac.

¹⁵ Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna. ¹⁶ Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

¹⁷ Ambia Esus tantiashun chuiquidon chiacpaden nabanta. Nuquin Papan, Ëbi tantiaquid utsibo isbanta caid icquin aido Nuquin Papan, Icsambo iquec, canushe qeshun isted-istedec. Aidon chiacpadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquo.

¹⁸ Chieshenquiocquin ëbëd icquid Nuquin Papa chui. Bëdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc. ¹⁹ Adembidi ëbi tantiaquin Nuquin Papa chuidoneta. Mimbi adonoc badedquo mibëd iquendabi.

²⁰ Adembidi utsibëd bëdamboen tabadméquid Nuquin Papan aton Mado matsesacsho utsibon unës uashun siacsho isun uincuemiabac bëyucanec abuc puduedoash abitedishun Icbombo nec. Abi tantiaquido chuinen yuedquid aidi Nuquin Papan icmepanëdash. ²¹ Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ëbi puduedmenuen Nuquin Papan naid nec, quequin ënenquiocquin chuiquid ma icpanuna.

²² Mibi tantiamenuen ëmbi dada uaqin chiaid daëdpactsëcquio icsho bëdamboen isec onquequin tantiadoneta.

²³ Nëbi utsi chiembique. Tantia. Timoteyo quënën naued-boedi nëbi puduemiac aid badedquio nëmbo choan aidbëdi mibi yacno nidendabi.

²⁴ Mibëd icquid Esus tantiaquid utsibobëdta mibi chuiquidtedi tantiec tsadebi quequin Pabadon dada uaosh, quequin chuita. Adecbidi ëbitsen tsadebi quequin chuiota, queoapec nëuësh Itadia yacno tabadquido.

²⁵ Nuquin Papan bëdambo icmiaid ma mibitedi icpanuna. Padi. Aidtedi dada uaombi.

SANTIACON DADA UAID

¹ Santiacon nebi. Nuquin Papan namiaidquio, Nuquin Icbo Esuquidistun namiaidquiobidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

Natiametequid

² Utsibo, mibi u tabadnuc mibi nēnaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuishon quec, Chieshenquiocquin nainembi, quiacpadquiec adecbidi tabadoata.

³ Adaid icnuc, ¿Ëbi tantiaquidquioda neque? Isnu, quequin, Nuquin Papan ëbi dayacquio icmec, quequin tantiec adecbidi tabadoata. ⁴ Aden tantiec tabadsho isun bēdamboec tabadte uesquin tantiabenquidquio mibi icmendac ma Esuquidistupadquid yampanueshun.

⁵ Mimbi tantienquio yaid Nuquin Papa chuita. Aden chiquien, Ma tantianu, queshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. ⁶ Ëbi tantieme, queboedi, ëbi tantiamenquiocpec quequin tantienda. Ëbi tantiemepec queboedi padenquio yanec cuëshēdec capuidequi yamec. ⁷ Adquid Nuquin Icbon pausuntiapimbo icpec. ⁸ Adquid, Nuquin Papan ëbi tantiamec, queboedi capuidequi icquidbimboec icpec.

⁹ Shubu abentsēquēn tabadacpadquiec tabadquid icta. Adec tabadec mitsana daēdpactsēc icquid yec, Con na daēdpactsēc iquiec, quequin mitsanauidi tantienquiocquin naden tantiata. Nuquin Papan bacuē nebi. Abēdi cuëshēdenquio yec tabadebi, quequin aiduidtsēqui tantiec tabadteneta. ¹⁰ Aton na dadpen icquidombien aton na bēdiactsec tantiaquin naden tantiendac: Con na nēidic chodquec; utsibic chiuidec. Adecbidi con nami shēnibudequi Nuquin Papan bacuē nebi. Abēdi cuëshēdenquio yec tabadebi quequin tantiec tabadta. ¹¹ Tanunquiocquidēn tiedēn caniquid unēsec podo tididiquec. Bēdamboeboedi nibēdquiec. Adquiecbidi icbo aton nabi bedbanequi aton nami shēnibudequi unēsec. Icbo icboedi icbo ictiapimbo yanec. Adec icbo ictiapimbo yanebi, quequin mitsana comapenen tantienda.

¹² Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bēdambo icmiaid nendac. Adquiecbidi, Ëmbi chiaid niaquenquio yec mibi tabadsho isembi. Ëbēd icquid mibi

neque. Pudued. Nēuēshquio mibi unēstiapimbo iquec, quendac Nuquin Papa. ¹³ Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. ¹⁴ Nidaidēn tabadquidien icsate bunec abibi icsaic. Adecbidi ambibi tantiacpadec icsaoaic. ¹⁵ Icsamane quequin tantienquio yec unēsacsho abi yacno puduedmenquiocquid Nuquin Papan uquē nēsecaindac adquid.

¹⁶ Utsibo, Nuquin Papan chiaid chieshēnesa nebi, quec mibibi mua uadenda. ¹⁷ Nuquin Papan pausunaid bēdambouidi iquec. Utsi uaquin namiantiapimbo iquec. Adenuidi namec. Adquiouidi Nuquin Papa iquec. ¹⁸ Ēmbi chiaid tantiaquidquo icsho con bacuē nec, caimbi, quequin Nuquin Papan tantiapampic. Aden tantiaquin Nuquin Papan abi chuidonequidquo aton Mado Esus nidaidēn budmepadenec. Adec budash nidaidēn capusho isash abēd ichoedo abi tantiaquido nuquitedi nec. Adquid icsho ambi bēyuc bacuē icmiaido, con nabo cain, Nuquin Papan cuēmbanoshi. Aden ambi bēyuc bacuē uaido icquin chuibanac ma tantiaquidquo dadpen yampanuna.

Nuquin Papan chiaid tantiaquin nabanta quiaid

¹⁹ Nēid bēdamboen tantiata. Chuinu. Nuquin Papan chiaid bēdamboen tantiaquid icta. Ambi chiaid bēdamboen tantienquiocquid aid badedquo chienda. Adecbidi badedquo nēishenda. ²⁰ Badedquo nēishquidēn Nuquin Papan chiapadquiec bēdamboec tabadaid ismesa nec. Adquid, Bēdamboen mimbi naoc, Nuquin Papan catiapimbo iquec. ²¹ Bēdamboec tabadesa icquin mimbi icsamboen tantiacpadenaid ēnquiota. Aden ēnu quiash, Icsaobique. Mimbi chiaid tantiaquiono. Ēbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquo yec cuēshēdenquo yec abēdi mibi iquendac.

²² Nuquin Papan chiaid tantiashun nainquo yequi Nuquin Papan chiaid bēdambo iquec, quec mibibi mua uadenda. Nuquin Papan chiaid tantiabocpadomboen nabanta. ²³ Nuquin Papan chiaid tantiashun naisa isnanten ²⁴ bēisadash bēpiscudacimboec bēpiscudendac. ²⁵ Padnuen Nuquin Papan nēbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuē caimbi, quequin Nuquin Icbon chiapadomboen nabanec tantesa uainquiocquid adquid nendac. Aden tantiaquin nabanquid Nuquin Papan bēdambo icmendac. ²⁶ Padnuen, Nuquin Papan chiaid tantiaquid nebi, queboedi ana bēdamboen oncamesa abibi onquequid nec.

Adquid, Esus tantiaquid nebi, quequin ambibi tantiaquin icsamboen chuiquid nec. Abipenquo chuiquid nec. Adquidbidi bēdamboec tabadaid ismesa nec. ²⁷ Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsēcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsēcquido tantiaquin nashunoatiad. Adembidi niante machobo utsin bedabi samēdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Ēmbi chiaid tantiaquin naquidquo nec. Con Madopadquidquo icsaisa nec, quendac Nuquin Papa.

2

Nēid bēdambo iquec. Nēidien icsambo iquec, quesa icta quiaid

¹ Utsibo, Nuquin Icho Esuquidistu Bēdaidquo nec. Aid tantiaquid mibi nec. Adquid icquin, Nēid bēdambo iquec. Nēidien icsambo iquec, quenquiocquin icsamboen nainquiocta. ² Mibi iccuededacno Esus tantiaquid mimbi isacmaid choec. Abentsēc bēdaidquo dasiuidash nac-nacquiocquid mēsiuidquid puduednubien utsi icsactsēcquiocquid dasiuidtsash puduedec. Aid daēd chosho isun ¿mitsipadentsi mimbi tantiapatsia? ³ Bēdaidquo dasiuidquid isun naden mimbi tantiatsiac: Bēdamboquid nec. Aton na dadpen icquid nec, quiacbimboen, Tsusion dayunquo tsadec cho, quequin mimbi aidi tsadumpec. Adshumbic, icsactsēcquiocquid dasiuidquid isun, Aton nain nibēdchitec, quiacbimboen uano tsad mimbi caoapec. ⁴ ¿Nēid icsambocquid nec. Nēidien bēdamboquid nec, quiacbimboen Esus tantiaquid utsibo mimbi tsadunenquioda ictio? ¿Aton na tantiaquin adoenquioda ictio? Aden naquin bēdamboen tantiaquin naisa mibi neyoc.

⁵ Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ēbi isec, quequin tantiec aidi tsadpec. Aidbidi Nuquin Papan tantiaid nec. Aidi Esus tantiaquid yec abi yacno puduedtequid iquendac. ⁶ Aidi bacuēbimboecnuc mimbi uano tsadumpec. ¿Utsibic tsusio dapabimboecnuc mimbi dayunquo tsadumbocpadquidēn utsin-utsinquien chono uashun mibi daēdpactsēc menenquioda ictiosh? ¿Adquidon mua uain chuiquin mibi utsi-utsien quēnēn nauedmenquioda ictiosh? ⁷ ¿Adoanquidēn baded-badedquien Esus quec onquequin mamēnshunenquioda ictiosh?

⁸ Nuquin Papan chiaid nad iquec: “Utsin naden ëbi nashuntiadquio iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bédambo icpec. ⁹ Nëid bédambo iquec. Nëidien icsambo iquec, quiacbimboen naquid icnuc Nuquin Papan chiaid niacquid mibi iquec. ¹⁰ Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. ¹¹ “Mimbi inacmaid chudenda,” quequin Nuquin Papan chiaid nec. “Utsi cunesunenda,” quequin ambi chiaid utsi nec. Min chidouidi chudquid icquimbi utsi cunesunquid mibi iquec Nuquin Papan chiaid niacquid mibi nepec.

¹² Mibi tantiaquin mibi icsaid pauquec Esuquidistuded icsambocquidbimboec yec unëspanëdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bédamboec tabadta. ¹³ Esuquidistu tantiaquid utsi icsambocquid nec quesa icta. Èbi icsaid Esuquidistun paucac. Adomboembidi abi tantiaquid utsi icsaidbidi paucac quequin bédamboen naban. Icsambocquid nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Èbëdta Esuquidistun paucaid nec quequin utsi tantiaquin nashumënquid icquin icsambocquid nec quiacbimboen icsamboen nashuntiapimbocquid mibi nec.

Esus tantiaquid nebi quequin ambi tantiacpadomboen nabanquin isme quiaid

¹⁴ Utsibo, Nuquin Papan bacuë nebi, queshun ¿Icbon chiaid nainquiocquinda utsi bédambo mimbi icmepadi? Padenquio. ¹⁵ Esus tantiaquid abi dasiuidtebëd pete nibëdquid, Bec cho, quesho ¹⁶ menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bédambo icpadic? Padenquio. ¹⁷ Adembidi, Nuquin Papan bacuë nebi, queshun Icbon chiacpadomboen naisa Icbon bédambo icmiaidpenquio nec. Nuquin Papan bacuë nebi, queshun naisa Nuquin Papa yacno puduedtiapimbo icoaic.

¹⁸ Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daëdshun tantiacpadomboen mimbi tantieque? Chui. Tantianu, quequin mimbi chuitsiac.

Adoaqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid

mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusën chiacpadomboen naquin mibi ismembi, caimbi. ¹⁹ Nuquin Papa Abentsëcquiobi iquec, quequin mimbi tantiec. Aden tantiaid bëdambo iquec. Adembidi, Nuquin Papa Abentsëcquiobi iquec, quequin mayan icsatedishun tantiaoaic. Aden tantiaquin niacquido yec uëdëquec.

²⁰ Icsamboen mimbi tantieque. Tantia. Chuinu. Nuquin Papa Abentsëcquiobi iquec, qeshun Icbon chiacpadomboen naisa yec, Icho tantiaquid nebi, quetiapimbo iquec. ²¹ Nuquin Papa tantiembi, qeshun ambi chiacpadomboen naquidquio icpampid chuinu. Tantia. ¿Abadauan ëbi tantiaquidquioda neque? Tantuanu, qeshun, Min mado abentsëc mibi cudasaidquio ëbi tantiaquin cuesuneshun tauita, cac Abadauanën Nuquin Papan chiaid niacmane qeshun tauinuequin aton mado abentsëc setsempampic. Chështempi sanandosho isun, Padi. Chën. Ëmbi chiacpaden nanuesho mibi bëdambo iquec, quequin mibi bëdamboen isembi, ¿quequin chienquioda Nuquin Papan icpampic? ²² Abadauan Nuquin Papan chiaid cacuidenquio yec, Con Icho Nuquin Papa nec, quec abi onquiapaden ismepampic. ²³ “Mimbi tishmi-aidën tishmiaid dadpenquioshë iquendac,” quequin chiondashumbic Nuquin Papan yuecshun adembidi: “Min mado abentsëc cuesuneshun tauita,” quequin chuioaqui, Nuquin Papa abimbo chuiquidquio nec, qeshun ambi chiaid niacchitomane quequin, Abadauanën aton mado abentsëc setsempampic. Adosho isashien Nuquin Papa, “Ëbi tantiaquin naquidquio Abadauan nec. Adquid con matsesquio aidi nec. Aden aidi tantiaquin ëmbi yuecquiocshon nanuequin tantiaid Abadauan chiembi,” quepampic Nuquin Papa.

²⁴ Nuquin Papan bacuë nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuë nebi, qeshun ambi chiaid naisa niacquid nec. ²⁵ Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmëdquid, dada dadpen chudmequid icpampic. Isadaidbon Icho nadatiambocquid nec, qesho tantiashien, Adquid abu nidaidbëdta aidënquiocquid Icbobidi nec, quequin Daban tantiapampic. Aden tantiaquin Daban matses cuesunenuequido isadaidbo abia puduedquin isquid chosho, Nadatiambocquidën matses nec, qeshun abi yacnouidtsëqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbëd icquido cuesunenquiocpec, quequin

Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedën chuibocpadquiobi Dababëd icquido cuesunianenquio yec isadaidbobëd icquidobimboec isec tabadpampic. ²⁶ Nuquin Papa tantiaquid Daba yanshun bëdamboen nasho isun mënchicaid Nuquin Papan con matses caidbëd tabadpampic. Padnuen, Esus tantiaquid nebi, qeshun Icbon chiacpadomboen naisa cuëshëdachimboec tabadec.

3

Anan icsamboen chiec onquiaid icsa ënta quiaid

¹ Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. ² Chuibanquidtedishun chua-chuatsëquien chuibantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquio adquid nendac.

³ Cabayo anëshquin dëchëdëdcash uidën uash tsadquin nidmec. Aden uidën uaquin bidiacmec. ⁴ Adembidi uncaten cano dapa tsibidiacoaic. Cunquequidën comapenen bëcunetiadquiocnobi adembidi icbon nidmec. ⁵ Cabayo canobidi nua icnuc abi bidiacmete aniactsëc iquec. Adecbidi icbo nua icnuc aton ana aniactsëc iquec. Aniactsëcquidi oncamequin icbon ambi naid dadpen comapenen chuibanec. Adembidi oncamequin onquiaid icsa chuibanec. Nëdënquiaid dëtsisidash badedquio nidachimboec onquiaid icsa badedquio nidoaic. ⁶ Ana onquiaid icsa chuibanacpaden nabanec adecbidi icsabudquieic icbo. Adquid mayan icsan yua iquec adequi icsate bunec.

⁷ Nidaidën capuquid podochoquidbidi matsesën yuampicpaden abi yuaid iquec. Yua quenesh cuenenquiocquid. ⁸ Ad yenquio ana iquec. Quenenenquio yec ana onquebudec. Onquiaid icsa adecbidi ënëdtiapimbo iquec. Ana onquiaid icsa tantibanec adecbidi icsabudquieic tabadendac.

⁹ Nuquin Icbo bëdambo iquec, qeshumbic ana icbon, Nuquin Icbon uaid matses icsambo iquec, quequin chuibanoaic. ¹⁰ Ana shëcuën utsi bëdamboen chuishumbic utsi icsamboen chuioaic. Aden nuqui chienquio ictiad. ¹¹ ¿Acte batapenquiocquid choaidënuësh batambocquidta chopadic? Padenquio. ¹² Adecbidi ¿cuëte bacuë batambocquidën ëshë bëchi chopecta dëyuctic? Padenquio. Adecbidi, ¿Isitodo dataniadaidën bacuë batambo yecta dëyucpadic? Padenquio.

Aidi adesa yacpadquieq Esus tantiaquidën ana shëcuën utsi bëdamboen chuishun utsi icsamboen chiesia ictiad.

¿Tsutsi Nuquin Papan chiaid tantiabenquidquio icpec? quiaid

¹³ ¿Tsutsi Nuquin Papan chiaid tantiabenquidquio icpec? Adquid yec comapenen Esus tantiaquid nebi, quenquiocquimbi bëdamboec tabadquin ismequid utsi-utsien ma icmebampanuna. ¹⁴ Utsin tantiamenushe queshun ëmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. ¹⁵ Adembidi, utsin dëniacnushe queshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. ¹⁶ Aden aidën icsamboen tantiacpadomboen abëd icquidon adomboembidi tantiec. Aden tantiec, Utsi dëniacnu, quiash utsi-utsiec dëniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquieq. Ad icnuc icsateuidi bunquid yampec. ¹⁷ Nuquin Papan tantiacpadomboen pausunaid ad yenquio iquec. Ambi tantiacpadomboen pausunaid yec utsibëd bëdamboec tabadquid iquendac. Adembidi utsi tantiaquin nashunquidquio icoaindac. Adembidi ëbëdtan nabanec cho cac nabanendac. Adembidi, Icsambocquid nec, quenquiocquin bëdamboen nabanquin ismendac. Adembidi, Esus tantiaquid nebi, abi quiacpadomboen bëdamboen naic. Adecbidi utsibo chiec muaisa nendac. ¹⁸ Ambia tantiaquid utsibëd bëdamboec tabadquin ismiac adecbidi utsibëd bëdamboec tabadquid dadpen yanendac.

4

Ëbi nua pausun, quequin chiasch Nuquin Papan dayunquio tsadta quiaid

¹ ¿Atotsi quiash Esus tantiaquido cuididianante buncuededpec? Mibi icsate bunacpadequi mibi cuididianante bunec. Aiduidquio tantiabudequi mibi chushcanancuededec. ² Nëid bunebi, queboedëmbi bedtiapimbo yanquin mimbi cuesunec. Adecbidi, Utsi dëniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. ³ Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

⁴ Mimbi inaiduidi chudenquio yacpadquiequi Nuquin Icbouidi tantienquio yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshënquid nec. ⁵ Adenquiocquin Esus tantiasho isun aton Mayan Nuquin Papan Esus tantiaquidtedi meniac bëdamboec

tabadec. ¿Atotsieshun Esus tantiaquid aidi menepec quepecta mibi ique? Nad iqueque. Tantiata. Chuinu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? ⁶ Aidëmbi abi chieshenquo yacpaden tantiamebanac icsamane quiash chieshenquo yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Ëmbibi bëdamboen tantiatiapimbo iquebique. Ëbi tantiame, Papa, qesho Nuquin Papan nua pausunac aton icbo chieshënenquiocquid iquendac adquid.”

⁷ Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquo tsadacimboecquin ambi chiaid tantiata. Nuquin Papa chieshënuquid mayan icsan yuadenda. Adquidën yuatiapimbo iquebique. Nuquin Papan chiaidquo nabanu, qeshun nabanuc mayan icsa cuenendac. ⁸ Aton dayunquo tsadquidbimboecquidbëd tabadquidquo Nuquin Papa nec. Icsash uano tsadquid icboedi bëchishash acten dapanudacimboen mimbi tantiaid icsa ënta. Adash, Tantiatid bëda pausumenu, quiash Nuquin Papan dayunquo tsadacimboecquin chieshenquiocquin ambi chiaiduidi tantiadeneta. ⁹ Aden tantiec tsadboedi, Ëmbibi tantiembi, quec Nuquin Papa chieshënuquidën dayunquo uano tsadashic, Con Icbo tantiec unësquo iquebi, quiash shubiec mamënenquo yec tsadta. Mibibi uano tsadquid yash unësacimboec icboedi choec isadcuenacimboec Nuquin Papan dayunquo tsadacimboec yec chieshenquo yec bëdamboec tsadoata. ¹⁰ Uano icboedi choash, Ëbibi icsaobi. Nëbi icsate bunenquo iquebi. Mimbi chiacpadiadquo iquebi, Papa, quequin chui. Aden mimbi chuisho tantiash, Puduedash nëmbo ëbëd tsadacimboec mibi yanoaic, quependac Nuquin Papa.

¹¹ Utsibo, Esus tantiaquidtedi min utsibimboecquid nec. Mibëd icquid icsamboec chuinanenquo yacpadquiec Esus tantiaquid utsibëd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacimboecquid nec. ¹² Nuquin Papa Chuiquid Dapa Abentsëcquiobi iquec. Ambi chiacpaden naquidquo nec. Nuquin Papa abitedi Isquidquo Abentsëcquiobi nec. Aden isquin: Nëid icsambocquid nec. Nëidien bëdambocquid nec, quequin Chuiquidquo abentsëcquiobi aidi neoaic. Adquid icquin ambi chiaid nabanquid abëdi tabadmec. Ambi chiaid niacquidien abëdi tabadmenquiocquin uquë nësecaindac.

Nuquin Papan ambi chiacpadomboen naquidbëdtabi ambi chiacpadomboen naisa isquidquio icquin ambi isacpaden cuidendac. ¿Adquidbidida mibi ne? Padenquio. Adquidpenquio icquin ¿atotsieshun, Icsambocquid nec, quequin mimbi chuipe?

Ma badiadshun nanun chiaid tantiesa neyoc, quequin chiaid

¹³ Tantiacidquio nebi, quiash, Piucquid bednuec seta abentsëc matamec chonoadec nidebi, quequid chuinu. Tantiata. ¹⁴ Ma adquid badiadshun nanun chiaid tantiesa mibi neyoc. ¿Tetsi seta matamec mibi tabadpe? Badiadbudnuc cuen-cuempambo yash badedquio nidac bimboec matses nidaidën tabadash adecbidi mibi nibëdanendac. ¹⁵ Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad. ¹⁶ Aden chienquiocquimbi mibi utsi dëniaquec onquiaid mimbi chiec. Aden chiec icsaic. ¹⁷ Nuquin Papan chiaid tantiembi, queshun adomboen natiadquidi naisa iquec icsaic.

5

Na dadpen bedbanquin dayun uaquido chiaid

¹ Nëbi aton na dadpen bedbanquin dayun uaquido chiembique. Tantiata. Mibi unësun mimbi bedbanquin daëd uaid mimbi tantiaidquio buantiapimbo mibi iquendac. Aden mimbi bedbanquin daëd uaiduidtsëqui icsho isun Nuquin Papan mibi cuidendac. Adquid nebi, quequin tantiash shubita. ² Unësosh, quequin chiac mimbi dadpen dayun uaid nibënquin isac ënden chodquiac. Adembidi mimbi bëdaidquio dectanaid capishton ënden piac. ³ Min shocosh piucquid ënden chiuidac. Adecbidi min piucquid utsi ënden tiadac. Adenuidi tantiaquin bedbanquid unësacsho abi yacno yuedquin, Bëdamboen mimbi naoc, quetiapimbo Nuquin Papa iquendac. Tanunënquio shubu nëdënquiash nibëdacpadquiec mimbi bedbanaid nibëdquiendac. Adenuidi tantiaquin, Esus ëbi bedec chonoshe queshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. ⁴ Adembidi mimbi icsamboen naid utsi iqueque. Tantiata. Min tied uaquido mimbi chono uaboedo bunec sidquec. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedën caniquidtsen dayun uanu, quequin mimbi bedmiaido uëshquec bunec sidquesho Nuquin Papan, Nadatiambocquid Abentsëcshun

tantiec. ⁵ Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudacbimboen mibi bunaiduidi bedbanquin dadpen dayun uaquido mibi nec. Aden nabanquin bēdamboec tabadaid ismesa mibi nec. Adec tabadec unēsash abi yacno mibentsēqui chosho Esuquidistu tantiamibocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidēmbi mibi cuidendac. ⁶ Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daēdpactsēc mimbi menebampoc. Aden nabanec mimbi cunesuniacbimboec bunquieci chonoadequi unēsposh.

Ma Nuquin Icbo chono quiash chieshesa icta quiaid

⁷ Nēbi utsibon chono uaido chuinu. Tantiata. Nuquin Icbo choec quequin tantiec chieshenquio yec tabadta. Nitsinash ma caninu quianec pec nidash cainec icbo tabadec. ⁸ Adembidi, Nuquin Icbo ēbi bednuec choec, quec bēdamboec tabadquin caimbudta. ⁹ Adec tabadquin Esus choate cainec Esuquidistu tantiaquid utsibobēd chieshēnanenda. Adec utsibobēd bēdamboec tabadsho isun abitedi tantiaquidēnquo Chuiquid Dapan mibi menequin bēdamboen cuidendac. Adesain menenquiocquin cuidendac. Adembidi, Nēidēn bēdamboen naosh. Nēidēmbien icsamboen naosh, quequin ēbi Chuiquidēnquo chiendac, quec chieshenquio yec bēdamboec tabadta.

¹⁰ Utsibo, natiatquid icnuc Nuquin Papan chiaid ambi chuimiaido chieshenquiocpampic. Aidquio chuibanu. Tantia. ¹¹ Natiaid icnuc chieshenquiosho isun Nuquin Papan bēdambo icmendac, quequin nuqui tantiondaid nendac. Natiaic cametquid icnuc Nuquin Papa chieshēnenquiocquid Obo icpampic. Aton na dadpen icboedi icsatequid utsi-utsiectsēcquiequidēn uesac nibēdquiosho isash, Con nabēd con nabo nibēdnuc Nuquin Papa bēdambo iquec, quec chieshenquiocpampic Obo. Adquid icsho isun daēd uaquin Nuquin Papan meneoapampic. Matses tantiaquin naquidquio Nuquin Papa nec, quequin ¹² abimbo chuiquidquio icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquio, quiacpaden nabanoata. Mua uanec onquequid Nuquin Papan cuidendac.

Nēidic bēdampec quequin abimbo tantianuc quiaid

¹³ ¿Natiambo icsatequid icnuc dayactiapimbo icquidta icpec? Adquidēnquo Nuquin Papa chuitiad. ¿Bēdambo iquebi, quec tsadquidta icpec? Adquid Nuquin Papan naid chiec

cuëdëntiad. ¹⁴⁻¹⁵ ¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chie cho, catiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinshun dashunquingquin, Mimbi utsibo bëdamenëdacpadomboen mimbi tantiacpaden nëidtsen bëdame, Icho, quequin chuita. Aden Nuquin Papa chuinun mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaid chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bëdamepanuna. ¹⁶ Abi icsaid uesquin Nuquin Papa chias bëdamboec tabadendac. Adquidën chiac dada icsambocquid Nuquin Papan bëdamendac.

¹⁷ Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasën tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquio icpampic. ¹⁸ Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

¹⁹ Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabëd yac bimboec icoindac. ²⁰ Aden mimbi chiac chieshenquio yec tabadsho isun Nuquin Papan uguë nësiatiapimbo adquid iquendac. Adecbidi abi icsaid bëpiscudoaic Nuquin Papa.

Padi. Mibi tantiaquin aidted dada uaombi.

PETEDON DADA UAID 1

Petedon tauamboen chiaid

¹ Petedo nebi. Abëd icquid icsho Esuquidistun: —Ëbi chuibeneta —caidquio nebi. Esus tantiaquidtedishun mimbi iste dada uanu. Isadaidbo icsho nuquin nidaidëshun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi. ² Ëndenquio Nuquin Papa: —Ëmbi tantiactedi mat-ses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuid-menquio icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquio iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquio icquin aido bëdamboen ista, Papa. Adembidi dacuëdenquio icnuc bëdambo icmeta, Papa —quequin Nuquin Papa mibi chianembi.

Esus tantiaquid Nuquin Papa yacno tabadte chiaid

³ —Nuquin Icbo Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquio icquin utsiacbimboecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unësascho uincuemeshun Nuquin Papan abi yacno nuqui tabadmendac padpidec unëstiapimbo icnuc. ⁴ Ambi chiampicpadomboen bëdamboshë yacno Esusbëdquio ëbi tabadmendac. Unëstequid nibëdec icsabudtequid nibëdec chodquetequid nibëdec quiacnombo Esusbëdquio nuqui tabadmendac —quequin nuqui tantiec. ⁵ Aden Esus tantiaquid icsho isash: —Con Mado Esus tantienquio yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

⁶ Ëmbi aden chuisho tantiash mibi cuishonquendac. Esus tantiesabon chieshënac shubiantiadtsëcquio yec natiaboedi

mibi bēdambo yanendac. —Nuquin Papabēd tabadec quene-
 nendabi —quec yuec nuqui shubienquo iquendac. ⁷ Nuqui
 cudasquid yec ζatotsi quiash Nuquin Papa: —Padi. Chēn.
 Esus tantiaquido natiamenta —queboedi adenquo icted-
 ictedpec? Matsu nacnenquidēn: —Ma tsasinu —quequin ambi
 nacnenaid tauiec. Adembidi Esus tantiaquid chieshtoenquo
 icquid icmete Nuquin Papa comapenec bunec. Matsu nac-
 nenquidēn: —ζBēdambo icquidida neque? Isnu —quetanquin
 matsu tauiec. Adembidi: —ζEsus tantiaquidquiobida neque?
 Isnu —quequin: —Natiamenta —cainquo iquec Nuquin Pa-
 pan. Aden natiamiaqui chieshtoenquo icquid icsho Es-
 uquidistun padpidec choshon: —Mibi bēdambo iquec. Ēbēdi
 tabadec cho —quequin utsibo tantiamequin chuishun abi
 yacno buanendac.

⁸ Aden mimbi isacmaidi Esus mimbi tantiaquiec. —Nēbi
 isadenquo icquidi Nuquin Papan Madombo Ēsus ēbi bed-
 nuec choendac —quec mibi cuishonquianec. ⁹ —Abi tantiasho
 icsano nidmenquo icquin Esusēn abi yacno ēbi yuedendac —
 quec Esus tantiec mibi cuishonquianec.

Esus chote tsusedpabon chiampid

¹⁰ Ēndenquimboshē Nuquin Papan tantiamiac isadaidbo
 tsusedpabon Nuquin Papan chiaid chuiquidon Esusēn
 matses cuidmenquo icte dada uapampic. Esusēn nate
 abitedi tantienquo icquin daēdpactsēc tantiaquin: —
 ζMitsipadquid Nuquin Papan chomepeba? —queded-
 quededquin chuipampic nuquin tsusedpabo isadaidbon.
¹¹ Aidobēd icquin Esuquidistun Mayanēn tantiamiac
 Esus chote abentse-abentsen chuipampic. —Matsesēn
 chieshēnquin cuستن dectanac matses cuidmenquo icnuec
 abided cuidadec unēsēndac. Adec unēsacsho uincuemi-
 ac padpidec abitedishun Icho icoaindac —quequin Esus chote
 chuipampic. —ζTsutsi chopec? ζTedectsi yash chopec?
 —quequin abitedi tantiatadquo icquimbi daēdpactsēc
 isadaidbo tsusedpabon tantiapampic. ¹² Naden Nuquin
 Papan tantiamepampic. —Mibi nibēdanān ēmbi chuiboed
 ēmbi matsesmiacsho utsibon isēndac —quequin tantiamiac
 Esusēn nate chuipampic. Aden chiampicpadomboen Esusēn
 naondash. Nuquin Papan Mayanēn tantiacpadomboen aid
 chuibenequidon aidēn naid mibi chiac caondash. Aden
 Esusēn naid Nuquin Papan abi yacnoshon uaido mayan
 bēdabontsen tantiatadquo icquimbi abitedi tantienquo
 iquec.

Bēdamboec tabadte tantiamiaid

¹³ Ĕmbi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquio yec bēdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ėnenquio icquin. ¹⁴ Ambi: —Con mado nec. Con champi nec —caido icquin Nuquin Papan chiacpadomboen nanuna. Ĕnden Nuquin Papan chiaid tantiabi mibi bunaid naic mibi icsanēdacpadec icsainda. ¹⁵ Mibi Esus tantiamequid icsaisambo Nuquin Papa neque. Ambi chiaid niaquenquio yec bēdamboec tabadnuna. ¹⁶ Nuquin Papan ambi chiaid naden dada uamepampic. “ ‘Nuquin Papa icsaisambo nec,’ quiash icsaisa ictiadquio yec bēdamboec tabad,” quequin Nuquin Papan ambi chiaid dada uamepampicpadec bēdamboec tabadnuna.

¹⁷ Papa quequin nuqui chianeboed Nuquin Papa matsesēn naidtedi chuiquid nendac. —Nēid ėbi tantiesa neque. Icsano nidmenu. Nēid ėbi tantiaquid neque. Ĕbēdi tabadmenu —quequin matses abitedi chiendac. —Abēdi tabadmenquio icnushe —quiash Nuquin Papabēd icte bunec bēdamboec tabadnuna. ¹⁸ Nuquin tsusedpabon chiaiduidi naquin Nuquin Papa tantienquio nuqui icpondac. Aden Satanasēn yuaido icsho Nuquin Papan nuqui bēdamboen istiapimbo icpanēdash. Adshun Satanas nuqui bedshunuen ėpiucquidida Nuquin Papan menepanēdash? Padenquio. Adquid icsabudtequid menenquio icquin ¹⁹ aton Mado Esus icsaisambo icsho matsesmepanēdash. Aden matsesmiacsho chieshēmēnquidēn cuesten dectanac Esus aton intac chididiquec abided cuidadec unēspondash. Nēbi aton Mado Esus tantiaquido bēdamboen isquin Nuquin Papan Satanas bedshunec. Aden Nuquin Papan bedshunaid yec bēdamboec tabadnuna. ²⁰ Ĕndenquimboshē abitedi uabi Nuquin Papa nadpampic. —Ĕmbi tantiacpadēn yuecash matsesash matses cuidmenquio icnuec mibided cuidadec unēsta, Mado —quepampic. Aden ambi chiampicpadomboen badedquio namenquio icboedēmbi nēbi nameshun Esus tantiasho mibi bēdamboen isec. ²¹ Abi tantiasho Esusēmbi Nuquin Papatšen nuqui tantiamec. Adoac nuqui naden tantiec. —Ĕsus unēsacsho uincuemeshun abēdi tabadmequin abitedishun Icbombo Nuquin Papan icmeoapanēdash. Ambi chiacpadomboen naquidquio Nuquin Papa nec. Ĕbi unēsacsho uincuemeshun abi yacno ėbi tabadmendac —quequin Nuquin Papatšen nuqui tantiec.

Esus tantiaquido tantiananquiqote chiaid

22 Nuquin Papan chiapadomboen naic bēdambo yanshun mibēdtan Esus tantiaquido utsibo mimbi tantiec. Adecbidi muenquio yec tantiananquionona. ²³ Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibēdantiapimbo icquid icnuc ambi chiaid bēnudtiapimbo iquec. Aidēn chiaid tantiashun mimbi Esus tantiabempanēdac. ²⁴ Ambi chiaid bēnudtiapimbo icte Nuquin Papan nuquin tsusedpa dada uamepampic naden chuiquin. “Uasimbimboec unēsquid matses nec.

Cuēte bacuēec bēdamboshē isadboedi badedquio chodquequid nec. Adecbidi matses: ‘Con nabēdi bēdamboshē iquebi,’ queboedi badedquio unēsquid nec.

²⁵ Nuquin Papain nibēdantiapimbo icquid nec. Adnuc ambi chiaid bēnudtiapimbo iquec,” quequin abimbo chuipampic. Aidēn chiaidquio mibi chiac caondash.

2

Nuquin Papan chiaid iste bunquionona, quiaid

¹ Aden Nuquin Papan chiaid tantiash chieshēmēnec tabadenda. Utsi muauainda. —Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēnec icsamboec onquenda. ² Adenquio yec Nuquin Papan chiaid iste bunquionona. Tishac chucactsēc bacuēmpi shuma chishte bunquiabimboec Nuquin Papan chiaid iste bunquionona. —Bēdiactsēc tantiaboedi aid isban-isbanquin Nuquin Papan chiapadomboen natiadquio yantsiabi —qeshun Nuquin Papan chiaid isbanuna. ³ —Esus tantiec bēdambo iquebi —qeshun Nuquin Papan chiaid isbanuna.

Buintadbimboecquid Esus nec, quiaid

⁴ Nuqui tantiaid nadquio iquec. Shubu uanun buintadquio nacnitsinuen istuidshun: —Nēid bēdambo iqueque. Nēidquio naimbi —quiacbimboen Nuquin Papan: —Ēmbi tantiaidquio yec mibi bēdambo iqueque. Ēmbi chiapadomboen mibi namenu —capanēdash Esus. Adoaidi matses dadpenshunquio Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac. ⁵ Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantiaime, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiapadomboenuidi natiadquio iquebi —quec bēdamboec tabadquidtsen nuqui yanec. Adsho

isash: —Bëdambo iquec —quependac Nuquin Papa nuqui caic.
 6 Aden aton Mado Esus tantiate chuiquin Nuquin Papan dada uamepampic naden.

“Buintad bëdambo icquid istuidash: ‘Nëidquio shubu uanun nitsinemi,’ quiacimboen

Edusaden yacno ëbi bëdamboen ismequidquio isadaidbobëd tabadmendambi.

Aid caic: ‘Nëid tantiasho Nuquin Papan abi yacno nuqui tabadmendac,’ quequin abi tantiaquido unësacsho ëbi yacno tabadmendambi,”

quequin Nuquin Papan ambi chiaid dada uamepampic. 7 Aid tantiec: —Bëdamboshë iquec —quependac Esus tantiaquido.

Utsibombien Esus chieshë nec. Ëndenquimbo Esus choabi icnuc aidën nate chuiquin Nuquin Papan dada uamepampic naden.

“Buintad bëdambo icquid istuidashi: ‘Nëidquio shubu uanun nitsinemi,’ quetiadquidi isuidacimboen Nuquin Papan namiaid chieshë nac.

Aden buintad isuidaidsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh,”

quequin Nuquin Papan dada uamepampic. 8 Adshumbic Esus chieshëntetsen dada uamepampic naden chuiquin.

“Nuquin Papan abipadquidquio Edusaden yacno isadaidbobëd tabadmiascho ambocquidon chieshë nendac.

Aid chieshë nquid nadquio iquendac. ‘Cuëte mabud iquec,’ quequin tantienquio yec nidec tocoshquetanec uebudacimboec

ëbi bëdamboen ismequid tantienquio yec unësash icsano nidendac,”

quequin Nuquin Papan ambi chiaid dada uamepampic. Aden Nuquin Papan chiaid tantiatipimbo icquin Esustsen tantiatipimbo iquec. —Adquid icsano nidmendambi —quequin Nuquin Papan tantiacpadec Esus tantiesabo yec unësash icsano nidendac.

Nuquin Papan matses nuqui nec, quequin chiaid

9 Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaidsin nuqui Esus tantiamepondash paposhquiacimboec nuc. Adoac: —Nuquin Papa bëdamboshë iquec. Ambi chiacpadomboenuidi natiadquio iquebi —quec bëdamboec tabadquid nuqui yanec. Adembidi: —Con matses Esus tantiameta, Papa —quequin Nuquin Papa chianequid nuqui nendac. Adecbidi: —Nuquin Papa bëdambo iquec —quequin utsibo chuibanquid nuqui nendac. 10 Ënden abi tantiesabo icsho Nuquin Papan mibi bëdamboen istiapimbo icquin: —Con matses mibi nec —mibi

catiapimbo icpanēdash. Nēbi Esus tantiasho Nuquin Papan mibi bēdamboen isquin: —Con matses mibi nec —mibi caindac.

Bēdamboec tabadte chiaid

¹¹ Ēmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesa ic-sate bunacpadec icsainda. —Esus tantienquo yamane —quiash bēdamboec tabadta. ¹² Esus tantiesabobēdi bēdamboec tabadnuna. —Ma aidontsen Esus tantianu —quiash adnuna. Adec mibi bēdamboec tabadsho isun mibi chieshēnquin icsamboen chuishumboedombi Esus tantiabenshun Nuquin Papa naden chiendac. —Mimbi namiaido bēdamboec tabadsho isun Esus tantiabenombi. Mibi bēdambo iquec, Papa —quendac.

¹³ Bēdamboec tabadnuna. —Con Icho Esus matsesēn chieshēnushe —qeshun matses chuiquid dapatedishun chiacpadomboen nanuna. Nuquin nidaidēn tabadquido abitedi chuiquid dapa pedesidente caidēn chiacpadomboen nanuna. ¹⁴ Aidēn: —Mibitsen matses chuiquid icta —caidon chiacpadomboentsen nanuna. Matses icsasho isun cuidquid neque. Adecbidi bēdamboec tabadsho isun: —Bēdambo icquid nec —caquid neque. Aidēn chiacpadomboen nanuna. ¹⁵ Aden Nuquin Papan chiacpadomboen naic bēdamboec tabadsho isun: —Icsamboec tabadquid nec —mibi caboedobi adtiapimbo yantsiash. Aden piushbimboecquin tantienquo icquin icsamboen chuiboedombi ambi icsamboen chiaid ēntsiash.

¹⁶ Satanasēn yuaido icsho Esusēn bedshunaid yec nēbi icsambo icquidēn yuapenquo yec bēdamboec tabadnuna. Icsanuec: —Utsin yuapenquo yec ēbi bunaiduidi naimbi —quenda. Nuquin Papan yuambo yec bēdamboec tabadnuna. ¹⁷ Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

Yuabo chiaid

¹⁸ Tantia, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquo icnubi adembidi nata. ¹⁹ Adec Nuquin Papa tantiaquid yec bēdambo icsho cuesaqui chieshēmēnenquo icsho: —Aid yua bēdambo iquec —quequin Nuquin Papan mibi bēdamboen istsiashē. Min icbon chiacpadomboen nata. ²⁰ ¿Icsamboec tabadquid cuesac chieshēmēnenquo icquidta Nuquin Papan: —Aid yua bēdambo iquec —capatsiash? Padenquo. Nuquin

Papan chiacpadquiec bēdamboec tabadquidi cuesaqui chieshtoenquo icsho: —Aid yua bēdambo iquec —Nuquin Papan catsiashe. Bēdambo icta.

Chieshtoenquo yec Esus unēsaid

²¹ —Chieshēnaqui chieshtotiadquo iquebi —¿quecta ique? Tantia. Mibi chuinu. —Con Mado Esusbimboec ma icnu. Chieshēnaqui ma chieshtoenquo icnu —queshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquo icnuec abided ciudadec mēyadec unēspondash. ²² Nuquin Papan dada uamepampicpadquo “muesambo yec icsaisambo icpondash.” ²³ Adquid icsho abi chieshēnquidon mamēnshunaqui Esusēn chushcainquo icpondash. Aidon matonbudnetanquin buanshun cuesten dectanac: —Mibitsen cuidendambi —cainquo icpondash. Adenquo yec nadpondash. —Nuquin Papan matsesēn naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquo icpondash. ²⁴ Adash: —Ēbi tantiaquid ma icsaid ucuadacimboec bēdamboec tabadnu —quiash nuqui icsaid bedshunec abided ciudadec unēspondash. Adec aton Madoded ciudadec unēsacsho isash nēish bēdانشun Nuquin Papan aton Mado tantiaquido bēdamboen isec. ²⁵ Yuan icbo cuenēnacimboen Nuquin Icbo nuqui tantienquo icpondac. Adoboedi nēbi: —Con Icbon ēbi bēdamboen dayun uaqin ēbi bēdamboen namendac —queshun nuqui Esus tantieque. Bēdamboen nanuna.

3

Bēnēbēdta chido chiaid

¹⁻² Tantia, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec tabadsho isun Nuquin Papan chiaid tantienquo icboedēmbi con bēnēn Esus tantiabentsiash. “Mimbitsen Esus tantiabenta,” quequin ēmbi chiambobi Esus tantiabentsiash —queshun min bēnēn chiacpadomboen nata. ³ Bēdamboec tabadquid ictiadquo icquin casēdu payuteuidi tantienda. Adembidi dashcute bēdambo icquid dasiuidteuidi tantienda. —“Bēdambo isadec. Mibi bēdambo iquec,” mabi canu —quiash nacnemēdteuidi tantienda. ⁴ —Bēdambo mibi iquec —camenuc bēdamboec tabadta. Nēishēmēnenquo icquin bēdamboen nabanta. Chieshenquo icquin min bēnēn chiacpadomboen naquid icta. Mibi adquo icsho isash: —Mibi bēdambo iquec —quendac Nuquin Papa. ⁵ Ēndenquimbo isadaidbo tsusedpan chido Nuquin

Papa tantiaquid yec adquio icpampic. Aton bēnēn chiacpadomboen naic bēdambo icpampic. ⁶—Con bēnē con icbo-bimboec iquec —quequin aton bēnē Abadauan caidēn chiacpadomboen Sada caidēn napampic. Esus tantiaquid icsho mamēnshunaqui min bēnē dacuēdēnenquio icquin aidēn chiacpadomboen naic bēdamboec tabadec Sadapadquio mibi ictsiac. Adquid bēdambo iquec. ⁷ Tantia. Bēnētsen chuinu. Abia uimabudquid icsho min chido bēdamboen ista. Mibēdtan Esus tantiaquid yec Nuquin Papa yacno mibēdi tabadtequid neque. Min chido bēdamboen ista. —Ēbi bēdamboen ista, Papa —quequin mimbi chiaid Nuquin Papan tantienquio icnushe. Min chido bēdamboen ista.

Bēdamboec tabad, quequin chiaid

⁸ Nēbi Esus tantiaquido abitedi chuinu. Tantia. —Nuquin Papan chiacpadomboen nanuna —quiash bēdamboec isnanuna. Cuishonquequidbēd cuishonquec shubiquidbēd shubinuna. Adec tantiananquionona. —Ēmbi naiduidi naimbi —quenquio icquin utsibon chiaidtsen nanuna. ⁹ Mibi chieshēnaqui cuidnanenda. Mibi chieshēnquin icsamboen chuishunaqui cuidnanec icsamboec chuishunanenda. Adenquio icquin Nuquin Papa chianeta. —Ēbi chieshēnquid bēdamboen isquin bēdamboen tabadme, Papa —quequin Nuquin Papa chianeta. —Ēmbi bēdamboen isaidon ma aton matses utsibo bēdamboen isnu —queshun Nuquin Papan nuqui Esus tantiaquido icmiaye. Bēdamboec tabadnuna. ¹⁰ Adec bēdamboec tabadte chuiquin Nuquin Papan dada uamepampic naden.

“Bēdamboec tabadte bunquidēn nadoendac.

Adonante bunenquio icquidēmbi utsibo muauainquio iquendac.

Chieshēnquin utsibo icsamboen chienquio iquendac.

¹¹ Icsamboec tabadboedi bēdamboec tabadendac. Utsibo chieshēnansho isash:

‘Padi. Chieshēnanenda,’ quendac.

¹² Adec bēdamboec tabadsho Nuquin Papan bēdamboen isendac.

Aden bēdamboen isaidon: ‘Ēmbi chuisho tantia. Ēbi bēdamboen ista, Papa,’ quequin abi chuisho Nuquin Papan tantien-dac.

Icsamboec tabadshoen bēdamboen istiapimbo iquendac,” quequin Nuquin Papan dada uamepampic.

Cuesaqui dacuēdenda, quequin chiaid

¹³ ¿Bëdamboec tabadshoda bëdambo icquidën badedquo mibi cuespatsiash? Padenquo ictsiash. ¹⁴ Bëdamboec tabadsho isun icsambo icquidën cuesacsho mibi Nuquin Papan bëdamboen istsiash. Mibi chieshënquido dacuëdënenda. ¹⁵ Dacuëdënenquo icquin: —Con Icho Esuquidistu nec —quequin ambi chiacpadomboen nanuna. Aden mimbi Esus tantianuc utsibo: —¿Atotsieshun Esus tantie? —quesho: —“Abided cuidadec unësaid Esus tantisho Nuquin Papan ëbi bëdamboen isquin unëscacsho abi yacno ëbi tabadmendac,” queshun Esus tantiemi —quequin Esus tantiesabo chuibanuna. ¹⁶ Aden nëishëmënenquo icquin Esusën naid chuibanuna. Aden bëdamboen chuinuec Esus tantiaquiec bëdamboec tabadnuna. —Ëbi bëdamboec tabadsho isash ëbi chieshënquin muauaquid: “Bëdambo icquidi muauachitombi. Icsachitobi,” ma quenu —quiash bëdamboec tabadnuna. ¹⁷ —Ëbi tantiaquid utsibon chieshënendac —quequin Nuquin Papan tantiacpadomboen Nuquin Papa tantiaquido utsi-utsien utsibon chieshënendac. Bëdamboec tabadquid icsho utsibon chieshënaqui nuqui chieshtoenquo icsho isash: —Mibi bëdambo iquiec —quetsiash Nuquin Papa nuqui caic. Icsambo icsho quënën nauedaiddi nëishenquo icsho: —Mibi bëdambo iquiec —cainquo ictsiash Nuquin Papan.

Esus unësaid tantia, quiaid

¹⁸ Chieshënaqui Esusbimboec chieshtoenquo yec bëdamboec tabadnuna. Aid icsaisambo yequi nuqui icsaid bedshunec abided cuidadec unëspendash. Aden Nuquin Papa abi tantiaquido bëdamboen ismenuc abentsecquiobi unëspendash padpidec unësenquo icnuec. Aton dada unësambi aton tantiate unësabí icpanëdash. ¹⁹ Adec aton dada unësambi aton tantiate icnuc ëndenquimboshë Noe caidën matses abi tantiesabo icsho Nuquin Papan cuidquin unës uampido uidën uashun quënën sauedampicno Esus nidpanëdash. Ambo nidshun Nuquin Papan cuidpampido Esusën ambi naboed chuibampanëdash. ²⁰ Naden Nuquin Papan aido cuidquin unës uapampic. Ëndenquimboshë aton matseshëd tabadec Noe bëdambo icnubi aton matses icsamboshë icpampic. Adnubien Nuquin Papan: —Matses icsaquido abitedi uesquin unës uanuen nidaiddi abitedi acte mabudadmembique. Baded cano dapa nacnen —quequin Nuquin Papan Noe caid chuipampic. Adoac badedquo cano dapa nacnemëdenquo yacpadembi Nuquin Papan badedi cuidenquo icpampic: —Ma abi icsaid ënshun ëbi tantianu —queshun. Adnubien cano dapa nacnentanec Noe chedo 8tedpactsëc cano dapa antabëdtopampic. Adnubien aido antabëdtoaid cano dapa acten bedtoac nuadtopampic.

Utsiboen acte mabudadmiaidën mentoadbudnepampic. Noe abi tantiaquidquo icscho Nuquin Papan cuidenquo icpampic.

²¹ Adembidi Esus tantiasho nuqui cuidenquo iquec. — “Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bëchish ucquinda nuqui adodi? Padenquo. Nuquin Papa naden chuiquin: —Esus tantiaquin icsaid ucacimboen mimbi chiapadomboen natiadquo iquebi, Papa —quequin nuqui adoec. Aden abi tantiasho Nuquin Papan uincuemenedaidën Esuquidistun nuqui cuidmenquo iquec. ²² Aidi uincuenash Nuquin Papa yacno nidash aidbëdi tsadoaic abitedishun Icbombo yanoac. Abitedimbo chuiquid dapa icquin ambi chiapadomboen abitedi namendac. Nuquin Papan abi yacnoshon uaido mayan bëdabo bëdamboen namequimbic Satanas aton yuabo mayan icsabobëdta Esusën cuidendac.

4

Bëdamboec tabadnuna, quiaid

¹ Nuquin Papan tantiacpadomboen nasho utsibon chieshënquin mëyanaqui Esus chieshtoenquo icpondash. Adembidi chieshëmënuqidën chieshënaqui adecbidi chieshtoenda. Abided ciudadec unësaid Esus tantiaquin nuqui icsaid nuqui ënendac. ² Aden nuqui tantiacpadomboen nainquo icquin Nuquin Papan chiapadomboen natiadquo nuqui iquendac. ³ Nuquin Papa tantiesabon nacpadomboen Nuquin Papan chiaid mimbi yuen niac-niacpondac. Utsin chido chudquinc utsin bënë chudmequinc tantiadenuen acte paëmbo icquid acquinc: —Nëid papa canu —quequin matsesbimboecnuc nacnenquinc mimbi capondac. Adec icsateuidi bunec mëmuntiapimbo mibi icpondac. Adquid iccondaidi nëbi bëdamboec tabadta. ⁴ Adec bëdamboec tabadsho isun mibëd icsaondaidën: —¿Atotsieshun nuqui naondacpadomboen nainquo ique? Mimbi Nuquin Papa caid nibëdec —quequin mibi icsamboen chuiquin mibi mamënsnunendac. ⁵ Aden mibi mamënsnunquid Nuquin Papan cuidendac. Cuidnumbi matsesën naidtedi tantiaquid icquin Nuquin Papan: —¿Mitsipaden nao? ¿Ada bëdamboec tabado? —cac ënden unësaidobëdtan unësabi icquidotedishun ambi naidtedi uesquin chiendac. ⁶ Aden abëdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabëd tabadendac padpidec unësenquo yec.

Utsibo nashununa, quiaid

⁷ Tantia. Mibitedi chuinu. Nuquin Papan cuidte nēbi iqueque. Esus tantiec nuqui icsate bunaid ēnash mēmunc bēdamboec tabadnuna. —Ma ēmbi abi chianesho Nuquin Papan bēdamboen tantianu —quiash adta. ⁸ —Tantiananquido chieshēnanec cuidnante bunenquio iquec —quiash ēnēdenquio yec tantiananquionona. ⁹ Nuquibēdtan Esus tantiaquido isedec chosho bēdamboen isnuna. Shubu utsinquido ēnapenuēsh chosho adembidi chieshēnenquio icquin min shubun yued. ¹⁰ Nuquin Papan tantiamiacpadomboen nuquibēdtan Esus tantiaquido nashuntiad. Esus tantiaquidquio icmēnuechieshenquio icquin nanuna. ¹¹ ¿Ada Nuquin Papan Esusēn naid chuibanquid mibi icmiac? Adquid icquin Nuquin Papan chiaidquio chuibanquiota. ¿Ada Nuquin Papan mibēdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ēbi nashunquid bēdamboen namequid Nuquin Papa bēdamboshē iquec,” ma ēmbi nashunaido quenu —queshun utsibo nashununa. —Abitedishun icombo yec Nuquin Papa bēdamboshē iquec —canuna ēnenquio icquin.

Chieshēnaqui chieshtoenquio icte chiaid

¹² Ēmbi tantiaido mibi neque. Tantia. —¿Atotsieshun matsesēn ēbi chieshēmpēba? —¿quecta ique? ¿Mibentsēquida chieshēndic? Ma Esus tantiaquido dadpenquio chieshēmpayoc. ¹³ —Chieshēnquin Esuquidistu comapenen mēyanacimboen Esus tantiesabon ēbitsen mēyanosh. Esus tantiaquid icshoeni adochitosh —quiash Esus tantiec bēdambo icnuna. —Utsibon chieshēnaidi abi tantiaquid ambi namiacno buanuec Nuquin Icbo Esus choec —quiash abi chote ushēn cuishonquenush adnuna. ¹⁴ —Esuquidistu tantiaquid nec —queshun chieshēmēnquidon natiamiaid mibi bēdambo iquendac. Nuquin Papan Mayan mibēd tabadquin Nuquin Papa yacno tabadte mibi tantiamequin mibi bēdambo icmendac. ¹⁵ Utsibo icsasho abi chuiquidēn natiamequin cuidquid. Cuesunianquid yec ampequid yec chieshēmēnquin icsamboen chuishunquid yec quec icsasho chuiquidēn cuidsho isun: —Bēdambo iquec —catsiambi. Adec icsainda. ¹⁶ Esus tantiaquid icsho utsibon chieshēnac dacuēdenda. Adec dacuēdenquio icquin: —Nuquin Papa bēdamboshē iquec. Aton Mado Esus tantiaquid icmiac bēdambo iquebi —quequin ēnenquio icquin Esus tantianuna. ¹⁷ —Nuquin Papan cuidte ushē nēbi icnuc ambi con matses caido Esus tantiaquido chieshēmēnquidon natiamendac —quiacpaden nēbi tauaquin

mibi natiamec. Adsho isun: —Chieshēmēnquidēn chieshēnac ěmbi tantiacpadomboen abi icsaid ěntsiash —queshun Nuquin Papan: —Natiamenda —cainquio iquec. Aden abi tantiaquido icsaid ěmete bunquin nashun ĵbēdiactsĕcta abi tantiesabo cuidpec? ¹⁸ Naden chuiquin Nuquin Papan dada uamepampic. “Aden chieshēdeniac natiambo yan-yanequi unēsash Nuquin Papabēd abi tantiaquido tabadendac. Nuqui adnuc ĵbēdiactsĕcta ambi chiaid niac-niacquido Nuquin Papan cuidpec? Padenquio. Comapenen cuidendac,” quequin dada uamepampic. ¹⁹ Nuquin Papan tantiacpadecc mēyadec Esus tantiaquid ma nadpanuna. —Ĕbi uaquidēn Nuquin Papan ambi chiacpadomboen ěbi bēdamboen namec. Aid tantiec bēdambo iquebi —quiash ma bēdamboec tabadpanuna.

5

Esus tantiaquido chuibanquid Petedon chiaid

¹ Tantia. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paēmbošhē icmequin Esuquidistu unēs uasho isondambi. Aidēn padpidec nidaidēn choshon abi yacno buanuen nuqui beduaneque. Tantia. ² Icho yua cudasac bimboec mibēd icquido Esus tantiaquido cudasta. —Esus tantienquio yanushe —queshun: —Nuquin Papan chiaid niaquenquio yec bēdamboec tabad —quequin chuibanta. —Ĕsus tantiaquido chuibanquid icta —cac: —“Padi,” quetiadquio icquimbi naimbi —quenquio icquin: —Aden Ĕsus tantiaquido nashumbantsiambi —quec Esus tantiaquido chuibanquidquio icta. —Piuccquid dadpen bednun nanu —quenquio icquin Nuquin Papan chiacpadomboen natiadquio yec Esus tantiaquido chuibanquid icta. ³ —Nēidtedi Esus tantiaquido bēdamboen name —caidtedi bēdamboen isequi chushcanenda. Adenquio yec: —Ĕbi yacpadecc ma tabadnu —quec bēdamboec tabad. ⁴ Aden Esus tantiaquido chuibanquidēn bēdamboen namesho isun Nuquin Icbon nidaidēn padpidec choshon utsibo ismequin: —Nēid bēdambo icquid nec —queshun chuibanquid ambi namiaidobēdta abi yacno buanendac.

Esus tantiaquidon nate utsi chiaid

⁵ Tantia, caniabo. Mibitsen chuinu. Mibi chuiquid dapabon chiaid niaquenquio icquin aidēn chiacpadomboen nata. Aidtedtsĕqui caniabo chuishumbic mibi yacnocquidotedi chuinu. —Ĕbiuidtsĕqui bēdambo iquebi. Ĕmbimbo naiduidi naimbi —quenquio icquin utsin nacpadomboentsen

nata. Aden chuiquin Nuquin Papan ambi chiaid naden dada uamepampic.

“Nuquin Papa tantienquo icquin aton matses utsibo tantienquo icquin ambi naïduidtsëqui nasho: ‘Adquid ic-sambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bëdamboen isquin bëdambo icmec,”

quequin Nuquin Papan ambi chiaid dada uamepampic.

⁶ Aden Nuquin Papan chiacpadomboen nabanuna. Nadati-ambo icquid yec abitedishun Icbombo Nuquin Papa neque. Utsibon chieshënaqui chieshtoenquo icnuna. Adec chieshtoenquo icsho ambi tantiacpadën utsibo ismequin: —Ëbi tantiaquidquo mibi neque. Ëbëdi tabadec cho —nuqui caindac Nuquin Papan. ⁷ Aidën nuqui tantieque. —¿Atotsimbi pepeba? ¿Ëbida cuespeba? ¿Con matsesta unëspeba? —quequin nuqui dacuëdaïdtedi Nuquin Papa chuinuna.

⁸ Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasën nuqui chieshënquieç. Esus bedshunuen nuqui icsametiadquo icquin bëdin nëish nibënacimboen ambi icsametequid Satanasën ënenquo icquin nibëmbeneque. ⁹ Ista. Icsamenda. Chieshtomenda. —Satanasën icsamechitoshe —qeshun Nuquin Papan chiaid niac-niaquenquo icquin Esus tantiaquionona. —Ëbi chieshënacpadomboen Esus tantiaquid utsibo nidaid utsi-utsiec yacno tabadquido utsibon chieshënac caosh —qeshun chieshtoenquo icquin Esus tantianuna. ¹⁰ Aden utsibon chieshënaïdo yec yuec-yuecpectsëc nuqui tabadec. Adshobien abi yacno buanquin nuqui bëdambo icmequidën Nuquin Papan Satanas nuqui icsa uamenquo iquendac. Adembidi Nuquin Papan nuqui bëdamboen isquid icquin dayacquio yacbimboecnuc chieshtoenquo icquid nuqui icmendac. ¹¹ Ëmbi aden chuïsho tantiashun: —Mibi bëdamboshë iquec, Papa. Mimbi tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquo icquin.

Petedon ënquimbi chiaid.

¹² Esus tantiaquidquo Sidas caïd nëïdtedtsëqui ëmbi dada uaboed mibi yacno buamembi. —Esusquo isondambi. Aid tantiasho Nuquin Papan matses bëdamboen isbenendac —quequin abimbo mibi chiombique. Chieshtoenquo icquin Esus tantianuna. ¹³ Nuquin Papan tantiamiac nuquibëdtan Esus tantiaquido ëmbi Babidonia caïd yacnocquidon: —Aïdo unësquo iquec —mibi caosh. Babidonia caïdbidi Doma caic.

Con madobimboecquid Madcosën –Aido unësquio iquec –
mibi caosh. ¹⁴ –Ëbëdtan Esus tantiaquido nec –quiash: –Mibi
unësquio iquec –cananuna. –Ma Nuquin Papan mibi Esus
tantiaquidotedi bëdambo icmepanu –quequin Nuquin Papa
chianembi. Padi. Aidedi chuiquin dada uaombi.

PETEDON DADA UAID 2

Tauamboen chiaid

¹ Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaido nuqui nec. ²Ëbëdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bëdambo icme, Papa. Aido bëdamboen isquiota, Papa —quequin Nuquin Papa chianembi.

Nuquin Papan bëdambo icmete chiaid

³ Comapenen tantiaquid icquin Nuquin Papan namiac aidën chiaid niac-niacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaido nuqui nec. ⁴ Abipadquidquio Esusën chiondacadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

⁵ Aden Nuquin Papan Esus tantiamiaido yec dayacquio yacbimboec ënëdenquio yec bëdamboec tabadnuna. Adecbidi Nuquin Papan chiaidquio tantiec tabadnuna. ⁶ Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshëncquidbëdi chieshënanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna. ⁷ Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. ⁸ Ëmbi chuiboedtedi nabanquin chieshtoenquio icquin adenuidi nanuna. Aden naquin Esus bëdiactsëc tantiatsëcboedëmbi chieshtoenquio icquin nuqui Esus tantiaquiotsiac. ⁹ Ëmbi chuibocpadomboen naisa pamumëdabimboec iquec. Adquidon: —Aton Mado Esus tantiasho icsaid ucudabimboecnuc Nuquin Papan nuqui bëdamboen isec —queboedombi bëpiscudquin tantienquio yanec.

¹⁰ Ëbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantiash chieshtoenquio icquin Esus tantiec bëdamboec tabadnuna. Adec tabadquin naden

nuqui tantiendac. —Ĕndenquimboshĕ ěbi tishabi icnuc ěbi caic: “Esus tantiamendambi,” quequin ambi chiampicpadomboen Nuquin Papan nĕbi tantiamiac Esus tantiabenombi —quequin nuqui tantiendac. Aden tantiec Esus tantienquo icquid nuqui yanenquo ictsiac. ¹¹ Adec bĕdamboec tabadash unĕsacsho: —Ĕbi tantiaquid mibi neque. Ĕbĕdi tabadec cho —qeshun ambi namiacno abĕdi tabadmequin Nuquin Icbo Esuquidistun nuqui bĕdambo icmendac padpidec unĕsenquo icnuc. ¹² Ĕmbi aden chuiboedtedi mimbi tantiondac. Aden tantiabosh Esus tantiec mibi bĕdamboec tabadcuenondac. Aden mimbi tantiondaidi mibi chuided-chuidedendambi. ¹³ —Nĕbi unĕsendabi —queboedi ěbi unĕsabi yacpadembi mibi chuided-chuidedendambi. ¹⁴ —Adĕnquo mibi unĕsendac —quequin Nuquin Icbo Esuquidistun chiacpadĕn nĕbi unĕsebi. ¹⁵ —Ĕbi unĕsan ěmbi chiondaid ma bĕpiscudenquo icnu —qeshun mibi chuiquin dada uanu.

Nuquin Papan Esus chiaid

¹⁶ ĤMuaquindambi mibi Esus chuidionda? Padenquo. —Nadatiambo icquin nabanquin Esusĕn ismedenepondash. Adquid yec abuc nidnush: “Padpidec nidaidĕn choindabi,” quepondash Esus —Ĥquectabi muadionda? Padenquo. Ĕmbimbo isondaidquo mambi mibi chiondac. —Nĕid con Madombo nec —quequin Nuquin Papan ismiac Esus isondambi. ¹⁷⁻¹⁸ Nadquo iccondash. Macuĕsh dapan dectatoash Esus bĕchamauanquiec iccondash. Adnubien Nuquin Papan: —Con Madombo nec. Ĕmbi tantiaidquo yec bĕdamboshĕ iquec. Nĕid isec bĕdambo iquebi —quequin abucshun dacuĕdampamboecnuc chuipondash.

¹⁹ ĤĔmbentsĕquidambi Esus chuibanquin nape? Padenquo. Ĕndenquimboshĕ Esus chote tantiamequin Nuquin Papan isadaidbo tsusedpabo dada uamepampic. Pacuĕnĕdadbimboen utsibon tantienquo icnubi paposhquiachimboecnuc Esus chote tantiamenuen dada uamepampic. Aden Nuquin Papan chiaid isec onquequin bĕdamboen tantianuna: —Muaquidon chuisho tantiamane —qeshun. —Abitedishun Icbombo nebi —quequin ismenuc padpidec Esus choabi yacpadembi Nuquin Papan chiaid bĕdamboen tantianuna. ²⁰ —Nuquin Papan nadoendac —quequin Ĥambembi chiaidta nuquin tsusedpabon dada uapampic? Padenquo. ²¹ Ambembi chiaid dada uainquo icquin Nuquin Papan chiaidquo dada uapampic. Nuquin Papan Mayanĕn tantiamiac abimbo chuipampic.

2

Muaquido iquendac, quequin chiaid

¹ Nuquin Papan chiaidquo isadaidbo tsusedpabon chuinubien utsibo: —Nuquin Papan nadoendac —quec mua-pampic. Nēbi adquidbidi iquendac. Mibi yacno puduedash ambembi chiaid chiec muasho tantiashun: —Mibi muequi nec —badedquo cainquo mimbi iquendac. —Abided ciudadec unēsaid Esus tantiaquid nebi —queboedi: —Esusēn chiacpadomboen natiapimbo iquebi. Adshobi Nuquin Papan ēbi cuidenquo ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. ² Aden muaquidēn chuisho tantiashun Esus tantiauidtsēcboedombi dadpenshun aidēn chiaid tantien-dac. Adashic Nuquin Papan chiaid niac-niaquec muaquido tabadac bimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. ³ Muaquido tantienda. Aidon piucquid comapenec bunquin ambembi chiaidquo mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantiashun aido cuidendac. —Adquid icsano nidmequin cuidendambi —quequin ambi ēndenquimboshē tantiapampicpadomboen comapenen Nuquin Papan cuidendac.

⁴ Ambi chiaid niac-niacsho icsano nidmequin cuidquid Nuquin Papa nendac. Ēndenquimboshē nidaid uabi icnuc ambi abi yacnoshon uaido mayan utsin-utsinquien: —Ēmbiquen abitedi namenu —quequin ambi chiaid niac-niacsho isun Nuquin Papan icsamboshē yacno nidmequin cuidpampic. —Chian anēdēnquiacno nēsecanumbi nabono —qeshun aden tauamboen Satanas chedo cuidpampic. ⁵ Adshumbic yuecquo ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unēs uapampic. Noeuidtsēqui padambo icpampic. —Bēdamboec tabadnuna —quequin Nuquin Papan chiaid chuibanquid icsho Noe chedo 8tedpactsēc Nuquin Papan cuidenquo icpampic. ⁶ Adshumbic yuecquo ictanquin matses utsibon Nuquin Papan chiaid niac-niacsho cuidquin nēdēncapampic. Shubu dadpen icquid nēid daēd icpampic. Nēidic Sodoma caid. Nēidic Comoda caid. Ambo tabadquido aton shububēdi abucuēsh taboadampamboec paēdquidēn pichiquepampic matses nibēdquo yec. —Aden icsambo icquido cuidquid nebi —quequin Nuquin Papan adopampic. ⁷⁻⁸ Sodoma caid yacnocquid abentsēqui Dod caid pichiquenquo icnuc Nuquin Papan cuemepampic. Bēdambo

icquid yec: —Nuquin Papan chiaid niac-niaquec nēmbo icquido icsamboecuidi tabadec —quec shubiec tsadsho cuemet-saidi pichiquiambo ictsampic. ⁹ Aden abi tantiaquido daëd Noebēda Dod Nuquin Papan cuidambo icpampic. Adembidi nēbi abi tantiaquido cuidenquio icquid Nuquin Papa nendac. Utsibon chieshēnaidi abi tantiaquido bēdambo icmequid nendac. Icsambo icquido cuidquid icquimbi matses cuidte ushē choabi icnuc nēbi tauaquin icsambo icquido Nuquin Papan cuidendac.

¹⁰ Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shēcuē nibēdacimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidtsēqui bunebi —qeshun ambi naiduidtsēqui naic. Dacuēdtiadquidi dacuēdenquio icquin Esus tantiaquido chuiquid dapa caic: —¿Bēdamboen namequidta nedic? —quequin icsamboen chuishunec. ¹¹ Padnuen Nuquin Papan abi yacnoshon uaido mayan bēdabon adec muaquido chuishuntiapimbo iquec. Muaquido bēdiactsec tantiaquido icnubi comapenen tantiaquido icquin mayan bēdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsēqui tantiaquid Nuquin Papa nec —qeshun adoenquio iquec. ¹² Padnuen ěmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bēdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

¹³ Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquiec inchēshēn icsash badiadēnsen icsaic: —Bēdambo iquebi —quec adquido cuishonquec. Esus tantiaquin penuec mibi cho-choacno mibēd tabadec muaquidotsen chopac caosh. —Esus tantiaquidbidi nebi —quiash mibēd tabadec aid icsasho isash: —Esus tantiaquid abitedi icsaic —quependac utsibo. ¹⁴ Muaquido utsin chido mēismec tabadec. Nuquin Papan chiaid niac-niaquec icsaic ěnēdenquio iquec. Adquid icquin Esus tantiatsēcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. ¹⁵ Nuquin Papan chiaid niac-niaquec icsateuidi bunquiec. Ěndenquimboshē matses utsi Beyod caidēn mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. ¹⁶ Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan

oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquo muaquido iquec. Piucquid comapenec bunec Nuquin Papan chiaid niactiadquio iquec.

17 —Mibi bēdambo icmete chuinu —quequin muaquidon chuisho tantiash: —Ai, mimi chiapadte bunebi —queuidtsiash matses. Uispa dadpen icboedi badiadnuc abu chēshēn bētinacsho isash: —Tanunquien badiadec —queuidacbimboec: —Ambi chiapadquio bēdambo icnu —queuidtsiash matses. Adec muasho tantiash: —Adquid chian anēdēnquiacno nēsecaindambi —quendac Nuquin Papa. 18 Adec muaquido abembi onqueuidequi onquec. Utsin chiaid tantienquio icquin ambi tantiaiduidi chiec naden. —Mibi bunacpadec mibitsen icsata —cac Esus tantiatsēcquin Nuquin Papan chiaid nauidsēcquimbi abi icsaid ēnuidboedi padpidemboec icsaquiec. 19 Muaquidon: —Nuqui bunaiduidi nanuna. Adec nuqui bēdambo ictsiac —quequin chuibanec. Adboedi abi icsaid ambembi ēntiapimbo yec icsamboshē iquec. Adec icsamianquidēn chiapadomboen naic matses icsaquid nendac. Adecbidi ambi naiduidi naic icsaquid matses nendac. 20 Nuqui cuidmenquio icquid Esuquidistu tantiatsēcquin abi icsaid ēnuidboedi padpiden Nuquin Papan chiaid niac-niaquec icsamboshē muaquido yanec. 21 Ēnden Esus chiondac: —Ai, aid tantiembi —quetsēccondaidi aden Esus tantienquio yanec icsamboshē yansho isun: —“Esus tantiembi,” quenquio icpatecnēdan —caimbi. 22 Adquid chuipanēdash naden. —Ambi ucbudaid opan chequid. Opa nesmiaqui nidaidēn nocoshquec padpidec bēchishoaquid —quepanēdash. Adecbidi Esus tantiauidtsēcquido icsaid ēnuidboedi muaquid padpidemboec icsadenechitequien iquec.

3

—Esus chote chiaid

1 Tania. Ēmibi tantiaido mibi neque. —Pabiate cuembo icquin Nuquin Papan chiaid tantiaquiec bēdamboec tabad —quequin mibi chuiquin dada uaondambi. Adomboembidi mibi chuiquin nēid dada uanu. 2 Esus chote chuiquin Nuquin Papan isadaidbo tsusedpabo dada uamepampid ¿ada tantie? Adomboembidi nuqui cuidmenquio icquidēn Nuquin Icbo Esusēn chuibanondash. Aidēn chiondaid abēd ictened utsin mibi chuinēdash. Aden chiaid tantiata. Aidbidi chuinu. 3 Esus nidaidēn padpidec choabi icnuc Esus tantiesabon abi icsate bunaiduidi naquin Esus mamēnshunendac. 4 —“Utsi uanuec padpidec nidaidēn choaindabi,” ¿quenēdaidta

chopec? Ma choenquio icpayoc. “Nëbi Esus choec,” quenedi con mëdimbo abitedi unësbudniac. Esus choambobi — quependac Esus tantiesabo. Nadembidi chiendac. —Taëec nidaid yanubi matses nidaidën tabadpampic. Adecbidi aton tsyuecquido tabadpampic. Nëbi adecbidi matses nidaidën tabadec. Èbi nibëdnuc adiquendac. Utsi uanuec Esus choenquio iquec —quependac Esus tantiesabo. ⁵ ¿Abimboda capec? Aden chuiquin Nuquin Papan chiaid tantienquio iquec. Èndenquimboshë ambi uaidtedi nibëdnuc: —Ad icta — quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid nënantan yampampic. Aden Nuquin Papan abitedi uapampic. ⁶ Aden abitedi uambic yuecquio ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin unës uapampic. ⁷ Aden ambi chiacpadomboen Nuquin Papan naindac. Ambi icsambo icquido cuidte ushën abu nidaidbëdta nëdëncaindac. Adembbidi matses Esus tantiesabo cuidendac.

⁸ Èmbi aden chiac: —¿Tedectsiash Esus chopeba? —¿quecta ique? Tantia. Mibi chuinu. Ambi tantiacpadëmbi Nuquin Papan Esus chomendac. Naden Nuquin Papan tantiec. — Dadpen seta icquid iquequi seta abentsëcbimboecquid nec. Adecbidi seta abentsëqui icquidquio iquequi dadpen seta icquidbimboecquid nec —quequin Nuquin Papan tantiec. ⁹ — Èdenquio: “Padpidec choendabi,” quenëdaidi Nuquin Icho Esus choenquien icchitec —quenubien Nuquin Papan: — Chiata. Cuidte bunenquio iquebique. Utsibontsen Esus tantishun ëmbi chiaid niac-niachoedi ënushë. Isbono. Ènacsho icsamboshë yacno nidmenquio ictsiambi —queshun Nuquin Papan Esus chomiabi iquec.

¹⁰ Adnubien matses: —Nëbi choec —quenquio icnuc Esus badedquio choendac. —¿Nëid ushëmbi ampequidën con na ampec —quequinda tantiapec? Padenquio. Adembbidi: —Nëbi choec —quequin tantienquio icnubi Esus choendac. Choshon acquimboen toncac abitedi nibëdanendac. Uispa yec inchëshën ushë yec badiadën ushë yec queboedi nibëdquiecnuc nëdëncaindac. Nidaid abichobimbo nëdënquenuc aidën icquidtedi nëdënquendac nibëdquio yec. ¹¹ —Nuquin Icho nac adquidtedi nëdënquendac —quiash Esus tantiec bëdamboequien tabadtiad. ¹²⁻¹³ Esus chobon Nuquin Papan cuidquin ambi uaidtedi nëdëncaindac. Abu yec uispa yec inchëshën ushë yec badiadën ushë yec queboedi nëdëncaindac nibëdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidën bëdambo ic-

quidoidquio nuqui tabadmendac. Ęmbi aden chuisho tantiash: —Ma Nuquin Papan Esus chomenu —quequin utsibo tantiamequin Esusēn naid chuibanec bēdamboec tabadnuna.

¹⁴ Ęmbi tantiaido mibi neque. Tantia. —Choshon abi yacno Esusēn nuqui tabadmendac —quec chieshtoenquio yec bēdamboec tabadnuna. Choshon Esusēn: —Mibi icsambo iquec —cainquio icnuc Nuquin Papan chiaid niaquenquio yec bēdamboec tabadnuna. ¹⁵ Adec tabadquimbi Ęmbi chui-boed tantiashun naden tantia. —“Utsitsen ma Esus tantiaquid yanu. Aden Esus tantiasho aid cuidenquio ictsi-ambi,” qeshun Nuquin Papan Nuquin Icho chomiabi iquec —quequin tantiec tabadta. Adembidi mibi chuiquin nuquin buchibimboecquidēn Pabadon dada uapaccondash. Nuquin Papan tantiamiac bēdamboen chiacondash. ¹⁶ Ęmbi chui-boedbidi chuiquin dada uadenepaccondash. —Pabadon dada uaid abentse-abentsec badedquio tantiadenuio iquec —qeshun utsibon aidēn chiacpadomboen chienquien icchitosh. Nuquin Papan chiaid niac-niactiadquio icquidon Pabadon chiaidquio tantienquio icquin icsamboen chiosh cashnad-cashnadacbitsēcquiecnuc. Nuquin Papan chiaidquio nuquin tsusedpabon dada uapampidtsen isbanshun adem-bidi tantienquio icquin icsamboen chiec. Adquido Nuquin Papan cuidendac.

¹⁷ Ęmbi tantiaido mibi neque. Tantia. Chuinu. —Abimbo tantienquio icquin Nuquin Papan chiaid niac-niacquidon muauaic —ēbi qesho tantiashun: —Esus tantienquio yamane. Muasho tantiatipimbo iquebi —quequin Ęnenquio icquin Esus tantianuna. ¹⁸ —Abi tantiaquid cuidmenquio icnuec abided ciudadec Esus unēspondash. Aid tantiasho Nuquin Papan nuqui bēdamboen isec —quequin Esus bēdiactsēc tantiatsēcshun comapenen Esus tantiaquionona. Adshumbic: —Nuquin Icho Esuquidistu bēdamboshē iquec —canuna Ęnenquio icquin. Padi. Aidedi chuiquin dada uaombi.

UANËN DADA UAIÐËMPI 1

Nuquin Papabëd ënëdenquo yec tabadte chianiaidquo

¹ Abia Yampidënquo matsesun Esuquidistun chuibansho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquo yec tabadte chianiaidquo nec. Aidquo chuiquin dada uaid nëid nendac. Aidquo tantiaquido icquin bëdamboen ista. ² Aid, abuc Nuquin Papabëd ënëdenquo yec tabadboedi nidaidënuësh matses icnuec chopanëdash. Choshon abipadquo yec Nuquin Papabëd ënëdenquo yec tabadte ismequin chianiaidquo ëbëd icquidobëdtan isteneshun chuibanec nebi. ³ Aidi ëbëd icquidobëdtan ispadened adembidi ëbëd icquidobëdtan tantiapadened chuibanec nebi ma mibitedishun tantiash shubu abentsëquën tabadacbimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadec nuqui bëdamboec tabadendac. ⁴ Esuquidistu tantiaquidtedi shubu abentsëquën tabadacbimboecquido nec, quequin chuiquin dada uaimbi ma aid tantiash, Cuishon. Bëdambo iquebi, quiacpadec ma mibitedi tabadpaneshun.

Nuquin Papa Bëdambocquid Abentsëcquiobi nec quiaid

⁵ Esuquidistun Nuquin Papa chuibansho nuqui tantion-dacpadomboen chuioaimbique. Tantiata. Nuquin Papa Bëdambocquid Abentsëcquiobi nec. Icsapenquiocquid aidi nec. ⁶ Adquid icnuc, Nuquin Papan shubun icquid nebi, queboedi ambi chiaid niacquin abipenquo chuiquid nuqui nendac. ⁷ Nuquin Papan chiacpadomboen nabanquidquo iquec abi tantiaquid utsibobëd shubu abentsëquën tabadacbimboecquid nuqui nendac. Adquid nuqui icmenuec nuqui ic-said bedshunash abided cuidadec Nuquin Papan Mado Esuquidistu unëspondash. Aid unësnëdaidënquo nuqui icsaidtedi paucbantequid nendac.

⁸ Icsaisa nebi, quequi mua uadquin abipenquo chuiquid nendac. ⁹ Icsaobique. Ebi pauc, Papa, qesho tantiashun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. ¹⁰ "Matses icsaisa nibëdquiec", quequin Nuquin Papan dada uamiampid icnubi, Icsaisa nebi,

quequin chiec, Muaquid Nuquin Papa nec, quiacbimboec adquid onquepec. Aden chuiquid Nuquin Papan pausun-temaid nendac. Adquid Esuquidistu tantiesa nec.

2

¹ Ma icsainquio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Èbi tantiaquid paucoata, quequin Nuquin Papan chiaid niaquesa icquin aton Madonquio Esuquidistun nuqui icsasho aden chiendac. ² Aidi matsestedi icsaid bedshunash abided ciudadec unëspondash.

³ Ambi chiacpadomboen nabanquin Esuquidistu tantiaquid nebi, qeshun nuqui tantiendac. ⁴ Esuquidistu tantiaquid nebi, qeshun Icbon chiacpadomboen nainquiocquin abipenquio chiendac adquidën. ⁵ Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aibdëd icquid nebi, quequin nuqui tantiendac. ⁶ Aden pausunac Nuquin Papan Madonquio bëdamboec tabadquin nabanacpadomboen naimbi, quec nidaidën bëdamboec tabad.

⁷ Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. ⁸ Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbisen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmënuquid icboedi aidën pausunac tantianquidquio yanec.

⁹ Esuquidistu tantiaquid nebi, qeshun abi tantiaquid utsi chieshënec Nuquin Papan tantiacpadomboen pausunacmaid adquid nec. ¹⁰ Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. ¹¹ Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuacbimboecquid adquid nec. Mayan icsan yua icquin ambi natiadquio yaid tantiesa nec.

¹²⁻¹⁴ Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun

chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

¹⁵ Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. ¹⁶ Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshënnquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. ¹⁷ Mayan icsan tantiaid ënëdendac. Aidën tantiacpadomboen tantiaquid icbobëd Nuquin Papa yacno tabadtiapimbo iquec. Nuquin Papan chiacpadomboen naquidien ënëdenquio yec Icbobëd tabadendac.

Esuquidistu chieshënnquid dadpen choendac, quequin chiaid

¹⁸ Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshënnquid dadpen choendac, quequin chiondacadpadquiec ënden chochoac. Dadpen cho-choacsho isun, Nëbi nëid nidaid naimbudendac, quequin nuqui tantiendac. ¹⁹ Esuquidistu chieshënnquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshënnquid iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquio icquido niosh, quequin nuqui tantiendac.

²⁰ Esuquidistu chieshënesa mibi nendac. Nuquin Papan aton Mayan meniac abimbo chiaid tantiaquid mibi nendac. ²¹ Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin

mimbi tantiendac. ²² ¿Tsutsi muaquid nepec? ¿quepecta mibi ique? Nuquin Papan Madombo nidaidëns hun chidon tishac matsesash aton Papan chuimaidquio nec, quesa muaquid nendac. Adquid Esuquidistu chieshënquid nendac. Abentsëcquidquibi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. ²³ Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

²⁴ Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubëd shubu abentsëquën tabadac bimboecquido mibi iquendac. ²⁵ Èbëd shubu abentsëquën nidaidën tabadac bimboecquido èbëd abuc ènëdenquio yec tabadte iquendac, quequin Esuquidistun chiaid nendac.

²⁶ Esuquidistu tantiaquid mibi icscho Nuquin Papan chiaid niacmenuequid iquec, quequin chuoaimbique. Tantiata. ²⁷ Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiaish bëdambo iquebi, mibi quendac. Aden Esuquidistun tantiamiaidquio yec abëd cuëshëdesa icnuec adequi tabadta.

Nuquin Papan chiaid tantiaquid ambi bacuë icmiaid

²⁸ Adembidi con nabo quequin mibi chuoaimbique. Adembi tantia. Esuquidistun chiaid tantiadonequieci tabadteneta. Adec tabadquin Esuquidistu choasho isash cuenenquio yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. ²⁹ Nuquin Papa bëdambocquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

3

¹ Matses tantiaquin naquidquio Nuquin Papa nec. Ma ëmbi unësquiocquin comapenen tantiaido èbëdi tabadpanueshun con bacuëbo caimbi, quequin Nuquin Papan icsaisanquio tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquio Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. ² Nuquin Papan comapenen tantiaido mibi

nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquio mibi icmendambi, çada Nuquin Papa capec? Padenquio. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquio nendac. Esuquidistu nuqui bedec chosho isash, Nëbi aidpadquidquio Nuquin Papan nuqui icmendac, quequin tantiemi, nuqui quendac. ³ Aid choabicnuc, Abipadquid iquendabi, quequin caindonequido nëbi Esuquidistu icsainquio yec tabadacpadquieci tabadte bunquid nuqui nendac.

⁴ Nuquin Papan nadec bëdamboec tabadta, quequin chiaid niacquid abibi icsaquid nendac. ⁵ Adnubien, Esuquidistu abuc tabadboedi nidaidënshun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquiocquid Esuquidistu nec. ⁶ Icbopadquidquio icnu quiash Esuquidistubëd tabadacbimboecquid icsadenesa nec. Icsadenequid, Nuquin Papan Esuquidistu tantiamiohi, quetiapimbo iquiec. Esuquidistu tantiesa adquio iquiec.

⁷ Con nabo, tantesa uamane queshun muaquin chuibanaid tantiesa icta. Esuquidistu bëdamboec tabadacpadquieci tabadquid icsaisa nec. ⁸ Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquiec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna. ⁹ Nuquin Papan con bacuë caido icsadenesa nec. Ambi con bacuë caido Nuquin Papapadquidquio yec icsadenetiapimbocquid nendac. ¹⁰ Mayan icsan yua Nuquin Papan chiapadomboen naisa nec. Utsi tantiesa adquid nec. Nuquin Papan chiapadomboen naquid Icbon bacuë nec. Icbon bacuë yec utsi tantiaquidquio nendac.

Esuquidistu tantiaquido tantiananaid

¹¹ Esuquidistu tantiaquid utsibo tantiaquiota, quequin chiaid nuqui abia tantiondaid nendac. ¹² Aton utsimbo chieshënquid Cain icpampidpadquid iquenda. Mayan icsan yua icquin aton utsi cuesunepampic. Aden cuesunaidën aton utsi Abedën abi tantiaquin nadenesho Nuquin Papan aid bëdamboen isnubi Cainën ambibi tantiacpaden nadenesho Nuquin Papan bëdamboen istiapimbo icpampic. Aden isac Cainën aton utsimbo Abed chieshënquid cuesunepampic. ¹³ Cainën aton utsimbo chieshënacpadomboen Nuquin Papa tantiesan Nuquin Papan con bacuë caidtedi

chieshënoaic. Nuquin Papa tantiesan mibi chieshënsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. ¹⁴ Esuquidistu tantiaquid tantienquiochoedi Esuquidistu tantiaquid yanash abi tantiaquid ut-sibo tantiaquidquio nuqui nendac. Aden abi tantiaquid ut-sibo tantiaquid icquin, Nuquin Papabëd tabadquidbimboecquid nebi, quequin nuqui tantiendac. Aton utsibo tantiesa cuëshëdacobimboecquid nec. ¹⁵ Aton utsibo chieshënquid, Con utsi cuesunenu, quiacbimboecquid nec. Adquid Nuquin Papabëd tabadtemaid nendac, quequin nuqui tantiendac.

¹⁶ Matses tantiaquin nashunquidquio Esuquidistu icpon-dash. Nuqui tantiec, ma ëbëd ënëdenquio yec tabadpanu quiash unësmene, quenquio yec nuqui icsaquido icsho cuid-nushe quiash abided cuidadec unëspondash. Abi tantiaquid icquin abi tantiaquid utsibo tantiaquin nashunec unësmene quenquio yec nuqui tabadendac. ¹⁷ ¿Aton nachoquid ic-nuc Esuquidistu tantiaquid utsin na nibëdquiocsho isec, Con utsi menenquio iquembi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. ¹⁸ Ëmbi con nabo caid, Utsi tantiec bëdamboec tabadquidquio nebi, quec onquequinuidi tantiec tabadenda. Utsi tantiembi, quequin mimbi chiacpadom-boen nabanquin ismeta. ¹⁹ Aden mimbi chiacpadomboen nabansho isun Nuquin Papan tantiamiac dacuëdenquio yec Nuquin Papa chuinu quiash abi yacno puduedquidbimboecquin nuqui chuided-chuidedec. ²⁰ Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuïta, quependac Nuquin Papa adquid caic.

²¹ Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënuquo Nuquin Papa bëisquidëmbimboen, Ëbi menepec, quequin dacuëdenquiocquin chianendac. ²² Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac. ²³ Naden tantiata, quequin Nuquin Papan chiaid nad iquec: Abëd Abia Yampidquio, Esuquidistu, nidaidënshun chidon tishac matsesaid Nuquin Papan chomiaid aton Madombo nec quequin nuqui tantiaidquio nendac. Adembidi Es-

uquidistun chiacpadec abi tantiaquid utsibobëd tantiana-nendac. ²⁴ Aden ambi chiacpadomboen naquidbëd Nuquin Papa iquec. Adquiduidquo Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

4

¿Nuquin Papan chiaidquiobida chuibanoshe? Isnu, qeshun Nuquin Papan chiaidquio isteneta quiaid

¹ Utsibo, Nuquin Papa chieshënquidën chuimiaido dadpen iqueque. Aidën chuimiaidën chuisho tantiashun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamiaidquio isteneta. ¿Adquiobida iqueque? Isnu, qeshun isteneta. ² Nuquin Papan pausunaidën naden chiendac: Nidaidënshun chidon tishac matsesaid Nuquin Papan chomiaid aton Madombo nec, quequin chuibanendac. ³ Nuquin Papa chieshënquidën chuimiaidën naden chiendac: Nuquin Papan chomiacmaid Esus niondash. Aid aton madopenquo nec, quequin chiendac. Aden chuiquid Esuquidistu chieshënquid nec. “Ëmbi chomiaid chieshënquid choec,” quequin Nuquin Papan chiampid mimbi tantiec. Aden chuiquid ënden dadpen chochoc.

⁴ Con nabo quequin Nuquin Papan aton Mayan meniac aidënquo tantiamiac Esuquidistu chieshënquidon chuisho, Tantianu, quesa mibi nendac. Nuquin Papan meniaidën tantiamiac Nuquin Papan chiaid chiac dëniacpadquiec mibi chieshënquid cuenendac. ⁵ Esuquidistu chieshënquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. ⁶ Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibansho Nuquin Papa tantiabenquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibansho, Tantianu, quesa iquendac. Adsho isun, Abipenquo chuiquidën yua nec, quequin nuqui tantiendac.

Nuquin Papan ismiac adecbidi tantiananquidquio ma nuquitedi icoapanuna quiaid

⁷ Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio

Nuquin Papan bacuë nendac. Adquid Nuquin Papa tantiaquidquo nec. ⁸ Utsi tantiaquidquo Nuquin Papa nec. Adquid icnuc utsi tantiesa yec, Nuquin Papa tantiembi, quetiapimbo iquec. ⁹ Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquo yec tabadendac. ¹⁰ Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuidmenquiocnoec abided cuidadec unëspondash. ¹¹ Nuquin Papa comapenen tantiaquidquo icquin Nuquin Icbopadquiocquin Esuquidistu tantiaquid utsi tantiaquiotiad. ¹² Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

¹³ Aton Mayan meniac ambi tantiamiaidquo yec Nuquin Papa ëbëd iquec, nuqui quendac. ¹⁴ Nuquin Papan Madomboen nuqui isaidquo icpadenec. Aden isboshon uquë nësiatiadquido nuqui icsho mënchicquid Nuquin Papan chomi-aid chosh, quequin nuqui chian-chianec.

¹⁵ Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniaid nec. ¹⁶ Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquo nendac. Adecbidi Icho abëd icquidquo nendac. ¹⁷ Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquo yec Nuquin Papa tantiaquid aton Madopadquiocquid Nuquin Papa yacno puduedendac. ¹⁸ Nuquin Papan tantiaid dacuëdenquo iquendac. Ambi tantiamiaid dacuëdesa nec. Abi tantiesa, Ebi icsaquid icsho cuidtsiash, quec dacuëdendac. Aidi utsi tantiesa yec dacuëdec.

¹⁹ Nuquin Papa Ambia Tantiaquid icquin ismiac tantiananquidombo nuqui nendac. ²⁰ Eëmbi isacmaidquo Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquo Nuquin Papa chieshënquid nendac. ²¹ Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

5

Nuquin Papan Madombo abimbo tantiaquid

¹ Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënuquo Nuquin Papa tantiendac. Adembidi Nuquin Papan con bacuë caid utsibo nuqui tantiendac. ² Ambi con bacuë caidën Nuquin Papa tantiaquin ambi chiacpadomboen naquidquio icquin ambi con bacuë caido nuqui tantiendac. ³ Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec. ⁴ Aden Nuquin Papan con bacuë caid icquin ambi chiacpadomboen nabanec tabadquin dëniacacimboen icsamenuquid nuqui cuemendac. Adembidi Abia Yampid nidaidënsnun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuquid cuenendac. ⁵ Esuquidistu Nuquin Papan Madombo Yampid nec, quequin tantiaquidënuquo ismiac icsamenuquid cuenendac. Ai, icsamenuquidën yuadesa Esuquidistu tantiaquidquio nendac.

⁶ Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidënsnun chidon tishac matsesash capusho acten mentoacsho: “Ëmbi bëdamboen tantiaidquio mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unësec aton Papa chiec: “Ëbi yuedta, Papa,” quiash Esuquidistu unësacsho nacsiaac aton intac chididiquepondash. Adashic, Nuquin Papa abimbo chuiquidpadquidquio icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui. ⁷ Nuquin Papa yec aton Mado yec aton Mayan yec quequin abucshun aitedishun abentsëc yacimboecquin Esuquidistu Nuquin Papan nidmiac chosho nidaidënsnun tishac matsesaid nec, quequin chuided-chuidedec. ⁸ Adecbidi nidaidënuësh Esuquidistu matsesacsho isun, Nuquin Papan Madombo nec, quequin ismenuc aton Mayan abucuësh budash aidbëd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuioapondash. Adembidi yuecshun ambi chiacpadec unëso isun, Con madombo nec, quequin inchëshacimboecnuc icmequin Nuquin Papan nadatiambocquin ismebampondash. ⁹ Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi,

Unëso isombi, quequin isondaidën chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac. ¹⁰ Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuioapec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacbimboen chuiquid nendac. ¹¹ Con Madombo, Esuquidistu nec, quequin Nuquin Papan chiaid tantiaquidquo abi yacno nidash abëdi ënëdenquo yec tabadendac. Matses icsaid bedshunash abided cuidadec aton Mado unëspanëdash, quequin tantiaquid Nuquin Papa yacno tabadtequid nuqui nendac. ¹² Esuquidistu tantiaquid ënëdenquo yec Nuquin Papa yacno tabadendac. Aid tantiesa aaidbëd tabadtiapimbo iquendac.

Ma tantiaquidquo mibi icpanuequin chiaid

¹³ Nuquin Papan Madombo Esuquidistu nec, quequin tantiaquid, Icbobëd ënëdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. ¹⁴ Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. ¹⁵ Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

¹⁶ Esuquidistu tantiaquid nebi, queboedi icsasho isun, Cuëshëdnushe queshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëdnushe queshun aid bëdamboen tabadme, Papa, cainda. Nuquin Papan chiaid tantiate bunesa aid nec. ¹⁷ Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpïdec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquo yec Nuquin Papabëd tabadendac.

¹⁸ Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënquidën adquido yuadtiapimbo iquendac. ¹⁹ Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënquidën yua nec, quequin nuqui tantiec. ²⁰ Nuquin Papan Madombo abuc abëd icboedëmbi nidaidënshun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui

tantiendac. Aïdbëdquiocquid nuqui nendac. Aton Madombo aton Papabimboecquid nec. Aïd tantiec aïdbëd ënëdenquio yec nuqui tabadendac, quequin nuqui tantiendac.

²¹ Con nabo, Nuquin Papabëdtactsëqui aton Madombo Esuquidistu tantiaquid icta. Ütsin nacnenaid ismequin, Nuquin Papa neque. Nëid tantiaquiota, cac tantienda. Esuquidistu nebi, qesho adembidi tantienda.

Nëbi padi. Aïdted chiombi.

UANËN DADA UAIDËMPI 2

Nuquin Papan chiaid abimbo iquec, quequid tantiaid

¹ Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiacpadquieic icquin mibëd Nuquin Papan chiaid tantieic iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiasash mibitedi tantieic tsadebi. ¿Ëbentsëquidabi mibitedi tantieic tsadpe? Padenquio. Aden chuisho tantiasash utsibotsen adecbidi mibi tantieic tabadoaic. ² Nuquin Papan chiaid abimbo iquec, quequin ënenquiocquin nuqui tantiendac.

³ Uquë nësiatiadquido nuqui icsash abëdi ënëdenquio yec nuqui tabadmenuec nuqui icsaid bedshunash abided ciudadec Esuquidistu unëspondash. Ademebidi ambi chiaid tantiaquido utsibobëdta bëdamboen tabadmiaido nuqui nendac. Nuquin Papabëdtan aton Mado Esuquidistun adquid icmiac, Ambi chiaid abimbo iquec, quequin tantieic utsibobëd tantiananquidquio nuqui nendac.

⁴ Mimbi chiac utsi-utsieic Nuquin Papan chiacpadomboen nabanec tabadsho isash bëdambo iquebi. ⁵ Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna. ⁶ Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiacpadquieic ma tabadpanuna.

Muaquin chuiquid

⁷ Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chiendac. Adquid muaquin chuibanec Esuquidistu chieshënquid nec. ⁸ Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. ⁹ Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabëd tabadachimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadachimboec tabadendac. ¹⁰ Esuquidistu Nuquin Papan Madombo nec, quequin chiesha

chosho isun yuedenda. Adembidi, Bëdambo icta, quequin adquid chienda. ¹¹ Adquid yuedquid ambi yuedaidbëdtan muaquin chuiquin ismequid nendac.

Ënquin chiaid

¹² Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibëdi onquebi.

¹³ Mibitedi tantiec tsadebi, quequin chuita quiosh ëbëd Nuquin Papan chiaid tantiec iccuededquido. Adembidi dada uaimbi.

Padi. Aidtedi dada uaombi.

UANËN DADA UAIDËMPI 3

Cayon naid chuiquin utsibon chiaid

¹ Ēmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

² Mimbi Nuquin Papan chiaid tantiapadquiec min nami bëdambo icpashun. Adembidi Nuquin Papan chiapadec tabadquin ismiac ma utsibobëd bëdamboec tabadpanuna.

³ Mibëd icquidon nëmbo choshon naden chioishi. Esuquidistun chiapadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. ⁴ Mimbi chuibanac Esuquidistu tantiaquin muainquiocquin utsibon chuioaic, quequin chuisho tantiash bëdambo iquebi, quec tsadebi. Ēmbi con mado caidën bëdamboen naid chuisho tantiash bëdambo iquebi.

⁵ Mimbi yuedaidon naden chioishi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioishi.

⁶ Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbi naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimiaidquio nec.

⁷ Aido isadaidpembo chuinuec nidshun adquid yacno choshon Esuquidistu tantiesa nec quec ëbi yued quetiapimbo iquebi quec Esuquidistu tantiaquid mibi icsho isash, Ēbipadquid nec, quiash mibi yacno puduedendac.

⁸ Esuquidistun chiaid tantiaquid icquin Esuquidistu tantiaquid ambi chuimiaido yuedtiad. Adoquin aidobëdtambi Esuquidistun nacpadomboen ismendac.

Diotedepesën icsamboen naid

⁹ Mibëd iccuededquido aden chuiquin dada uaondambi. Aden ëmbi dada uaid bedash: “Ēmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. ¹⁰ Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

Demetedio caid bēdambocquid nec, quequin chiaid

¹¹ Aidën nacpadec icsainda, caimbi mibi. Nuquin Papan Icsaisanquio chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac. ¹² Utsien Demetedio caid bēdambocquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquio nec, quequin ëbēd icquidobēdtan chuioaimbi. Uanën chiaid abimbo iquec, quequin mibitedishun tantien-dac.

Ënquin chiaid

¹³ Dadpen dada uatiadquiocquimbi daēdpactsēc dada uaombi. ¹⁴ Daēdec ushtanquin mimbi ispashuni. Mibi yacno nidash mibēdi onquendabi.

¹⁵ Esuquidistun chiaid tantiaquid utsibēd bēdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nēmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanoata.

Padi. Aideded dada uaombi.

UDASËN DADA UAID

Tauamboen chiaid

¹ Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiasho isash: —Ëbi tantienquio yanushe —quiash Esus mibi cudasec. ² —Aido bëdamboen isquin bëdambo icme, Papa —quequin Nuquin Papa chianembi mibi tantiaquin.

Muaquido iquendac, quequin chiaid

³ Ëmbi tantiaido mibi neque. Tantia. Nuqui cuidmenquio icnuec Esus abided cuidadec unësaid tantiateuidi mibi chuitiadquio iccobi. Adnuc: —Esus tantiaquido iccuededacno muaquido puduedosh —quesho tantiaboshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquio mimbi chiec. Aid tantiatipimbo iquebi —cata. Nuquin Papan tantiacpadomboen Esusën abëd icquido chuibanëdaid nuqui tantiaid neque. Utsi tantienda. ⁴ Esus tantiaquido mimbi danubi mibi icsamenuc mibi yacno muaquido puduedac caosh. Ambi ëdenquio tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bëdamboen isaïdo icsauidequi icsho nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bëdamboen isec —quec comapenec muaique. Muasho tantienda. Esuquidistu Nuquin Icho abentsëcshun chiaid niac-niaquec icsaique.

⁵ Adquid Nuquin Papan comapenen cuidendac. Tantia. Nuquin Papan cuidampid mimbi tantianëdaid mibi chuinu. Equipito yacnoshon unësmenuen ancanquidën icsamboen chonoa uasho isun ashunquio Nuquin Papan con matses isadaïdbo tsusedpabo puduamepampic. Adoac yuectanquin puduamïaidombi ambi chiaid niac-niacsho isun Nuquin Papan uesquin unës uapampic. ⁶ Adembidi utsibotsen cuidpampic. Abëd icpampido ambi abi yacnoshon uaido mayan chedo abëdtan namequido ichoedobi Nuquin Papan chiaid niac-niacte buncuenash Nuquin Papabëd icte bunenquio yampampic. Adec Satanasho chedo abëd icte bunenquio icsho isun puduentiapimbo yacno icsamboshë yacno Nuquin Papan nidmepampic. —¿Ada mibi bëdambo icti? Mibi icsamboshë iqueque. Mibi cuidnu —quetequid ushën padpiden uesquin cuidnumbi adopampic. ⁷ Adembidi shubu dadpen yacnocquido cuidpampic. Shubu dadpen icquid Sodoma

caid yacnoshon dadan aton chidopenquoio chudnubi adem-
bidi chidon aton bënëpenquoio chudmepampic. Dada aton
dada utsibëdi chichudnanquidquoio icpampic. Shubu dad-
pen icquid Comoda caid yacnocquido adecbidi icsapampic.
Shubu utsi-utsiec uanocquido adecbidi icsamboecuidi tabad-
pampic. Adsho isun cuidquin Nuquin Papan nêdëncapampic
nibêdquiec nuc. Aido cuidampid tantiaquin: —Adembidi ic-
samboec tabadquido abitedi cuidquin Nuquin Papan chian
anêdënquiacno nêsecaindac —quequin nuqui tantiec.

Muaquido icsaid

⁸ Cuidte tantienquoio yec adecbidi muaquido icsamboecuidi
tabadec. Aton dada utsibëdi chichudnanquido nec. Abi
chuiquid dapabon chiaid niac-niacquinc Nuquin Papan chi-
aid niac-niacquinc caindac. Adembidi Nuquin Papan abi
yacnoshon uaido mayan bédabo caic: —¿Nadatiambo icquidta
nedic? —quequin muauaic. ⁹ Mayan bédabo chuiquid dapa
Miqued caidën adotiapimbo icpampic. Aidi Moises unêsacsho
isash: —Chococanu —quesho podobitsi icsabon icbon Sa-
tanasën: —Ëmbiquen bednu —catuidpampic. Adoac: —Icsano
nidta —cainquoio icpampic Miquedën. Adenquoio icquin: —
Nuquin Papambien mibi cuidec —capampic Miqued caidën
mayan bédabo namequid dapa icquin. ¹⁰ Muaquidombien
ambi tantienquoio yaid icsamboen chuishunec. ¿Ada bëdi cuid-
nushe quepadic? Adembidi abi cuidte tantienquoio icquin
ambi tantiaiduidi naic tabadsho Nuquin Papan cuidendac.

¹¹ Cain caidbimboecquid muaquido nec. Nuquin Pa-
pan chiaid niac-niacquin abi bunaid naiqui icsaic. Badan
caidën piucquid bednuen Nuquin Papan chiaid niactiadquoio
yampampic. Adembidi piucquid bednuen muaquidon am-
benquiobi chiec. Code caidën abi chuiquid dapan chi-
aid niac-niacpampic. Adembidi abi chuiquid dapan chiaid
muaquidon niac-niaquec. Adsho Nuquin Papan comape-
nen cuidendac. ¹² Muaquido icsambo iquec. Mibi ic-
sametiadquien icchitec. Esus tantiaquidon pebededacno
puduedshun mibêdtambi muaquidon piac caosh. —Esus
tantiaquidquoio nebi —quiash puduedash dacuëdenquoio yec
icsaiqui tabadec. —Esus tantiaquido chuibanquid nebi —
¿quec muaquidonda Nuquin Papan chiaid chuipadic? Paden-
quoio. Ambi naiduidi naquin ambembi chiaid chiac matses
nadquoio iquec. Uispa dadpen icboedi badiadnuc abu chëshën
bëtinacsho isash: —Tanunquien badiadec —queuidachimboec
matses iquec. Pete ambi nitsinaid unêsacsho istuidash: —
Pete nitsinuidombi —quiachimboec muaquidon chuisho tan-
tiaquido: —Bêdamboen chiaid tantianu —queuidendac. ¹³ Acte
têccuasquequidën cuëmano nushan uaquin icsa uacbimboen

icsaquin muaquidon mibitsen icsamec. Abi capuaid tantien-
 quio yequi: —Ëbi capuaid tantiaquidquio nebique. Isec
 cho —queboedi bēnudtaniacimboen: —Nuquin Papan chi-
 aid tantiamequidquio nebi —queboedēmbi tantiamenquio
 iquec. Adec muasho cuidquin Nuquin Papan puduenti-
 apimbo yacno icsamboshē yacno nidmendac.

¹⁴ Adquido con tsusedpa Enoc caidēn chuipampic. Abia
 matses uaid Adanēn madon baban tishmiaidēn baba Enoc
 nepampic. Naden chuipampic. “Nuquin Papan abi yac-
 noshon uaid mayan bēdabo dadpenquioshē Nuquin Icbobēd
 choendac. ¹⁵ ‘¿Ada mibi bēdambo icti? Icsambo icquid yec mibi
 icsauidequi iccoc. Mibi cuidnu,’ quequin matses icsambo ic-
 quido cuidnuec Nuquin Icho choendac. Nuquin Papa icsam-
 boen chuishunquinc Nuquin Papan chiaid niac-niacquinc
 caquido cuidnuec choendac,” quepampic Enoc Esus matses
 cuidnuec chote chiec. ¹⁶ Aidēn cuidtequido muaquido abi
 chuiquid dapabon chiaid cacuidec: —Icsambo iquec. Ad-
 tiapibi —quec chieshēmēnec tabadec. Abi bunacpadecuidi
 icsaquiec. —Ëmbentsēqui bēdamboen naic —queuidequi iquec.
 —Ëmbi tantiacpadomboen ma nanu —quiash matses chiec: —
 Ëmbi tantiaidquio mibi nec —quec muaic.

Esus tantiaquionona, quiaid

¹⁷ Ëmbi tantiaido mibi neque. Tantia. Esusbēd iccondaidon
 chiaid mibi chuinu. ¹⁸ Nadpondash. “Esus padpidec
 choabi icnuc Nuquin Papan chiacpadec bēdamboec tabad-
 sho Esus tantiesabon mamēnshunendac. Nuquin Papan chi-
 aid niac-niaquec abi bunacpadec icsaquiendac,” quepon-
 dash. ¹⁹ Adquio muaquido iquec. Aton padi yec icsaiqui
 chieshēmēnquin mibi cuēsh-cuēshēdmec. Nuquin Papan aton
 Mayan aidobēd tabadmenquio iquec.

²⁰ Adquid icsacpadec icsainquio icquin Esus
 tantiatsēchoedēmbi Nuquin Papan chiaid isban-isbanquin
 ēnenquio icquin Esusbēdta Nuquin Papa tantianuna. Nuquin
 Papan Mayanēn tantiamiacpadomboen Nuquin Papa
 chianenuna. ²¹ —Abi tantisho bēdamboen isquin abi
 yacno Esusēn nuqui tabadmendac —queshun Esus chosho
 isnuen cainquin aidbēdta Nuquin Papa tantianuna. —
 Nuquin Papan ēbi tantiec —quequin ambi chiacpadomboen
 utsibo tantianuna. ²² Adshumbic Nuquin Papan chiaid
 tantiatsēcquido bēdamboen isnuna. Adquidon muaquidon
 chuisho tantiaish: —¿Abimbobida capeba? —quesho tantiaishun
 nēishenquio icquin Nuquin Papan chiaidquio tantiamenuna.
²³ Bacuēmpi cuēten pichiquetsensho: —Baded bed.
 Taidnushe —quiacbimboen —Icsano nidmequin Nuquin

Papan cuidnushe –queshun utsibo Esus tantiamenuna. Icsaquidotsen bēdamboen isnuna. Esus tantiamenuen aido bēdamboen isec: –Ēbitsen icsamane –quiash aido icsacpadec icsainda. ²⁴ Nuquin Papa bēdamboshē iquec. Aid tantiasho nuqui icsamenquo iquendac. Adshumbic: –Icsambo mibi iquec –utsibo quetiapimbo icnuc bēdambo icmeshun bēdamboshē yacno abēdi nuqui tabadmendac. Adoac nuqui cuishonquendac. ²⁵ Aden tantiaquin nadonona. – Abipadquid utsi nibēdnuc abentsēcquiobi Nuquin Papa iquec. Nuquin Icbo Esused cuidshun abi tantiaquido cuidenquo icquid nec. Abitedishun Icbombo Nuquin Papa nec. Nadatiambo icquin nabanquidquo nec. Abitedi chuiquid dapambo yec abitedi namequidquo nec. Bēdamboshē iquec –canuna ēnenquo icquin. Esus tantiaquido icquin adonona. Padi. Aidedi chuiquin dada uaombi.

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ² Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. ³ Nëid dada uaid tantiaish chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵ Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemiaidquio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided cuidadec unëspondash. ⁶ Abi tantiaشو Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin. ⁷ Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte

tantiec dacuëdec natiaic shubiendac. Esus tantiesabo utsibot-sen adecbidi abi cuidte tantiec natiaic shubiendac.

⁸ Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquo nebi. Nidaid uabi yec ictenedi nebi. Nëbi adquid yec nibëdantiapimbo icquidquo nebi. Adquid yec abitedishun Icbombo nebi — queposh Nuquin Papa. Aidquio tantianuna.

Dacuëdampamboecnuc Esusën ismiaid

⁹ Esusbëd ictened Uan nebi. Mibëdtan Esus tantiaquid yec min utsibimboecquid nebi. Mibi yacpadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenuo iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacbimboen cuemenquo icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi. ¹⁰ Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacimboec comapenec onquesho tantiapombi. Ushenquo icquimbi ushqin isacimboen tantiombi. ¹¹ Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidtedishun iste dada uashun buame —quequin comapenec onquequin chuiposhi.

¹² Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaaidquo neposh. ¹³ Aid nënantanquo Esusquo icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiacosh. Abi shictonquete bëshpiu-bëshpiuctsëcquid nuacquid dapambo icposh. ¹⁴ — Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquo nec —camenuc cuëte isquidbimboec aton ëshë isquid-isquidquo icposh. ¹⁵ —Utsin: “Ëmbiquen abitedi namenu,” catiapimbo icnuc abitedimbo namequid nec — camenuc shocosh piu nacnenaaidbimboec nac-nacquo aton taë icposh. —Nuquin Papapadquidquo nec —camenuc acte chodoquiacbimboec comapenec onqueposh. ¹⁶ Abiucshun uispa 7tedi sanamposh. Chështe cuënumbo icquid ana

shëcuënuësh cueshqueposh. —Matses icsaid cuidquidquo nec —camenuc adposh. Aton bêtantete ushëbimboec bëchamauanquiecposh. —Bëdambo icquidquo nec —camenuc ad icposh.

¹⁷ Dacuëdampamboecsho istanequini Esusën dayumbi uebudpaccoc unësaniac bimboec padishec. Adshobini Esusën camishquin bëdameposh. —Dacuëdenda. Nuquin Papan padquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Icbombo nebi. ¹⁸ Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

¹⁹ Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. ²⁰ Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibancho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquo ëbibi iquebi —quequin aden ismeposhi Esusën.

2

Epeso yacnocquido Esusën chiaid

¹ Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquo abibi icquin ismioshi. —Ëbi tantiaquido chuibanquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. ² Mimbi naidtedi tantiaquid nebi. Dayacquio icquin ëmbi chiacpadomboen mimbi dadpen nabanoc. Utsibo chieshtonobi chieshtoenquo icquin mimbi ëbi tantioc. Ëbi tantiaquido icsamenuen chiec: ‘Esusën namiaidquo yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquo mimbi chuibanoque. Utsibo chienda,’ quequin mimbi aidon chiaid tantienquo iccoc. Aden mimbi bëdamboen naoc. ³ Adembidi utsi-bon chieshënaqui chieshtoenquo icquin Nuquin Papan chiaidbëdta ëmbi naid mimbi chuibanoc.

⁴ Aden bēdamboen nasho isun mibi icsaid abentsēc chuitsēcnu. Tauamboen mimbi ēbi tantiaquiopadenec. Aden ēbi tantiaquidquio icquin mimbi utsibotsen tantiaquiopadenec. Adodenedēmbi pacuēnēdacimboen ēbi bēdiactsēc tantiatsēcquin utsibotsen mimbi bēdiactsēcbiidi tantiatsec. Adec mibi icsacuededec. ⁵ Ēmbi chuiboed tantiash: ‘Ai, abimbo caic. Tauamboen Esus tantiaquiondaidi nēbimbi bēdiactsēc tantiachitec. Adchitequini icsaoc,’ qeshun tauamboen mimbi naondacpadomboen ēbi tantiaquiota. Adembidi utsibotsen tantiaquiota. Adoenquio icshoembi mibi yacnoshon ēmbi chiaid mibi chuibanquid nibēdmendac. Adnuc ēbi tantiec cuēdēnuec mibi pudued-puduedenquio ictsiandac. ⁶ Mibi icsaid ēnquin chiombi. Nēbi mimbi naid utsitsen isash bēdambo iccobi. Mibi cuēdēnacno puduedshun nicodaitabon mibi icsamenuen icsamboen chuisho tantiashun: ‘Aido icsamboshē iquec,’ mimbi caoc. Adembidi aido bēdamboen istiapimbo icoaibi. ⁷ Nēbi ēbi tantiaquido utsibo chuinu. Ēmbi Epeso yacnocquido chuibocpadomboen con Mayanēn mibitsen tantiametsiashe. Pabiate cuembo icquin ēmbi chiaid tantiata. Satanasēn: ‘Icsamenu,’ caqui chieshtoenquio icquin ēbi tantiasho Nuquin Papa yacno ēbēdi tabadmendambi. Tauamboen matses uashun Nuquin Papan aid dada tsadacno tied bēdamboshē yacno tied nēnantan icquid cuēte matses unēstiapimbo icquid icmete icmepampic. Aid cuēte bacuē meniachimboecnuc mibi padpidec unēsenquio icnuc ēbēdi tabadmendambi,” quequin ēmbi chuiboed dada uata –quequin Esusën chuiposhi.

Esmidina yacnocquido Esusën chiaid

⁸ Adshumbic Esusën padpiden chuioaposhi. Aid nidaid uabi yec icpampidi nēbi adquid yec nibēdantiapimbo icquid nec. Adquid yec abitedishun Icbombo icshobi chieshēmēnquidon unēs uacsho chococaqui uincuem-paccondash. Adondaaid yec unēsaid uincuemquidquio nec. Aidēn naden chuiposhi. –Esmidina yacnocquidon ēbi tantiaquidon iste ēmbi naden chuiboed dada uata. “Tantia, Esmidina yacnocquido. Mibitedi chuinu. ⁹ Ēbi tantiaquido icsho utsibon chieshēnac mimbi dayun uaid nibēdquindac. Nēbi mitsana nibēdquid yequi con Pa yacnuēsh dadpen dayun uaquidbimboec mibi bēdamboshē iquendac. Chieshēmēnquidon mibi icsamboen chuishumboedtsen tantiembi. Mibi yacnoshon Satanasēn namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquio yec Satanasēn yuaboen nec. ¹⁰ Aido tantiash: ‘Ashibi mēyampatsiash,’ quec dacuēdenda.

Satanasën: ‘¿Ada Esus tantiaquido chieshtoenquio ictsiashe? Tanu,’ quequin namiacpadomboen chieshëmënquidon mibi utsi-utsien quënën nauedbanendac. Adoac daëdpactsëc ushec mibi mëyadendac. Puduenabi yec chieshtoenda. Chieshëmënquidon: ‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. ¹¹ Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquio icquin ëbi tantiasho isun icsaido cuidquiacno nësecainquio iquendambi,” quequin ëmbi chuiboed dada uata –quequin chuiposhi Esusën.

Pedcamo yacnocquido Esusën chiaid

¹² Adoshombic ana shëcuënuësh chështe cuënumboshë icquid cueshqueboedën Esusën naden chuioaposhi. –Pedcamo yacnocquidon ëbi tantiaquidon iste ëmbi naden chuiboed dada uata. “Tantia, Pedcamo yacnocquido. Mibitedi chuinu. ¹³ Mibi yacno Satanäsën yuabo dadpen icnuc ëbi tantiec mibi chieshtoenquio iquec. Ënden Satanäsën namiac mibi yacnoshon chieshëmënquidon con yua Antipas caid cuesunepondash. Aidën chieshtoenquio icquin ëmbi naid chuiban-sho cuesuniacsho isumbic adembidi chieshtoenquio icquin mimbi ëbi tantiaquiopondac. Aden mimbi bëdamboen naid tantiemi.

¹⁴ Adondaaid tantiaquin mibi icsaidtsen chuinu. Mibi cuëdëncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: ‘Isadaidbo aquec cho,’ cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi. ¹⁵ Adec nicadaitabo caido ëbi tantiate shubun puduedash mibëdi cuëdëncuededec icsamiente bumpec. ¹⁶ Aidon chiaid tantienda. Ëmbi chiaid mibi niac-niacmenushë. Aidobëd tabadenda. Mibi cuëdëncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacbimboen mibi cuidtsiambique. ¹⁷ Nëbi ëbi tantiaquido utsibotsen chuinu. Ëmbi Pedcamo

yacnocquido chuibocpadomboembidi con Mayanën mibitsen tantiametsiashe. Pabiate cuembo icquin ëmbi chuiboed tantiata. Chieshtoenquo icquin ëbi tantiasho bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaidquio yec ëbi yacno puduedtequid nec,’ qeshun cuënote ushu menendambi. Abi cuëmëdquid icnubi utsi uain cuënquin aid cuënoten dada uatanquin menendambi. ‘Ëmbi meneboedënuidtsëqui ma isnu,’ quequin adoendambi,’ quequin ëmbi Pedcamo yacnocquido chuiboed dada uata —quequin chuiposhi Esusën.

Tiatida yacnocquido Esusën chiaid

¹⁸ Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquio yequi aton taë shocosh piubimboec nac-nacpambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquio icquin matses cuidquidquio nec —camenuc adquio isadquidën naden chuiposhi. —Tiatida yacnocquidon ëbi tantiaquidon iste ëmbi naden chuiboed dada uata. ¹⁹ “Tantia, Tiatida yacnocquido. Mibitedi chuinu. Mimbi naid abitedi tantiembi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiash,’ quequin chieshtoenquo icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquo icquin ëbi tantiapec. Tauamboen ëbi tantiaquin daëdpactsëc naondaïdi nëbi ëbi tantiaquioshon ëmbi chiacpadomboen mimbi dadpen naic.

²⁰ Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquio yec mibitedi icsaic. Mimbi cacumiabi mibi iccuededacno isadaidbo tsusedpan chido Esabed caidbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaid chuiquid nebique. Tantia. Chuinu,’ quequin abi bunaidquidquio chuibanosh. Adoac ëbi bëdiactsëc tantiauidtsëcboedi aidën chiacpadec icsacuededposh. Nuquin Papapenquio utsibon papa caid tantiabededacno puduedposh. Adshumbic aidon papa quequin dasamboed nëish pichicaïd pec tabadcuuededquimbi aton chidopenquio chudbededposh. ²¹ Adsho isun aid chido: ‘Ma abi icsaid ënu,’ qeshun badedquio cuidenquio iccombi. Adoboqui abi icsaid ënte bunenquio iccosh. ²² Adec abi icsaid ëntiapimbo icsho isumbimbi nëbi cuidendac.

Ëmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naid ënshoembi cuidenquio ictsiac. ²³ Aid chido cuidquioquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquiendambi. Ëmbi adosho isun ëbi tantiaquidtedishun: ‘Matsesën otacquio tantiaid tantiaquidquio Esus nec. Adquid icquin abi icsaid ënenquio icquido cuidquin abi tantiaquido bëdambo icmendac,’ quequin tantiatsiash.

²⁴ Tantia. Ambocquido ëbi tantiaquidombotsen chuinu. Aden Satanasën chuimaidën chuisho: ‘Aden chuisho tantiapimbo iquebi,’ mimbi capoc. Aden bëdamboen nasho isun utsi chienquio iquembi. ²⁵ Nëiduidtsëqui chuinu. Mimbi bëdamboen nabocpadomboen chieshtoenquio icquin ëbi tantiaata. Ëbi choabi yacpadembi adota. ²⁶ Choshombimbi chieshtoenquio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac. ²⁷ Aden Nuquin Papan aido ëbëdta chuiquid dapa icmiacsho utsibon: ‘Dëniacquin ëmbiquen nanu,’ catiapimbo iquendac. Ëbi chieshënquido: ‘Esus dëniacquin ëmbiquen matses namenu,’ qesho tantiashun matsu nacnenquidën ambi nacnenaid icsambo icsho isun pos-posacimboen cuidquiendambi. ²⁸ Badiadte anoentsëc uispa dapa choded-chodedbocpadquiec ënëdenquio yec ëbi tantiaquidobëd iquendabi. ²⁹ Ëbi tantiaquido utsibotsen chuinu. Ëmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin tantiaata. Chieshtoenquio icquin ëbi tantiasho adembidi bëdambo icmendambi,” quequin ëmbi chuibod dada uata –quequin chuiposhi Esusën.

3

Sadis yacnocquido Esusën chiaid

¹ Adoshombic Nuquin Papan Mayan abi tantiaquidobëd tabadmequidquio icquin Esusën padpiden chuiposhi. –Abi tantiaquido chuibanquid namequid nec –camenuen uispa 7tedi sananquin ismeboedën naden chuiposhi. –Sadis yacnocquidon ëbi tantiaquidon iste ëmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bëdamboec tabadquido danquin utsibon: ‘Bëdambo icquido nec,’ mibi canubi ëmbien adotiapimbo iquec. Mibi bëdapenquio iquec. Unësacimboen mimbi ëbi bëdamboen tantienquio iquec. ² Isucunacimboen ëbi padpiden tantiaquiota. Nuquin Papan chiacpadomboen mimbi nauidtsëccoque. Mimbi ëbi tantienquio iqueque. ‘Nuquin

Papan chiacpadquieç bēdamboec tabadnuna. Esus tanti-aquionona,' cananta. ³ Mimbi ëbi tantiabenondacpadom-boen ëbi tantiaquiota. Bēpiscudenda. Nēbi mibi icsaid ēnshun ëmbi chiacpadomboen naoata. Isucunenquio yacbimboen ëbi tantienquio icshoembi mibi cuidendac. 'Ampequid choec,' quequin tantienquio yacbimboen ëmbi cuidte tantienquio icsho mibi cuidtsiambique. Ëbi tantiaquiota.

⁴ Mibi yacno icsaquido dadpen tabadnubi utsi-utsieç daēdpactsēc ambi naid icsa ucudacimboec icsainquio yec bēdamboec tabadec. Adec bēchish ucudacimboec abi icsaid ēnash bēdamboec tabadsho isun ëbēdi tabadmequin icsaisa icmendambi. ⁵ Ëbi tantiaquido utsibotsen chuinu. Ëmbi chuibocpadquidēn chieshtoenquio icquin ëbi tantiasho adembidi bēdamboen isun Nuquin Papa yacno ëbēdi tabadmequin icsaisa icmendambi. Aido cuēmēdquid cuēmēdquidquien Nuquin Papa chuibanendambi. 'Aido ëbi tantiaquidotedi neque. Nuquibēd tabadmenuna,' quequin adoendambi Nuquin Papan abi yacnoshon uaido mayan bēdabontsen tantianuc. Aden dada uaid ucudenquio yacbimboen bēshunenquio icquin ëbēdi tabadtequido abitedi tantiemi. ⁶ Ëmbi Sadis yacnocquido chuiboed Nuquin Papan Mayanēn mibitsen tantiametsiashe. Pabiate cuembo icquin bēdamboen tantiata. Chieshtoenquio icquin ëbi tantiasho adembidi bēdambo icmendambi," quequin ëmbi chuiboed dada uata –quequin Esusën chuiposhi.

Pidadepia yacnocquido Esusën chiaid

⁷ Adoshombic icsaisambo icquin ambi chiacpadomboen naquidēnquio Esusën padpiden chuiposhi. Con tsusedpa Dabid yampicpadquid matses namequidquio yec ambentsēqui Nuquin Papa yacno puduedmequid nec utsibon: –Padi –catiapimbo icnuc. Abi tantiesabo cacumequid Esus nec. Aidēn naden chuiposhi. –Pidadepia yacnocquidon ëbi tantiaquidon iste ëmbi naden chuiboed dada uata. ⁸ "Tantia, Pidadepia yacnocquido. Mibitedi chuinu. Mimbi naid tantiemi. Mibi yacno ëbi tantiaquido daēdpactsēc iquec. Adquid yec: '¿Ada nuquitedictsēqui chieshtoenquio icpatsiaba?' queded-quededtsēcquien mimbi ëbi tantiaquioc. Chieshēnaqui: 'Esus tantiatiapimbo iquebi,' quenquio mibi iccoc. Adec chieshtoenquio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. ⁹ Aden isadaidbon mibi ëmetiadquio iquec. Aido: 'Con matses isadaidbouditsēqui Nuquin Papan bēdamboen isendac,' quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: 'Ai, abimboen mimbi caoc.

Nuquin Papan Madon Esusën tantiaidombo mibi nec,' aidon mibi caindac. ¹⁰ Ëmbi chiacpadec chieshtoenquo icquin ëbi tantiasho isash mibi cudasendabi. '¿Ada Esus tantienquo yantsiashe? Tanu,' queshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquo icquid icmendambi.

¹¹ Tantia. Nëbi choendabi. Utsibon chieshënaqui mibi icbocpadquiec chieshtoenquo yec bëdamboec tabadta. 'Ëbi adenquo icsho isun Esusën abi yacno puduedmenquo ictsiashi,' quiash bëdamboec tabadta. ¹² Aden chieshtoenquo icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yac bimboecnuc con shubun icquido mibi icmendambi auëshquo cuentiapimbo icnuc. ¿Mitsipaden icbon: 'Con na nec,' quequin abi cuëmëdquid dada uaqin ismepec? Adembidi abitedi ismequin: 'Con Pabëdtan con matses nec,' mibi caindambi. 'Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,' mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. ¹³ Ëmbi Pidadepia yacnoquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiaata. Chieshtoenquo icquin ëbi tantiasho adembidi bëdambo icmendambi," quequin ëmbi chuiboed dada uata —quequin Esusën chuiposhi.

Daudiseya yacnoquido Esusën chiaid

¹⁴ Adoshombic abitedishun naid tantiaquin abimbo chuiquidënquo Esusën padpiden chuioposhi. Nidaidbëdta abitedi uaquidënquo abitedishun Icbon chuiposhi naden. —Daudiseya yacnoquidon ëbi tantiaquidon iste naden ëmbi chuiboed dada uata. "Tantia, Daudiseya yacnoquido. Mibitedi chuinu. ¹⁵ Mimbi naid tantiembi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bëdamboen tantiaquidon adopendactic? Padenquo. 'Esus tantiaquid nebi,' quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashun: 'Dayacquio yac bimboen ëbi tantiaquiopashun,' caimbi mibi. ¹⁶ Mibi adec chieshtonoc ëbitsen chieshtotiadquo iquebi. 'Cacumiabimboen Nuquin Papa yacno ëbëdi mibi tabadmenquo iquendambi,' mibi catiadquo icchitebi. ¹⁷ 'Nuquin Papan chiaid niac-niaquec icsapobi,' quetiadquidi: 'Ëmbembi con na dadpen bedshun dayun uaic utsi bunenquo yec bëdambo iquebi,' mibi quepoc. 'Esus tantienquo yec Nuquin Papabëd tabadtiapimbo

icchitebi,' quetiadquidi mibi adenquoio iccoc. Nuquin Papa yacno tabadte tantienquoio icsho isun mibi shubiuatiadquoio iquebi. Bëchish ucabi yacnimboen mibi icsaid ënabi icsho mibi bëdamboen istiapimbo iquebi. Pacuënëdacnimboen ëbi tantienquoio mimbi iquec. ¹⁸ Adboedëmbi Nuquin Papabëd tabadte bunquin ëbi tantiaquiota. Ëbi tantiaquin bëchish ucacnimboen mibi icsaid ënta. Adsho icsaisabimboecnuc mibi bëdamboen isquin ëbëdi tabadtequid icmetsiambique. Pacuënëdaid paposhquiabimboecnuc ëmbi naid mibi bëdamboen tantiametsiambique. Ëbi tantiata.

¹⁹ Ëmbi tantiaido bëdamboen tantiamembi. Aton papan: 'Padi, mibi icsambo iquec,' quequin bacuë ëmiacnimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash bëdamboec tabadta. ²⁰ Mibi tantiaquiembrie. 'Ëbi tantiata,' ëmbi cac mibi: 'Ai,' qesho tantiash mibëd iquendabi. Pec tabadec bëisnanguiacnimboec mibëd iquendabi. ²¹ Tantia. Ëbi tantiaquido utsibotsen chuinu. Chieshtoenquoio icquin Nuquin Papan chiaidtedi naquin nainash aidbëdi tabadquid nebi. Adquid yec aidbëdi abitedishun Icbombo nebi. Adem-bidi ëmbi con Pan chiaid nacpadec chieshtoenquoio yec ëbi tantiec tabadsho ëbëdi tabadmequin ëbëdtan chuiquid icmendambi. ²² Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquoio icquin ëbi tantiasho adembidi bëdambo icmendambi," quequin ëmbi chuiboed dada uata —quequin chuiposhi Esusën.

4

Nuquin Papa Uanën isaid

¹ Asia yacnocquido Esusën ëmbudquin chuibon abuc ispombi. Adshun isquien shëcuë shëcniacnimboec isadpec. Adnubien chuibocpadquiec shoncacnimboec comapenec on-queoaposh. —Nëmbo cho. "Nadquid iquendac. Nadotsiandac," quequin mibi dadpen ismenu —caposhi.

² Adoac Nuquin Papan Mayanën tantiamiac ambo nidacnimboen ispombi. Ushquin isacnimboembimbi caindac. Adshun isquien Nuquin Papambo chuiquid dapan tsadte dapanquoio tsadpec. ³ —Chuiquid dapa abentsëcquiobi nec. Bëdamboshë iquec —camenuc matses bunaidquoio casëdubimboec nac-nacquoio yec piumbo yec bëdamboshë isadposh. Abi tsadaid nënantanquoio uenquebudpamboec uen podquedbipamboec umu-umupambo icposh. — Bëdamboshë icquidquoio nec —camenuc adquoio icposh.

4 Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquido dasiuidcuededposh. Chuiquid dapan mauetempo shocosh nacnenaidquido mauecuededposh. 5 Adnubien Nuquin Papa yacnuësh abubimboec bed-bedquetanenubien abu tesquianiabimboec cuëdtoposh. —Abitedishun Icbombo nec —camenuc adec cuëdtoposh. Nuquin Papan bëntsiaucquido tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquiquimbi abi tantiaquido chianequid yequi Esus tantiaquidobëdtsen icoaic —camenuc aden ismeposhi. 6 Bëntsiaucbidi actepenquido chian dapa actectesëcquido isadposh.

Nuquin Papa tsadaid anoen daëdtsëcquido abi dacuenadec aben icquidbimboecquid 4tedi icposh. Dadano chedobi ëshë ictsëcquieci icposh. Utsi tanenquido. Abimbouidquido istequidquido icposh. Cachoc icnubi tacbiduc adquiobidi icposh. 7 Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. 8 Icho-icboec aton podo uicchunën podobimboec 6tedi icposh. Podonotsen adquiobidi ëshëuidquido isadposh. Podo ananquido adquiobidi icposh. Aidonquibi ënenquido icquin Nuquin Papa chuiposh nadec cuëdënquin.

—Icsaisambo yec bëdamboshë icquidquido mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquido mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquido nec

—quec badiadquidën badiadquidënquieci cuëdënashic inchëshëntsen cuëdëndeneposh.

9 Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsias, Papa —Nuquin Papa cadonenubi 10 tsusiobo 24ted icquido ambo tabadquido danëshën tinquebudcuededposh. Adtanquimbi mauete chicbededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbic aidontsen Nuquin Papa chuiposh nadec cuëdënquin.

11 —Mibi bëdamboshë iquec, Papa. Adembidi abitedishun mibi: “Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiacpadomboen mimbiuidtsëcquiobi abitedi uapampic.

Adoac mimbi tantiacpadequi mimbi uaido nibëdanabi yec abi iquec.

—quec tsusiobo cuëdëncuededposh.

5

Nuquin Papan chiacpadomboen namequid Esus isadaid

¹ Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaidën isnushe —queshun 7ted icnuc bitaccatempin bitaccabanaid neposh. ² Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chicbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. ³ Adoquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidedi dada uaid bedshun bitaccaid chicbanquin istequid nibëdposh. ⁴ Adsho isashini unësquio icnuc shubipoc: —Aid dada uaid bedshun chicbanquin chuibanquid nibëdec —quiash. ⁵ Adshobini anocquid tsusion: —Otac. Shubienda. Ënëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

⁶ Adoac isquien isadaidbon Nuquin Papa cuidmenquio icnuen abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunuec abided ciudadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uguëctsëc tsusiobuidquio dacuenadec tabadposh. Padnuc obecabimboecquid yec aton pais 7tedi icnuc aton ëshëmbo aidedequiobidi icposh. —Abitedishun

Icbombo yec utsin dëniacadiapimbo icquid Esusquio nec – camenuen aden pais ismeposhi. Adembidi: –Aton Mayambidi Nuquin Papan Mayan yec nidaid utsi-utsiec yacno mases abitedi yacno nidmiaid icnuc ompodëmëdtiapimbo icquid Esus nec –camenuen ëshë 7tedi ismeposhi ushquin isachimboecnuc. ⁷ Adshumbic obecabimboec isadboedën Esusën Nuquin Papan abiucshunquio sananaid dada uaid bedposh. ⁸ Bedsho istanequien dadanobi ëshëcquidobëd tsusiobo 24ted icquido Esus ismec danëshën tinquebudcuededposh. –Bëdamboshë icquidquio mibi nec –quiash adcuededposh. Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tautempi sanamposh. –Ëmbi ten-tencamequin Nuquin Papa cuishoncamiacimboc Esus tantiaquido cuëdënaid iquec –quequin aden ten-tencate sananquin ismeposhi. Adembidi: –Nëshun tauiac nëid pushudquid Nuquin Papa yacno nidachimboec Esus tantiaquidon chianiaid iquec –quequin bëdambo nuadnuc tautempi sananquin ismeposhi. ⁹ Adashic cuëdënte chucan Esus chiec cuëdëncuededposh tsusiobo.

–Mibi bëdamboshë iquec.

Nuquin Papan chiacpadec mases cuidmenquio icnuec mibided cuidadec unësondaidquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi mases caimbi. Nëidic masesquio.

Nëidic mases utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

¹⁰ Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” cadedcadedendac.

Mimbi tantiacpadën nidaidënuësh mibëdtan chuiquid iquendac

–quec cuëdëncuededposh tsusiobo.

¹¹ Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi

ëshëcquidoudiquio dacuenadec tabadposh. Abi uquëctsäc dacuenadec tsusiobouidquio tabadposh. Aid uquëctsäc dacuenadequic mayan bédabouidquio tabadposh. ¹² Adec tabadec mayan bédabo abitedimbo cuëdëncuededposh naden chiec.

—Isadaidbon obeca bacuëded cuidacimboec matses icsaid bedshunuec abided cuidadec Esus unëspondash.

Esusquio bédamboshë icquidquio nec.

Adquid icsho: “Abitedishun Icho icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bédamboshë iquec. Mibi tantiaquiemi,” abitedishun capashun

—quec cuëdëncuededposh mayan bédabo Esus tantiec.

¹³ Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.

—“Abitedishun Icbombo yec tsadte dapan tsadquidquio Nuquin Papa bédamboshë iquec.

Obeca bacuëbimboecquid abided cuidadec unësaid Esustsen bédamboshë iquec,” canuna, ënenquio icquin.

“Abiuidtsëqui Nuquin Icho nec. Utsi adquid ictiapimbo iquec. Aidën nac nuqui bédamboshë iquec.

Abipadquid utsi nibëdec,” canuna ënenquio icquin

—quec cuëdëncuededposh abitedimbo.

¹⁴ Adsho tantiash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icho bédamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

6

Bitaccaid chicaid chiaid

¹ Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacimboec comapenec cuëdquin: —Cho —caposh.

² Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshënquido uesquin cuesun secaquidquio mibi nec —quetanquin chuiquid dapan mauetempo mauemeposh. Adoac adecbidi abí chieshënquido cuesun secanuec nidposh.

³ Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac⁴ cabayo piumbo icquid catsadec dada choposh. —Matses cuesun secananenquo icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —queshun chështe dapa matses siante dapa meneposh. Adomboen Nuquin Papan matses cuidte tantiameposhi.

⁵ Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. ⁶ Adnubien dadanobi ëshëcquido dacuenadec tabadnuc nënantanshunquo Nuquin Papan cabayo chëshëmbo icquid catsadquid chuiwash. —Piucquid dadpenquo meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiwash. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquo icquin nata —quequin chuiwash. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

⁷ Adnubien Esusën dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: —Cho —cac⁸ cabayo bëdiactsëc ushu-ushupactsëcquid catsadec dada choposh. —Aid matses unës uaquid nec —quequin cuënsho tantiombi. Abipadquid utsin chinumwash. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

⁹ Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquo icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. ¹⁰ Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ;tedectsicshun mimbi cuidpe?

—caquin chuidoneposh. ¹¹ Adoaquien: —Chiata. Yuec-yuecpectsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmëmbi —qeshun abitiombi dasiuidbudte ushumbo icquid dasiuimbamposh.

¹² Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacbimboec inchëshquio icposh. Inchëshën ushëbic intacbimboec piumboshë isadposh. ¹³ Uispabic natiambo cunquenuc cuëte bacuë tididiquiachimboec nidaidën tididieposh. ¹⁴ Abubic dashcute bidiquiachimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. ¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. ¹⁶ Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided ciudadec unësaid Esusëntsen cuidnushe. ¹⁷ Aidon ambi tantiacpadënquiobini nëbimbobi cuidchitec. Padtembo. ¿Tsutsi cuidenquio icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismëboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icho-icboen uidën uaquin cuncamenquio icposh. —Nuquin

Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —queshun adoposh. ² Adnubien mayan bëda utsi ushë choacmiüesh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. ³ —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiüesh choquidën.

⁴ Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë. ⁵ Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. ⁶ Nëidic Acobon madobidi Ased caidën matses tsyuecquido aidtedquiobidi. Nëidic Acobon madobidi Netadi caidën matses tsyuecquido aidtedquiobidi. Nëidic Acobon madobidi Manases caidën matses tsyuecquido aidtedquiobidi. ⁷ Nëidic Acobon madobidi Simeyon caidën matses tsyuecquido aidtedquiobidi. Nëidic Acobon madobidi Debi caidën matses tsyuecquido aidtedquiobidi. Nëidic Acobon madobidi Isacad caidën matses tsyuecquido aidtedquiobidi. ⁸ Nëidic Acobon madobidi Sabadon caidën matses tsyuecquido aidtedquiobidi. Nëidic Acobon madobidi Ose caidën matses tsyuecquido aidtedquiobidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. —Adquido iquendac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yacted iquec. Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidtedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesën chuiquid dapa ismiacnimboen: —Nuquin Papa bëdamboshë iqueque. Ismenu —quequin niste

podobiecquid sananquin uic-uiccaposh. ¹⁰ Aido comapenec cuëdëncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuëded cuidacimboen aton Mado Esuseded cuidpanëdash.

Adoac nuqui icsaid bedshunuec abided cuidadec unëspondash Esus.

Aid tantiasho icsaido cuidacno nidmenquo icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

¹¹ Adsho tantiashe ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iquec. Ismenuna —quiash adposh. Nënantanquo Nuquin Papabëd Esus tabadnuc abi uguëctsc dacuenadec dadanobi ëshëcquido 4tedi icquiduidquo tabadposh. Abi uguëctsc dacuenadec tsusiobo 24tedi icquiduidquo tabadnuc abi uguëctsc dacuenadequic mayan bëdabouidquo tabadposh. ¹² Aid mayan bëdabotedi danëshën tinquebudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec. Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec, Papa,” quequin chuipashun.

Esusbëdi Nuquin Papa bëdamboshë iquec.

Abipadquid utsi nibëdec.

Comapenen tantiaquidquo icnuc ambi tantiacmaid utsi nibëdec.

Aiduidtsëqui bëdamboen tantiaquidquo nec.

Aidën nashunac bëdamboshë iquebi.

Nadatiambo icquid nec. Abitedishun Icbombo nec.

“Esusbëd Nuquin Papa bëdamboshë iquec,” canuna

—quecuededposh mayan bëdabotedi.

¹³ Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiüëshquio aido chosh? —

cac: ¹⁴ —Tsaudi, tsusio. Mimbibien tantiec —capombi.

Adsho tantiashe: —Tantia. Mibi chuinu. Satanasën: “¿Ada chieshtoenquo ictsiash? Tanu,” qeshun natiamboshë icmiac Esus tantiec chieshtoenquo ictenedo nec. Adec chieshtoenquo icsho isun Satanasën tantiacpadomboen chieshëmëncuidon unës uapondash. Abided cuidadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh. ¹⁵ Esus tantiaquido icsho Nuquin Papan abi yacnombo puduedmeshun aton

yuabo icmepondash. Adoac Nuquin Papa yacnombo tabadquimbi abi ënenquo icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” queshun abëdi tabadmequin bëdamboen dayun uaic. ¹⁶⁻¹⁷ Isadaidbo matsesën nëish yua obeca dadpen dayun uacpaden abided cuidadec unësaidën Esusën abi tantiaquido bëdamboenshë dayun uaindac padpidec unëstiapimbo icnuc. Adoac pete bunenquo iquendac. Actetsen bundoenquo iquendac. Abi yacnuësh ushën pichiquenquo iquendac. Chun mëyadenquo iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante nibëdquiec iquendac. Unësquo icmiante nibëdquiec iquendac. Bacuë shubisho anin bëucquin bëdambo icmiacbimboen abi yacnoshon Nuquin Papan Esus tantiaquido bëdambouidquo icmendac –quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. –Dacuëdampambo iquec –quec media oda yec yuec-yuecpactsëc otacquo tantiec tabadposh. ² Adnubien Nuquin Papan abi yacnoshon uaido mayan bëdabo sietetedi: –Nuquin Papan chiacpadomboen nanu –quec tabadposh. Adsho isun icbo-icboen shoncate sietetedi menebamposh. ³ Adnubien mayan bëda utsi ambobidi choposh. Choash bëdambo nuadquid tauinuequin shocosh nacnenaïd tauite dapa dayun nidtuidposh. Shocoshëmpin bëdamboshë nuadnuc tauitempi utsi sanamposh. Adsho isun bëdambo nuadquid nua meneposh. Adoac: –Nëid tauiac pushudquid Nuquin Papa yacno nidacbimboec Esus tantiaquidon chianiaïd iquec –quequin bëdambo nuadquid sanshun tauite nacnenaïd dapan tauiposh bëdambo nuadnuc. ⁴ Aden tauiac Nuquin Papa yacnombo pushudquid nidosh. –Adembidi Esus tantiaquidon chianiaïd abi yacnoshon tantiashun Nuquin Papan abi tantiaquido chieshënquido cuidendac –quequin aden ismeposhi. ⁵ Adshumbic aid mayan bëdan tauite dapan samëdquid cuëte dëtsisadaïd isquidquo icquid bedshun shocoshëmpin sandoposh. Aden sandotankimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bedbedquetanepamboec abu tesquianiacbimboec cuëdtoposh. Adnubien nidaïd abichobi saca-sacaquemboec uëdëqueposh.

—“Nuquin Papan ëbi chieshënquido cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

Shoncate shoncaquin ismiaid

⁶ Matses tabadacno cuëte dëtsisadaid isquidquio icquid masiabudnubien shoncate bedboedon mayan bëdabon shoncanuen sanamposh. ⁷ Adshumbic abentsëcshumba shoncado-posh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaid isquidquio icquid yec intac yec quenuc chomeposh ue dapa choacximboecnuc. Aden chomiaidën nidaid nuamboshë taidposh. Cuëte dadpenquioshë taidposh. Uasin dadpenquioshë pichiqueposh.

⁸ Adnubien mayan bëda utsin shoncaposh 5tedishun shoncabi icnuc. Shoncanubien macuësh dpatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. ⁹ Adec intac yanaidën acten icquid dadpenquioshë unësbudneposh. Adechidi cano dapa antabëdquidotedi abi canochobi mentoadbudneposh.

¹⁰ Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdën-nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. ¹¹ Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

¹² Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactsëcquio chënquiantsëccosh.

¹³ —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësquioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

9

Mayan bëda utsin shoncanuc isaid

¹ Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempi meneposh. Podobitsi ic-sabo uidën uacno nidaid shëcuë uquëduccio icquid bëtashte chichte neposh. ² Aid chictempin chicaquien uquëduccuësh tied nëdënquedoacpipamboec pushudtoposh. Abuc inchëshquio pushudquid icnuc ushë isadenquio icposh. ³ Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh. ⁴ Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquiduidquio sebudneta —quequin chuiposh. ⁵ Adshumbic: —Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsebiecquidën sebudnequin ismeposhi. ⁶ Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

⁷ Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsebiecquid isadposh. Shocosh mauetebimboecquid mauecuededposh. Matsesën bëtantetembobi bëisadposh. ⁸ Chidon tëbucshumbimboec isadposh. Bëdin shëtabimboec aton shëta icposh. ⁹ Bëntsiauc shicdiadquid cudaste shocosh nacnenaiddimboec sictsasimbo icposh. Aid abi maisi cuensho tantiac tied nëdënquiacbimboec comapenec cuëdposh. ¹⁰ Aid tsectsebiecquid chishpichoquid yec chichumbimboec sianquidquio neposh. Inchëshën ushë 5tedi nidmequin adquidën dadpenshun natiamboshë icnuc matses sebudneposh. ¹¹ Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiauc tsadunaid yacnuëshquio onquedosh tantiombi. ¹⁴ Adec onquequidën nëbi

shoncaboed chuiposh. —Acte dapa Eupëdates caid yacnoshon matses cuidquido mayan bédabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. ¹⁵ Aden chuitanac aid mayan bédabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. ¹⁶ Adoaquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

¹⁷ Ęmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nêdênquepamboec pushud-pushudpambo yec choposh. Cachinan bacuë pisenaid nuadachimboec asupede caid icsamboshë nuadposh. ¹⁸ Adshumbien ana shëcuënuësh choaidën matses dadpenquioshë cuesun secabudneposh. ¹⁹ Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidëntsen matses dadpenquioshë unës uabudnequin ismeposhi.

²⁰ Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo icposh. Ambi naiduidi nabamposh. Ęntiadquidi abi icsaquioposh. Nuquin Papa tantienquio icquin podobitsi icsabo tantiaquin ëntiapimbo icposh. Adembidi ambibi nacnenaid ambi papa caid ënenquio icquin tantiaposh. Utsibon shocosh nacnenaid tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaid anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquio icquin Esusquio tantiatiadquidi ambi nacnenaiduidi tantiaposh. ²¹ Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquio chudquidombic adembi utsi chudshumbededposh. Adembidi aton bënëpenquio chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Ębi icsaid ënu —quetiadquidobi adenquio icposh.

10

Mayan bëdan dada uaidëmpi pemiaid

1 Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuëdampambo icquidquo Nuquin Papa yacnuëshquo budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacbipamboec mapino icposh. Ushëbimboec bëtantete bëchamauanquiecposh. Buintad nitsinaid nëdënquiabipamboec isquid-isquidpambo nidte icposh. ² Dada uaidëmpi bëcadotsaid sanamposh. Budash nidtuidposh. Tsiembudcuenshun taë abiucshun chian dapa mad caid nëtıncaquimbi taë opiocshon mananuc tincaposh. Ènapenquioshë icquid niosh. ³ Adashien bëdi noshquiabimboec nuamboshë cuëdtoposh. Adec cuëdquin chiac abu 7tedec cuëdtonequin ëcbedtoneposh Nuquin Papan chiaid chuiquin. ⁴ Aden abu cuëdquin ëcbedtonesho tantishun: —Abu cuëdquin chiaid dada uanu —queshobi: —Padi —caposhi Nuquin Papa yacnoshon chuiquin. —Abu cuëdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquo iccombi.

⁵ Adnubien mayan bëda tsiembudcuenshun chian dapa nëtıncaquin utsiucshun mananuc tincaboedën ambibi podò abiucquo cadoposh. —Nuquin Papan isnubi abimbo chuiquidquo nebi —quequin tantiamenuen aden ambibi podò abiucquo cadoposh. ⁶ Adotanquin chuiposhi. —Tantia. Mibi chuinu. ¿Tutsi nidaid uabi yec ëndenquimboshë icpampic? Aidi Nuquin Papa nëbi adquid yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaidquo chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. ⁷ Èbi padquid mayan bëda utsin shoncate sanamboedën: “Nëbi nainquin shoncanu,” cacpadënquo Nuquin Papan ambi chiampicpadomboen adoendac —quepòsh mayan bëda chuiquid dapa dacuëdampambo icquid Nuquin Papan matses cuidquin naimpanuda.

⁸ Adnubini abucüesh cuëdquidën chuiposh. —Aid mayan bëdan sanamboed dada uaid bed —cac: ⁹—Dada uaid beccho —capombi. Adoquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuishonquequin isban-isbanash mucambo yanacbimboec Nuquin Papan

cuidte tantiash shubitiadquo mibi yanendac —quequin tantiamenuen aden chuiposhi.

¹⁰ Adoac aid bedshun chiash adquo yanobi. ¹¹ Adquo yansho isun mayan bédabo chuiquid dapan chuioposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebédta chuiquid dapabon nabante mimbi chuibanendac. Aden Nuquin Papan tantiapadomboen mimbi chuibanendac —quequin chuiposhi mayan bédabo chuiquid dapan.

11

Nuquin Papan namiaidon daëdshun naid

¹ —Nuquin Papan tantiapadomboen mimbi chuibanendac —quequin chuishumbic mayan bēda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bēdambo nuadnuc tauinuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. ² Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” queshun aid shubu daquënë uaid tambanenda. Aden Edusaden icsa uaquin seta ³tedi matamendac —quequin chuiposhi. —“Muainquio icquin Esusbédta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³ Adnubini Nuquin Papan chuiposh. —Aden Edusaden icsa uanubi matses daëdquiobi ëmbi chuiboedquo chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiapadomboen chuibanendac. Adquid yec: “Matses abitedi icsamboshë icsho isash shubitiadquo iquebi,” quequin icsambo icquid abi icsaid ëmenuec dashcute icsactsëcquidquo dasiuidendac —quequin Nuquin Papan chuiposhi.

⁴ Adshobini mayan bēdan chuioposh. —Aido Nuquin Papan oncamaid daëd isadaidbo matses tsusedpan chuipampid nendac. “Nuquin Papan bëntsiauc cuète odibos caid nitsinaid daëd bēdambo icquid iquendac. Ambobidi tabote daëd bēdambo icquid iquendac,” quequin chuipampid

nendac. “Nuquin Papan Mayanën tantiamiaidquo icquin ambi chiaidquo chuibanendac,” camenuen aden chuipampic. ⁵ Aden abi chuibancho abi chieshënquidën: “Mibi cunesunenu,” caqui cunesuniadenquo iquendac. Nuquin Papan dayun uaid icquin ana shëcuënuësh choboedën nibëdquiecnuc pichicacimboen abi cunesunenuquidotedi unës uaindac. Nuquin Papan cuidte tantiamenuen adoendac. ⁶ Adembidi Nuquin Papan cuidte tantiamenuen Nuquin Papan Mayanën namiaidquo icquin comapenen tantiaquin ismebanendac. Aden ismequin nac abi nidabi yacpadequi ue choenquo iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

⁷ Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cunesun secaindac. Satanasën namiacpadomboen adoendac. ⁸ Edusaden yacnoshon cunesun secashun chococainquo iquendac. “Ma cunesun secaid ischitono,” queshun chococainquo icquin podqued ansanendac. Nuquin Icho Esus cuesten dectanacnoshonquo matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cunesun secaindac. ⁹⁻¹⁰ Aden cunesun secabosh: “Nuqui mëyanquid nëid daëd neque. Chococatiapimbo iquebi,” queshun chococainquo iquendac. Adashic matses abitedimbo cunesun secaboed isbededec tabadendac. “Nuqui shubimequido cunesun secaosh,” quiash cuishonquec abëd icquidobëd menancuededendac. Matses abitedimbo caimbi. Nëidic matsesquo. Nëidic mayu. Nëidic nidaid utsi-utsiec yacno tabadquido. Aidtedi menancuededendac. Abentsë chotsec ushquin aden ambi cunesun secaboed isbededec tabadendac –quequin chuiposhi mayan bëdan.

¹¹ Adashic abi onquec: –Abentsë chotsec ushquin isbededec tabadbombien Nuquin Papan cunesun secaboed daëd uincuemendac. Uincuemiachsho isash cuishonqueboedobi natia dacuëdec tabadendac. ¹² Adnubi Nuquin Papan abuchshun cuënquin: “Nëmbo cho,” cac abu ushu datanec cunesun secaboed daëd abuctoendac. Abi chieshënquidon isnubi adendac. ¹³ Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquo chimeshadbudnendac. Chimeshadbudnequimbi matses catashquin dadpenquo 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien

tantiatiad,” quecuededendac —quequin chuiposhi mayan bēdan. ¹⁴ Aden chiqui dapan chuibocpadomboen mayan bēdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daēd chuibombien mayan bēdan shoncate sanamboedēn nainquin shoncaposh. Shoncanubien Nuquin Papa yacnuēsh nua cuēdēncuededposh naden chiec.

—Nuquin Papabēdi aton Mado Esuquidistu abided ciudadec unēsaid bēdamboshē iquec.

Abi chieshēnquidon naid ēmeshun aid abentsēcshumbi matses abitedimbo namendac ēnenquio icquin.

Abitedishun Icho nec

—quec cuēdēncuededposh. ¹⁶ Adashic Nuquin Papa yacnombo icho-icboec tsadten tabadboedobi tsusiobo 24tedi icquido: —Mibi bēdamboshē iquec —quequin ismec danēshēn tinquebud-cuededposh. ¹⁷ Adtanequi nadec cuēdēncuededposh.

—Nidaid uabi yec ēndenquimboshē mibi icpampic, Papa.

Nēbi adquid yec nibēdantiapimbo icquid mibi nec.

Abitedishun Icbombo mibi icnuc:

“Ēmbiquen dēniacquin namenu,” Satanasën catiapimbo mibi iquec.

Nadatiambo icquid icquin mimbentsēqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobēdan mibi chieshēdenec.

Mimbi uaidtedi icsa uadenec.

Adsho mimbi tantiacpadēnquio nēbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobēda mibi tantiaquido abitedimbo mibi yacno mibēdi mimbi tabadmendac.

Chuiquid dapambobēda chuiquidpenquio mibi tantiaquidotedi bēdambo icmequin mimbi adoendac

—quequin tsusiobon Nuquin Papa chuisho tantiapombi ushquin isaczimboen.

¹⁹ Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shēcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh.

—Ēndenquimboshē ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ēbi ismenubien bed-bedquetanec abu teshquia-niaczimboec nua cuēdtoneposh. Nidaid saca-sacaquemboec

uëdëqueposh. Ue dapa nuamboshë choacbimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

12

Chidobëdta nisibimboecquid dapa ismiaid

¹ Adoshombic Nuquin Papa yacnoshombidi utsitsen dacuëdampamboecquidbidi ismeoaposhi. Adoac chido ushë dasiuidacbimboec bëchamuanquiecsho ispombi. Inchëshën ushë tincash tsadposh. Uispa 12tedi nacnenaïd mauete mauëposh. ² Bacuë nua usunec tishtiadtsëcquio yec shubibud-shubibudposh. —Isadaïdbon chido Esus tishquid nec —camenuen aden ismeposhi. ³ Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauëcuededposh. Satanas nïosh. ⁴ Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo ichoedo utsi-utsien yuapampic. Aden yuash aton yuabobëdi nidaidën choshon matsesën icsamete bunquiec —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. ⁵ Adnubien chidon dada bacuë tishposh. Bëdambo icquid matses abitedishun Icho ictequidëmpi nïosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquëc —quequin ismeposhi. ⁶ Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquio seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquïobi. Nëidic mayan bëdabo ichoedobi Nuquin Papan chiaïd niac-niaquëc icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bëdabo dadpen. Nëidic aïdo chuiquid dapambo Miqued caïd. Aidtedi ispombi. Adnubien Satanas nadposh. —Aton yuabo mayan bëdabo cuemiash Nuquin Papa dëniaquëc ëbimbo abitedishun icho yantsiabi —quiash

nicantiadquio icposh. Satanas chedo nidaidën nidmiabi icnuc neposh. ⁸ Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidënquio icquido yec niadenquio icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh. ⁹ Nicaquien matses tabadacno nidaidën choec Satanas chedo bud-budposh. Eba caid icsamepampid Satanas niosh. Nëbi matses dadpenquioshë icsamequin yuate bunquieq.

¹⁰ Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdtan abi dëniacnuequido dëniacmenquio icposh.

Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bëdambo icquidoda nedic? Ëmbi natiamic aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided ciudadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec. ¹¹ Adashic padpidec auëshbidi:

—Nëbi ëmbi isac Satanasën Esus tantiaquido chieshtometi-apimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoenquio icposh.

Cuidmenquio icnuec abided ciudadec unësaid Esus tantiec chieshtoenquio icposh.

Adsho abi chieshënquidon matsesën: “Padi. Esus tantienda. Cueschitomane,” caqui

chieshtoenquio icquin adenuidi Esus tantiasho cuesun secameposh Satanasën aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonquetiapimbo iquec.

Nëshun cuemiatic mibi yacno budash Nuquin Papa chieshënquieq Satanas chieshëmënquieq tabadec.

Mibi icsamete bunquieq. “Nëbi Nuquin Papan ëbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

¹³ Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —queshun chieshënquin nisibimboecquid Satanasën aid chido nadancaposh. ¹⁴ Adnubien Nuquin Papan chiqui dapan podobiecquid meniac bedanec aid podombi cuenec mates nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh. ¹⁵ Adnubien nisibimboecquidën: —Aid chido unës uachitono —quequin ambibi ana shëcuënshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo mates nibëdametiadquio iquec. Adembidi Esus tantiaquido nibëdametiadquio iquec. ¹⁶ Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc. ¹⁷⁻¹⁸ Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

13

Bëdibimboecquid dapa ismiaid

¹ Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Èbiuidtsëqui abitedishun icbombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën decambampaccosh. ² Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac mates abitedimbo chuiquid dapambo yamposh. Aden Satanasën mates icsamboshë icquid chuiquid dapa icmequin ismeposhi. ³ Adshumbic padpiden ismeposhi. Adoac aid bëdi dapabimboecquid acte uquëducuësh choaedën mapi abentsëc mëmuntiapimbo

icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —queshun matses abitedishun acte uquëducuësh choboedën chuiquid icsamboshë icquidën chiacpadomboenuidi nabed-edposh. ⁴ Adshumbic: —Ëbi chuiquid dapa namequid mibi nec —quequin Satanas papa caquin matsesën tantiabeded-posh. —Aden Satanasën namiac ëbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec —queshun abi chuiquid dapa acte uquëducuësh choboedtsen tantiaquioposh. ⁵ Aden matsesën tantiaid icquin Satanasën tantiamiacpadomboen Nuquin Papa chieshënquiec: —Nuquin Papa caid nibëdquiec. Ëmbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. ⁶ Aidën Nuquin Papa chieshënquin naden muauaposh. —Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh —quec muaposh. ⁷ Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isac bimboecnuc ismeposhi. ⁸ Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bëdamboen tantia. Esus tantiaquido icsho mibi chuinu. ¹⁰ Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantiash mimbi nacpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquid bimboecquid utsitsen nidaid shëcuënuësh puduensho ispombi. Obecan pais bimboec aton pais daëd icposh. Satanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. ¹² Adsho isun Satanasën abia

chuiquid dapa icmeboedën nidaid shëcuënuësh puduemboed
 chuiquid dapatsen icmiac abëdtambi matses abitedimbo
 ancaquin nameposh. Aden namequin abi chuiquid
 dapa acte uquëducuësh choboedën chiacpadomboen
 matses abitedi nameposh naden chuiquin. —Seshuniaid
 uincuemiondaidën nuqui chuiquid dapan chiaiduidtsëqui
 natiad —caposh. ¹³ Aden acte uquëducuësh choboedën abi
 chuiquid dapan chiaid namenuen comapenen tantiaquid
 icquin nidaid shëcuënuësh choboedën dadpen ismeposh.
 Matses dadpenshun isnubi abucshun abembi taboadaid
 budmequin ismeposh. ¹⁴ Aden Satanasën namiacpadomboen
 comapenen tantiaquin ismiac matses dadpenshun: —
 Abimbo caic —quequin abi chuiquid dapa icsamboshë
 icquidën chiaid nabededposh Nuquin Papambo tantienquo
 icquin. Abi chuiquid tantiamequid nidaid shëcuënuësh
 choboedën: —Nuqui chuiquid dapa uincuemiaidquo icsho
 tantiaquin abibimboecnuc nuamboshë icnuc nacenata —cac
 matsesën nacenemposh. ¹⁵ Nacnenacsho isun Satanasën
 namiacpadomboen nidaid shëcuënuësh choboedën abi
 chuiquid dapabimboecnuc nacenemboedi tibocameshun
 oncameposh. Adoquien nacenemboedquiobi chuiquid dapa
 icsabimboec onquequin: —Ëbi tantiesabo neque. Cuesun
 secatan —cac yuabon abi chuiquid dapa tantiesabo cuesun
 secatamposh. ¹⁶ Adnubien nidaid shëcuënuësh choboedën:
 —Nuqui chuiquid dapan yuabo nuqui nec —quequin
 ancabudquin matses dadpenquo dada uaquin bësiadmeposh
 nëidtedi. Nëidic chuiquid dapabo. Nëidic chuiquidpenquo.
 Nëidic dadpen dayun uaquido. Nëidic aton na nibëdquido.
 Nëidic matses yuabotedi. Nëidic yuapenquo. Aidedi matses
 dadpenquioshë dada uaquin bësiadmeposh. Utsi-utsien
 bëtanteteno bësiadmeposh. Utsi-utsien mëdante abiucquo
 mësiadmeposh. —Acte uquëducuësh choboedën ëbi chuiquid
 dapan yuabo nec —qeshun nameposh. ¹⁷ Adshumbic nidaid
 shëcuënuësh choboedën chuiposh. —Adec ëmbi chiacpade
 siadambo icquido piucquidbëdta mitsana utsi menenda.
 Ëmbi siadmiaiduidtsëqui mene —queposh. Utsi-utsiec abi
 chuiquid icsamboshë icquid cuëmëdquid dada uaquin
 bësiadmiaid neposh. Utsi-utsiec aid cuëmëdaidbimboecquid
 naden 666 dada uaquin bësiadmiaid neposh. ¹⁸ ¿Ada
 ëmbi chuiboed tantio? Bëdamboen tantiaquidën: —Abi
 cuëmëdquidquo chienquo icquin naden 666 chuiquin dada
 uapac —catsiash. —Adec matses icsamboshë icquidquo
 chuiquid dapa yansho isun bëdambo icquid danenda —
 quequin ushquin isacbimboecnuc aden ismeposhi.

14

Nuquin Papan cudasënaido ismiaid

¹ Adoshombic padpiden ismiac abided ciudadec unësaid Esusquo macuësh dapa Sion caid mananënquo tabadsho ispombi. Abëdi abi tantiaquido dadpenquo 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbëdta Esus cuëmëdquid dada uaquin bësëmiaido niosh. —Adec Esus tantiaquido abëdi tabadendac —quequin aden ismeposhi.

² Adnubien Nuquin Papa yacnuësh ¿midapadpamboec cuëdtoposh? Acte nua chododoquiabipamboequien niabiposh. Abu tesquianiabipamboequien nechitosh. Ten-tencate dapa dadpen icbo-icboen sananquin tentencabipamboec comapenec cuëdëncuededposh. ³ Adec Esusbëdi macuësh mananënquo tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëdtan dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided ciudadec unësaid Esus tantiaquidon matsesënuidsëqui aid cuëdënte chuca tantiec cuëdënosh. ⁴ Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatiapimbo icnubi aidombien tantiaquiopanëdash. Abided ciudadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. ⁵ Chieshtoenquo icquin Esus tantiec muesabo icpanëdash. —Adquido iquendac —quequin ushquin isachimboecnuc aden ismeposhi.

Mayan bëda utsi 3tedshun chiaid

⁶ Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenachimboec abuc cuensho ispombi. Bënuhtiapimbo icquid Nuquin Papan chiaidquo matses chuinuec niosh nëidtedi. Nëidic matsesquo. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh. ⁷ Abuc cuenquimbi chuibemposh. —Nuquin Papauidsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquo iquec,” quequin tantiata. Nëbi ambi chiaid niacniacquido cuidquieque. Aidquo tantiata —quequin chuibe-mposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenaposh. –Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacbimboen matses utsibo abitedi Nuquin Papa tantiamenquio icquin icsamequioposh. Aduidequi icsho ëndenquimboshë cuidampicpadomboen Nuquin Papan uesquin cuidquiendac –quequin chuibemposh mayan bëda utsin abuc cuenquimbidi.

⁹ Adnubien mayan bëda utsitsen abuc cuenoaposh. Aidëntsen chuibenaposh. –Tantia. Nuquin Papan cuidtequido chuinu. Chuiquid dapa icsamboshë icquid acte uguëducuësh choboed tantiaquin aidbimboecnuc nacnenaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatipimbo icsho Nuquin Papan cuidquiendac. ¹⁰ Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided ciudadec unësaid Esusënquio mayan bëdabobëdtan isnubi adoendac. ¹¹ Ënenquio icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquio icquin adembi cuidquiendac ënenquio icquin –quequin chuibemposh mayan bëdan. Aden ismeposhi.

¹² Ëmbi chuiboed tantiashun mimbi nabocpadomboembi chieshtoenuio icquin Esus tantiaquin ambi chiacpadomboenuidi nabanta. Utsibon chieshënquin: –Padi. Esus tantienda. Cueschitomane –caqui adenuidi ënenquio icquin Nuquin Papabëdta Esus tantiaquiota.

¹³ Adnubi Nuquin Papa yacnuësh comapenec onquequin chuioaposhi. –Naden chuiquin dada uata. Chieshëmënuquidon: “Esus tantiec,” qeshun cuesun secaido Esus tantiaquido cuishonquendac –quequin chuiposhi. Adnubien Nuquin Papan Mayanëntsen: –Ai, abimbo caosh. Esus tantiaquido natiaic tabadtenedobi unësash bëdamboshë iquendac shubitiapimbo yacno tabadec. Ambi chiacpadquiec bëdamboec tabadec unësacsho Nuquin Papan aden bëdamboshë icmendac –quequin chuiposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquio Esus tsadsho ispombi. –Abitedishun Icbombo nebi –quec

chuiquid dapan mauetempo shocosh nacnenaïd maueshun chështebimboecquid sanamposh. ¹⁵ Adnubien mayan bêda utsin abi yacnuësh choquin comapenec onquequin Nuquin Papan chuiboed Esus chuituidposh. —Nëbi nidaidën icquid sinaïd butebanquin sando. Nuquin Papan tantiacpadën nëbimbobi nata ¹⁶ —caquien chështebimboecquidën sinaïd butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

¹⁷ Adnubien mayan bêda utsi Nuquin Papa yacnuëshquiobidi choposh chështebimboecquid sanampamboec. ¹⁸ Adec chështebimboecquid sanampamboec choshobien mayan bêda utsin matses tabadacno cuëte dêtsisadaïd isquidquïo icquid nidaid masiabudboedën tauite dapa dayunuëshquïo choshon comapenec cuëdquin chuiposh. —Shancuinbimboecquid uba caïd nidaidën caniquid chështebimboecquidën mëtebanquin sandoshon buanshun uba tish-tishten sando ¹⁹⁻²⁰ —caquien uba caïd mëtebanquin sandoshon buanshun uba tish-tishten sandoposh. Aden abi tish-tishten sandoshon taën tintincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquïo Nuquin Papan cuidac matsesën intac nuamboshë chïdïdiquëc nua mauanendac. Acte nua chëuëdäcbipamboec cabayon mapi yaction intac chëuëdsho isombi. Ënapenquïo quïdometedos 300ted cactiombi cuësquëc nuamboshë matsesën intac chëuëdsho isombi ushquin isäcbimboen. —Aden Nuquin Papan abi chïeshënquïdo cuidendac —quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquïdo dacuëdampambo icquido 7tedi icsho ispombi. Mayan bêdabo nïosh. —Aïdon ambi chïacpadomboen ënquïmbi matses icsaïdo cuidsho isash Nuquin Papa nëish bêdanendac —quequin tantiaquin ispombi.

² Nuquin Papa yacnobidi chïan dapa icposh. Actepenquïo yec acte-actetsëcquïo isadposh. —Nuquin Papa icsaquïdo cuidquïdquïo nec —camenuëc tied nëdënquïacimboec äid bëntse isadposh. Äïd cuëmambi Esus tantiaquïdo tabadposh. Satanäsën namïäïdën acte uquëducuësh choëdën chuiquid dapa icsamboshë icquidën: —Yuanu —cauidäïdo

niosh. Chuiquid dapa icsamboshë icquidbimboecnuc nacenaid tantiatiapimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh. ³ Nuquin Papan namiaid Moises: —Nuquin Papan nac ëbi chieshënquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa bëdamboen ismenuec abided cuidadec unësaidquio Esus aton Papabëdta tantiec cuëdëncuededposh naden chiec.

—Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naid abitedi tantiaquidquio abimbo chuiquidquio mibi nec, Papa.

Mimbi naid bëdambo icnuc dacuëdampambo mibi iquec, Papa. Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo icquido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

⁵ Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi. ⁶ Auëshquio Nuquin Papan chiacpadec ëmbi isboedo mayan bëdabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuc dashcute nac-nacquio icquid dasiuidcuededash dashcute bëshpiu-bëshpiumbo icquid shictonquecuededposh.

⁷ Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaaid icho-ichoen menebamposh. Unëstiapimbo icquidën Nuquin Papan nëishënquioshon cuidte cushtoaid maspanëmpi niosh.

⁸ Adnubien Nuquin Papa tabadaid nuntanuësh pushud-pushudpambo icposh. Adec dacuëdampamboecsho isash Nuquin Papa chuinuic puduedtiapimbo icposh. Ënquin cuidambi padpidec Nuquin Papa yacno puduednushi niosh.

—Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden ismeposhi.

16

Maspanëmpin cushtoid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. — Matses yacno nidshun maspanëmpin cushtoid chiuinquin matses uesquin cuidta —quequin chuiposh Nuquin Papan.

² Adoquien abentsëcshun ambi bedboed maspanëmpin cushtoid nidaidënshun chiuimposh. Adnubien ëmbi isboed acte uguëducuësh choboed chuiquid dapa icsamboshë icquidën yuaidotedi natiambo yec chiuë—chiuëtsëcquio yancuededposh. Satanasën namiaidquio icsamboshë icquid tantiakin abibimboecnuc nacnenaaid tantiaquido yec aton icbo cuëmëdquid dada uaquin siadmiaido icsho aden cuidposh.

³ Adnubien utsin ambi bedboed maspanëmpin cushtoid chian dapa mad caid nëchiuimposh. Adoquien aid chian mad caid intacac. Ënden unësaidën intacpamboecnuc intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoid acte utsitedi nëchiuimbeneposh. Nëchiuimbeniac aidentsen intacposh. ⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmënuquidon cuesun secabudnepondash,” queshun

cuesun secanquido cuidquin mimbi aton acte intacuashu—nacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷ Aden acte dayun uaquidën chuisho tantiash Nuquin Papa tantiaquin nëish pichicate dapa yacnuëshquio utsi cuëdposh. — Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo

chuiquin mimbi aido cuidec. Adsho isun: “Mibi bēdamboshē iquec,” Papa, caimbi —queposh mayan bēda utsi.

⁸ Adnubien utsintsen ambi bedboed maspanēmpi cushtoaid badiadēn ushē bēchiuimposh. Adoaquien Nuquin Papan nami-acpadec matses baded-badedquieic ushēn pichiebudneposh.

⁹ Adec pichiebudneshumbien Nuquin Papa chushcabelededposh. —Icsauidequi icsho Nuquin Papan nuqui cuideque. Nuqui icsaid ēnash ambi chiapadec bēdamboec tabadnuna —quetiadquidēmbi chieshēnquin abi cuidquidquio Nuquin Papanbo chushcabelededposh.

¹⁰ Adnubien utsintsen ambi bedboed maspanēmpin cush-toaid chiuimbenequin acte uquēducuēsh choboed chuiquid dapa icsamboshē icquid ambi namiaidobēd tabadacno chiuimbenequin. Adoaquien inchēshposh inchēshquio yec. Badiadenquio icposh. Adsho isash matses abitedi natiambo dacuēdcuededposh. ¹¹ Adec dacuēdcuededec: —Ambi chiaid niac-niacsho Nuquin Papan nuqui cuideque. Nuqui icsaid ēnash ambi chiapadec tabadnuna —quetiadquidēmbi: —Natiambo chiuēmianec Nuquin Papa icsambo iquec —qeshun Nuquin Papa chushcabelededposh.

¹² Adnubien utsintsen ambi bedboed maspanēmpin cush-toaid acte dapa Eupēdates caid nēchiuimposh. Adoaquien Eupēdates caid acte nua icboedi nibēdquio yec uesadposh. Ma matses utsi-utsiec aton chuiquid dapabobēdi tsidadash Esus chedo cuesun secanuec ushē choacmiuēsh choquin ma potenuquin aden acte uesadmeposh.

¹³ Adec aid matses cho-choabi icnuc ushē choacmishun cho-chometequidēmpi naden ismeposhi. Coqeshbimboecquid podobitsi icsa 3tedi ana shēcuēnuēsh cho-chosho ispombi. Nēidic nisi dapabimboecquid Satanasēn ana shēcuēnuēsh choquid. Nēidic acte uquēducuēsh choboed chuiquid dapa icsamboshē icquidēn ana shēcuēnuēsh choquid. Nēidic nidaid shēcuēnuēsh choboedēn Satanasēn muauamequin oncameboedēn ana shēcuēnuēsh choquid. Aidtedi chosho isombi. ¹⁴ Satanasēn yuabo icquin comapenen tantiaquin nacnenguido niosh. Matses utsi-utsien abi chuiquid dapabobēdtabi namenuc niosh. —Aidon namiac chuiquid dapabo abitedi aton yuabobēdi tsidadash ushē choacmiuēshquio cho-choendac. Nuquin Papa chieshēnquin Esus chedo cuesun secanuec adec cho-choendac. Nuquin Papan tantiacpadēnquiobi adendac —camenuen mayan bēdan aden ismeposhi.

¹⁵ Adnubien Esusquio cuēdposh. —Tantia. Chuinu. Mimbi: “Nēbimbobi aid choec,” cacmaidquieni choendac. Ushenquio yacbimboen ēbi ēnenquio icquin tantiec: “Nēbien Esus chochitec. Choshon nuqui icsaid abitedi chuiquin cuidnushe.

Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec –queposh Esus.

¹⁶ Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanëmpi bedboed utsintsen ambembi chiinquin Nuquin Papan cuidte ënquimbi ismeposh. Ambembi chiunubien abi tabadacnuëshquio Nuquin Papa cuëdposh. –Padi. Nëbi ëmbi tantiacpadomboen ënquimbi cuidec –queposh. ¹⁸ Adnubien abu bedbedquetanepamboec abu tesquianenuec natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. ¹⁹ Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: –Anocquido icsamboshë icquido nec –quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. ²⁰ Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. ²¹ Abucuëshquio ue dapa choacbimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin Papa chushcabededposh. –Nuqui icsaid ënshun Esus tantianuna –quetiadquidëmbi chushcabededposh. – Adquido iquendac –quequin ushquin isacbimboecnuc aden ismeposhi.

17

Chido chishpidabimboecquid ismiaid

¹ Adshumbic maspanëmpin icquid chiuimboedën abentsëcshun chiuuamposhi. –Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. ² Aido icsamboshë iquec. Matses utsi-utsien abi chuiquid

dapabobëdta uisma uanten danoshcaccimboen Nuquin Papambo tantiamenquo icquin ambi chiaid niacniacmequioposh. Aido cuidsho isec cho –queposh.

³ Adshumbic ushquin isaccimboecnuc ismeposhi. Nuquin Papan Mayanën tantiamiac masiuidquo yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: –Nuquin Papa caid nibëdquo iquec –quequin uesquin dada uapaidquo icposh. Aton mapi sietetedi icnuc aton pais 10tedi icposh. –Mimbi isboed acte uquëducuësh choboed chuiquid icsamboshë icquidquo nec –quequin aden aben icquid ismeposhi. ⁴ Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquo icquid chedo payuec aibdidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquo icposh. –Chido chishpidabimboec Babidonia caid yacnocquido icsamboshë iquec. Uisma uanten danoshcaccimboen: “Nuquin Papa caid nibëdquiec,” quequin tantiamequin matses utsibo dadpenquo icsamequiendac –camenuen aden ismeposhi. ⁵ Adshun isquien aid chido abi tantiamete abi cuëmëdquid bëtanteteno bëdada uadac. –Babidonia yacnocquido bëdambo icquido damianquidi icsamboen tabadmequido nec –quequin dada uaid icposh. ⁶ Aid chido paëmbo icquid acaccimboec Esus tantiaquidon intac acash tantiadenquo yamposh. –Babidonia caid yacnocquidon Esus tantiaquido dadpen cuesun secaindac –quequin tantiamenuen aden ismeposhi. Dacuëdampamboecsho isash: –¿Mitsipadquiopequini ique? –quebudquiobi.

⁷ Adbudquioshobini aid mayan bëdan: –“Tantiadenquo iquec,” ¿quecta ique? Tantia. Chido chishpidabëdta abi catsadaid aben icquid chuinu. ⁸ Mimbi isboed aben icquid icsamboshë icquid ictenedi nëbi nibëdec. Yuecshun Satanasën abi tabadacnoshon padpiden chomendac. Adoacsho yuecshun Nuquin Papan chian anëdënquiacono nësecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdai uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquo adoendac –queposh mayan bëda.

⁹ Adshumbic padpiden chuiposhi. –Tantia. Ëmbi chuiboed bëdamboen tantiamenuen chuinu. Naden tantiamenuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi

iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰ Aid chuiquid dapabo 5tedi nibëdnubi utsi abi iquec. Nëbi aidën aton matses namec. Utsitsen choendac. Choshon aton matses nametantsequi badedquo nibëdanendac. ¹¹ Nibëdanëdaidi choashic ëmbi ismeboed acte uquëducuësh choboed chuiquid dapa icsamboshë icquidquo iquendac. Aidën ëmbi chui-boedo chuiquid dapabo 7tedishun namiacbimboen aton matses icsamboenshë namendac. Adoacsho isun Nuquin Papan icsaido cuidquiacno nësecaindac —queposh mayan bëda.

¹² Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquo nibëdanendac. ¹³ Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquo icnuc,” qeshun aden icsamboshë icquid abi chuiquid dapa icmendac. ¹⁴ Aden Esus chieshënquidon: “Chieshtomenu,” cac Esusën yuaido abi tantiaquidotedi chieshtoenquo iquendac. Aton Icho Esusën abided cuidadec unësaidën namiac chieshtoenquo iquendac. Aden abi tantiaquidobëdta chieshënquin cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

¹⁵ Adashic padpidec: —“Nidaid utsi-utsiec yacno tabadquido dadpenquo Babidonia caid yacnocquidon icsamendac,” quequin tantiamenuen chido chishpid-abimboecquid acte dapa bëntse tsadsho mibi ismiombi. ¹⁶ Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënendac. Aden chieshënquin cuesun secatanquin shububëdtabi nëdëncaindac nibëdquiecnuc. ¹⁷ “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. ¹⁸ “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

18

Nuquin Papan Babidonia caid yacnocquido cuidaid

1 Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. 2 Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac. 3 Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenquio icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bëdabon chuiposhi. 4 Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —quesho tantiombi. 5 Nuquin Papa yacnoshombidi utsin chuiposh. —Ënëdenquio yec icsauidequi icsho isun ambi tantiacpadomboen Nuquin Papan cuidquiendac. 6 Babidonia caid yacnocquidon matses utsibo dadpenquio icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. 7 Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquio bedash: “Aidtedi dayun uaic bëdambo iquebi,” quepec Nuquin Papan cuidte tantienquio yequi. Adsho tantiaashun: “Natiambo icnuc comapenen cuidquiopashun,” caimbi. Otacquio tantiec: “Nuquin matses yuabo dadpen icnuc nuqui bëdamboec tabadec. Chido niante bënë unësaid mëyadac bimboec mëyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. 8 Adsho ambi: “Nëbi ëbi cuidec,” cacmaidënquio cuidendac. Nuquin Papanquio abitedishun Icbombo icquin comapenen tantiaquin nacnenquidquio icquin badedquio cuidquiendac. Aden dadpenquio unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquio nëdënquendac —queposh mayan bëda.

9 Adashic abi onquec: —Adec Babidonia yacnuësh nëdënquec pushudtonesho isash: “Aidon namiacpadomboen Nuquin Papa tantienquio icquin con na dadpen bedtenembi,” quequin chuiquid dapabon nadambocain

sedencabededendac. ¹⁰ “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquo icpadenec. Ambi dayun uaid dadpenquo icpadenec. Matses utsibo dadpen namepadenec. Aido tantiac unësquimboshë iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec —queposh mayan bëda.

¹¹ Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiec. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac. ¹² Aidobidi: “Nadquid Babidonia caid yacnocquido menequin piucquid dadpen bedtenembi. Nëidic shocosh piu. Nëidic shocoshquo. Nëidic casëdubimboecquid cuënote bëdambo icquid. Nëidic dashcute bëdambo icquid. Nëidic dashcute piumbo icquid. Nëidic dashcute umumbo icquid. Nëidic sëntebimboecquid nacnenaid. Nëidic aben icquid edepanten shëta nacnenaid. Nëidic cuëte utsi bëdaidquo nacnenaid. Nëidic shocosh utsi nacnenaid. Nëidic cuënote nac-nacquo icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³ Utsitsen dadpen bedpadenec. Nëidic batambo icquid sabimboecquid. Nëidic bëdambo nuadte. Nëidic bëdambo nuadec danoshquete. Nëidic acte paëmbo icquid. Nëidic bëchi. Nëidic pan nacnentequid. Nëidic nëish yua baca caid. Nëidic nëish yua utsi obeca caid. Nëidic nëish yua cabayo caid. Nëidic matses antsadsho cabayon nimbanquin buante. Nëidic ambi chonua uatequido matses ambi ampequin bedaido dadpen. Babidonia caid yacnocquidon aidtedi dadpenquo bedtenesho aton piucquid dadpen bedpadenembi,” quependac nidaid utsi-utsiec yacno tabadquido —queposh mayan bëda.

¹⁴ Adashic abi onquec: —Abi piucquid menedenedën dayun uaid nibëdanesho isash: “Aid matses bunaidquo ambi dayun uaid pete nibëdquiec. Ambi dayun uaid dashcute bëdambo icquidbëd aton na utsi dadpen abitedi nibëdquiec,” ¹⁵ quiash natiambo dacuëdec uanoshon isec tabadec sedenquecuededendac abi piucquid menedenedo tantiec. ¹⁶ “Aid matses tantiac unësquimboshë iquec. Matses dadpen yuaquin matses dadpen namepadenec. Aton matses dashcute bëdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casëdubimboecquid shocosh piu nacnenaid payudenec. Utsibic casëdubimboecquid utsi payuec

mësiuidtenec. Adec: ‘Con na dadpenquo icnuc bëdamboec tabadebi,’ quepadenec Babidonia caid yacnocquido. ¹⁷ Adsho isun Nuquin Papan abi ushëmbi cuidquiac ambi dayun uaidbëd aid matses badedquio nibëdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nëidic cano dapa dancha icbo. Nëidic dancha icbobëd nidquido aton yuabo. Nëidic icbo piucquid meniash dancha antabëdtoquido. Nëidic nuëcquid bedshun piucquid bednuen menequido. Aidtedi uanoshon isec sedenquecuededendac. ¹⁸ Nëdënquec pushudtonesho uanoshon isash: “Adquido utsi nibëdec,” ¹⁹ quiash natiaquiec sedenquecuededendac. Adec shubiec: “Ëbipadquid dancha icbon bëaidtedi bedshun piucquid dadpen menedenedo tantiac unësquimboshë iquec. Is. Cuidquiac badedquio nibëdanaque,” quec sedenquecuededendac —queposh mayan bëda.

²⁰ Adashic mayan bëdabidi: —Ëbien cuishonquendac. “Nuquin Papa yacno tabadquidotsen ëbëdi cuishonque,” quequin chiendambi. Esus tantiaquido chuiquinc Esusbëd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshënquin natiamiacpadomboen mibi chieshënquido Nuquin Papan uesquin cuidquioshe,” quequin chiendambi —queposh mayan bëda.

²¹ Adnubien mayan bëda utsin uidënquo icquidënquo nidaid moco nuacquid dapa yuëmboshë icquid cadotanquin acquimboen acte nënebidanquimbi chuiposh. —Ëmbi acquimboen nënebocpadomboen Nuquin Papan Babidonia caid yacnocquido uesquin cuidquiendac nibëdquiecnuc. ²² Adoac aido ictenecnombo nadimbo iquendac. Ten-tencate tencainquo iquendac. Utsibobic cuëdënenquo iquendac. Utsibobic shoncate shoncainquo iquendac. Cuëte chëshun nacnenenquo iquendac. Piacbo macuesenquo iquendac. Nadimboshë iquendac. ²³ Tabote taboadaid nibëdendac. Dada aton chido ambi nëbi bedaidbëdi mamënenquo iquendac. Nibëdec. Nadimboshë iquendac. Adsho isash ut-sibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec,” quendac. ²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin

cuidquiendac —queposh mayan bëda.

19

Chieshënquido cuidacsho isash cuishonquiaid

¹ Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquio Esus tantiaquido dadpenquioshë comapenec cuëdëncuededposh.

—Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

² Muesambo icquin ambi chiacpadomboen naquidquio nec.

Abi tantiesabo ënëdenquio yec icsauidequi icsho cuidquidquio nec.

Adquid icquin: “Icsamboshë iquec,” quequin matses utsibo icsamequido Babidonia caid yacnocquido cuidquiosh.

Nuquipadquid Esus tantiaquido cuesun secacsho isun cuidquioposh

—quec cuëdëncuededposh.

³ Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncuquin Babidonia caid yacnocquido uesquin cuidquioshë

—quec cuëdëncuededposh Esus tantiaquido dadpenquioshë.

⁴ Adsho tantiash Nuquin Papa chuiquid dapan tsadten tsadnuc abi dacuenadec tabadquido: —Nuquin Papa Nuquin Icbo nec —quequin ismenuec danëshën tinquebudcuededposh.

Adec tinquebudcuededequi: —Abimbo caic. Nuquin Papa bëdambo iquec —quecuededposh dadanobi ëshëcquido 4tedi icquido tsusiobo 24tedi icquidobëdi. ⁵ Adashic auëshquiobidi abentsëc cuëdposh.

—Nuquin Papa matses uaquidquio yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun:

“Nuquin Papa bëdambo iquec,” canuna

—queposh.

Esusën abi tantiaquido beduante chiaid

⁶ Adsho tantiash abu tesquianiacbimboec acte nua chododoquiacbimboec Nuquin Papa yacnocquido dadpenquio cuëdëncuededposh.

—Abi chieshënidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquo beduanacimboen abided cuidadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiabimboec:

“Nëbien con Icho chochitec,”

quiash Esus tantiaquido bëdamboec tabadec.

⁸ Abi tantiasho Nuquin Papan bëdamboen isaido yec abi icsaid ënash:

“Nëen con Icho chochitec,” quiash bëdamboec tabadec.

Aden abi tantiasho Esusën dashcute chuca ushumbo icquid dasiunacimboen abitedi icsaisa icmendac

—quec comapenec cuëdëncuededposh.

⁹ Adnubi mayan bëdan chuioposhi. —Ëmbi chuibocpadomboen dada uata. “Isadaidbo aton chido bedquin aton matses cho-chomiash pemec bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaidquo chiec nebi —queposh mayan bëda.

¹⁰ Adsho tantiashini Nuquin Icho danec ismenuc danëshën tinqebuduidpoc. Adshobini: —Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

Cabayo ushu catsadquid bëdamboshë icquid

¹¹ Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëdtiapimbo icquid yec ambi chiacpadomboen naquidquo Esusquo nec —quequin tantiombi. Ambi chiacpadomboen icsaido cuidquidquo icquin icsaido cuesun secanuec niosh. ¹² —Matsesën ompodëmëdtiapimbo icquidquo nec —camenuc cuëte isquidquo icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bëdada uadaid tantiadenquo icposh. Utsibon tantiatiapimbo icnuc ambentsëqui tantiante niosh. —Nuquin Papabëdtan Esusën naidtedimbo matsesën tantiatiapimbo iquec —camenuc adec bëdada uadaid

ismeposhi. ¹³ Abi cuëmëdquid utsiembi tantiatsëccoc. —Nuquin Papapadquidquio yec abi tantiamianquid nec —quequin cuënaid niosh. Aton dashcute bëntse icquid cuidaidën intaquën punacbimboec piumboshë isadposh. —Abi tantiesabo cuidquidquio nec —camenuen aden ismeposhi. ¹⁴ Esus bëyuc nidnuc abi tsibanec abi tantiaquidobëd mayan bëdabo cabayo ushucquiduidquio catsadcuededec cho-choposh. Icsaisa icmiaido yec dashcute ushumbo icquid bëchish nibëdquidquio dasiuidcuededposh. ¹⁵ Abi bëyucquid ana shëcuënuëshquio chështe cuënumbo icquid cueshqueposh. —Ambi chiacpadomboen matses icsaido abitedi cuidquidquio Esus nec —camenuen aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ënë icnuc tish-tishacbimboen nua intac icnuc cuesun secaindac. ¹⁶ Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bësudquid yacnombo adembidi dada uaccosh.

¹⁷ Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuiposh. —Nuquin Papan cuidquin cuesun secaidon nami chec cho-cho. ¹⁸ Ëmbi chiacpadec cho-choshon matsesën nami mimbì nua tēpuisquin chendac nēidtedi. Nēidic matses utsi-utsien chuiquid dapabo. Nēidic sondado chuiquid dapabo. Nēidic dada cuesabo. Nēidic cabayo chedo abi catsadquidobëdtabi. Nēidic matses utsibo abitedimbo. Nēidic matses yuabo. Nēidic matses yuapenquio. Nēidic bacuëbo. Nēidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui ²⁰ cuesun secadenquio icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiaidtsen bedposh. Aid comapenen tantiaquin ismequin muaquin abi chuiquid

dapan icsamboshë icquidën chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. ²¹ Adshumbic Esusën ana shëcuënuësh chështe cuënumbo icquid cueshquequidën: —Ëbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

20

Satanas uidën uaid

¹ Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaïd dapa sanamposh. ² Adshumbic Eba icsamenuec nisipampid Satanasquio bedposh. Bedtanquimbic shocosh bucubimboecnuc nacnenaïdën ambi sanamboedën uidën uaposh. ³ Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh puduentiapimbo icnuc. Seta dadpenquio 1000tedi matameshun bëtashte chicshun Satanas cuenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquëc —queshun chicten bidiacquin uidën uaquipoposh. Aden ismeposhi.

⁴ Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aïdo Nuquin Papan icmiacpadquid abimbo chuiquido icquin Esusbëdtambi matsesën naïd abimbo chuïbamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aïdo utsi-utsien mapi butiaïdo uincuemiaïdo neposh. Aïdo Esus tantiaquin acte uquëducuësh choboed chuiquid dapabëdta abibimboecnuc nacnenaïd tantiapimbo icquido neposh. Adecbidi: —Aïdën yua nebi —quëc aïd chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaïdo niosh. Aïdo Nuquin Papan uincuemiac tabadposh. ⁵ Unësaïdotedi uincuemiambo icposh. Nuquin Papan ambi tantiactedï tauaquin

uincuemeposh. —Seta 1000tedi matameshun utsibo abitedi uincuemendambi —quequin adoposh. ⁶ Adnubien tauaquin uincuemiaido bédambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “ ‘Esusbéd Nuquin Papa bédamboshê iquec,’ canuna,” quequin chianequid nendac. Aid seta 1000tedi matamequin Esusbédambi utsibo bédamboen namequid nendac —quequin aden ismeposhi.

Satanasquio chian anëdënquequid nëniaid

⁷ Adshumbic aitedquio seta 1000tedi matameshun uidën uaid chicquin Satanas cuemendac. ⁸ Adoaquien matses icsamenuec muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëdic nidaid Coc caid yacnocquido. Nëdic nidaid utsi Macoc caid yacnocquido. Nëdic matses utsibo abitedi cuête podotedi dadpenquioshê.

⁹ Aidedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. ¹⁰ Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshê icquidbêdta nidaid shëcuënuësh chondaid ënden nësecaondacnombo chian anëdënquequid Satanastsen nënendac. Adoac aido ënëdenquio yec natiamboshê iquendac. Aden ismeposhi.

Icsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshê icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuc adec tsadposh. Icsambo icquido cuidquidquio yec dacuëdampamboecshê Nuquin Papa isadnuc abubêdi nidaid abichobi nibëdanaccosh padpidec isadtiapimbo yec. ¹² Nuquin Papa yacno unësaïdo uincuemiaido abitedimbo tabadposh. Adnubien bëshunenquio icquin dada uaten dada uabanacimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abêdi tabadmequimbi abi tantiesabo comapenen cuidnun aden chuibamposh. ¹³ Unësaïdo abitedi icposh. Utsi-utsiec unësaïsho chian dapa mad caid nëniaïdo uincuemiaïdo nïosh. Utsi-utsiec nidaidën chococaid uincuemiaïdo nïosh. Adsho aidon naidtedi Nuquin Papan chuibamposh. ¹⁴⁻¹⁵ Adshumbic Esus tantiesabo icsho documento nibëdquidbimboecsho abi yacno tabadmenquio icquin

chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unëstiapimbo icquiduidquio icposh. — Adquid iquendac —quequin aden ismeposhi.

21

Nuquin Papabëd tabadaidquio

¹ —Esus tantiesabo chian anëdënquequid nësecaindac — quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquiduidquio icposh. Ënden iccondaïd chian dapa mad caïdtsen nibëdposh. ² Adnubien Esusbëdi Nuquin Papa tabadaidquio abichobi Edusaden chuca caïd abucuësh budposh. Chïdo nëbi bedboedën aton bënë cuishoncamiacbimboec cuishoncamianquid yec bëdamboshë icposh. ³ Adnubien Nuquin Papa tsadacnuëshquio comapenec cuëdposh naden chiec. —“Con matses nec,” quiash nëbi Nuquin Papa matsëbëdi tabadendac cuëshëdenquio yec. Adsho isun aton yuabo icquin matses abitedishun: “Nuquin Icbombo nuqui tantiaidquio nec,” caïndac. ⁴ Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacbimboec. Nidaid shënin tabadec abitedi unëstequiduidquio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiposh. —Ëmbi aden chuiboed dada uata. Ëmbi muesambo icquin abimbo chiaïd nec —queposh Nuquin Papa Esusbëdi.

⁶ Adashic Nuquin Papa padpidec onquec: —Ëmbi chuiboctedimbo nainquin naindambi utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacbimboec ëbëd tabadte bunquidon con Mado Esus tantiasho ëbëdi tabadmendambi. ⁷ Satanasën: “Chieshtomenu,” cauidaïdo Esusbëdta ëbi chieshtoenquio icquin tantiaquido ëbëdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi

mibi nec,” caindambi. ⁸ Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsëc tanti-aidtsëcboedobi chieshëmënquidon: “Cuesnu,” cac chieshtoash tantiesa yanoaido. Nëidic Esus tantiesabo abitedi. Nëidic icsamianquido. Nëidic chieshëmë nec cuesunianquido. Nëidic dada aton dada utsibëdi chichudnanquido. Nëidic aton chidopenquo chudquido. Nëidic aton bënëpenquo chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindambi —queposh Nuquin Papa.

Abi tantiaquido Esusbëd icte chiaid

⁹ Adnubien mayan bëdan Nuquin Papan matses cuidte cushtoaid chiuimboed abentsëc choshon chuioaposhi. — Isec cho. Chido nëbi bedboedën aton bënë cuishoncami-acbimboen abided cuidadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen. ¹⁰ Adshumbic Nuquin Papan Mayanën tantiamiac ushquin isacbimboen isombi. Mayan bëdan ëbi buanquin ispombi. Aden buanshun macuësh dapa mananënquo tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen icquid budposh. Aid tabadaid Edusaden chuca caposh. ¹¹ Aid tabadaidquo aid shubutedi Nuquin Papa tabadaid yec abi yacpadquo abichobi bëchamauanquiecposh. Casëdu bëdambo icquidbimboec isquid-isquidquo isadposh. ¹² Shubu abitedi nënantan icnuc abichobi daquënë uaid icposh. Abucquo icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. ¹³ Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aidtedbidi shëcuë icoaposh. Ushë nibëdaucbidi sud yauc aidtedbidi shëcuë icposh. Ushë budauc aidtedbidi shëcuë icposh. ¹⁴ Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh.

Adenuidi cuënoten cuënotenquien Esusbëd icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

15 Adshumbic ëbi chuiboedën mayan bëdan shocosh bëdaidquio nacnenaïd tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh. 16 Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh. 17 Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaïd tambanten tanac metedos 65ted cactiombi icposh nuamboshë bitsipambo.

18 Daquënë uaid abichobi isquid-isquidquio isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenaïduidquio yec nac-nacquio icposh. 19 Aid daquënë uaqin tauaquin sandoaid nidaid cuënote dapa casëdubimboecquid bëdambo icquid matses comapenec bunaidquio utsi-utsien dabitaccabanaïd niosh. Abentsëc aspe caïd umu-umumboctsëcquid dabitaccabampaccosh. Utsibic sapido caïd umumbo icquid dabitaccabampaccosh. Utsibic acata caïd ushumbo icquid. Utsibic esmedada caïd umumbo icquid utsi. 20 Utsibic onise caïd piumbo icquid. Utsibic conadina caïd piu-piupactsëcquid. Utsibic quidisodito caïd bëshpiu-bëshpiupactsëcquid. Utsibic bedido caïd umu-umupactsëcquid utsi. Utsibic topasio caïd piu-piupactsëcquid utsi. Utsibic quidisopadasa caïd nushan-nushanacbitsecquid. Utsibic asinto caïd umumbo icquid utsi. Utsibic amatista caïd umumbo icquidbidi. Aidtedi dabitaccabanaccosh. —Nuquin Papa yacnombo bëdamboshë iquendac —camenuen aden ismeposhi. 21 Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu uaid nuacquid dapambo abichobi-abichobien nacnenaïd niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsëcquid acte-actectsëcquio icnuc mabiunaïd icposh. —Esusbëd Nuquin Papa tabadacnombo bëdambo icquiduidquio iquendac —camenuen aden ismeposhi.

22 Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icbo Esus abided cuidadec unësaidbëd Nuquin Papa icsho bëisquioquin tantiec anocquido tabadendac. 23 Ambobidi inchështanec badiadenquoio iquendac. Badiadën ushë isadenquoio iquendac. Inchëshën ushëtsen isadenquoio iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquieccquid icquin ambo ushëmbouidi icmendac. Inchëshaid tantiadenquoio iquendac. —Nuquin Papa icsaisambo icnuc abi yacno icsaido nibëdquoio iquendac —camenuen aden ismeposhi. 24 Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenene tabadcuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac. 25 Nuquin Papa matsesbëdi tabadacnombo inchëshenquoio icnuc: —Icsambo icquido puduednushe. Bëdashnu —quetiapimbo icsho isun daquënë uaid shëcuë bëtashenquoio iquendac. Shëcniacchobi iquendac. 26 Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquoio yec abitedishun Icbombo nec. Abipadquid utsi nibëdec —quendac abitedi. 27 Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquoio icquin dada uacbimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquoio bëdamboshëuidquoio iquendac —quequin aden ismeposhi mayan bëdan.

22

Nuquin Papa yacno acte ismiaid

1 Adshumbic aid mayan bëdan padpiden ismeoaposhi. Adoac Nuquin Papa abided cuidadec unësaid aton Madobëdquoio tsadte dapan tabadacnuësh matses unëstiapimbo icmetequad acte bëdambo icquid nushan nibëdquidquoio chëuëdsho ispombi. 2 Nuquin Papa yacnuëshquoio choec chëuëdec ambo tabadquido Esus tantiaquido tabadaid shubu nënantanquoio chëuëdposh. Aid cuëmambi matses unëstiapimbo icmetequad cuëtetsen

icposh. Baded-badedquiec bacuëquidquio niosh. Inchëshën ushë choan-choanquiec badedquio bacuëquid niosh. Aid cuëte podo nidaid utsi-utsiec yacno tabadquido bëdambo icmetequid niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. ³ Aden abitedi bëdambo icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadacnoshon aid daëdi tantiaquiec Esus tantiaquido tabadendac. ⁴ Adec: —Con bacuëbo nec —quequin Nuquin Papan abi cuëmëdquid dada uaquin bësiaidon Nuquin Papambo bëisquiec tabadendac. —Nidaidën tabadec bëdamboec tabadquido Nuquin Papabëd tabadec abipadquio bëdamboshë yanendac —camenuen aden ismeposhi. ⁵ Ambo bëdambouidquio yec inchëshenquio iquendac. Nuquin Papa bëchamauanquiecquidëmbi ushëmbouidquio iquendac inchëshaid tantiadenquio yec. —Aden abi tantiaquido bëdamboen isquin ënenquio icquin bëdamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶ Adshumbic mayan bëdan chuioaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

Esus chote chiaid

⁷ Adnubini Esusënquio naden chuiposh. —Chieshtoenquio icquin ëbi tantiaata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaguini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec. ⁹ Adshobini: —Padi. Aden ëbi ismenda. Mibi-padquid Nuquin Papan yuabidi nebique. Èndenquimboshë Nuquin Papan tantiamiac min tsusedpabo isadaidbon ambi chiaidquio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi

nec. Adquidbidi nebi aton yuambo. Nuquin Papauidtsëqui tantiaquin aden ismeta –caposhi mayan bëdan.

¹⁰ Adashic padpidec: –Ëmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquoio icquin Esus tantiec ma tabadnu,” queshun dada uata. ¹¹ Nëbimbobi Esus chonoc Esus tantiesabo badedquoio bëdamboec tabadcuentiapimbo iquendac. Abi icsaid badedquoio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun –queposh mayan bëda.

¹² Adnubini Esusën chuioaposh. –Chieshtoenquoio icquin ëbi tantiata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. ¹³ Nuquin Papapadquidquoio nebi. Ëmbi tantiacmaid nibëdnuc abitedi comapenen tantiaquidquoio nebi. Nidaid uabi yec ictenedi nëbi adquidquoio yec nibëdantiapimbo icquid nebi. Adquid yec abitedishun Icbombo nebi.

¹⁴ Icsambo ichoedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacimboen. ¹⁵ Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquoio chudquido. Nëidic aton bënëpenquoio chudmequido. Nëidic cuesanquido. Nëidic papa quequin ambi nacnenaidi tantiaquido. Nëidic abi bunaiduidquoio naic muauanquido. Aidtedi Nuquin Papa yacno puduedtiapimbo iquendac.

¹⁶ Ëmbi chiacpadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquoio nebi. Utsin: “Dëniacnu,” cadtiapimbo icquid nebi. Adquid icquin matses abitedimbo namendambi –quequin chuiposhi Esusën.

¹⁷ Adsho tantiashun Nuquin Papan Mayanën tantiamiacpadomboen chuiquin: –Nëbimbobi Esus chonoshe. Aidquoio tantiabenta –caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: –Nëbimbobi chonoshe. Aidquoio tantianuna –cac bëdambo ictsiashe. Adsho tantiash Esus tantiesabo acte bunachimboec Esus tantiate

bunsho Nuquin Papan bēdamboen isendac. Nuquin Papa bēdamboen ismenuen menete nibēdnuc Esusuidi tantiaho Nuquin Papan bēdamboen isquin abēdi tabadmendac.

¹⁸ Tanta. Ęmbi chuiboed tantiaquido chuinu. Nuquin Papan: –Nadquid iquendac. Yucash utsi iquendac –quequin ěbi ismeboedtedi dada uaombi. Ęmbi dada uaboed tsitēnquin ambembi chiaid dada uainda. Ęmbi chuibocpadomboen Nuquin Papan mibi cuidtsiashe. ¹⁹ Adembidi ěmbi dada uaboed utsi uainquo icquin abimbo chuita. Ęmbi chuibocpadomboen Nuquin Papan mibi unēstiapimbo icquid icmenquo ictsiashe. Adembidi bēdamboshē yacno abēdi mibi tabadmenquo ictsiashe.

²⁰ –Ma aidtedi tantianu –quequin Esusën chiacpadomboen mayan bēdan aidtedi ismeposhi. Ęmbi chuibocpadomboen Esusën: –Nēbimbobini choendac –caposhi. Adsho tantiaho: –Ai, nēbimbobi chota –capombi.

²¹ Mibitedi Esus tantiaquidotedi tantiaquin: –Ambi nabocpadomboen Nuquin Icho Esusën bēdamboen isquin bēdambo icmepashun –caimbi. Padi. Aidtedi chuiquin dada uaombi.